


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
23f9fc55-a8a4-59ef-9513-707ec336b0ee

Contents

Mahte	1
Markuq	61
Lukaq	99
Yohan	163
Lagyo	211
Romaq	268
1 Korinhтуq	294
2 Korinhтуq	319
Galatiq	336
Ehpesu	345
Hpilipi	354
Kolose	360
1 Htesaloni	366
2 Htesaloni	372
1 Timohti	375
2 Timohti	382
Tituq	387
Hpilemon	390
Hebre	392
Yakuq	411
1 Petruq	418
2 Petruq	425
1 Yohan	430
2 Yohan	437
3 Yohan	438
Yude	439
Shing-rân	442

MAHTE é Gabú Danglù Laiká (The Gospel of Matthew)

Yesuq É Byùxik Shap Kyô É Hkyô
Luk 3:23-38

¹ Abraham é awut ashín, Dawiq é yangzozo yangshu,* Yesuq Hkrisduq é byùxik labaù gi, a-ô mâ é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yanggu yangmâng pé lé hku é nghut lhê;

³ Yudaq gi, Hparet eq Zera lé hkû, haù nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohlâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yangmyi dut wú sú nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut hui é hkûn, Yehkoniaq eq yanggu yangmâng pé lé hku é nghut ri.

¹² Babelon má shúm dut hui é htáng má,

Yehkoniaq gi, Shalahtila lé hkû;

Shalahtila gi, Zerubelaq lé hkû;

¹³ Zerubelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

* **1:1** Awut ashín eq yangzozo yangshu gâ é lé, Chyúmdang ra-am má, "yangzozo" ga le bo tô lhê.

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mã é eq rajung za nghut ri: Yesuq é yhangnu Mariq gi, Yosep èq dúng tô é sù nghut ri; nghut kôlhang, yangnhik a zùm shi má, yang gi, Chyoiyúng Woi-nyí mai zogúng dut bê nghut ri. ¹⁹ Yhâng é yhumsing hpó Yosep gi, dúngmân sù nghut luí, yang lé byu pé hí má hoq a kâm lhoq hpu nau é yanmai, tsik za lhoq kâng pyám rà dà ri.

²⁰ Nghut kôlhang, yang haû su myit nyi é hkûn, yhupmoq má, haû Yhumsing é maumang lagyo gi, yang lé, lé htoq shit luí, "Dawiq é yangzo yangshu Yosep é, haû náng é yhumsing myhí Mariq lé hâng yù rà hkyô lé, hkâ-myt chiq; haí mù gâ le, yang wun tô é zoshâng gùng gi, Chyoiyúng Woi-nyí dông lo é nghut lhê. ²¹ Yang gi, yuqzo rayuq hkú rà nghut luí, náng gi, zoshâng haú lé, Yesuq nghû mying myhíng byí ra rà nghut lhê; hkâsu mù gâ le, Yang gi, Yhâng é byu pé lé, yangmoq é yubak mara mai hkyi yù rà sù nghut lhê." ga tai ri.

²² Shí hkyô banshoq gi, Garai Gasâng èq, haû myiqhtoi dông tai é dang lé lhoq dik é nghut ri. ²³ Myiqhtoi dang haû gi, "Haû zomyi gyíng gi, zogúng dut luí, yuqzo rayuq hkú rà nghut lhê; Yhâng é mying lé gi, Emanuelaq ga kó rà nghut lhê."* gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

²⁴ Yosep gi, yhup bún lo é hkûn, haû Yhumsing é maumang lagyo tai é eq rajung za, Mariq lé, yangmyi dông yhúm má shuí yù bê nghut ri. ²⁵ Nghut kôlhang, yang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yang gi, Yesuq ga myhíng byí ri.

2

Buihtoq Hkyam Mã É Hpaqchyí Bò Bang

¹ Herut hkohkâm up nyi é u lé, Yuda mau mã é Betlehem wà mã Yesuq lé hku é nghut ri. Hau htâng, buihtoq hkyam mã é hpaqchyí bò bang gi, Yerusalem wà mó má jé lé kômù, ² "Haû hku lé lô bê Yudaq byu pé é Hkohkâm gi, hkâmá nghut lhê lú? Yhâng é kyí lé, buihtoq hkyam mã ngamoq myàng luí, Yang lé noq rà matú jé lé é nghut lhê." ga luí, myí akò nghut ri.

³ Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhang bang le, myit myô bum akò nghut ri.

† 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê. * 1:23 Esai 7:14

4 Haù mù luí, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haù Hkrisduq hkâmá hku lé lô rá nghut é hkyô lé myí ri.

5 Haù hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haù myiqhtoi kâ tô é má,

6 Yudaq mau má é Betlehem wà ê, nàng gi, Yudaq mau má é wà pé má, je tiq sù a nghut;

hkâsu mù gâ le, ngá é Israelaq byu pé lé upzúng rá Zau gi, náng chyáng mai htoq lô rá nghut lhê.[✧]
ga bo tô ri." ga tù tai akô.

7 Hau htâng, Herut gi, haù hpaqchyí bò bang lé haq ji yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri. 8 Haù mù, yhang gi, "Nungmoq, zoshâng haù lé rago é ho wú keq. Ngò le, Yhang lé é wó noq rá matú, Yhang lé nungmoq é myâng eq yhang, ngo lé lo shit kyo keq." ga tai luí, haù bang lé Betlehem wà shut nhang kat bê nghut ri.

9 Yhangmoq gi, haù hkohkam é dang lé gyô yu é htâng má, htoq e ló bekô nghut ri. Haù buihotoq hkyam má yhangmoq myang é kyí gi, haù zonú nyi é ahtog ang ang má ló nô é jé shoq, yhangmoq é hí má é ló byí ri. 10 Yhangmoq gi, kyí haù lé myàng jáng, gyai yhang gabú bum akô nghut ri. 11 Yhangmoq gi, haù yhùm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haù zonú lé noqkuq akô; hau htâng, yhangmoq é sùtdek pé lé le hpóng luí, hîng, namngón jung loban eq mura* pé lé yù mù, Yhang lé chyunghuq byí akô nghut ri. 12 Yhangmoq gi, Herut chyáng a dum taù lô rá matú, yhupmoq má, yhangmoq lé sidiq byí é hui kômù, hkyô gó hkat dông yhangmoq é mau shut taù lô bekô nghut ri.

Egutuq Ming Shut H pang E É Hkyô

13 Yhangmoq ló byuq é htâng má, haù Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haù zoshâng eq yhângnu lé, Egutuq ming shut shuí hpang ê aq. Ngò, nang lé dum ji yu é ahkyíng jé shoq, haù má nyi nyi keq. Haù mù gâ le, Herut gi, zoshâng haù lé sat rá matú, ho nyi bê nghut ri." ga tai ri.

14 Haù mù, yhang gi, toq luí, myín lé yhang, zôshang me lé shuí chùng mù, Egutuq ming shut e ló bê nghut ri. 15 Yhangmoq gi, Herut shi é jé shoq, haù má nyi nyi akô. Haù gi, "Ngá zo lé, ngò, Egutuq ming mai wut htoq yù bê nghut lhê."[✧] ga, haù Yhumsing èq myiqhtoi dông tai é dang lé lhoq dik é ru nghut lhê.

16 Herut gi, yhang lé, hpaqchyí bò bâng èq mhaù pyâm tô é lé sé jáng, nhikmo-yo bê nghut ri; haù mù, yhang gi, haù hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm má é wà pé má nyi é, í zân mai a-ô má é yuqzo pé banshoq lé, sat pyám nhang ri. 17 Haù gi,

"Ramaq gâ é jowò má, yón kuq é eq ngau garû é htê lé wó gyô ri; Rahkelaq gi, yhang zô pé a nyi byuq lo kô é yanmai, ngau nyi é eq nhik a wó tíng dut ri."[✧]

ga luí, 18 myiqhtoi Yeremiaq dông tai tô é dang lé lhoq dik é nghut ri.

Nazaret Wà Má Dum Taù Lo É Hkyô

✧ 2:6 Mihka 5:2 * 2:11 Mura gi, chí wó kut jung xù nghut lhê. ✧ 2:15 Hos 11:1 ✧ 2:17 Yer 31:15

¹⁹ Herut shi byuq é htâng, Egutuq ming má, haù Yhumsing é maumang lagyo gi, Yosep chyáng yhupmoq dông lé htoq shit mù, ²⁰ "Toq aq, haù zôshang me lé shuí chùng mù, Israelaq ming má taù ló aq; hkâsu mù gà le, haù zoshâng lé sat naù bang shi byuq bekô nghut ri." ga tai ri.

²¹ Haù mù, Yosep gi, zôshang me lé shuí chùng mù, Israelaq ming shut taù ló bê nghut ri. ²² Nghut kôlhâng, yhang gi, Yuda mau má, Arhkela-uq, yhângwa Herut é hkô má xoq up nyi é hkyô lé wó gyo jâng, haù má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù, ²³ Nazaret gà é wà má ló nyi nyi bê nghut ri. Haù mù, "Yhang lé, Nazaret wà byù ga râ nghut lhê." ga lui, haù myiqhtoì pé dông tai tô é dang lé lhoq dik é nghut ri.

3

Wui-myhup Sará Yohan Shui Hen É Hkyô *Mrk 1:1-8; Luk 3:1-18; Yhn 1:19-28*

¹ Haù yoq má, Wui-myhup Sará Yohan htoq ló mù, Yuda mau má é yoso má hko kyô é gi, ² "Myit lhing keq; hkâsu mù gà le, mauhkúng mingdán gi, chyâng lò bê* nghut ri." gà ri. ³ Haù yuq gi, "Haù yoso má, byù rayuq garù tai é htê gi, 'Haù Yhumsing é matú, hkyô hen to keq; Yhâng é matú, hkyô lhoq nyhang to keq.' gà ri."*

ga myiqhtoì Esai-aq tai tô é sù yuq nghut ri.

⁴ Yohan gi, gola-uq shomaù eq sai é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosò byo-í pé nghut ri. ⁵ Yerusalem wà mó má é bang, Yuda mau banshoq má é bang eq Yodan làng awui ayám lhunglháng má é bang gi, yhâng chyáng htoq e bum akô. ⁶ Yhangmoq gi, yhumsing é mara lé yín yù kôlui, yhâng chyáng mai Yodan làng má wui-myhup hkám yu bum akô nghut ri.

⁷ Nghut kôlhâng, yhang gi, yhang wui-myhup hkám byí é jang má, Hparishe pé eq Saduke pé myo myo lé lo nyi kô é lé myàng jâng, yhangmoq lé tai é gi, "Duq htân nhangmùi amyù pé ê, jé lô râ yubak dam mai wó hpang lut kó sháng gaq ga, nungmoq lé ó yuq tai pùn é lú? ⁸ Myit lhing hkyô eq gingdán é ashi pé zui keq. ⁹ Ngamoq gi, Abraham é yhangzo yhangshù pé nghut lhê.' nghù lui, yhumsing é i-myt unghkaù má hkálum to kó. Hkâsu mù gà le, ngò, nungmoq lé tai kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰ Ahkuí lháng, Garai Gasang gi, Yhâng é wazung lé haù siggám wang pé má tô to bê nghut ri; haù mù, ge é ashi a zui é agàm hkangmó lé gi, htug lhêng pyám mù, myi má dú kat pyám râ nghut lhê.

¹¹ Ngò gi, nungmoq myit lhing kó sháng gaq nghù, wui eq za wui-myhup hkám byí lhê. Nghut kôlhâng, ngá htoq má wum-o a-tsam je bo é sù rayuq, ngá htâng má jé lé lô shirà nghut lui, ngò gi, Yhâng é hkyi-tsung chùng byi rá lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi rá nghut lhê. ¹² Yhang gi, loq má byò chung to mù, guq chyâràng má é guq bùm lé hik sân pyám lui, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí eq nyhê hkyô pyám râ nghut lhê." gà ri.

* **3:2** Mauhkúng mingdán gi, chyâng lò bê gà é lychiúm gi, Garai up râ ahkying chyâng lò bê gà é nghut lhê. * **3:3** Esai 40:3

*Yesuq, Wui-myhup Hkâm Yu É Hkyô**Mrk 1:9-11; Luk 3:21-22*

¹³ Haú hkûn, Yesuq gi, Yohan chyáng wui-myhup hkâm yù rà ga, Galile mau mai Yodan làng má jé lé lo ri. ¹⁴ Nghut kôlhang, Yohan gi, "Ngò sheq Náng chyáng wui-myhup hkâm yù rà sù ru nghut lhê nhing! Náng sheq ngá chyáng lé lo lhê lú?" ga luí, lhom taí hkûm ri.

¹⁵ Haú hkûn, Yesuq gi, "Dingmán hkyô banshoq lé, nga-nhúng lhoq dik rà é yanmai, Ngo lé wui-myhup hkâm byi laq." ga tú taí ri. Haú mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyáng sù é đông mai, Yhâng ahtoq má lé gyô nô tô é lé, Yhang myang kat ri. ¹⁷ Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtë htoq lo ri.

4*Yesuq, Gúnglaú Huí É Hkyô**Mrk 1:12-13; Luk 4:1-13*

¹ Haú htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng rà matú, yoso shut shuí é ri. ² Yesuq gi, zoshuq gám é myi xê nyi myi xê myìn jé jáng, zòmut hui bê nghut ri. ³ Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

⁴ Haú jáng, Yesuq gi, "Byù gi, muk èq za asak ùi rà a nghut; Garai Gasâng é nhut mai htoq lo é mungdang hkangmó èq sheq asak ùi rà nghut lhê. ✧ ga luí, Chyúmdang má kê tô ri." ga yhang lé tú taí ri.

⁵ Haú hkûn, nat Tsadán gi, Yesuq lé, chyoiyúng myuq* má shuí é mù, noqkuq yhum je myhang é shúhtâng htoq má yap nhang to luí, ⁶ "Nàng, Garai Gasâng é Yhangzo nghut le gi, byam gyô kat wú aq. Hkâsù mù gà le, 'Náng é matú, Garai Gasang gi, Yhâng é maumang lagyô pé lé taí to rà nghut mù,

luqgok má Náng é hkyí a ló htung shoq, yhangmoq é loq èq Nang lé lhom bún yù kó rà nghut lhê. ✧ ga luí, Chyúmdang má kê tô ri." ga taí ri.

⁷ Nghut kôlhang, Yesuq gi, "Haú Yhumsing, nungmoq é Garai Gasang lé, wó chyam wú rà a nghut. ✧ ga luí le, Chyúmdang má kê tô ri." ga, yhang lé tú taí ri.

⁸ Nat Tsadán gi, Yesuq lé, gyai yang myhang é bùm htoq má shuí doq lô mù, mingkan má joq é mingdán pé banshoq eq haú pé é hkikhkâm hkyô lé tûn shit ri. ⁹ Haú htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi rà." ga, Yesuq lé taí ri.

¹⁰ Haú hkûn, Yesuq gi, "Tsadán nàng, ló byuq aq! Hkâsù mù gà le, 'Haú Yhumsing náng é Garai Gasang lé za, nàng noqkuq dojaú ra rà nghut lhê. ✧ ga luí, Chyúmdang má kê tô ri." ga, yhang lé taí ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akò nghut ri.

✧ 4:4 Tarâ Pun 8:3

*

4:5 chyoiyúng myuq gi, Yerusalem lé gà lhê.

✧ 4:6 Hkya-on 91:11-12

✧ 4:7 Tarâ Pun 6:16

✧

4:10 Tarâ Pun 6:13

*Yesuq Mungdang Hko Hi Lô É Hkyô**Mrk 1:14-15; Luk 4:14-15*

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taù lô bê nghut ri. ¹³ Yhang gi, Nazaret wà mai htoq lô mù, Zebulun eq Nahtali mau mà é nhông yàm má joq é Kaperna-um wà má lô nyi nyi ri. ¹⁴ Haù gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mà é hkyô, Yodan làng yàm, túngbaù pé nyi é Galile mau é,

¹⁶ mauchut hkaù má nyi nyi é bang, maubó mó lé myàng bê nghut ri; shì wup hkaù má nyi to bâng é matú, maubó lô bê nghut ri."^{*}

ga kâ tô é dang lé lhoq dik rà matú nghut ri.

¹⁷ Haù hkùn mai, Yesuq gi, "Myit lhing keq! Mauhkûng mingdán gi, chyâng lô bê nghut ri." ga, mungdang hko hi e lô bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkùn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹ Haù mù, Yhang gi, haù nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga taì ri. ²⁰ Haù hkùn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haù mai xoq sô e lô le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhai hkaù má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhai haù lé, tô pyâm to kôluí Yesuq htâng cháng bekô nghut ri.

*Nò Bang Lé, Yesuq Lhoq Gê Byí É Hkyô**Luk 6:17-19*

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng mà é nòhpyo ajung jung hui bang eq noli nojàng amyù myù dap bang lé, lhoq gê byí wún ri. ²⁴ Yesuq eq sêng é hkyô ludang gi, Suriq ramau gón má byo myín lô mù, byu pé gi, awáng nòhpyo ajung jung hui é bang, hkê-nhò jamjaù nyi é bang, nat gang wang júng é bang, mhúngtuq tuq é bang, gúngjum shi é bang lé, shuí lé lô kôluí, Yhang gi, haù bang lé lhoq gê byí ri. ²⁵ Galile mau, Dekapoli,† Yerusalem, Yuda mau eq, Yodan làng tú tap mà é byù moq mó gi, Yesuq htâng châng bum akô nghut ri.

5*Hkungsô Wó É Tarâ**Luk 6:20-23*

¹ Yesuq gi, byù moq mó lé myàng jáng, bùm má doq lô luí, lô zung tô ri. Haù hkùn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

* 4:16 Esai 9:1-2 † 4:25 Dekapoli gâ é gi, Griek đông myuq raxé lé gâ lhê.

- 4 Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó rà nghut lhê.
- 5 I-myait nú-nhâm é bang gi, hkungsô wó nyi ri; hkâsu mù gà le, yhangmoq gi, mîngkan lé wó sîng kó rà nghut lhê.
- 6 Dingmán hkyô lé mut shít nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó rà nghut lhê.
- 7 Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó rà nghut lhê.
- 8 Myit sanséng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó rà nghut lhê.
- 9 Nguingón hkyô sô xoq byí é bang gi, hkungsô wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó rà nghut lhê.
- 10 Dingmán hkyo é yanmai zing-ri huí é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.
- 11 Ngá é yanmai, byu pé èq, nungmoq lé rhoi é, zing-rí é, a teng a mán é đông agè ashop é dang amyú myú taí tso kô é hkûn, nungmoq hkungsô wó nyi ri.
- 12 Nguingón gabú nyí keq, hkâsu mù gà le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rí lai lo wú bekô nghut ri.

Xo Eq Maubó

Mrk 9:50; Luk 14:34-35

13 Nungmoq gi, myidám htoq mâ é xo nghut nyi lhê. Nghut kôlhang, xo gi, màn kân byuq jáng, haú lé hai èq dum wó lhoq ngam yù rà lhu? Shinggan shut dú pyám mù, byu pé èq nâng pyeq pyâm é mai lai lui, hai akyú le bò rà a nghut lo.

14 Nungmoq gi, mîngkân é maubó nghut akô; bùm htoq mâ é myuq lé gi, wó nghop to rà a nghut. 15 Myibung lé tap mù, mûng èq nghop tô é ó a kut wú kó; haú su kut rà malaí, yhúmhmaú má lúng tô é bang yuq hkangmó myoq wó myàng rà matú, tsungjang má kúm tsung to rà nghut lhê. 16 Haú eq rajung za, byu pé gi, nungmoq é ge é muzó pé lé byu-myàng lui, mauhkûng htoq mâ é nungmoq é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

17 Ngò gi, myiqhtoí pé é dang eq jep é tarâ lé lhoq hpyoq pyám rà matú, jé lé é nghut nhô hkâ-ngâm kó; haú pé lé lhoq dik rà matú sheq jé lé é ru nghut lhê. 18 Ngò, nungmoq lé teng za taí kôlé, mauhkûng eq myigûng byuq byuq lé háng, haú pé a ban lhoq dik dik gi, jep é tarâ má é tiq dik é dangjí eq myihkyet zo ralhuh háng byuq byuq rà a nghut. 19 Jep é tarâ shí pé má é tiq dik é dang rahkun lé lu lai lui, góbang lé le, haú su kut rà matú mhoq byí é sù ó yuq nghut kôlé, mauhkûng mingdán má tiq dik sù gà é hui rà nghut lhê; nghut kôlhang, jep é tarâ shí pé lé châng kut lui, mhoq byi sù kúm gi, mauhkûng mingdán má, hkik sù gà é hui rà nghut lhê. 20 Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó rà a nghut.

21 'Byù hkâsat,* sat é sù gi, jéyáng é hui râ nghut lhê' ga, hí hpyang lhê é bang lé tai tô é dang, nungmoq wó gyô wú bê nghut lhê. 22 Nghut kôlhang, Ngò, nungmoq lé tai kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'* ga tai é sù gi, Yudaq byin tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

23 Haù mù, hkungga gyap má, nàng hkungga nhông rà dâ é hkùn, náng é gumang rayuq yuq, nang lé mara hun é hkyô rajung jung joq é lé, myit bún kat é nghut jáng, 24 náng é hkungga lé, haù hkungga gyap hí má tô pyâm to mù, náng é gumang hpó haù yuq eq hí nguingón hkyô ló yù luí sheq, hkungga lé nhông byi aq.

25 Nang lé yui tsuq sù gi, nang lé tarâ rùng má dé e ló é hkùn, hkyô má ru nghut nyi ashí u lé, yhang eq nguingón hkyô hí hân yù aq. Haù a nghut jáng, haù yuq gi, nang lé, tarâ agyi chyáng é ap pyám mù, haù tarâ agyi gi, nang lé htóng hkyô pyám rà matú, htóng suwún hpô é loq má ap pyám rà nghut lhê.

26 Ngò, nang lé teng za tai lé, yuichyín haù a ban xap xap gi, htóng haù mai nàng wó htoq ló rà a nghut.

Su-myi Sulàng Lú É Hkyô Eq Séng Luí Mhoqshit É Dang

27 'Su-myi sulàng hkâlú'† ga é dang lé, nungmoq wó gyo wú bê nghut lhê.

28 Nghut kôle, Ngò, nungmoq lé tai kôlé, myiwe rayuq lé shut nau é myit èq wú é sù gi, yhâng é myit hkaù má, myiwe haù yuq eq su-myi sulàng lú hkyô kut é sù nghut bê. 29 Haù mù, náng é loqyo myoq èq, nang lé mara kut shut nhang é nghut le gi, haù lé lap choq yù mù, dú pyám aq. Hkâsu mù gà le, náng é ragùngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri. 30 Haù eq rajung za, náng é loqyo loq èq, nang lé mara kut shut nhang é nghut le gi, haù lé hpyit yù mù, dú pyám aq. Hkâsu mù gà le, náng é ragùngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

31 'Yhumsing é yhangmyi lé kâng é sù gi, lhoq kang laiká byi rà dut lhê.† ga é dang joq lhê. 32 Nghut kôlhang, Ngò, nungmoq lé tai kôlé, myiwe đông mai làng shut é a nghut é za, yhumsing é yhangmyi lé kâng é sù gi, myiwe haù lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

33 Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, tai tô é dang lé nungmoq wó gyô wú bê nghut lhê. 34 Nghut kôlhang, Ngò, nungmoq lé tai kôlé, hai èq le hkâdakâm kó: mauhkùng lé lang luí le, hkâdakâm kó; hkâsu mù gà le, haù gi, Garai Gasâng é zùng tanghkuq nghut lhê; 35 myigùng lé lang luí le, hkâdakâm kó; hkâsu mù gà le, haù gi, Garai é hkyi nang jang nghut lhê; Yerusalem lé lang luí le, hkâdakâm kó; hkâsu mù gà le, haù gi, Hkohkâm mó é myuq nghut lhê. 36 Hau htoq agó, yhumsing é ulhúm èq le, hkâdakâm kó; hkâsu mù gà le, xâm rahkat lé lhang hpyú shoq noq shoq, nàng wó kut é a

☆ 5:21 Htoq Ló 20:13

* 5:22 Byù gang gà é lé, Grik đông "Raka" gà lhê.

☆ 5:27 Htoq Ló 20:14

☆ 5:31 Tarâ Pun 24:1

nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, tái aq; haû mai lai é gi, haû agê ashop su chyáng mã é nghut ri.

Lató Hpuq É Hkyô
Luk 6:29-30

³⁸ 'Myoqjí matú myoqjí xap, zui matú zui xap'✧ gâ é dang lé, nungmoq wó gyô wú bê nghut lhê. ³⁹ Nghut kôhang, Ngò, nungmoq lé tái kôlé, agê ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byí é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq. ⁴² Nang lé dung sù lé, byi aq; náng chyáng mai chyí naû sù lé le, nunghtáng hkâlhik pyám.

Gyè Lé Chyitdap Râ É Hkyô
Luk 6:27-28, 32-36

⁴³ 'Náng é chyangnâm mã é bang lé gi, chyitdap mù, náng é gyè lé gi, a jú kut aq'✧ gâ é dang lé, nungmoq wó gyô wú bê nghut lhê. ⁴⁴ Nghut kôhang, Ngò, nungmoq lé tái kôlé, nungmoq gi, mauhkúng htoq mã é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyùdung byi keq; ⁴⁵ hkâsu mù gâ le, Yhang gi, agê ashop bâng é ahtoq má le, gè bâng é ahtoq má le, bui tsô byi nhâng mù, dینگmán bâng é ahtoq má le, a dینگmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lúhú? Kang guq bang lháng, haû su kut lhê a nghut kó lúhú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq mã haí wá laklai râ lúhú? Túngbaù pé lháng haû su kut lhê a nghut kó lúhú? ⁴⁸ Haû mù, mauhkúng htoq mã é nungmoq é Íwâ gumjup é su, nungmoq le gumjup nyi keq.

6

Alu Byi É Hkyô

¹ Nungmoq dینگmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haû su kut é nghut jáng, mauhkúng htoq mã é nungmoq é Íwâ chyáng mai, chyunghuq wó yú kó râ a nghut.

² Haû mù, haû gegùn labyoq kut bang gi, byu pé èq shigyau é hui sháng gaq ga, tarajong pé hká, hkyô pé hká kut é su, náng gi, alu byi é hkûn, tut hté su hkâlhoq htoq. Ngò, nungmoq lé teng za tái kôlé, haû bang gi, yhangmoq é chyunghuq lé hkúm shoq wó yú bekô nghut lhê. ³ Ra châ to bang lé náng alu byí é hkûn, náng é loqyo loq kut é hkyô lé, loqpaí loq lé lháng hkâsé nhâng. ⁴ Haû hkûn, náng alu byí é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Íwâ gi, nang lé chyunghuq shigyau rá nghut lhê.

Kyûdûng É Hkyô
Luk 11:2-4

⁵ Nungmoq kyûdûng le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má

yap mù, kyûdung râ ô nau akô. Ngò, nungmoq lé teng za tái kôlé, haú bang gi, yhangmoq é chyunghuq lé wó yû bekô nghut ri. ⁶ Nghut kôlhang, nàng kyûdung le, náng é gok hkaú má wang ló mù, hkum myhî pyám luí, a byu-myang é náng é Íwa chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê. ⁷ Haú mù, kyûdung le, tûngbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín luí dung jáng sheq, gyo byi nhô ngam akô nghut ri. ⁸ Haú bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shî mai sê to Sû nghut lhê.

⁹ Haú mù, nungmoq kyûdung le,

'Mauhkûng htoq tsáng myhâng mâ é ngamoq é Âwa ê,
Náng é myîng gi, choyiyúng nyí sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuî râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

¹³ Ngamoq lé, agúng alau hkyô má a wàng nhang é za, agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shing kang gi, pyat dedu ahtum abyuq Náng chyáng ru joq nyi ri ô! Amen.)*

ngû dung keq. ¹⁴ Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi râ nghut lhê. ¹⁵ Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shít râ matú myoqdong lhoq nyhui shít akô nghut ri. Ngò, nungmoq lé teng za tái kôlé, haú bang gi, yhangmoq é chyunghuq wó yû bekô nghut ri.

¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Íwa za myàng sháng gaq, myoq chí pyám luí, u xû but keq; ¹⁸ haú jáng sheq, ó a sé loshoq kut é hkyô lé myang é Sû, nungmoq é Íwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyám é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó.

²⁰ Jàngkon, jogyik èq le a wó lhoq htên pyám é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzè hkong to keq. ²¹ Hkâsu mù gâ le, náng é sutzè joq jang má, náng é i-myyit le jé nyi râ nghut lhê.

* **6:13** Chyúmlaiká ra-am má, shí tûm a bo é nghut lhê.

²² Myoqjî gi, gungdû é myibung nghut nyi ri. Náng é myoqjî ge é nghut le gi, náng é gungdu gón má maubó byíng mui to rá nghut lhê. ²³ Nghut kôlhang, náng é myoqjî a ge é nghut le gi, náng é gungdu gón gi, mauchut tuq dut nyi rá nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû rá lhâ!

²⁴ Ó yuq nghut kôle, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap rá nghut lhê; haú a nghut jáng, rayuq lé lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzê lé le, radá dâm wó dojaú kó rá a nghut.

Hkâ-myt Chiq Kó

Luk 12:22-31

²⁵ Haú mù luí, Ngò, nungmoq lé taí kôlé, nungmoq é asak matú haí zo hai shuq rá eq nungmoq é gungdû matú haí wut haí tsang rá lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat má é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsing kat to kô é nghut le lhang, mauhkûng htoq má é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpau nap nyi lhê a nghut kó lhú? ²⁷ Nungmoq má, ó yuq wá, myit chiq é eq, yhumsing é asak lé radúng kó wó jat yù kó rá lhú?

²⁸ Haú nghut le nhing, haí mù, mebû matú myit chiq akò lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkying le a duí kó nghut ri. ²⁹ Nghut kôlhang, Ngò, nungmoq lé taí kyo kôlé, hkohkâm Sholomon hpung kô dik u lé wut é mebu lhang, ban haú rabó lé a hkyit nghut ri. ³⁰ Lumjîng myit tiq é bang é, hkû-nyí joq mù, napmá myihkyóm má dú kat pyám hui rá nghut é yosó mhan pé lé za lhang, Garai Gasang haú su kut hut é nghut le gi, nungmoq lé je riyhang hut rá a nghut kó lhú? ³¹ Haú mù, 'Haí zo rá lhi?' 'Haí shuq rá lhi?' 'Haí wut rá lhi?' nghû hkâ-myt chiq myhúng kó. ³² Tungbaù pé kúm gi, haú pé banshoq lé châng hkat ho nyi akò; nghut kôlhang, mauhkûng htoq má é nungmoq é Íwa gi, haú pé lé nungmoq rá é hkyô, sé byí nyi lhê. ³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi rá nghut lhê. ³⁴ Haú mù, napmá lhê é matú hkâ-myt chiq kó; hkâsu mù gâ le, napmá gi, yhâng é yhang myit chiq rá nghut lhê. Hkû-nyí é wuihke hkyó gi, hkû-nyí é matú gé bê nghut ri.

7

A Jéyáng Râ Hkyô

Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng é hui kó rá nghut é htoq agó, nungmoq lik byí é bung eq, nungmoq lé dum lik byi rá nghut lhê.

³ Yhumsing myoq hkaú má lúng tô é siktúm lé lhang a myit wú é nhing, haí mù luí, nunggu nungmâng é myoqwàng lé myang lhê lhú? ⁴ Yhumsing é myoq má siktúm lhùng to luí nhing, 'Náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó taí rá lhú?

⁵ Gegùn labyoq kut sù é, náng é myoq má lúng tô é siktúm lé hí choq pyám

aq. Haù jáng sheq, nunggu nungmâng é myoq má wang tô é myoqwàng choq pyám byi rà matú, nàng san za myàng rà nghut lhê.

⁶ Hkuí pé lé, yunglhô é zê hkâbyi kó; waq pé hí má, nungmoq é palhé wuizo lé hkâdú byi kó. Haù su kut jáng, haù bang gi, zè haù pé lé nàng pyeq pyám mù, nungmoq lé dum taù ngat lò rà nghut lhê.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haù jáng, nungmoq lé byi rà nghut lhê; hô keq, haù jáng, nungmoq myàng kó rà nghut lhê; hkum má kok keq, haù jáng, nungmoq lé hpóng byi rà nghut lhê. ⁸ Hkâsu mù gà le, ó yuq nghut kôle, dung sù wó rà; hô sù myàng rà; hkum kok sù lé gi, hpóng byi rà nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó rà lúh? ¹⁰ Ngozo dúng le, lhangmui* byi kó rà lúh? ¹¹ Agè ashop é bang nungmoq lhang gi, nungmoq é zo wui lé, ge é chyunghuq dat byi kó le nhing, mauhkung htoq tsáng myhâng má é nungmoq é Íwa gi, Yhang lé dúng é bang lé, je riyhang ge é chyunghuq byi rà nghut lhê! ¹² Haù mù, hai hkyô má nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haù mù gà le, haù gi, jep é tarà eq myiqhtoi pé é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gà le, lam é hkúmdong eq hkyô mó gi, htên byoq hkyô shut shuí e é nghut mù luí, haù dông wàng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuí e é nghut mù luí, haù lé myang ho é bang gi, shaù akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó rà nghut lhê. Zubyap mai tsibiyiq shi, zugâm mai maìhpáng-shi wó yu wú akô lúh? ¹⁷ Ge é agàm gi, ge é ashi zui mù, a ge é agàm gi, a ge é ashi za dat zui ri. ¹⁸ Ge é agàm gi, a ge é ashi a wó zui, a ge é agàm le, ge é ashi a wó zui nghut ri. ¹⁹ Ge é ashi a zui é shigâm hkangmó lé gi, htuq pyám mù, myi má dú kat pyám rà nghut lhê. ²⁰ Haù mù, yhangmoq é muzó jizó lé wú mù, nungmoq gi, yhangmoq lé wú sé kó rà nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó rà a nghut; haù mauhkung htoq má é Ngá Wa ô nau é dông kut sù za sheq, myang wàng rà nghut lhê. ²² Haù buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklaí kumlhá ajung jung lé, kut bê a nghut lúh?' ga luí, Ngo lé myi kó rà nghut lhê. ²³ Haù hkún, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng lò byuq keq.' nghù, yhangmoq lé san za tũ tai kat rà nghut lhê.

* **7:10** Garai Gasang gi, lhangmui a zo rà matú, Yudaq byu pé lé hkunmó hkyô tô é nghut lhê.

Hpaqchyí Bò Sû Eq Ngok Sû

Luk 6:47-49

²⁴ Haú mù, Ngá é dang shí pé lé wó gyô yù luí, châng kut é sù gi, hpaqchyí bò mù, lunghtân htoq má, yhùm sai é sù eq wuí nyi ri. ²⁵ Mau wô, wuí je, laidun lò mù, yhùm haú lé lo htung kôlhang, yhùm haú gi, a htên byoq byuq râ nghut lhê; hkâsu mù gà le, yhùm haú gi, lunghtân htoq má tsuq tô é yanmai nghut ri. ²⁶ Nghut kôlhang, Ngá é dang lé, wó gyô yù mù, a cháng sù gi, semui-jàng má, yhùm sai é byù ngok eq wuí nyi râ nghut lhê. ²⁷ Mau wô, wuí je, laidun wò yup dut lò mù, yhùm haú lé lo htung jáng, yù whuí a mù loshoq htên byoq byuq râ nghut lhê." gà ri.

²⁸ Yesuq mungdang ban tai é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gà le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. ² Haú hkûn, manggâm dap é byù rayuq gi, Yhâng é hí má, lé mù, hkyihput huq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga tai ri.

³ Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoí." ga tai kat ri. Haú hkûn jáng, haú yuq é manggâm gi, ge byuq bê nghut ri. ⁴ Haú hkûn, Yesuq gi, "Nàng, shí hkyô ó lé le hkâtai kyo. Nghut kôlhang, náng é gungdu lé, hkyangjong hpô chyáng ló tân shit mù, yhangmoq é matú saksé dut sháng gaq, Mosheq tai tô é eq rajung za, hkungga ló không byi aq." ga haú yuq lé tai kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpô rayuq gi, Yhâng chyáng lé jé mù, ⁶ "Yhumsîng ê, ngá é dui-nhâng zoshâng gi, gùngjum shí é htoq agó, yhùm má gyai no jamjaú leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga tai kat ri.

⁸ Gyezau hpô haú, Yhang lé dum tû tai é gi, "Yhumsîng ê, Nàng, ngá é laishînhtâng má, lé nang râ lháng ngò má a gingdán. Nàng, dang rahkun za tai kat laq; haú hkûn, ngá é dui-nhâng zoshâng ge ló râ nghut lhê. ⁹ Hkâsu mù gà le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'È aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shí kut aq!' nghu le, yhang kut lhê." gà ri.

¹⁰ Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za tai kôlé, Israelaq amyú má lháng, shí í lumjîng é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé tai kôlé, buihtoq buiwàng hkyam má é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poi mó má myang zùng kó râ nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaú nhap eq zui kyik kyik shoq hpuzô nyi bùm bekô râ nghut lhê." ga tai ri.

¹³ Hau htâng, Yesuq gi, gyezau lé, "Ló aq hkoi! Nàng lumjíng é eq rajung za, dut râ nghut lhê." ga tai ri. Haú-u má yang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

¹⁴ Yesuq gi, Petruq é yhùm má jé wang e é hkûn, Petruq é yhâng-aumó gyai yang no leq tô é lé, é myang ri. ¹⁵ Yesuq gi, yhâng é loq má é záng kat é hkûn, Petruq yhâng-aumó gi, nòhpyo ge byuq mù, toq luí, Yhang lé wó gai tso gai huq bê nghut ri.

¹⁶ Myinhântang mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agê ashop é nat gâng pé lé dang eq hkat htoq pyám mù, nòhpyo huí é bang banshoq lé lhoq gê byí ri. ¹⁷ Haú gi, "Yhang gi, nga-nhùng é noli nojàng lé yu pyám byi mù, nga-nhùng é noli nojàng lé, wùn waq pyám byi bê nghut ri."*

ga, myiqhtoi Esai-aq tai tô é dang lhoq dik rà matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhínghkyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap ê sháng gâ ri. ¹⁹ Haú hkûn, tará sará rayuq gi, lé lô mù, "Sará é, ngò gi, Nàng hká e le hká cháng rã nghut lhê." ga Yhang lé lé tai ri.

²⁰ Haú jáng, Yesuq gi, "Wamhkuí pé gi, hkyúng wó akô; ngoq pé le, ngoqsut wó akô. Nghut kôhang, haú Byu Yhangzo gi, u nghê jowò lhang a wó nghut ri." ga lhom tai kat ri.

²¹ Haú hkûn, chángzo rayuq gi, "Yhumsíng ê, ngá wa lé ló yhùm pyám rã ahkáng hí byi shilaq." ga tai kat ri.

²² Nghut kôhang, Yesuq gi, "Shí bê bang gi, shí bê bang yangchang yhùm lhum kó sháng gaq, nàng gi, Ngá htâng cháng aq." ga dum tai tai ri.

Laidun Lhoq Zím É Hkyô

Mrk 4:35-41; Luk 8:22-25

²³ Hau htâng, Yesuq lhai hkaú má wàng mù, Yhâng é chángzô pé le, Yhâng htâng châng wàng bekô nghut ri. ²⁴ Haú hkûn, nhông má byodan-htik laidun mó lô mù, wuìhêng pé gi, lhai má bat ùm lò bê nghut ri. Nghut kôhang, Yesuq gi, yhup myhí tô ri. ²⁵ Chángzô pé gi, Yhâng chyáng jé ê mù, Yhang lé nhaú pun luí, "Yhumsíng ê, hkyi yù laq ô! Nga-nhùng myup ló nyi ri." ga tai akô.

²⁶ Yhang gi, "Lumjíng myit shaú é bang ê! Hái mù, haú-í gyuq bum akô lhu?" ga tai kat ri. Hau htâng, Yhang gi, toq luí, laidun eq wuìhêng pé lé tân kat jáng, banshoq zím byuq bê nghut ri.

²⁷ Byù haú bang gi, maúhong byuq kômù, "Shí yuq gi, hkasú é byù lhà? Lai eq wuìhêng pé lhang gi, Yhâng é dang lé gyo byí ri myhi-nhung!" ga luí, rayuq eq rayuq myí lhum bum akô nghut ri.

Nat Wang Júng Su Nhik Lé, Lhoq Gê Byí É Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuí é su nhik nghut akô. ²⁹ Yhangnhik

gi, Yesuq lé, "Garaî Yhangzo ê, Nàng, ngamoq eq haî sêng lhê lú? Ahkyíng a jé shimá, ngamoq lé zing-ri râ matú jé lé lo é nghut lhê lú?" ga taî garú akô.

³⁰ Haú mai a lúm wê é jowò má, waq rajúm mó gi, myi dû but zô nyi bum akô nghut ri. ³¹ Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pé chyáng wàng nhâng laq." ga dúng akô.

³² Yesuq gi, "Htoq ló keq!" ga taî kat ri. Haú mù, yhangmoq gi, htoq ló luí, waq pé chyáng wàng mù, waq haú júm gi, gampyoq mai nhông hkaú shut din yán wang ló kôluí, wui hkaú má myup shi byuq bekô nghut ri. ³³ Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló taî kyo akô nghut ri. ³⁴ Haú mù, rawa bang gi, Yesuq lé huí râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tóngbân akô nghut ri.

9

Gungjum Shí Sû Lé Lhoq Gê Byí É Hkyô

Mrk 2:1-12; Luk 5:17-26

¹ Yesuq gi, lhai má wàng mù, yhumsing é wà shut jî dap ló bê nghut ri. ² Byù ra-am gi, gungjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjǐng myit lé byu-myàng jáng, haú gungjum shí sù lé, "Ngá zo é, nhik hkâ-ngê; náng é yubak mara lé hkyut pyám byi bê." ga taî ri.

³ Haú hkún, tará sará pé ra-am gi, yhangmoq é i-myit hkaú má, "Byù shí yuq gi, Garaî Gasang lé rhoí dang taí nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaú má, haú su agê ashop é dông haî mù myit nyi akô lú? ⁵ 'Náng é yubak mara lé hkyut pyám byi bê.' nghú taí râ eq 'Toq luí, hkyô so aq.' nghú taí râ má, hká hkun je taí lui lhê lú? ⁶ Nghut kôlhang, haú Byu Yhangzo gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga taí lui, haú gungjum shí sù lé, "Toq aq, náng é taphkang yu chùng lui, yhúm taú ló aq hkoi." ga taî kat ri. ⁷ Haú mù, haú yuq gi, toq mù, yhúm shut ló byuq bê nghut ri. ⁸ Byù hpúng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garaî Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haú jowò mai só e ló é hkún, kang guq zúm má zung tô é Mahte ga sù lé myàng mù, "Ngá htâng cháng aq." ga taí jáng, haú yuq gi, toq lui, Yhâng htâng cháng bê nghut ri.

¹⁰ Yesuq gi, Mahte é yhúm má myinzang zô nyi é hkún, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù lui, kang guq bang eq yubak dap bang eq rahá zo shuq nyi lhê lú?" ga myí akô.

¹² Yesuq gi, haú su ga kô é lé wó gyo jáng, "Wángzán bang gi, chi sará a ra kó; nòhpyo huí bang za sheq ru râ lhê. ¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.' gá é lichyúm lé mhoq yú

keq. Hkâsu mù gà le, Ngò gi, dingmán bang lé wut yù rà matú jé lé é a nghut, yubak dap bang lé ji yù rà matú sheq jé lé é ru nghut lhê." ga tù tai kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haù mù a gám kô é lúh?" ga luí, lé myí akô.

¹⁵ Haù mù, Yesuq tù tai é gi, "Bing pé gi, lusik eq rahá nghut nyi to ashí hkùn, hkâsu ge yón kó rà lúh? Lusik lé, yhangmoq chyáng mai shuí yu pyám é hkyíng jé rà nghut lhê; haù hkùn kúm gi, yhangmoq zoshuq gám kó rà nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gà le, pán sik kun byuq jáng, mebu xau le je lhoq cheq pyám rà nghut lhê. ¹⁷ Tsiyiq wing asik lé le, shokuq htùng axau má ó a kat wú kó. Kat é nghut jáng, tsiyiq wing asik soq htân luí, htùng buq goq byuq mù, tsiyiq wing le yui shun byuq, htùng le htên byuq, dut rà nghut lhê. Haù mù, tsiyiq wing asik lé, shokuq htùng sik má kat jáng sheq, haù í jùng é a hten rà nghut lhê." gà ri.

Shí Bê Myiwe Zo Eq No É Myiwe Myhi

Mrk 5:21-43; Luk 8:40-56

¹⁸ Yesuq haù su ga tai nyi é hkùn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shí byuq bê. Nghut kôlhang, Náng lé mù, yhâng é ahtoq má loq lé ke byi laq, haù jáng, yhang, asak dum dui lò rà nghut lhê." ga tai ri. ¹⁹ Yesuq gi, toq mù, Yhâng é chángzô pé eq rahá, haù yuq htâng châng e lô akô.

²⁰ Haù hkùn, raxe í zân yhang, suí yui nyi é myiwe myhi rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹ Myiwe myhi haù gi, yhang gùng yhang, "Ngò, Yhâng é buhtáng má ê wó záng jáng gi, ge byuq rà nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjìng myit gi, nang lé lhoq gê byi bê nghut ri." ga tai ri. Haù hkùn jáng yhang, myiwe myhi haù gi, ge byuq bê nghut ri.

²³ Yesuq gi, suwún hpô é yhùm má jé wang lô é hkùn, sampyí mut bang eq garu garín dut nyi é bang lé, ê myàng mù, ²⁴ yhangmoq lé, "Hui keq. Myiwe zo gi, shí byuq é a nghut, yhup myhi tô é sheq ru nghut lhê." ga tai jáng, yhangmoq gi, Yhâng lé wuizui kut pyám byí akô. ²⁵ Yesuq gi, byù hpùng lé, shinggan shut htoq lò nhâng mù, Yhang wang ê luí, myiwe zo haù lé loq èq zuí kat jáng, myiwe zo haù gi, dum dui toq lo ri. ²⁶ Haù hkyo é danglù gi, ramau gón yhang jam lô byuq bê nghut ri.

Myoqjit Í Yuq Eq Nhut Jit Sù Rayuq Lé, Lhoq Gê Byí É Hkyô

²⁷ Yesuq gi, haù jowò mai xoq e lò nyi le, Yhâng é htâng má, myoqjit í yuq gi, châng đin uchyang, "Dawiq é Yhangzo ê, ngá-nhik lé shogyô yù laq ô!" ga wut tai akô.

²⁸ Yesuq gi, yhùmhaù má jé wang lô é hkùn, myoqjit su nhik châng wang lò kômù, haù nhik lé, "Ngò wó kut byí é lé, nungnhik lumjìng akô luq?" ga myí ri.

Haù hkùn, yhangnhik gi, "Lumjìng lhê ô, Yhumsing ê." ga tù tai akô.

²⁹ Hau htâng, Yhang gi, haù nhik é myoqjí má ê záng htung luí, "Nungnhik lumjìng é eq rajung za dut sháng gaq." ga tai ri. ³⁰ Haù mù, yhangnhik gi,

myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri. ³¹ Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpúng mó gi, haú lé wú maú byuq kômù, "Shí su dut é hkyô lé, Israelaq amyú má radâm lhang a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pé é zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luí, haú pé má é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nôhpyo ajung jung eq noli nojàng hui bang yuq hkangmó lé, lhoq gê byí wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâsu mù gà le, yhangmoq gi, sau zúng sù a nyi é sau pé su, awui ahke dut é eq byo myin bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshù yù rá myo shoq joq kôlhang, mù zui rá byù gi, shaú nyi ri. ³⁸ Haú mù, haú kyô Yhumsing lé, Yhâng é kyô yô má, kyô shu byù myo myo nhâng byi rá matú, dung keq." ga taí ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq rá eq, noli nojàng eq nôhpyo ajung jung lé wó lhoq gê rá ahko ahkáng yhangmoq lé byí ri.

² Haú lagyo raxe í yuq é mying gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alphe é yhangzo Yakuq, Htade, ⁴ Zelutuq* dut é Simun eq, Yesuq lé ap pyám rá sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tùngbaù pé chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israelaq byu pé chyáng shieq é keq. ⁷ Nungmoq gi, é mù, 'Mauhkûng mingdán gi, chyáng lò bê nghut ri.' ngu é danglù lé hko kyo keq. ⁸ Nò bang lé lhoq gê byi, shí bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gà le, mù zui sù gi, zoshuq wó gíng lhê.

¹¹ Hká wà hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhùm má za nyi nyi keq. ¹² Haú

* **10:4** Zelutuq gà é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rá matú shikut nyi é hpúng bang lé, Zelutuq gà lhê.

yhôm má wang é hkûn, shichyên yù keq. ¹³ Háu yhôm gi, gingdán é nghut jáng, nungmoq shimân byí é hkyô, yhangmoq chyáng joq nyí sháng gaq; a gingdán é nghut jáng, nungmoq chyáng dum taú lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, háu yhôm háu wâ mai htoq ló é hkûn, nungmoq é hkyiwa má dap é hpuilhaú lé ko hkyô pyâm to keq. ¹⁵ Ngò, nungmoq lé teng za tái kôlé, tará jéyáng é buinyí má, háu wâ gi, Sodom eq Gomoraq myuq htoq má je hpuzo rá nghut lhê. ¹⁶ Wamhkuí hpúng má nhang hâng kat é sau pé lé su, Ngò, nungmoq lé nhang kat é nghut lhê. Háu mù, lhangmui su hpaqchyí bò luí, hpúngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tará rûng pé má é ap pyâm kó rá nghut é htoq agó, yhangmoq é tarajong pé má, nungmoq lé nhuq bat kó rá nghut lhê. ¹⁸ Nungmoq gi, Ngá é yanmai, mauzau wui eq hkohkam pé é hí má shuí jé é hui lui, yhangmoq é hí má le, tungbaù pé é hí má le, saksé myang hkâm kó rá nghut lhê. ¹⁹ Nghut kôlhang, nungmoq lé ap pyâm kô é hkûn, nungmoq hkâsu tái rá eq hái tái rá lé, hkâ-myit chiq kó. Háu hkûn tái rá dang, nungmoq wó kó rá nghut lhê. ²⁰ Hkâsu mù gâ le, háu gi, nungmoq é dang a nghut, nungmoq é Yhângwâ é Woi-nyí sheq, nungmoq dông tái rá ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rá nghut lhê; zo wui gi, mó wui lé gumlau toq mù, sat pyâm nhâng kó rá nghut lhê. ²² Byu lhunglhang bang gi, Ngá é yanmai, nungmoq lé a nguí kut kó rá nghut lhê; nghut kôlhang, jihtûm jé shoq wó hkam jân nyí é sù gi, hkyi yu é hui rá nghut lhê. ²³ Rawò má zing-ri é hui jáng, rawò shut hpang é keq. Ngò, nungmoq lé teng za tái kôlé, Israelaq byu pé é myuq pé má, nungmoq a ban wang ngap shimá, háu Byu Yhangzo jé rá nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rá a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wui lé gi, je riyhang nghû kó rá a nghut lhu?

²⁶ Háu mù, yhangmoq lé hkâgyuq kó. A byông htoq loshoq wó zaú nghop tô é hái le a joq rá nghut lhê; a sé loshoq wó haq tô é le, hái a joq rá nghut lhê. ²⁷ Ngò, nungmoq lé mauchut hkaù má tái é hkyô lé, myoq myàng maubó má tái kyo keq; Ngò, nungmoq lé dangsoq soq kyo é hkyô lé, yhumhkûng htoq mai tái pyô keq. ²⁸ Gungdu lé za wó sat pyâm mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyi keq. ²⁹ Johkyáng í du lé, gyi htingchap rachap èq wó ùng pyâm lhê a nghut kó lhu? Nghut kôlhang, háu radu lhang, nungmoq é íwâ é myit èq a nghut jáng, myigùng má wó byit gyó rá a nghut. ³⁰ Nungmoq é ulhum mâ é xâm banshoq lé lhang, nghap to gù nghut lhê. ³¹ Háu mù, hkâgyuq kó; nungmoq gi, háu johkyáng myo myô htoq má lhang gù je bo é bang nghut lhê.

³² Byu pé hí má, Ngo lé lhom yín yu é sù ó yuq lé nghut kôle, mauhkûng htoq má é Ngá Wâ é hí má, Ngò lhom yín yu rá nghut lhê. ³³ Byu pé é hí má, Ngo le he-ngik pyâm é sù ó yuq lé nghut kôle, mauhkûng htoq má é Ngá Wâ é hí má, Ngò he-ngik pyâm rá nghut lhê.

† 10:25 Bezebulaq gâ é gi, Tsadán é myíng rajà nghut lhê.

³⁴ Ngo lé, haù myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê.[‡] ³⁵ Hkâsu mù gà le, 'Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kó râ nghut lhê.

³⁶ Yhumsing é yhumbyù wui gi, yhumsing é gyè taù dut râ nghut lhê.[✧] gà tô é matú sheq, Ngò jé lé é ru nghut lhê.

³⁷ Ngo lé chyit é htoq yhumsing é ìnu ìwa lé je chyit é sù ó yuq nghut kôle, Ngá é chángzo kut râ gingdán sù a nghut; Ngo lé chyit é htoq yhumsing é zo wui lé je chyit é sù ó yuq nghut kôle, Ngá é chángzo kut râ gingdán sù a nghut; ³⁸ Yhumsing é tapzing lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi òng lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù òng lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê. ⁴² Shí, tiq bang mã é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gà ri.

11

Yesuq Eq Wui-myhup Sará Yohan *Luk 7:18-35*

¹ Yesuq gi, Yhâng é chángzo raxe í yuq lé dang ban pying é htâng má, Galile mau mã é wà pé má mhoqshit râ matú eq hko kyo râ matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, ³ "Nàng gi, haù jé lé lô râ Sù nghut lhê lúh? Haù a nghut jáng, ngamoq gi, góyuq lé láng ra shirâ lúh?" ga, yhâng é chángzô pé lé myí nhang kat ri.

⁴ Yesuq tui taí é gi, "Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungso wó nyi ri." ga taí ri.

⁷ Yohan é chángzô pé taù ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haì lé hpuq wú râ matú, haù yoso shut e akô lúh? Laì eq hik nhùn é jangâm lé wú râ matú nghut akô lúh? ⁸ Haù a nghut jáng, haì lé wú râ matú e akô lúh? Nú-nhâm é mebu wut sù lé wú râ matú e akô lúh? A nghut. Nú-nhâm é mebu wut bang gi, hkohkâm-wâng pé má sheq rù nyi lhê. ⁹ Haù nghut lé gi, haì lé wú râ matú é kô é lúh? Myiqhtoi rayuq lé lúh? Haù kúm nghut ri; Ngò, nungmoq lé taí kôlé, Yohan gi, myiqhtoi htoq lhang gyaù sù nghut lhê. ¹⁰ Haù yuq é hkyô lé, Chyúmdang mã kâ tô é gi,

[‡] **10:34** Yesuq gi, simsaq hkyô byi sù nghut lhê. Nghut kôlhâng, Yhang é yanmai, byu pé mabyoq htoq râ nghut é hkyô lé sé mù, haù su ga taí é nghut lhê. ✧ **10:36** Mihka 7:6

'Wú aq, Náng é hkyô lajang láng rã matú, Ngá é lagyo lé, Náng é hí má Ngò nhang kat rã nghut lhê.¹⁰

gã ri. ¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlhã, Garai Gasâng é mauhkúng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuú jé shoq, mauhkúng mingdán gi, lú chyín wang nyi é hui mù, sarhé pé gi, haú lé wó yú bekô nghut ri. ¹³ Hkãsu mù gã le, Yohan é ahkyíng jé shoq, haú myiqhtoí pé banshoq eq tarã gi, haú hkyô eq séng luí, myiqhtoí htoí to gù nghut lhê. ¹⁴ Nungmoq hap yú nau é nghut jáng, Yohan gi, haú jé lé lô rã ga sù Eliyaq nghut lhê.¹⁵ Gyô yú rã nohkyap dap sù gi, gyô yú sháng gaq.

¹⁶ Shí ipyat lhê é byu pé lé, Ngò, hai eq taí kè wú rã lhú? ¹⁷ Yhangmoq gi, 'Nungmoq é matú, ngamoq sampyí mut byi kôlhã, nungmoq gi, a gó kó; ngamoq, ngaú hkyangsâng kôlhã, nungmoq gi, a ngaú kó.' ga luí, gài pé má zùng mù, góbang lé wut taí lhùm nyi é zoshãng wui eq wui akô. ¹⁸ Hkãsu mù gã le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. ¹⁹ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bãng é buinùm hpó nghut ri.' ga dum taí akô. Nghut kôlhã, hpaqchyí byéng-yá gi, yhãng é muzô eq saksé tún shit nyi ri." gã ri.

Myit A Lhĩng É Wà Mó Pê Hkyô

Luk 10:13-15

²⁰ Hau htãng, Yesuq gi, laklaí kumlhá pé je myo kut shit bê nghut kôlhã, myit a lhĩng é myuq pé lé tân é gi, ²¹ "Kurazin wà mó ê! Nãng dingnyé wó ri! Bet-saida wà mó ê! Nãng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhĩng mù, jimé tú wut lhê, myiwar kyaq gyùn lhê kut bekô rá nghut lhê. ²² Ngò, nungmoq lé taí kôlé, tarã jéyãng é buinyi má, nungmoq gi, Turuq myuq eq Sidun myuq htoq má je hpuzo kó rá nghut lhê. ²³ Dum mù, Kaperna-um wà nãng ê, nãng gi, mauhkúng jé shoq waq toq é hui rá lhú? A nghut, mosumhkung má sheq gyó rá nghut lhê. Nãng chyáng kut shit é laklaí kumlhá lé, haú Sodom wà má kut shit é ru nghut le gi, myuq haú hkũ-nyí jé shoq joq nyi rá nghut lhê. ²⁴ Ngò, nungmoq lé taí kôlé, tarã jéyãng é buinyi má, Sodom wà hpuzô é gi, nãng htoq shau rá nghut lhê." gã ri.

Ngú Nyi Bãng É Matú Bánno Jang

Luk 10:21-22

²⁵ Haú u lé, Yesuq taí é gi, "Mauhkúng eq myigung é Yhumsĩng, Áwa ê, Nãng gi, haú pé lé, hpaqchyí byéng-yá bò bang eq myit hpaqchyí sé bãng é hí má nghop to luí, zoshãng wui lé tún shit bê nghut é yanmai, Ngò, Nãng lé hkyã-on lhê ô. ²⁶ Nghut bê, Áwa ê, haú gi, Nãng ô nau é hkyô nghut ri.

²⁷ Ngá Wa gi, lhunglhãng lé Ngá é loq má ap byí to bê. Haú Zo lé, Áwa mai lai luí ó le a sé; Áwa lé le, haú Zo eq haú Zo mai sé nhãng rá matú hkyin yu é bang mai lai luí ó a sé.

²⁸ Ngú é eq wólai wun é lhunglhãng bang ê, Ngá chyáng lé keq; Ngò, nungmoq lé bánno nhãng rá nghut lhê. ²⁹ Ngò gi, myit nú-nhãm é eq myit

lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haú hkûn, nungmoq é asak woi-nyí bánno kó rà nghut lhê. ³⁰ Haí mù gà le, Ngá é kandang gi, waq lui é htoq agó, Ngá é wò le sôm lhê." gà ri.

12

Bánno Buinyi É Yhumsing

Mrk 2:23-28; 3:1-6; Luk 6:1-5, 6-11

¹ Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akô nghut ri. ² Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga tái kat akô.

³ Haú hkûn, Yesuq tú tái é gi, "Dawiq lháng gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhúm hkaú má wang ê mù, hkyangjông pé mai lai lui, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú? ⁵ Hau htoq agó, Bánno buinyi má, hkyangjông pé gi, noqkuq yhúm hkaú má Bánno buinyi é tará lé shut kôlháng mara a wó é lé, haú tará laiká má nungmoq a nghap wú kó lú? ⁶ Ngò, nungmoq lé tái kôlé, haú noqkuq yhúm htoq je ko sù gi, shí má nghut nyi lhê. ⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê* gà é lichyúm lé nungmoq sé kô é ru nghut le gi, mara a bò bang lé mara hùn kó rà a nghut. ⁸ Hkâsu mù gà le, haú Byu Yhangzo gi, haú Bánno buinyi é Yhumsing nghut lhê." gà ri.

⁹ Hau htâng, Yhang gi, haú jowò mai e ló mù, yhangmoq é tarajong má wang e ló ri. ¹⁰ Loq rahkiam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nõhpyo lhoq gè byi le, tará wang lhê lú?" ga myi é dông, Yhang lé mara hùn rà hkyô ho akô nghut ri.

¹¹ Haú hkûn, Yesuq gi, "Nungmoq chyáng má é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó rà lú? ¹² Byù gi, saú htoq má hpauđap dik é nghut lhê! Haú mù, Bánno buinyi má ge é hkyô kut le, tará wang lhê." ga yhangmoq lé tú tái ri.

¹³ Hau htâng, Yhang gi, haú loq jum shí sù lé, "Náng é loq nyhang kat aq." ga tái kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó sat pyám rà hkyô lé, chôm hpyé lhum bum akô nghut ri.

Garai Hkyin Tô É Dui-nhâng Zoshâng

¹⁵ Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo lui bang banshoq lé lhoq gè byi lui, ¹⁶ Yhang ó yuq nghut é hkyô lé, a tái byông htoq rà matú, yhangmoq lé tái hkùm tô ri. ¹⁷ Haú gi, myiqhtoi Esai-aq é nhut dông mai tái tô é dang lé lhoq dik rà matú nghut ri. Dang haú pé gi,

¹⁸ "Shí yuq gi, Ngò chyt, Ngò myit nguì lui, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi rà nghut mù,

Yhang gi, tarâ dingmán é hkyô lé byù myû banshoq pé má tai kyo râ nghut lhê.

19 Yhang gi, hai a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

20 Yhang gi, tarâ dingmán é hkyô lhoq ung é hkùn jé shoq, nâng chap pyám bê jam gám lé le, lhoq hkyui râ a nghut, myihkau za htoq nyi bê myi lé le, lhoq sat pyám râ a nghut.

21 Byù myû chângjup gi, Yhâng é mying má myit myoqbyù kó râ nghut lhê.*

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

22 Hau htâng, agè ashop é nat gang wang júng lui, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, hau yuq lé lhom lhoq gè byi ri; hau mù, hau yuq gi, dang le wó nyô, myoq le wó myâng dut bê nghut ri. 23 Byù hpúng mó gi, hau lé wú mau byuq kômú, "Shí yuq, Dawiq é Yhangzo za gi, nghut lhê laq?" ga tai bum akô.

24 Nghut kôlhang, Hparishe pé gi, hau lé wó gyo kôjáng, "Shí yuq gi, nat gang pé é zau Bezebulaq* é wum-o a-tsam eq za nat gang pé lé wó hkat htoq é nghut ri." ga tai bum akô nghut ri.

25 Yhangmoq myit nyi é hkyô lé Yesuq sé mù, yhangmoq lé tai é gi, "Hká mingdán nghut kôle, ahkaú má byoq gang lhùm nyi kô é nghut jáng, htên byoq byuq râ za nghut lhê; hau eq rajung za, myuq ralhüm nghut nghut, yhumhtu ralhüm nghut nghut, yhangchang byoq lhùm nyi kô é nghut jáng, hau gi, wó gíng nyi râ a nghut. 26 Tsadán gi, Tsadán lé hkat htoq pyám é nghut jáng, yhumsing gúng yhumsing lhoq hpuyó nyi gù bê nghut ri. Hau su nghut jáng, yhâng é mingdán gi, hkâsu kut wó gíng to râ thú? 27 Hau mù lui, Ngò gi, Bezebulaq é wum-o a-tsam eq za nat gang pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyám kô é nghut lhê thú? Hau su nghut jáng, hau bang gi, nungmoq lé tarâ jéyáng bang dut kó râ nghut lhê. 28 Nghut kôlhang, Ngò gi, Garai Gasâng é Woi-nyí eq nat gang pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

29 Ó yuq nghut kôle, wum-o bò sú lé hí tuí zing pyám é a nghut le gi, yhâng é yhùm má lú wâng mù, yhâng é sutzè lé hkâsu wó lú yú râ thú? Hau yuq lé hí tuí zing pyám jáng sheq, yhâng é sutzè lé wó lú yú râ nghut lhê.

30 Ngá hkyam shut a dap sú gi, Ngo lé gyè kut sú nghut lhê; Ngò eq rahá a shùm tsing sú gi, lhoq pyo pyám é sú nghut nyi ri. 31 Hau mù, Ngò, nungmoq lé tai kôlé, byu pé é yubak mara hkangmó eq Garai Gasang lé rhoi dang tai pyám é lhunglhang gi, mara hkyut byí é wó hui râ nghut lhê. Nghut kôlhang, hau Chyoiyúng Woi-nyí lé rhoi dang tai pyám é gi, mara hkyut byí é hui râ a nghut. 32 Hau Byu Yhangzo lé dang dông shut é sú gi, mara hkyut byí é wó hui râ nghut lhê; nghut kôlhang, hau Chyoiyúng Woi-nyí lé dang tai shut é sú gi, shí ipyat má le, htang pyat má le, mara hkyut byí é hui râ a nghut.

33 Ashi lé wú lui, agám lé sé râ nghut é yanmai, agám lé lhoq gè jáng, ashi le gè râ nghut lhê; agám lé a lhoq gè jáng, ashi le gè râ a nghut; 34 Duq htân lhangmui amyú é, nungmoq gi, agè ashop é bang nghut to kôlui nhing, dang

* 12:21 Esai 42:1-4 * 12:24 Bezebulaq gâ é gi, Tsadán é mying rajá nghut lhê.

gè hkâsu wó taí kó râ lúh? Hkâsu mù gà le, i-myit unghkaû má byíng mui tô é lé za, nhut mai taí htoq lo é nghut lhê. ³⁵ Ge é sù gi, yhumsing é i-myit unghkaû má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû má é agè ashop é sutdò mai, agè ashop é zè pé lé lhoq htoq shit lhê. ³⁶ Ngò, nungmoq lé taí kôlé, byù gi, yhumsing taí kat é akyù a bo é dang pé é matù, tará jéyáng é buinyi má taí sân kyo ra kó râ nghut lhê. ³⁷ Hkâsu mù gà le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gà ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tará sará pé ra-am gi, "Sará ê, ngamoq gi, Nang, limik kumlhá kut shit râ lé myàng nau ri." ga Yhang lé dúng akò.

³⁹ Haù mù, Yhang tù taí é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotù haí le tún shit râ a nghut. ⁴⁰ Hkâsu mù gà le, Yonaq gi, ngo mó é wamdau hkaû má sum nyí sum myín lúng é su, haù Byu Yhangzo le, myigùng káng má sum nyí sum myín lúng râ nghut lhê. ⁴¹ Ninewe wà byù wui gi, Yonaq mungdang hko kyô é hkûn myit lhing kô é nghut mù, tará jéyáng é buinyi má, ipyat shí má é bang eq rahá toq lò luí, ipyat shí má é bang lé mara hùn kó râ nghut lhê; haù Yonaq htoq ko sù gi, ahkuí shí má jé nyi to bè. ⁴² Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyò yù bè nghut mù, haù tará jéyáng é buinyi má, ipyat shí má é bang eq rahá toq lò luí, ipyat shí má é bang lé mara hùn râ nghut lhê; haù Sholumon htoq ko sù gi, ahkuí shí má jé nyi to bè.

⁴³ Haù agè ashop é nat gi, byù rayuq chyáng mai htoq lò mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri.

⁴⁴ Haù hkûn, yhang gi, 'Ngò nyi lai lo é yhùm má dum taù ló wú rá.' ga taí ri. Yhang dum taù jé ló wú le, yhùm haù lé, ó le a sing yu hpyuq é htoq agó, san za rago dut to lánq é lé ló myang ri. ⁴⁵ Haù jáng, yhang gi, dum taù ê mù, yhâng htoq je wuí é nat nyhit nat lé shuí lò luí, haù má lo wang nyi to bekò. Haù mù, haù yuq é nyi yap sâmlai gi, hí lhê htoq má je wuí lò bè nghut ri; agè ashop é ipyat shí le, haù eq rajung za dut râ nghut lhê." gà ri.

Yesuq É Yhângnu Eq Yhanggù Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rù nyo nyi ashí hkûn, yhângnu eq yhanggu pé gi, Yhang lé nyò naù kômù, shinggan má lé yap tô akò nghut ri. ⁴⁷ Haù mù, Yesuq lé, "Nang nu eq nunggu pé gi, Nang lé nyò naù mù, shinggan má lánq yap bum akò." ga taí kyô akò.

⁴⁸ Haù hkûn, Yhang gi, "Ô pé gi, Ngá nu eq Ngá gu pé nghut akò lúh?" ga tù taí kat ri. ⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bè. ⁵⁰ Hkâsu mù gà le, mauhkung htoq má é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bè." ga xoq taí ri.

13

Kyôshi Sân É Dangtú

Mrk 4:1-20; Luk 8:4-15

¹ Haú nyí má yhang, Yesuq gi, yhúmkaú mai htoq ló mù, wui nhông yàm má é zung tô ri. ² Byù hpûng mó gi, Yhâng é lhíngkyuq má zup zing lé búm kô é yanmai, Yhang gi, lhaí hkaú má doq zùng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo tai é má, "Kyô hkyô sù rayuq gi, kyôshi san râ ga htoq é ló ri. ⁴ Yhang, kyôshi sân kat é hkún, ra-am gi, hkyô má gyô ang mù, nghoq pé èq lé hte zô pyám ri. ⁵ Ra-am gi, myi-tse a htú é luqgok yò pé má gyô ang mù, myi-tse a htú é yanmai, lui za yuq htoq lô kôle, ⁶ amyit a wó chin hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaú má gyô ang luí, zubyap haú pé kô lò mù, wup pyám ri. ⁸ Ra-am dum nghut jáng, myìhpún bo é jang má gyô ang luí, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le tai ri.

¹⁰ Haú hkún, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông tai lê lhê?" ga myí akô.

¹¹ Haú jáng, Yhang tú tai é gi, "Mauhkung mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byí shí é nghut lhê. ¹² Wó to sù lé gi, yhang agùn agó wó râ matú, jat byí shirá nghut lhê. A wó su chyáng mai kúm gi, yhang wó tô é lé hláng yu pyám byí shirá nghut lhê. ¹³ Yhangmoq gi, wú to kôlhang, a myàng kó; gyô nyí kôlhang, a wó gyo, a sê gyo kó nghut é yanmai, yhangmoq lé Ngô dangtú dông tai râ é nghut lhê. ¹⁴ Haú gi,

'Nungmoq gi, wó gyô tô nyí kôlhang, sê gyo kó râ a nghut;
myang tô nyí kôlhang, wú sé kó râ a nghut.

¹⁵ Hkâsu mù gà le, byù shí bang gi, myit nhikshi jit byuq bê;
yhangmoq é nohkyap gi, a wó gyo kó,
myoqji le chùm byuq bekô nghut ri.

Haú su a nghut le gi, yhangmoq, myoq myàng no gyo mù,
i-myt bun bóng luí, lhíng lò kômù,

Ngò, yhangmoq lé yâ gè byi berá nghut lhê.[✧]

gá é, Esai-aq é myiqhtoi dang lé lhoq dik é nghut ri. ¹⁶ Nghut kôlhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkàngsô wó nyí ri. ¹⁷ Hkâsu mù gà le, Ngò, nungmoq lé teng za tai kôlé, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng naù gyo naù kôlhang, a wó myàng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq;
¹⁹ Hkyô má gyô âng é kyôshi gi, mauhkung mingdán eq sêng é danglù lé wó gyo kôlhang, a sê gyô é yanmai, haú agé ashop sù lé lò mù, yhâng é i-myt hkaú má san kat tô é kyôshi lé, lé yu pyám byí é hui sù lé gá nau é nghut lhê.
²⁰ Luqgok yò pé má gyô âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chin é yanmai, razup zo za yuq mù, mungdang é yanmai, wuìhkê é eq zing-rí é hui kôjáng, hân hân htak ló byuq é sù lé gá nau é nghut lhê. ²² Zugyóm má gyô âng é kyôshi gi, haú mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zèhkoq èq hup pyám é yanmai, ashi a wó zuí é sù lé gá nau é nghut lhê. ²³ Nghut kôlhang, myìhpún bo é jang má gyô âng é kyôshi kúm

✧ 13:15 Esai 6:9-10

gi, mungdang lé wó gyo mù, sê gyô yu é sù lé gá nau é nghut lhê. Haú yuq ashí zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkúng mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkô luí, taú lò byuq bê nghut ri. ²⁶ Guq gàm yuq lò mù, guq nhâm htoq lo é hkùn, myoqgàm le bo yuq htoq lo ri.

²⁷ Yhumsing hpô é dui-nhâng zoshâng wuì gi, yhâng chyáng lé jé mù, 'Yhumsing ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng, ²⁸ haú yhumsing hpô gi, 'Gumlau gye êq kut é nghut ri.' ga tú taí ri.

Haú jáng, dui-nhâng zoshâng wuì gi, 'Ngamoq, myoq haú pé lé é nut pyám râ lé, nàng ô nau ri lhú?' ga myi akô.

²⁹ Haú hkùn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkùn, guq gàm pé lé le bo záng nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haú hkùn, myoqgàm pé lé hí hkyin tsing yù mù, nyhê hkyô pyám râ matú hkyom dng to luí, guq lé kúm gi, shù yù mù, ngá é chyí má tsing kat to râ matú, kyô shu bang lé ngò taí râ nghut lhê.' ga tú taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhú dum xoq taí é gi; "Mauhkúng mingdán gi, byù rayuq êq, yhâng hkyâm má hô tô é angshi cham eq wuì ri. ³² Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkúng mingdán gi, myiwe rayuq êq sungso mún sum búng má yu nyhó luí, haú pé banshoq lé wó lhoq dau nhang é múnchi eq wuì ri." gâ ri.

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lhang a taí wú nghut ri. ³⁵ Haú gi, "Ngá nhut lé hpóng mù, dangtú dông mai taí râ; mingkan lé sâng-hi hpan é mai záu tô é hkyô pé lé taí sân kyo râ nghut lhê."* ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmhkaú má wang ló ri. Haú hkùn, Yhâng é chángzô pé gi, Yhâng chyáng lé lô kômù, "Yò má é myoqgàm dangtú eq sêng é hkyô lé taí sân kyo laq." ga taí akô.

³⁷ Haú jáng, Yhang tú taí é gi, "Ge é kyôshi san sù gi, haú Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkúng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; ³⁹ haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htúm é ahkying nghut ri; kyô shu bang gi, maumang lagyô pé nghut akô.

⁴⁰ Haù myoqgàm pé lé, nut yù mù, myi má nyhê pyâm é su, haù mingkan htùm é ahkyíng má dut râ nghut lhê. ⁴¹ Haù Byu Yhangzo gi, Yhâng é maumang lagyô pé lé nhâng râ nghut lhê; haù mù, haù bang gi, hkyô lhoq ngoq nhang é bang banshoq eq agè ashop hkyô kut é bang lunglhang lé, Yhâng é mingdán mai hkyin she htoq yù mù, ⁴² gyúng nyi é myibung hkyúng hkaù má dú kat pyám kó râ nghut lhê; hau má, ngaubyi ngaù nhap eq zui kyik kyik shoq hpuzô nyi kó râ nghut lhê. ⁴³ Haù hkùn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkúng mingdán gi, yò má haq tô é sutzè eq wuí ri. Sutzè haù lé myang é sù gi, haù lé sai haq to mù, gabú myit eq taù ló luí, yhang wó é banshoq lé úng pyám mù, yò haù lé wuí yu ri.

⁴⁵ Dum, mauhkúng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaù é palhé lé myàng jáng, yhang wó é banshoq lé ló úng pyám mù, haù lé wuí yu ri.

Gùn Lé Dangtú Yu É Hkyô

⁴⁷ Mauhkúng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haù má ngozo byíng jáng, ngo kóng bang gi, wuí yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyám akò. ⁴⁹ Haù eq rajung za, mingkan htùm é ahkyíng má le, maumang lagyô pé gi, gyó lé ló mù, agè ashop é bang lé, dingmán bâng chyáng mai gam htoq yù luí, ⁵⁰ ngaubyi ngaù nhap eq zui kyik kyik shoq hpuzô nyi râ nghut é, gyúng nyi é myibung hkyúng hkaù má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekò lúh?" gâ ri.

Haù hkùn, yhangmoq gi, "Sê gyo bê." ga tù taí akò nghut ri.

⁵² Hau htâng, Yesuq gi, yhangmoq lé, "Mauhkúng mingdán eq séng luí mhoq yù bê é tarâ sará ó nghut kòle, yhang mhoq é hkyô gi, yhumsing é sut-púnglhung hkaù mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haù pé lé ban taí jáng, haù jowò mai htoq e ló bê nghut ri.

⁵⁴ Yhang gi, Yhâng é yhummau má já lé jó jáng, byu pé lé, yhangmoq é tarajong má mhoqshít ri; haù hkùn, yhangmoq gi, gyô maù byuq kòluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê làh? ⁵⁵ Yhang gi, laksíma hpó é yhangzo a nghut lúh? Yhângnú é myíng gi, Mariq gâ lhê a nghut lúh? Yhanggú pé gi, Yakuq, Yosep, Simun eq Yudaq gâ é bang a nghut kó lúh? ⁵⁶ Yhâng nhammó pé le, nga-nhung eq rahá nghut nyi lhê a nghut kó lúh? Haù su nghut le nhíng, haù pé banshoq lé, Yhang hkâmai wó yu é nghut lhê làh?" ga myí bùm kômù, ⁵⁷ Yesuq lé myit a ngón dut bùm bekò nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhùm má za, myoqdong a lhaq wó wú é nghut lhê." ga tù taí kat ri.

⁵⁸ Yhangmoq lumjáng myit a bò kô é yanmai, Yesuq gi, haú má, laklai kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haú hkún, mauzau Herut gi, Yesuq eq sêng é ludang lé wó gyo jáng, ² yhang a-ô má é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

³ Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tui yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyâm naú kôlhang, mingbyû wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhang, Herut é hkú ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit ngui mù, ⁷ byizo haú lé, yhang haí dung le haí byi râ ga dakam é danggidid byí ri. ⁸ Byizo haú gi, yhangnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlhang, yhang dakam tô é danggidid é yanmai le, bíng pé é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat lui, myiwe zo haú lé byi jáng, myiwe zo haú gi, haú lé yhângnú chyáng yu ló byí ri. ¹² Haú mù, Yohan é chángzô pé gi, yhâng é mâng lé lé yú lui, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhai jí mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri. ¹⁴ Yesuq gi, lhai mai gyó dap ló é hkún, byù moq mó nyi to láng é lé myàng jáng, yhangmoq lé wú shogyo lui, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló lui, yhangmoq é matú zôjung ló wó wui kó sháng gaq, yhangmoq lé nhang kat aq hkoi." ga taí akô.

¹⁶ Haú hkún, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tú taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tú taí akô.

¹⁸ Haú jáng, Yesuq gi, "Yu lò keq." ga tú taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkung shut tu wú to lui, jeju ban hkyá-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi,

zô myhit tô é pé lé, raxe í mung byíng shoq wó guq tsíng yu ashî kô nghut ri. ²¹ Háu má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

Yesuq, Wuì Htoq Má Sô É Hkyô
Mrk 6:45-56; Yhn 6:15-21

²² Yesuq gi, háu shiwa byu pé lé byo ló nhang nyi é hkún jáng, chángzô pé lé lhai má wang ji nhâng mù, tũ tap shut dap ló láng nhâng ri. ²³ Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú háu má nyi nyi ri. ²⁴ Háu u lé, lhai gi, gin-gau mai tósmra wê é jowò má jé é hkún, lai tau mut é yanmai, wuìheng eq gyaì yhang lo bat nhùn é hui zô ri.

²⁵ Htang napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Háu mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é eq taí garú akô nghut ri.

²⁷ Háu jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Háu hkún, Petruq gi, "Yhumsíng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taí kat ri.

²⁹ Háu jáng, Yesuq gi, "Lé lô aq." ga tũ taí kat ri.

Háu mù, Petruq gi, lhai mai gyó mù, wuì htoq mai Yesuq chyáng sô e ló ri.

³⁰ Nghut kôlhâng, yhang gi, laidun htan é lé myang kat jáng, wú gyuq luí, wuì má nop ló nyí mù, "Yhumsíng ê, ngo lé hkyi yù laq." ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé láng zing to mù, "Lumjíng myit shau sũ ê, nàng hai mù úng-âng lhê lúhú?" ga taí ri.

³² Yhangnhik, lhai má wàng kôjáng, laidun le zím byuq bê nghut ri. ³³ Hau htâng, háu lhai má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gũ dap ló kômù, Genesarat mau má jé wang ló bekô nghut ri. ³⁵ Háu mau má é bang gi, Yesuq lé wú sé kôjáng, awui ayàm má é bang banshoq lé kyô kat akô. Háu mù, byu pé gi, nòhpyo hui bang lhunglhang lé, shuí lé lô kômù, ³⁶ nòhpyo hui bang lé, Yhâng é bushi htâng má za lhang záng nhâng râ matú dũng tóngbán akô; Yhang lé záng é lhunglhang bang gi, lhoq gè byí é hui bekô nghut ri.

15

Sansêng É Hkyô Eq A Sansêng É Hkyô
Mrk 7:1-23

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, ² "Náng é chángzô pé gi, hai mù luí, íchyí îwa pé é htúngli lé a cháng kut akô lúhú? Yhangmoq gi, loq hí a chi é zang zô akô nghut ri." ga, lé taí akô.

³ Háu jáng, Yesuq tũ taí é gi, "Nungmoq gi, hai mù, nungmoq é htúnglí é yanmai, Garai Gasâng é hkunmó lé a cháng kô é lúhú? ⁴ Hkâsũ mù gâ le, Garai Gasang gi, 'Nungmoq é înu îwa lé, hkungga keq.'* ga le, 'Înu îwa lé, nhîng é sũ ó yuq nghut kôle, sat pyâm é hui râ lhê.'* ga le, taí tô é nghut lhê. ⁵ Nghut kôlhâng, nungmoq taí é gi, 'byù rayuq yuq, yhumsing é yhângnu yhângwa lé

byi âng é zè lé, Garai Gasang lé byi râ chyunghuq nghut lhê ga tai é nghut jáng, ⁶ haú yuq gi, yhângwa lé hkungga nó a ra.' gâ akô nghut ri. Haú đông mai, nungmoq gi, nungmoq é htunglí é yanmai, Garai Gasang é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri. ⁸ Myiqhtoi dang haú gi, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngo eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri; hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri. ¹⁰ gâ é nghut lhê." ga ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga tai ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nang sé lhê lhu?" ga myi kôjáng, ¹³ Yhang gi, "Mauhkung htoq tsáng myhâng mã é Ngá Wa a hô tô é agàm hkangmó gi, apùn eq roq nut pyâm é hui râ nghut lhê. ¹⁴ Yhangmoq é yanmai, myit hkâ-myô kô; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhum é nghut le gi, í yuq é yhang donghkong má byit gyo kô rà za nghut lhê." ga tù tai ri.

¹⁵ Haú hkûn, Petruq gi, "Ngamoq lé, dangtú hau é lichyúm tai sân kyo laq." ga tai jáng, ¹⁶ Yesuq gi, "Nungmoq, ahkuí le haú-í yhang go nyi ashi kô luq? ¹⁷ Nhut má wang lo é hái jung le, wamdau hkaú má jé wang ló mù, gungdu mai dum htoq ló é nghut lhê. ¹⁸ Nghut kôlháng, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhum mai htoq lo é gi, agê ashop é đông gungsho zùm yap é hkyô, byù sat é hkyô, su-myi sulàng lú hkyô, ashop é đông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga tai ri.

Hkanan Myiwe Myhí Rayuq É Lumjǐng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bè nghut ri. ²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsing ê, ngo lé shogyô yù laq ô! Ngá byzo gi, nat gang wang júng mù, gyai yhang nó gyin nyi ri." ga tai garû ri.

²³ Nghut kôlháng, Yesuq gi, dang rahkun le a tù tai nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí hau lé ló nhang pyâm aq; hai mù gâ le, yhang gi, nga-nhùng é htâng má châng garû nyi ri." ga tai akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga tai ri.

²⁵ Haú hkûn, myiwe myhí hau gi, Yhâng é hí má lé mù hkyihput htuq luí, "Yhumsing é, ngo lé garúm yù laq ô!" ga tai ri.

²⁶ Yesuq gi, "Zô wui chyáng má é zoshuq lé yù mù, hkuí pé lé byi tsô é jung a nghut." ga tù tai jáng, ²⁷ myiwe myhí haú gi, "Yhumsing ê, haú kúm nghut ri; nghut kôlhang, hkuí pé lhang, yhumsing hpô é zohpoq mai gyó é zang cham zang htâng lé, zô akô mhai." ga dum tai ri.

²⁸ Haú mù, Yesuq gi, "Myiwe zo ê, náng é lumjing myit gi, kô nyi ri! Nàng dúng é hkyô lé gyo byi bê nghut lhê." ga tù tai ri. Haú hkún jáng, myiwe myhí hau é byizo le ge byuq bê nghut ri.

Byù Myi Hkyíng Lé Byi Tsô É Hkyô

Mrk 8:1-10

²⁹ Yesuq gi, haú mai htoq ló luí, Galile nhông yàm má é jé mù, bùm shut doq ló luí, ló zung nyi ri. ³⁰ Haú hkún, byù moq mó gi, hkyí hten bang, myoqjit bang, gung-yùn bang, nhut jit bang eq nò bang gotù myo myo lé shuí lé lô kômù, Yhâng é hkyí wang má lé nyhi to kô é nghut luí, Yhang gi, haú bang lé lhoq gê byí ri. ³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é lé le, hkyí hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkyá-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, hai le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gù lé, Ngò a nhang kat naù." ga tai ri.

³³ Haú hkún, Yhâng é chángzô pé gi, "Isù é yoso má nhing, byù shí myhò bang lé luq shoq byi tso rá zoshuq gi, hkarâ é wó rá lú?" ga myí akô.

³⁴ Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tù tai akô.

³⁵ Haú mù, Yhang gi, byù hpúng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkyá-on jáng, myhik hpé luí, haú chángzô pé lé byi jáng, yhangmoq gi, byù hpúng lé gàm byi akô nghut ri. ³⁷ Yhangmoq lhunglhang bang zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsing yu ashí kô nghut ri. ³⁸ Haú hkún zô é bang má, myiwe wui eq zoshâng wui lé a nhang lhôm é za, yuqgè wui baú myi hkyíng yuq bo ri. ³⁹ Yesuq gi, byù hpúng lé ló nhang pyâm é htâng má, lhai má wang ji mù, Magadan mau shut dap e ló bê nghut ri.

16

Kumlhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkúng má é kumlhá kut shit rá matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpông rá nghut lhê, hkâsu mù gà le, mauhkúng ne ri.' ga le, ³ napkyó lé nghut jáng, 'Hkú-nyí laidun lò rá nghut lhê, hkâsu mù gà le, mauhkúng nè mù, noq ri.' ga le, lhaq tai akô. Nungmoq gi, mauhkung é isám lé wú mù sê gam hkoq yú kô é nghut kôlhang, shí ipyat lhê é kumlhá lé gi, a sê gam hkoq yú kô nghut ri. ⁴ Agé ashop é eq lhum a zuí é ipyat shí gi, limik kumlhá lé ho nyi akô; nghut kôlhang, Yonaq é kumlhá mai lai luí, gotù hai le tûn shit rá a nghut." ga tai ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi
Mrk 8:14-21

⁵ Yhangmoq, nhông hé hpoq shut gû dap ló kô é hkûn, haù chángzô pé gi, muk yu chûng râ lé tô-myhî pyâm akô. ⁶ Haù hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haù su ga taí é nghut ri." ga luí, taí lhum bum akô nghut ri.

⁸ Yhangmoq haù su taí lhûm nyi kô é lé Yesuq sé jáng, yhangmoq lé, "Lumjîng myit shaù é bang ê, muk a bo é hkyô lé, haí mù taí lhûm nyi akô lúhú? ⁹ Ahkuí jé shoq, nungmoq gi, a sê gyo shi kó lúhú? Muk ngo lông eq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, ¹⁰ muk nyhit lông eq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, nungmoq a myit bun kó lúhú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pé é múnchi lé koi pyám keq nghû taí é ru nghut lhê." ga taí ri. ¹² Haù hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pé é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô
Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haù Byu Yhangzo gi, ó yuq nghut lhê ga, byu pé taí akô lúhú?" ga myî ri.

¹⁴ Haù hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotù myiqhtoi rayuq yuq nghut ri ga, taí akô." ga tù taí kôjáng, ¹⁵ Yhang gi, "Haù jáng, nungmoq gi, Ngo lé ó yuq nghut lhê nghu akô lúhú?" ga, yhangmoq lé xoq myî ri.

¹⁶ Haù hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tù taí ri.

¹⁷ Haù mù, Yesuq tù taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haù hkyô tún shit é gi, byù mai a nghut, mauhkûng htoq má nyi é Ngá é Iwa mai tún shit é ru nghut lhê. ¹⁸ Ngò, nang lé taí lé, nàng gi, Petruq* nghut luí, luggok shi má, Ngò, Ngá é noqkuq hpúng lé xuq tò rà nghut mù, haù moming hkúmdong pé gi, hpúng haù lé wó úng rà a nghut. ¹⁹ Mauhkûng mingdán é zoqshi pé lé, Ngò, nang lé ap byi rà nghut lhê; myigùng htoq má, nàng tuí to má tuí to lé, mauhkûng htoq má le, tuí to rà nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi rà nghut lhê." gâ ri. ²⁰ Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

Yesuq Gi, Yhang Shî Râ Lé Hí Te Taí É Hkyô
Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuî, hkyangjong agyi pé eq tará sará pé é loq má, zing-ri é myo myo hui zo luí, sat pyâm é hui ra rà nghut kôle, sum nyî nghû rà buinyi má, lhoq toq yu é hui rà nghut é hkyô lé, haù hkûn mai, Yhâng é chángzô pé lé taí kyo hi ló bê nghut ri.

* 16:18 Grik đông Petruq gâ é gi, luggok lé gâ é nghut lhê.

²² Haû mù, Petruq gi, Yhang lé rahkyam shut shuí htoq yû mù, "Yhumsing ê, haû hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garaí Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

²⁴ Hau htàng, Yhang gi, Yhâng é chángzô pé lé, "Ngá htàng cháng naù sù ó yuq nghut kôle, yhumsing gung yhumsing he-ngik pyam mù, yhumsing é tapzing lé waq chùng luí, cháng ra rá nghut lhê. ²⁵ Hkâsu mù gâ lé, yhumsing é asak lé hkyi yù naù sù ó yuq nghut kôle, asak sum rá nghut lhê; nghut kôlháng, Ngá é yanmai, yhumsing é asak sùm pyâm é sù kúm gi, asak wó yù rá nghut lhê.

²⁶ Byù gi, mingkan gón lé wó sing to kôlháng, yhumsing é asak woi-nyí sùm byuq é nghut le gi, yhang é matú, hai akyú bò rá lúh? Byù gi, yhumsing é asak woi-nyí lé, hai eq wó htaí yù rá lúh? ²⁷ Haû Byu Yhangzo gi, Yhâng Wâ é hpungwup shing kang bo é eq, Yhâng Wâ é maumang lagyó pé eq rahá jé lé lô rá nghut lhê; haû hkùn, Yhang gi, yuq hkangmó lé, yhumsing kut lai bê eq rajung za akyú byi rá nghut lhê. ²⁸ Ngò, nungmoq lé teng za taí kôlé, ahkuí shí má yap to bang ra-am gi, haû Byu Yhangzo, Yhâng é mingdán eq jé lé lo é lé, a myang é za shí kô rá a nghut." ga taí ri.

17

Yesuq, Isâm Htaí Lo É Hkyô
Mrk 9:2-13; Luk 9:28-36

¹ Hkyuq nyí lai htàng má, Yesuq gi, Petruq lé le, Yakuq eq yhanggu Yohan nhiktàng lé le, shuí chùng mù, yhangmoq baù myhang é bùm ralhúm má doq lô akò. ² Haû má, yhangmoq é myoq hí té má, Yesuq é ihpyó isâm htaí byuq mù, Yhâng é myoqdong gi, bui su duqbó tò é eq, Yhâng é mebu gi, maubó su hpyu zan tô ri. ³ Haû hkùn jáng, Mosheq eq Eliyaq gi, yhangmoq é hí má htoq shit mù, Yesuq eq dánh nyo lhum nyi akò.

⁴ Haû mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhúm, Mosheq é matú ralhúm, Eliyaq é matú ralhúm kut, ngò zúm sùm lhum saí bá." ga taí ri.

⁵ Petruq dang ru taí nyi ashí le, duqbó é mhut gi, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekò nghut ri. ⁷ Nghut kôlháng, Yesuq gi, yhangmoq chyáng jé lé lô mù, yhangmoq lé loq eq záng kat luí, "Toq keq, hkâgyuq kó." ga taí ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taù gyó lô kô é hkùn, Yesuq gi, "Ahkuí nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkùm tô ri.

¹⁰ Haû jáng, chángzô pé gi, "Eliyaq hí lé ra rá nghut lhê ga, tará sará pé hai mù taí kô é lúh?" ga, Yesuq lé myí akò.

¹¹ Haû hkùn, Yesuq gi, "Eliyaq hí lé luí, lhunglháng lé hen lajáng to rá gâ é gi, têng lhê. ¹² Nghut kôlháng, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekò nghut ri. Haû eq rajung za, haû Byu Yhangzo le, yhangmoq é loq má hpuzo rá nghut lhê." ga taí ri. ¹³ Haû hkùn sheq,

Yhang taí nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

Nat Wang Júng Sù Lé Lhoq Gê Byí É Hkyô

Mrk 9:14-32; Luk 9:37-45

¹⁴ Yhangmoq, byu moq mó pé chyáng dum taú jé lô kô é hkùn, byu rayuq gi, Yesuq chyáng lé jé mù, hkyihput htuoq lui, ¹⁵ "Yhumsing ê, ngá é yuqzo lé shogyô yù laq; yhang gi, mhúngtuq tuq lui, gyai yhang jamjaú nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

¹⁷ Haú mù, Yesuq gi, "Lumjúng myit a bo é eq agè ashop é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi rã lúh? Yuqgè zo haú lé, Ngá chyáng shuí lé lô keq." ga tú taí kat ri. ¹⁸ Yesuq gi, nat gang lé tân kat jáng, nat gang haú gi, yuqgè zo haú yuq chyáng mai htoq ló byuq bê nghut mù, haú hkùn jáng, yuqgè zo haú gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lúh?" ga, lé myi kôjáng, ²⁰ Yhang gi, "Nungmoq é lumjúng myit shaú é yanmai nghut ri. Ngò, nungmoq lé teng za taí kôlé, nungmoq é lumjúng myit angshi cham í za hkâlháng bò kô é nghut le gi, bùm shí lé, 'Hé shut htot ló aq.' ga taí le, htot rã nghut lhê. Nungmoq a wó kut é haí lháng joq rã a nghut. ²¹ Shí jung gi, kyúdung é eq zoshuq gám é dông za a nghut jáng, a htoq ló é nghut lhê.*" ga dum tú taí ri.

²² Yhangmoq, Galile mau má rahá zup nyi kô é hkùn, Yesuq gi, yhangmoq lé, "Haú Byu Yhangzo gi, byu pé é loq má ap pyâm é hui zo rã nghut lhê. ²³ Haú bang gi, Yhang lé sat pyám kó rã nghut lhê; nghut kôlhang, Yhang gi, shi é htâng sum nyí nghú rã nyí má lhoq dui toq é hui rã nghut lhê." ga taí ri. Haú mù, haú chángzô pé gi, gyai yhang gyô yón nyí bekô nghut ri.

Noqkuq Yhùm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkùn, noqkuq yhùm hkansê hkyuú bang gi, Petruq chyáng lé jé kômù, "Nungmoq é sará gi, noqkuq yhùm hkansê a kat lúh?" ga myí akô.

²⁵ Petruq gi, "Kat lhê." ga tú taí ri.

Hau htâng, Petruq yhùmhkaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pé chyáng mai guq yu akô lúh? Yhumsing byu pé chyáng mai lúh? Haú a nghut jáng, góbâng chyáng mai lúh? Nàng, hkâsu wó myit lhê lúh?" gâ ri.

²⁶ Haú mù, Petruq gi, "Góbâng chyáng mai nghut ri." ga tú taí jáng, Yesuq gi, "Haú su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myt a ngón a dut kó sháng gaq, nhông má é mù, ngo-nhe é hkyô aq. Sâng-hi wó nhê yu é ngozô é nhut lé lãng há kat jáng, ngùn htíngchap rachap lé myàng rã nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sù Gi, Ó Yuq Nghut Lhê Lúh?

Mrk 9:33-37, 42-48; Luk 9:46-48; 17:1-2

* 17:21 Chyúmbun shí gi, chyúmding myo myo má a bo é nghut lhê.

¹ Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sù gi, ó yuq nghut lhê lúhú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí. ³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhám le wó wâng kó rá a nghut. ⁴ Haú mù, zoshâng zo shí yuq su, yhumsing é i-miyit wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjîng é zoshâng wuí mã é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè rá nghut lhê.

⁷ Haú mingkan gi, byu pé lé mara kut shut nhâng jang joq é yanmai, dingnyé wó ri. Haú mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gù dú hkyô pyâm é huí rá htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gù ngarai myi má dú hkyô pyâm é huí rá htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wuí mã é rayuq lé lhang a wú tiq rá matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mã é yhangmoq é maumang lagyô pé gi, mauhkûng htoq mã é Ngá Wâ é myoqdong lé, hkâ-nhám le myang nyi akô. ¹¹ (Hkâsu mù gâ le, haú Byu Yhangzo gi, byuq byuq bê bang lé hkyi yù rá matú, jé lé é nghut lhê.)*

¹² Byù rayuq gi, sau rashô du wó é nghû sháng, sau haú gû mã é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi rá lúhú? Haú lé, nungmoq hkâsu wó myit ngam akô lúhú? ¹³ Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkûn, a lám byuq é sau gaú xe gaú dù é matú gabú é htoq má, haú dù matú je riyhang gabú ri. ¹⁴ Haú eq rajung za, mauhkûng htoq mã é nungmoq é Íwa gi, shí tiq bang mã é rayuq htên byoq byuq rá lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng é mù, nungnhik baú za nghut é hkûn, yhâng é mara lé tún shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri. ¹⁶ Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq. *[☆] gâ tô é eq rajung za, nang, gotú byù ra-í yuq lé shuí chûng aq. ¹⁷ Yhang gi, haú bang é dang lé le a lhom yu é nghut jáng, haú hkyô lé, noqkuq hpúng má shit kyo aq;

* **18:11** Bun zo shí gi, chyúmding myo myo má a bo é nghut lhê. ☆ **18:16** Tarâ Pun 19:15

hpông é dang lé le a gyo é nghut jáng, yhang lé, a lumjáng é byù rayuq dông le, kang guq sú rayuq dông le sôn pyám aq.

¹⁸ Ngò, nungmoq lé teng za tái kôlé, myigùng htoq má, nungmoq tuí to má tuí to lé, mauhkúng htoq má le, tuí to rá nghut lhê; myigùng htoq má, nungmoq lhoq lhut má lhoq lhut lé, mauhkúng htoq má le, lhoq lhut byi rá nghut lhê.

¹⁹ Ngò, nungmoq lé dum tái kôlé, myigùng htoq má, nungmoq mâ é í yuq myit hui lui, hai lé dung kôhang, mauhkúng htoq mâ é Ngá Wa gi, haú nhik lé gyo byi rá nghut lhê. ²⁰ Hkâsu mù gâ le, Ngá mying lé lang lui, í yuq sum yuq zup zing é jang hkâmá nghut kôhang, haú bâng é gyoro má Ngò nyi lhê." gâ ri.

Shogyo Nhikmyin A Sê É Jùn Hpô É Dangtú

²¹ Haú hkûn, Petruq gi, Yesuq chyáng hui é mù, "Yhumsing ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rá lhú? Nyhit dâm jé shoq hkyut byi ra rá lí?" ga myí ri.

²² Haú jáng, Yesuq tú tái é gi, "Ngò, nang lé tái lé, nyhit dâm za a nghut, nyhit xe nyhit tú dâm hkyut byi rá lhê.

²³ Mauhkúng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yhang gi, jihpán lé jep hi ló é u lé, yhâng chyáng ngùn wan myo myo chyín dap to sú lé shuí lé lo akô. ²⁵ Haú yhumsing hpó gi, haú yuq chyín a wó xap é yanmai, chyín wó yù rá matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám rá hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htuaq lui, 'Ngo lé myit hâng byi shi laq; banshoq lé, ngò xap rá.' ga dúng tóngbán ri.

²⁷ Haú dui-nhâng zôshang é yhumsing hpó gi, haú yuq lé wú shogyo lui, chyín banshoq lhut pyám byi mù, nhang kat ri.

²⁸ Nghut kôhang, dui-nhâng zoshâng haú gi, htoq ló mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga tái ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuaq lui, 'Ngo lé myit hâng byi shi laq; ngò xap rá.' ga dúng tóngbán ri.

³⁰ Nghut kôhang, yhang gi, a gyo byí e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotú dui-nhâng zoshâng wui gi, haú hkyô lé myàng kôjáng, i-myt wú nô kôlui, yhangmoq é yhumsing hpó lé, haú hkyô banshoq ló tái kyô akô.

³² Haú mù, haú yhumsing hpó gi, dui-nhâng zoshâng haú lé wut hâng yù mù, 'Agé ashop é dui-nhâng zoshâng ê, nàng, ngo lé dúng tóngbán é yanmai, nàng, ngo lé dap é chyín banshoq lé, ngò lhut pyám byi bê nghut lhê mhai. ³³ Haú su é nhing, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhé a nghut lhú?' ga tái lui, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo rá matú, yhang lé, htóng suwún pè chyáng ap byí pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkúng htoq tsáng myhâng mâ é Ngá Wa le, nungmoq lé haú dông kut rá nghut lhê." gâ ri.

† 18:28 Denari rachap gi, ra-nyi lhê é byù rayuq é zuihpau eq wui ri.

19

*Myi Làng Gâng É Hkyô**Mrk 10:1-12*

¹ Yesuq gi, mhoqshit é dang háu pé lé ban tai jáng, Galile mau mai htoq ló mù, Yodan làng tú tap mâ é Yuda mau má ê jé ri. ² Byù moq mó gi, Yhâng htâng cháng kô é nghut mù, Yhang gi, háu bang mâ é nôhpyo hui bang lé, háu má lhoq gé byi ri.

³ Háu hkún, Hparishe pé ra-am gi, Yhâng chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyâm le, tarâ wang lhê lú?" ga myí akô.

⁴ Háu jáng, Yhang tú tai é gi, "A-nham sâng-hi lé, Hpân Sù, 'byu hpan é hkún, yuqgè eq myiwe lé hpan é nghut lhê.' ⁵ 'Hau é yanmai, yuqgè gi, yhumsing é ínu íwâ chyáng mai htoq lui, yhangmyi eq ráhá rading ralhum za kut nyí mù, yhangnhik gi, gungsho ralhum za dut byuq kó rá nghut lhê.' ⁶ ga kâ tô é lé, nungmoq a nghap wó kó lú? ⁶ Háu mù lui, yhangnhik gi, í yuq a nghut lô e za, rayuq za dut bê nghut ri. Háu mù lui, Garai Gasang lhoq tsúm tô é lé, byù gi, a lhoq kang sháng gaq." gâ ri.

⁷ Háu hkún, yhangmoq gi, "Háu lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, hái mù, Mosheq, hkunmó hkyô tô lhê lú?" ga, Yhang lé dum tau myí akô.

⁸ Háu mù, Yesuq gi, "A-nham sâng-hi mai gi, háu đông a nghut. Nghut kôlhang, nungmoq é myit nhiklhum htân kô é yanmai, nungmoq é yhangmyi pé lé lhoq kang rá ahkáng, Mosheq byí tô é ru nghut lhê. ⁹ Ngò, nungmoq lé tai kôlé, sulàng lú é za a nghut jáng, yhumsing é yhangmyi lé káng pyâm mù, myiwe gotú dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tú tai ri.

¹⁰ Háu hkún, háu chángzô pé gi, "Myi làng hkyô má háu đông ru nghut le gi, a yu le lhang je ge nyo ri." ga tai akô.

¹¹ Háu mù, Yesuq gi, "Yuq hkangmó gi, dang háu lé wó hap yu é a nghut, wó hkâm rá jeju wó é bang za sheq, wó hap yu é nghut lhê. ¹² Byù ra-am gi, ínu unghkaú mai yhang, yuqgè a jé gú hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé rá đông kut yu pyâm akô nghut ri. Shí hkyô lé wó hap yu sù gi, hap yu sháng gaq." ga dum tai ri.

*Zoshâng Wui Eq Yesuq**Mrk 10:13-16; Luk 18:15-17*

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Háu chángzô pé kúm gi, háu shuí lé lô bang lé lhom tân hkûm akô nghut ri.

¹⁴ Nghut kôlhang, Yesuq gi, "Háu zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, háu sù é bâng é mingdán ru nghut lhê." ga tai kat ri. ¹⁵ Yhang gi, zoshâng wui htoq má loq ke shimân byi mù, háu jowó mai htoq ló bê nghut ri.

*Sùt Wó É Zorâm Rayuq É Hkyô**Mrk 10:17-31; Luk 18:18-30*

¹⁶ Byù rayuq gi, Yesuq chyáng lé jé mù, "Sarâ é, ahtum abyuq é asak wó yú rá matú, ge é muzó hái kut ra rá lú?" ga myí ri.

17 Haú jáng, Yesuq gi, "Ge é hkyô eq séng luí, haí mù Ngo lé myí lhê lú? Ge é Sù gi, rayuq za nyí lhê. Nàng, asak dui é má wàng nau é nghut le gi, jep é tará pé lé cháng aq." ga tù tai ri.

18 Haú yuq gi, "Hká gù lé lú?" ga dum myí jáng, Yesuq gi, "'Byù hkâsat, su-myi hkâlú, hkâhkau, a teng a mán é saksé hkâhkâm, 19 nángnu nángwa lé hkungga aq, ☆ ga le, 'náng gùng lé nàng chyitdap e su, náng é chyangnâm má é bang lé le chyitdap aq. ☆ ga le bo tô ri." ga tai kat ri.

20 Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut rã ashí lú?" ga dum taù myí ri.

21 Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám luí, myùng bang lé byí pyám aq; haú jáng, nàng, mauhkûng htoq má sutzè wó rã nghut lhê; haú mù, Ngá htàng lé cháng aq." ga tù tai ri.

22 Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

23 Hau htàng, Yesuq gi, Yhâng é chángzô pé lé, "Ngò, nungmoq lé teng za tai kôlé, sutzè wó bang gi, mauhkûng mingdán wó wàng rã gyai yhang wui ri.

24 Hau htoq agó, Ngò, nungmoq lé tai kôlé, sutzè wó sù rayuq, Garai Gasâng é mingdán má wó wàng rã htoq, gola-uq radu ãpno mai wó wang lai rã gi, je lui rã nghut lhê." ga tai ri.

25 Haú chángzô pé gi, haú su gâ é lé wó gyo kôjáng, haú ru nghut le gi, ó yuq za hkyi yu é hui rã nghut lhê lú?" ga Yhang lé myí akò nghut ri.

26 Haú hkûn, Yesuq gi, yhangmoq lé wú kat mù, "Haú hkyô lé byù mai gi, wó kut rã a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tai ri.

27 Haú hkûn, Petruq gi, Yhang lé, "Ngamoq gi, wó é gù lhunglhang lé tô pyâm to luí, Náng htàng cháng bê nghut lhê. Ngamoq, haí wá wó rã nghut lhê lú?" ga myí kat ri.

28 Haú mù, Yesuq tù tai é gi, "Ngò, nungmoq lé teng za tai kôlé, lhunglhang lé asik dum sai dut nhang é má, haú Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htàng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyù raxe í hú lé jéyáng kó rã nghut lhê. 29 Ngá é yanmai, yhumsing é yhûm, nhiktàng wui, ìnu ìwa, zo dù wui eq yò pé rajung jung lé tô pyâm tô é sù ó yuq nghut kôlé, rashô tú akyù myo jat shoq wó rã nghut é htoq agó, ahtum abyuq é asak le, wó yù rã nghut lhê. 30 Nghut kôlhang, hí nghut nyí é bang myo myo gi, htàng gyó byuq kó rã nghut mù, htàng gyó nyí bang yuq gi, hí bekô rã nghut lhê.

20

Tsibiyiq Hkyâm Mù Zui Bang Lé Dangtú Yu É Hkyô

1 Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng rã langchyáng é lùng rã ga, napsùn noq le htoq e ló é hkyâm yhumsing eq du ri. 2 Yhang gi, ra-nyí é matú denari rachap byi rã đông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mù le a kut é za, gai má yap tô é bang ra-am lé é myang ri. ⁴ Haú mù, yhang gi, haú bang lé, 'Nungmoq le, ngá é hkyâm má mù ê zui keq; byi âng é ahpau, ngò, nungmoq lé byi râ nghut lhê.' ga tái jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhâng sum hkyíng kô má le, dum htoq é mù, haú eq rajung za langchyâng pé é lung kat ri. ⁶ Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, é myâng mù, haú bang lé, 'Nungmoq gi, haú le a kut é za, ra-nyí buí haí mù shí má yap tô bum akô lúh?' ga myi jáng, ⁷ haú bang gi, 'Ngamoq lé, ó yuq eq le a lùng kô é yanmai nghut lhê.' ga tú tái akô.

Haú hkûn, yhang gi, 'Nungmoq le, ngá é hkyâm má mù ê zui keq.' ga tái ri.

⁸ Myinhâng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyâng pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga tái ri.

⁹ Myinhâng ngo hkyíng má mù wàng bang le, denari rachap chap wó yu bum akô. ¹⁰ Haú mù, je hí má mù wàng bang gi, yhangmoq je myo wó nhò ngam akô. Nghut kôlhang, yhangmoq le, rayuq denari rachap chap za wó akô nghut ri. ¹¹ Yhangmoq gi, haú myhó za wó yu bùm kô é yanmai, haú hkyâm yhumsing lé, ¹² 'Shí bang gi, je htâng má mù lé wàng mù, nayí rahkum za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byi ri.' ga mara hûn dang tái akô.

¹³ Nghut kôlhang, haú hkyâm yhumsing gi, haú bang má é rayuq lé, 'Buinum hpó ê, ngò, nàng lé a tará é đông kut é a nghut. Denari rachap byi râ nghú, nàng eq ngò myit huí to bê a nghut lúh? ¹⁴ Nàng wó âng é lé yu chùng mù, ló aq. Je htâng má mù lé wang é sù lé le, nàng lé byi é myhó, ngò byi nau ri. ¹⁵ Ngá é ngùn lé, ngò kut nau é su a ge kut lúh? Ngò, ge é kut le, nàng manôn ri lúh?' ga tái ri.

¹⁶ Haú mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó rá nghut lhê." gâ ri.

Yesuq Gi, Yhang Shí Râ Hkyô Lé Dum Tái Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotú kut wut yù mù, ¹⁸ 'Nga-nhung gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tará sará pé é loq má ap byí pyâm é hui râ nghut lhê; haú bang gi, Yhang lé, shí râ mara byi kó rá nghut é htoq agó, ¹⁹ jóng pyâm é, nhuq bat é eq tapzing má jén sat pyâm é hui râ matú, haú tũngbaù pé é loq má ap pyâm kó rá nghut lhê. Nghut kôlhang, Yhang gi, sum nyí nghú râ buinyi má, lhoq duí toq é dum hui râ nghut lhê." ga tái ri.

Zô Nhik Matú Ínu Êq Dung Byí Ê Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômá, rajung dung rá matú, Yesuq é hí má hkyihput htuq nyi ri.

²¹ Haú mù, Yesuq gi, "Nàng, haí ô nau ri lúh?" ga yhang lé myi jáng, yhang gi, "Náng é mingdán má, shí ngá zô nhiktang lé, Náng é loqyò hkyam má rayuq, loqpaí hkyam má rayuq kut, zùng rá ahkáng byi laq." ga tái ri.

* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hí lhê.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lúhú?" ga myi jáng, yhangnhik tâng gi, "Wó shuq lhê." ga tú taí akò nghut ri.

²³ Haú mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byi jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

²⁴ Gotú chângzo raxê yuq gi, haú hkyô lé wó gyo kôjáng, haú nhiktâng lé nhik-yô akò nghut ri. ²⁵ Haú mù, Yesuq gi, yhangmoq banshoq bang lé wut tsing yù luí, "Túngbaù pé lé uphkan é ga bang gi, túngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shihtáí gunglik hkungga dông, Yhâng é asak lé byi pyám râ matú sheq, jé lé é ru nghut é su, ²⁷ nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê. ²⁸ Hau htoq agó, nungmoq má ushuq dut nau sù ó yuq nghut kôle, nungmoq é jùn dut ra râ nghut lhê." ga taí ri.

Myojit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chângzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akò. ³⁰ Haú hkyô yàm má zung tô é myojit í yuq gi, Yesuq lai ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garú kat akò nghut ri.

³¹ Byù moq mó gi, yhangnhik zím byuq râ matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mò eq wut garú kat akò nghut ri.

³² Haú mù, Yesuq gi, yap kat mù, "Ngò, nungnhik lé haí kut byi râ ô nau akò lúhú?" ga, yhangnhik lé wut myi kat ri.

³³ Haú hkûn, yhangnhik gi, "Yhumsing ê, ngá-nhik myoq myàng nau ri." ga tú taí akò.

³⁴ Yesuq gi, yhangnhik lé wú shogyo luí, yhangnhik é myoqjí má é záng byi ri. Haú hkûn jáng, yhangnhik gi, myoq wó myàng kômù, Yhâng htâng châng bekò nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chângzô pé gi, Yerusalem wà mó eq chyâng lo nyi kô é hkûn, Tsanlun Bùm má é Bethpage wà má jé ló kôjáng, Yesuq gi, chângzo í yuq lé, ² "Nungnhik, hí má é wà má ê keq; wà haú má, logúng zing radu lé, logúng zo eq rahá tuí to láng é lé, ê myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haú Yhumsing chùng râ ri.' gâ nghú tú taí keq; haú jáng, yhang, radá dâm nhâng byi râ nghut lhê." ga Yesuq taí luí, nhang kat ri.

† 20:22 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

⁴ Haù gi, myiqhtoi dang lhoq dik râ matú dut lo é nghut ri. ⁵ Myiqhtoi dang haù gi,

"Zi-un byizo* lé, shí su nghú keg; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"*

gâ ri.

⁶ Haù chángzô nhik gi, e ló mù, Yesuq taí kat é eq rajung za é kut bekô nghut ri. ⁷ Yhangnhik gi, logúng me lé she lò mù, yhangnhik é buhíng pé lé, haù logúng mè é htoq má ke byi kôjáng, Yesuq gi, doq jî ri. ⁸ Byù moq mó má é myo myo gi, yhangmoq é buhíng lé, hkyô má hkyut hkang byí akô; ra-am gi, mhandíng pé lé zân hkyô yù mù, hkyô má hkang byí akô nghut ri. ⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí sháng gaq ô!"

"Haù Yhumsing é myíng mai jé lé lô Sù gi, hkungsô wó nyí sháng gaq ô!"*

"Htoq tsáng myhâng má, hosana nghut nyí sháng gaq ô!"

ga luí, taí garú bum akô nghut ri.

¹⁰ Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhè lhà?" ga luí, myi lhùm bum akô.

¹¹ Haù hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhè." ga taí akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhùm má wang é mù, haù má é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é siboí pé eq hpúngkyui ung zo bâng é tanghkuq pé lé, tu mhuc pyám byí ri. ¹³ Haù hkûn, Yhang gi, "Ngá yhùm gi, kyúdung yhùm ga râ nghut lhè."* ga kâ to kôlhang, nungmoq gi, jowò shí lé 'damaq hkyúng'* kut nyi akô." ga, yhangmoq lé taí ri.

¹⁴ Yesuq, noqkuq yhùm má nyi tô é hkûn, myoqjit bang eq hkyí hten bang Yhâng chyáng lé lô kômù, Yhang gi, haù bang lé lhom lhoq gè byí ri. ¹⁵ Nghut kôlhang, hkyangjong agyi pé eq tarà sará pé gi, Yhang kut é mauho muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wuì garú nyi bùm kô é lé le, myàng kôjáng, wú nhik-yô bum akô nghut ri.

¹⁶ Haù mù, yhangmoq gi, "Zoshâng shí bang haí taí nyi kô é lé, Nàng wó gyô lhè lú?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuì eq nyheqnú pé é nhut mai hkya-on kungtôn râ matú, nàng lajàng to bê nghut ri.'*

ga kâ tô é lé, Chyúmdang má a nghap wú kó lú?" ga yhangmoq lé taí ri.

¹⁷ Hau htâng má, Yhang gi, haù bang lé nyhi to luí, wà hkaù mai htoq ló mù, Behrani wà má é jé luí, haù myín, haù má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

* 21:5 Zi-un byizo gâ é lichyúm gi, Yerusalem byu pé gâ é nghut lhè. ✧ 21:5 Zhk 9:9 † 21:9 Hebre dang má, hosana gâ é gi, "ahkuí hkyi yù laq" gâ é nghut lhè. Nghut kôlhang, bun zo 9 má gi, hkya-on dang dông chung é nghut lhè. ✧ 21:9 Hkya-on 118:26 ✧ 21:13 Esai 56:7 ✧ 21:13 Yer 7:11

✧ 21:16 Hkya-on 8:2

¹⁸ Yhang gi, htang napkyó noq le, Yerusalem wà mó shut dum taú ló é hkùn, hkyô má zòmut hui bê nghut ri. ¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai lui, hái lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashí a zui sháng gaq." ga taí kat ri. Haú hkùn jáng, agàm haú gi, nyhuí kyuq shí ló byuq bê nghut ri.

²⁰ Haú chángzò pé gi, haú lé myàng kôjáng, maú byuq kômù, "Maihpáng gâm shí gi, hái mù haú-í hân nyhuí kyuq shí ló lê là?" ga myí akó.

²¹ Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjǐng kô é nghut le gi, maihpáng gâm má Ngò kut é muzó lé, nungmoq wó kut kó rá nghut é htoq agó, bùm shí lé, 'Htot mù, wuimau má ló gyó wàng aq.' ga taí jáng, taí é eq rajung za dut rá nghut lê. ²² Nungmoq, lumjǐng myit éq dung kô é nghut jáng, hái dǔng le le wó yú kó rá nghut lê." ga tũ taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhùm wàng hkaú má wang ê mù, mhoqshit nyi é hkùn, hkyangjong agyí pé eq mingbyu é suwún wú gi, Yhâng chyáng lé jé kômù, "Hai ahko ahkáng èq, Nàng, shí pé lé kut nyi lê lú?" Ahko ahkáng shí, Nàng lé ó yuq byí é lú?" ga myí akó.

²⁴ Haú hkùn, Yesuq gi, "Ngò le, nungmoq lé rajung myí wú kôlé, nungmoq wó tũ taí kô é nghut jáng, hai ahko ahkáng èq, Ngò, shí pé kut é hkyô lé taí kyo rá nghut lê. ²⁵ Yohan byí é baptisma gi, ó yuq é ahko ahkáng mai nghut lê lú? Mauhkúng mai lú? A nghut jáng, byu chyáng mai lú?" ga tũ myí kat ri.

Haú hkùn, yhangmoq, chôm hpyê lhum kô é gi, "'Mauhkúng mai nghut lê.' nghũ, nga-nhúng taí jáng le, 'Haú nghut le nhing, hái mù, yhang lé a lumjǐng kô é lú?' ga rá nghut; ²⁶ 'Byu chyáng mai nghut lê.' nghũ jáng le, yhangmoq lunglhang bang gi, Yohan lé, myiqhtoi rayuq ga lumjǐng bùm kô é nghut lê ynamai, haú bang lé, nga-nhúng gyuq rá lê nghut." gâ akó.

²⁷ Haú mù, yhangmoq gi, Yesuq lé, "Ngamoq a sé." ga tũ taí akó.

Haú hkùn, Yesuq gi, "Haú jáng, Ngò le, hai ahko ahkáng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akó lú? Byú rayuq gi, yuqzô í yuq wó ri. Yhang gi, ko sũ yuq chyáng é mù, 'Ngá zo é, nàng, hkù-nyí tsibiyiq hkyâm má mù é zui aq.' ga taí jáng, ²⁹ yuqzô haú gi, 'Ngò a kâm ê.' ga tũ taí ri; nghut kôlhang, htâng má, yhang gi, myit dum lhing mù, é bê nghut ri.

³⁰ Hau htâng, yhângwa gi, yhang zo tiq sũ yuq chyáng é mù, rajung za ga é dum taí jáng, yuqzô haú gi, 'Ê rá, âwa!' ga yín yũ kôlhang, a é kut ri.

³¹ Haú nhiktâng má é hká yuq sheq, yhângwa ô nau é hkyô lé kut sũ nghut ri lú?" gâ ri.

Haú hkùn, yhangmoq gi, "Ko sũ nghut ri." ga tũ taí akó.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kó rá nghut lê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tũn shit kôlhang, nungmoq gi, yhang lé a jǐng kut akó nghut ri; nghut kôlhang, haú kang guq bang eq shiwa

myhî pé gi, yhang dang lé jing akô nghut ri. Nungmoq gi, haú hkyô lé myang é nghut kôlhang, myit a lhang kô é htoq agó, yhang lé a lumjing shi kó nghut ri.

Tsibiyiq Hkyâm Sai Bang Lé Dangtú Yu É Hkyô
Mrk 12:1-12; Luk 20:9-19

³³ Gotú dangtú lé gyô wú shi keq; hkyâm yhumsing rayuq gi, tsibiyiq hkyâm ralhum sai to mù, lhangkyuq kyâm to lui, tsibiyiq wing pyik htoq rá dongkong dú to mù, machya ralhum sai tô ri. Hau htang, yhang gi, hkyâm haú lé, hkyâm sai zo bang chyáng ngho byi to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi é yú rá matú, yhang é dui-nhang zoshang wui lé, haú hkyâm sai zo bang chyáng nhang kat ri.

³⁵ Haú hkyâm sai zo bang gi, dui-nhang zoshang wui lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok eq lhom dú sat pyám, kut akô nghut ri. ³⁶ Hau htang má, yhang gi, hí dam lhê htoq je myo shoq gotú dui-nhang zoshang wui lé dum nhang kat le le, haú hkyâm sai zo bang gi, hí lhê bang lé su lhom dum kut akô nghut ri. ³⁷ Ló htang má, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhang zo lé, haú bang chyáng nhang kat ri.

³⁸ Nghut kôlhang, haú hkyâm sai zo bang gi, yhang zo lé myang kôjáng, 'Shi yuq gi, silí wunlí sing yú rá sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq tai lhum bum akô nghut ri. ³⁹ Haú mù, yhangmoq gi, yhang lé, chyup yú lui, hkyâm shinggan shut dú htoq kômù, sat pyám bekô nghut ri.

⁴⁰ Haú mù lui, tsibiyiq hkyâm yhumsing lé jé é hkûn lé, haú hkyâm sai zo bang lé hkâsu kut nhô ngam akô lúhú?" ga Yesuq myi ri.

⁴¹ Haú hkûn, haú hkyangjong agyi pé eq suwún wui gi, "Haú agè ashop bang lé gi, agè ashop é dong sat pyám rá nghut lhê. Haú tsibiyiq hkyâm lé gi, kyô shu yoq má, yhang é gambum lé byi rá bang lé, htot ngho byi pyám rá nghut lhê." ga, tù tai akô nghut ri.

⁴² Haú jáng, Yesuq dum tai é gi, "Chyúmdang má, 'Yhûm sai bang eq hkyin htoq pyám é luqgok gi, htungchyûn mâ é ahkyak dik é luqgok dut bê.

Shí hkyô gi, haú Yhumsing kut é nghut lui, nga-nhung é myoq hí má mauhpo dut bê nghut ri.'*

ga bo tô é lé, nungmoq a nghap wú kó lúhú?

⁴³ Haú mù, Ngò, nungmoq lé tai kôlé, Garai Gasang é mingdán lé, nungmoq chyáng mai yú mù, hau é ashi wó zui rá byuhú lé byi pyám rá nghut lhê.

⁴⁴ Luqgok haú má gyó záng é sù gi, gyui gyop byuq rá nghut lhê. Luqgok hau eq gyó nhê záng é sù le, nhê pyeq pyám é hui rá nghut lhê." gá ri.

⁴⁵ Hkyangjong agyi pé eq Hparishe pé gi, haú Yesuq tai é dangtú pé lé wó gyo kôjáng, yhangmoq lé tai nyi é hkyô lé, sê gyô akô nghut ri. ⁴⁶ Haú mù, yhangmoq gi, Yhang lé chyup yú rá hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

* 21:42 Hkya-on 118:22-23

22

*Myiháng Poi Dangtú Pé**Luk 14:15-24*

¹ Yesuq, dangtú pé đông yhangmoq lé dum taí é gi, ² "Mauhkûng mingdán gi, yhumsing yhangzô é matú myiháng poi hen lajâng to byí é hkohkâm rayuq eq du ri. ³ Hkohkâm hpó haú gi, yhang ji tô é bang, haú poi má lé lò râ matú, yhâng é dui-nhâng zoshâng wui lé ê tsing taí nhang ri; nghut kôlhâng, haú bang gi, a lé kut akô nghut ri.

⁴ Hau htâng má, yhang gi, gotú dui-nhâng zoshâng wui lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poi má lé lò keq hkoì nghù, haú ji tô é bang lé é taí keq.' ga pyíng luí, nhang kat ri.

⁵ Nghut kôlhâng, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq beko nghut ri. ⁶ Ra-am dum nghut jáng, yhâng é dui-nhâng zoshâng wui lé lhom chyup yú kômù, nhuq bat luí, sat pyám byí akô nghut ri. ⁷ Haú mù, hkohkâm gi, nhikjum yo luí, yhâng é gyezô pé lé, haú byù sat bang lé sat pyám nhâng mù, yhangmoq é myuq lé nyê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wui lé, 'Myiháng poi gi, rì rì nghut to bê; nghut kôlhâng, haú ji to huí é bang gi, lé râ a gingdán kó nghut ri. ⁹ Haú mù, hkyô kang pé má é luí, myang é yuq hkangmó lé, poi má lé râ matú é jì keq.' ga taí ri. ¹⁰ Haú jáng, dui-nhâng zoshâng haú bang gi, hkyô kang pé má htoq é luí, myang é byù gè byù gang lhunglhang lé jì tsing yù kô é nghut mù, myiháng poi gi, bíng pé zung byíng bùm bê nghut ri.

¹¹ Nghut kôlhâng, bíng haú bang lé, hkohkâm hpó, lé wang wú é hkûn, myiháng poi wàng hking a wut tô é byù rayuq lé, yhang byu-myang ri. ¹² Haú mù, yhang gi, haú yuq lé, 'Buinùm hpó ê, nàng gi, myiháng poi wàng hking le a wut é nhing, shí má hkâsu kut wang lo é lúh?' ga myí jáng, haú yuq gi, haí le a dat tú taí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyí loq má tui luí, haú ngaubiyi ngaù nhap eq zui kyik kyik shoq hpuzô nyí râ nghut é shinggan mauchut hkaú má, dú htoq pyám keq.' gâ ri.

¹⁴ Hkâsu mù gâ le, byù myo myo gi, jì yu é huí kôlhâng, hkyin yù huí é bang gi, shaú ri." gâ ri.

*Kehtaq Lé Kang Kat Byí É Hkyô**Mrk 12:13-17; Luk 20:20-26*

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyí dá akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garaí Gasâng é hkyô lé, tengmán é đông mhoqshít é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haú mù, hkoséng Kehtaq lé kang kat byí le gi, ge lhê lúh? A gè lúh? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lúh? ¹⁹ Kang kat râ ngùn htingchap rachap, Ngo lé byí wú keq." ga taí kat ri. Haú hkûn,

yangmoq gi, denari rachap yù byí akô. ²⁰ Haù mù, Yhang gi, yangmoq lé, "Shí má, ó yuq é alhò eq masat laiká dap tò ri lhu?" ga myi jáng, ²¹ yangmoq gi, "Kehtaq é nghut ri." ga tũ tai akô. Haù mù, Yhang gi, yangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga tai kat ri.

²² Haù su gâ é lé, wó gyo kôjáng, haù bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myi Chyam É Hkyô

Mrk 12:18-27; Luk 20:27-40

²³ Haù nyí má yhang, haù dum dui toq hkyô a joq gâ é Saduke pé gi, Yesuq chyáng lé je kômù, dangmyi lé myi akô. ²⁴ Yhangmoq myi kô é gi, "Sarâ é, 'Myiwe wó é byù rayuq gi, zo dù a dap é za shi byuq é nghut jáng, yanggu gi, yangmâng é awut ashín xoq byi rà matú, yhâng rhat lé chui gon ra rà nghut lhê.' ga, nga-nhúng lé, Mosheq tai tô é nghut lhê. ²⁵ Hí hpyang lé, ngamoq chyáng, gumang nhiktàng wui nyhit yuq nyi akô. Lagám yuq gi, myiwe yù luí, zo dù a dap é za yangmyi lé shi lhuí pyâm to bê nghut ri. ²⁶ Haù eq rajung za, Lanong, Lalaq mai Lahkâ je shoq, chuimó haù lé gon luí, ó le zo dù a dap é za shi ló byuq bùm bekô nghut ri. ²⁷ Ló htáng má, myiwe myhí haù le châng shi ló byuq bê nghut ri. ²⁸ Haù mù luí, haù dum dui toq é buinyi má, myiwe myhí haù gi, haù nhiktàng wui nyhit yuq mã é hká yuq é yangmyi nghut rà lhu? Hkâsu mù gâ le, yang gi, haù nhiktàng wui banshoq bâng é yangmyi dut wú bê sù nghut ri." gâ akô.

²⁹ Haù hkũn, Yesuq gi, yangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰ Haù dum dui toq é buinyi má gi, myi byi myi yù hkyô joq lo rà a nghut; yangmoq gi, mauhkúng htoq mã é maumang lagyô pé su dut byuq kó rà nghut lhê. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga, nungmoq lé tai tô é lé, nungmoq a nghap wú kó lhu? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga tai ri.

³³ Byù moq mó gi, dang haù wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yangmoq gi, Yesuq chyáng zup zîng lé bum akô. ³⁵ Yhangmoq mã bo é tarâ sarâ rayuq gi, Yesuq lé chyam wú é dông, ³⁶ "Sarâ é, jep é tarâ má, hká lhum gi, je ahkyak dik lhê lhu?" ga myi ri.

³⁷ Haù mù, Yesuq gi, "Haù Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap rà lhê.* gâ é nghut lhê. ³⁸ Tarâ haù gi, je hí lhum eq je ahkyak dik é lhum nghut lhê. ³⁹ Hau htang lhum le haù eq du é nghut mù, 'Náng gûng lé nàng chyitdap é su, náng é chyangnâm mã é bang lé le chyitdap aq.*' gâ é nghut lhê. ⁴⁰ Tarâ haù í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yang lé tai kat ri.

*Hkrisduq Gi, Ô Yuq É Yhangzo?**Mrk 12:35-37; Luk 20:41-44*

⁴¹ Hparishe pé zup zing to kô é hkûn, Yesuq gi, yhangmoq lé. ⁴² "Nungmoq gi, Hkrisduq eq séng luî hkâsu myit ngam akô lúhú? Yhang gi, ó yuq é yhangzo nghut lhê lúhú?" ga myi jáng, yhangmoq gi, "Dawiq é yhangzo nghut ri." ga tù tai akô.

⁴³ Haù mù, Yhang gi, yhangmoq lé, "Haù hkûn, Dawiq gi, Woi-nyí dông mai, Yhang lé, 'Yhumsing' ga, hai mù wut lhê lúhú? Hkâsu mù gà le, Dawiq tai é gi, ⁴⁴ 'Haù Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tô pyâm é hkying jé shoq,

Ngá é loqyo hkyam shut zung nyi shi aq." ga tai ri. ^{*}

gá ri. ⁴⁵ Haù mù, Dawiq yhang lháng, Hkrisduq lé, 'Yhumsing' gá é nghut le gi, yhangzo za hkâsu ge nghut rá lúhú?" ga tai ri. ⁴⁶ Haù mù, ó yuq le, dang rahkun lháng a wó tù tai lo kô é nghut mù luî, haù nyí mai, ó yuq lháng Yhang lé dangmyi a wám myi lo kó nghut ri.

23*Tarâ Sará Pé Eq Hparishe Pé Lé Sidiq Râ Hkyô**Mrk 12:38-40; Luk 11:37-52; 20:45-47*

¹ Hau htâng, Yesuq gi, byu moq mó eq Yhâng é chángzô pé lé tai é má, ² "Tarâ sará pé eq Hparishe pé gi, Mosheq é tanghkuq má zung akô. ³ Haù mù, yhangmoq mhoqshit é hkyô chângiup lé, nungmoq châng kut ra kó rá nghut lhê. Nghut kôlháng, yhangmoq kut é dông gi, hkâkut kó; hkâsu mù gà le, yhangmoq gi, yhangmoq tai é dông a kut kó nghut ri. ⁴ Yhangmoq gi, byu pé é goqsân má wôlai ke byi kôlháng, yhangmoq yhang gi, wò haù pé lé bo waq rá matú, loqnyhui lháng a kâm lhoq tuí kó nghut ri.

⁵ Yhangmoq kut é hkyô lunglháng gi, byu pé myàng rá matú za kut shit é nghut akô; haù chyumbun bo é showui-htung pé lé lhoq kô yù kômù, buhng pé má é banbyaù pé lé lhoq hing yu akô nghut ri; ⁶ yhangmoq gi, poi pé má é réng é jowò pé eq tarajong pé má é ahkyak dik é zùng jang pé má, myang zùng rá lé ô nau nyi akô; ⁷ yhangmoq gi, gai pé má lhom shi-kyâm yù kó rá eq, byu pé mai, yhangmoq lé, 'Rabai'* ga lhom wut kó rá lé ô nau nyi bum akô.

⁸ Nungmoq kúm gi, 'Rabai' ga wut rá lé hkâ-ô nau kó; hkâsu mù gà le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹ Haù mù, myidàm htoq má, ó yuq lé le, 'áwa' hkâ-nghú kó; hkâsu mù gà le, mauhkûng htoq má é Íwa rayuq za, nungmoq é Íwa nghut lhê. ¹⁰ Hau htoq agó, 'sarâ' ga wut rá lé, hkâ-ô nau kó; hkâsu mù gà le, Hkrisduq za, nungmoq é Sarâ nghut lhê. ¹¹ Nungmoq má é je gyaù sù gi, nungmoq é dui-nhâng zoshâng dut rá nghut lhê. ¹² Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui rá nghut lhê, yhumsing gùng lé lhoq nyhum sù kúm gi, waq toq é hui rá nghut lhê.

¹³ Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi, byu pé hí má, mauhkûng mingdán hkyô lé xaù tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴ (Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi,

* **22:44** Hkya-on 110:1 * **23:7** Aramaik dang dông rabai gá é gi, sará gá é lichyúm nghut lhê.

chuímo pé é yhûm-yò pé lé hpyoq zo hpyoq shuq é eq kyû hîng hîng dûng shit mhaû é bang nghut akô; haû mù, dam byî é je myo hui zo kó râ nghut lhê.)†

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byû rayuq lé nungmoq é noqkuq htung má wó lhoq lhik yû râ matú, myi hkyô, wui hkyô, châng jón wún kômù, wó lhoq lhik yu é sù lé gi, nungmoq su ngaraî byû í tú shuí dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haí a ra; noqkuq yhûm mâ é hîng lé lang mù dakam é sù kúm gi, châng ra bê.' ga lhaq taí akô. ¹⁷ Myoqjit é byû nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lú? ¹⁸ Hau htoq agó, nungmoq gi, 'Haû hkungga gyap lé lang luí dakam é sù gi, haí a ra, nghut kôlhâng, haû hkungga zè lé lang mù dakam é sù gi, châng ra bê.' ga le, lhaq taí akô nghut ri. ¹⁹ Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú?

²⁰ Haû mù, haû hkungga gyap lé lang luí dakam é sù gi, haû hkungga gyap eq hau é ahtoq má ke tó é zè banshoq lé lang luí dakam é sù dut bê nghut ri.

²¹ Noqkuq yhûm lé lang luí dakam é sù gi, haû noqkuq yhûm eq haú má nyi é Sù lé lang luí dakam é sù dut bê nghut ri. ²² Hau htoq agó, mauhkûng lé lang luí dakam é sù gi, Garaî Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shíngtón, bantsai, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyâm kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haû jâng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haû pé gi, ahtoq má wú yúng kôlhâng, ahkaû má gi, mâng bup showui pé eq achau achyut é chângjup byíng tô é nghut ri. ²⁸ Haû eq rajung za, nungmoq gi, byu pé hí má, ahtoq pyâm dingmán é su kut shit kôlhâng, ahkaû má gi, gegùn labyoq kut é eq agé ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoí pé é lup lé luptsuq tsuq kômù, dingmán bâng é lup pé lé mhón byi kôluí, ³⁰ Ngamoq gi, ngamoq é íchyí íwa pé é ipyat má nyi âng é ru nghut le gi, haû myiqhtoí pé é sui lhoq shun é bang má, ngamoq bo lòm râ a nghut.' ga lhaq taí akô. ³¹ Haû su mù, nungmoq gi, haû myiqhtoí pé lé sat pyâm bâng é awut ashín pé nghut é hkyô lé, nungmoq gúng nungmoq saksé hkam yu nyi akô nghut ri. ³² Haû mù, nungmoq é íchyí íwa pé hí tô é muzó lé, banshoq châng kut pán keq!

† 23:14 Chyúmding ra-am má gi, bun zo 14 shí a bo é nghut lhê.

³³ Lhangmui pé ê, duq htân lhangmui amyû pé ê! Ngarai mîng é dam byi hkyô mai, hkâsu wó h pang lut kó râ lú? ³⁴ Hau é yanmai, myiqhtoi pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang má é ra-am lé gi, nungmoq lhom sat pyâm mù, tapzîng má jén pyâm kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê. ³⁵ Hau é yanmai, haú dîngmán sù Abelaq é sui mai hí luí, noqkuq yhúm eq hkungga gyap gyoro má nungmoq sat pyâm é, Berehkiaq é yhangzo Zahkariq é sui jé shoq, myidàm htoq má shun pyâm é dîngmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za tai kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoi pé lé sat pyâm pyâm kut mù, náng chyáng nhang kat é bang lé luqgok èq dú sat sat kut é myuq nàng ê, woqzîng gi, yhangzô pé lé, yhâng é dùng hkaú má tsîng lhúng yu é su, nungzô pé lé, Ngò, hkâ-myhó dâm shuí tsîng yù nàù kôlhâng, nàng a dóng nghut ri. ³⁸ Wú keq, nungmoq é yhúm gi, nungmoq é matú chamchyuyiui dut pyâm to berâ nghut lhê. ³⁹ Hkâsu mù gà le, Ngò, nungmoq lé tai kôlé, 'Yhumsing é myîng mai jé lé lo é Sù gi, hkungsô wó nyí sháng gaq.'* ga, nungmoq a tai tai gi, Ngo lé wó myâng kó râ a nghut lo." gà ri.

24

Ló Htâng Buinyi Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhúm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haú noqkuq yhum é loqmú pé lé tûn shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za tai kôlé, luqgok haú pé gi, rachâm htoq racham lhâng a kê lhum loshoq, hpyoq hpyi pyâm é hui râ nghut lhê." ga tai ri.

³ Yesuq gi, Tsanlun Bùm má zung tô é hkûn, haú chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhâm dut lò râ lú? Nàng gyó lé râ hkûn eq ló htâng buinyi má, hkasú é kumlhá htoq lô râ nghut lhê lú? Ngamoq lé tai kyô wú laq." ga, Yhang lé myí akô.

⁴ Haú hkûn, Yesuq, yhangmoq lé tû tai é gi, "Nungmoq lé, ó yuq èq le a wó shuí nghoq sháng gaq, sidiq nyi keq. ⁵ Hkâsu mù gà le, 'Ngò gi, haú Hkrisduq nghut lhê.' ga, Ngá myîng lé lãng é byù myo myo pô htoq lô mù, byù myo myo lé hkyô shuí nghoq kó râ nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhâng, hkâgyuq dân kó. Haú hkyô pé gi, dut lò râ za nghut lhê; nghut kôlhâng, ló htâng é buinyi gi, a nghut shi. ⁷ Byù ra-myû eq ra-myû, mingdân ralhum eq ralhum majan zân lhum lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸ Haú pé gi, wuîhke jamjau hkyo é apûn awang za ru nghut ashî.*

⁹ Haú hkûn, nungmoq gi, zing-rí é eq sat pyâm é hui zo râ matú, ap pyâm é hui kó râ nghut lhê. Byù myû lhunglhâng bang gi, Ngá é yanmai, nungmoq lé a ngui kut kó râ nghut lhê. ¹⁰ Haú u lé, byù myo myo gi, lumjîng myit lé tô pyâm kômù, rayuq eq rayuq a ngui lhum dut é htoq agó, rayuq eq rayuq ap

pyâm lhum kó râ nghut lhê. ¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó râ nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân lô byuq râ nghut lhê; ¹³ nghut kôlhang, jìhtùm jé shoq wó hkam jân nyi é sù gi, hkyi yu é hui râ nghut lhê. ¹⁴ Byù myù banshoq má saksé dut râ matú, haù mingdán eq sêng é gabú danglù lé, mingkan gón má hko kyo râ nghut lhê. Hau htàng má sheq, lô htum buinyi jé râ nghut lhê.

¹⁵ Haù mù luí, myiqhtoi Danielaq dông mai taí tô é eq rajung za, 'haù lhoq hten lhoq hpyoq é achao achyut hkyô¹⁴ gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sè gyo sháng gaq). ¹⁶ Haù hkùn, Yuda mau má nyi é bang gi, bùm pé shut hpang doq lô kó sháng gaq. ¹⁷ Yhumhkúng htoq má nyi tô é sù gi, yhúmkaù má é zè haí lé le, a lô gyó wang yù lo sháng gaq. ¹⁸ Yò má nyi tô é sù gi, yhâng é buhíng lé a lô taù yu nyi lo sháng gaq. ¹⁹ Haù buinyi pé má, zogúng dut é myiwe eq náu huq ashí nghut é ìnu wù gi, gyai yang wuìhke jamjau kó râ nghut lhê. ²⁰ Haù nungmoq hpâng râ buinyi gi, gyoqmyò, * a nghut jáng, Bánno buinyi má a ang râ matú, kyúdùng nyi keq. ²¹ Hkâsu mù gà le, mingkan lé joq é hkùn mai ahkuí jé shoq, hkâ-nhám le a dut wú shí é wuìhke jamjau mó gi, haù buinyi pé má dut lò râ nghut lhê; haù sù é hkyô gi, htàngnùng má hkâ-nhám le dum dut lo râ a nghut. ²² Buinyi haù pé lé lhoq shaù pyâm é za a nghut le gi, ó yuq le asak wó lut râ a nghut; nghut kôlhang, Garai Gasang eq hkyin yù hui bâng é matú gi, buinyi haù pé lé, lhoq shaù pyâm byi râ nghut lhê. ²³ Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó. ²⁴ Hkâsu mù gà le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklai kumlhá pé lé kut shit kó râ nghut lhê. ²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶ Haù mù, rayuq yuq eq, nungmoq lé, 'Yhang gi, yoso má nyi ri.' gà jáng le, hkâ-ê kó; 'Yhang gi, shí gok hkaù má lúng tô ri.' ga jáng le, hkâjíng kó. ²⁷ Hkâsu mù gà le, bui htoq hkyam má lhap hpyat é gi, bui wang hkyam má lhang jé shoq duqbó é su, haù Byu Yhangzo jé lé é hkùn le, dut râ nghut lhê. ²⁸ Màng leq é jang má, langdâ pé, lé zíng bùm râ nghut lhê.

²⁹ Buinyi haù pé má é wuìhke jamjau lai eq yhang, 'Bui gi, noq byuq mù, lhamó gi, a tsò dut byuq râ nghut lhê; kyí pé gi, mauhkúng mai byit gyó lo bùm mù, mauhkúng má é wum-o a-tsam pé gi, lhoq nhún é huí bùm kó râ nghut lhê.'^{*}

³⁰ Haù hkùn, haù Byu Yhangzò é kumlhá gi, mauhkúng má htoq shit lò râ nghut mù, myidàm htoq má é byù myù lunglhang gi, yón ngau bùm kó râ nghut lhê. Haù Byu Yhangzo gi, mauhkúng mai, mhut jì mù, hpungwup a-tsam mó eq le, hpungwup shíngkàng eq le, gyó lé lo é lé, yhangmoq byu-myàng kó râ nghut lhê. ³¹ Hau htàng má, Yhang gi, Yhâng é maumang lagyó pé lé, tut htê mó eq nhang kat luí, yhangmoq gi, maumyí chyùn myi chyùn eq mauhkúng rahkyam mai, gó hkyam htum shoq má é, Yhang hkyin yu tô é bang lé shuí tsíng yù kó râ nghut lhê.

* 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuìhke é ahkyíng nghut lhê. * 24:29 Esai 13:10; 34:4

³² Maihpáng gâm lé wú mù, mhoq yú keq; agàm mai a-nyuq nyún lô mù, ahaq htut lô jáng, bui nyé nám chyáng lò bê lé, nungmoq sé lhê. ³³ Haú eq rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé lo keq. ³⁴ Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé† banshoq dut byuq rá nghut lhê. ³⁵ Mauhkûng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyí rá nghut lhê.

Haú Buinyi Eq Ahkying Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyi eq ahkying haú lé gi, ó yuq le a sé; mauhkûng htoq má é maumang lagyô pé lhang a sé; haú Zo le a sé; haú Iwa za ru sé lhê. ³⁷ Noaq é tsín pyat má dut é su, haú Byu Yhangzo lé lo é hkûn le, dut rá nghut lhê. ³⁸ Hkâsu mù gâ le, dowuí a dǐng shí é buinyi pé má, byu pé gi, Noaq, wui-sanghpo mó hkaú má wang é hkûn jé shoq, zo zo shuq shuq, myi byi myi yú, kut nyi bum akò nghut ri; ³⁹ yhangmoq gi, dowuí dǐng lô mù, yhangmoq banshoq lé ùm sat pyám é hkûn jé shoq, haú dut lò rá lé, a sé kó dut bùm é su, haú Byu Yhangzo lé lo é hkûn le, dut rá nghut lhê. ⁴⁰ Haú hkûn, yò má rahá nyi tô é byú í yuq má é rayuq gi, shuí yu é hui mù, rayuq gi, myit gyó to rá nghut lhê. ⁴¹ Luqluí chòm llang nyi é myiwe í yuq má é rayuq gi, shuí yu é hui mù, rayuq gi, myit gyó pyám to rá nghut lhê.

⁴² Haú su mù, haú nungmoq é Yhumsing gi, hká nyi jé lé lô rá lé, nungmoq a sé kô é yanmai, sidiq machya nyi keq. ⁴³ Myín hká u má hkau sù jé lé lô rá lé, yhumsing sé é ru nghut le gi, yhang é yhùm má a wó hput wâng nhâng loshoq, yhang machya nyi rá nghut é lé, nungmoq sé gyó nyi keq. ⁴⁴ Haú mù, nungmoq le ri rá nghut nyi keq; hkâsu mù gâ le, haú Byu Yhangzo gi, a bûn nung má jé lé lô rá nghut lhê.

⁴⁵ Yhumsing hpò é dui-nhâng zoshâng wui lé, uphkâng rá eq ahkying jé jáng zoshuq gâm byi rá matú, yhumsing hpò éq mù nhang tô é, lhumzui luí, hpaqchyí bo é dui-nhâng zoshâng gi, ó yuq nghut rá lhú? ⁴⁶ Yhumsing hpó dum taú lo é hkûn, haú su kut nyi llang é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kôlé, yhumsing hpò haú gi, yhang é tsyé banshoq, dui-nhâng zoshâng haú yuq lé ap to rá nghut lhê. ⁴⁸ Nghut kôlhang, laqmá mù, dui-nhâng zoshâng haú yuq gi, agé ashop sù nghut luí, 'Ngá é yhumsing hpó jé lô rá gyai myáng ashí.' ga, yhang é i-myt unghkaú má myit yù mù, ⁴⁹ gotú dui-nhâng zoshâng luzúm wui lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsing hpó gi, yhang a myitngam tô é buinyi eq yhang a sé tô é ahkying má jé lô mù, ⁵¹ yhang lé jap pyám luí, gegùn labyoq kut bang hkâm zô é, ngaubyi ngaú nhap eq zui kyik kyik shoq hpuzô nyi rá jowò má hkyô pyám rá nghut lhê.

25

Zomyi Raxê Yuq Lé Dangtú Yu É Hkyô

† 24:33 Shí hkyô banshoq gâ é gi, Yesuq jé lé rá hí má dut rá hkyô pé lé taí é nghut lhê. † 24:34 Haú hkyô pé gâ é gi, Yerusalem noqkuq yhùm htên byoq rá lé taí é nghut lhê.

¹ Haù hkûn, mauhkûng mingdán gi, myibung yu chûng mù, lusik lé te yù rà ga, htoq e ló é zomyi raxé yuq eq pûng rà nghut lhê. ² Haù bang má, ngo yuq gi, nhik a gyíng kó; ngo yuq gi, nhik gyíng akô nghut ri. ³ Haù nhik a gyíng é bang gi, myibung yu chûng kôlhang, xù a yu chûng kó nghut ri. ⁴ Nghut kôlhang, haù nhik gyíng é bang kúm gi, yangmoq é myibung lé le, xù bo é bông lé le yu chung akô nghut ri. ⁵ Lusik jé lé lô rà myáng nyi é yanmai, yangmoq banshoq bang gi, yhup mui lò kômù, yhup myhi byuq bekô nghut ri.

⁶ Myín gunggam jé jáng, 'Lusik jé bê ô! Yhang lé te yù rà matú, htoq lé lô keq hkoì ô!' ga, garú é htê htoq lo ri.

⁷ Haù hkûn, zomyi haù bang banshoq gi, toq lô mù, yangmoq é myibung lé hen lajáng akô nghut ri. ⁸ Haù nhik a gyíng bang gi, 'Ngamoq lé, xù ratsui byi kó laq; hkâsu mù gâ le, ngamoq é myibung shi lô nyi ri.' ga, haù nhik gyíng bang chyáng dúng akô.

⁹ Haù hkûn, haù nhik gying bang gi, 'Nungmoq eq ngamoq é matú ga jáng, luq rà a nghut. Haù mù, nungmoq é matú, xù ung bâng chyáng é wui yù keq.' ga tũ tai kat akô.

¹⁰ Yhangmoq, xù wui e ló kô é hkûn, lusik gi, jé lé lô mù, haù ri rì hen tô é zomyi wui gi, yang eq rahá myiháng poì má wang ló bekô. Hkum le myhi byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lò kômù, 'Yhumsíng ê! Yhumsíng ê! Ngamoq lé, hkum hpóng byi laq ô!' ga tai akô.

¹² Nghut kôlhang, haù lusik gi, 'Ngò, nungmoq lé teng za tai kôlé, nungmoq lé ngò a sé.' ga tũ tai kat ri.

¹³ Haù mù luí, haù Byu Yhangzo jé lé rà buinyi eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkûng mingdán gi, byù rayuq byìn we htoq rà hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashí nghut ri. ¹⁵ Yhang gi, yangmoq é a-tsam má cháng luí, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byi to mù, byìn we shut htoq ló byuq bê nghut ri. ¹⁶ Ngùn ngo joí wó yù sù gi, haù hkûn jáng htoq ló mù, hpugá gá luí, ngùn ngo joí wó myat yù bê nghut ri. ¹⁷ Haù eq rajung za, ngùn í joí wó yù sù le, í joí wó myat yù bê nghut ri. ¹⁸ Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsíng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haù bâng é yhumsíng hpó gi, dum tau jé lò mù, yangmoq é ngùn chyaráng lé, lo jep ri. ²⁰ Ngùn ngo joí wó yù sù gi, amyat ngo joí lé le yu lé lò mù, 'Yhumsíng ê, nàng, ngo lé, ngùn ngo joí ap tô é nghut lhê. Wú aq, amyat ngo joí wó ho jat yù bê.' ga tai ri.

²¹ Haù hkûn, haù yhumsíng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mú má hláng wó lum é sù nghut é yanmai, ngò, nang lé, kô é mú lé le ap byi rà nghut lhê. Náng yhumsíng hpô é gabú hkyô má bo wang lòm aq hkoì!' ga tũ tai ri.

²² Haù eq rajung za, í joí wó yù sù le, lé lò mù, 'Yhumsíng ê, nàng, ngo lé ngùn í joí ap tô é nghut lhê. Wú aq, amyat í joí wó ho jat yù bê.' ga, lé tai ri.

²³ Haù hkûn, haù yhumsíng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mú má hláng wó lum é sù nghut

é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabû hkyô má bo wang lòm aq hkoï!' ga tù tai ri.

²⁴ Hau htâng, rajoï wó yû sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agò, yhumsîng, kyôshi a sân hkyô tô é jang mâ é tsîng yù nau sù nghut é lé, ngò sê lhê. ²⁵ Hau mù, ngò gi, gyyuq luï, htoq gi é mù, náng é ngùn lé, myigùng má é haq myihup tô é nghut lhê. Wú aq, shí gi, nàng é ngùn nghut lhê.' ga tai ri.

²⁶ Hau mù, yhumsîng hpô gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taù jé lô jáng, aráng eq amyat wó yù shoq, ngùn hpùn kat jang má, haï mù a kat tô é lúh?

²⁸ Hau mù, hau ngùn rajoï lé, náng chyáng mai yù luï, raxê joï wó to sù lé, byï pyám nhâng râ nghut lhê. ²⁹ Hkâsu mù gà le, wó sù ó yuq lé nghut kôle, yhang agùn agò wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. ³⁰ Hau mù, hau akyû a bo é dui-nhâng zoshâng lé gi, ngaubyi ngaù nhap eq zui kyik kyik shoq hpuzò nyi râ jowò nghut é, shînggan mauchut hkaù má dú htoq pyám keq. gà ri.

Sau Eq Bainám

³¹ Hau Byu Yhangzo gi, Yhâng é hpungwup shîngkang mai, maumang lagyo lhunglhâng bang eq rahá jé lé lo é hkùn. Yhâng é hpungwup shîngkang bo é hkohkâm-tanghkuq htoq má zùng râ nghut lhê. ³² Hau hkùn, byù myù chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotú tù kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé lé, loqpaï hkyam shut kut, nyhi to râ nghut lhê.

³⁴ Hau htâng má, hau Hkohkâm gi, Yhâng é loqyo hkyam shut mâ é bang lé, 'Ngá Wâ chyáng má é shimân jeju hkam yu é hui bang ê, lé keq; mingkan lé hpan é hkùn mai, nungmoq é matú ga hen lajâng tô é mùi mingdán má wang lô keq. ³⁵ Hkâsu mù gà le, Ngò zòmut é u lé, nungmoq, Ngo lé byi tso kô é nghut lhê; Ngò wuîshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huï é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga tai râ nghut lhê.

³⁷ Hau hkùn, hau dingmán bang gi, Yhang lé, 'Yhumsîng ê, Nàng zòmut huï é lé, ngamoq, hkâ-nhám myàng luï, byi tsò wú é lúh? Nàng wuîshit é lé, ngamoq, hkâ-nhám myàng luï, byi huq wú é lúh? ³⁸ Nàng bíng kut wún é lé, ngamoq, hkâ-nhám myàng luï, lhom hkulum wú é lúh? Nàng gùngchîn dut é hkùn, ngamoq, hkâ-nhám byi hut wú é lúh? ³⁹ Nàng nòhpyo huï é lé le, htóng lúng é lé le, ngamoq, hkâ-nhám myàng luï, lé gon lé kum wú é lúh?' ga myi kó rá nghut lhê.

⁴⁰ Hau hkùn, hau hkohkâm gi, 'Ngò, nungmoq lé teng za tai kôlé, shî, Ngá gumang wú mà é je tiq sù lé, nungmoq kut byï é hkyô haï le, Ngo lé kut byï é nghut bê.' ga tù tai râ nghut lhê.

⁴¹ Hau htâng má, Yhang gi, Yhâng é loqpaï hkyam shut mâ é bang lé, 'Dingnyé wó é bang ê, Ngá chyáng mai gâng lô mù, nat Tsadán eq yhâng é maumâng pé é matú hen tô é, ahtum abyuq é myi má wang lô keq. ⁴² Hkâsu

mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchín dut é u lé, nungmoq, Ngo lé, mebu a byi hut kó; Ngò nõhpyo huí é eq htóng lúng é u lé, nungmoq, Ngo lé a gon kó nghut ri.' ga tai rá nghut lhê.

⁴⁴ Haú hkún, yhangmoq gi, 'Yhumsíng ê, nang zòmút wuìshit é, bíng kut wún é, gùngchín dut é, nõhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lúhú?' ga tau myi kó rá nghut lhê.

⁴⁵ Haú hkún, Yhang gi, 'Ngò, nungmoq lé teng za tai kólê, shí bang má é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tũ tai rá nghut lhê.

⁴⁶ Haú mù luí, haú bang gi, ahtum abyuq mara dam byí é má wang ló kó rá nghut lhê; haú dingmán bang kúm gi, ahtum abyuq é asak má wang ló kó rá nghut lhê." ga Yesuq tai ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban tai é htâng má, Yhâng é chángzô pé lé, ² "Nungmoq sê tó é eq rajung za, í nyí lai é htâng má, Lhoqlhai Poi jé rá nghut mù, haú Byu Yhangzo gi, tapzîng má jén sat é hui rá matú, ap pyâm é hui rá nghut lhê." ga tai ri.

³ Haú u lé, hkyangjong agyi pé eq suwún wuí gi, Kayahpaq gâ é hkyangjong mó rayuq é yhumwàng má zup zîng to kômù, ⁴ Yesuq lé haq chyup yú rá eq sat pyâm rá hkyô lé, hpyê lhúm bum akò nghut ri. ⁵ Nghut kôlhang, yhangmoq gi, "Byu pé gabyông ló kó abe, poi gyoro má gi, a kut shi sháng." ga, tai lhúm akò nghut ri.

Yesuq, Xú Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhúm má nyi tó é hkún, ⁷ myiwe myhí rayuq gi, gyai hpaú é namngón xú bo é luq hpyû bông yu lé lô mù, Yesuq zo shuq nyi é hkún, namngón xú haú lé, Yhâng é ulhum má hut gyun byí ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lúhú? ⁹ Xú haú lé, ahpau myo myô eq ùng pyâm mù, myùng bang lé byí le ge lhê mhai!" ga tai kat akò.

¹⁰ Yesuq gi, haú hkyô lé sé luí, "Haí mù, myiwe zo haú lé, i-myt lhoq myô nyi akò lúhú? Yhang gi, Ngá é ahtoq má ge é hkyô kut bê nghut ri. ¹¹ Haú myùng bang gi, nungmoq eq rahá hkâ-nhám le nyi rá nghut lhê; nghut kôlhang, Ngò gi, nungmoq eq rahá ayang nyi nyi rá sù a nghut. ¹² Yhang, Ngá gùng má namngón xú hut gyun é gi, Ngá gùng lé yhum rá matú, hen lajâng é hkyô nghut ri. ¹³ Ngò, nungmoq lé teng za tai kólê, haú gabú danglù lé, mingkan gón hko kyô é jowò hkangmó má, yhang lé myit bún é dông, yhang kut é hkyô shí lé, tai kyo bekò rá nghut lhê." ga tai kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng ê mù, ¹⁵ "Ngò, Yesuq lé nungmoq é loq má ap byí é

nghut jáng, nungmoq, ngo lé hai byi kó rá lú?" ga myí ri. Haú mù, yangmoq gi, yang lé ngùn denggá sum xê chap nghap byí akô. ¹⁶ Haú hkùn mai, Yudaq gi, Yesuq lé ap pyám rá hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, "Nàng zo rá Lhoqlhai Poí zoshuq lé, ngamoq hkámá món to rá lú?" ga myí akô.

¹⁸ Haú mù, Yang gi, "Myuq hkaú shut wang ló mù, byù rayuq chyáng ê luí, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhùm má Lhoqlhai Poí kut rá nghut lhê.' gâ Sará taí ri nghù, é taí keq." ga pyíng kat ri. ¹⁹ Haú mù, haú chángzô pé gi, Yesuq pyíng kat é eq rajung za é taí kômù, Lhoqlhai Poí lé món to bekô nghut ri.

²⁰ Myinhâng jé lô jáng, Yesuq gi, haú chángzo raxe í yuq eq rahá, zohpoq má zung tó ri. ²¹ Yangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám rá nghut lhê." ga taí ri.

²² Haú hkùn, yangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaí?" ga, Yang lé chôm myí akô.

²³ Haú hkùn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám rá sù nghut lhê. ²⁴ Haú Byu Yangzo gi, Yang eq séng luí kâ tô é eq rajung za, shí rá za nghut lhê. Nghut kôlhâng, haú Byu Yangzo lé ap pyám é sù gi, dingnyé wó ri; haú yuq gi, a hku lé le lháng, je ge ri." ga dum taí kat ri.

²⁵ Hau htâng, Yang lé ap pyám rá sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tû taí kat ri.

²⁶ Yangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²⁷ Hau htâng, Yang gi, góm lé le, yù mù, jeju hkya-on luí, yangmoq lé byi mù, taí é gi, "Nungmoq banshoq bang, shuq keq. ²⁸ Shí gi, yubak mara hkyut pyám byi rá, byù myo myô é matú htoq pyám é, dangshikaq eq séng é Ngá sui nghut lhê. ²⁹ Ngò, nungmoq lé taí kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga taí ri.

³⁰ Yangmoq gi, hkya-on mahkôn ralhum ban hkôn jáng, Tsanlun Bùm shut htoq é ló bekô nghut ri.

Petruq He-ngik Rá Lé, Te Taí É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yangmoq lé, "Nungmoq lhunglhâng bang gi, hkú-myín yang jáng, Ngá é yanmai, myit lingbat kó rá nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng má é sau pé gi, lhoq pyo pyám é hui kó rá nghut lhê.'^{*}

ga kâ tô ri. ³² Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má é ló láng rá nghut lhê." gâ ri.

³³ Haú hkùn, Petruq gi, "Náng é yanmai, góbang banshoq myit lingbat kôlhâng, ngò gi, hkâ-nhám le myit lingbat rá a nghut." ga tû taí ri.

³⁴ Yesuq gi, "Ngò, nang lé teng za tái lé, hkù-myîn yhang jáng, woq a tân shimá, nàng, Ngo lé sum dâm he-ngik pyám rá nghut lhê." ga tái ri.

³⁵ Nghut kôlhang, Petruq gi, "Ngò, Nàng eq rahá shí rá dut kôlhang, Nang lé ngò he-ngik pyám rá a nghut." ga tái ri. Haù chángzô pé góbang banshoq le, haù su ga châng tái bum akô nghut ri.

Get-samane Gà É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gà é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zùng láng keq." ga tái ri. ³⁷ Yesuq gi, Petruq eq Zebedi yhangzô nhik lé shuí chùng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí rá í yhang myit yón nyi ri; nungmoq gi, Ngò su machyâ luí, shí má láng nyi keq." ga tái ri.

³⁹ Yesuq gi, haù mai ratsuí zo sô é mù, myigùng má ngóm gop to luí, "Áwa é, wó dut é nghut le gi, góm* shí lé, Ngá chyáng mai lhai pyám byi laq. Nghut kôlhang, Ngò ô nau é đống a nghut, Nàng ô nau é đống sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taù lo le, yhangmoq yhup myhí to kô é lé lo myàng ri. Haù mù, Yhang gi, Petruq lé, "Nungmoq gi, hkying hkum rahkum za lhang, Ngò eq rahá a wó machya nyi kô lú? ⁴¹ Gunglaú é a hui sháng gaq, machyâ luí, kyûdûng nyi keq. Haù woi-nyí gi, kâm nyi kôlhang, gungsho gi, wum nyhôm nyi ri." ga tái ri.

⁴² Yhang gi, radâm dum é mù, "Áwa é, góm shí lé, Ngò a shuq é a wó lai rá nghut jáng gi, Nàng ô nau é đống nghut sháng gaq hkoi." ga kyû dum dũng ri.

⁴³ Yhang dum taù lo le, yhangmoq gi, myoqkuq lai kô é yanmai, yhup myhí to láng kô é lé, lo dum myàng ri. ⁴⁴ Haù mù, Yhang gi, yhangmoq lé tô pyâm to mù, sum dâm nghũ rá dâm dum é luí, hí lé dũng é đàng lé roq é dum dũng ri.

⁴⁵ Haù mù, Yhang gi, haù chángzô pé chyáng dum taù jé lô mù, yhangmoq lé, "Nungmoq gi, ahkuí jé shoq yhup ngón nyi ashí kô lú? Wú keq! Haù ahkying gi, jé bê nghut luí, haù Byu Yhangzô gi, yubak dap bâng é loq má ap pyâm é hui rá nghut bê. ⁴⁶ Toq keq! Ló losháng hkoi! Ngo lé ap pyám rá sũ gi, jé lé bê nghut ri." ga tái ri.

Yesuq, Chyup Yú Hui É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dãng nyo nyi ashí u lé, haù chángzô raxe í yuq má bó é Yudaq gi, jé lé lo ri; haù hkyangjong agyi pé eq mingbyu é suwún wui chyáng mai nhang kat é bang nghut é, sâm eq dumbáng pé chung tô é byù moq mó le, yhang eq rahá nghut akô. ⁴⁸ Yesuq lé ap pyám rá sũ gi, haù bang lé, "Ngò, bopuq puq é sũ gi, haù yuq nghut bê; Yhang lé chyup yú keq." ga kumlhá byí tô ri. ⁴⁹ Yudaq gi, Yesuq chyáng hkyê za é mù, "Rabai é, wángzân nyi lhê lú?" ga tái ri, Yhang lé bopuq puq byí ri.

⁵⁰ Haù hkùn, Yesuq gi, "Buinùm hpó é, nàng kut rá muzó lé kut aq hkoi." ga tái tái kat ri.

Hau htâng, yhangmoq gi, hí shut hui é luí, Yesuq lé chôm zuí zing mù, chyup yú bekô nghut ri. ⁵¹ Haù mù, Yesuq eq rahá nyi bang má é rayuq gi, sâm she

* **26:39** Góm gà é gi, Yesuq, jamjau hui rá hkyô eq shí rá hkyô lé, tái nau é nghut lhê.

htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haù jáng, Yesuq gi, haù yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shí rà nghut lhê. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rà nghut é lé, nungmoq a sé kó lúhú? ⁵⁴ Nghut kôlhang, haù su nghut é nghut jáng, shí hkyô dut lò rà nghut lhê ga Chyúmdang pé má bò tô é hkyô gi, hkâsu wó dik lò rà lúhú?" ga taí kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rà matú, shâm eq dumbáng pé chùng mù, lé lo akò lúhú? Ngò gi, nyí wuí, noqkuq yhùm má zùng mù, mhoqshit nyí kôlhang, nungmoq, Ngo lé a chyup yû kó é nghut lhê. ⁵⁶ Nghut kôlhang, shí su dut é hkyô pé banshoq gi, haù myiqhtoí pé kâ tô é hkyô pé lo dik rà matú dut é nghut ri." ga taí ri. Haù hkùn, haù chângzô pé banshoq gi, Yesuq lé tò pyám to kôluí, hpang byo byuq bekò nghut ri.

Yudaq Byìn Tú Wapdoq Má Jep Huí É Hkyô
Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haù tará sará pé eq suwún wuí zup zîng nyi é jang, hkyangjong mó Kayahpaq é yhùm má, Yhang lé shuí e akò. ⁵⁸ Petruq gi, hkyangjong mó é yhumwâng hkaù má châng jé wâng shoq, we we mai Yesuq htâng châng tô ri. Yhang gi, hkâsu dut lò rà lé myàng naù luí, wâng hkaù má wang é mù, zúng bang eq rahá zung tò ri.

⁵⁹ Haù hkyangjong agyi pé eq Yudaq byìn tú wapdoq má é góbang gi, Yesuq lé sat pyám nhâng rà matú, a têng é saksé ho nyi akò. ⁶⁰ A têng é saksé myo myo htoq lô kôlhang, wó sat rà í é saksé a myàng kó nghut ri.

Ló htâng má, byù í yuq gi, lé lô kômù, ⁶¹ "Shí yuq gi, 'Ngò gi, haù Garai Gasâng é noqkuq yhùm lé lhoq hten pyám mù, sum nyi gyo-ro má dum wó sai lhê,' ga taí sù nghut ri." ga taí akò.

⁶² Haù hkùn, haù hkyangjong mó gi, toq yap mù, "Nàng, hai le a tú taí luq? Shí bang, Nàng lé mara hun nyi é saksé gi, hká đông nghut lhê lúhú?" ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rú dui nyi é Garai Gasâng é mying lé lang luí, ngò, Nàng lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôle, nungmoq gi, ahkuí mai htâng hpyang má, haù Byu Yhangzo gi, a-tsam bo dik Su é loqyo hkyam má zung tò é lé le, mhuthtui jì mù, mauhkung mai lé lo é lé le, nungmoq myàng kó rà nghut lhê." ga taí ri.

⁶⁵ Haù hkùn, hkyangjong mó gi, yhâng é bu lé lâng cheq pyám mù, "Yhang gi, Garai Gasang lé rhoí dang taí bê nghut ri! Nga-nhúng, hai saksé rà ashí lúhú? Yhang, Garai Gasang lé rhoí dang taí é lé, nungmoq, ahkuí wó gyo bekò nghut lhê. ⁶⁶ Nungmoq hkâsu wó myit akò lúhú?" ga myí jáng, yhangmoq gi, "Yhang gi, shí gíng sù nghut lhê." ga tú taí akò nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqtsup èq htuí byí akò nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoí htoí wú aq." ga taí akò.

Yesuq Lé, Petruq He-ngik Pyâm É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaù má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haù Galile byù Yesuq eq rahá nyi sù nghut ri." ga taí ri.

⁷⁰ Nghut kôlhang, Petruq gi, haù bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haù má é bang lé taí kat ri.

⁷² Haù hkún, yhang gi, "Byù haù yuq lé, ngò a sé!" ga dakam é dông he pyâm ri.

⁷³ Hau htâng razup zo má, haù jowò má yap to bang gi, Petruq chyáng huí é kômù, "Nàng le, haù bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haù hkún, yhang gi, yhânggùng yhang nhing luí, "Haù yuq lé, ngò a sé." ga dakâm dang taí ri.

Haù-u yhang, woq tún bê nghut ri. ⁷⁵ Haù mù, Petruq gi, "Woq a tún shi má, nàng, Ngo lé sum dâm he pyâm râ nghut lê." ga, Yesuq, yhang lé taí é dang lé, myit bûn kat mù, shinggan shut htoq é luí, gyai yhang é ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsún noq le, hkyangjong agyi pé banshoq bang eq mingbyu é suwún wui gi, Yesuq lé sat pyám nhâng rá matú chôm myit hpyit yù bekô nghut ri.

² Haù mù, yhangmoq gi, Yhang lé tuí yù luí, shuí htoq é kômù, mauzau Pilat chyáng é ap byí akô nghut ri.

³ Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng, nungngham wó mù, haù ngùn sum xê chap lé, hkyangjong agyi pé eq suwún wui chyáng ló dum taú byí ri. ⁴ Haù mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haù hkyô, ngamoq eq haí sêng lhê lúh? Haù gi, nàng eq sheq ru sêng lhê." ga lhom taí kat akô nghut ri.

⁵ Haù mù, Yudaq gi, ngùn haù lé, noqkuq yhúmhkaù má dú pyâm to luí, htoq ló mù, yhang gúng yhang é juíshi byuq bê nghut ri.

⁶ Haù hkyangjong agyi pé gi, ngùn chap haù pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô. ⁷ Haù mù, yhangmoq gi, tũngbaù pè é lupdùng kut rá matú, au saí zo su é maumyí lé, ngùn hau èq wui hpyit yù rá dông, chôm myit hpyit to bekô nghut ri. ⁸ Hau é yanmai, ahkuí jé shoq, haù jowò lé, sui myigùng ga myhíng tô akô nghut ri.

⁹ Haù gi, "Haù Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haù Yhumsing Garai, ngo lé pying tô é eq rajung za,

¹⁰ haù au saí zo su é maumyí lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

11 Haú u lé, Yesuq gi, mauzau hpô é hí má yap tô é nghut mù, haú mauzau hpô gi, Yhang lé, "Nàng gi, Yudaq byu pê é hkohkâm nghut lê lú?" ga myi jáng, Yesuq gi, "Nàng taí é eq rajung za nghut lê." ga tú taí ri.

12 Haú hkyangjong agyi pé eq suwún wuí gi, Yhang lé, mara hún kôjáng, Yhang gi, haí le a tú taí nghut ri. 13 Haú hkûn, Pilat gi, Yhang lé, "Yhangmoq, Nang lé mara hún saksé haú-í hkâm nyi kô é lé, Nàng a wó gyo lú?" ga saí myi ri. 14 Nghut kôlhang, Yesuq gi, dang rahkun lhang a tú taí é yanmai, haú mauzau hpô gi, gyai maú byuq bê nghut ri.

15 Haú Lhoqlhai Poi u lé, mingbyú wui ô nau é má cháng luí, haú mauzau hpô gi, htóng byú rayuq yuq lé nhâng byí é htúng joq ri. 16 Haú u lé, a gè myíng htoq é htóng byú, Barabaq ga sù rayuq nyi ri. 17 Haú mù, byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myi ri. 18 Yhang haú su ga myi é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

19 Pilat gi, tarâ jéyáng tingnyâng htoq má zung tô ashí hkûn, yhangmyi gi, "Haú mara a bò Sù lé, haí le hkâkut; hkâsu mù gâ le, hkú-nyí za lhang, yhupmoq má, haú yuq é yanmai, ngò tsómra hpuzô pyám bê nghut lê." ga, yhâng chyáng dang pyíng kat ri.

20 Nghut kôlhang, haú hkyangjong agyi pé eq suwún wuí gi, Barabaq lé dúng htoq yú rá eq Yesuq lé sat pyám nhâng rá matú, shiwa byu pé lé wum byi bekô nghut ri.

21 Haú mauzau hpô gi, "Shí í yuq má é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tú taí akô nghut ri.

22 Haú mù, Pilat gi, "Haú jáng gi, Hkrisduq gâ é Yesuq lé, ngò hkâsu kut rá lú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tú taí akô nghut ri.

23 Nghut kôlhang, yhang gi, "Haí mù lú lú? Yhang gi, hai mara kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

24 Pilat gi, hká dông le a dat kut lô é eq byu pé gabyông lò kó rá nghut é hkyô lé myàng luí, uchyam yù mù, shiwa byu pê hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lê." gâ ri.

25 Haú shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshú pé htoq má joq nyi sháng gaq." ga, dum tú taí kat akô nghut ri.

26 Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám rá matú ap byí kat bê nghut ri.

Yesuq Lé, Gyezô Pé Rhoi É Hkyô
Mrk 15:16-21; Yhn 19:2-3

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaú má shuí wang ló kômù, Yhâng é lhíngkhyuq má, gyedap gón lé jì tsíng tô akô. 28 Yhangmoq gi, Yesuq é mebu hkyut pyám byi kôluí, zam zam ne é buhíng hut byi kômù, 29 zujanmaú ralhun saí yù kôluí, Yhâng é ulhum má tsung byi akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuaq kôluí, "Yudaq byu pê é hkohkâm hpô é! Chyung híng xê híng nyi sháng gaq ô!" ga, jihpoi dang taí akô. 30 Yhangmoq gi, Yhang lé sókan byé gyun luí, Yhâng é loq mai jàm-yang lú yú

mù, Yhâng é ulhum má dum bat bat kut akô nghut ri. ³¹ Yhangmoq gi, Yhang lé rhoi jihkyoi ban kut yû kôjáng, Yhang wut tô é buhîng lé hkyut yû kômù, Yhâng é mebu lé dum hut byi luí, tapzîng má jén sat pyám rã matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luí tapzîng waq nhang akô nghut ri. ³³ Yhangmoq gi, Golgahta gà é jowò má jé e ló bekô nghut ri. Golgahta gà é lichyúm gi, ugyap joq é jowò lé gà é nghut lhê. ³⁴ Háu má jé jáng, yhangmoq gi, Yesuq lé, hkô jung eq nyhô tô é tsibiyiq wing lé byi huq akô; nghut kôllhang, Yhang gi, háu lé chyam wú mù, a shuq byi kut pyâm ri. ³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byi akô. ³⁶ Hau htâng, yhangmoq gi, háu jowò má zung to mù, Yhang lé zúng nyi akô nghut ri. ³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kã tap tô akô. ³⁸ Háu hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô lai ló é bang gi, nyhap é dông u-ngut ngut mù, tai kô é gi, ⁴⁰ "Noqkuq yhùm lé hpoyoq pyám luí, sum nyi gyoro má dum wó sai lhê ga Sù ê! Nàng, Garai Gasâng é Yhangzo nghut le gi, Nàng gûng nàng hkyi yù luí, tapzîng mai gyó lo wú aq mhai!" ga akô nghut ri.

⁴¹ Háu eq rajung za, hkyangjong agyi pé, tarã sarã pé eq suwún wui le, Yhang lé rhoi jihkyoi kut mù, tai kô é gi, ⁴² "Shí yuq gi, góbang lé hkyi yù sù nghut kôllhang, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhã! Ngamoq wó lumjîng rã matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkãsu mù gà le, Yhang gi, 'Ngò, Garai Gasâng é Yhangzo nghut lhê.' ga tai ri." ga bum akô nghut ri. ⁴⁴ Háu eq rajung za, Yhang eq rahá tapzîng má jén to huí é damyaq í yuq le, Yhang lé rhoi dang tai akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai ê, Ngá Garai ê, Nàng, hai mù, Ngo lé tô pyâm tô lhê lú?" gà é nghut ri. ⁴⁷

⁴⁷ Háu nãm má yap tô é bang ra-am gi, háu lé wó gyo kôjáng, "Yhang gi, myiqhtoi Eliyaq lé wut nyi ri." ga tai akô.

⁴⁸ Háu hkûn jáng, yhangmoq mã é rayuq gi, din e ló mù, wuimaù lé ê yu ri. Yhang gi, háu lé tsibiyiq wing chyín má jum yù luí, jãm-yang má tuí tap mù, Yesuq shuq rã matú yhun byi ri. ⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga tai akô nghut ri.

⁵⁰ Háu hkûn, Yesuq gi, htê mó eq dum garú kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. ⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é huí akô. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wui myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô. ⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhangnu Mariq eq Zebedi é yhangzô nhiktang é yhangnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. ⁵⁸ Yhang gi, Pilat chyáng é mù, Yesuq é gungsôm lé é dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng eq htup yup luí, ⁶⁰ luqgok lé kyúng tô é, yhâng é lup sik hkaú má é kat tô ri. Hau htâng, yhang gi, luphukm má, luqlông eq lhêng chí pyâm to luí, lô byuq bê nghut ri. ⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng é mù, ⁶³ "Yhumsing ê, Yhang, asak dui nyi ashî hkûn, 'Sum nyi nghû râ buinyi má, Ngò dum dui toq lô râ.' ga, haú byù mhaú taí é dang lé, ngamoq bûn nyi lhê. ⁶⁴ Haú mù, haú sum nyi nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu lô mù, Yhang shi é mai dum dui toq lô bê ga, byu pé lé taí kó râ nghut lhê. Shí, lô htâng dâm mhaú é hkyô gi, sâng-hi dâm htoq je wui râ nghut lhê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tú taí kat ri. ⁶⁶ Haú mù, yhangmoq gi, é luí, lup lé gau shoq ga, luqgok má dizik htung mù, lup zúng byú nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyi lai jáng, rabat é sâng-hi nyi maubó zó má, Magadalaq wà mâ é Mariq eq goyuq Mariq gi, lup má é wú râ ga, e lô akô.

² Haú hkûn, layàng mó nún lo ri; hkâsu mù gâ le, Yhumsing Garaí é maumang lagyo rayuq gi, mauhkûng mai gyó lé lô mù, lup má é luí, haú luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lúm wú gyuq kômù, pyik pyik nán luí, shí gùng su dut bùm bekô nghut ri.

* 27:53 Chyoiyúng myuq gâ é gi, Yerusalem wà mó lé gâ é nghut lhê.

⁵ Haù maumang lagyo gi, miyiwe haù nhik lé, "Hkâgyuq kó! Haù tapzîng má jén sat huí é Yesuq lé, nungnhik ho nyi kô é lé, ngò sê lhê. ⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lhez é jowò lé, lé wú keq. ⁷ Haù mù, hân taù ló luí, Yhâng é chángzô pé lé, 'Yhang, shí é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haù má ló myâng kó râ nghut lhê.' nghù ló taí kyo keq. Nungnhik lé, ngò taí é lé matsîng chûng keq." ga taí kat ri.

⁸ Haù mù luí, miyiwe myhí haù nhik gi, gyuq kôlhang, gyai gabú é myit èq lup mai hân taù ló mù, Yhâng é chángzô pé lé ló taí kyo râ matú, din ló bê nghut ri. ⁹ Haù hkûn, Yesuq gi, radá dâm yhangnhik lé lhom tê mù, "Wângzán nyí kó sháng gaq." ga taí ri. Haù mù, yhangnhik gi, huí ê luí, Yhâng é hkyí má po zing to mù, Yhang lé noqkuq akó. ¹⁰ Haù hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghù ló taí kyo keq; haù má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

¹¹ Miyiwe haù nhik hkyô má ru nghut nyi ashí le, lup zúng é gyezô pé ra-am gi, myuq hkaù má wang ló mù, dut lai lo é hkyô banshoq lé, haù hkyangjong agyi pé lé ló taí kyo akó nghut ri. ¹² Haù hkyangjong agyi pé gi, suwún wui eq huí lhum luí, hpyê lhùm é htâng má, haù gyezô pé lé, ngùn myo myo tsup byi mù, ¹³ "Myín lé, ngamoq yhup myhí tô é hkûn, Yhâng é chángzô pé lé ló mù, mâng lé, lé hkaù yu ló bekô nghut ri.' nghù taí keq. ¹⁴ Shí hkyô lé, haù mauzau hpó wó gyô é nghut jáng, yhang myit ngon shoq, ngamoq taí râ nghut lhê; haù hkûn, nungmoq gi, hai manghkáng a htoq râ nghut lhê." ga taí kat ri. ¹⁵ Haù mù, gyezô pé gi, ngùn haù pé lé yù luí, yhangmoq lé taí kat é eq rajung za kut bekô nghut ri. Haù su mù, haù hkyô gi, Yudaq byu pé má taí pyo myhín ló bê nghut mù, ahkuí jé shoq taí nyi bum akó nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haù chángzo raxe rayuq gi, yhangmoq lé, Yesuq ê nhang tô é Galile mau má é bùm shut e ló bekô nghut ri. ¹⁷ Yhangmoq gi, Yesuq lé myàng kôjáng, noqkuq akó; nghut kôlhang, ra-am gi, a dê jîng kó nghut ri. ¹⁸ Hau htâng, Yesuq gi, yhangmoq chyáng lé lô mù, "Mauhkûng eq myigùng htoq má é ahkáng ayá banshoq, Ngo lé byí to bê nghut lhê. ¹⁹ Haù mù, nungmoq gi, htoq é luí, byù myù chângjup lé, Ngá é chángzô pé dut nhâng mù, haù Íwa, Yhangzo, Chyoiyúng Woi-nyí é myiêng lang luí, wui-myhup hkám byi mù, ²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htùm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

Yesuq É Matú Hkyô Htong Byí É Hkyô
Mht 3:1-12; Luk 3:1-18; Yhn 1:19-28

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haú myiqhtoi Esai-aq laiká má: "Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê."[☆]

ga luí le,

³ "Haú yoso má, byù rayuq garú tai é htê gi, 'Haú Yhumsing é matú, hkyô hen to keq; Yhâng é matú hkyô lhoq nyhang to keq."[☆]

ga luí le, kâ tô é eq rajung za nghut lhê. ⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é huí râ matú myit lhing mù, wui-myhup hkám yù râ hkyô lé, hko kyô nyi ri. ⁵ Haú hkûn, Yuda mau jowô hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yù kôluí, yhâng chyáng mai Yodan láng má wui-myhup hkám yu bum akô nghut ri. ⁶ Yohan gi, gola-uq shomaú èq sai é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosó byo-í pé lé zo sú nghut ri. ⁷ Yhang tai kyô é dang gi, "Ngá htoq má wum-o a-tsam je bo é sú rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyí râ lháng a gingdán é nghut lhê. ⁸ Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gá ri.

Yesuq, Wui-myhup Hkâm Yu É Hkyô Eq Gunlaú Huí É Hkyô
Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkám yu ri. ¹⁰ Yesuq gi, wui mai htoq lo é u lé, mauhkung bóng lo é lé le, Woi-nyí gi, hpúngkyui gungghyâng sú é dông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkung mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haú mù, Yhang gi, yoso má myi xê nyí nyi luí, Tsadán èq gunlaú é huí ri; tân jung yosó zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé
Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkyíng gi, jé bê; Garai Gasâng é mingdán gi, chyáng lò bê nghut ri; myit lhing mù, haú

gabú danglù lé lumjǐng keq hkoi." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô lai ló le, Simun eq yhanggu Andre nhiktâng, nhông má gùn dù nyí kô é lé, myang ri; haú nhik gi, ngozo kóng zo su nhik nghut akô. ¹⁷ Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé cháng kóng su nhik dut nhâng rã nghut lhê." ga tái ri. ¹⁸ Haú hkún, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkún, Zebedi é yhangzo, Yakuq eq yhanggu Yohan nhiktâng, lhai hkaú má gùn hpo nyi kô é lé, myang ri. ²⁰ Haú hkún, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhai hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um và má e akô; Bánno buinyi nyí jé jáng, Yesuq gi, tarajong má wang ê mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gà le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyi luí, wut garú kat é gi, ²⁴ "Nazaret và byù Yesuq é, ngamoq gi, Nàng eq haí sêng lhê lú? Ngamoq lé lhoq hten rã matú, Nàng jé lé é nghut lhê lú? Nàng gi, Garai Gasâng é Chyoiyúng Sù nghut é lé, ngò sê lhê." gà ri.

²⁵ Haú hkún, Yesuq gi, "Hkâjop, yhâng chyáng mai htoq ló aq." ga yhang lé tân kat ri. ²⁶ Haú hkún, agè ashop é nat haú gi, byù haú yuq lé wum kat langtân nhâng luí, htê mó eq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang và nghut lhê lú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byí akô nghut ri." ga luí, tái lhùm bum akô nghut ri. ²⁸ Yesuq eq sêng é ludang gi, Galile mau jàm shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkún jáng, Yakuq eq Yohan nhik le mù, Simun eq Andre nhiktâng é yhùm má wang e ló bekô nghut ri. ³⁰ Simún é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom tái kyô akô nghut ri. ³¹ Haú mù luí, Yesuq gi, yhâng chyáng huí é mù, yhâng é loq má zui luí tu tsung ri; haú hkún jáng, nò ge byuq luí, yhang gi, yhangmoq lé gai tso gai huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkát htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a tái nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralthum má htoq é luí, kyú é dúng ri. ³⁶ Simun eq yhâng é luzúm wuí kúm gi, Yhang lé

châng hô kômù, ³⁷Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luí, tái kyô akô nghut ri.

³⁸Haú hkûn, Yesuq gi, yhangmoq lé, "Awui ayàm mã é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tù tái ri. ³⁹Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byi wún ri.

Manggâm Dap Sû Lé, Yesuq Lhoq Gê Byi É Hkyô
Mht 8:1-4; Luk 5:12-16

⁴⁰Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

⁴¹Haú hkûn, Yesuq gi, yhang lé wú shogyo luí, loq lhâm kat mù, háu yuq lé é záng luí, "Ngò dóng lhê, sân-yúng aq hkoi." ga tái ri. ⁴²Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴Yesuq gi, "Nàng, shí hkyô ó lé le hkâtaí kyo. Nghut kôlháng, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri. ⁴⁵Nghut kôlháng, háu yuq gi, htoq ló mù, háu hkyô lé je tái pyo myhín ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mã é chamchuyiui dut é jowò má za nyi nyi ri. Nghut kôlháng, byu pé gi, jowò hkangmó mai Yhâng chyáng ru zing lé nyi bum ashí kó nghut ri.

2

Gùngjum Shí Sû Lé, Yesuq Lhoq Gê Byi É Hkyô
Mht 9:1-8; Luk 5:17-26

¹Buiniyí hkâ-myháng a myáng má, Yesuq gi, Kaperna-um wà má dum wang lò jáng, Yhang yhùm dum taú jé lô bê gâ é hkyô lé, byu pé wó gyô bum akô nghut ri. ²Haú mù, byù myo myo zing lé lô kôluí, yhùmhkaú má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri. ³Haú hkûn, byù myi yuq gi, gùngjum shí sù rayuq lé chôm dang waq luí, Yhâng chyáng lé lo akô. ⁴Yhangmoq gi, byù lùm myô chyín chyap to mù, byù háu yuq lé Yesuq chyáng a wó shuí jé é kô é yanmai, Yesuq é u htoq mã é yhumhkúng lé dong htông yù luí, gùngjum shí sù lé taphkang eq roq hkyô kat akô nghut ri. ⁵Yesuq gi, yhangmoq é lumjing myit lé byu-myàng jáng, gùngjum shí sù lé, "Ngá zo é, náng é yubak mara lé hkyut pyám byi bê." ga tái ri.

⁶Haú hkûn, tarâ sará pé ra-am gi, háu má zung to kôluí, yhangmoq é i-myyit unghkaú má, ⁷"Byù shí yuq gi, hái mù luí háu su gâ lhê laq? Yhang gi, Garai Gasang lé rhoi dang tái nyi ri; Garai Gasang mai lai luí, ó yuq wá mara wó hkyut byi râ lúh?" ga luí, myit són wuí nyi bum akô nghut ri.

⁸Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, "Nungmoq é i-myyit hkaú má, hái mù háu su ngù myit són wuí nyi bum akô lúh?" ⁹Haú gùngjum shí sù lé, 'Náng é yubak mara lé hkyut pyám byi bê.' ngù tái é dang eq, 'Toq aq, náng é taphkang lé yù mù, hkyô so aq.' ngù tái râ má, hká hkun je tái lui lhê lúh? ¹⁰Nghut kôlháng, háu

Byu Yhangzo * gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga, yhangmoq lé tai kat ri. ¹¹ Hau htâng, Yhang gi, haú gùngium shí sù lé, "Ngò, nang lé tai bá, toq aq, náng é taphkang lé yu chùng lui, yhùm taú ló aq hkoi." ga tai ri. ¹² Haú yuq gi, toq mù, yhâng é taphkang lé yu chùng lui, yhangmoq banshoq bang wú tsuq tô é myoq hí mai só htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isù é hkyô gi, hkâ-nhâm lháng a myàng wú shí." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haú hkùn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri. ¹⁴ Yhang gi, sô yông ló nyi é hkùn, kang guq zúm má zung tô é, Alhpe yhangzo Lewiq lé myang kat lui, "Ngá htâng châng aq." ga tai ri. Haú hkùn, Lewiq gi, toq lui, Yhang htâng châng bê nghut ri.

¹⁵ Yesuq gi, Lewiq é yhùm má myinzang ê zô nyi é hkùn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù lui, kang guq bang eq yubak dap bang eq rahá zo shuq nyi lhê lú?" ga myí bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nòhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tai kat ri.

Zoshuq Gám É Eq Sêng É Hkyô
Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlháng, náng é chángzô pé gi, haí mù a gám kô é lú?" ga lui, myí akô nghut ri.

¹⁹ Haú hkùn, Yesuq tú tai é gi, "Bing pé gi, lusik eq rahá nghut nyi tô ashí hkùn, zoshuq hkâsu wó gám râ lú? Yhangmoq gi, lusik eq rahá nghut nyi é u lé, zoshuq gám kó râ a nghut. ²⁰ Nghut kôlháng, lusik lé yhangmoq chyáng mai shuí yu pyám é hkying jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. ²² Haú eq rajung za, tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng lui, tsibiyiq wing eq shokuq htung htên byuq râ nghut lhê. Haú mù, tsibiyiq wing asik gi, shokuq htung sik má za ge kat é nghut lhê.

Báno Buinyi É Yhumsing
Mht 12:1-14; Luk 6:1-11

* **2:10** Byu Yhangzo gâ é gi, Yesuq Yhânggung yhang lé le tai é nghut lhê, Mesaia lé le tai é nghut lhê.

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló é hkún, Yhâng é chángzô pé gi, kyôshi ratsuí langshap yu akò nghut ri. ²⁴ Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haú mù, náng é chángzô pé kut nyi akò lú?" ga tai akò.

²⁵ Haú hkún, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkún, hkásu kut é hkyô lé, nungmoq hkâ-nhâm le a nghan wú kó lú?" ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tú tai ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haú mù, haú Byu Yhangzo gi, haú Bánno buinyi é Yhumsing lháng nghut lhê." ga xoq tai ri.

3

¹ Yesuq gi, tarajong má radam dum wang e le, loq raloq ajum shi byuq é byù rayuq nyi to lánq ri. ² Haú hkún, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lú ga, mara hún râ matú gyám wú nyi akò nghut ri. ³ Yesuq gi, haú loq jum shí sù lé, "Banshoq bâng é hí má, toq yap shit aq." ga tai kat ri.

⁴ Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyí râ eq byù sat râ hkyô pé má, hká lhum kut le sheq tarâ wang lhê lú?" ga myí kat jáng, yhangmoq kúm gi, jit le a ga kó nghut ri.

⁵ Haú mù, Yhang gi, nhik-yô nau é myit eq haú bang lé lhîng wú mù, yhangmoq myit htan é hkyô lé, wú yón luí, haú loq jum shí sù lé, "Náng é loq nyhang kat aq." ga tai kat jáng, haú yuq gi, loq nyhang kat luí, yhâng é loq gi, shoq za ge byuq bê nghut ri. ⁶ Hau htâng má, Hparishe pé gi, htoq ló kômù, Yesuq lé hkásu kut wó sat pyám râ hkyô lé, Herut é byu pé eq chôm hpyê lhum bum akò nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akò nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayám jé shoq mâ é bang, ajùm ayò gi, Yhang kut nyi é hkyô banshoq lé wó gyo kójáng, Yhâng chyáng jé lé bum akò nghut ri. ⁹⁻¹⁰ Yesuq gi, byù myo myo lé lhoq gê byí é yanmai, nôhpyo hui to bang gi, Yhang lé wó záng shoq ga, chyín chyap wang ló bum akò. Byù lúm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhú hen to nhang ri. ¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, tai garú akò. ¹² Nghut kôlháng, Yesuq gi, Yhang ó yuq nghut é hkyô lé a tai byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haú bang gi, Yhâng chyáng jé lé lo bum akò nghut ri. ¹⁴ Haú hkún, Yesuq gi, byù raxe

í yuq lé hkyin yù luí, lagyo ayá byí ri; haú bang gi, Yhang eq rahá nyí rá matú le, mungdang hkô rá matú Yhang nhang htoq kat rá eq, ¹⁵ nat gâng pé lé hkat htoq rá ahko ahkáng wó rá matú le, nghut akô nghut ri. ¹⁶ Haú raxe í yuq gi, Simun (Yesuq mai Petruq ga mying myhíng byí sù); ¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buaneraga ga mying myhíng byí ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq, ¹⁹ Yhang lé ap pyám rá sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhúm má wang ló le, byù ajùm ayò dum zing lé lô kômù, Yhang eq Yhang é chángzô pé gi, zang zo hkying lháng a wó kó nghut ri. ²¹ Yhâng é yhumbyù wui gi, haú hkyò lé wó gyo kôjáng, "Yhang, myit a gying lo nghut ri." ga luí, Yhang lé hung shuí yù rá matú, e akô nghut ri.

²² Yerusalem wà mó mai gyó lé lo é tará sará pé gi, "Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaù é wum-o a-tsam eq za, nat gâng pé lé hkat htoq pyám é nghut ri." ga tai bum akô nghut ri.

²³ Haú mù luí, Yesuq, yhangmoq lé wut yù mù, dangtú dong tai é gi, "Tsdán gi, Tsdán lé hkâsu kut wó hkat htoq rá lú? ²⁴ Mingdán ralhum gi, ahkaú má byoq gâng lhúm nyí kô é nghut jáng, mingdán haú wó gíng nyí rá a nghut. ²⁵ Yhumhtu ralhum má le, ikon byù yhangchang byoq gâng lhúm nyí é nghut le gi, yhumhtu haú wó gíng nyí rá a nghut. ²⁶ Haú eq rajung za, Tsdán le, yhanggung yhang lhoq hpyoq luí, gam hkoq nyí é nghut le gi, yhang wó nyí nyí rá a nghut, htúm byuq rá za nghut lhê. ²⁷ Ó yuq nghut kôle, wum-o bò sù lé hí tui zing pyám é a nghut le gi, yhâng é yhúm má lú wáng mù, yhâng é sutzè lé wó lú yù rá a nghut: Haú yuq lé hí tuí zing pyám jáng sheq, yhâng é sutzè lé wó lú yù rá a nghut lhê. ²⁸ Ngò, nungmoq lé teng za tai kôle, byu pé kut shut é mara banshoq eq rhoi dang tai pyám é pé lé gi, mara wó hkyut pyám byí lhê. ²⁹ Nghut kôlháng, haú Chyoiyúng Woi-nyí lé rhoi dang tai pyám é sù gi, hkâ-nhám le, mara hkyut byí é wó hui rá a nghut; haú yuq gi, ahtum abyuq yubak wó sù nghut nyí ri." gâ ri.

³⁰ Yhang haú su ga tai é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhúm hkun má yap to kôluí, Yesuq htoq lô rá matú, byù rayuq lé wang tai nhang akô nghut ri. ³² Byù ajùm ayò gi, Yhâng é lhíngkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má lánq bum akô." ga tai kyô akô nghut ri.

³³ Haú hkùn, Yhang gi, "Ó pé gi, Ngá nu eq Ngá gu pé nghut akô lú?" ga myí kat ri.

* **3:18** Zelutuq gâ é lichyúm gi, yhumsing zui saí é hkyò má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó rá matú shikut nyí é hpúng bang lé, Zelutuq gâ lhê.

³⁴ Hau htâng, Yhang gi, Yhâng é lhhinghkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radàm dum mhoqshít hi ló bê nghut ri. Haú hkûn, Yhâng é lhhinghkyuq má byù moq mó lûm yán zîng lé lo bùm kô é yanmai, Yhang gi, nhông hkaú má é lhaí má wang zung tô ri; haú u lé, byù moq mó gi, nhông yàm gin-gau htoq má nyo míng bum akô nghut ri. ² Yhang gi, haú bang lé, dangtú pé dông myo myo mhoqshít byí nyi ri; Yhang mhoqshít é má. ³ "Gyo wú keq! Kyô hkyô sù rayuq gi, kyôshi san râ gâ htoq e ló ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri. ⁵ Ra-am gi, myi-tse a htú é luqgok yò pé má gyó ang mù, myi-tse a htú é yanmai, lui za yuq htoq ló kôle, ⁶ amyit a wó chîn hing é nghut mù, bui htoq ló jáng, hlap kyuq pyám bê nghut ri. ⁷ Dum ra-am gi, zuguaym hkaú má gyó ang lui, zubyap haú pé kô lò mù, wup pyám é yanmai, ashi a wó zui nghut ri. ⁸ Nghut kôlhang, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri. ⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô. ¹¹ Haú hkûn, Yhang, yhangmoq lé taí kyô é gi, "Garai Gasâng é mingdân eq sêng é sê gyo wui é hkyô lé sé gyo râ ahko ahkâng, nungmoq lé byí to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê. ¹² Haú mù lui, "Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sé gyo kô é ru nghut le gi, lhhing taú lò mù, mara hkyut pyám byí é hui kó râ nghut lhê!"[☆] gâ ri." ga tô ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lúh? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wui akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mà é mungdang lé lé yù pyám byí ri. ¹⁶ Ra-am gi, luqgok yò pé má gyó âng é kyôshi eq wui akô; yhangmoq gi, mungdang lé wó gyo jáng, radá dâm gabú myit èq hap yù akô. ¹⁷ Nghut kôlhang, yhangmoq gi, amyit a wó chîn é yanmai, razup zo za yuq kômù, mungdâng é yanmai, wuihke é eq zing-rí é pé hui kôjáng, hân hân htak ló byuq kó râ nghut lhê. ¹⁸ Dum ra-am nghut jáng, zuguaym hkaú má gyó âng é kyôshi eq wui akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wui myit hke hkyô, hkyô shuí nghoq jung ngùn hng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyám é yanmai, ashi a wó zui dut kó râ nghut lhê. ²⁰ Ra-am kúm gi, myìhpún bo é jang má gyó âng é kyôshi eq wui akô; yhangmoq gi, haú

[☆] 4:12 Esai 6:9-10

mungdang lé gyô yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htûn É Hkyô
Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jâng, yhupchong ô má tsung tô é, ó yuq wá kut wú akò lúh? ²² Hkâsu mù gâ le, haq tô é zè hai jung le htoq ze lò râ eq, zaú tô é pé hai jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byí é bung eq, nungmoq lé dum lik byí râ nghut lhê; hau htoq lhang myo shoq wó kó râ nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù hau yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. ²⁹ Kyôshi myihng jâng, kyô shu yoq jé bè nghut é yanmai, yhang gi, zaiyik eq yâm yù râ nghut lhê." gâ ri.

Angshi Cham Lé Dangtú Yu É Hkyô
Mht 13:31-32; Luk 13:18-19

³⁰ Yesuq dum xoq taí é gi, "Garai Gasâng é mingdán lé, hai eq lhoq whuí wú râ lúh? Hai jung dangtú yù mù, shit wú râ lúh? ³¹ Garai Gasâng é mingdán gi, angshi cham eq wuí ri. Angshi cham hau gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jâng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê." gâ ri.

³³ Hau sù é dangtú myo myo đông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é hai lhang a taí wú nghut ri; nghut kôlhang, Yhang eq chángzô pé baú nghut nyi é hkún kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zim Pyâm É Hkyô
Mht 8:23-27; Luk 8:22-25

³⁵ Hau nyí, myinhâng lé, Yesuq gi, Yhâng é chángzô pé lé, "Nga-nhung nhông hé hpoq shut dap e ló sháng." ga taí ri. ³⁶ Hau hkún, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gú dap lô bekó; gotú lhai pé le, yhangmoq eq rahá bo gú dap lô akò nghut ri. ³⁷ Hau u lé, laidun mó jé lô mù, wuìhng hta toq lò luí, lhai má lo bat hâng é yanmai, wui bying lô bê nghut ri. ³⁸ Hau hkún, Yesuq gi, lhai htâng má uhkuq hkuq mù yhup myhi tô ri; hau chángzô pé gi, Yhang lé nhaú pun luí "Sarâ é, nga-nhung myup shi lô râ dut é lé, nàng a chiq byi lúh?" ga taí akò nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haù laidun num ló byuq luí, banshoq zím byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haí mù, haù-í gyuq bum akô lúh? Nungmoq gi, lumjing myit a bò shí kó lúh?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasú é byù nghut lhê lhà? Lai eq wuìlhêng pé lhang gi, Yhâng é dang lé gyo byí ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyâm É Hkyô Mht 8:28-34; Luk 8:26-39

¹ Yhangmoq gi, nhông hé hpoq mâ é Gerase byu pé é mau má jé dap e ló akô. ² Yesuq lhai mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haù yuq gi, lupdùng má za nyi é sù nghut ri; yhang lé, ó yuq eq le, shamtoq-tuì eq lhang a wó tuí zing wú kó nghut ri. ⁴ Hkâsu mù gâ le, adàm dàm, yhâng é loq eq hkyí má shamtoq-tuì eq tuí tô wú kôlhang, yhang gi, loq mâ é shamtoq-tuì pé lé lhang hpyit pyám pyám kut mù, hkyí mâ é shamtoq kyum lé lhoq hkyop pyám pyám kut ri. Yhang lé, ó yuq eq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok eq dún cheq wún ri.

⁶ Yhang gi, Yesuq lé, we mai myang kat jáng, din e ló mù, Yhâng é hí má hkyihput htuq ngop luí, ⁷ htê mó eq, "Myhang htâng é Garaí Yhangzo Yesuq ê! Nang gi, ngò eq haí sêng lhê lúh? Nang gi, ngo lé a zing-ri râ matú, Garaí Gasâng hí má danggidíq byi laq." ga taí garú ri. ⁸ Haí mù gâ le, Yesuq gi, yhang lé, "Agè ashop é nat nang ê, byù shí yuq chyáng mai htoq ló aq." ga taí kat é yanmai nghut ri.

⁹ Hau htâng, Yesuq gi, "Nang mying haí gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tũ taí ri. ¹⁰ Hau htâng, yhang gi, haù jawò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haù u lé, waq rajùm mó gi, bùm yàm má dù but zô nyi bum akô nghut ri. ¹² Haù mù luí, nat gâng pé gi, "Ngamoq lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akô. ¹³ Haù hkûn, Yesuq gi, yhangmoq lé ahkáng byí kat jáng, haù agè ashop é nat pé gi, haù yuq chyáng mai htoq ló kôluí, waq pé chyáng wang ló byuq bekô nghut ri. Haù mù, haù í hkyíng kô bo é waq hpúng gi, gampyoq mai nhông hkaù shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, hpang din wang ló kômù, myuq hkaù mâ é bang eq awui ayàm mâ é bang lé, haù hkyô ló shit kyo kô é yanmai, byù haù bang gi, dut lai lò bê hkyô lé, ê htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sũ, mebu wut luí, byù gè rayuq su zung to lánng é lé myàng kômù, gyuq dan bùm bekô nghut ri. ¹⁶ Haù hkyô lé myang é bang gi, nat gâng pé wang júng sũ eq waq pé chyáng hkâsu dut é hkyô, góbang lé taí kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tôngbán akô nghut ri.

¹⁸ Yesuq lhai hkaù má wang ló é u lé, haù nat gâng pé wang júng lai lò bê sũ gi, Yesuq htâng cháng râ matú, Yesuq lé dung tôngbán ri. ¹⁹ Nghut kôlhang,

Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, nang é yhumbyù buinùm ji-myi wuì lé ló tai kyo aq." ga tai kat ri. ²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló tai kyô ri. Haú hkùn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, hai ji mù, không he hpoq shut dum dap jé ló mù, Yhang, không yàm má nyi tô é u lé, byù ajùm ayò gi, Yhâng é lhinghkyuq má lé zing bum akô nghut ri; ²² haú hkùn, Ya-irug gâ é, tarajong má up bang mà é rayuq gi, haú má lé luí, Yesuq lé myang kat jáng, Yhâng é hkyi wang má paí gop to mù, ²³ "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nang lé mù, yhâng é ahtoq má loq lé ke byi laq." ga, wum kat dúng tôngbân nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyin chyap wún bum akô.

²⁵ Haú hkùn, raxe í zân suí yui nyi é myiwe myhi rayuq le haú hpúng má bo tô ri. ²⁶ Yhang gi, chi sará myo myô pè chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lhang wuìhke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huì lé mù, Yhâng é bu má ê záng kat ri. ²⁸ Hai mù luí gâ le, yhang gi, "Ngò, Yhang é bu má za lhang é wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkùn jáng, yhâng chyáng suí yui é kân byuq luí, yhang gi, hpuzò nyi é mai wó lut bê hkyô lé, yhanggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lú?" ga myi kat ri.

³¹ Haú hkùn, Yhâng é chángzô pé gi, "Náng é lhinghkyuq má byù ajùm ayò chyin chyap nyi é lé, myang to luí nhing, 'Ngo lé, ó yuq záng bê lú?' nghù myi lhê lú?" ga tù tai kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri. ³³ Haú hkùn, myiwe myhi haú gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nân é èq Yhang é hkyi wang má ngóm gop to luí, yhâng chyáng dut lai lò bê hkyô banshoq lé tai kyô ri. ³⁴ Haú mù, Yesuq gi, myiwe myhi haú lé, "Byizo ê, nang é lumjing myit gi, nang lé lhoq gê byi bê nghut ri; nang é nòhpyo ge byuq bê nghut ri; ngón za ló aq hkoi!" ga tai ri.

³⁵ Yesuq gi, dang ru tai nyi ashí hkùn, tarajong má up sù Ya-irug é yhùm mai byù ra-am jé lé mù, "Nang é byizo gi, shi byuq bê; hai mù luí, haú sará lé lhoq hkyik nyi lhê lú?" ga luí, lé tai kat akô.

³⁶ Yesuq gi, haú bang tai é dang lé gyô hai pyám mù, "Hkâgyuq, za lumjing aq." ga, haú tarajong má up sù lé tai kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri. ³⁸ Yhangmoq, haú tarajong má up sù é yhùm má jé lé kô é hkùn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhùmkaú shut wang ló

* 5:20 Dekapoli gâ é gi, Grik đông myuq raxê lé gâ lhê.

mù, haú bang lé, "Haí mù, yón ngau gabyông nyi bum akô lúh? Haú zoshâng gi, shi byuq é a nghut, yhup myhí tô é sheq ru nghut lhê." ga taí ri. ⁴⁰ Nghut kôlhang, yhangmoq gi, Yhang lé wuizui kut pyám byi akô.

Yhang kúm gi, haú bang banshoq lé hkat htoq pyám mù, zoshâng é yhangnu yhangwa nhik eq Yhâng é chángzô pé lé za shui lui, zoshâng lé lhezô tô é gok má wang e akô nghut ri. ⁴¹ Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo è, ngò, nang lé taí bá, toq aq," gâ é nghut lhê.) ga taí ri. ⁴² Myiwe zo haú gi, haú hkún jáng, toq lui, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé taí hkúm kat lui, myiwe zo haú lé, zô jung byi tso râ matú le, yhangmoq lé taí ri.

6

Yhumsing Wà Má Myoqdong A Wó É Hkyô *Mht 13:53-58; Luk 4:16-30*

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri. ² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôlui, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù lui, laklai kumlhá lé lhang kut lhê laq? ³ Shí yuq gi, Mariq é yhangzo, laksíma hpó nghut lhê, a nghut lúh? Yhang gi, Yakuq, Yose, Yudaq, Shimun pé é yhangmang nghut lhê, a nghut lúh? Yhâng nhammó pé le, nga-nhúng eq rahá nghut nyi lhê, a nghut kó lúh?" ga lui, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wui eq yhumsing é yhùm má za, myoqdong a lhaq wó wú é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gé byí é mai lai lui, gotú laklai kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjín myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô *Mht 10:5-15; Luk 9:1-6*

⁷ Yesuq gi, haú lagyo raxe í yuq lé wut yù mù, agè ashop é nat pé lé ùng râ a-tsam byi lui, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai lui, zoshuq le, etap le, ngùn le, gotú haí le, hkâyü chùng kó; ⁹ hkyí-tsung kúm gi, tsùng chùng keq; nghut kôlhang, bu í dung hkâwut chùng kó. ¹⁰ Hká má nghut kôlhang, rayhùm yhùm má nungmoq wang bíng kô é nghut le gi, haú wâ mai dum htoq ló é buinyi jé shoq, haú yhùm má za nyi nyi keq. ¹¹ Jowò rawò wò má é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyám to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló lui, myit lhing râ é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé myo myo lé hkat htoq pyám byi mù, nò é bang myo myo lé le xú but byi lui, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é mying hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haù shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam hau pé lé wó kut é nghut ri." ga luí, taí bum akò nghut ri.

¹⁵ Ra-am gi, "Yhang gi, Eliyaq nghut ri." ga taí akò nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." ga ri.

¹⁶ Herut kúm gi, hau lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyám é hkyô é yanmai, Yohan lé chyup tuí yù nhâng mù, htóng hkyô pyám nhang wú é sú nghut lhê. ¹⁸ Hkâsu mù gà le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri.

¹⁹ Haù mù, Herudiaq gi, Yohan lé gyai a jú dut byuq luí, sat pyám naù kôlhang, a wó sat dut nyi ri. ²⁰ Haí mù gà le, Herut gi, Yohan, dingmán chyoiyúng é sú nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashí nghut ri.

²¹ Nghut kôlhang, Herut gi, yhâng é hkù ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, hau nyí gi, Herudiaq é matú, buinyi gè dut bê nghut ri. ²² Herudiaq é yhangzo byizo gi, wang lé lô mù, gó shit é hkùn, Herut eq yhâng é bíng pé gi, myit ngón bum akò nghut ri.

Haù mù, hkohkâm gi, myiwe zo hau lé, "Nàng ô nau é haí nghut kôle, dung aq, ngò nàng lé byi rá nghut lhê." ga, dakam é danggidiq byí ri. ²³ Hau htoq agó, yhang gi, myiwe zo hau lé, "Nàng dung é haí nghut kôle, ngò byi rá; ngá é mingdán rawuí gù lhâng, byi rá nghut lhê." ga, dakam é danggidiq byí ri.

²⁴ Haù hkùn, myiwe zo hau gi, htoq ló mù, yhâng nu lé, "Haí dúng le gè rà laq?" ga myi jáng, yhângnu gi, "Wui-myhup Sará Yohan é ulhum dung aq." ga tú taí kat ri.

²⁵ Myiwe zo hau gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tóngbán ri.

²⁶ Haù su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, myiwe zo hau taí é dang lé a kâm he pyám lo nghut ri. ²⁷ Haù mù, hkohkâm gi, zúng é gyezo rayuq lé, Yohan é ulhum é hpyit lô rá matú, radá dâm hkunmó hkyô mù nhang kat ri. Haù mù, hau yuq gi, htóng hkaù má é luí, Yohan é ulhum lé, é hpyit mù, ²⁸ bó má kat luí, myiwe zo hau lé lo byí ri; myiwe zo hau gi, ulhum hau lé, yhângnu chyáng yu ló byí ri. ²⁹ Yohan é chángzô pé gi, hau hkyô lé wó gyo kôjáng, yhâng é mâng lé lé yù luí, lup má ló myhup pyám bekò nghut ri.

Byù Ngo Hkying Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zing lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akò nghut ri.

³¹ Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyíng lhang a wó kó nghut ri. Haù mù, Yesuq gi, chángzô pé lé, "Nga-nhúng, tsím tsâm é jowò ralhum má é mù, è nô yù sháng." ga tai ri.

³² Haù mù, yhangmoq gi, yhangmoq baù lhai racham má ji mù, tsím tsâm é jowò shut e ló akò nghut ri. ³³ Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkgangmó mai hkyí hkyô châng din é kômù, yhangmoq é hí má jé to láng akò nghut ri. ³⁴ Yesuq gi, lhai mai gyó dap ló é hkûn, byù moq mó nyi to láng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhogshít byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; ³⁶ yhangmoq gi, awui ayám mà é yhmù pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga tai akò nghut ri.

³⁷ Haù hkûn, Yhang gi, "Nungmoq, yhangmoq lé rajung jung byi tso keq." ga tú tai jáng, yhangmoq gi, "Shí myhó é bang zo rá matú, ngamoq gi, è luí, denari* í sho èq muk é wui byi ra rá luq?" ga dum taù myí akò nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akó? È wú wú keq." ga myí ri. Haù mù, yhangmoq gi, myang hô jáng, "Muk ngo long eq ngozo í du wó lhê." ga, dum tú tai akò nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zúng nhâng rá matú, Yhâng é chángzô pé lé tai kat ri. ⁴⁰ Haù mù, shiwa byu pé gi, rashò shò kut le, ngo xê xê kut le, ahpúng hpúng zung tó bùm bekò nghut ri. ⁴¹ Yesuq gi, haù muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi rá matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. ⁴² Yhangmoq banshoq bang gi, zô gyí bùm bekò nghut ri. ⁴³ Hau htâng, haù chángzô pé gi, zô myhit tó é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haù hkûn, zô é bang gi, yuqgè wui baù lhang, byù du ngo hkyíng nghut ri.

Yesuq, Wui Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haù shiwa byu pé lé byo ló nhang nyi é hkûn jáng, Yhâng é chángzô pé lé lhai má wang ji nhâng mù, tú tap mà é Bet-saida wà mó shut dap ló lhang nhang ri. ⁴⁶ Yhangmoq lé shi-kyâm kat é htâng, Yhang gi, kyúdung rá ga, Yhang baù bùm shut doq e ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baù za myí htoq má nyi tô ashí nghut ri. ⁴⁸ Lai tau mut é yanmai, haù chángzô pé gi, lhai lhu wuihké nyi kô é lé, Yesuq myang ri. Napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló rá dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akò nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

* **6:37** Denari rachap gi, byù rayuq é ra-nyí lhê é zuihpau eq wui ri.

Nghut kôlhang, Yhang, radá dâm yhangmoq lé dáng nyo kat é gi, "Hkâgyuq kó. Ngò ru nghut lhê; zim za nyi keq." gâ ri. ⁵¹ Hau htâng, Yhang gi, lhai htoq má yhangmoq eq rahá ê doq ji jáng, lai gi, zim byuq bê nghut ri; haú mù, yhangmoq gi, gyai yhang mauhong byuq bum bekô nghut ri. ⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bống kô é yanmai nghut ri.

⁵³ Yhangmoq gi, gù dap ló kômù, Genezarat mau má jé wang lò jáng, lhai lé haú má ló shap tô akô nghut ri. ⁵⁴ Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri. ⁵⁵ Haú mù, yhangmoq gi, haú mau ramau gón má đin jón mù, nò bang lé taphkang mai waq luí, Yesuq nyi rí gâ é jowò hkangmó má, shuí lé lo bum akô nghut ri. ⁵⁶ Yesuq jé é wà hkangmó, myuq hkangmó, awui ayâm mã é wà hkangmó pé má, yhangmoq gi, nò byù lé gài pé má lé lhez to kôluí, Yhâng é bushi htâng má za lhâng, haú bang lé byi záng nhâng râ matú, Yhang lé đung tôngbán akô. Yhang lé záng é lhunglhang bang gi, lhoq gê byí é huí akô nghut ri.

7

A Sanséng Dut Nhang É Hkyô Pé

Mht 15:1-20

¹ Haú Hparishe pé eq tarâ sará pé ra-am gi, Yerusalem wà mó mai jé lé ló kômù, Yesuq é nàm má lé zup zîng bum akô. ² Haú hkûn, Yhâng é chángzô pé ra-am gi, htúngli đông a chí pyâm é, a sanséng é loq eq zo shuq nyi kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é íchýi íwâ pé é htúngli lé châng é bang nghut lhê mù luí, loq hí a chí é gi, haí le a zô wú kó nghut ri. ⁴ Yhangmoq gi, gài pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htúngli gotú pé lé le, châng akô nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, íchýi íwâ pé é htúngli lé a châng e za, a sanséng é loq eq zo shuq nyi akô lú?" ga myí akô.

⁶ Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myihtoí Esai-aq htoí tô é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhikhlum gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.[✧]

ga kâ tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luí, byu é htúngli lé za, myhik zing tô akô nghut ri." ga luí tù taí ri.

⁹ Hau htâng, Yhang xoq taí é gi, "Nungmoq gi, yhumsing é htúngli lé za cháng râ matú, Garai Gasâng é hkunmó lé he-ngik pyâm é mã, hpaqchyí gyai bo akô nghut ri. ¹⁰ Hkâsu mù gâ le, Mosheq gi, 'Nungmoq é ínu íwâ lé, hkungga keq.[✧] ga le, 'Ínu íwâ lé, nhîng é sù ó yuq nghut kôle, sat pyâm é hui rá lhê.[✧] ga le, kâ tô é nghut lhê. ¹¹ Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi rá chyunghuq) nghut lhê gá nhang akô. ¹² Haú mù, haú yuq lé, yhângnu yhângwâ é matú, haí a kut byi nhâng lô é đông dut bê nghut ri. ¹³ Haú đông

mai, nungmoq gi, nungmoq chung gyó lo é htúngli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keg; ¹⁵ Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaú mai htoq ló é zè kúm gi, byù lé a sanséng dut nhang lhê." gâ ri.

¹⁶ (Gyo râ nohkyap dap é sù gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq ló mù, yhúm hkaú má jé wang ló é hkùn, Yhâng é chángzô pé gi, dangtú haú eq séng luí, Yhang lé lhom myí akô nghut ri. ¹⁸ Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lú? ¹⁹ Hkâsu mù gâ lé, haú gi, byu é myit nhiklum hkaú má wang ló é a nghut e za, wamdau hkaú má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gâ nau é dông nghut ri.)

²⁰ Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê. ²¹ Hkâsu mù gâ lé, ahkaú mai htoq lo é gi, byu pé é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaú é hkyô, byù sat é hkyô, su-myi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achaq achyut zùm yap lhúm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri." gâ ri.

Túngbaù Myiwe Myhí Rayuq É Lumjng Myit

Mht 15:21-28

²⁴ Yesuq gi, haú jowò mai htoq ló mù, Turuq eq Sidun maukyo shut e ló luí, yhúm ralhúm má wang é ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haú mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkùn jáng, Yhâng chyáng jé lé mù, Yhâng é hkyí wang má lé paí gop to luí, ²⁶ yhang zô chyáng mai nat gang lé hkat htoq pyám byi râ matú, Yhang lé dúng tóngbán ri. Myiwe haú gi, Suru-Hpiniki mau má é Grik byuhú nghut ri.

²⁷ Yesuq gi, "Zo wui† hí zô gyi kó sháng gaq; haí mù gâ le, zô wui chyáng má é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

²⁸ Haú hkùn, yhang gi, "Yhumsing è! Haú kúm nghut ri; nghut kôlhang, siboí ô má é hkuí lhang, zô wui é zô myhit shuq htâng lé, ge zo lhê a nghut lú?" ga dum tû taí ri.

²⁹ Haú mù, Yesuq gi, yhang lé, "Nàng tû taí é dang hau é yanmai, ló lo aq hkoí; haú nat gang gi, nung zô chyáng mai htoq ló byuq bê nghut ri." ga taí kat ri.

³⁰ Myiwe myhí haú gi, yhúm má dum taú jé lo é hkùn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byí É Hkyô

* **7:16** Bun zo shí gi, Chyúmlaíká ra-am má bo lhê, ra-am má a bò. † **7:27** Zo wui gâ é gi, Yudaq byu pé lé gâ é nghut lhê. ‡ **7:27** Hkuí pé gâ é gi, túngbaù pé lé gâ é nghut lhê.

³¹ Yesuq gi, Turuq mau mai dum htoq ló mù, Sidun mai sô lai ló luí, Dekapoli mau hkaû dông lai byit mù, Galile nhông shut gyó jé ló ri. ³² Háu hkún, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, háu yuq é ahtoq má loq ke byi râ matú, Yhang lé dúng tôngbân akô nghut ri.

³³ Yesuq gi, háu yuq lé baú za byù hpúng mai shuí htoq yú mù, yhâng é nohkyung má loqnyhui htaû háng byi luí, sôkan byé tik yú mù, háu yuq é shô má htau byí ri. ³⁴ Hau htâng, Yhang gi, mauhkung shut tu wú mù, soq mó shé luí, "Ehpahta!" (Lichyúm gi, "Bóng aq hko!") ga luí, háu yuq lé tai kat ri. ³⁵ Háu hkún, háu yuq é nohkyap le bóng byuq luí, shô le nyhôm byuq mù, balang hkyang hkyang dang wó nyô bê nghut ri.

³⁶ Yesuq gi, háu hkyô ó lé le a tai kyo râ matú, yhangmoq lé hkúm kôlhang, yhangmoq gi, je hkúm le, je tai pyo akô nghut ri. ³⁷ Byu pé gi, gyai yhang mauhong byuq bùm kôluí, "Yhang gi, hai lé le, ge é dông chyat kut ri; nojit sù lé, wó gyo shoq, dang a hkyang sù lé, wó nyô shoq, kut byi bê nghut ri." ga luí, tai bum akô nghut ri.

8

Byù Myi Hkying Lé Byi Tsô É Hkyô *Mht 15:32-39*

¹ Háu yoq má, gotú byù moq mó gi, lé zing bum akô; háu bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyi bò bê, hai le a myàng zo kó nghut ri. ³ Yhangmoq chyáng má é ra-am gi, mau we mai lé é bang nghut é yanmai, yhangmoq lé, zòmút gû yhúm shut nhang kat é nghut le gi, hkyolat má mutyut yut é ló hui kó râ nghut lhê." ga tai ri.

⁴ Háu hkún, Yhâng é chángzô pé gi, Yhang lé, "Ísu é yoso má nhing, shí myhò bang lé luq shoq byi tso râ zoshuq gi, hkâmá é yú râ lú?" ga tai akô.

⁵ Yesuq gi, "Nungmoq, muk hkâ-myhó long wó akô lú?" ga taú myi jáng, yhangmoq gi, "Nyhit long." ga, dum tú tai akô nghut ri.

⁶ Háu mù, Yhang gi, byù hpúng lé myigùng htoq má zùng nhang to luí, muk háu nyhit long lé yù mù, jeju ban hkya-on jáng, myhik hpé luí, háu bang lé gàm byi râ matú, Yhâng é chángzô pé lé byí kat ri; háu mù, yhangmoq gi, háu bang lé gàm byí akô nghut ri. ⁷ Yhangmoq gi, ngo-nú zo ratsuí le wó akô nghut ri; háu mù, Yhang gi, ngozo háu pé é matú jeju hkya-on luí, chángzô pé lé dum gàm byí nhang ri. ⁸ Yuq hkangmó zô gyí bùm kô é htâng má, háu chángzô pé gi, amyit ahtâng lé nyhit mung bying shoq wó guq tsing yu ashí kó nghut ri. ⁹ Zô é bang gi, byù myi hkying kó nghut ri; Yesuq gi, háu bang lé, nhang kat luí, ¹⁰ Yhâng é chángzô pé eq rahá, lhai má wang ji mù, Dalamanuhta mau má é jé akô nghut ri.

¹¹ Hparishe pé gi, lé mù, Yesuq eq dang htíng htíng lhúm akô; hau htoq agó, yhangmoq gi, mauhkung má é kumlhá lé dúng é dông, Yhang lé chyam wú akô nghut ri. ¹² Yesuq gi, myit nò-kying kying luí, yhangmoq lé tai é gi, "Hai mù luí, shí ipyat lhê é byu pé gi, limik kumlhá dúng akô lú? Ngò teng za tai kôlé, shí ipyat má é bang lé, hai kumlhá le tân shit râ a nghut." gâ ri. ¹³ Hau htâng, Yhang gi, yhangmoq lé pyâm to mù, lhai má dum taú wang ló luí, tú tap shut gú dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴ Haú chángzô pé gi, muk yu chùng râ lé tô-myhî pyâm kôluí, lhai hkaú má muk ralong za ru wó akô nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luí, koi pyâm nyi keq." ga taí ri.

¹⁶ Haú hkûn, yhangmoq gi, "Nga-nhùng chyáng muk a bo é yanmai, haú su ga taí é nghut ri." ga luí, rayuq eq rayuq taí lhum bum akô nghut ri.

¹⁷ Haú su ga taí lhum nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhum nyi akô lúhú? Ahkuí jé shoq, nungmoq gi, a byu-myàng, a sê gyo shi kó lúhú? Nungmoq é myit nhiklhum gi, ru htan nyi ashî kó lúhú? ¹⁸ Myoq dap to kôluí nhîng, a myàng kó lúhú? Nohkyap dap to kôluí nhîng, a wó gyo kó lúhú? ¹⁹ Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashî kó lúhú?" ga myi jáng, yhangmoq gi, "Raxe í mung." ga tû taí akô.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yu kô é lúhú?" ga myi jáng, yhangmoq gi, "Nyhit mung." ga dum tû taí akô.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lúhú?" ga, yhangmoq lé myí ri.

Myoqjit Sû Rayuq Lé Lhoq Gê Byí É Hkyô

²² Yhangmoq gi, Bet-saida và mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lò mù, haú yuq lé záng byi rá matú, dúng tóngbán akô. ²³ Yesuq gi, myoqjit sù haú yuq é loq lé zui mù, và shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lúhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sikgâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luí, yhâng é yhum shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi và mó awui ayàm mâ é và pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lúhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tû taí akô.

²⁹ Yesuq gi, "Nungmoq gi, ngo lé ó yuq nghut lhê nghu akô lúhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

* **8:15** Shí má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê. † **8:29** Grik dong Hkrisduq gâ é gi, xú but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê.

Byu Yhangzo Gi, Sat Pyâm É Hui Luí, Dum Dui Toq Râ Hkyô
Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo lui, suwún wuí, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghú râ buinyi má, dum dui toq râ nghut lhê." gâ ri. ³² Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yú mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, yhumsing é tapzìng lé waq chúng lui, cháng ra râ nghut lhê.

³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê.

³⁶ Byù gi, mینگan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyù bò râ lúhú? ³⁷ Byù gi, yhumsing é asak woi-nyí lé, hai èq wó htaí yù râ lúhú? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wá é hpungwup shingkan bo é èq, haú choyoiyung maumang lagyô pé eq rahá jé lé é hkún, hoq pyám râ nghut lhê."* gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasang é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihpyô Isâm Htaí Lo É Hkyô
Mht 17:1-13; Luk 9:28-36

² Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chúng mù, yhangmoq baú myhang é bùm ralhùm má doq ló akô; haú hkún, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyù shoq a wó xaú hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dang nyo lhum nyi akô.

⁵ Haú mù, Petruq gi, Yesuq lé, "Rabai é, shí jowò má nga-nhung nyi le ge ri; haú mù, Náng é matú ralhùm, Mosheq é matú ralhùm, Eliyaq é matú ralhùm kut, ngamoq lé, zúm sùm lhum saí nhâng laq." ga taí ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haú su gâ é nghut ri.

⁷ Hau htâng, mhut htoq lô lui, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

⁸ Haú hkún jáng, chángzô pé gi, lhingkyuq má wú kat le, Yesuq za yhangmoq eq rahá nghut nyi é mai lai lui, ó lé le, a myàng lo kó nghut ri.

⁹ Yhangmoq, bùm mai taû gyô lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taî kyo râ matú taî hkûm tô ri. ¹⁰ Chángzô pé gi, dang haû lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myí lhùm bum akô nghut ri.

¹¹ Hau htâng, yhangmoq gi, "Eliyaq hí lé ra râ nghut lhê ga, tarâ sará pé haî mù taî kô é lúhú?" ga, Yesuq lé myí akô.

¹² Haû hkûn, Yesuq gi, "Eliyaq hí jé lé é gi, teng bê nghut luí, lunglhang lé dum lajâng tô é nghut ri. Nghut kôlhang, haû Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashí, a nghut kó lúhú? ¹³ Ngò, nungmoq lé taî kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tù taî ri.

*Nat Dap É Yuqgè Zo Rayuq Lé Lhoq Gê Byí É Hkyô
Mht 17:14-20, 22-23; Luk 9:37-45*

¹⁴ Yhangmoq gi, chángzô pé chyáng dum taû jé lô kô é hkûn, haû bâng é lhinghkyuq má byù moq mó zing lé é lé le, tarâ sará pé, haû bang eq dang htíng htíng lhùm nyi kô é lé le, myang akô. ¹⁵ Haû má nyi tô é lunglhang bang gi, Yesuq lé myang kat é eq, maû byuq kôluí, din é mù, é shi-kyâm akô nghut ri.

¹⁶ Haû hkûn, Yesuq gi, yhangmoq lé, "Nungmoq gi, yhangmoq eq haî lé dang htíng htíng lhùm nyi akô lúhú?" ga myí ri.

¹⁷ Byù hpúng hkaû má é rayuq tù taî kat é gi, "Sarâ ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê. ¹⁸ Nat haû gi, yhang chyáng wàng hkanmó, yhang lé myí htoq má lhoq leqbat nhang ri; haû mù, yhang gi, nhut mai guttsû htoq lhê, zui kyik kyik lhê, langhtan lo lhê, dut ri; hau é yanmai, nat haû lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Haû hkûn, Yesuq gi, "Lumjúng myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lúhú? Yuqgè zo haû lé, Ngá chyáng shuí lé lô keq." ga taî kat ri.

²⁰ Haû mù, yhangmoq gi, yuqgè zo haû lé shuí lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haû hkûn, Yesuq gi, yhangwa lé, "Yhang, isu dut é hkâ-myháng myáng bê lúhú?" ga myí jáng, yhang wa gi, "Zoshâng hkûn mai nghut bê. ²² Nat haû gi, yhang lé lhoq sat pyám naû mù, myí má le, wui má le, anum num lêng wàng nhang wú bê nghut lhê; nghut kôlhang, Nàng, rajung jung wó kut byí é nghut le gi, ngá hpe lé shogyo yù laq, garúm yù laq." ga tù taî ri.

²³ Yesuq gi, "'Nàng, wó kut byí é nghut le gi,' nghú, haî mù taî lhê lúhú? Lumjúng myit bò su é matú gi, haî le wó dut lhê." ga, yhang lé taî ri.

²⁴ Haû zoshang é yhangwa gi, radá dâm, "Ngò lumjúng lhê; nghut kôlhang, ngá é lumjúng myit gi, shaû ashí nghut é yanmai garúm yù laq." ga taî garú ri.

²⁵ Yesuq gi, byù hpúng din zing lé lô kô é lé, myàng jáng, haû agê ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo." ga tân kat ri.

²⁶ Haû hkûn, nat haû gi, garu mù, zoshâng haû lé wum kat langhtân nhâng luí, htoq ló byuq bê. Zoshâng haû gi, shí màng gùng su dut byuq é yanmai, byù myo myo gi, "Yhang shí bê nghut ri." ga taî akô. ²⁷ Nghut kôlhang, Yesuq

gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhmaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lhú?" ga, tsik za Yhang lé myí akô.

²⁹ Yesuq gi, "Haú jung nat lé gi, kyúdùng é dông za a nghut jáng, wó hkat htoq rá a nghut." ga, yhangmoq lé tù tái ri.

³⁰ Yhangmoq gi, haú jowò mai htoq ló mù, Galile mau mai lai ló akô; nghut kôhlang, Yesuq gi, ó lé le a sé nhâng naú nghut ri. ³¹ Haí mù gâ le, Yhang gi, "Haú Byu Yhangzo gi, byu pé é loq má ap pyâm é hui rá nghut lhê; haú bang gi, Yhang lé sat pyâm kó rá nghut lhê; nghut kôhlang, Yhang gi, shi é htâng sum nyí ngù rá nyí má, dum dui toq rá nghut lhê." ga, Yhâng é chángzô pé lé mhoqshít byí nyí é yanmai nghut ri. ³² Yhâng é chángzô pé gi, dang haú lé a sê gyo kôhlang, Yhâng chyáng a wám myí kó nghut ri.

Kô Dik Sû Gi, Ó Yuq Nghut Lhê Lhú?

Mht 18:1-5; Luk 9:46-48

³³ Yhangmoq gi, Kaperna-um wà má jé e akô nghut ri. Yesuq gi, yhúmhmaú má nyí tô é hkún, chángzô pé lé, "Hkyô má, nungmoq, hai hkyô lé dang chyin chyin lhum kô é lhú?" ga myí ri. ³⁴ Nghut kôhlang, yhangmoq gi, zim za nyí tô akô; hkâsu mù gâ le, ko dik sû gi, ó yuq nghut lhê ngù é hkyô lé, hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haú chángzo raxe í yuq lé, wut yù luí, "Kô dik naú sù ó yuq nghut kôle, tiq dik sû eq banshoq bâng é dui-nhâng zoshâng dut ra rá nghut lhê." ga tái ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gung má shap to luí, dum bún yù mù, yhangmoq lé tái é gi, ³⁷ "Shí sù é zoshâng lé, Ngá é myíng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gâ É Hkyô

Luk 9:49-50

³⁸ Haú hkún, Yohan gi, "Sarâ é! Náng é myíng lang luí, nat gâng pé lé hkat pyâm byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkúm pyâm é nghut lhê." ga tái ri.

³⁹ Yesuq kúm gi, "Yhang lé hkâhkúm kó; Ngá myíng lé lang luí, laklai kumlhá kut é sù gi, razup za má, Ngò eq séng luí, a ge é hkyô pé lé tái rá a nghut;

⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za tái kôle, nungmoq gi, Hkrisduq eq séng é bang nghut lhê gâ é yanmai, ngá é myíng lé lang luí, nungmoq lé, uchyam ragóm byí huq é sù ó yuq nghut kôle, zuihpau lé hkyak myang hkam yù rá za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjing é zoshâng wui mâ é rayuq lé, mara kut shut nhang é sù gi, yhâng é lingzing má luqlui long mó tuí hut byi luí, wuimau má é dú hkyô pyâm é huí é nghut lé gi, yhang é matú je gè rá nghut lhê. ⁴³ Náng é loq èq, nang lé mara kut shut nhang é nghut le gi, haú lé hpyit dú pyâm aq; loq í loq dap luí, hkâ-nhám le, myiduq a dat shum é ngaraí ming wàng rá htoq má, loq

raloq eq za ahtum abyuq é asak wó rã shut wàng le gi, náng é matú je ge ri. ⁴⁴ (Hau ngaraí ming gi, 'yhangmoq lé hkê nyi é luq le a shì, myiduq le a shúm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, hau lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyó pyâm é hui rã htoq má, hkyi rahkyí za dap luí, ahtum abyuq é asak wó rã shut wang le gi, náng é matú je ge ri. ⁴⁶ (Hau ngaraí ming gi, 'yhangmoq lé hkê nyi é luq le a shì, myiduq le a shúm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, hau lé lap choq pyám aq; myoqjí í jí dap gú, ngaraí ming má dú hkyó pyâm é hui rã htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Hau ngaraí ming gi, 'yhangmoq lé hkê nyi é luq le a shì, myiduq lé a shúm' é jowò nghut lhê.)*

⁴⁹ Hkâsu mù gà le, hkangga sho lé xo kat luí lhoq sansêng é su, myi gi, yuq hkangmó lé lhoq sansêng rã nghut lhê.*

⁵⁰ Xo gi, ge lhê. Nghut kôhang, xomân kân byuq jáng gi, hkâsu kut dum wó lhoq ngam yù rã lúh? Nungmoq gi, xo su ngam nyi mù, rayuq eq rayuq nguóngon nyí keq." ga taí ri.

10

Myi, Làng Gâng É Hkyô

Mht 19:1-12; Luk 16:18

¹ Hau htâng má, Yesuq gi, Kaperna-um mai htoq ló mù, Yuda mau má é maukyo má é jé luí, Yodan làng tú tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, hau bang lé mhoqshit byí ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarã wang lhê lúh?" ga myí é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyó tô é lúh?" ga taú myí ri.

⁴ Hau hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byí tô ri." ga tú taí akô.

⁵ Yesuq dum tú taí é gi, "Nungmoq é myit nhikhlum htân kô é yanmai, Mosheq gi, tarã hau lé kã tô é nghut lhê. ⁶ Nghut kôhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.* ⁷ 'Hau é yanmai, yuqgè gi, yhumsing ínu íwã chyáng mai htoq luí, yhangmyi eq rahá rading ralhúm za kut nyi mù, ⁸ yhangnhik gi, gungsho ralhúm za dut byuq kó rã nghut lhê.* Hau mù luí, yhangnhik gi, í yuq a nghut lo é za, rayuq za dut bê nghut ri. ⁹ Hau mù luí, Garai Gasang lhoq tsúm tô é lé, byù gi, a lhoq kang sháng gaq." gã ri.

¹⁰ Yhumhkaú má, yhangmoq nyi tô é hkûn lé, chángzô pé gi, hau hkyó eq séng luí, Yhang lé dum sai myí akô. ¹¹ Hau hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. ¹² Myiwe

* **9:44** Bun zo 44, 46, gi, Chyúmlaiká myo myo má a bo é nghut lhê. * **9:48** Esai 66:24 * **9:49** Nhong 2:13 * **10:6** Apûn 1:27 * **10:8** Apûn 2:24

rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tú tai ri.

Zoshâng Wuì Eq Yesuq É Hkyô

Mht 19:13-15; Luk 18:15-17

¹³Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlhâng, chángzô pé gi, yhangmoq lé lhom tân hkâm akô nghut ri. ¹⁴Haú lé Yesuq myàng jáng, Yhang gi, wú nhik-yo naú luí, "Haú zoshâng wuì lé, Ngá chyáng lé nhâng keq; yhangmoq lé hkâhkâm zing to kó; hkâsu mù gâ lê, Garai Gasâng é mingdán gi, haú su é bâng é mingdán ru nghut lhê. ¹⁵Ngò, nungmoq lé teng za tai kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng rá a nghut." ga yhangmoq lé tai ri. ¹⁶Hau htâng, Yesuq gi, zoshâng wuì lé bún yú mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷Yesuq gi, hkyô dum so xoq e ló é hkún, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yú rá matú, ngò haí kut ra rá lhú?" ga myí ri.

¹⁸Haú mù, Yesuq gi, "Hai mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyí. ¹⁹Jep e tará má, 'Byu hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!'" ga bo tô é lé, nàng sê lhê." ga tú tai ri.

²⁰Haú hkún, haú yuq gi, "Sará ê, haú pé banshoq lé, ngò, zoshâng hkún mai cháng bê nghut lhê." ga tai ri.

²¹Yesuq gi, haú yuq lé wó tsuq to mù, yhang lé chyitdap luí, tai é gi, "Nàng kut rá rajung rá tô ashí; lô mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkung htoq má sutzè wó rá nghut lhê; haú mù, Ngá htâng lé cháng aq." gâ ri.

²²Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

²³Yesuq gi, lnhngkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng rá matú, haú-í yhang wuì ri-nhung!" ga tai ri.

²⁴Chángzô pé gi, Yhang tai é dâng é yanmai, mauhong bum akô nghut ri. Nghut kôlhâng, Yesuq dum xoq tai é gi, "Zo wuì ê, Garai Gasâng é mingdán má wàng rá matú, haú-í yhang wuì ri-nhung! ²⁵Sutzè wó sù rayuq, Garai Gasâng é mingdán má wó wâng rá htoq, gola-uq radu âpno mai wó wang lai rá gi, je lui rá nghut lhê." gâ tai ri.

²⁶Haú hkún, chángzô pé gi, je riyhang máu byuq kômù, rayuq eq rayuq, "Haú su ru nghut le gi, ó yuq za hkyi yu é hui rá nghut lhê lhú?" ga, tai lhum bum akô nghut ri.

²⁷Haú hkún, Yesuq gi, yhangmoq lé wú kat mù, "Haú hkyô lé, byù mai gi, wó kut rá a nghut; nghut kôlhâng, Garai Gasang gi, wó dut lhê; hkâsu mù gâ le, Garai Gasang gi, lunglhang lé wó kut é Sù nghut lhê." ga tai ri.

²⁸Haú hkún, Petruq gi, Yhang lé, "Ngamoq gi, wó é gû lunglhang lé tô pyám to luí, Náng htâng cháng bê nghut lhê." ga tai ri.

²⁹ Haù mù, Yesuq tù tai é gi, "Ngò, nungmoq lé teng za tai kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, ìnu ìwa, zo dù wuì eq yò pé lé tô pyâm tô é sù ó yuq nghut kôle, ³⁰ shí pyat lhê é yhùm pé, gumang gu-nhá wuì, ìnu pé, zo dù wuì eq yò pé lé, rashô tú wó hkam yù luì, zing-rì é hkyô pé lé le hui kó rà nghut é htoq agó, htang pyat má le, ahtum abyuq é asak wó yù rà nghut lhê. ³¹ Nghut kôlhang, hí nghut nyi é bang myo myo gi, htàng gyó byuq kó rà nghut mù, htàng gyó nyi bang yuq gi, hí bekô rà nghut lhê." gâ ri.

Yesuq, Yhang Shí Râ Hkyô Lé Dum Tai É Hkyô
Mht 20:17-19; Luk 18:31-34

³² Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haù hkùn, htàng má sô é bang gi, gyuq nyi bùm kô é u lé, haù chángzô pé gi, maù byuq bum akô nghut ri; Yesuq gi, haù chángzo raxe í yuq lé gotù kut dum wut yù mù, Yhàng chyáng dut lò rà hkyô, yhangmoq lé tai kyô é gi, ³³ "Wú keq, nga-nhúng gi, Yerusalem wà mó shut doq ló nyi lhê; haù Byu Yhangzo gi, hkyangjong agyi pé eq tarâ sará pé é loq má ap byi pyâm é hui rà nghut lhê; haù bang gi, Yhang lé, shí rà mara byi luì, tûngbau pé é loq má ap byi pyám kó rà nghut lhê. ³⁴ Haù bang gi, Yhang lé, wuizul kut pyâm é, sòkan byé gyùn é, nhuq bat é kut yù mù, sat pyám kó rà nghut lhê. Hau htàng sum nyi má, Yhang dum dui toq lô rà nghut lhê." gâ ri.

Yakuq eq Yohan nhik dung é hkyô
Mht 20:20-28

³⁵ Hau htàng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ é, ngá-nhik dúng é gù banshoq, Nàng kut byi rà lé, ngá-nhik ô nau ri." ga tai akô.

³⁶ Haù hkùn, Yhang gi, "Ngò, nungnhik lé haì kut byi rà ô nau akô lú?" ga myi ri.

³⁷ Yhangnhik gi, "Náng é hpungwup shingkang hkaù má, ngá-nhik tâng lé, Náng é loqyò hkyam má rayuq, loqpaì hkyam má rayuq kut, zùng nhâng laq." ga tù tai akô.

³⁸ Nghut kôlhang, Yesuq gi, "Nungnhik haì dúng nyi é lé, nungnhik a sé kó nghut ri. Ngò shuq rà góm* lé, nungnhik wó shuq kó rà lú? Ngò hkam yù rà baptisma lé, nungnhik wó hkam yù kó rà lú?" ga yhangnhik lé tù tai ri.

³⁹ Haù hkùn, yhangnhik gi, "Nga-nhik wó dut lhê." ga tù tai kôjáng, Yesuq gi, "Ngò shuq rà góm lé, nungnhik shuq kó rà nghut lhê; ngò hkam yù rà baptisma lé le, nungnhik hkam yù kó rà nghut lhê. ⁴⁰ Nghut kôlhang, Ngá é loqyò, loqpaì hkyam má zùng rà ahkáng lé gi, Ngò byi jung a nghut. Jowò haù pé gi, hen to byi é hui bâng matù za nghut lhê." ga yhangnhik lé tai ri.

⁴¹ Haù su gâ é hkyô lé, haù gotù chángzo raxe yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsing yù luì, "Tûngbau pé lé uphkan é ga bang gi, tûngbau pé lé up zô nyi kô é hkyô lé le, haù eq rajung za, yhangmoq é ming up suwún wuì le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haù su a dut kó sháng gaq, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut rà rà nghut lhê. ⁴⁴ Hau htoq agó, nungmoq má ushuq

* 10:38 Góm eq baptisma gâ é gi, jamjau hui rà eq shí rà lé, tai nau é nghut lhê.

dut naù sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gà le, haù Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shihtaí gunglik hkungga đông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

Myoqjit Sù Barateme, Myoq Dum Myang É Hkyô
Mht 20:29-34; Luk 18:35-43

⁴⁶ Hau htâng, yhangmoq gi, Yerihko và má jé ló akô nghut ri. Yesuq eq Yhâng é chángzô pé gi, byù moq mó eq rahá, và mai htoq ló nyí kô é hkún, Barateme (Teme é yhangzo) gà é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret và byù Yesuq lai ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garú kat ri.

⁴⁸ Haù mù, byù myo myo gi, zim za nyi râ matú yhang lé tân hkûm akô; nghut kôhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garú kat ri.

⁴⁹ Haù mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haù lé taí akô. ⁵⁰ Haù hkún, haù yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

⁵¹ Yesuq gi, yhang lé, "Ngò, nàng lé haí kut byi râ ô nau ri lhú?" ga myi jáng, yhang gi, "Sarà ê, ngò myoq myàng nau ri." ga tũ taí ri.

⁵² Yesuq gi, "Ló aq hkoi, nàng é lumjîng myit gi, nàng lé lhoq gê byi bê nghut ri." ga taí kat é hkún jáng, yhang gi, myoq wó myàng mù, Yesuq e ló é hkyô shut cháng e ló bê nghut ri.

11

Yesuq, Yerusalem Và Mó Má Wang Ló É Hkyô
Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem và mó eq chyâng lo nyi kô é hkún, Tsalun Bùm mà é Bethpage và eq Behtani và má jé ló kôjáng, Yesuq gi, Yhâng é chángzo í yuq lé, ² "Nungnhik, hí mà é và má ê keq; và haù má wang é hkún jáng, ó le a jì wú shí é logúng zo tuí to lánng é lé, é myàng kó râ nghut lhê; haù lé hpyi yù mù, Ngá chyáng she lò keq. ³ Byù rayuq yuq mai, 'Haí mù, haù su kut nyi akô lhú?' ga nungnhik lé lhom myi jáng, 'Shí du lé, haù Yhumsîng râ ri ga, razup má dum taù dé byi râ nghut lhê.' nghũ tũ taí keq." ga pyîng luí, nhang kat ri.

⁴ Haù nhik gi, e ló mù, hkyô mó yàm mà é hkumdong nàm má tuí tô é logúng zo radu lé, é myàng kôluí, haù lé tuí hpyi nyi akô. ⁵ Haù hkún, haù má yap tô é bang ra-am gi, "Haí mù, logúng tuí hpyi nyi akô lhú?" ga myi akô. ⁶ Haù jáng, yhangnhik gi, Yesuq pyîng kat é eq rajung za taí kyo kôjáng, yhangmoq gi, she ló râ ahkáng byí kat akô nghut ri. ⁷ Yhangnhik, logúng zo haù lé Yesuq chyáng she jé lo é hkún, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jì ri. ⁸ Byù myo myo gi, yhangmoq é buhîng pé lé, hkyô má hkyut hkang byí akô; ra-am gi, yò pé má zân yu é mhandîng lé hkang byí akô nghut ri. ⁹ Hí má so bang eq htâng má châng é bang gi, "Hosana!"*

* **11:9** Hebre dang má, hosana gà é gi, "ahkuí hkyi yù laq" gà é nghut lhê. Nghut kôhang, bun zo 9, 10 má gi, hkyá-on dang đông chung é nghut lhê.

Haù Yhumsing é mying mai jé lé lô Sù gi, hkungsô wó nyí sháng gaq ô!

¹⁰ Jé lé lô râ nghut é, nga-nhùng é iwa Dawiq é mingdán gi, hkungsô wó nyí sháng gaq ô!

Htoq tsáng myhâng má hosana nghut sháng gaq ô!*

¹¹ Yesuq gi, Yerusalem và mó má jé mù, noqkuq yhùm má wang ê luí, lhinghkyuq mã é jung hkangmó lé wú ri; nghut kôlhang, búi gyum ló bê nghut é yanmai, Yhâng é chángzo raxe í yuq eq rahá, Behtani và shut htoq e ló bekô nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyí, yhangmoq, Behtani và mai htoq ló kô é hkún, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haù má ashí zui lhê laq ga é jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui yâm a nghut é yanmai nghut ri. ¹⁴ Haù mù, Yesuq gi, shigâm haù lé, "Ahkuí mai gi, náng chyáng mã é ashí, ó yuq le a myàng zo lo kô sháng gaq." ga taí ri. Yhâng é chángzô pé gi, haù su ga taí é dang lé wó gyô yu akô nghut ri.

Yesuq, Noqkuq Yhùm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem và mó má jé é hkún, Yesuq gi, noqkuq yhùm má wang ê mù, haù mã é zè ung zè wui kut nyí é bang lé, hkat htoq pyám luí, ngùn htaí zo bâng é siboí pé eq hpúngkyui ung zo bâng é tanghkuq pé lé tu mhuc pyám byí ri. ¹⁶ Hau htoq agó, Yhang gi, ó yuq lé nghut kôle, ung zè lé noqkuq yhùm mai a waq lai nhâng kut pyám ri. ¹⁷ Yesuq, yhangmoq lé mhoqshit é gi, "Ngá yhùm gi, byù myú lhunglhâng bâng é matú, kyúdung yhùm ga râ nghut lhê.*"

ga kâ tô é a nghut kó lhu? Nghut kôlhang, nungmoq gi, 'damaq hkyúng' kut pyám bekô nghut ri." gâ ri.*

¹⁸ Hkyangjong agyí pé eq tará sará pé gi, haù lé wó gyo kômù, Yhang lé hkâsu kut wó sat pyám rà hkyô ho nyí akô; nghut kôlhang, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, và hkaù mai htoq ló bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat luí, "Rabai ê, wú aq! Nàng nhing pyám é maihpáng gâm gi, nyhuí shi byuq bê nghut ri." ga luí, Yesuq lé taí ri.

²² Haù hkún, Yesuq gi, "Garai Gasang lé lumjìng keq. ²³ Ngò, nungmoq lé teng za taí kôlé, ó yuq nghut kôle, i-myt má ùng-àng é hkyô a bo é za, yhumsing taí é hkyô gi, dut lò râ nghut lhê ga lumjìng kô é nghut le gi, bùm shí lé, 'Htot mù, wuimau má ló gyó wâng aq.' ga taí le lhang, haù hkyô dut byi rà nghut lhê. ²⁴ Haù mù luí, Ngò, nungmoq lé taí kôlé, nungmoq haí dúng le

le wó yû râ nghut lê nghû lumjîng kô é nghut le gi, wó yû kó râ za nghut lê.
²⁵ Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdûng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhang, nungmoq mai mara a hkyut pyám byí é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tû tai ri.†

Yesuq É Ahko Ahkáng Lé Myî Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaú má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù, ²⁸ "Hai ahko ahkáng èq, Nang, shí pé lé kut nyi lê lú? Haú su kut râ ahko ahkáng, Nang lé ó yuq byí é lú?" ga myî akô.

²⁹ Haú jáng, Yesuq gi, "Ngò le, nungmoq lé rajung myî wú kôlé, tû tai wú keq; haú hkûn, hai ahko ahkáng èq, Ngò, shí pé kut é hkyô lé tai kyo râ nghut lê. ³⁰ Yohan byí é baptisma gi, mauhkûng mai lú? A nghut jáng, byu chyáng mai lú? Tai wú keq!" ga tû myî kat ri.

³¹ Haú hkûn, yhangmoq chôm hpyê lhum kô é gi, "'Mauhkûng mai nghut lê' nghû nga-nhúng tai jáng le, 'Haú nghut le nhîng, hai mù, yhang lé a lumjîng kô é lú?' ga râ nghut; ³² 'Byu chyáng mai nghut lê.' nghû jáng le..." gâ ri. (Yohan gi, myiqhtoi rayuq gè gè nghut lê ga, lunglhang bang lumjîng bûm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ngamoq a sé." ga tû tai akô.

Haú hkûn, Yesuq gi, "Haú jáng, Ngò le, hai ahko ahkáng èq shí pé kut é hkyô lé, nungmoq lé a tai kyo." ga, yhangmoq lé tai ri.

12

Tsibiyiq Hkyâm Sai Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé tai é gi, "Byù rayuq gi, tsibiyiq hkyâm rahkyam sai to mù, lînglkyuq kyâm to luí, tsibiyiq wing pyik htoq râ dongkong dû to mù, machya ralhûm sai tô ri. Hau htâng, yhang gi, hkyâm haú lé, hkyâm sai zo bâng chyáng ngho byi to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi é yû râ matú, dui-nhâng zoshâng rayuq lé, hkyâm sai zo bâng chyáng nhang kat ri. ³ Nghut kôlhang, haú bang gi, haú yuq lé lhom chyup bat luí, loq kôm taú nhang kat akô. ⁴ Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpú kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyám akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htâng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù râ sù nghut lê; lé keq, yhang lé sat pyám sháng, haú jáng sheq, silí wunlí pé lé nga-nhúng wó

† 11:26 Bun zo shí gi, Chyûmlaiká ra-am má za bo lê.

yù rã nghut lhê.' ga rayuq eq rayuq taí lhùm bum akô. ⁸ Haú mù, yhang lé chyup yù luí, sat pyám mù, hkyám shinggan shut dú htoq pyám akô nghut ri.

⁹ Haú jáng, tsibiyiq hkyám yhumsing gi, yhangmoq lé hkâsu kut rã lhú? Yhang gi, é mù, haú hkyám saí zo bang lé sat pyám luí, hkyám haú lé, góbang lé htot ngho byí pyám rã nghut lhê. ¹⁰ Chyúmdang má, 'Yhùm saí bãng eq hkyin htoq pyám é luqgok gi, htungchyún má é ahkyak dik é luqgok dut bê.

¹¹ Shí hkyô gi, haú Yhumsing kut é nghut luí, nga-nhùng é myoq hí má mauhpo dut bê nghut ri.' ga bò tó é lé, nungmoq a nghap wú kó lhú?"*
gã ri.

¹² Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù rã matú hkyô ho nyi akô. Nghut kôhlang, yhangmoq gi, byù moq mó lé gyuq kô é yanmai, Yhang lé nyhi pyám to luí, htoq ló byuq bekô nghut ri.

Kehtaq Lé Kang Kat Byí É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yù rã matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴ Haú bang gi, Yhâng chyáng lé jé kômù, "Sará é, Awut gi, tengmán sù nghut é lé, ngamoq sé lhê. Nàng gi, ó haí ga rã lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é đông mhóqshit é sù nghut ri. Haú mù, Kehtaq lé kang kat byí le gi, ge lhê lhú? ¹⁵ Ngamoq kat ra rã lhú? A kat ra rã lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri. ¹⁶ Haú hkùn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tó ri lhú?" ga myí ri.

Yhangmoq gi, "Kehtaq é nghut ri." ga tú taí akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myí Chyam É Hkyô

Mht 22:23-33; Luk 20:27-40

¹⁸ Haú dum dui toq hkyô a joq gã é Saduke pé gi, Yesuq chyáng lé jé kômù, dangmyi lé myí akô. ¹⁹ Yhangmoq myí kô é gi, "Sará é, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi rã matú, yhâng rhat lé chui gon ra rã nghut lhê ga, nga-nhùng lé, Mosheq kã to byí ri. ²⁰ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq bê nghut ri. ²² Haú nhiktâng wui nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myí haú le châng shi ló byuq bê nghut ri. ²³ Haú mù luí, haú dum dui toq é buinyi má, myiwe myí haú gi, hká yuq é yhangmyi nghut rã lhú?"

* 12:11 Hkya-on 118:22-23

* 12:12 Kehtaq gã é gi, "hkoséng" gã é nghut lhê.

Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô ngoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lúh? ²⁵ Haú shi byuq bê bang dum dui toq é hkûn gi, myi byi myi yú hkyô joq lo rá a nghut; yhangmoq gi, mauhkûng htoq mã é maumang lagyô pé su dut byuq kó rá nghut lhê. ²⁶ Shi é mai dum lhoq dui toq é hkyô eq séng luí, Mosheq kâ tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.[✧] ga kâ tô é lé, nungmoq a nghap wú kó lúh? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga tai ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sará rayuq gi, lé lô mù, yhangmoq tai htng lhum nyi kô é lé, lé wó gyô ri. Yhang gi, haú bang lé, Yesuq rago tú tai nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lúh?" ga myi ri.

²⁹ Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhúng é Yhumsing Garai Gasang za, Garai Gasang nghut lhê. ³⁰ Haú Yhumsing náng é Garai Gasang lé, náng é myit nhiklhum banshoq, náng é asak woi-nyi lhum gón, náng myit é hkyô banshoq, náng é wum-o banshoq eq, chyitdap rá lhê.[✧] gâ é nghut lhê. ³¹ Hau htang lhum gi, 'Náng gung lé náng chyitdap é su, náng é chyangnâm mã é bang lé le chyitdap aq.[✧] gâ é nghut lhê. Shi í lhúm htoq kô é tarâ gotú a joq lo." ga yhangmoq lé tú tai ri.

³² Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotú a nyi lo ga náng tai é gi, têng ri. ³³ Garai Gasang lé, náng é myit nhiklhum banshoq eq le, náng é sê gyo é nyan banshoq eq le, náng é wum-o banshoq eq le, chyitdap rá lhê gâ é eq, náng gung lé náng chyitdap é su, náng é chyangnâm mã é bang lé le chyitdap rá lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga tai ri.

³⁴ Yesuq gi, yhang hpaqchyí bo é dông tú tai nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé tai kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhúm má mhoqshit nyi é hkûn lé tai é dang gi, "Hai mù, haú tarâ sará pé gi, Hkrisduq lé, Dawiq é yhangzo za nghut lhê gâ akô lúh?"

³⁶ Dawiq gi, Chyoiyung Woi-nyi eq tai nhang é má, 'Haú Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tô pyám é hkyíng jé shoq, Ngá é loqyo hkyam shut zung nyi shi aq." ga tai ri.[✧]

gâ ri. ³⁷ Haú mù, Dawiq yhang lháng, Hkrisduq lé, Yhumsing gâ é nghut le gi, yhangzo za hkâsu ge nghut rá lúh?" gâ ri.

Byù hpung mó gi, Yhâng é dang lé, gabú myit eq gyô nyi bum akô nghut ri.

³⁸ Yesuq gi, mhoqshit uchyang tai é má, "Tarâ sará pé lé sidiq nyi keq. Yhangmoq gi, réng é buhíng wut chúng mù, sô yông wún luí, gai pé má lhom

shi-kyâm yù rã lé le, ³⁹ tarajong pé mâ é ahkyak dik é zùng jang pé eq poi pé mâ é réng é zùng jowò pé má myang zùng rã lé le, ô nau nyi bum akô. ⁴⁰ Yhangmoq gi, chuimó pé é yhùm-yò pé lé hpyoq zo hpyoq shuq kôluí, kyú hîng hîng dúng shit mhaú é bang nghut akô. Haú su é bang gi, dam byí é je riyhang hui zo kó rã nghut lhê." gâ ri.

Chuimó Myhí Kat É Alu Ngün

Luk 21:1-4

⁴¹ Yesuq gi, alu sidek nàm má zung to mù, noqkuq yhùm mâ é alu sidek haú má, byù moq mó ngùn kat nyi é lé wú nyi ri. Sút wó bang myo myo gi, ngùn ga-myhó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú rã ngùn banshoq lé, kat bê nghut ri." ga taí ri.

13

Ló Htâng Buinyi Má Dut Lò Rã Hkyô

Mht 24:1-21, 29-35; Luk 21:5-33

¹ Yesuq, noqkuq yhùm mai htoq lô é hkûn, Yhâng é chángzo rayuq gi, "Sarâ é, wú aq; hkâ-í ko é luqgok pé! Hkâ-í hkik é yhùm pé!" ga Yhang lé taí kat ri.

² Haú hkûn, Yesuq gi, "Nàng, yhùm mó shí pé lé myàng lhê a nghut lúhú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui rã nghut lhê." gâ tú taí ri.

³ Yesuq gi, Tsanlun Bùm má, noqkuq yhùm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé je kômù, ⁴ "Haú hkyô pé gi, hkâ-nhâm dut lò rã lúhú? Haú dut lò rã hkûn, hkâsú é kumlhá htoq lô rã nghut lhê lúhú? Ngamoq lé taí kyô wú laq." ga Yhang lé baú myí akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq. ⁶ Hkâsu mù gâ le, 'Ngò gi, haú yuq* nghut lhê.' ga, Ngá myîng lé lhang é byù myo myo pô htoq lô mù, byù myo myo lé shuí nghoq kó rã nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dân kó. Haú hkyô pé gi, dut lò rã za nghut lhê; nghut kôlhang, lô htâng é buinyi gi, a nghut shi. ⁸ Byù ra-myù eq ra-myù, mingdân ralhüm eq ralhüm majan zân lhum lò kó rã nghut lhê. Jowò myo myo má, layàng nún é, mutmó gyó é pé dut lò rã nghut lhê. Haú pé gi, wuîhke jamjau hkyo é apûn awang za ru nghut ashî.

⁹ Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyâm kó rã nghut é htoq agó, tarajong pé má nungmoq lé nhuq bat kó rã nghut lhê. Hau htoq agó, nungmoq gi, Ngá myîng é yanmai, mauzau wui eq hkohkam pé é hí má, saksé dông yap ra kó rã nghut lhê. ¹⁰ Haú gabú danglù gi, amyù banshoq lé hí hko kyo ra rã nghut lhê. ¹¹ Nungmoq gi, chyup yu é hui luí, jep hui é hkûn, haí taí rã lé, hkâ-myt chiq kó. Ahkyîng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

* 13:6 Haú yuq gâ é gi, Hkrisduq lé gâ é nghut lhê.

¹² Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyâm nhâng kó râ nghut lhê. ¹³ Byù lhunglhang bang gi, Ngá é yanmai, nungmoq lé a ngui kut kó râ nghut lhê; nghut kôlhâng, jihtùm jé shoq wó hkam jân nyi é sù gi, hkyi yu é hui râ nghut lhê.

¹⁴ 'Haù lhoq hten lhoq hpyoq é achâq achyut hkyô^{*} gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpang doq lô kó sháng gaq. ¹⁵ Yhumhkúng htoq má nyi tô é sù gi, yhúmhaù má é zè haì lé le, a lô gyó wang yù lo sháng gaq. ¹⁶ Yò má nyi tô é sù gi, yhâng é buhîng lé a lô taù yu nyi lo sháng gaq. ¹⁷ Haù buinyi pé má, zogùng dut é myiwe wuî eq náu huq ashí nghut é înu wuî gi, hkâ-í yhang wuîhke bekó nghut ri myhi-nhung. ¹⁸ Haù hkyô gi, gyoqmyò má a dut sháng gaq, kyúðùng nyi keq. ¹⁹ Hkâsu mù gâ le, Garai Gasang, mingkan lé hpan tô é hkùn mai ahkuî jé shoq, hkâ-nhám le a dut wú shí é wuîhke jamjau mó gi, haù buinyi pé má dut lò râ nghut lhê; haù su é hkyô gi, htàngnùng má hkâ-nhám le dum dut lo râ a nghut. ²⁰ Buinyi haù pé lé, haù Yhumsing Garai mai a lhoq shaù é nghut le gi, ó yuq le asak wó lut râ a nghut. Nghut kôlhâng, Yhang hkyin yù bê nghut é, hkyin yù hui bâng é matú gi, buinyi haù pé lé, Yhang lhoq shaù pyâm byi bê nghut ri. ²¹ Haù ahkying má, byù rayuq yuq má, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklai kumlhá pé lé kut shit kó râ nghut lhê. ²³ Haù mù, nungmoq sidiq nyi keq; ahkying a jé shi mai, ngò, nungmoq lé, jung hkangmó taí kyô nyi gù nghut lhê.

²⁴ Buinyi haù pé má, wuîhke jamjau haù pé lai é htâng, 'Bui gi, noq byuq mù, lhamó gi, a tsò dut byuq râ nghut lhê;

²⁵ kyî pé gi, mauhkúng mai byit gyó lo bùm mù, mauhkúng má é wum-o a-tsam pé gi, lhoq nhùn é hui bùm kó râ nghut lhê.'^{*}

²⁶ Haù hkùn, haù Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó râ nghut lhê. ²⁷ Haù htâng má, Yhang gi, Yhâng é maumang lagyô pé lé nhang kat mù, maumyî chyûn hkangmó eq myigùng htuam shoq, mauhkúng htâng shoq mai, Yhang hkyin yu tô é bang lé shui tsing yù nhâng râ nghut lhê.

²⁸ Maihpáng gâm lé wú mù, mhoq yú keq; agâm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹ Haù eq rajung za, shí hkyô pé dut nyi é lé, nungmoq myàng kôjáng, Yhang gi, chyâng bê nghut mù, hkúmdong má lhang nghut nyi bê hkyô lé, nungmoq sé lo keq.

³⁰ Ngò, nungmoq lé teng za taí kôlé, shí pyat má é byu pé a ban shi byuq shimá, haù hkyô pé banshoq dut byuq râ nghut lhê. ³¹ Mauhkúng eq myigùng gi, a joq lo dut byuq râ nghut lhê; nghut kôlhâng, Ngá é dang gi, ru joq nyi râ nghut lhê.

Haù Buinyi Eq Ahkying Lé, Ó Le A Sé

Mht 24:36-44

³² Buinyi eq ahkying haù lé gi, ó yuq le a sé; mauhkúng htoq má é maumang lagyô pé lhang a sé; haù Zo le a sé; haù Îwa za ru sê lhê. ³³ Haù mù, nungmoq

gi, ahkyíng haù hkâ-nhám jé rà lé, a sé kô é yanmai, sidiq nyi keq! Machya nyi keq! ³⁴ Haù gi, byù rayuq, yhâng é dui-nhâng zoshâng wui lé, ó le ó eq séng é mú lé gám byí to mù, hkum zúng sù lé le, machya nyi rà matú pying to luí, yhâng yhúm lé, haù dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

³⁵ Haù mù, haù Yhumsing hpó gi, myinhtâng laq, myín gunggám laq, woqtún hkun laq, maubó zó laq, hkâ-nhám jé lô rà lé nungmoq a sé kô é yanmai, sidiq machya nyi keq. ³⁶ Haù a nghut jáng, Yhang, dân loq tung tau jé lo é hkûn, nungmoq yhup myhí tô é lé, lo myang pyám rà nghut lhê. ³⁷ Ngò, nungmoq lé, 'sidiq machya nyi keq,' nghú taí é eq rajung za, yuq hkanmó lé le, taí é nghut lhê." ga taí ri.

14

Yesuq, Xù But Byi Huí É Hkyô

Mht 26:1-16; Lúk 22:1-6; Yhn 11:45-53; 12:1-8

¹ Ahkuí, haù Lhoqlhai Poí eq múmchi a kat é Muk Zo Poí jé rà í nyí za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yú mù, sat pyám rà matú, hkyô ho nyi akò nghut ri. ² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akò.

³ Yesuq gi, Behtani wà má nyi é manggám dap wú sù Simûn é yhúm, siboi má nghe zung tô é hkûn, myiwe myhí rayuq gi, nardu amyit mai za saí yu é, gyai hpaù é namngón xù bo é alabasta (luq hpyû) bông yu lé lô mù, bông haù lé lâng hkyui luí, namngón xù haù lé Yesuq é ulhum má hut gyun byí ri.

⁴ Haù má nyi tô é ngum ra-am gi, wú nhik-yô é myit èq, rayuq eq rayuq taí lhum kô é gi, "Haí mù, namngón xù lé aha agó kut pyâm lhê laq?" ⁵ Haù namngón xù lé, denari* sùm sho èq ung luí, myùng bang lé byí le ge lhê mhai!" gá akò. Yhangmoq gi, myiwe myhí hau lé le, gyai chôm tân akò.

⁶ Nghut kôlhang, Yesuq gi, yhangmoq lé, "Myiwe zo haù lé, hkâtân nyi kó; haí mù, yhang lé i-myt lhoq myo nhang nyi akò lúh? Yhang gi, Ngá é ahtoq má ge é hkyô kut bê nghut ri. ⁷ Haù myùng bang gi, nungmoq eq rahá hkâ-nhám le nyi rà nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi rà sù a nghut. ⁸ Yhang gi, yhang wó dut é í kut bê nghut ri. Yhang, Ngá gûng má, namngón xù hut gyûn é gi, Ngá gûng lé yhum rà matú, hí hen lajáng tô é ru nghut lhê. ⁹ Ngò, nungmoq lé teng za taí kólé, haù gabú danglù lé mingkan gôn hko kyô é jowó hkanmó má, yhang lé myit bûn é đông, yhang kut é hkyô shí lé, taí kyo bekò rà nghut lhê." ga taí kyo ri.

¹⁰ Hau htâng, haù chángzo raxe í yuq má bo é Yudaq Iskarut gi, Yesuq lé ap pyám rà ga, hkyangjong agyi pé chyáng e ri. ¹¹ Haù bang gi, haù hkyô lé lhom wó gyo kôjáng, gyô gabú luí, yhang lé ngùn byi rà ga, danggidiq byí akò. Haù mù, yhang gi, Yesuq lé ap pyám rà hkyô ho nyi bê nghut ri.

Yhumsing É Myinzang

Mht 26:17-30; Lúk 22:7-23; Yhn 13:21-30

¹² Haù htungli joq é eq rajung za, Lhoqlhai Poí hkungga sauzo jaú byí é, múmchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo rà Lhoqlhai Poí lé, nngamoq hkâmá ê món to rà lúh?" ga myí akò.

* **14:5** Denari rachap gi, byù rayuq é ra-nyí lhê é zuihpau eq wuí ri.

¹³ Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byù rayuq lhom hui rá nghut lhê; haú hkún, nungnhik gi, yhang htâng cháng keq. ¹⁴ Haú yuq, wang ló é yhùm mã é yhumsing lé, 'Ngò, Ngá é chángzô pé eq rahá, Lhoqlhai Poi lé zo rá bing wap hkámá nghut lhê lú ga, Sará myí nhang kat ri.' nghú tai keq. ¹⁵ Haú hkún, hen to gú nghut é, ahtoq mã é wap mò lé lhom tún shit rá nghut lhê. Wap haú má, nga-nhùng é matú é hen to keq." ga tai lú, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq tai kat é eq roq za é myâng kômù luí, Lhoqlhai Poi lé, món to bekò nghut ri.

¹⁷ Myinhâng jé lô jáng, Yesuq gi, haú chángzo raxe í yuq eq rahá, haú má lé jé bekò nghut ri. ¹⁸ Yhangmoq gi, siboi má nghê mù, zô nyi bùm kô é u lé, Yesuq gi, "Ngò, nungmoq lé teng za tai kôlé, Ngò eq rahá zô nyi é bang nungmoq mã é rayuq sù gi, Ngo lé ap pyám rá nghut lhê." ga tai ri.

¹⁹ Haú hkún, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akò.

²⁰ Haú hkún, Yhang gi, "Haú yuq gi, haú raxe í yuq mã é rayuq nghut lhê. Ngò eq rahá, hkoq shí má muk jùmzo sù nghut lhê. ²¹ Haú Byu Yhangzo gi, Yhang eq séng luí ká tô é eq rajung za, shí rá za nghut lhê. Nghut kôlháng, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga tai uchiang, Yhang é chángzô pé lé gám byí ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akò nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyám é, dangshikaq eq séng é Ngá sui nghut lhê. ²⁵ Ngò, nungmoq lé teng za tai kôlé, Ngò, Garai Gasâng é mingdán mã, tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga tai ri.

²⁶ Yhangmoq gi, hkya-on mahkôn ralhú ban hkôn jáng, Tsanlun Bùm shut htoq e ló bekò nghut ri.

Petruq He-ngik Rá Hkyô Lé, Te Tai É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó rá nghut lhê; hkásu mù gà le,

'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó rá nghut lhê.*'

ga ká tô ri. ²⁸ Nghut kôlháng, Ngò gi, lhoq dui toq é huí htâng má, Galile mau shut, nungmoq é hí má e ló lánng rá nghut lhê." ga tai ri.

²⁹ Haú hkún, Petruq gi, "Góbang banshoq myit lingbat kôlháng, ngò gi, myit lingbat rá a nghut." ga tai kat ri.

³⁰ Haú mù, Yesuq gi, "Ngò, nàng lé teng za tai lé, hkú-nyí, hkú-myín yhang jáng, woq í dâm a tún shimá, nàng, Ngo lé sum dâm he-ngik pyám rá nghut lhê." ga tú tai ri.

³¹ Nghut kôlháng, Petruq gi, "Ngò, Nàng eq rahá shí rá dut kôlháng, Nang lé ngò he-ngik pyám rá a nghut." ga zuq zuq tai ri. Góbang banshoq le, haú su ga châng tai bum akò nghut ri.

* 14:27 Zhk 13:7

Get-samane Gà é Jowò Má Kyûdûng É Hkyô

Mht 26:36-46; Luk 22:39-46

³² Yhangmoq gi, Get-samane gà é jowò má jé lô kômù, Yesuq gi, Yhâng é chángzô pé lé, "Ngò, kyû é dúng nyi é u lé, shí má zùng láng keq." ga tai ri. ³³ Yesuq gi, Yhang eq rahá Petruq, Yakuq, Yohan pé lé, shuí chùng ri. Háu hkûn, Yhang gi, myit gyai a ngón é eq myit wuîhke é hui mù, ³⁴ yhangmoq lé, "Ngò gi, shí rá i yhang myit yón nyi ri; nungmoq gi, machyâ luí, shí má láng nyi keq." ga tai ri.

³⁵ Yesuq gi, háu mai ratsuí zo sô é mù, myigùng má gop byên to luí, ahkyíng háu lé ge lhoq lhai pyám byi le gi, Yhâng chyáng mai lhoq lhai pyám byi rá matú, ³⁶ "Aba, † Áwa é, Nang gi, hai le wó dut é Sù nghut lhê. Góm† shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nang ô nau é dông sheq nghut sháng gaq." ga kyûdûng ri.

³⁷ Hauhâng, Yhang gi, Yhâng é chángzô pé chyáng dum taù lo le, yhangmoq yhup myhi to kô é lé lo myang ri. Háu mù, Yhang gi, Petruq lé, "Simun, nang yhup ngón nyi lhê lhu? Razup za lhang a wó machya nyi lhu? ³⁸ Gunglaú é a hui sháng gaq, machyâ luí, kyûdûng nyi keq. Háu woi-nyí gi, kâm nyi kôlhang, gungsho gi, wum nyhôm nyi ri." ga tai ri.

³⁹ Yesuq gi, radàm dum é mù, hí lé dúng é dang lé za, é dung ri. ⁴⁰ Yhang dum taù lo le, yhangmoq gi, myoqkuq lai kô é yanmai, yhup myhi to láng kô é lé, lo dum myang ri. Yhangmoq gi, Yhang lé hai tai rá a sé dut byuq akò nghut ri.

⁴¹ Yesuq gi, sum dâm nghû rá lhíng má, yhangmoq chyáng dum taù jé lô mù, yhangmoq lé, "Nungmoq gi, ahkuí jé shoq yhup ngón nyi ashí kô lhu? Gé bê! Háu ahkyíng gi, jé bê nghut luí, háu Byu Yhangzo gi, yubak dap bâng é loq má ap pyám é hui rá nghut bê. ⁴² Toq keq! Lô losháng hkoi! Ngo lé ap pyám rá sù gi, jé lé lô bê nghut ri." ga tai ri.

Yesuq, Chyup Yû Hui É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dâng nyo nyi ashí u lé, háu chángzo raxe í yuq má bo é Yudaq gi, háu hkyangjong agyi pé, tará sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám rá sù gi, yhangmoq lé, "Ngò bopuq puq é sù gi, háu yuq nghut bê; Yhang lé chyup yû mù, zúng shuí lô keq." ga kumlhá byi to bê nghut ri. ⁴⁵ Yudaq gi, Yesuq chyáng hkyê za é mù, "Rabai é." ga tai luí, Yhang lé bopuq puq byi ri. ⁴⁶ Háu hkûn, yhangmoq gi, Yesuq lé chôm zuí zing mù, chyup yû bekò nghut ri. ⁴⁷ Háu mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup rá matú, shâm eq dumbáng pé chùng mù, lé lo akò lhu? ⁴⁹ Ngò gi, nyi wui, nungmoq eq rahá nyi luí, noqkuq yhúm má mhoqshit byi nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra rá nghut lhê." ga tai ri. ⁵⁰ Háu hkûn, háu chángzô pé gi, Yesuq lé to pyám to kôluí, hpang byo byuq bekò nghut ri.

† 14:36 Aba gà é gi, Aramaik dang dông "Áwa" gà é lichyúm nghut lhê. † 14:36 Góm gà é gi, Yesuq, jamjau hui rá hkyô eq shí rá hkyô lé, tai nau é nghut lhê.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkún, ⁵² yhang gi, buhîng lé hkyut hkyô pyâm to mù, gùngchín hpang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhang bang, suwún wui eq tarâ sará pé le, lé zup zîng bum akô. ⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haí le a myàng kó nghut ri. ⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq sai é noquq yhùm shí lé, Ngò hpyoq hpyi pyâm mù, sum nyi gyoro má, byu loq èq a sai é, gotù ralhùm dum sai râ nghut lhê.' ga taí é lé, ngamoq wó gyô ri." ga akô. ⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haí le a tú taí luq? Shí bang, Nang lé mara hun nyi é saksé gi, hká dòng nghut lhê lú?" ga lui, Yesuq lé myí ri. ⁶¹ Nghut kôlhang, Yesuq gi, jit le a ga nyi tô ri.

Hau mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myí ri.

⁶² Haú hkún, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam^s má zung tô é lé le, mhuthtui ji mù, mauhkûng mai lé lo é^{*} lé le, nungmoq myàng kó râ nghut lhê." ga taí ri.

⁶³ Haú hkún, hkyangjong mó gi, yhang é bu lé lhang cheq pyâm mù, "Nga-nhúng, hai saksé râ ashí lú?" ⁶⁴ Yhang, Garai Gasang lé rhoí dang taí é lé nungmoq wó gyo bê nghut lhê. Nungmoq hkâsu wó myit akô lú?" ga myí ri; yhangmoq banshoq bang gi, shí gíng sù nghut ri ga, chôm myit huí akô.

⁶⁵ Haú mù, ra-am gi, Yhang lé sôkan byé gyun é eq, myoq má nghop pyâm byi lui, loqtsup èq htui byí lhê kut mù, "Nang lé ó yuq htui é, myiqhtoi htói wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôlhang, yhang gi, "Nàng taí é hkyô lé, ngò, sé le a sé, gyo le a sé gyo." ga he pyâm lui, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haú gi, Petruq lé, haú má dum myàng jáng, awui ayâm má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri. ⁷⁰ Petruq gi, radàm dum he pyâm ri; hau htâng razup zo má,

§ 14:62 Loqyô hkyam gâ é gi, ahko ahkáng wó é jowò lé gâ é nghut lhê. * 14:62 Mhuthui ji mù, mauhkûng mai lé lo é gâ é gi, Danielaq 7:14 má bò lhê. † 14:68 Chyúmding ra-am má Haú hkún jáng, woq tún bê nghut ri gâ é le bo ri.

haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haû hpúng má é byù rayuq hkyak nghut lhê." ga taí akô.

⁷¹ Haû hkûn, yhang gi, yhânggùng yhang nhing lui, "Haû nungmoq taí é byù lé, ngò a sé." ga dakam ri.

⁷² Haû u yhang, woq radàm dum tun kat bê nghut ri. Haû mù, Petruq gi, "Woq í dâm a tûn shimá, nàng, Ngo lé sum dâm he-ngik pyám rà nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haû napkyô noq za má, hkyangjong agyi pé gi, suwún wui, tarâ sará pé, Yudaq byin tú wapdoq gón bang eq rahá kut, chôm bóng yù kômù, Yesuq lé tuí yù lui, shuí htoq ê kômù, mauzau Pilat chyáng ê ap byí akô nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lúhú?" ga myi jáng, Yesuq gi, "Nàng taí é eq rajung za nghut lhê." ga, tú taí ri.

³ Haû hkyangjong agyi pé gi, Yhang lé mara gyai myo shoq chôm hun akô.

⁴ Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haí le a tú taí lúhú?" ga myí ri.

⁵ Nghut kôlhang, Yesuq gi, haí le a tú taí kut jáng, Pilat gi, maú byuq bê nghut ri.

⁶ Haû Lhoqlhai Poí u lé, mingbyù wui dúng é htóng byù rayuq yuq lé, mauzau mai lhaq lhoq htoq byi byi kut é htùng joq ri. ⁷ Haû hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri. ⁸ Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi rà matú, dúng akô.

⁹ Haû mù, yhang gi, "Yudaq byu pé é hkohkâm lé nhang htoq kat byi rá lé, nungmoq ô nau akô lúhú?" ga myí ri. ¹⁰ Pilat, haû su ga myí é gi, haû hkyangjong agyi pé, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri. ¹¹ Nghut kôlhang, haû hkyangjong agyi pé gi, Barabaq lé sheq nhâng byi rà matú, Pilat chyáng dung kó sháng gaq ga, haû byù moq mó lé i-myit lhoq toq byí akô.

¹² Pilat gi, "Haû jáng, nungmoq mai Yudaq byu pé é hkohkâm ga sù yuq lé, ngò hkâsu kut rà lúhú?" ga yhangmoq lé myí ri.

¹³ Haû hkûn, yhangmoq gi, "Yhang lé tapzîng má jén sat pyám aq." ga chôm garu akô.

¹⁴ Haû jáng, Pilat gi, "Haí mù lui lúhú? Yhang haí kut shut bê lúhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garú lo bum akô nghut ri.

¹⁵ Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám rà matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaú má shuí wang ló kômù, gyedap gón lé ji tsing yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akô. ¹⁸ Hau htâng, yhangmoq gi, "Yudaq byu pé

é hkohkâm hpó ê! Chyung hîng xê hing nyí sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng eq adàm dàm bat kômù, sôkan byé gyun luí, Yhâng hí má hkyihput htuq mù, paí mhaú akó nghut ri. ²⁰ Yhangmoq gi, Yhang lé rhoi jihkyoi ban kut yú kôjáng, Yhang wut tô é buhîng nè lé hkyut yú kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byú nghut é Simun ga sù gi, yosô wà mai lò mù, haú jowò mai lai ló ri. Haú hkûn, gyezò pé gi, yhang lé, tapzîng waq nhang akó nghut ri. ²² Yhangmoq gi, Yesuq lé, Golgahta gâ é jowò má shuí e akó (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhò tô é tsibiyiq wing huq akó; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyín shosé shê mù, âng é dông gam yu pyám byi akó nghut ri.

²⁵ Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akó nghut ri. ²⁸ (Haú gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô lai ló é bang gi, nyhap é dông u-ngut ngut mù, tai kô é gi, "Noqkuq yhúm lé hpyoq pyám luí, sum nyí gyoro má dum wó sai lhê ga Sù ê! ³⁰ Náng gùng nàng hkyi yú luí, tapzîng mai gyó lò wú aq mhai!" ga akó nghut ri.

³¹ Haú eq rajung za, hkyangjong agyi pé eq tará sará pé le, yhangmoq hkaú má, "Shí yuq gi, góbang lé hkyi yú sù nghut kôlhang, Yhânggùng yhang gi, a wó hkyi yú nghut ri myhi-nhung! ³² Nga-nhung wó myâng mù, lumjîng râ matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang tai akó. Yhang eq rahá tapzîng má jén tap to huí é su nhik le, Yhang lé rhoi dang tai akó nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó eq garû kat ri. Haú é lichyúm gi, "Ngá Garai é, Ngá Garai é, Nàng, hai mù, Ngo lé tô pyâm tô lhê lú?" gâ é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, tai akó.

³⁶ Haú hkûn, byú rayuq gi, din e lò mù, wuimaú lé tsibiyiq wing chyín má jum yú luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lò mù, Yhang lé lé lhoq hkyô yú abe, nga-nhung chôm láng wú sháng." ga tai ri.

* 15:23 Mura gi, chí wó kut jung xú nghut lhê. ✧ 15:28 Esai 53:12 † 15:28 Bun zo shí gi, chyúmdang axau ra-am pé má za bo é nghut lhê. ✧ 15:34 Hkya-on 22:1

³⁷ Yesuq gi, htê mó èq garû kat luî, kâng byit byuq bê nghut ri.

³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga tai ri.

⁴⁰ Myiwe wui ra-am gi, we we mai wù nyi bum akô. Haú bang má, Magadalaq và mã é Mariq, Yakuq tiq sù yuq eq Yose nhiktang é yhangnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng rã é hkyô pé lé châng kut byi é bang nghut akô. Yesuq eq rahá, Yerusalem và mó má doq lé lo é myiwe wui, góbang myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyi gi, Hên Lajang Buinyi (Bánno buinyi é hí nyi) nghut ri. Haú mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti và byù Yosep gi, myit wum lhoq kng yù mù, Pilat chyáng wàng luî, Yesuq é gungsôm lé é dúng ri. ⁴⁴ Pilat gi, Yesuq shi bê gá é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shi teng bê lúhú ga myí ri. ⁴⁵ Shí teng bê hkyô lé, shô up gyezau chyáng mai wó sê yù jáng, Pilat gi, Yesuq é gungsôm lé yù rã ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luî, gungsôm lé yu hkyô mù, htop yup luî, luqgok lé kyúng tô é lup hkaú má é kat tô ri. Hau htâng, yhang gi, luphkum má, luqlong eq lhêng chí pyâm tô ri. ⁴⁷ Magadalaq và mã é Mariq eq Yose é yhangnu Mariq gi, Yesuq lé, hkâmá lheq tô é lé, é myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq và mã é Mariq, Yakuq é yhangnu Mariq eq Salome pé gi, Yesuq é gung má, è but byi rã matú namngón jung é wui akô.

² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mã é luqgok lé, ó yuq chyûn lhêng pyám byi rã lúhú?" ga, rayuq eq rayuq tai lhum akô.

⁴ Nghut kôlhang, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê.

⁵ Yhangmoq gi, lup hkaú má wang è kô é hkûn, hpyu é buhng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dân kó! Nungmoq gi, haú tapzîng má jén sat huí é, Nazaret và byù Yesuq lé ho akô, a nghut lúhú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so láng rã nghut lhê. Nungmoq lé, Yhang tai tô é eq rajung za, nungmoq gi, Yhang lé haú má ló myàng kó rã nghut lhê.' nghú, Yhâng é chángzô pé eq Petruq lé ló tai kyo keq." ga lhom tai kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a tai kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mà é Mariq lé hí htoq shit ri. ¹⁰ Mariq haú gi, lò mù, haú Yesuq eq nyi lai lò bê bang, yón ngau nyi kô é hkûn, haú hkyô lé lò tai kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhâng, a jing kó nghut ri.

¹² Hau htâng má, Yesuq gi, yosô wà shut htoq e lò nyi é chángzo í yuq lé, gotú gunghkyáng dong htoq shit ri. ¹³ Haú nhik gi, taú lò mù, gotú chángzô pé lé haú hkyô lò shit kyo akô; nghut kôlhâng, yhangmoq gi, haú lé le a jing byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang tai kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq é mù, waxâng zo wui lhunglhang lé, haú gabú danglù hko kyo keq. ¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui rá nghut lhê. Nghut kôlhâng, a lumjing é sù ó yuq nghut kôle, mara byi é hui rá nghut lhê. ¹⁷ Lumjing é bang wó kut shit rá kumhá pé gi, Ngá é mying lé lang lui, nat gâng pé lé wó hkat htoq kó rá eq laklai é mying pé lé dat nyò kó rá nghut lhê; ¹⁸ yhangmoq gi, lhangmui pé lé le, wó kui zui kó rá nghut lhê; muí shi jung duq lé, shuq kôlhâng, hai dut kó rá a nghut. Nò bâng é htoq má, yhangmoq é loq ke byi jáng, nò bang ge byuq kó rá nghut lhê." ga tai ri.

¹⁹ Haú Yhumsing Yesuq gi, yhangmoq lé dang ban tai é htâng má, mauhkung shut shui toq yu é hui lui, Garai Gasâng é loqyo hkyam má zung to bê nghut ri. ²⁰ Hau htâng, haú chángzô pé gi, htoq é mù, jowò hkangmó má mungdang é hko kyô akô nghut ri; haú Yhumsing gi, yhangmoq eq rahá nghut nyi mù lui, Yhâng é mungdang têng é hkyô lé tún shit rá matú, yhangmoq lé, kumhá pé wó kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

1 Aróng wó dik é sù Htohpiluq ê, ngamoq chyáng dut lai lò bê hkyô pé lé, sâng-hi mai yhumsing myoq eq yang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kâ to bekô nghut ri. ³⁻⁴ Ngò le haú pé banshoq lé awang mai ahpyo hpyot jikhúm nuqguq ho myí yù luí, nàng wó sé yu to bê hkyô pé gi, je lhoq gíng é dut sháng gaq nghú, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú mâ é, Elizabet ga sù nghut ri. ⁶ Haú nhik gi, Yhumsing Garaí é jep é tará eq htúngtará banshoq lé, rago za cháng mù, Garaí Gasâng é hí má dingmán é su nhik nghut akò. ⁷ Nghut kôlhang, Elizabet gi, baùdung dung sù nghut é yanmai, yhang nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhang é hpúng eq rahá, Garaí Gasâng é hí má lé zui le, ⁹ haú Yhumsing é noqkuq yhúm ahkaú má namngón hkungga é wang nyhé râ matú, hká yuq nghut râ lé hkyangjông pé é htúngli eq rajung za byù hkyín shosé she wú é hkún, yhang chyáng àng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyúdung nyi akò.

¹¹ Haú hkún, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq ê, hkâgyuq, náng é kyúdung dang lé Garaí Gasang gyo byi bê. Haú mù luí, náng é yhumsing myí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghú myhíng byi ra râ nghut lhê. ¹⁴ Yhang gi, náng é matú gabú hpo eq nguóngón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gà le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyyiq wing eq ihpe lé ge shuq râ sù a nghut; yhang nú é unghkaú mai yang, Chyoiyung Woi-nyí eq byíng nyí râ sù nghut lhê. ¹⁶ Yhang gi, Israelaq yhangzo yhangshù pé myo myo lé, Yhumsing yangmoq é Garaí Gasâng chyáng lhing lò nhâng râ sù nghut lhê. ¹⁷ Íwâ pé é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myú dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé tai ri.

¹⁸ Haú hkún, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngá é yhumsing myí le asak ipyat ko bê." ga luí, maumang lagyo lé tú tai ri.

¹⁹ Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí tai kyo aq ga luí, Yhang, ngo lé nhang kat é nghut lhê. ²⁰ Ahkýíng jé jáng, ngá dang gi, gè gè dut lò râ nghut lhê. Dang shí

pé lé nàng a lumjǐng é yanmai, mù haũ dut lo é buinyì jé shoq, nàng gi, nhut jit byuq rà nghut lhê." ga luí, yhang lé tú taí ri.

²¹ Haũ u, shiwa byu pé gi, Zahkariq noqkuq yhũm ahkaũ má haũ-í myáng shoq lúng byuq é hkyô lé lǎng maũ nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haũ mù luí, yhangmoq gi, noqkuq yhũm ahkaũ má yhang myoqwup shing-rǎn rajung jung myàng ang bê lé, wú sê yu akô nghut ri.

²³ Ahkuí, Zahkariq gi, hkyangjong jong âng é buinyì ngap jáng, yhũm shut dum taũ ló byuq bê. ²⁴ Hau htáng má, yhâng é yhumsing myhi Elizabet gi, zogũng dut lò mù luí, hká le a htoq e za lhamó ngo hkyap yhũmhkaũ má lúng byuq ri. ²⁵ Haũ hkũn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dõng mai huí sêng pyám byi é buinyì má, Yhang ge é hkyô lé, ngo lé tũn shit bê nghut ri." ga taí ri.

Yesuq Hku Lé Lô Berá Gâ É Hkyô

²⁶ Ahkuí, Elizabet zogũng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gâ ri; yhang gi, Dawiq amyũ má é Yosep gá su èq dũng tô é zomyi nghut ri. ²⁸ Maumang haũ gi, Mariq chyáng jé jáng, "Mariq ê, nguĩngón nyí sháng gaq; Nàng, hkungsô wó nyi ri; Haũ Yhumsing Garai gi, nàng eq rahá nyi nyi ri ò!" ga taí ri.

²⁹ Mariq gi, dang haũ lé gyo sing nán mù, shí su gâ é dang gi, haí jung gá naũ é nghut lhê lú ga luí, myit maũ nyi ri. ³⁰ Haũ hkũn, haũ maumang lagyo gi, "Mariq ê, hkágyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogũng dut lò mù luí, yuqzo rayuq bau rà nghut lhê. Yhâng é myíng lé gi, 'Yesuq' nghũ luí, nàng myhíng byi ra rà nghut lhê. ³² Yhang gi, hpung bô sũ dut rà nghut mù, Myhang htáng htũm Su é Yhangzo gâ é hui rà nghut lhê. Yhumsing Garai Gasang gi, yhang lé, yhâng é íchyí iwa Dawiq é hkohkâm tanghkuq lé, byi rà nghut mù luí, ³³ Yhang gi, Yakup yhũm* lé hká-nhám le ru-up nyi rà nghut lhê. Yhâng é mingdán le htum nghu é joq rà a nghut." ga luí, yhang lé taí ri.

³⁴ Haũ hkũn, Mariq gi, "Ngò gi, zomyi gyíng ru nghut ashí, haũ gi, hkásu wó dut rà lú?" ga luí, maumang lagyo lé tú taí ri.

³⁵ Haũ maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htũm Su é wum-o a-tsam gi, nàng lé shum gum to byi luí, haũ baũ lò rà Chyoiyúng sũ le gi, Garai Gasâng é Yhangzo ga kó rà nghut lhê.

³⁶ Hau htoq agó, wú aq, náng é amyũ suisho baũdung myhi Elizabet lhang, mang bê le yuqgè zo wun to bê. Ahkuí, zogũng dut é lhamó hkyuq hkyap wàng bê nghut ri. ³⁷ Hkásu mù gâ le, Garai Gasang a wó kut é haí le a joq." ga luí, yhang lé tú taí ri.

³⁸ Haũ hkũn, Mariq gi, "Yhumsing é jũnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú taí ri. Hau htáng, maumang lagyo gi, yhâng chyáng mai ló byuq bê.

Elizabet Lé Mariq Ê Huí É Hkyô

³⁹ Hau htáng hká-í a myáng má, Mariq gi, Yuda mau bum mau má é wà rawà shut hân hân e ló luí, ⁴⁰ Zahkariq é yhũm má wàng mù, Elizabet eq huí nyo lhum ri. ⁴¹ Mariq é danghtë lé Elizabet wó gyo jáng, yhâng é unghkaũ

* 1:33 Yakup yhũm nghu e gi, Israelaq amyũ lé gâ lhê.

mâ é zoshâng gi, byam chyû lo ri. ⁴² Elizabet le, Chyoiyúng Woi-nyí byíng to mù luí, Mariq lé htê mó èq taí é gi, "Myiwe banshoq má, nàng gi, hkungso wó dik sù nghut ri. Náng é unghkaú mâ é zoshâng le hkungso wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lúh? ⁴⁴ Wú aq, náng danghtê lé wó gyo kat jáng, ngá unghkaú mâ é zoshâng gi, gabú luí byam chyû nyi ri. ⁴⁵ Haú Yhumsing taí é dang gi, ge gè dik lò rà nghut lhê ga luí, lumjing é myiwe gi, hkungso wó nyi ri." gâ ri.

Mariq É Hkya-on Dang

⁴⁶ Haú hkûn, Mariq gi,
 "Ngá é i-mytit mai haú Yhumsing lé hkya-on nyi lhê,
⁴⁷ ngá é woi-nyí le, Garai Gasang ngá é hkyi yù Sù má gabú nyi lhê.
⁴⁸ Ngò Yhâng é jùnmyhí myit nyhum ngá é lé, Yhang myàng byi bê nghut ri. Wú aq, ahkuí mai ipyat dedu má, ngo lé gi, hkungso wó nyí sù, gâ nyi bekò rà nghut lhê.
⁴⁹ hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,
 Yhâng é myíng gi, chyoiyúng nyi ri ô.
⁵⁰ Yhang lé gyoq hoq nyí bâng é ahtoq má, Yhang shogyo nhikmyín é hkyô gi, pyat bán hkangmó jé shoq hkâ-nhám le joq nyi rà nghut lhê.
⁵¹ Yhâng é wum-o bo é loq èq mauhpo mù mó pé lé tân shit bê.
 Yhumsing myit é hkyô má nghutbún nyi é bang lé, Yhang lhoq pyo pyám bê.
⁵² Zaugun suwún wuí lé gi, zau zúng tanghkuq mai lhoq hkyô pyám mù, i-mytit nyhúm bang lé gi, lhoq myhâng bê nghut ri.
⁵³ Zòmút hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.
⁵⁴⁻⁵⁵ Nga-nhûng é íchyí íwâ pé lé taí tô é dang eq rajung za, Abraham eq yhangzo yhangshu pé lé,
 hkâ-nhám le shogyo nhikmyín nyi rà gâ é lé myit bún nyi é yanmai,
 Yhâng é dui-nhâng zoshâng Israelaq byu pé lé hku baú nyi ri."
 ga luí, taí ri.
⁵⁶ Mariq gi, Elizabet chyáng lhamó sum hkyap kô nyi mù luí, yhúm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htâng, Elizabet gi, zoshâng bau rà buinyi jé mù, yuqgè zo bau bê.
⁵⁸ Yhang lé haú-í kô é jeju Yhumsing tân shit é hkyô lé, yhâng é yhumkyo buinúm wui eq mung moq gumang wui wó gyo kojáng, yhang eq rahá gabú nyi akô.
⁵⁹ Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi rà matú lé kôluí, yhâng wá é myíng eq rajung za, Zahkariq ga myhíng byi rà dâ akô. ⁶⁰ Nghut kôhang, yhâng nu gi, "A nghut, Yohan nghú sheq myhíng rà nghut lhê." ga tù taí ri.
⁶¹ Yhangmoq gi, "Náng é amyû suisho má le, haú su gâ é myíng rayuq le a bo wú shi." ga luí, yhang lé taí akô.
⁶² Haú hkûn, zoshâng haú lé hkâsu nghú myhíng nau lhê laq ga, yhâng wa lé loq lik lik shit mù myí akô. ⁶³ Zahkariq gi, kâ jung longpá dúng yù mù, "Yhâng é myíng gi, Yohan nghut lhê." ga kâ shit ri. Haú mù, lungghlâng bang gi, maú

byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵ Haú su dut é hkyô lé, wó gyô é awui ayàm lhinghkyuq mã é lhunglhâng bang gi, gyuq mau byuq bum kômù, Yuda mau bum mau ramau gón tai pyo lô bum akô. ⁶⁶ Wó gyô é lhunglhâng bang gi, haú hkyô lé yhumsing é i-myt unghkaú má kat to mù, "Zoshâng shi gi, hkâsu dut lò râ sù nghut lhê lú?" ga myit wú nyi akô. Haí mù gà le, haú Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong tai é gi,

⁶⁸ "Haú Yhumsing, Israelaq é Garai Gasang lé hkya-on sháng ô!

Haí mù gà le, Yhang gi, Yhâng é amyú lé, lé kúm wú mù lui, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyú mai nga-nhúng é matú

wum-o bo é hkyi yu é hkyuí† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pê é nhut mai tai tô é eq rajung za nghut ri.

⁷¹ Haú hkyuí gi, nga-nhúng lé nga-nhúng é gye pê chyáng mai le, a ngui a naù bang banshoq é loq mai le, hkyi yù rá nghut lhê.

⁷² Íwa Garai gi, nga-nhúng é íchyí íwa pé lé shogyo nhikmyin hkyô lé tân shit rá matú, Yhang byí tô é chyoiyúng dangshikaq lé a tô-myí nghut ri.

⁷³ Haú gi, nga-nhúng é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhúng lé gye pê loq mai hkyi yù rá eq, nga-nhúng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai, Yhang lé wó dojaú nyí nhâng rá matú, Yhang jé lé é nghut lhê.

⁷⁶ Ngá zo ê, nàng gi, Yhumsing é hí má, e lô mù lui, Yhâng é hkyô lé hen lajang byi rá sù nghut é yanmai,

nang lé Myhang htáng htúm Su é myiqhtoi ga kó rá nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui rá hkyô lé tai kyo rá sù nghut lhê.

⁷⁸ Haí mù gà le, Garai Gasâng é shogyo nhikmyin é yanmai, napsún bui‡ gi, mauhkúng mai nga-nhúng chyáng htoq lé lô rá nghut lhê.

⁷⁹ Yhang gi, mauchut hkaú§ eq shí wup hkaú má lúng to bang lé builoq su duqbó byi rá eq,

nga-nhúng lé nguóngón simsaq é hkyô shut shuí e lô rá sù nghut lhê." ga ri.

⁸⁰ Zoshâng haú gi, kô lò mù, woi-nyí wum-o bo lò lui, Israelaq byu pê chyáng htoq shit lo é buinyi jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô *Mht 1:18-25*

† 1:69 Hkyi yu é hkyuí gi, Yhumsing Yesuq lé tai é nghut ri. ‡ 1:78 Napsún bui gà é gi, Yesuq lé tai é nghut lhê. § 1:79 Mauchut hkaú gà é gi, Garai lé a sé mù woi-nyí má shi tô é bang lé gà lhê.

¹ Buinyi haú pé má, Romaq hkoséng ming banshoq mâ é byù lhunglhang bang gi, mying jihpán kat rá matú, hkoséng Kehtaq Augustuq chyáng mai mungdang htoq ri. ² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haú hkûn, byù du jup gi, mying jihpán kat rá matú, ó le ô é wà shut ló bum akò.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau má é Betlehem gà é Dawiq é wà shut, ⁵ yhang dúng tô é myiwe Mariq eq rahá mying kat lóm rá matú jé doq ló akò; Mariq kúm gi, gungloq lai to bê nghut ri. ⁶ Haú Betlehem má nyi tô ashí le, Mariq gi, zo hkú rá buinyi jé mù, zomún yuqzo lé bau bê. ⁷ Yhang gi, zoshâng haú lé panchoq èq htup mù no tso langhkang má lheq tô ri; hai mù gà le, bíng yhùm má yhangmoq nyi rá jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuí, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akò. ⁹ Haú hkûn, Yhumsing é maumang lagyo gi, yhangmoq é hí má lé htoq yap shit to mù, Yhumsing é hpungwup shingkang gi, awui ayàm má duqbang lò luí, yhangmoq gyai gyuq bum akò. ¹⁰ Maumang lagyo gi, "Hkâgyuq kó, byù lhunglhang bâng é matú, gyai yhang gabú é danglù, ngò nungmoq chyáng wun lé lo lhê. ¹¹ Hkû-nyí lhê buinyi má, Hkrisduq* nghu é Yhumsing nghut é hkyi yù Sù gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to láng ra nghut lhê." ga luí, yhangmoq lé tai ri.

¹³ Haú hkûn jáng yhang, mauhkûng bang rajùm rayò htoq lò mù, maumang lagyo haú eq rahá Garai Gasang lé hkya-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguingón é gi, hkâ-nhám le joq nyi sháng gaq ô!"

gá akò.

¹⁵ Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng é mù, ahkuí za Yhumsing nga-nhúng lé lé shit kyò lai ló bê hkyô lé é gôn wá sháng," ga luí, rayuq eq rayuq tai lhùm akò.

¹⁶ Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, é myàng akò. ¹⁷ Zoshâng haú lé, yhangmoq myàng kôjáng, zoshâng haú eq séng lui yhangmoq lé, lé tai kyò é dang lé, tai pyò kat bekò. ¹⁸ Wó gyò é bang banshoq gi, haú sau zúng bang tai kyò é dang lé, maú byuq bum akò. ¹⁹ Mariq kúm gi, dut lo é hkyô pé eq wó gyò é dang banshoq lé unghkaú má matsing yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo tai kyò kat é dang eq rajung za, wó gyò yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum tau ló bekò nghut ri.

Yesuq Lé, Noqkuq Yhùm Má Shuí E É Hkyô

* **2:11** Grik dong Hkrisduq gá é gi, xù but hui Sù gá é lichyùm nghut mù, Hebre dong "Mesaia" gá é eq rajung za nghut lhê.

²¹ Zoshâng haû, shit nyí jé mù ahp̄yo-kuq hpyit byi râ buinyí má, yhang unghkaû má a lúng shi mai maumang lagyo myhîng tô é myîng eq rajung za, yhang lé, "Yesuq" ga luí, myhîng byi akô.

²² Mosheq é tarâ eq rajung za, yhangmoq é lhoq san lhoq sêng é buinyi byîng jáng, Yhumsing é tarâ má, "Zomún yuqzo hkangmó gi, haû Yhumsing é hí má chyoyúng sù wó nghû râ matú, Yhumsing chyáng é ap byi râ lhê."[☆] gâ é eq, ²³ "Hpûngkyui razúm, haû a nghut jáng, nghoqmyhû zo í du,"[☆] hkungga byi râ lhê ga kâ tô é eq rajung za, ²⁴ Mariq eq Yosep gi, zoshâng haû lé shui mù Yerusalem wà mó shut é akô.

²⁵ Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israellaq lé nhik lhoq tîng râ ahkyîng lé láng nyí sù nghut ri; haû Chyoyúng Woi-nyí le, yhâng é ahtoq má nyi nyi ri. ²⁶ Yhang gi, haû Yhumsing Hkrisduq lé a myang é za, shû râ a nghut, ga Chyoyúng Woi-nyí èq tûn shit tô é hui sù nghut lhê. ²⁷ Yhang gi, Chyoyúng Woi-nyí èq shui mù, noqkuq yhúmhaû má é jé nyi tô é hkûn lé, Mariq eq Yosep gi, zoshâng Yesuq lé htung tarâ eq rajung za kut byi râ matú, noqkuq yhúmhaû má shuí wang ló kôjáng, ²⁸ Simeon gi, zoshâng lé loq èq lhom bún yû mù, Garai Gasang lé hkya-ôn é dang gi,

²⁹ "Yhumsing ê, náng é danggidiq gi, dik bê nghut ri; hkû-nyí náng é jùn ngô gi, nguôngón é eq wó shi ló berâ nghut lhê.

³⁰ Haî mù gâ le, byù lhunglhâng bâng é matú, nàng lajang tô é hkyi yù hkyô lé, ngá myoq èq yhang wó myâng bê.

³¹ Haû gi, byù myû chângjup wó myâng râ matú, nàng lajang to byí é nghut mù,

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israellaq é hpungwup shingkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shi gi, Israellaq ming má é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumhá matú le, hkyin tô é hui sù nghut ri. ³⁵ Haû mù, byù myo myô é unghkaû má, myit mi-myit lé lhoq htoq shit râ nghut lhê. Náng é myit nhikhum má, shâm chûn èq htaù kyâng kat é su gâ é lé, nàng hui zo râ nghut lhê." ga taí ri.

³⁶ Ashe amyû mã é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyí luí, shit xe myi zân jé shoq chuimó mó nyi to sù nghut ri.

³⁷ Myiwe haû gi, noqkuq yhùm mai a htoq é za, nyí myín a ga noqkuq dojaù nyí mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé ló mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglháng lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mã é yhangmoq wà Nazaret shut dum taù ló bekô.

⁴⁰ Zoshâng haû gi, kô lò mù, wum-o bò lo é eq, hpaqchyí byéng-yá le byîng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhkaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poi jé hkgangmó, zàn wui Yerusalem wâ mó má ê ê kut akô. ⁴² Yesuq raxe í zân jé jáng, poi haû, ê bo lôm ra htàngli joq é eq rajung za, yhangme wui yhanghpe wui doq ló akô. ⁴³ Haû poi buinyi lai luí, dum taû lo é hkûn, zoshâng Yesuq gi, Yerusalem wâ mó má nyi gyó tô ri; nghut kôlháng, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò rà su ngám kômù luí, Yosep eq Mariq gi, ra-nyí buigyùm chap sô ló bê htàng má, mung moq wui eq, sé lhúm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wâ mó má dum taû jé e ló bekô. ⁴⁶ Ahkuí, sum nyí nghú rà nyí sheq, noqkuq yhúmhkaû má, tará sará pé é gung gung má zung to mù, yhangmoq é dang lé gyo yù luí, dum taû myi myi kut nyi é lé, yhangnhik é myàng akô. ⁴⁷ Yhâng é dang wó gyó é bang banshoq gi, Yhâng é u-nuq nyau é hkyô lé le, Yhang tú tai é dang lé le, maû nyi akô. ⁴⁸ Yhang lé myàng jáng, yhangnhik maû byuq kômù luí, yhângnu gi, "Ngá zo ê, haí mù luí ngá-nhik lé isu kut lhê lú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luí, Yhang lé tai ri.

⁴⁹ Yhang gi, "Haí mù luí, ngo lé châng ho akô lú? mauhkúng má é ngá Wá é yhúm má ngò nyi rà lhê le gi, nungnhik a sé kó lú?" ga luí, yhangnhik lé tú tai ri. ⁵⁰ Nghut kôlháng, yhangnhik gi, Yesuq tai é dang lichyúm lé, a sé gyo kó.

⁵¹ Yesuq kúm gi, yhangnhik eq rahá Nazaret wâ shut taû jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhum má matsing tô ri. ⁵² Yesuq gi, hpaqchyí byéng-yá kúng zet lo é eq, gungkyáng kó myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haû hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haû mù, yhang gi, Yodan làng yàm jowò hkgangmó má, sô jón wún luí, yubak mara hkyut pyám byí é hui rà matú myit lhing mù, wui-myhup hkâm* yù rà hkyô lé, hko kyô nyi ri. ⁴ Haû gi, myiqhtoi Esai-aq laiká má,

"Haû yoso má, byù rayuq garú tai é hté gi,
'Haû Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuihkung langhkop hkgangmó lé lhoq pyíng ra rà nghut lhê;
bùm eq wingkáng hkgangmó lé hpyit pyám ra rà nghut lhê;
agoí aguq é hkyô hkat hkgangmó lé lhoq nyhâng ra rà nghut lhê;
ahkung ahkop dut é hkyô hkat hkgangmó lé lhoq rhá ra rà nghut lhê.

⁶ Haû hkûn, byù banshoq gi, Garai Gasâng é hkyi yù hkyô lé myàng rà nghut lhê."[☆]

* 3:3 Wui-myhup hkâm gá é gi, baptilma lé gá é nghut lhê. ☆ 3:6 Esai 40:3-5

ga luí, kâ tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù rá ga luí htoq lé lô kôjáng, Yohan tai é gi, "Duq htan é lhangmui amyù pé† è, jé lô rá yubak dam mai wó h pang lut kó sháng gaq ga, nungmoq lé ó yuq tai pún é lhu? ⁸ Myit lhing hkyô eq gingdán é ashi zui keq. 'Nga-nhung gi, Abraham é yhangzo yhangshù pé nghut lhê.† nghù luí, yhumsing é i-myt unghkaù má hkâtai kó. Hkâsu mù gâ le, ngò, nungmoq lé tai kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ⁹ Ahkuí lháng, Garai Gasang gi, Yhâng é wazung lé haù sigâm wang pé má tô to bê nghut ri; haù mù, ge é ashi a zui é agàm hkangmó lé gi, htuq lhêng pyám mù, myi má dú kat pyám rá nghut lhê." gâ ri. [§]

¹⁰ Haù hkûn, shiwa byu pé gi, "Haù nghut le gi, ngamoq hkâsu kut le gè rá lhu?" ga luí, yhang lé myí akò.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tú tai kat ri.

¹² Kang guq bang le, wui-myhup hkâm yù rá ga lé lô mù, "Sarà è, ngamoq gi, hkâsu kut le ge rá lhu?" ga luí, yhang lé myí akò.

¹³ Yhang gi, "Nungmoq hkyui yù rá masat tô é htoq lai shoq hkâyù kó." ga luí, yhangmoq lé tai ri.

¹⁴ Gyezô pé ra-am le, "Ngamoq gi, hkâsu kut le gè rá lhu?" ga luí, yhang lé lé myí akò.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e aphaù eq gé bûn nyi keq." ga luí, yhangmoq lé tai ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haù yuq nghut lhê laq ga yhumsing é i-myt unghkaù má myit wú nyi bum akò. ¹⁶ Haù hkûn, banshoq bang lé Yohan tai é gi, "Ngò gi, nungmoq lé, wui èq za wui-myhup hkâm byí lhê; nghut kôlháng, ngá htoq má wum-o a-tsam je bo é sù rayuq jé lé lô rá nghut lhê. Ngò gi, yhâng é hkyî-tsung tui lé hpyî rá lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi rá nghut lhê. ¹⁷ Yhang gi, loq má byò chung to mù, guq chyârâng má é guq bôm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí eq nyhê hkyô pyám rá nghut lhê." gâ ri. ^{*} ¹⁸ Haù mù, Yohan gi, byù haù bang lé gotú dang myo myo eq lhoq pun lhoq kying mù, gabú danglù lé hko kyô nyi ri.

¹⁹ Nghut kôlháng, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara haù pé htoq agó, Herut dum kut jat yu é mara gi, Yohan lé htóng má lhung kat é nghut ri.

*Yesuq, Wui-myhup Hkâm Yu É Hkyô
Mht 3:13-17; Mrk 1:9-11*

† 3:7 Lhangmui amyù pé gâ é gi, Lukaq 3:7-10 má bo é Hparishe eq Saduke pé lé tai é nghut ri. † 3:8 Nga-nhung gi, Abraham é yhangzo yhangshù pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui rá ga, myit yu é hkyô nghut ri. § 3:9 Bun zo shí lhûm é lichyúm gi, myit a lhing bang lé, Garai Gasang jéyáng é buinyí jé rá nghut lhê ga naù é nghut ri. * 3:17 Haù eq rajung za, Hkrisduq gi, a ge é byu pé eq ge é byu pé lé gam hkoq pyám rá nghut lhê.

²¹ Yohan lé htóng má a lhùng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdúng nyi le, mauhkúng bóng lô mù, ²² haú Chyoiyúng Woi-nyí gi, hpúngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai danghtë htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù lhkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gungláu É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí é ri. ² Haú má, Yesuq gi, buinyi myi xê nyi jé shoq, nat Tsadán èq gungláu é huí ri. Buinyi haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luggok shí lé muk dut nhâng aq." ga luí, Yhang lé tái ri.

⁴ Haú hkún, Yesuq gi, "'Byù gi, muk èq za asak duì rã a nghut.' ga luí, Chyúmdang má kã tô ri." ✧ ga yhang lé tù tái ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mینگan má joq é mingdán pé banshoq lé razup má za tùn shit luí, ⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gã le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlháng, byí rã nghut lhê. ⁷ Haú mù, Nàng, ngo lé noq é nghut jáng, shí pé banshoq Nàng é dut rã nghut lhê." ga, Yesuq lé tái ri.

⁸ Haú hkún, Yesuq gi, "'Haú Yhumsing náng é Garai Gasang lé za, náng noqkuq dojaú rã rã nghut lhê." ✧ ga luí, Chyúmdang má kã tô ri." ga luí, yhang lé tù tái ri.

⁹ Nat Tsadán gi, Yesuq lé Yerusalem và mó má shuí è mù, noqkuq yhum je myhang é shùhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gã le,

'Nang lé upzúng byí nyí rã matú, Garai Gasang gi, Yhâng é maumang lagyô pé lé tái to rã nghut mù,

¹¹ luggok má náng é hkyí a ló htung shoq, yhangmoq é loq èq Nang lé lhom bún yú kó rã nghut lhê." ✧

ga luí, Chyúmdang má kã tô ri." ga tái ri. ¹² Nghut kôlháng, Yesuq gi, "'Haú Yhumsing, nungmoq é Garai Gasang lé, wó chyam wú rã a nghut." ✧ ga luí, Chyúmdang má bo tô ri." ga, yhang lé tù tái ri.

¹³ Nat Tsadán gi, gunglaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Và Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taù lo ri. Haú mau jowò hkangmó má, Yhâng é hkyô lé tái pyo ló bùm bekô.

¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé tái hkya-ôn nyi bum akô.

¹⁶ Hau htâng má, Yhang nyi kô lo é Nazaret và má dum taù jé ló bê; Yhang gi, hkâ-nhám le kut nyi é eq rajung za, Bánno buinyi* lé tarajong má wang é mù, laiká ngap rã ga toq yap é hkún, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsing é Woi-nyí gi, ngá é ahtoq má nyi nyi ri; hkâsu mù gã le, asho awuí é bang lé gabú danglù hkô kyo rã matú, Yhang ngo lé hkyin yú bê.

Htóng lúng bang lé lhoq htoq rã hkyô eq, myoqjit bang lé myoq dum myàng nhâng rã hkyô hkô kyo rã matú le,

zik zo huí é bang lé nhang kat nhâng rã eq,

¹⁹ Yhumsing, Yhâng é byu pé lé hkyi yú rã ahkyíng zanwut lé hkô kyo rã matú le, Yhang, ngo lé nhang kat bê nghut ri." ✧

ga luí, kã tô é jowò lé myang záng mù ngap ri.

✧ **4:4** Tarà Pun 8:3 ✧ **4:8** Tarà Pun 6:13 ✧ **4:11** Hkya-on 91:11-12 ✧ **4:12** Tarà Pun 6:16

* **4:16** Bánno buinyi gã é gi, Yudaq byu pé nòmu é buinyi lé gã lhê. Ahkui lhê é đông ga jáng, Bánno buinyi gi, bat htoq hkyuq nyi lé âng ri. ✧ **4:19** Esai 61:1-2

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong má é byù lhunglhang bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

²² Lhunglhang bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lhu?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.' † gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó rà nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhang, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq má é rayuq chyáng le, Eliyaq lé a nhang kat é za, Sidun mau Zarephta wà má é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng má é rayuq le wó sân-yúng yù kô é a nghut; Suriq byù Naman ga sù tûngbau hpó za sheq wó sân-yúng é nghut lhê." ga taí ri.

²⁸ Tarajong hkaú má é lhunglhang bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq má é gampyoq má, é chyûn hpyit hkyô pyám rà ga shuí e ló akô. ³⁰ Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htâng, Yesuq gi, Galile mau má é Kaperna-um wà má jé ê mù, Bánno buinyi má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaú má mhoqshit byí nyi é hkûn, nat gang wang júng é byù rayuq htê mó o mó èq taí é gi, ³⁴ "Ê, Nazaret wà byù Yesuq é, ngamoq gi, Nàng eq haí sêng lhê lhu? Ngamoq lé lhoq hten rà matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sé lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lhez to mù, a nò nhang é za, yhang chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasù é dang wà nghut lhê lhu? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhum bum akô. ³⁷ Haú hkûn, haú mau má é awui ayâm jowò hkangmó má jàm shoq, Yhâng é hkyô lé taí pyo hù ló bùm bekô nghut ri.

† **4:23** Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tân shit rà nghut lhê." gâ é nghut lhê.

Yesuq Nòhpyo Lhoq Gê Byí É Hkyô
Mht 8:14-17; Mrk 1:29-34

³⁸ Yesuq gi, haù tarajong mai toq ló mù, Simun é yhùm má wang ló ri. Simun é yhang-aumó gi, aì gyai nyé no nyi é nghut mù luí, lhoq gê byí rá matú, Yesuq lé garúm dung byí akô. ³⁹ Yesuq gi, Simun é yhang-aumó nàm má yap to mù, nòhpyo haù lé tân kat jáng, Simun é yhang-aumó gi, ge ló byuq bê; haù hkún jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lunglhang lé, Yesuq chyáng shuí lé lô kômù, yhangmoq rayuq htàng rayuq é ahtoq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut tái mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó tái loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaù é jowò yoso hkaù má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq rá matú châng hkúm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo rá rá ashí, haù é matú, Garai Gasang gi, ngo lé nhang kat bê nghut lhê." ga luí, yhangmoq lé tái ri. ⁴⁴ Haù mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Hui É Chángzô Pé
Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo rá ga, shiwa byu pé, Yhâng chyáng chyín chyap wang lé lô kô é hkún, ² nhông gin-gau yàm má lhai razúm joq tô é lé, Yhang myang kat ri. Ngogún dú bang kúm gi, lhai mai htoq mù, yhangmoq é gùn pé lé chỉ nyi akô. ³ Yesuq gi, Simun é lhai má wàng mù gin-gau mai rachyit lhoq kang nhâng luí, haù lhai htoq má zung to mù, shiwa byu pé lé mhoqshit tái kyô nyi ri.

⁴ Dang ban tái jáng, Yesuq gi, Simun lé, "Wui nik é shut hui luí, ngozo wó kông yù rá matú, nungmoq é gùn pé lé dú hkyô kat keq." ga tái ri.

⁵ Simun gi, "Yhumsing ê, ngamoq amàn ra-myin mau shikut wú kôlhang, haì le a wó; nghut kôlhang, náng dang é yanmai, ngò gùn dú hkyô kat rá nghut lhê." ga tú tái ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló rá su dut é yanmai, ⁷ lhai gó lhum mã é luzúm wui lé, lé garúm yù rá matú loq lik lik kat kôjáng, haù bang lé lô mù, haù lhai í lhum aluq myup ló shoq ngozo lé kat pyíng bekô.

⁸ Simun Petruq gi, haù lé myàng jáng, Yesuq é hkyí wang má hkyihput htuq mù, "Yhumsing ê, ngá chyáng mai ló byuq aq, haì mù gâ le, ngò gi, yubak dap é byù nghut nyi lhê." ga tái ri. ⁹ Haì mù luí gâ le, Simun le, yhang eq nyi tô é lunglhang bang le, haù su ngozo wó yu é yanmai, maú nyi bùm kômù nghut ri. ¹⁰ Simun é luzúm nhik, Zebedi é yhangzo Yakuq eq Yohan le, haù su chôm maú byuq akô.

Hau htàng, Yesuq gi, "Hkâgyuq, ahkuí mai nàng gi, byù lé châng kóng sù dut rá nghut lhê." ga luí, Simun lé tái ri. ¹¹ Yhangmoq gi, wuiyàm má jé jáng, lhai

pé eq yhangmoq é zè banshoq lé tô pyâm to lui, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byî É Hkyô
Mht 8:1-4; Mrk 1:40-45

¹² Radâm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuoq lui, "Yhumsing ê, Nàng dóng é nghut le gi, ngo lé Nàng wô lhoq sân-yúng byi râ nghut lhê." ga dũng wut ri.

¹³ Yesuq gi, loq lhâm kat mù, haú yuq lé é záng lui, "Ngò dóng lhê, sân-yúng aq hkoi." ga tai ri; haú hkũn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlháng, náng é gungdu lé, hkyangjong hpô chyáng ló tũn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé tai hkũm kat ri.

¹⁵ Nghut kôlháng, Yesuq é hkyô gi, je riyháng tai pyo hũ jam ló mù lui, shiwa byù rajũm rayò gi, Yhâng é dang gyo râ matú le, yhangmoq é nõhpyo lhoq gê byo nhâng râ matú le, lé zup míng tô akô. ¹⁶ Yesuq kũm gi, Yháng baú tsik za yoso shut htoq ê mù, kyũ é dung dung kut ri.

Gũngjum Shí Sũ Lé, Yesuq Lhoq Gê Byî É Hkyô
Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkũn, Hparishe pé eq tarâ sará pé le, Yesuq nãm má zung tô akô; haú bang gi, Galile mau wà hkyap hkangmó má é bang eq Yuda mau, Yerusalem wà mó má é bang nghut akô. Yhumsing Garaí é wum-o a-tsam le nõhpyo lhoq gê râ matú Yesuq eq rahá nghut nyi ri. ¹⁸ Haú hkũn, byù ra-am gi, gũngjum shí sũ rayuq lé taphkang mai waq lé lô kômù, haú yuq lé, yhũmhkaú má nyi tô é Yesuq é hí má, wô lheq byi shoq ga hkyô ho nyi akô. ¹⁹ Byù lũm myô chũn chyap to mù, haú nõ sũ lé hká dóng le a wó shuí wàng kôlui, haú yhumhkũng htoq shut waq doq ló mù, haú yuq lé taphkang eq roq, shiwa hpong gung gũng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjáng myit lé byu myàng jáng, "Byù nàng ê! Náng é yubak mara lé hkyut pyám byi bê." ga tai ri.

²¹ Haú hkũn, Hparishe pé eq tarâ sará pé gi, "Shí su ga lui, Garaí Gasang lé rhoi dang tai é sũ gi, ó yuq wá nghut lhê lú? Garaí Gasang za a nghut jáng, yubak mara wô hkyut pyám byi sũ gi, ó yuq wá nghut lhê lú?" ga lui, myit sòn wuí nyi bum akô.

²² Yesuq gi, yhangmoq myit sòn wuí nyi é hkyô lé sé mù, "Nungmoq é i-myt hkaú má, haí mù shí pé lé myit sòn wuí nyi akô lú? ²³ 'Náng é yubak mara lé hkyut pyám byi bê.' nghũ tai râ eq, 'Toq lui, hkyô so aq.' nghũ tai râ má, hká hkun je tai lui lhê lú? ²⁴ Nghut kôlháng, haú Byu Yhangzo* gi, míngkan htoq má, mara hkyut byi râ ahkáng wô Sũ nghut é lé, nungmoq lé sé nhâng nau lhê." ga mù, haú gũngjum shí sũ lé, "Ngò, nàng lé tai bá, toq aq, náng é taphkang yu chũng lui, yhũm taũ ló aq hkoi." ga tai ri. ²⁵ Haú hkũn jáng, yhang gi, yhangmoq é hí má toq yap mù, yhâng é taphkang waq chũng lui, yhâng é yhũm shut Garaí Gasang lé hkyá-on kungtõn uchyang ló byuq bê. ²⁶ Byù banshoq bang gi, gyai maú byuq kômù lui, Garaí Gasang lé hkyá-on

* 5:24 Byu Yhangzo gá é gi, Yesuq Yhânggũng yhang lé le tai é nghut lhê, Mesaia lé le tai é nghut lhê.

kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amú pé lé myàng bê." ga taí nyi akô.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô
Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé è myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú mâ é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poi mó kut byí ri; poi haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng má é tará sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lú?" ga, Yhâng é chángzô pé lé mara hún dang taí akô.

³¹ Yesuq gi, yhangmoq lé, "Wángzán bang chi sará a ra kó, nòhpyo hui bang za sheq ru rà lhê. ³² Ngò gi, dingmán bang lé wut yù rà matú jé lé é a nghut, yubak dap bang myit lhing rà matú sheq jé lé é ru nghut lhê." ga tú taí ri.

Zoshuq Gám Hkyô Eq Séng Luí, Yesuq Tai É Hkyô
Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lú?" ga Yesuq lé taí akô.

³⁴ Yesuq, yhangmoq lé tú taí é gi, "Bíng pé gi, lusik eq rahá nghut nyi to ashí hkún, yhangmoq lé zo shuq wó gám nhâng rà lú?" ³⁵ Nghut kôlhang, lusik† lé yhangmoq chyáng mai shuí yu pyâm é hkyíng jé rà nghut lhê; haú buinyi pé má kúm gi, yhangmoq, zoshuq gám kó rà nghut lhê." gâ ri.

³⁶ Dangtú dông mai le, Yesuq, yhangmoq lé taí é gi, "Mebu sik má é lâng cheq yú mù, mebu xau má hpo é gi, ó a kut wú kó; haú su kut é nghut jáng, mebu sik lé le lâng cheq pyâm é dut mù, pán jap sik le mebu xau eq du lhum rà a nghut. ³⁷ Tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng mù, tsibiyiq wing le yui shun byuq, htung le htên byuq, dut rà nghut lhê. ³⁸ Haú su a dut shoq gi, tsibiyiq wing asik lé, shokuq htung asik má kat ra rà nghut lhê. ³⁹ Tsibiyiq wing axau shuq nyi bê sù gi, asik lé a shuq nau nghut rà; hkâsu mù gâ le, 'Axau sheq je nghâm ri.' ga taí rà." gâ ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô
Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai só laí ló é hkún, Yhâng é chángzô pé gi, kyôshi ratsuí langshap yú mù, loq èq nè hpuq zô akô. ² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akô lú?" ga taí akô.

³ Yesuq gi, yhangmoq lé, "Dawiq lháng gi, yhâng htâng cháng é bang eq rahá zòmut huí é hkún, hkâsu kut é hkyô lé, nungmoq a nghap wú kó lú?" ⁴ Dawiq

† 5:35 Lusik gâ é gi, Yesuq lé taí nau é nghut lhê.

gi, Garai Gasâng é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lúh?" ga tai tai ri. ⁵ Hau htâng, Yhang gi, "Haú Byu Yhangzo gi, haú Bánno buinyi é Yhumsíng nghut lhê." ga yhangmoq lé tai ri.

Loq Jum Shì Sù Lé Yesuq Lhoq Gê Byi É Hkyô

Mht 12:9-14; Mrk 3:1-6

⁶ Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyi má nòhpyo lhoq gê byi râ lúh ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myt lé sé sù nghut luí, loq jum shì sù lé, "Toq mù, banshoq bâng é hí má, yap shit aq." ga tai kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lúh?" ga luí, yhangmoq lé tai ri.

¹⁰ Hau htâng má, yhangmoq banshoq lé lhing wú mù, haú loq jum shì sù lé "Náng é loq nyhang kat aq." ga tai kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri. ¹¹ Nghut kôlháng, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám râ lúh?" ga luí, rayuq eq rayuq tai lhûm nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasâng lé kyûdung nyi ri. ¹³ Maubó jáng Yhâng é chángzô pé lé wut yù mù, yhangmoq chyáng má é raxe í yuq lé hkyin yù luí, lagyo pé ga myhîng to byi ri. ¹⁴ Haú bang gi, Yesuq eq Petruq ga myîng myhîng byi é Simun eq, yhanggu Andre, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wá mó mâ é bang, wuîshuq lung-aû ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyó yù râ eq yhangmoq é nòhpyo lhoq gê nhâng rá matú, rahá za zup míng tô akô. Agè ashop é nat èq zing-ri huí é bang le ge byuq akô. ¹⁹ Yhâng é gùng mai htoq é wum-ó èq byù banshoq lé lhoq gê byi nyi é yanmai shiwa byu pé le Yhang lé wó záng shoq ga, ho nyi akô.

²⁰ Haú hkûn, Yesuq gi, Yhâng é chángzô pé lé wú kat luí tai é gi, "Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuí, zòmút wuîshit huí nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó râ nghut lhê.

* **6:4** Garai Gasâng é yhûm nghu é gi, Yerusalem wá mó má joq é saksé zúm lé gà é nghut lhê. † **6:15** Zelutuq gà é lichyúm gi, yhumsíng zui sai é hkyô má gyai yhang myit lòm shirong é sù lé ga lhê. Haú u lé, Israellaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê. ‡ **6:20** Garai Gasâng é mingdán gà é gi, Garai Gasang up é lé gà lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó rá nghut lhê.

22 Haú Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

23 Haú hkûn lé, gabú byam chyû nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé tai lhê, hkâsu mù gâ le, yhangmoq é íchýí íwa pé le myiqhtoí pé^S lé haú su kut wú bekô."

24 Nghut kôlhâng, sùt wó bang nungmoq gi, dingnyé wó rá, hkâsu mù gâ le, nungmoq gi, yhumsing gùng má nhik shí nhik dik é hkyô lé huí yù bekô.

25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rá, hkâsu mù gâ le, nungmoq zòmut wuìshit é hui kó rá nghut lhê.

Ahkuí, wui nyi é bang nungmoq gi, dingnyé wó rá, hkâsu mù gâ le, iyon yôn é eq ngaubyi ngau-nhap htoq é hui kó rá nghut lhê.

26 Byù banshoq bang, nungmoq lé ge é byù ga kôjáng, nungmoq gi, dingnyé wó rá, hkâsu mù gâ le, yhangmoq é íchýí íwa pé le, myiqhtoí pyoq pé^{*} lé, haú su ga tai wú bekô.

Gye Pé Lé Chyitdap Râ Hkyô

Mht 5:38-48; 7:12

27 Hau htoq agó, ngá dang gyô nyi bang nungmoq lé ngò tai kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq; 28 nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. 29 Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; 30 nang lé rajung jung dúng é sù lé le, byí pyám aq; náng zè yu pyám byí é su chyáng mai le, hkâdung yù lo. 31 Nungmoq ô nau é dông supé lé kut nhâng nau é su, yhangmoq lé le kut byi keq.

32 Nungmoq lé chyitdap é bang lé za chyitdap kô le gi, nungmoq é matú hai akyú bò kó rá lhú? Yubak dap bang le, yhumsing lé chyitdap é bang lé gi, chyitdap nyi akô. 33 Nungmoq lé ge é dông kut nyi é bang lé za, ge é dông kut nyí kô le gi, nungmoq é matú hai akyú bò kó rá lhú? Yubak dap bang le haú su kut nyi akô. 34 Supé lé zè chyí byí le, dum wó tau byi rá su dut é bang lé za, chyí byí le gi, nungmoq é matú hai akyú bò kó rá lhú? Yubak dap bang lháng chyí byí é myhó dum wó yù shoq, yubak dap é bang lé chyí byí akô. 35 Nghut kôlhâng, nungmoq gi, nungmoq é gye pé lé chyitdap mù, ge é dông kut byí nyi keq. Dum wó tau yù rá lé myoq a byu é za, chyí ngho byi keq; haú su kut jáng, nungmoq wó é chyunghuq ko rá eq, Myhang htáng htúm Su é yhangzô pé dut rá nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. 36 Nungmoq é íwa Garai Gasang shogyo nhikmyin sé é su, nungmoq le shogyo nhikmyín nyi keq.

S 6:23 Myiqhtoí pé le zing-ri huí é yanmai, yhangmoq chyunghuq wó nyi akô. Haú eq rajung za, jamjau huí é bang nga-nhúng le chyunghuq wó rá nghut lhê. ***** **6:26** Myiqhtoí pyoq pé gi, Garai Gasang jéyáng é hui rá.

A Jéyáng Râ Hkyô

Mht 7:1-5

³⁷ A jéyáng é za nyi keq; haù jáng, nungmoq le jéyáng é a hui kó râ nghut lhê. A doqđân é za nyi keq; haù jáng, nungmoq le doqđân é a hui kó râ nghut lhê. Mara hkyut byi keq; haù jáng, nungmoq le mara hkyut byi é hui kó râ nghut lhê. ³⁸ Byi keq, haù jáng, nungmoq le dum byi é hui kó râ nghut lhê. Mán é búng mai byíng mui shún shoq nhún chyíng, dún chyíng kat mù, nungmoq é tanghkoí hkaù má lik kat byi é hui kó râ. Hkâsu mù gà le, nungmoq lik byi é bung èq, nungmoq lé dum lik byi râ nghut lhê." gà ri.

³⁹ Hau htoq agó, Yhang dangtú ralhüm dông yhangmoq lé dum tai é gi, "Myoqjit sù gi, myoqjit sù lé hkyô wó tún shit lhê lúh? Yhangnhik í yuq é donghkong má byit gyó kó râ nghut lhê, a nghut kó lúh? ⁴⁰ Jongzo gi, sará htoq gyaù rá a nghut; nghut kôlhang, gúm shoq mhoq yù bê sù ó nghut kôlhang, yhumsing é sará su dut rá nghut lhê.

⁴¹ Yhumsing myoq hkaù má lúng tô é siktúm† lé lhang a myit wú é nhing, hai mù luí, nunggu nungmáng é myoqwàng‡ lé myang lhê lúh? ⁴² Yhumsing é myoq má lúng tô é siktúm lé lhang a myang sù nhing, 'Gumang hpó è, náng myoq má lúng tô é myoqwàng lé, ngò choq pyám byi lé.' nghù luí, náng é gumang hpó lé hkâsu wó tai rá lúh? Gegùn labyoq kut sù è, náng é myoq má lúng tô é siktúm lé hí choq pyám aq. Haù jáng sheq, nunggu nungmáng é myoq má wang tô é myoqwàng lé choq pyám byi rá matú, náng san za myàng rá nghut lhê.

Agàm Eq Ashi

Mht 7:17-20; 12:34-35

⁴³ A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. ⁴⁴ Haù mù luí, shigâm hkangmó lé, zuí é ashi lé wú mù wó sè hkyin yu lhê. Dangké, zubyap mai maihpáng-shi ó le a myang hpoyoq yù wú, zuyóm mai le tsibiyiq shi a wó hpoyoq yu wú. ⁴⁵ Ge é sù gi, yhumsing é i-myyit unghkaù mã é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myyit unghkaù mã é agè ashop é sutdò mai, agè ashop é zè pé lé lhoq htoq shit lhê. Hai mù gà le, yhâng é i-myyit unghkaù mã byíng mui tô é lé za, yhâng é nhut mai tai htoq lo é nghut lhê.

Luqhtân Htoq Má Yhüm Saí Sù Eq Myi Chín Dum Má Yhüm Saí Su É Hkyô

Mht 7:24-27

⁴⁶ Ngò tai é eq rajung za lhang a wó châng kut kô é nhing, hai mù luí, nungmoq Ngo lé 'Yhumsing é, Yhumsing é.' nghu nyi akó lúh? ⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkâsú é sù eq wuí é lé ngò nungmoq lé shit kyo kôle. ⁴⁸ Haù yuq gi, wahpang yhüm sai le, nik nik du luí a dui é lunghtân htoq má apûn awang hi é sù eq wuí lhê. Wui jê lò luí wuibaù pè èq yhüm haù lé lo gùn kôlhang, gíng gíng tíng tíng sai to bê nghut luí, haù lé a wó gun nhún. ⁴⁹ Ngá dang gyô yù mù, a châng sù gi, apûn awang a sai é za myi chín dum má wahpang yhüm sai sù eq wuí nyi ri. Wuibaù pè èq yhüm haù lé lo gun kat é eq, haù hkûn jáng, lêng gyop byuq ri. Yhüm haù byoq hten byuq é gi, yù whuí a bò loshoq dut byuq rá nghut lhê." gà ri.

† 6:41 Siktúm nghu e gi, yubak mara kó é lé tai lhê. ‡ 6:41 Myoqwàng nghu e gi, yubak mara atiq azo lé tai é nghut lhê.

7

Romaq Gyezau Rayuq É Lumjǐng Myit
Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haú hkún, Romaq gyezau rayuq é chyitdap dui-nhâng zoshâng gi, shí-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi rá matú, Yesuq lé é ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyáng jé é kô é hkún, "Yhang gi, nàng shí hkyô kut byi rá matú gingdán é sù, nhang nghut nyi ri; ⁵ hkâsu mù gâ le, yhang gi, nga-nhông amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhùm eq hká hé a wê é má jé jáng, Romaq gyezau hpó, yhâng é luzúm wuí lé tái nhang kat é gi, "Yhumsing Yesuq ê, nàng gùng lé hkálhoq hkyik lo. Nàng, ngá é laishîn-htâng má, lé nang rá lháng ngò má a gingdán. ⁷ Haú mù, ngò, nàng chyáng jé lé rá matú gingdán é sù a nghut; Nàng, dang rahkun za tái kat laq, haú hkún, ngá é dui-nhâng zoshâng ge ló rá nghut lhê. ⁸ Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jún lé le, 'Shí kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé tái kôlé, Israelaq amyû má lháng, shí í lumjǐng é sù lé, Ngò a myang wú." ga tái ri. ¹⁰ Nhang kat é bang yhùm má dum taú jé jáng, no nyi é dui-nhâng zoshâng gi, ge to lánq é lé ló myang akô.

Shí Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. ¹² Haú wà wàng hkum má jé lo é hkún lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byù myo myo le, chuimó myhí haú eq rahá châng lé lo akô. ¹³ Yhumsing gi, haú chuimó myhí lé myàng jáng, yhang lé wú shogyo luí, "Hkâ-ngaú." ga tái ri.

¹⁴ Yesuq gi, gung shut huí é mù, loq èq é záng kat ri. Haú hkún, waq tô é bang le jáng yap to býi akô. Yhang gi, "Zorâm ê, ngò, nang lé tái lhê, toq aq." ga tái ri. ¹⁵ Haú hkún, shí bê sù gi, toq zúng mù dang tái lo ri. Yesuq gi, zorâm haú lé yhângnú chyáng dum ap býi ri.

¹⁶ Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhông chyáng lé pô htoq bê nghut ri. Garai Gasang gi, Yhâng é amyû lé garúm rá ga lé kùm wú nyi ri." ga tái nyi akô. ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má tái pyo myhîn ló bum akô.

Yesuq Eq Wui-myhup Sará Yohan É Hkyô
Mht 11:1-19

¹⁸ Haú hkún, wui-myhup sará Yohan é chángzô pé gi, haú hkyô banshoq yhang lé lo tái kyô akô. ¹⁹ Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, "Nàng gi, haú jé lé lô rá Sù nghut lhê

lhu? Haú a nghut jáng, ngamoq, góyuq lé láng ra shirâ lhu?" ga, myí nhang kat ri.

²⁰ Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lhu? Haú a nghut jáng, ngamoq góyuq lé myoqbyu láng nyí ra shirâ lhu?" ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huí é bang eq agê ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²² Haú hkún, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keg; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htàng má, Yesuq gi, Yohan eq séng luí, byù moq mó lé taí é gi, "Nungmoq gi, hai lé hpuq wú râ matú, haú yoso shut e akô lhu? Lai èq hik nhùn é jangâm lé wú râ matú nghut akô lhu? ²⁵ Haú a nghut jáng, hai lé wú râ matú e akô lhu? Nú-nhâm é mebu wut sù lé wú râ matú e akô lhu? A nghut! Wú keg, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶ Haú nghut le gi, hai lé wú râ matú é kô é lhu? Myiqhtoi rayuq lé lhu? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat rá nghut lhê.'*

gâ ri. ²⁸ Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyú lunglhang bang eq kang guq bang gi, dang haú pé lé wó gyo kôjáng, Yohan byí é baptisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byí é baptisma a hkam yù kômù luí, Garai Gasang hen lajang é hkyô lé yhumsgung é matú he-ngik pyâm akô.

³¹ Yesuq dum taí é gi, "Haú mù luí, byù myú shí lé, Ngò, hai èq taí kê wú râ lhu? Yhangmoq hai eq wuí akô lhu? ³² Yhangmoq gi, 'Nungmoq é matú, ngamoq sampyí mut byi kôlháng, nungmoq gi, a gó kó, ngamoq ngaù hkyangsâng kôlháng, nungmoq gi, a ngaù kó.'

ga luí, gài pé má zùng uchyang rayuq eq rayuq wut taí lhùm nyi é zoshâng wui eq wuí akô. ³³ Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le, 'Yhang gi, nat gang dap sù nghut ri.' ga luí, nungmoq taí akô. ³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. ³⁵ Nghut kôlháng, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkâm byí nyi akô."* gâ ri.

Yubak Dap É Myiwe Rayuq, Yesuq Lé Xù But Byí É Hkyô

* 7:27 Mal 3:1 * 7:35 Nghut kôlháng, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkâm nyi akô.

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri. ³⁷ Haú hkún, wú keq, haú wâ mã é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xú bo é luq hpyú bông yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyí èq záng lhoq teq byi jáng, úxam èq but sut pyám byí ri. Dum nghut jáng, nhut èq puq luí mura lé but byí ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htùng é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luí, yhâng é unghkaú má myit nyi ri.

⁴⁰ Yesuq gi, "Simun ê, Ngò, nang lé tái rá rajung joq ri." ga tái ri.

Simun le, "Sarâ ê, tái aq." ga tái kat ri.

⁴¹ Haú hkún, Yesuq gi, "Ngùn chyí zo sù rayuq chyáng, chyín dap é byú í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín xap rá ngùn a wó kôluí, chyín yhumsing gi, yhangnhik lé xap a ra lò gâ pyám ri. Haú mù luí, haú nhik mã é hkâ yuq gi, yhang lé je chyitdap rá lhú?" ga myí ri.

⁴³ Simun gi, "Je myo lhoq lhut hui sù, nghut rá su ngam ri." ga tũ tái ri.

Yesuq gi, "Nàng myit e dông jô ri." ga tái ri.

⁴⁴ Haú hkún, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhùm má wang le, hkyí chi rá uchyam, nàng a byi, yhang kúm gi, ngaubyí èq ngá hkyí lé tik byi luí, yhâng é xam èq sut pyám byi bê. ⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhkaú má wang é mai ngá hkyí má a no loshoq puq nyi rá. ⁴⁶ Nàng gi, ngá ulhum má xú a but byí wú, yhang kúm gi, ngá é hkyí má nàm ngón é mura but byi bê nghut ri. ⁴⁷ Haú su mù, ngò, nàng lé tái lé, haú myiwe gi, je chyitdap luí, yhang wó é yubak myo myo lé hkyut pyám byí é hui bê. Shau za mara hkyut pyám byí é hui sù gi, shau za chyitdap sù nghut ri." ga tái ri.

⁴⁸ Yesuq gi, myiwe haú lé le, "Ngò, náng é yubak mara hkyut pyám byi bê." ga tái ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akò.

⁵⁰ Yesuq gi, "Náng é lumjing myit èq nang lé hkyi yù bê, ngón za ló aq hkoi." ga luí, myiwe haú lé tái kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé tái kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mã é Mariq le. ³ Herut é ikun zum sù Kuza é yhumsing myí Yoanaq le, Susannaq le, gotú myiwe wui myo myo le, Yesuq eq rahá nghut akò. Haú bang gi, yhumsing wó du é í Yesuq eq lagyo pé lé byi zo byi huq nyi akò.

† 7:41 Denari rachat gi, ra-nyí lhê é byú rayuq é zuihpau eq wuí ri.

*Kyôshi Sân É Hkyô**Mht 13:1-23; Mrk 4:1-20*

⁴ Wà hksång wà mó mà é bang gi, Yesuq chyáng zup zing lé lo bùm kômù shiwa byu moq mó zup ming tô é hkûn, Yesuq dangtú dông tai kyô é gi, ⁵ "Kyô hkyô sù rayuq gi, kyôshi san rã ga htoq e lô ri. Yhang, kyôshi sân kat é hkûn, ra-am gi, hkyô má gyó ang mù, byu èq zàng nãng pyeq pyâm lê, maulat nghoq pè èq hte zo pyâm lê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zuyóm hkaú má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôhång, ra-am gi, myìhpún bo é jang má gyó ang mù, yuq kô lò jång, rashò tú myô jat lo ri." ga tai ri.

Yhang haú su ga tai nyi é hkûn, "Gyô yù rã nohkyap dap sù gi, gyô yù sháng gaq!" ga le, htê mò èq tai kat ri.

⁹ Haú hkûn, Yhâng é chángzô pé gi, dangtú shi hai lichyúm nghut lê lúhú ga, Yhang lé myì akô. ¹⁰ Yhang gi, "Garai Gasâng é mingdán eq sêng é sê gyo wuí é hkyô pé lé sê gyo rã ahko ahkáng, nungmoq lé byi to bê. Nghut kôhång, góbång matú gi,

'Wú to kôhång, a myàng kó sháng,
gyô nyi kôhång, a sê gyo kó sháng.'^{*}
nghú, ngò dangtú dông tai lê.

¹¹ Ahkui lê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lê. ¹² Hkyô má gyó âng é kyôshi gi, haí eq wuí lê lúhú gâ le, haú mungdang lé byu pé wó gyô é htâng má, lumjìng é má le, hkyi yu é má le, a jé kó sháng gaq ga luí, yhangmoq é i-myit hkaú mai nat Tsadán eq mungdang haú lé, lé yu pyâm é hui bang eq wuí lê. ¹³ Luqgok yò pé má gyó âng é kyôshi gi, haí eq wuí lê lúhú gâ le, haú mungdang lé wó gyo jång, gabú myit èq hap yù kôhång, amyit a wó chin mù, rayoq rabun za lumjìng luí, gunglau huí é nyi má, dum htak lô byuq é bang eq wuí lê. ¹⁴ Zuyóm má gyó âng é kyôshi gi, haí eq wuí lê lúhú gâ le, haú mungdang lé gyô yù luí, yhumsing é asak dui e lô é hkyô má, shí ipyat lê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wuí lê. ¹⁵ Hpún bo é myigùng má gyô é kyôshi kúm gi, haí eq wuí lê lúhú gâ le, haú mungdang lé lhumzui luí ge é i-myit èq ban gyô yù mù, ging tìng shoq zuí zing luí, wó jân é i-myit èq ashi zuí é bang eq wuí lê.

*Myibung Htùn É Hkyô**Mrk 4:21-25*

¹⁶ Myibung lé tap mù, aú èq nghop tô é le, yhupchong ô má tô tô é le, ó a kut wú kó. Nghut kôhång, wang lé lô bang myoq wó myâng rã matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zau tô é zè le haí a joq nghut ri. ¹⁸ Haú mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirã, a wó su chyáng mai kúm gi, yhang wó to bûn é má é lé lhang, yu pyám byi shirã nghut lê." ga tai ri.

*Yesuq É Yhângnu Eq Yhanggu Pé**Mht 12:46-50; Mrk 3:31-35*

¹⁹ Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang é kó nghut

ri. ²⁰ Haú hkùn, Yhang lé, "Náng nu eq nunggu pé gi, nang lé hui naú luí, shinggan má láng yap bum akò." ga tai kyo akò.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gũ pé nghut akò." ga luí, yhangmoq lé tũ tai kat ri.

Laidun Mó Lé Yesuq Lhoq Zim É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga tai luí, lhai má wàng mù gũ dap e ló akò. ²³ Yhangmoq gũ dap e ló é hkùn lé, Yesuq gi, yhup myhí tó ri. Haú u lé, nhông haú má laidun mó lò luí, lhai má wui byíng lô mù, yhangmoq myup shí rã su dut lò nyi bekò nghut ri.

²⁴ Haú mù, yhangmoq gi, Yesuq chyáng hui é luí, Yhang lé nhaú pun mù, "Yhumsíng ê, Yhumsíng ê, nga-nhúng myup ló nyi ri." ga tai akò.

Haú hkùn, Yhang toq luí, laidun eq wuilhêng pé lé tân kat jáng, haú pé gi, zim za dut ló byuq bê. ²⁵ Haú mù, Yesuq gi, "Nungmoq é lumjúng myit gi, hkámá nghut akò lúhú?" ga luí, yhangmoq lé myí ri.

Yhangmoq kúm gi, gyuq máu byuq bùm kôluí, "Shí yuq gi, hkasú é byù nghut lhê lhê? Yhang hkunmó hkyó jáng, lai eq wuilhêng pé lhang gyo byi ri-nhung!" ga luí, rayuq eq rayuq myi lhum bum akò nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶ Hau htáng, yhangmoq gi, Galile mau tũ tap mâ é Gerase byu pé é mau má jé dap e ló bekò. ²⁷ Yesuq kong shut doq ló le, haú wã mã é nat gang dap é sũ rayuq gi, Yhang lé hui ri. Haú yuq gi, yhũm má le a nyi é za, mebu a dap é, lupdùng má myáng myáng nyi nyi sũ nghut ri. ²⁸ Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htáng é Garai Yhangzo Yesuq é, Nang gi, ngò eq haí séng lhê lúhú? Ngo lé a zing-ri rã matú, ngò nang lé dùng nyi lhê." ga luí, hté mó eq tai garú nyi ri. ²⁹ Hkãsu mù gã le, Yesuq gi, agè ashop é nat lé haú yuq gùng mai htoq ló rã matú, tân pyâm é yanmai nghut ri. Byù haú yuq lé nat gâng eq adãm dãm wang júng hkanqmó, loq eq hkyí má tojáng tui eq tui shung, kyum xâng tó é eq, zúng tó é nghut kôlhang, láng hpyit pyám pyám kut é htoq ago, nat gâng eq yhang lé yoso hkaú shut lãngmhap yù yù kut nyi ri.

³⁰ Yesuq gi, yhang lé, "Náng myíng haí gã lhê?" ga myí kat é hkùn, yhang gi, "Legio* gã lhê." ga tũ tai ri. Haí mù gã le, yhâng chyáng nat gang myo myo wang lúng tó é yanmai nghut ri. ³¹ Nat jùm gi, yhangmoq lé nik dik htũm é Lasang-dong shut a kôn kat rã matú, Yesuq lé chôm dùng nyi bum akò.

³² Haú u lé, waq rajùm mó gi, bùm yãm má dù bù zô nyi bum akò nghut ri. Haú mù, yhangmoq gi, waq pé chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pé chyáng wàng byuq bekò nghut ri. Haú hkùn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekò nghut ri.

³⁴ Waq zúng bang gi, haú su dut é lé myàng jáng, hpang din ló kômù, myuq hkaú mã é bang eq awui ayãm mã é bang lé ló tai kyô akò nghut ri. ³⁵ Haú mù, wó gyô é bang gi, haú hkyô lé wú rã matú htoq lé lo akò. Yhangmoq gi,

* 8:30 Legio gã é lichyùm gi, gyezo 4000 eq 6000 gyoro bo é gyped lé tai ri.

Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luí, byù gè rayuq su zùng to láng é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luí lhoq ge yu é hkyô lé myang é bang gi, gôbang lé tai kyô akô nghut ri. ³⁷ Haú hkûn, Gerase byu pé é mau má é lunglhang bang gi, gyuq dan dik kôluí, Yesuq lé yhangmoq é mau mai htoq lô byuq râ matú, chòm dúng tôngbán akô. Haú mù luí, Yesuq gi, taú lô byuq râ matú lhai má wàng bê nghut ri.

³⁸ Nat htoq byuq hui é sù gi, Yesuq htâng cháng râ matú, Yesuq lé dúng tôngbán ri. ³⁹ Nghut kôlhang, Yesuq gi, "Nàng, yhùm shut sheq lô mù, Garai Gasang, nang lé hkâ-í kut byi bê hkyô lé, lô tai kyo aq." ga luí, yhang lé lô nhâng bê nghut ri. Haú hkûn, yhang htoq lô mù, Yesuq yhang lé hkâ-í kut byi bê hkyô lé, haú wà rawà bang lé lô tai kyô ri.

Ya-iruaq É Yhangzo Byizo É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò râ lé láng nyí kô é nghut mù, Yhang dum taú gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuaq luí, yhang yhùm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi lô nyi é yanmai nghut ri.

Haú mù, Yesuq cháng e lolé, shiwa byu pé gi, Yhang lé záng htung lo bum akô. ⁴³ Haú u lé, raxe í zân sui yui luí ngunzè lunglhang ban pyám shoq chi sará pé chyáng yâ wú kôlhang, hká yuq le a wó yâ gè byi é† myiwe myhi rayuq le haú hkaú má bo tò ri. ⁴⁴ Myiwe haú gi, Yesuq é nunghtáng má huí lé mù, Yhang é bushi htâng má é záng kat eq, sui yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhu?" ga luí myi jáng, lunglhang bang gi, a sé ga he nyi bùm kô é hkûn lé, Petruq gi, "Yhumsing é, shiwa byu pé gi, nang é lhinghkyuq mai nang chyáng chyin chyap wang lo bùm kô é yanmai, nang lé záng bekô râ nghut lhè?" ga tai ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq lolé lé, ngò châng sé kat ri." ga tai ri.

⁴⁷ Haú jáng, myiwe myhi haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luí, hai mù Yhang lé záng é hkyô eq, hká dông ge lolé byuq é hkyô pé lé, shiwa byu banshoq bâng é hí má Yesuq lé tai kyô nyi ri. ⁴⁸ Yesuq gi, "Ngá zo ê, nang é lumjing myit gi, nang lé lhoq gè byi bê nghut ri, ngón za lolé aq hkoi!" ga luí, myiwe haú lé tai kat ri.

⁴⁹ Yesuq gi, dang ru tai nyi ashí hkûn, tarajong má up sù Ya-iruaq é yhùm mai byù rayuq jé lé lolé luí, "Nung zo gi, shi byuq bê, haú sará lé hkâlhoq hkyik nyi lo." ga luí, Ya-iruaq lé tai kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjing aq, haú jáng, yhang ge byuq râ nghut lhè." ga luí, Ya-iruaq lé tai ri.

⁵¹ Yesuq gi, Ya-iruaq é yhùm má jé é hkûn lé, Petruq, Yohan, Yakuq, eq haú myiwe zô é yhangnu eq yhangwa mai lai luí, yhùm haú má, ó lé le a wàng nhâng

† **8:43** Ngunzè lunglhang ban pyám shoq chi sará pé chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhè; ra-am má gi, a bò.

kut ri. ⁵² Haú u lé, lhunglhang bang zoshang hau é yanmai, ngaubiyi ngau-nhap eq yón nyi akô. Yesuq kúm gi, "Hkâ-ngaú kó, yang shi byuq é a nghut, yhap myhí tô é sheq ru nghut lhê." ga luí, yangmoq lé taí ri.

⁵³ Zoshang gi, shi byuq bê lé yangmoq sé kôluí, yangmoq gi, Yesuq lé wuizui kut pyám byí akô. ⁵⁴ Yang kúm gi, myiwe zo hau é loq má zuí to mù, "Zoshang ê, toq aq." ga taí kat ri. ⁵⁵ Haú mù luí, yhang woi-nyí dum taí wàng mù, haú hkûn jang toq yap ri. Haú jang, Yesuq gi, zoshang haú lé zôjung byi keq, ga yangmoq lé taí kat ri. ⁵⁶ Haú myiwe zô é yhangnu eq yhangwa nhik gi, gyai maú byuq akô. Nghut kôhang, Yesuq gi, haú dut é hkyô ó lé le a taí kyo rá matú, yangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

¹ Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám rá matú eq, noli nojang wó lhoq gè rá matú, yangmoq lé wum-o a-tsam eq ahko ahkáng byí ri. ² Hau htang má, Garai Gasang é mingdán hkyô hko kyo rá eq, nôhpyo lhoq gè byi rá matú nhang htoq kat ri. ³ Yesuq gi, yangmoq lé, "Hkyowui é matú, dumbáng, etap, zoshuq, ngùn eq, bu htai lhang hkâwûn hkâchûng kó. ⁴ Nungmoq hká yhûm má wàng kôhang, haú wá mai dum htoq lô é buinyí jé shoq, haú yhûm má za nyi nyi keq. ⁵ Nungmoq lé a lhom hap yu é bang lé gi, yangmoq é wá mai htoq lô é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yangmoq é myoq hí má ko hkyô pyám to keq." ga taí kat ri. ⁶ Haú mù, yangmoq gi, htoq e lô luí, wá hkanq wá mó má haú gabú danglù hko kyo uchyang, hká jé hkâmá nôhpyo lhoq gè byi wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yù luí myit wuí nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhang bê, nghut kôhang, shí í wá taí byông bùm kô é gi, ó wá nghut lhê lú?" ga luí, Yesuq lé myang shoq ga ho nyi ri.

Byù Ngo Hkying Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taù lo é hkûn, yangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yangmoq lé shuí chûng mù, Bet-saida gâ é wá mó shut tsik za e lô byuq ri. ¹¹ Shiwa byu pé gi, haú hkyô lé châng sé kômù, Yhang htang châng e lô akô. Yesuq le yangmoq lé lhom hap yù mù, Garai Gasang é mingdán hkyô lé taí kyo luí, nôhpyo gè naù bang lé, lhoq gè byí ri.

¹² Buigyùm zó má, lagyo raxe í yuq gi, Yhang chyáng huí é mù, "Haú shiwa byu pé lé, awui ayám má é yhûm pé eq wá pé má lô mù, zoshuq hô zo luí lô yhap kó sháng gaq, lô nhang aq. Hkâsu mù gâ le, ahkuí nga-nhûng gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yangmoq lé rajung jung byi tso keq." ga tú taí ri.

Yhangmoq gi, "Shí myhô bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai lui, hai le a wó nghut ri." ga tai akô. (Hkâsu mù gà le, yuqgè wui baú láng ngo hkyíng kô nghut ri.)

¹⁴ Nghut kôhang, Yesuq gi, "Shí bang lé rahpúng má ngo xê xê kô kut lui, zùng nhang to keq." ga lui, Yhâng e chángzô pé lé tai ri. ¹⁵ Yhangmoq lé Yesuq tai é eq rajung za, banshoq bang lé zùng nhang to bekô. ¹⁶ Háu hkún, Yesuq gi, háu muk ngo long eq ngozo í du lé yù mù, mauhkúng shut tu wú to lui, jeju ban hky-a-on jáng, háu lé ajap jap hpé lui, shiwa byu pé lé, châng to byi rá matú, Yhâng é chángzô pé lé byi kat ri. ¹⁷ Háu hkún, yhangmoq banshoq bang zô gyí bùm kô é htâng má, háu chángzô pé gi, zô myhit tô é pé lé, raxe í mung bying shoq wó guq tsing yu ashí kô nghut ri.

Yesuq Gi, Hkrisduq Nghut Lê Ga Petruq Tai É Hkyô

Mht 16:13-28; Mrk 8:27—9:1

¹⁸ Radâm lé, Yesuq gi, Yhang baú kyûdùng nyi é hkún, chángzô pé le, Yhang eq rahá nghut akô. Háu htâng, Yhang gi, yhangmoq lé, "Shiwa byu pé gi, ngo lé ó yuq nghut lê ga, tai akô lúhú?" ga myi ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lê é myiqhtoi rayuq yuq dum dui toq lo é nghut ri ga, tai akô." ga lui, yhangmoq tú tai akô.

²⁰ Dum, Yhang gi, yhangmoq lé, "Nghut kôhang, nungmoq gi, ngo lé ó yuq nghut lê nghu akô lúhú?" ga myi ri.

Háu hkún, Petruq gi, "Nàng gi, Garai Gasang nhâng byí é Hkrisduq nghut ri." ga tú tai ri.

²¹ Shí hkyô ó lé le a tai kyo sháng gaq ga, Yesuq, yhangmoq lé tai hkúm pyâm ri. ²² Háu mù, Yhang gi, "Háu Byu Yhangzo gi, zing-rí é myo myo hui zo lui, suwún wui, hkyangjong agyi pé, tarâ sará pé eq he-ngik pyâm é hui mù, sat pyâm é hui ra rá nghut lê, hau htâng sum nyi nghu rá buinyi má, hoq toq yu é hui rá nghut lê." ga tai ri.

²³ Háu htâng, banshoq bang lé Yhang dum xoq tai é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, nyí wui yhumsing é tapzìng lé waq chùng* lui, cháng ra rá nghut lê. ²⁴ Hkâsu mù gà le, yhumsing é asak lé hkyi yù naú sù ó yuq nghut kôle, asak sum rá nghut lê; nghut kôhang, Ngá é yanmai, yhumsing é asak sum pyâm é sù kúm gi, asak hkyi yu é hui rá nghut lê. ²⁵ Byù gi, mingkan gón lé wó sing to kôhang, yhumsing é asak woi-nyí sùm byuq é nghut le gi, yhang é matú, hai akyú bò rá lúhú? ²⁶ Ngò eq Ngá é dang lé, lhom hap yù rá lé hoq é sù ó yuq lé le, háu Byu Yhangzo gi, yhumsing é hpungwup shinggang eq, Yhâng Wá é hpungwup shinggang, háu choyiyúng maumang lagyô pê é hpungwup shingkâng eq jé lé é hkún, hoq pyâm rá nghut lê. ²⁷ Ngò, nungmoq lé teng za tai kôlé, shi má yap tô é bang ra-am gi, Garai Gasâng é mingdán lé a myang é za shí kó rá a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang háu tai é htâng, shit nyí kô nghut jáng, Yhang gi, kyûdùng rá ga Petruq, Yohan, Yakuq pé lé shuí chùng mù, bùm shut doq ló ri. ²⁹ Kyû dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq

* 9:23 Tapzìng lé waq chùng nghu é gi, Yesuq é yanmai jamjau hui é lé tai é nghut lê.

bang lo ri. ³⁰ Haú hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dáng nyo lhùm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é đông mai dik lò rà nghut é hkyô lé tai lhùm nyi akô. ³² Petruq eq yhâng luzúm nhik gi, yhup myit nyi akô; nghut kôlhang, yhangmoq bûn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô. ³³ Haú nhik Yesuq chyáng mai gâng lô nyi é hkûn, Petruq gi, Yesuq lé, "Yhumsing ê, shí jowò mà nga-nhúng nyi le ge ri, haú mù, Náng é matú ralhùm, Mosheq é matú ralhùm, Eliyaq é matú ralhùm kut, ngamoq lé, zúm sùm lhum saí nhâng laq." ga tai kat kôlhang, yhang hai tai nyi é lé, yhang a sé.

³⁴ Petruq dang tai nyi ashí hkûn lé, mhut jé mù, yhangmoq lé htup zing lo nyi ri. Mhut haú htup lo nyi é yanmai, yhangmoq gi, gyuq byuq akô. ³⁵ Haú mhut hkaú mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê haú zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yuq má, ó lé le a tai kyô é zim za nyi byuq akô.

Nat Gang Dap É Yuqè Zo Rayuq Lé Lhoq Gê Byi É Hkyô
Mht 17:14-18; Mrk 9:14-27

³⁷ Hau htâng nyi, yhangmoq bùm haú mai gyó lô kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mà é byù rayuq wut garú htoq lô é gi, ³⁹ "Sarà é, wú aq, ngá é zo te yuq zo gi, nat wang júng mù dàn so dàn loq garú lo lhê, guttsú gi, agut gut dut shoq langtân nhang lo lhê kut mù, nat gi, yhang lé gyai myáng shoq zing-rí yù yù kut nyi ri. ⁴⁰ Nat haú lé hkat pyám byi kó laq nghu luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haú mù, ngá zo lé lhoq gê byi rá matú, ngò gi, nang lé gyai myit lum é eq dúng kat lhê." gâ ri.

⁴¹ Haú mù luí, Yesuq gi, "Lumjing myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi rá lhu? Nung zo lé, shí shut shuí lé lô aq." ga tù tai ri.

⁴² Zoshâng haú, lé lo nyi le lháng, nat gang gi, yhang lé lhoq lhêng to mù langtân nhang ashí. Yesuq kúm gi, haú agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byi ri. ⁴³ Nyi mi-nyì gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haú lé maú nyi bùm kô le, Yesuq gi, ⁴⁴ "Haú Byu Yhangzo gi, byu pé é loq má ap pyám é hui zo rá nghut lhê. Dang shí hkun lé nungmoq é no má rago gyô wun to keq." ga luí, chángzô pé lé tai ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haú gi, yhangmoq é matú a sê gyo sháng gaq ga luí, nghop tô ashí yanmai nghut ri. Dang hau é lichyúm lé, Yesuq chyáng yhangmoq a wám nyi kó nghut ri.

Ó Yuq Gi, Kô Dik Sù Nghut Rá Lhú?
Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sù nghut lhê lhu ga, rayuq eq rayuq tai myíng myô lhùm nyi akô. ⁴⁷ Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸ "Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haú Ngo lé nhang kat é Sù lé hap yu é le nghut lhê. Haú mù luí, nungmoq banshoq má, je tiq sù gi, je kô sù nghut lhê." ga luí, yhangmoq lé tai ri.

⁴⁹ Haú hkûn, Yohan gi, "Yhumsîng ê, Náng é myîng láng luí, nat gâng pé lé hkat pyám byí wún é byù rayuq lé, ngamoq myang ri. Yhang gi, ngamoq chyáng a lôm sù nghut é yanmai, yhang lé ngamoq hkûm pyám é nghut lhê." ga tai ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkûng shut shuí toq yú rá buinyi chyâng lò bê nghut mù, Yerusalem wà mó shut ê rá lé myit hpyit to luí, Yhâng é hí má lagyo nhang kat ri. ⁵² Lagyo haú bang gi, Yhâng matú rá é hkyô lajang láng rá ga, Samariq wà rawà má wang ló akô. ⁵³ Nghut kôlhâng, Yesuq gi, Yerusalem wà mó shut lai e ló é sù nghut é yanmai, haú wâ bang gi, Yhang lé a lhom hap yú kó. ⁵⁴ Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám rá matú, ngá-nhik mauhkûng mai myi wut hkyô le, a gè lhu?" ga luí, Yesuq lé myí akô. ⁵⁵ Yhang kúm gi, lhing wú luí yhangnhik lé, tân pyâm ri, ⁵⁶ haú mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng rá." ga luí, Yesuq lé tai ri.

⁵⁸ Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhâng, haú Byu Yhangzo gi, ulhum to jang lháng a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haú yuq gi, "Yhumsîng ê, ngá wa lé, ló yhûm pyám rá ahkáng hí byi shi laq." ga tai ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhûm lhum kó sháng gaq; nghut kôlhâng, nàng gi, Garai Gasâng é mingdán hkyô lé, ê hko kyo aq." ga tai ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng rá, nghut kôlhâng, ngá yhumbyù lé hí hkyang ló shit to rá ahkáng byi shi laq." ga tai ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhâng, Garai Gasâng é mingdán eq a gingdán." ga luí, yhang lé tai ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotù chángzô pé nyhit xê yuq* lé hkyin yù mù, Yhang e ló rá wà eq jowò hkangmó shut í yuq razúm zúm kut luí, Yhâng é hí má ê nhang kat ri. ² Yesuq gi, yhangmoq lé, "Kyô† shù yù rá myo shoq joq kôlhâng, mù zui rá byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi rá matú, dung keq. ³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq

† **9:60** Shí bê bang gâ é gi, woi-nyí má shi to bang lé gâ lhê. * **10:1** Chyúmdang ra-am má gi, chángzô nyhit xê í yuq ga le kâ tô ri. † **10:2** Kyô nghù é gi, Yesuq lé lumjínng nau kôlhâng tai kyo rá bang a nyi luí láng tô é bang nghut ri. ‡ **10:2** Kyô shu byù nghu é gi, Yesuq é hkyô gabú danglù lé tai kyo bang nghut ri.

lé nhang kat é nghut lhê. ⁴ Ngùn htùng eq, etap, hkyî-tsung pé hkâyü chung kó, hkyô má ó lé le hkâshichyên kùn nyi kó.

⁵ Nungmoq gi, hká yhùm má wàng e ló kô le, 'Shi yhùm nguingón nyi sháng gaq.' nghu luí, hí taí keq. ⁶ Haú yhùm má nguingón hkyô eq gíngdán sù nyi é nghut le gi, nguingón hkyô haú gi, haú yuq é ahtoq má joq to rá nghut lhê. Haú a nghut jáng, nguingón hkyô haú gi, nungmoq chyáng dum taú lo byuq rá nghut lhê. ⁷ Haú yhùm má nyi to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yú gíng lhê; haú mù, nungmoq rayhum htâng rayhùm hkâhtot nyi wún kó.

⁸ Nungmoq hká wá má wang ló kôlháng, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq. ⁹ Haú má é nò bang lé lhoq gê byi mù, 'Garai Gasâng é mingdán gi, nungmoq eq chyáng lò bê nghut ri.' nghu luí, yhangmoq lé taí kyo keq. ¹⁰ Nghut kôlháng, nungmoq hká wá má wang ló kô le, yhangmoq a lhom hap yu é nghut le gi, haú wá má é hkyô mó má htoq ê mù, ¹¹ 'Ngamoq é hkyî má dap tô é nungmoq wá má é hpuilhaú lháng, nungmoq lé hkyang pù tsò nyi rá matú ngamoq kô hkyô pyâm to byi bê. Nghut kôlháng, Garai Gasâng é mingdán gi, chyáng lò bê hkyô lé, sé to keq.' nghu luí taí keq. ¹² Ngò, nungmoq lé taí kôlé, haú buinyi S lé, haú wá gi, Sodom wá htoq má je hpuzo rá nghut lhê.

¹³ Kurazin wá mó ê! Nang dingnyé wó ri! Bet-saida wá mó ê! Nang dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyün lhê kut zung ngùng to bekô rá nghut lhê. ¹⁴ Haú mù, tará jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó rá nghut lhê. ¹⁵ Dum mù, Kaperna-um wá nang ê, nang gi, mauhkung jé shoq waq toq é hui rá lhu? A nghut, mosumhkung má sheq gyó rá nghut lhê." ga taí ri.

¹⁶ Hau htâng má, chángzo pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." ga ri.

Nyhít Xê Yuq Dum Taú Jé Lo É Hkyô

¹⁷ Hau htâng, haú chángzo nyhit xê yuq gi, gabú myit èq dum taú lò mù, "Yhumsing ê, nang é mying lé lang jáng, nat gâng pé lháng ngamoq é dang lé gyô bum akò." ga taí akò.

¹⁸ Haú su ga taí kôjáng, Yesuq tú taí é gi, "'Tsdán gi, mauhkung htoq mai lhap hpyat é su byit gyó ló é lé ngò myang kat bê. ¹⁹ Wú keq! Ngò gi, nungmoq lé, lhangmui eq gogok pé lé wó nang rá eq gumlau gyè pé é wum-o a-tsam banshoq lé wó ùng rá ahko ahkáng lé byi bê nghut mù luí, hai èq le nungmoq lé wó lhoq hten rá a nghut lo. ²⁰ Nghut kôlháng, nat pé nungmoq é dang gyô é lé za hkâgabú nyi kó, mauhkung htoq má é asak jihpán laiká buk má nungmoq é mying bo to bê lé sheq gabú nyi keq." ga taí ri.

²¹ Haú u lé, Yesuq gi, Chyoiyung Woi-nyí má gabú é myit byíng lô mù, "Mauhkung eq myigung é Yhumsing, Áwa ê, Nang gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zosháng

§ 10:12 Haú buinyi gâ é gi, Garai Gasâng tará jéyáng é buinyi lé gâ lhê. * 10:14 Nungnhik je hpuzo é hkyô gi, mauhpo kumlhá myo myo myang é nghut kôlháng, myit a lhing kô é yanmai nghut ri.

wui lé tân shit bê nghut é yanmai, Ngò, Nang lé hkya-ôn lê ô. Nghut bê, Áwa é, haú gi, Nang ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luí, ó a sé." ga tai ri.

²³ Hau htâng má, Yhâng é chángzô pê shut lhing wú luí, yhangmoq lé baú za haq tái kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé tái kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng nau gyo nau kôlhang, a wó myàng, a wó gyo kó nghut ri." ga tai ri.

Gè É Samariq Byù

²⁵ Haú hkún, wú keq, tarâ sará rayuq gi, toq luí, Yesuq lé, "Sará ê, ahtum abyuq é asak lé wó yú shoq, ngò hkâsu kut râ râ lê lú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkâsu ga kê tô ri lú? Nang haú lé hkâsu nghap yu nyi lê lú?" ga luí, yhang lé myí ri.

²⁷ Haú yuq gi, "'Hau Yhumsing náng é Garai Gasang lé, náng é myit nhikhlum banshoq, náng é asak woi-nyi lhum gôn, náng é wum-o banshoq, náng myit é hkyô banshoq eq, chyitdap râ lê; 'náng gung lé nang chyitdap é su, náng é chyangnâm mã é bang lé le chyitdap aq.' ga tú tai ri.

²⁸ Yesuq gi, "Nang tú tai é dang jô ri; haú su yhang kut aq, haú jáng nang gi, asak duí râ nghut lê." ga yhang lé tái ri.

²⁹ Nghut kôlhang, haú yuq gi, yhâng gungdu dingmán é lé, tân shit nau luí, "Ngá é chyangnâm mã é sù gi, ó yuq nghut lê lú?" ga luí, Yesuq lé myí ri.

³⁰ Yesuq tú tai é gi, "Byù rayuq gi, Yerusalem wá mó mai Yeriho wá shut gyó ló le, damyaq eq htung huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyám to kôluí ló byuq bekô. ³¹ Haú u lé, hkyangjong rayuq gi, haú hkyô mai lai âng ló le, haú damyaq huí sù lé myàng jáng, koi lai ló byuq ri.

³² Haú eq rajung za, Lewiq rayuq le, haú mai lai ló é hkún, haú yuq lé myàng jáng, koi lai ló byuq ri. ³³ Nghut kôlhang, Samariq byù rayuq le, haú mai lai ló é hkún, haú yuq leq tô é lé myàng jáng, wú shogyo luí yhâng chyáng huí é mù, ³⁴ yhâng é dâm má, xú eq tsibiyi wing shoq gyun luí, rago za htup byi mù, yhâng é logung má, haú yuq lé bún ke luí, bing-yhúm ralthum má jé shoq shuí ló mù, gôn lajang byi ri. ³⁵ Htang nyi lé, yhang gi, haú bing-yhúm yhumsing lé ngùn Denari í chap shê byi mù, tái é gi, 'Shí yuq lé wú lajang byi laq, yhâng gung má nang myo chung záng é banshoq lé ngò dum taú lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nang gi, byù haú bang sum yuq má damyaq huí sù é chyangnâm mã é đồng nghut sù gi, hká yuq nghut râ su ngam ri lú?" ga luí, Yesuq myí ri.

³⁷ Haú tarâ sará gi, "Hau yuq lé shogyo sù nghut ri." ga tai ri.

Yesuq gi, "Nang le haú đồng ló kut aq." ga luí, yhang lé tái kat ri.

Mariq Eq Mahtaq Nhik Chyang Yesuq Ê Jé É Hkyô

³⁸ Ahkuî, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri. ³⁹ Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsing Yesuq é hkyî wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, sai tso sai huq é amû myo luí, gyin bûn nyi ri. Haú mù luí, yhang huí é mù, "Yhumsing é, ngá gu gi, sai tso sai huq é amû má, ngo lé baú za rap kut tô é lé, nang a bo myàng byi lúhú? Ngo lé, lé garúm sháng gaq, yhang lé tai byi laq." ga luí, Yesuq lé tai ri.

⁴¹ Haú hkûn, Yhumsing gi, "Mahtaq, Mahtaq, nang gi, muzó lé za ma nyi mù, myit myo myit chiq é huí nyi ri. ⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi rà a nghut." ga luí, yhang lé tú tai ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsing é, Yohan gi, yhâng é chángzô pé lé kyûdung rà hkyô mhoq byí é su, ngamoq lé le mhoq byi laq." ga Yhang lé tai ri.

² Haú hkûn, Yhang gi, "Nungmoq kyûdung le, 'Mauhkúng htoq tsáng myhâng má é ngamoq é Áwa é, Náng é mying gi, choyiyung nyí sháng gaq. Náng é mingdán jé lô sháng gaq.

³ Ngamoq nyí wuí rà é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq. Ngamoq lé, agúng alaú hkyô má hkâwâng nhâng.' nghú keq." ga luí, yhangmoq lé mhoqshit ri.

⁵ Yesuq yhangmoq lé dum tai é gi, "Dangké, nungmoq chyáng má é rayuq sù gi, buinùm wó é nghú sháng, yhang gi, gunggàm yoq má haú yuq chyáng é luí, 'Buinùm hpó é, ngo lé muk sùm long byam chyi byí kat laq, ⁶ haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso rà haí le a joq byam dut tô ri.' ga tai é hkûn, ⁷ yhúmhaú shut má é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wuí le ngò eq rahá yhupjang má yhup to bekô. Ngò, nang lé haí le a wó toq yú byi lo.' ga tu kat ri. ⁸ Ngò, nungmoq lé tai kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra chá é banshoq toq yú byi rà nghut lhê.

⁹ Haú mù, ngò, nungmoq lé dum tai kôlé, dung keq, haú jáng, nungmoq lé byi rà nghut lhê; hô keq, haú jáng, nungmoq myàng kó rà nghut lhê; hkum má kok keq, haú jáng, nungmoq lé hpóng byi rà nghut lhê. ¹⁰ Hkâsu mù gâ le, ó yuq nghut kôle, dung sù wó rà; hô sù myàng rà; hkum kok sù lé gi, hpóng byi rà nghut lhê.

¹¹ Nungmoq íwá pé má, ó yuq wá, yhumsing yhangzo muk dúng le, luqgok byi kó rà lúhú? Ngozo dúng le, lhangmui byi kó rà lúhú? ¹² Woq-ú dúng le, gogok byi kó rà lúhú? ¹³ Agé ashop é bang nungmoq lhang gi, nungmoq é zo wuí lé, ge é chyunghuq dat byi kô le nhing, mauhkúng htoq tsáng myhâng má é

nungmoq é Îwa gi, Yhang lé dúng é bang lé, je riyhang haû Chyoiyúng Woinyí byi râ nghut lhê." ga taí ri.

Mara Hùn É Dang Lé Yesuq Tú Tai É Hkyô
Mht 12:22-30, 43-45; Mrk 3:20-27

¹⁴ Radám lé, Yesuq gi, byù rayuq lé dang a wó nyô shoq kut tô é nat gang lé, haû yuq chyáng mai hkat htoq pyâm ri. Nat haû htoq lô byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵ Nghut kôlhang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsam èq za, nat gâng pé lé wó hkat pyâm é nghut ri." ga taí bum akô nghut ri. ¹⁶ Ra-am le, Yhang lé, mauhkúng mâ é kumlhá tûn shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù tai é gi, "Ikun byoq é mingdán hká lhum nghut kôle, hten byuq râ za nghut lhê; haû eq rajung za, ikun byù yhangchang rayuq eq rayuq byoq lhùm é yhùm htu gi, byoq gâng lhum râ za nghut lhê. ¹⁸ Nat pé le yhangmoq yhangchang byoq gâng lhùm nyi kô é nghut le gi, Tsadán é mingdán gi, hkâsu kut wó gíng to râ lú? Ngò isu nghu tai é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. ¹⁹ Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyâm kô é nghut lhê lú? Haû mù luí, yhangmoq gi, nungmoq lé jéyáng é bang dut bekô râ nghut lhê. ²⁰ Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhùm lé, shâm, lhâm chùng luí zúng tô é nghut jáng, yhâng é sutzé pé gi, rago za wó joq to râ nghut lhê. ²² Nghut kôlhang, yhâng htoq wum je bo é sù lé luí, haû yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luí, yhâng é sutzé pé lé, gam yu pyâm byi râ nghut lhê.‡

²³ Ngá hkyam shut a dap sù gi, Ngo lé gye kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴ Haû agè ashop é nat gi, byù rayuq chyáng mai htoq lô mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. Haû hkûn, yhang gi, 'Ngò nyi lai lo é yhùm má dum taú ló wú râ.' ga taí ri. ²⁵ Yhang dum taú jé ló wú le, yhùm haû gi, shum pyâm mù san za rago dut to lánq é ló myang ri. ²⁶ Haû jáng, yhang gi, dum taú é mù, yhâng htoq je wuí é nat nyhit nat lé shuí lò luí, haû má lo wàng nyi to bekô. Haû mù, haû yuq é nyi yap sâmlai gi, hí lhê htoq má je wuí lò bê nghut ri." ga taí ri.

²⁷ Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé tai é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

* **11:16** Byu pé gi, Yesuq lé Garai Gasang nhang kat é hkyô lé saksé myàng naù luí, mauhpo kumlhá dúng nyi akô. † **11:20** Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkanq é lé gâ é nghut lhê. ‡ **11:22** Haû eq rajung za, Yesuq gi, Tsadán lé zân ùng bê nghut é yanmai, agè ashop é nat pé lé byu pé chyáng mai, wó hkat pyâm bê nghut ri.

*Mauhpo Kumlhá Lé Dung Kô É Hkyô**Mht 12:38-42; Mrk 8:12*

²⁹ Shiwa byu pé jat myô zup zing lo é hkún lé, Yesuq taí é gi, "Shí ipyat lhé é byu pé gi, agè ashop é bang nghut akò. Yhangmoq gi, limik kumlhá dung nyi bùm kôlhang, Yonaq é kumlhá mai lai lui, gotú haí le tún shit rà a nghut.

³⁰ Yonaq gi, Ninewe wa byu pé hí má kumlhá^S dut é su, haù Byu Yhangzo gi, shí pyat lhé é byu pé hí má, kumlhá dut rà nghut lhé. ³¹ Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haù tará jéyang é buinyi má, shí ipyat má é byu pé eq rahá toq lô lui, yhangmoq lé mara hún rà nghut lhé. Wú keq, Sholumon htoq ko sù gi, ahkuí shí má jé nyi to bê. ³² Ninewe wa byu pé gi, Yonaq, mungdang hko kyô é hkún myit lhing kô é nghut mù, tará jéyang é buinyi má, shí ipyat eq rahá toq lô lui, yhangmoq lé mara hún kó rà nghut lhé. Wú keq, Yonaq htoq ko sù gi, ahkuí shí má jé nyi to bê.

*Myibung Su Duqbó Râ Hkyô**Mht 5:15; 6:22-23*

³³ Myibung lé tuq mù go pyâm é jowò má tô tô é le, mung eq nghop tô é le, ó a kut wú kó. Nghut kôlhang, wang lé lô bang myoq wó myâng rà matú kúm gi, tsungjang má tsung to to chyat kut akò. ³⁴ Náng é myoq gi, náng gungdú é myibung* nghut nyi ri. Náng é myoqjí ge é nghut le gi, náng é gungdu gón má maubó byíng muí to rà nghut lhé. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi rà nghut lhé. ³⁵ Haù mù, náng chyáng bo é maubó gi, mauchut byuq é, a chut byuq é lé wú nyí aq. Nang lumjéng é hkyô eq nang myit é hkyô gi, mauchut tuq a dut sháng gaq, sidiq nyi aq. ³⁶ Náng é ragúngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí rà nghut lhé." ga taí ri.

*Hparishe Pé Eq Tará Sará Pé Lé, Yesuq Mara Hun É Hkyô**Mht 23:1-36; Mrk 12:38-40; Luk 20:45-47*

³⁷ Yesuq haù su ga ban taí é htâng má, Hparishe rayuq gi, yhang eq zang rahá zo rà matú, Yesuq lé ji ri. Haù mù, Yesuq gi, haù yhùm má wang é mù zang zo rà ga siboí nàm má zung tô ri. ³⁸ Nghut kôlhang, Hparishe wá gi, zang zo rà hí má Yesuq loq a chí é lé, myâng lui maú nyi ri.†

³⁹ Haù mù lui, Yhumsing Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaù má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé é, ahte[‡] lé le, ahtoq^S lé le, saí sù gi, Garai Gasang rayuq za nghut é lé, a sé kó lhú? ⁴¹ Nghut kôlhang, ahte má bo é zè pé lé, ra chá é bang lé byí pyám keq; haù hkún, nungmoq é matú banshoq gi, sân-yúng lô rà nghut lhé.

⁴² Hparishe pé é, nungmoq gi, dingnyé wó ri, hkásu mù gâ le, nungmoq gi, gau-tsáng, shingtón pé eq zangxun mhan-haq ajù jù má é, xê gambùm ragambùm lé gi, Garai Gasang lé byi nyi kômù, tará dingmán é hkyô eq Garai Gasang chyitdap é hkyô lé gi, lhai pyâm tô akò. Xê gambùm ragambùm byí é

§ 11:30 Kumlhá gi, Yonaq, ngozó wamdaù má sum nyí lúng é su, Yesuq le, shí bê mai sum nyí nghù rà nyí má, dum dui toq lô rà hkyô lé taí nau é nghut ri. * 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htúng tará má gi, zang a zo shí má loq chí rà lhé. ‡ 11:40 Ahte gâ é gi, i-myit unghkaù lé taí ri. § 11:40 Ahtoq gâ é gi, gungdu lé taí ri.

lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyí râ lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtoq mai só lai é lupdùng eq du akô." ga tai ri.

⁴⁵ Haú hkûn, tarâ sará rayuq gi, "Sará ê, nàng haú su gà é gi, ngamoq lé le rhoi lhôm nyi é nghut bê." ga Yhang lé tú tai ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq râ wui é noqkuq htùng tarâ wòlai lé wùn nhâng luí, yhumsing yhang gi, wò haú lé loqnyhui eq lháng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é íchýí íwâ pé sat pyâm é myiqhtoí pé é lup lé luptsuq tsuq akô. ⁴⁸ Haú mù luí, nungmoq gi, nungmoq é íchýí íwâ pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí pé lé sat pyâm mù, nungmoq gi, lup haú pé lé luptsuq tsuq akô. ⁴⁹ Haú mù luí, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyô pé lé, ngò yhangmoq chyáng nhang kat râ nghut lhê; haú bang má é ra-am lé gi, yhangmoq lhom sat pyâm mù, ra-am lé gi, zing-ri kó râ nghut lhê.' gà ri. ⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyâm huí é Zahkariq é sui jé shoq, shun pyâm é myiqhtoí pé é sui banshoq bâng é manglat gi, shí pyat mâ é byu pé lé hùn râ nghut lhê. ⁵¹ Ngò, nungmoq lé tai kôlé, manglat haú pé lé gi, shí pyat mâ é byu pé lé, gè gè yhang hùn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyâm byi kômù, yhumsing yhang le a sé, sé naú bang lé le, hkùm zing tô akô nghut ri." ga tai ri.

⁵³⁻⁵⁴ Yesuq haú mai htoq ló é hkûn, tarâ sará pé eq Hparishe pé gi, Yhang lé gye kut mù, Yhâng é dang má mara wó myâng shoq ga, wui é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô *Mht 10:28-33; 12:32; 10:19-20*

¹ Haú u, byù hkying mun zup zing lò mù, rayuq eq rayuq lháng záng nàng lhum shoq dut nyi é hkûn, Yesuq, Yhâng é chángzô pé lé tai hi é gi, "Gegùn labyoq kut é Hparishe pé é múnchi lé koi sidiq pyám keq. ² A byông htoq loshoq wó záu nghop tô é, hai le a joq râ nghut lhê; a sé loshoq wó haq tô é le, hai a joq râ nghut lhê. ³ Haú mù luí, nungmoq, mauchut hkaú má haq tai é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkung htoq mai tai pyo bùm bekô râ nghut lhê.

⁴ Ngá buinùm wui ê, Ngò, nungmoq lé tai kôlé, gungdu lé za wó sat pyâm mù, woi-nyí lé hai le a wó kut é bang lé, hkâgyuq kó. ⁵ Nghut kôlháng, nungmoq ó lé za gyuq râ é lé gi, Ngò, nungmoq lé tai kyo kôlé, gungdu lé sat pyâm é htàng má, woi-nyí lé ngaraí ming shut wó hkyô kat pyâm é a-tsam wó sú lé kúm gi, gyuq keq. Nghut bê, Ngò, nungmoq lé tai kôlé, haú yuq lé za,

gyuq nyi keq. ⁶ Johkyáng ngo du lé, gyi htingchap í chap èq wó ùng pyâm lhê a nghut kó lúh? Haú johkyáng radu lé lhang, Garai Gasang gi, tô-myí pyâm é a nghut. ⁷ Garai Gasang gi, nungmoq é ulhum má é xâm banshoq lé lhang, nghap to gù nghut lhê. Haú mù, hkâgyuq kó; nungmoq gi, haú johkyáng myo myo htoq má lhang gù je bo é bang nghut lhê.

⁸ Ngò, nungmoq lé tai kôlé, byu pé hí má Ngo lé lhom yín yu é sù ó yuq nghut kôle, Garai Gasâng é maumang lagyô pé é hí má, haú Byu Yhangzo gi, haú yuq lé lhom yín yú râ nghut lhê. ⁹ Nghut kôlhang, byu pé é hí má Ngo lé he-ngik pyâm é sù lé chyaú gi, Garai Gasâng é maumang lagyô pé é hí má, he-ngik pyâm râ nghut lhê. ¹⁰ Haú Byu Yhangzo lé dang đông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoi dang tai pyâm é sù gi, mara hkyut byí é hui rá a nghut.

¹¹ Byu pé nungmoq lé jéyáng râ matú tarajong pé má le, agyi suwún wúí eq ahkáng ayá wó bâng é hí má le, shuí e ló kô é hkûn, hkâsu kut rá lé le, hkâsu nghú tú tai rá lé le, hkâ-myt chiq kó. ¹² Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu tai rá hkyô lé mhoqshit byi rá nghut lhê." ga tai ri.

Hpaqchyí A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byu rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo tai byi laq." ga luí, Yesuq lé tai ri.

¹⁴ Yesuq gi, "Byù nàng ê, nungnhik tang ahtoq má tarâ agyi kut luí, ikun zè gâm byí rá gi, ngo lé ó hkyin tô é lúh?" ga luí, yhang lé tú tai ri. ¹⁵ Yesuq yhangmoq lé tai é gi, "Myoqnoq é hkyô banshoq mai, nungmoq é i-myt lé hkûm zing luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhum đông mai le, yhangmoq lé Yesuq tai é gi, "Sahtê rayuq gi, yhang é yò pé má guqzo muilhum gyai já ri. ¹⁷ Haú mù luí, yhang é unghkaú má myit é gi, 'Ngò hkâsu kut wú rá lhi? Ngá é guqzo muilhum pé lé kat to rá jowó a wó lo dut to bê.' gâ ri.

¹⁸ Dum nghut jáng, yhang gi, 'Ngò ísu kut wú rá abe, ngá é chyí xau pé lé hpyoq pyám luí, je kô é chyí pé lé sai rá nghut lhê. Chyí haú pé má ngá é guqzo muilhum pé eq sutzè banshoq lé, tsing kat to luí, ¹⁹ ngá é i-myt lé ísu nghú tai rá, "I-myt ê, zanwut myáng myáng é matú, zè gè myo myo ngò tsing to bê. I-myt nàng zim za kut nyi aq hkoi. Zo mù, shuq mù, ngón ngón nyi aq." ga' gâ ri.

²⁰ Nghut kôlhang, Garai Gasang gi, 'Byù gò é, náng é asak lé, hkû-myín yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut rá lúh?' ga luí, yhang lé tai ri.

²¹ Haú eq rajung za, yhumsing é matú sutzè hkong to mù luí, Garai Gasâng é hí má myung nyi sù gi, haú yuq su nghut rá nghut lhê." gâ ri.

Myit A Chiq É Za Garai Lé Lumjng Râ Hkyô

Mht 6:25-34, 19-21

²² Yesuq, Yhâng é chángzô pé lé dum tai é gi, "Haú mù luí, Ngò, nungmoq lé tai kôlé, nungmoq é asak matú haí zo haí shuq rá eq nungmoq é gungdú matú haí wut haí tsang rá lé, hkâ-myt chiq kó. ²³ Asak gi, zoshuq htoq má, gungdu gi, mebù htoq má, je ahkyak lhê. ²⁴ Nghonoq pé é hkyô lé myit wú keq; yhangmoq gi, kyô hkyô kyô shu a kut kó; guqchyí eq sutdek lé a wó

kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lhú? ²⁵ Nungmoq má, ó yuq wá, myit chiq é èq, yhumsing é asak lé radúng kô wó jat yù kó rá lhú? ²⁶ Haú su mù luí, tiq dik é hkyô lé lháng, nungmoq a wó kut kô é nhing, haí mù luí gotû hkyô pé lé, myit myô nyi akô lhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri. Nghut kôlhang, Ngò, nungmoq lé tai kyo kôlé, Hkôkhâm Sholumon hpúng kô dik u lé wut é mebu lháng, ban haú rabó lé a hkyit nghut ri. ²⁸ Lumjúng myit tiq é bang ê, hkû-nyí joq mù, napmá myihkyóm má dú kat pyám hui rá nghut é yosô mhan pé lé za lháng, Garai Gasang haú su kut hut é nghut le gi, nungmoq lé, je riyhang hut rá a nghut kó lhú? ²⁹ Nungmoq gi, haí zo haí shuq rá lé hkâho nyi kó; haú eq séng luí lé hkâ-myit chiq nyí kó. ³⁰ Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq rá é hkyô, sé byí nyi lhê. ³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi rá nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byí nau nyi ri. ³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngonhtúng sai luí, hkau sù lé a jé, manot èq le a wó zô é sutzè lé mauhkûng htoq má hkong to keq. ³⁴ Hkâsu mù gâ le, náng é sutzè joq jang má, náng é i-myit le jé nyí rá nghut lhê.

Yesuq Dum Jé Lé Lô Râ Hkying Lé Machya Nyi Râ Hkyô

Mht 24:45-51

³⁵ Nungmoq gi, hpyihit hit luí, (mù zui rá matú rì rì kut to keq); nungmoq é myibung lé tuq to mù, ³⁶ myiháng poi mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wùi su kut nyí keq. ³⁷ Haú yhumsing jé lo le, machya nyi láng é dui-nhâng zoshâng wùi gi, hkungsô wó nyi rá. Hkâsu mù gâ le, ngò, nungmoq lé teng za tai kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, sai tso sai huq rá nghut lhê.

³⁸ Gunggâm yoq lé nghut kôlhang, woq tún hkún lé nghut kôlhang, haú su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. ³⁹ Yhumsing hpó rayuq, hká u má hkau sù lé lô rá lé, sê tô é ru nghut le gi, yhang machya nyi luí, yhâng yhùm lé a wó hput htong nhâng rá nghut é lé, bûn sê nyi keq. ⁴⁰ Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô rá nghut lhê." gâ ri.

⁴¹ Haú hkún, Petruq gi, "Yhumsing ê, dangtú shí gi, ngamoq lé za, tai é nghut lhê lhú? Haú a nghut jáng, lhunglhâng bang lé tai é dông nghut lhê lhú?" ga myí ri.

⁴² Haú jáng, Yesuq gi, "Lumging é eq hpaqchyí bo é sùt zum sù gi, hká yuq nghut lhê lhú? Haú yuq gi, yhâng yhumsing é dui-nhâng zoshâng wùi lé ahkying jé jáng zoshuq gâm byi rá matú, yhumsing hpó èq hkyin to sù dut rá nghut lhê. ⁴³ Yhumsing hpó dum taú lo é hkún, haú su kut nyí láng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za tai kôlé,

* **12:27** Htutbó ban gi, yúng dik é yosô ban nghut lhê.

yhumsing hpó haú gi, yhang é sutzè banshoq, dui-nhang zoshang haú lé ap to râ nghut lhê. ⁴⁵ Nghut kôlhang, dui-nhang zoshang haú gi, yhang é i-myt unghkaú má, 'Ngá é yhumsing hpó jé lô râ gyai myang ashî.' ga myit pyám mù, dui-nhang zoshang luzúm wuí myiwe, yuqgè lé nhuq bat é eq, zo yê shuq yê î shuq wut nyi é nghut jang, ⁴⁶ dui-nhang zoshang hau é yhumsing hpó gi, yhang a myitbyu tô é buinyi eq yhang a sé tô é ahkying má jé lô mù, yhang lé jap pyám luí a lumjing bang eq rahá nyhi pyám râ nghut lhê.

⁴⁷ Yhumsing hpó é i-myt lé sê to kôlhang, yhang ô nau é đông a cháng, rì rì le a hen tô é dui-nhang zoshang gi, yhang yhumsing eq nhuq bat é lé, myo myo hui zo râ nghut lhê. ⁴⁸ Nghut kôlhang, a sé mù kut shut sủ kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yủ su chyáng mai, myo shoq dúng yủ râ nghut lhê. Myo myo ap byi tô é hui su chyáng mai, je myo shoq dum dúng yủ râ nghut lhê.

Nguingón Nhang Râ A Nghut, Lhoq Kang Nhang Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhang râ matú nghut lhê. Myi haú dap to láng é nghut le gi, ngò ô nau é hkyô jup bying bê. ⁵⁰ Nghut kôlhang, ngò hkam yủ râ é baptisma† rajung joq ashî, haú a hkam yủ yủ gi, ngò gyai yhang hkâm zo wuí nyi rì. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lúh? Haú đông a nghut, Ngò, nungmoq lé tái kôlé, byu pé lé lhoq pyô lhoq kang râ matú sheq ru nghut lhê. ⁵² Haú su mù, ahkuí mai rayhúm za mà é byu ngo yuq gi, rayuq eq rayuq yhangmoq yhangchang byoq gang lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhangwa gi, yhang é yuqzo eq, yuqzo gi, yhangwa eq, yhangnu gi, yhang é byizo eq, byizo gi, yhangnu eq, yhangmhoi gi, yhang dumó eq, yhang dumó gi, yhangmhoi eq kut, ngá é yanmai, rayuq eq rayuq byoq gang lhum bùm bekô râ nghut lhê." ga tái rì.

Dut Lò Râ Hkyô É Kumhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htang shiwa byu pé lé, Yhang tái é gi, "Nungmoq gi, buiwàng hkyam shut mhut htup é lé myàng jang, 'Maú wo lò berá.' ga radá dâm lhaq tái tái mu akô, haú eq rajung za le, dut lò lò mu rì. ⁵⁵ Dum nghut jang, maupyí shut mà é lai lo le, 'Bui htân berá.' ga lhaq tái tái mu akô, haú eq rajung za le dut lò lò mu rì. ⁵⁶ Gegùn labyoq kut bang ê, nungmoq gi, myigùng eq mauhkung é kumhá lé, sê gam hkoq yu nyi akô. Haú su nghut kô le nhing, haí mù luí, shí ipyat mà é kumhá lé gi, a sê gam hkoq dut tô akô lúh?

⁵⁷ Haú eq rajung za, haí mù haú dingmán é hkyô lé yhumsing yhang yhang a wó doqdân yủ kô é lúh? ⁵⁸ Dangké, nang lé yui tsuq sủ eq rahá, tará agyi wá chyáng e ló le, hkyô má yhang eq ngón shoq byin hpyé hui yủ aq. Haú a nghut jang, yui yhumsing gi, nang lé tará agyi chyáng é dé pyám luí, tará agyi gi, htóng hkyô su chyáng, nang lé ap pyám luí, yhang gi, nang lé htóng má lhung pyám râ nghut lhê. ⁵⁹ Ngò, nang lé tái lé, yuichyin haú a ban xap xap gi, htóng haú mai nang wó htoq ló râ a nghut." ga tái rì.

13

Myit A Lhng Jang Shi Hten Byuq Râ

† 12:50 Shí mà é baptisma gi, Yesuq, ajung jung hpuzo mù shí hkâm é hkyô lé tái é nghut lhê.

¹ Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé tai kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lúh? ³ Haú su a nghut! Ngò, nungmoq lé tai kôlé, nungmoq le, myit a lêng kô é nghut le gi, banshoq bang haú eq rajung za shi hten byuq kó rá nghut lhê. ⁴ Haú htoq agó, Siloam wà má é machya gyop gyó luí, nhê sat huí é byù raxe shit yuq gi, Yerusalem wà mó má é byù banshoq bang htoq má mara je kô akô nghû, nungmoq myit ngam nyi akô lúh? ⁵ Haú su a nghut! Ngò, nungmoq lé tai kôlé, nungmoq le, myit a lêng kô é nghut le gi, banshoq bang haú eq rajung za shi hten byuq kó rá nghut lhê." ga tai ri.

⁶ Yesuq dangtú dòng dum tai é gi, "Byù rayuq gi, yhâng é tsibiyiq hkyâm má, maihpáng gâm ragám hô tô ri. Yhang agám haú má, ashi é ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gâm haú má ashi é ho wú le, a myàng nghut ri; haú lé htuq pyám aq. Haí mù, maumyí aha agó kut yuq nhang tô lhê lúh?' ga luí, tsibiyiq hkyâm zúng sù lé tai ri.

⁸ Hkyâm zúng sù gi, 'Yhumsing ê, hkûzân za gi, yuq tô wú shi sháng gaq, shigám hau é lhinghkyuq má ngò du lêng to mù, myihpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám rá nghut lhê.' ga luí, hkyâm yhumsing lé tú tai ri." gâ ri.

Bánno Buinyi Má Gùng Loq Hten Sù Lé, Lhoq Gê Byí É Hkyô

¹⁰ Bánno buinyi lé, Yesuq gi, tarajong ralhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dangngóm luí, gungdu ratsú lhang a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myí é, nàng, nòhpyo mai gè berâ." ga luí, ¹³ yhâng é ahtoq má loq ke byí ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nòhpyo lhoq gê byí é yanmai, tarajong má up sù gi, wú nhik-yo luí, "Mù wó zui é buinyi hkyuq nyi joq tô le, buinyi haú pé má, lé wó lhoq ge yù lhê. Haú mù, Bánno buinyi má gi, hkâkut kó." ga luí, shiwa byu pé lé tai kat ri.

¹⁵ Haú hkûn, Yhumsing Yesuq gi, "Gegùn labyoq kut bang ê, nungmoq yuq hkangmó gi, Bánno buinyi lé, yhumsing é no, logúng pé lé, hkup mai hpông htoq yù mù uchyam byi huq huq kut akô a nghut lúh? ¹⁶ Haú nghut le gi, raxe shit zân gón Tsadán èq tú to huí é, Abraham é yhangzo yhangshu myiwe zo shí lé, Bánno buinyi má Tsadán loq mai, hkyut byi a gíng rá lúh?" ga tú tai ri.

¹⁷ Haú su ga tai jáng, Yhang eq i-myt shai lhum é bang banshoq gi, hoq hpú byuq bum akô. Shiwa byù banshoq bang kúm gi, Yhang kut é mauhpo amú banshoq é yanmai, gabú nyi bum bekô nghut ri.

Angshi Cham Eq Munchi Dangké *Mht 13:31-33; Mrk 4:30-32*

¹⁸ Haú hkûn, Yesuq tai é gi, "Garai Gasang é mingdán gi, haí eq wuí lhê lúh? Ngò hai eq tai kê wú rá lúh? ¹⁹ Haú gi, byù rayuq mai, yhâng é hkyâm má hô

tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq tai é gi, "Garai Gasâng é mingdán lé, ngò hai eq tai kê wú râ lúhú? ²¹ Haú gi, myiwe zo rayuq èq sungsô mún sum búng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

²² Hau htâng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byí ri. ²³ Haú hkún, byù rayuq gi, "Yhumsing ê, hkyi yu é hui râ bang gi, shau za nghut râ lúhú?" ga luí, Yesuq lé myí ri.

²⁴ Yesuq gi, "Chyap é hkúmdong mai, Garai Gasâng é mingdán má wó wàng shoq shikut keq. Hkâsu mù gâ le, ngò, nungmoq lé tai kôlé, byù myo myo gi, wó wàng shoq ga shikut wú kó râ. Nghut kôlháng, a wó wàng kó râ nghut lhê. ²⁵ Yhumsing hpó, * hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsing ê, ngamoq lé hkum dpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú tai râ nghut lhê.

²⁶ Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga tai bekô râ.

²⁷ Nghut kôlháng, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dòng kut é bang banshoq é, ngá chyáng mai gâng ló byuq keq.' ga tú tai kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlháng, nungmoq gi, shinggan shut hkat pyâm é hui luí, haú jowò má ngaubyi ngaú nhap eq zui kyik kyik shoq hpuzô nyi bùm bekô râ nghut lhê. ²⁹ Hau hkún, buihtoq, buiwàng, maupyí, mautsùng mâ é mingdán myo myo mai byu pé lé luí, Garai Gasâng é mingdán zoshuq poi má myang zùng kó râ nghut lhê. ³⁰ Haú hkún, ahkuí htâng gyó nyí bang gi, hí bekô râ; ahkuí hí to bang gi, htâng gyó bekô râ." ga luí, yhangmoq lé tai ri.

Yerusalem Wà Mó Eq Séng Luí, Yesuq Tai É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé tai akô.

³² Haú jáng, Yesuq gi, "Hkú-nyí, napmá,† ngò nat gang hkat pyám luí, nò zo hpoy zo lhoq gê byi râ nghut lhê; sum nyí nghú râ buinyí‡ má sheq, ngá mù bàn râ nghut lhê.' nghú luí, agé ashop é wamhkui haú lé ló tai kyo keq. ³³ Haí wá dut kôlháng, hkú-nyí, napmá, sânghe nyí, ngò gi, e ló râ dut ashí. Hkâsu mù gâ le, myiqhtoí pé gi, Yerusalem wà mó mai lai luí gotú jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsing lhùng yu é su, nungzô pé lé,

* **13:25** Yhumsing hpó gi, Garai nghut lhê. Yhùm gi, Garai é mingdán lé tai é nghut lhê. † **13:32** Hkú-nyí, napmá gâ é gi, Yesuq mingkan htoq má mù zui râ ahkying lé tai é nghut lhê. ‡ **13:32** Sum nyí nghú râ buinyí gâ é gi, Yesuq mingkan htoq má mù ban zui é buinyí lé tai é nghut lhê.

Ngò hkâ-myhó dâm shuí tsing yù nau kôlhang, nàng a dóng nghut ri. ³⁵ Wú keq, nungmoq é yhúm gi, nungmoq é matú chamchuyui dut pyâm to berâ nghut lhê; Ngò, nungmoq lé tai kôlé; Yhumsing é mying mai jé lé lo é Sù gi, hkungsô wó nyi sháng gaq.* nghû, nungmoq a tai tai gi, Ngo lé wó myâng kô râ a nghut lo." ga lui, yhangmoq lé tai ri.

14

Hparishe Rayuq É Yhúm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhúm má, ê wang nyi tô le, hau má é bang gi, Yhang lé gyui gyui chôm wú nyi bum akô. ² Hau u lé, wui wam ana dut sù rayuq gi, Yesuq é hí má jé nyi tô ri. ³ Hau mù, Yesuq gi, "Bánno buinyi má nôhpyo lé lhoq gè byí é gi, tarâ wang lhê lhu, a wang é lhu?" ga lui, tarâ sarâ pé eq Hparishe pé lé myi kat ri. ⁴ Nghut kôlhang, yhangmoq gi, zim za dut byuq akô. Hau hkûn, Yesuq gi, nôhpyo hui sù lé, zui to mù, lhoq gè byi lui, nhang kat ri.

⁵ Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsing é yhangzo rayuq yuq, hau a nghut jáng, no myang radu du, Bánno buinyi má, wuihtung má byit gyó le, hau hkûn jáng, a xe htoq yu é za, wó nyi kô râ nghut lhê lhu?" ga myi kat ri. ⁶ Yhangmoq kúm gi, dang hau hkun lé, hai le a wó tú tai kô nghut ri.

⁷ Hau hkûn, Yesuq gi, ji tô é bang jé réng é zùng jowò pé hkyin yu nyi kô é lé myang jáng, yhangmoq lé dangtú dông tai é gi, ⁸ "Byù rayuq yuq nang lé, myiháng poi má ji é nghut jáng, je réng é jowò má hkâ-ê zùng. Hkâsu mù gà le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga lui, náng lé lé tai jáng, nàng hoq hpu lui, hkyi htâng shut hui zùng ra râ nghut lhê. ¹⁰ Hau mù lui, supé nang lé ji le, hkyi htâng má é zùng aq; hau hkûn, nang lé ji sù lé mù lui, 'Buinùm hpó é, shí je réng é jowò má hui doq zùng aq.' ga lui, nang lé tai jáng, nàng eq rahá zung tô é bing lhunglhâng bâng é hí má, nàng gi, myoqdong wó râ nghut lhê. ¹¹ Hkâsu mù gà le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga tai ri.

¹² Hau htâng, Yesuq yhang lé ji é yhumsing hpó lé tai é gi, "Napzang, a nghut jáng, myinxún lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâji tso. Hau bang lé ji tsô é nghut jáng gi, yhangmoq nang lé dum ji tsô é èq, jeju dum tau kô râ nghut lhê.

¹³ Nghut kôlhang, nàng poi kut mù, byi tso poi huq nau é nghut le gi, myung bang, hkyi gyui loq hten bang eq myoqjit é bang lé, ji tso aq. ¹⁴ Hau su kut jáng, nàng hkungsô wó nyi râ nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyi má, hau é akyú lé, nàng wó hkam yu râ nghut lhê." ga ri.

Zoshuq Poi Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang hau wó gyo jáng, "Garai Gasâng é mingdán má é zoshuq poi má wó zo râ sù gi, hkungsô wó nyi sù nghut râ." ga lui, Yesuq lé tai ri.

* 13:35 Hkya-on 118:26

¹⁶ Yesuq haú yuq lé tû taí é gi, "Byù rayuq gi, myinzang byi tso râ ga, zoshuq poi mó ralhum hen to mù, byù myo myo lé ji tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸ Nghut kôlhâng, haú bang banshoq gi, zoshuq poi má a ê râ dông chyat he pyám akò. Rayuq sù gi, 'Ngò yohtóng rahkyang wui tô lhê; haú lé é wú râ dut ri. Haú mù, ngo lé ahkáng byi shi laq.' ga yhang lé taí ri.

¹⁹ Dum rayuq le, 'Ngò, nohtó ngo zúm wui tô lhê; haú pé lé dui nhang chyam wú râ dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹ Haú jáng, dui-nhâng zoshâng taù lò mù, yhâng é yhumsing lé haú hkyô banshoq lò taí kyô ri. Haú hkún, yhumsing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân é mù luí, myùng bang, hkyi gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhâng, zùng râ jowò gi, mân tô ashí.' ga taí ri.

²³ Haú su ga jáng, yhumsing hpó gi, 'Ngá yhùm bying râ matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shuí lò aq. ²⁴ Nang lé ngò taí lé, hí lé ji to huí é bang rayuq lháng, ngá é zoshuq poi lé wó chyim wú râ a nghut.' ga luí, yhâng é dui-nhâng zoshâng lé taí ri." gâ ri.

Yesuq É Chángzo Wó Dut Râ Matú *Mht 10:37-38; 5:13; Mrk 9:50*

²⁵ Byù hpùng mó Yesuq eq rahá e ló kô é hkún, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhumsing é ìnu, íwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsing é tapzing lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng má é byù rayuq yuq, tsehtung yhùm ralhum saí nau le, yhang gi, yhùm haú ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lú? ²⁹ Laq má mù, apùn awang gi, saí hi to mù luí, a wó lhoq pân é nghut jáng, ³⁰ myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lhê.

³¹ Dangké, hkohkâm rayuq gi, gye zan râ hen le, gyezo í mun eq lé sù hkohkâm lé, gyezo ramùn eq za lhom wó zân ùng râ, a wó zân ùng râ lé, zùng mù luí, hí a myit wú é nyi râ lú? ³² A ùng râ dut le gi, gye pé we we má nyi tô ashí hkún lé, lagyo suwùn pé lé nhang kat luí, simsaq râ matú htíngram pyám ra râ nghut lhê. ³³ Haú eq rajung za, nungmoq chyáng má é ó yuq nghut kôlhâng, yhumsing wó é zè banshoq lé, a pyám to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhâng, xomân kân byuq jáng gi, haú lé hai èq dum wó lhoq ngam yù râ lú? ³⁵ Haú gi, myigung matú le, myihpún kut râ matú le, akyú a bò lo. Haú mù luí, shinggan shut kúm gi, dú pyám sê akò.

Gyo râ nohkyap dap sù gi, gyô yù sháng gaq." ga tai ri.

15

Byuq Byuq É Sau *Mht 18:12-14*

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zing bum akô. ² Háu hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga tai put nyi bum akô.

³ Háu mù, Yesuq yhangmoq lé dangtú dông tai é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau háu lé, myàng shoq a châng ho yu é, ó yuq wá nyi kó rá lúhú? ⁵ Byuq byuq é sau háu lé myang hô jáng, gyaí gau é i-myit éq goqsân htoq má bún kê chùng mù, ⁶ yhûm má jé jáng, yhâng é buinùm ji-myi wuè eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga tai rá nghut lhê. ⁷ Háu eq rajung za, Ngò, nungmoq lé tai kôlé, myit lhing a rá é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkung htoq má, je riyhang gabú jowò dut rá nghut lhê.

Byuq Byuq É Ngùn Chap

⁸ Dum nghut jáng, dangtú ralhüm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú rá a nghut lúhú? ⁹ Háu lé ho myàng jáng le, yhâng é buinùm ji-myi wuè eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga tai rá nghut lhê. ¹⁰ Háu eq rajung za, Ngò, nungmoq lé tai kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut rá nghut lhê." gâ ri.

Byuq Byuq É Yuqzo

¹¹ Yesuq xoq tai é gi, "Byù rayuq gi, yuqzo í yuq wó ri. ¹² Háu nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

¹³ Háu htâng hkâ-myhâng a myáng má, yhangzo tiq sù yuq gi, sutzè banshoq hkyom yu chùng mù, mau we shut ê luí, háu jowò má, mingkan ngón hkyô châng é má yhang wó é ngunzè banshoq lé langså pyám bê. ¹⁴ Háu su kut ngunzè wó mi-wó lé ban langså pyám é htâng má, háu mau má mutmó gyo é yanmai, yhang gi, asho awui dut lo nyi bê nghut ri. ¹⁵ Háu mù, háu mau má é byù rayuq chyáng, langchyáng ê kut le, háu yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Háu hkûn, yhang gi, waq jùm zô é shígyang cham pé lé lháng, zo naù shoq dut kôlháng, ó yuq le a byi zo kó nghut ri.

¹⁷ Háu mù, yhang myit bûn lo é gi, 'Ngá wá chyáng nyi é langchyáng pé gi, agùn agó myàng zô nyi kó rá nghut lhê. Nghut kôlháng, ngò gi, shí jowò má, zo mut wuèshit é eq shi ló rá dut bê. ¹⁸ Ahkuí, ngò toq mù, ngá wá chyáng taù ló luí, 'Áwa ê, ngò gi, Garai Gasang lé le, nang lé le, shut bê. ¹⁹ Ahkuí mai ngò gi, nung zo nghù rá a gíng lo, hau é yanmai, náng é langchyáng rayuq dông za ngo lé nyi nháng laq.'" nghù luí, ló tai rá.' gâ ri. ²⁰ Háu htâng, yhang toq luí,

yhâng wâ chyáng ló le, yhang we we má ru nghut ashí hkûn mai, yhang wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byí ri.

²¹ Haú hkûn, yhangzo gi, 'Áwa è, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghú rà a gíng lo.' ga luí, yhang wa lé dúng tóngbán ri.

²² Yhângwa kúm gi, yhang é langchyâng pé lé, 'Réng dik é mebu hân hân yu lé mù, yhang lé hut byi keq; yhang é loq má, loqchyop chyop byi keq; hkyí má le hkyí-tsung tsung byi keq. ²³ Tsô myum tô é nojûng zo le yu sat keq. Haú mù, nga-nhúng gi, zoshuq poí kut mù chôm ngón sháng. ²⁴ Haí mù gâ le, ngá zo shí yuq gi, shi byuq é mai, ahkuí dum duí bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekô.

²⁵ Haú u lé, yhangzo ko sú yuq kúm gi, yò má nyi tô ri. Yhang gi, yò mai yhúm shut jé lo nyi é hkûn, zìng út bat luí gó nyi é hté lé lò wó gyô ri. ²⁶ Haú mù, langchyáng rayuq lé wut yù luí, haú hkyô lé yhang myí wú le, ²⁷ langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

²⁸ Dang haú lé wó gyo jáng, yhang gi, gyô nhik-yo luí, yhúmhkaú shut a wàng lo kut ri. Haú mù, yhang wa htoq é luí, yhang lé è chyuoq ri. ²⁹ Yhangzo kúm gi, 'Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu lai wú. Nghut kôhlang, ngò ngá é luzúm wuí eq ngón kún rà matú, bainám zo radu lháng radám le nàng a byi wú shí. ³⁰ Shiwa myíhí pé eq zum yap wún luí, náng é sutzè lé lhoq pân pyám é sú nung zo haú dum taú jé lô jáng kúm gi, tsô myum tô é nojûng zo lé, yhang é matú nàng sat byi bu-nhung!' ga luí, yhang wa lé tù taí ri.

³¹ Yhângwa gi, 'Ngá zo è, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. ³² Nghut kôhlang, shí nung gu gi, shi byuq é mai ahkuí dum duí bê; byuq byuq é mai le, dum myàng bê. Haú mù, gabú hpo nghut bê.' ga luí, yhang lé taí ri." gâ ri.

16

Hpaqchyí Ge Dâ É Sùt Zum Sú

¹ Yesuq, Yhâng é chángzô pé lé taí é gi, "Sahtê rayuq chyáng sùt zum sú rayuq nyi ri. Haú yuq gi, yhang yhumsing é sutzè pé lé jai hpyuq pyám ri ga, yhang yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhú? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sú wó kut lo rà a nghut lo.' ga taí ri.

³ Haú jáng, sùt zum sú gi, 'Ahkuí, ngò hkâsu kut lo rà lhú? Ngá é yhumsing gi, ngo lé sùt zum ayá mai lhoq hkyô pyám bê. Myí du myí hkop zo rà le ngò wum a bò; dung zo dung shuq rà le ngò hoq ri. ⁴ Ngo lé sùt zúm é ayá mai hkyô pyám htàng má, supé ngó lé yhangmoq é yhúm má lhom hap yù rà matú, hkâsu kut rà hkyô lé ngò sé bê.' ga wó myit rot jáng, ⁵ yhang gi, yhang yhumsing hpó lé chyín dap to é bang rayuq htàng rayuq lé wut yù mù, sâng-hí yuq lé, 'Ngá yhumsing hpô chyáng nàng chyín hkâ-myhó dap tô lhê lhú?' ga myí jáng, ⁶ haú yuq gi, 'Xù rashô púng dap lhê.' ga tù taí ri.

Haù jáng, sùt zum sù gi, 'Náng é jihpán yù luí, hân zùng mù, ngo xê pùng kut kâ to aq.' ga yhang lé tai ri.

⁷ Dum rayuq lé, 'Nàng hkâ-myhó dap tô lhê lúh?' ga myi jáng, haù yuq gi, 'Sungsô rashô búng dap lhê.' ga tú tai ri. Sutzum sù gi, haù yuq lé, 'Náng é jihpán má shít xê búng kut kâ to aq.' ga tai ri.

⁸ Haù a dingmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé tai é gi, mingkan zo wú gi, yhangmoq é mingkan eq sêng é hkyô pé má, maubó gung é yhangzo pé* htoq hpaqchyí je bò kô é yanmai nghut lhê. ⁹ Haù mù luí, Ngò nungmoq lé tai kyo kôle, a tara é sutzè pé eq buinùm ho nyi keq, haù mù, sutzè haù htùm byuq jáng, nungmoq lé, ahtum abyuq joq tô é yhùm má, lhom hap yu é hui kó rà nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lùm rà nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui rà a nghut. ¹¹ Haù mù, mingkan sutzè má lhang nungmoq lé a wó lùm kô é nghut le gi, haù tengmán é sutzè lé, nungmoq chyáng ó yuq wá kâm ap byi rà lúh? ¹² Supé é sutzè má, nungmoq lé a wó lùm kô é nghut le gi, nungmoq sng âng é sutzè lé, nungmoq chyáng ó yuq wá kâm ap byi rà lúh?

¹³ Dui-nhâng zoshâng ó yuq nghut kôlhang, yhumsing í yuq lé wó dojaú rà a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap rà nghut lhê; haù a nghut jáng, rayuq lé gi, lhumzui mù, rayuq lé gi, hpau a tap kut rà nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rà a nghut." ga tai ri.

¹⁴ Ngùn myoqnoq é Hparishe pé gi, dang haù banshoq lé wó gyo kôjáng, Yesuq lé wuizui kut pyám byí akò. ¹⁵ Haù mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shít mhaù é bang nghut akò; nghut kôlhang, Garai Gasang gi, nungmoq é i-myt unghkaù lé sé sù nghut lhê. Byù é hí má hpaudap é pé gi, Garai Gasang é hí má achayt é nghut nyi ri.

¹⁶ Jep é tarâ† eq myiqhôi pé é dang, ahko ahkáng wó tô é ahkyíng gi, wui-myhup sará Yohan jé lé é buinyi jé shoq nghut bê. Haù hkyíng mai gi, Garai Gasang é mingdán hkyô gabú danglù lé, hko kyô nyi mù, yuq du jup gi, haù hkyô má htùng chying wang ló bum akò. ¹⁷ Jep é tarâ má é tiq dik é dangjí eq myihkyet zo ralhum lé wó lhoq hten rà htoq, mauhkùng eq myigùng hten rà gi, je lui rà nghut lhê.

¹⁸ Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga tai ri.

Sahtê Hpó Eq Lazaruq

¹⁹ Yesuq dum xoq tai é gi, "Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri. ²⁰ Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé nyhi tô akò. ²¹ Haù yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byí nyi akò.

²² Htâng má, haù dung zo sù shi byuq jáng, maumang lagyô pé gi, mauhkùng má nyi é Abraham é tanghkoí má yhang lé shuí ló byí akò. Sahtê

* **16:8** Maubó gung é yhangzò pé nghu é gi, Garai Gasang é yhangzò pé lé tai é nghut lhê. † **16:16** Jep é tarâ gâ é gi, Garai Gasang, Mosheq mai nga-nhúng lé byí tô é tarâ lé gâ lhê.

wá le shi byuq luí, yhûm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri. ²⁴ Haû mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haû mù, Lazaruq gi, yhâng é loqnyhui û êq wui má tik yû mù, ngá é shô má wui ra-poq zo hkálháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê. ²⁶ Haû mai gotú gi, shí mai nungmoq chyáng dap lé naú bang a wó dap shoq le, haû mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langkung mó êq kyo pyám to bê nghut ri.' ga tú tai ri.

²⁷ Sahtê wá gi, 'Áwa ê, haû nghut le gi, ngò, nang lé dúng nau ri. Ngá gú pé ngo yuq nyi ashí; yhangmoq le ísu hpuzô é jowò má a jé sháng gaq, ²⁸ yhangmoq myit lhîng shoq ló tai pun râ matú, Lazaruq lé ngá wâ yhûm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga tai ri.

³⁰ Sahtê wá gi, 'Áwa Abraham ê, haû su a nghut. Shi byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit lhîng kó rá nghut lhê.' ga tai ri.

³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang má é rayuq yuq dum dui toq ló mù, ló tai kyo kôlháng, kâm gyo kó rá a nghut.' ga luí, yhang lé tú tai ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé tai é gi, "Byu pé lé mara kut shut nhang é hkyô gi, joq htoq lô rá za nghut lhê. Nghut kôlháng, mara kut shut nhang é hkyô lé lhoq htoq é sù gi, dîngnyé wó rá. ² Zoshâng shí bang má é rayuq lé, mara kut shut nhang é sù gi, yhâng é lingzing má luquí long mó tuí hut byi luí, wuimau má é dú hkyô pyám é hui é nghut le gi, yhang é matú je gè rá nghut lhê. ³ Nungmoq gi, yhumsîng gûng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhòqshit aq; yhang myit lhîng é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dâm shut mù, 'Ngò myit lhîng bê.' ga luí, nang lé nyhit dâm dum tóngbán le, tóngbán hkangmó, nàng, yhâng é mara lé hkyut pyám byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akó.

⁶ Haû jáng, Yhumsîng gi, "Nungmoq é lumjîng myit angshi cham í za hkálháng bò kô é nghut le gi, shí hangwâ gâm lé, 'Sikgâm ê, amyit eq roq bún luí, wuîshuq lung-aú má, ê yuq to aq ô.' gâ le, nungmoq é dang lé sikgâm haú gyo byi rá nghut lhê.

⁷ Dangké, nungmoq má é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyí é nghut le, dui-nhâng zoshâng haú

yohtung pá mai jé lo é hkûn, yhang lé, 'Hân zùng mù zang zo aq.' ga luí, ó yuq wá taí kó râ lúhú? ⁸ Haû dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lúhú? ⁹ Taí mitai banshoq lé, dui-nhâng zoshâng ban zui sai byí é nghut kôlháng, yhang lé jeju bún é dang ó yuq wá taí wú akò lúhú? ¹⁰ Haû eq rajung za, nungmoq gi, taí mitai ban kut jáng sheq, 'Nga-nhúng gi, jeju bun a ging é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghú taí keq." ga taí ri.

Mangâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri. ¹² Yhang, wà rawà shut wang ló é hkûn, manggâm dap é byù raxê yuq eq luí ri. Haû bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luí, wut garú bum akò.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shít keq." ga yhangmoq lé taí ri. Yhangmoq gi, hkyô má ru sô nyí ashí le lháng, sân-yúng ló byuq bekò.

¹⁵ Yhangmoq chyáng mã é rayuq gi, yhumsing gungdu ge byuq é lé myàng jáng, Yesuq chyáng dum taú é mù, htê mó eq Garai Gasang lé hkya-ôn é eq, ¹⁶ Yesuq é hkyí wang mã pai gop to luí, Yhang lé jeju hkya-ôn nyi ri. Haû yuq gi, Samariq byù nghut ri.

¹⁷ Haû mù, Yesuq gi, "Sân-yúng byuq é gi, raxê yuq a nghut lúhú? Gau yuq gi, hká ló byuq bekò? ¹⁸ Shí tûngbau rayuq mai lai luí, dum taú lé mù Garai Gasang lé hkya-ôn é byù, rayuq le a nyi lo kó lúhú?" ga taí ri. ¹⁹ Hau htâng, Yesuq gi, haû yuq lé, "Toq mù ló aq, náng é lumjúng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myí akò. Haû jáng, Yesuq gi, "Garai Gasâng é mingdán jé lé râ gi, myoq eq wú luí myàng râ a nghut. ²¹ Garai Gasâng é mingdán gi, nungmoq yuq jup é ahkaú má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tû taí ri.

²² Chángzô pé lé le Yesuq taí é gi, "Haû Byu Yhangzô é buinyi ra-nyí lé, nungmoq myàng nau dik é ahkyíng jé râ. Nghut kôlháng, nungmoq gi, Byu Yhangzo lé wó myàng kó râ a nghut. ²³ Haû buinyi má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó râ nghut lhê. Nghut kôlháng, hkâ-ê; hkâcháng kó. ²⁴ Hkâsu mù gã le, maumyí rahkyam má hpyat é maulhap gi, maumyí gó hkyam jé shoq duqbó é su, haû Byu Yhangzo dum jé lé é buinyi má le dut râ nghut lhê. ²⁵ Nghut kôlháng, haû su a dut htoq shimá, Yhang gi, zing-rí é myo myo lé le, ipyat shi mã é byu pé eq he-ngik pyám é lé le, hui shirâ nghut lhê.

²⁶ Noaq é tsín pyat má dut é su, haû Byu Yhangzo jé lé é buinyi má le dut râ nghut lhê. ²⁷ Byu pé gi, Noaq, wui-sanghpo mó hkaú má wang é hkûn jé shoq, zo zo shuq shuq, myi byi myi yû, myiháng kut luí, nyi nyi bum akò. Haû hkûn, dowuí dúng lô mù, yhangmoq banshoq lé lo lhoq htên pyám bê nghut ri.

²⁸ Haû eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhùm kut luí nyi nyi akò. ²⁹ Nghut kôlhang, Sodom wà mai Lot htoq lô é buinyi má, mauhkûng mai, myi eq hang gi, mau su wò gyó lô luí, lhunglhang lé lhoq htên pyám bê nghut ri.

³⁰ Haû Byu Yhangzo, lé htoq shit é buinyi má le, haû eq rajung za dut rà nghut lhê. ³¹ Haû buinyi má, yhumhkûng* htoq má nyi tô é sù gi, yhúmkaû má é zè lé, a lô gyó wang yú lo sháng gaq. Yò má nyi tô é sù gi, haû eq rajung za, yhùm shut a taù lò lo sháng gaq. ³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum rà nghut lhê; asak sum pyám é sù kúm gi, asak wó duì rà nghut lhê. ³⁴ Ngò, nungmoq lé tai kyo kôlé, haû myín lé, yhupjang ralhú má byù í yuq nyi to kô le, rayuq gi, shuí yu é hui mù, rayuq gi, myit gyó to rà nghut lhê. ³⁵ Myiwe í yuq luí má rahá za chòm luí nyi tô le; rayuq gi, shuí yu é hui mù, rayuq gi, myit gyó pyám to rà nghut lhê. ³⁶ Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyám to berá nghut lhê." gâ ri.

³⁷ Haû hkún, chángzò pé gi, "Yhumsing Yesuq é, haû gi, hká gyo má dut rà lhú?" ga luí, Yesuq lé myi kôjáng, Yhang gi, "Màng leq é jang má, langdá pé, lé zing bùm rà nghut lhê." ga luí, yhangmoq lé tù tai ri.

18

Chuimó Myhí Eq Tarâ Agyi É Hkyô Lé Dangtú Yú É Hkyô

¹ Yesuq, Yhâng é chángzò pé lé, myit wum a gyuí é za, hká-nhám le kyúdung nyi rà hkyô lé, dangtú dông mhoqshit é gi, ² "Wà rawá má, Garai Gasang lé le a gyuq hoq, byù lé le hái su a ngàm é tarâ agyi rayuq nyi ri. ³ Haû wá má chuimó myhí rayuq le nyi ri. Yhang gi, haû tarâ agyi wá chyáng é luí, 'Ngò eq amú htoq sù lé, yhâng é mara eq rajung za, jéyáng byi laq.' ga luí, é dum tai tai kut nyi ri.

⁴ Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le hái su a ngàm, ⁵ nghut kôlhang, chuimó myhí shí yuq é amú lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng rà dut ri. Haû mù, ngò yhâng é amú lé jéyáng byi rà.' ga, yhâng é unghkaû má myit yu ri." gâ ri.

⁶ Haû mù luí, Yhumsing Yesuq gi, "A ding a mán é tarâ agyi wá tai é dang mai mhoq yú keq. ⁷ Garai Gasang gi, Yhang lé nyi myín wut dúng nyi é, Yhang hkyi yu to bê bang lé, tarâ é dông a kut byi é gi, myáng myáng nyi to rà lhú? ⁸ Ngò, nungmoq lé tai kôlé, Garai Gasang gi, yhangmoq lé hân yhang tengmán é dông jéyáng byi berá nghut lhê. Nghut kôlhang, haû Byu Yhangzo jé lé é buinyi má, lumjing hkyô lé gi, mingkan htoq má myang wú shirá lhú?" ga tai ri.

Hparishe Eq Kang Guq Sù Kyúdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông tai é gi, ¹⁰ "Byù í yuq kyúdung kó rà ga, noqkuq yhùm má doq e akò. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luí, 'Garai Gasang é, ngò gi, byù góbang su lú zo lú shuq é hkyô

* **17:31** Yudaq byu pé é yhumhkûng gi, rá é nghut lhê mù, nyi kún jang kut akò. † **17:32** Lot é yhangmyi gi, Sodom wà shut dum taù lhing wú é yanmai, Garai Gasang lhoq hten pyám é hui sù nghut lhê.

le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bún lhê ô! ¹² Ngò gi, rabat má zoshuq í dâm gám nyi lhê; ngò wó yu é gũ má é xê gambùm ragambùm le kat nyi lhê.' ga luí, yhang baú yhang gotú kut dúng nyi ri.

¹³ Kang guq sù kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang é, shí yubak dap sù ngo lé, shogyô yù laq ò!' ga dúng ri.

¹⁴ Ngò, nungmoq lé tái kôlé, kang guq sù kúm gi, Garai Gasâng é hí má mara hkyut san byí é lé wó yú luí, yhùm shut dum taú ló bê; nghut kôlháng, Hparishe wá gi, a wó nghut ri. Hkâsu mù gá le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga tái ri.

Zoshâng Wuí Lé Yesuq Shimân Byí É Hkyô

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akò. Chángzô pé gi, haú lé myàng jáng, lhom tân hkùm akò nghut ri. ¹⁶ Nghut kôlháng, Yesuq gi, zoshâng wuí lé, wut yú luí, "Haú zoshâng wuí lé, Ngá chyáng lé nhâng keq; yhangmoq lé hkâhkúm zing to kó; hkâsu mù gá le, Garai Gasâng é mingdán gi, haú sù é bàng é mingdán ru nghut lhê. ¹⁷ Ngò, nungmoq lé teng za tái kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haú má gè gè yhang wó wàng râ a nghut." ga tái ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byú rayuq le, Yesuq lé, "Ge é Sará ê, ahtum abyuq é asak wó yú râ matú, ngò hái kut ra râ lúhú?" ga myí ri.

¹⁹ Yesuq gi, "Hái mù, Ngo lé ge é Sará nghu lhê lúhú? Garai Gasang mai lai luí, ge é ó yuq le a nyi. ²⁰ Jep é tará má, 'Su-myi sulàng hkâlú, byú hkâsat, hkâhkau, a teng a mán é saksé hkâhkám, nángnu nángwa lé hkungga aq.'* gá é dang pé lé, náng sé gũ bê." ga luí, yhang lé tù tái ri.

²¹ Háu yuq gi, "Háu pé banshoq lé, ngò, zoshâng hkùn mai cháng bê nghut lhê." ga tái ri.

²² Yesuq gi, dang haú lé wó gyo jáng, "Nàng kut râ rajung râ tô ashí; nàng wó miwó lé ùng pyám luí, myùng bang lé byí pyám aq; haú jáng, nàng, mauhkúng htoq má sutzè wó râ nghut lhê; haú mù, Ngá htâng lé cháng aq." ga luí, yhang lé tái ri.

²³ Háu yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴ Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng râ matú, haú-í yhang wuí rinhung! ²⁵ Sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." ga tái ri.

²⁶ Dang haú lé wó gyô é bang gi, "Háu su ru nghut le gi, ó yuq za hkyi yu é hui râ nghut lhê lúhú?" ga myí bum akò nghut ri.

²⁷ Háu hkùn, Yesuq gi, "Byú a wó kut é hkyô lé, Garai Gasang gi, wó kut lhê." ga tái kyô ri.

²⁸ Háu hkùn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htâng cháng bê nghut lhê." ga tái jáng,

* 18:20 Htoq Ló 20:12-16

²⁹ Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhúm, yhumsing é yhangmyi, yhumsing é âgu âmang, yhumsing é ìnu ìwa, yhumsing é yhangzô pé lé, pyâm to sù ó yuq nghut kôle, ³⁰ shí pyat má, akyù myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé taí ri.

Yesuq, Yhang Shì Hkám Râ Lé Dum Taí É Hkyô
Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhúng gi, Yerusalem wà mó shut doq lô nyi é nghut lhê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tungbaù pé é loq má ap pyâm é hui luí, haú bâng èq Yhang lé, wuizui kut pyâm é, rhoí rip e, sôkan byé gyün é, nhuq bat é kut yù mù, sat pyâm kó râ nghut lhê. ³³ Hau htâng sum nyi nghú râ buinyi má, Yhang gi, dum dai toq lô râ nghut lhê." ga luí, yhangmoq lé taí ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sù Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô lai lô é hté lé wó gyo jáng, haú haí dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq lai lô ri." ga luí, yhang lé taí kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má lai lô é bang gi, zim za nyi râ matú yhang lé tân hkûm akô; nghut kôlháng, yhang gi, "Dawiq é Yhangzo ê, ngo lé shogyo yù laq ô!" ga, je riyháng hté mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, ⁴¹ "Ngò, nàng lé haí kut byi râ ô nau ri lhú?" ga, yhang lé myi kat ri.

Hau yuq gi, "Yhumsing ê, ngò myoq myàng nau ri." ga tú taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjing myit gi, nang lé lhoq gê byi bê nghut ri." ga, yhang lé taí ri. ⁴³ Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglháng bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô lai lô nyi ri. ² Haú hkûn, haú wâ má, Zake gâ é kang guq agyí rayuq nyi ri; haú yuq gi, sutzé wó sù nghut ri. ³ Yhang gi, Yesuq hká yuq nghut é lé myàng nau kôlháng, nyhùm sù nghut é htoq agó, byù rajùm rayò chyín chyap tô é yanmai, a wó myàng nghut ri. ⁴ Haú mù, yhang gi, Yesuq lé wó myàng shoq ga, Yesuq lai lô râ hkyô hí shut din ê mù, khohúm gâm htoq má é doq zung tô ri.

⁵ Yesuq gi, haú jowò má jé jáng, tu wú kat luí, "Zake ê, hân gyó lô aq; hkû-nyí ngò náng yhûm má bíng rã nghut lê." ga taí ri. ⁶ Haú jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

⁷ Haú má nyí bang banshoq gi, haú lé myàng jáng, "Yhang gi, yubak dap sù rayuq chyáng bíng kut rã ga wang e lô bê." ga luí, mara hûn dang taí nyí bum akò.

⁸ Zake kúm gi, toq yap mù, "Yhumsíng Yesuq ê, ngò wó é sutzè rawuí gú myùng bang lé gàm byí pyám rã; ngò záng mop zô pyám é byù rayuq yuq nyí le gi, myí tú dum tau byí rã." ga Yhumsíng Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù rã matú, jé lé sù nghut lê." ga luí, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyó nyí bùm kô é hkûn, Yesuq gi, Yerusalem wà mó má jé rã chyàng lò bê nghut é yanmai le, Garai Gasâng é mingdán gi, radá dâm htoq shit lô berã ga, byu pé myit ngam tô bùm kô é yanmai le, dangtú ralhûm dõng dum taí jat é gi, ¹² "Aróng wó sù byù rayuq gi, hkohkâm ayá é hkam yù luí, dum taú lò rã ga, wê é ming shut é rã matú hen nyí ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byí luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù luí, yhang e lô é htâng má, 'Shí yuq ngamoq ahtoq má up nyí rã lé, ngamoq a ô naù.' ga luí, é taí rã matú lagyo châng nhang kat akò.

¹⁵ Nghut kôlhâng, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé naù luí, yhangmoq lé wut nhang kat ri.

¹⁶ Haú hkûn, sâng-hí yuq gi, lé mù luí, 'Yhumsíng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsíng hpó gi, 'Arã! Nghut bê, kyet é dui-nhâng zoshâng ê, nàng gi, je tiq é mù má hláng wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsíng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsíng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsíng ê, náng é ngùn rajoí lé a byuq shoq, ngò panchoq èq htop tô lê; wú aq, shí nghut lê. ²¹ Nàng gi, yhumsíng yhang a tô tô é zè pé lé yù nau é eq, yhumsíng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkûn, yhumsíng gi, 'Agè ashop é dui-nhâng zoshâng ê, nàng nhut má é dang eq rajung za, ngò, nang lé jéyáng rã nghut lê. Ngò gi, yhumsíng yhang a tô tô é zè pé lé yù nau é eq, yhumsíng yhang a hô tô é yò mai yâm yù nau é sù, byù wui nghut é hkyô lé, nàng sê to gù nghut le nhing, ²³ ngá ngùn lé, ngò

* 19:9 Abraham é yhangzo nghù é lichyúm gi, Abraham su Garai Gasang lé lumjìng é sù lé gâ lê.

dum taù jé lô jáng, aráng eq amyat wó yù shoq, ngùn hpún kat jang má, hai mù a kat tô é lúh?' ga yhang lé tai ri.

²⁴ Hau htàng, yhumsing hpó gi, ayàm má yap tô é bang lé, 'Haù ngùn rajoi lé yhang chyáng mai taù yù lui, raxê joi wó sù lé jat byi keq.' ga tai ri.

²⁵ Haù bang gi, 'Yhumsing ê, yhang gi, raxê joi wó to bê lé nhing.' ga akò.

²⁶ Haù jáng, yhang gi, 'Ngò, nungmoq lé tai kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê. ²⁷ Ahkuí, yhangmoq ahtoq má ngò hkohkâm kut rá lé a ô nau é, ngá é gyè pé lé, shí má shui lé mù, ngá hí má sat pyám keq.' ga hkúnmó hkyô kat ri." gâ ri.

*Yesuq Logúng Ji Mù, Yerusalem Wà Mó Shut Wang E Lô É Hkyô
Mht 21:1-11; Mrk 11:1-11; Yhn 12:12-19*

²⁸ Yesuq gi, shí hkyô pé lé ban tai jáng, hí má so lui, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsalnun Bùm má é Bethpage wà eq Behtani wà má jé lô kojáng, Yhâng é chángzo í yuq lé, ³⁰ "Nungnhik, hí má é wà má ê keq; wà haù má wang é hkùn jáng, ó le a jì wú shí é logúng zo tui tô lánng é lé, é myàng kó rá nghut lhê; haù lé hpyi yù mù, Ngá chyáng she lò keq. ³¹ Byù rayuq yuq mai, 'Haù hai mù hpyi nyi akò?' ga nungnhik lé myi kôjáng, 'Shí du lé, haù Yhumsing rá ri gâ.' nghú tú tai keq." ga pying lui, nhang kat ri.

³² Nhang kat é sù nhik ê jé lé, Yesuq tai kat é dông yhang, dut to lánng é lé é myang akò. ³³ Yhangnhik logúng zo haù lé hpyi nyi kô é hkùn, yhumsing wui gi, "Haù logúng zo lé, hai mù hpyi nyi akò lúh?" ga lui, yhangnhik lé myi akò.

³⁴ Haù jáng, yhangnhik gi, "Shí du lé haù Yhumsing rá ri gâ." ga tai akò.

³⁵ Yhangnhik gi, haù logúng zo lé Yesuq chyáng she lò mù, yhangmoq é buhng pé lé logúng ahtoq má bui lui, Yesuq lé doq ji nhang akò. ³⁶ Haù su kut, Yhang ji e ló nyi le, byu pé gi, yhangmoq é buhng pé lé hkyô má hking byi akò.

³⁷ Ahkuí, Tsalnun Bùm hkègyó gyó ló é jowò eq chyáng lo é mai gi, chángzô pé banshoq bang, yhangmoq myang é laklai kumlhá pé é yanmai, gabú myit mai htê mó ó mó èq Garai Gasang lé hkya-on kô é dang gi,

³⁸ "Haù Yhumsing é mying mai jé lé lo é hkohkâm gi, hkungsô wó nyi sháng gaq ô!✧ Mauhkúng htoq má, nguingón nyi sháng gaq ô!
Htoq tsáng myhâng má, Garai Gasang gi, hpungwup shing kang bo nyi sháng gaq ô!"
gâ akò.

³⁹ Haù mù lui, haù byù hpûng hkaù má bo é Hparishe pé ra-am gi, "Sarâ é, náng é chángzô pé lé tân pyám aq." ga lui, Yesuq lé tai akò.

⁴⁰ Haù hkùn, Yesuq gi, "Ngò, nungmoq lé tai kôlé, shí bang zim za nyi kó é nghut le gi, luqgok pé garú lô rá nghut lhê." ga tú tai ri.

⁴¹ Ahkuí, Yesuq, Yerusalem wà mó eq chyáng lò lui, wà mó haù lé myàng jáng, haù wà mó é matú ngaù mù, tai é gi, ⁴² "Wà nàng ê! Hkù-nyí lhê é buinyi má, nguingón é hkyô lé nàng bún sé tô é nghut le gi, gè rá wá! Ahkuí kúm gi, haù hkyô lé nghop to bê nghut mù lui, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kúm jé é hkùn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhing hkyuq mai nang

† 19:26 Wó sù nghu é gi, yhumsing a-tsam lé rago dat chùng sù lé tai é nghut lhê. ✧ 19:38 Hkya-on 118:26

lé lom tô é buinyi jé lô râ nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô rá; nang gi, luqgok racham htoq má racham lháng a kê lhum loshoq, dut byuq rá nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut rá nghut lhê." ✧ ga kâ to kôlháng, ⁴⁶ nungmoq gi, jowò shí lé 'damaq hkyûng' ✧ kut akô." ga taí uchyang, hkat htoq pyâm ri.

⁴⁷ Yhang gi, nyí wuí noqkuq yhûm má mhoqshit nyi ri. Hkyangjong agyi pé, tará sará pé eq, byu pé é suwún wuí kúm gi, Yhang lé wó sat pyám rá hkyô ho nyi akô. ⁴⁸ Nghut kôlháng, byù banshoq bang gi, Yhâng mhoqshit é dang lé gyo nau nyi kô é yanmai, wó sat rá hkyô lé, a myang hô kó nghut ri.

20

Yesuq É Ahko Ahkáng Lé Myí Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaú má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tará sará pé, suwún wuí eq rahá kut, Yhâng chyáng lé jé kômù, ² "Hai ahko ahkáng èq Nang shí pé lé kut nyi lhê lú? Ahko ahkáng shí, Nang lé ó yuq byí é lú? Ngamoq lé taí kyô wú aq." ga Yhang lé myí akô.

³ Haú hkûn, Yhang gi, "Ngò le, nungmoq lé rajung myí wú kôlé; ⁴ Yohan byí é baptisma gi, mauhkúng mai lú? A nghut jáng, byu chyáng mai lú? Ngo lé taí kyô wú keq?" ga yhangmoq lé myí ri.

⁵ Haú hkûn, yhangmoq chôm hpyê lhum kô é gi, "Mauhkúng mai nghut lhê.", nghú nga-nhúng taí jáng le, 'Hai mù, yhang lé a lumjíng kô é lú?' ga rá nghut; ⁶ 'Byu chyáng mai nghut lhê.' nghú jáng le, shiwa byù banshoq gi, Yohan lé, myiqhtoi rayuq ga lumjíng to kô é yanmai, yhangmoq, nga-nhúng lé luqgok èq dú sat kó rá nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tù taí akô.

⁸ Yesuq gi, "Haú jáng, Ngò le, hai ahko ahkáng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyq Hkyâm Yhumsíng Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dòng xoq taí kyô é gi, "Byù rayuq gi, tsibiyq hkyâm rallhum saí to mù, hkyâm saí zo bâng chyáng ngho byí to luí, gó ming shut myáng myáng é nyi byuq ri. ¹⁰ Kyôshu yoq jé jáng, yhang gi, hkyâm saí zo bâng èq, hkyâm mã é tsibiyq shí pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlháng, hkyâm saí zo bang gi, haú yuq lé lhom bat mù, loq kôm taù nhang kat akô. ¹¹ Gotù dui-nhâng zoshâng rayuq lé, yhangmoq chyáng dum nhang kat ri. Nghut kôlháng, yhangmoq gi, haú yuq lé le, lhom bat mù, hoq lhoq hpu luí, loq kôm dum taù nhang kat akô. ¹² Sum yuq nghú rá dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lúh? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga tai ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yù shoq, yhang lé sat pyám sháng.' ga rayuq eq rayuq tai lhum bum akô. ¹⁵ Haú mù, yhang lé hkyâm shinggan shut dú htoq kômù, sat pyám akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lúh? ¹⁶ Yhang gi, é mù, haú hkyâm saí zo bang lé sat pyám lui, hkyâm haú lé góbang lé htot ngho byí pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htang, Yesuq gi, yhangmoq lé byu wú lui, "Haú jáng gi, 'Yhûm saí bâng èq hkyin htoq pyám é luqgok gi, htungchyûn má é ahkyak dik é luqgok dut bê.'*

ga Chyúmdang má kê tô é gi, haí gá nau é nghut lhê lúh? ¹⁸ Luqgok* haú má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyám é hui râ nghut lhê." ga tai ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang lui tai é hkyô lé, sé kô é yanmai, haú hkûn jáng lhang Yhang lé chyup yù râ matú hkyô ho nyi akô. Nghut kôlhang, byu pé lé gyuq mù a chyup shí kó nghut ri.

Kang Kat É Hkyô Eq Séng Lui Myí É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yù shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri. ²¹ Haú jowú bang gi, "Sarâ é, nang gi, dîng dîng mán mán tai mhoqshit é eq, byu é myoqdong lé a tè byí é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lhê. ²² Hkoséng Kehtaq lé, ngamoq kang kat râ gi, tarâ wang lhê lúh? A wang é lúh?" ga lui, Yhang lé myí wú akô.

²³ Nghut kôlhang, Yesuq gi, haú bang é myit goi é hkyô lé sé mù lui, yhangmoq lé, ²⁴ "Ngo lé, ngùn rachap tûn shit wú keq. Ó yuq é alhô eq masat laiká dap tô ri lúh?" ga myí jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasâng lé byi keq." ga yhangmoq lé tai ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tú tai é dang é yanmai, maú hong byuq kôlui, zim byuq akô.

Dum Dui Toq Lô Râ Hkyô Eq Séng Lui Myí É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ é, myiwe wó é byù rayuq gi, zo dù a dap é za shí byuq é nghut jáng, yhanggu gi, yhangmâng é awut ashín xoq byi râ matú, yhang rhat lé chui gon ra râ nghut lhê ga, nga-nhúng lé, Mosheq kê to byí ri. ²⁹ Hí hpyang lé, gumang nhiktang wui nyhit yuq nyi akô. Lagám yuq gi, myiwe yù lui, zo dù a dap é za shí lô byuq bê nghut ri. ³⁰ Lanang yuq le,

* 20:17 Hkya-on 118:22 * 20:18 Luqgok nghu é gi, Yesuq lé tai ri.

yangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhâng, zo dù a dap é chyat shi ló byuq bùm bekô nghut ri. ³² Ló htâng má, miywe myhí haú le châng shi ló byuq bê nghut ri. ³³ Haú mù luí, haú dum dui toq é buyni má, miywe myhí haú gi, haú nhiktâng wui má é hkâ yuq é yangmyi nghut râ lhú? Hkâsu mù gà le, yang gi, haú nyhit yuq é yangmyi dut wú bê sú nghut ri." ga luí, Yang lé myi wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yú kut nyi bum akô. ³⁵ Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yú hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shi lo kô râ nghut lhê. Yangmoq gi, dum dui toq lô su é yangzô pé† nghut é yanmai, Garai Gasâng é yangzô pé nghut bekô. ³⁷ Haú nyé duq nyi é mhanpúng eq séng luí, Mosheq èq kâ tô é má lháng, Yhumsing gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.* ga bo tô é yanmai, shi é bang dum dui toq lô râ hkyô lé tún shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gà le, lhunglhâng bang gi, Garai Gasâng é hí má dui nyi é bang chyat nghut akô." ga yangmoq lé tù tai ri.

³⁹ Haú hkûn, tarâ sará pé ra-am gi, "Sarâ ê, nàng tai é jô ri." ga akô. ⁴⁰ Haú mù, yangmoq gi, Yang lé hai le a wám myi jat lo kó nghut ri.

Hkrisduq Gi, Ó Yuq É Yangzô?

Mht 22:41-46; Mrk 12:35-37

⁴¹ Hau htâng, Yesuq gi, yangmoq lé, "Byu pé gi, Hkrisduq lé, Dawiq é yangzô nghut lhê, ga hkâsu mù tai akô lhú? ⁴²⁻⁴³ Dawiq yang yang lháng gi, Hkya-on Kungtôn Laiká má, 'Haú Yhumsing Garai gi, ngá é Yhumsing lé, "Ngò, náng é gyè pé lé, náng é hkyi nang tanghkuq kut pyám byí é hkying jé shoq, Ngá é loqyo hkyam† shut zung nyi shi aq." gà ri.* ga kâ tô ri. ⁴⁴ Haú mù, Dawiq yang lháng, Hkrisduq lé, Yhumsing gà é nghut le gi, Hkrisduq gi, yangzô za hkâsu ge nghut râ lhú?" ga tai ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé tai é gi, ⁴⁶ "Tarâ sará pé lé sidiq nyi keq. Yangmoq gi, réng é buhíng wut chùng mù, sô yông wún luí, gai pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poi pé mâ é je réng é zùng jowò pé má myang zùng râ lé le, ô nau nyi bum akô. ⁴⁷ Yangmoq gi, chuimó pé é yhùm-yò pé lé hpyoq zo hpyoq shuq kôluí, kyú híng híng dúng shit mhaú é bang nghut akô. Haú sù é bang gi, je riyhang htan é đông dam byí é hui zo kó râ nghut lhê." gà ri.

21

Chuimó Myhí Kat É Alu *Mrk 12:41-44*

† **20:36** Dum dui toq lô su é yangzô pé gà é gi, Yesuq lé lumjing luí, shi é htâng má dum dui toq lo é bang lé gà lhê. * **20:37** Htoq Lô 3:6 † **20:42-43** Loqyo hkyam ngu é gi, ahko ahkáng wó é jowò nghut lhê. * **20:42-43** Hkya-on 110:1

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haù mù, Yhang gi, "Ngò, nungmoq lé teng za tai kôlé, shí myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haù góbang banshoq gi, yhumsing agùn agó wó é mâ é lé, lé kat akò; yhang kúm gi, myùng sù nghut kôlé, yhang asak lé baù ra ngùn lunglhang lé kat bê nghut ri." ga tai ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yung é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyi jé râ nghut lhê." ga tai ri.

⁷ Haù su ga jáng, yhangmoq gi, "Sarâ ê, haù nghut le gi, haù hkyô pé gi, hkâ-nhám dut lò râ lú? Haù dut râ chyâng lò jáng, hkâsú é kumlhá htoq lò râ nghut lhê lú?" ga, Yhang lé myi akò.

⁸ Haù hkûn, Yhang gi, "Nungmoq gi, hkyô shuí ngoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé llang é byù myo myo pò htoq lò kó râ nghut lhê. Nghut kôlhang, nungmoq gi, yhangmoq htâng hkâcháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haù hkyô pé hí dut lò râ nghut lhê. Nghut kôlhang, lò htâng é buinyi gi, haù hkûn jáng dut rà a nghut shí." ga tai ri.

¹⁰ Hau htâng, Yhang, yhangmoq lé dum tai é gi, "Ra-myû eq ra-myû, mingdán rahlum eq ralhum majan zân lhûm lò kó râ nghut lhê. ¹¹ Jowò myo myo má, layàng mó nún lo é, noli nojáng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lò râ nghut lhê.

¹² Nghut kôlhang, haù hkyô banshoq a dut shimá, Ngá mying é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng é ap byí é le, hui kó râ nghut lhê. ¹³ Haù su é pé mai, nungmoq gi, ngò eq séng luí, saksé wó hkám râ hkyô htoq lò berâ nghut lhê. ¹⁴ Nghut kôlhang, hkâsu nghû lhom tú tai râ hkyô lé, hí mai a myit wui nyi râ lé, nungmoq myit hpyit to keq. ¹⁵ Hkâsu mù gâ le, nungmoq é gye pé lunglhang bang, hai le a wó lhom tú tai loshoq, ngò, nungmoq lé dang eq hpaqchyi byi râ nghut lhê.

¹⁶ Nghut kôlhang, nungmoq gi, Ìnu íwâ pé, âgu âmâng pé, mungmoq eq buinùm ji-myi wui eq lhang, ap pyám é hui kó râ nghut lhê. Yhangmoq gi, nungmoq chyáng má é ra-am lé lhang, sat pyám kó râ nghut lhê. ¹⁷ Byù lunglhang bang gi, Ngá é yanmai, nungmoq lé a ngui kut kó râ nghut lhê. ¹⁸ Nghut kôlhang, nungmoq é xâm rahkat lhang wó htên byuq râ a nghut. ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem và mó lé gyè hpúng mó èq lóm tô é lé, nungmoq myàng jáng, và mó haù htên byuq râ ahkyíng chyâng lò bê lé, bûn sê nyi keq. ²¹ Haù hkûn lé, Yuda mau má nyi é bang gi, bùm pé shut hpang doq ló kó sháng gaq; haù và hkaù má nyi é bang le, hpang htoq kó sháng gaq; và tiq và zo pé má nyi

* **21:18** Shí má gi, asak woi-nyí a shí râ hkyô lé tai é nghut lhê.

é bang le, wà hkaû shut a wàng kó sháng gaq. ²² Hkâsu mù gà le, Chyúmdang má kâ to má kâ to banshoq dik lò rà matú, buinyi haú pé gi, mara dam byí é buinyi pé dut rà nghut lhê. ²³ Haú buinyi pé má, zogúng dut é myiwe wui eq naú huq ashí nghut é ìnu wui gi, gyai yhang wuihke kô rà nghut lhê; hkâsu mù gà le, shí ming ahtoq má wuihke mó eq, shí amyu ahtoq má Garai Gasang nhikmó-yò é jé lò rà nghut lhê. ²⁴ Yhangmoq gi, shâm lhâm eq sat pyám hui lhê eq, ming hkang ming mó má chyup shui lò é le hui kó rà nghut lhê. Túngbaù pé lé byí tô é buinyi ahkyíng htáng shoq, Yerusalem wà mó gi, túngbaù pé èq nàng zik tô é hui rà nghut lhê.

²⁵ Haú hkûn, bui, kyí, lhamó pé má, kumlhá htoq shit rà nghut lhê. Wuishuq lung-aù má é wuìlhêng pé é mying é htê mó é yanmai, myigùng htoq má, byú myú chângjup gi, hkâsu kut rà a sé loshoq maú é eq myit wui myit hkê é hui bekò rà nghut lhê. ²⁶ Byu pé gi, mingkan htoq má dut lò rà é hkyô pé lé, a jé shi mai nyi gyuq kô é yanmai, moq byuq lò bùm kó rà nghut lhê; hkâsu mù gà le, mauhkûng má é wum-o a-tsam pé gi, lhoq nhùn é hui bùm kô rà nghut lhê. ²⁷ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shíngkang mó eq le, gyó lé lo é lé, yhangmoq byu-myàng kó rà nghut lhê. ²⁸ Haú hkyô pé dut hi lò jáng, ulhum tú mù wú kat keq, hkâsu mù gà le, nungmoq lé hkyi yù rà buinyi gi, chyàng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi, "Maihpáng gâm eq siggâm banshoq lé wú wú keq. ³⁰ Sikbu nyùn lo é lé myàng jáng, bui nyé nám chyàng lò bê ga luí, nungmoq yhang dat wú sê akò. ³¹ Haú eq rajung za, haú hkyô pé dut nyi é lé, nungmoq myàng kôjáng, Garai Gasang é mingdán gi, chyàng bê nghut é hkyô lé, nungmoq sé lo keq.

³² Ngò, nungmoq lé teng za taí kólé, shí pyat má é byu pé a ban shi byuq shimá, haú hkyô pé banshoq dut byuq rà nghut lhê. ³³ Mauhkûng eq myigùng gi, a joq lo dut byuq rà nghut lhê; nghut kôlháng, Ngá é dang gi, ru joq nyí rà nghut lhê.

³⁴ "Nghut kôlháng, zo myo shuq myó é, í shuq wut é, mingkan htoq má é myit wui myit hkê é pé èq, nungmoq é i-myyit wò lai nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. ³⁵ Hkâsu mù gà le, buinyi haú gi, mingkan htoq má nyi é byù banshoq bâng é ahtoq má, haú su jé lò rà nghut lhê. ³⁶ Haú mù luí, haú dut lò rà hkyô banshoq maí, nungmoq wó lut lai mù, haú Byu Yhangzô é hí má, wó yap gíng é bang dut sháng gaq, hkâ-nhám le kyúdung luí, ahkyíng hkangmó má machya nyi keq." gâ ri.

³⁷ Yesuq gi, nyí wui noqkuq yhùm má mhoqshit nyí luí, myìn wui Tsanlun Bùm gà é bùm shut htoq é mù, é nyi to to kut ri. ³⁸ Byù banshoq bang gi, Yhang mhoqshit é dang gyo rà ga, napsùn noq noq mai noqkuq yhùm má jé lé bum akò nghut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gà é Azuma (múnchi a kat é Muk Zo Poí) jé rà chyàng lò bê. ² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám rà hkyô, ho nyi akò; hkâsu mù gà le, yhangmoq gi, mingbyú wui lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut

gâ é Yudaq chyáng Tsadán wàng mù luí, ⁴ yang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhúm zúng é gyezau pé eq, ê hpyé ri. ⁵ Haú mù, yangmoq gi, gyô ngui luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkùn, Yesuq lé ap pyám râ hkyô ho nyi bê nghut ri.

Lhoqlhai Poi Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poi mâ é sauzo shigu hkungga sat nhông byi râ é Azuma buinyi jé bê. ⁸ Haú hkùn, Yesuq gi, Petruq eq Yohan lé, "Nga-nhúng zo râ matú Lhoqlhai Poi ê món láng keq." ga luí, nhang kat ri.

⁹ Haú nhik gi, "Hkâmá é món to nhâng nau ri lú?" ga luí, Yang lé myí akô.

¹⁰ Haú hkùn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui râ nghut lê; haú yuq chyáng châng ló luí, yang wang ló é yhúm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poi zo râ bíng wap hkâmá nghut lê lú ga, Sará myí nhang kat ri.' nghú tái keq. ¹² Haú hkùn, hen tô é ahtoq má é wap mó lé, nungnhik lé lhom tûn shít râ nghut lê; wap haú má é món to keq." ga tái kat ri.

¹³ Haú chángzo nhik htoq e ló le, Yesuq tái kat é eq roq za é myâng kômù, Lhoqlhai Poi lé món to bekô nghut ri.

Yhumsing É Myinzang

¹⁴ Ahkuí, ahkying jé jáng, Yesuq eq Yhâng é chángzô pé rahá za zohpoq má zung tó akô. ¹⁵ Haú hkùn, Yesuq gi, "Ngò wuñke jamjau hpuzô é a hui shí má, Lhoqlhai Poi shí lé nungmoq eq rahá zo râ lé, Ngò gyai ô nau nyi lê. ¹⁶ Hkâsu mù gâ le, ngò, nungmoq lé tái kôlé, Garai Gasâng é mingdán má poi shí a ló dik dik gi, ngò haú lé dum zo râ a nghut ló." ga luí, yangmoq lé tái ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yangchang gàm shuq lhum keq. ¹⁸ Ngò, nungmoq lé tái kôlé, ahkuí mai gi, Ngò, Garai Gasâng é mingdán a jé jé tsibiyiq wíng lé dum shuq râ a nghut lo." ga tái ri.

¹⁹ Hau htâng, Yang gi, muk lé yù mù, jeju hkya-on luí, muk lé myhik hpé mù, yangmoq lé byi uchyang, "Shí gi, nungmoq é matú byi pyám é, Ngá é gungdu nghut lê; Ngo lé bûn nyi râ matú, shí su kut nyi keq." ga tái ri.

²⁰ Haú eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyám é, Ngá é sui má xuq tô é dangshikaq asik nghut lê. ²¹ Nghut kôlhang, wú keq, Ngo lé ap pyám râ sù gi, zang bó shí má ngò eq rahá nyi tô ri. ²² Haú Byu Yhangzo gi, hkyin to hui é eq rajung za shí râ nghut lê; nghut kôlhang, Yang lé ap pyám é sù gi, dingnyé wó ri." ga tái ri. ²³ Haú su ga jáng, lagyô pé gi, yangmoq má shí hkyô kut râ sù gi, hká yuq nghut râ lú ga, rayuq eq rayuq myí lhum bum akô.

²⁴ Haú htoq agó, yangmoq má é hká yuq sheq je kô lê lú ga le, rayuq eq rayuq tái htíng lhum bum akô. ²⁵ Haú mù luí, Yesuq gi, "Túngbau pé é hkohkam pé gi, yangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, tái hkungga nyi bum akô. ²⁶ Nungmoq kúm gi, haú su hkâkut kó. Nungmoq má je kô sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lê lú? Zô zung nyi sù lú? Haú a nghut jáng, saí tsô é sù lú? Zô zung nyi é sù sheq nghut ri. Nghut kôlhang, ngò gi, nungmoq má é saí tso sù

su za nghut nyi lhê. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akò. ²⁹ Haú su mù, Ngá wa gi, Ngo lé, mingdán ap byi é su, Ngò le, nungmoq lé mingdán ap byi rá nghut lhê. ³⁰ Haú mù, Ngá é mingdán mâ é, Ngá é zangbó má, nungmoq wó zo kó rá nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó rá nghut lhê.

Yesuq Lé, Petruq (Simun) He-ngik Pyâm Râ Hkyô
Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungso cham lé shai é su, nungmoq lé wó shai shoq ga, Tsadán wá gi, ahkáng dung bê. ³² Nghut kôlháng, náng é lumjǐng myit a hten sháng gaq nghú, Ngò, náng é matú kyúdung byi bê; náng dum lhing bún lò jáng, nung gu nung mǎng pé lé wum-o lhoq gǐng byi aq." ga taí ri.

³³ Haú hkún, Simun gi, "Yhumsǐng ê, hótong wǎng kôlháng, shǐ kôlháng, ngò gi, náng eq rahá chǎng rá matú myit hpyit to bê." ga tú taí ri.

³⁴ Yesuq gi, "Petruq gi, nang lé Ngò taí lé, hkú-nyí* lháng woq a tǔn shǐ má, náng, Ngo lé a sé ga luí sum dǎm he-ngik pyám rá nghut lhê." ga taí ri.

³⁵ Hau htáng, Yesuq, yhangmoq lé taí é gi, "Ngò, nungmoq lé ngunhtǔng, jǐhtǔng, hkyí-tsung a wún a chǔng nhang é za, nhang kat é nghut hkún, nungmoq chyáng haí ra akò lhú?" ga myi jǎng, yhangmoq gi, "Haí le a ra lo." ga taí akò.

³⁶ Haú hkún, Yhang gi, "Ahkuí kúm gi, ngunhtǔng wó sǔ gi, yù wun sháng gaq, jǐhtǔng wó sǔ le, yù wún sháng gaq, shǎm a wó sǔ gi, bumó ung luí wui sháng gaq. ³⁷ Hkǎsu mù gǎ le, Ngò, nungmoq lé taí kôlé, Ngò eq séng luí Chyúmdang má kǎ tô é gi, dut lò berá nghut lhê; 'Haú yuq gi, yubak mara wó bang má nghap lhôm to bê.*" ga kǎ tô é dang gi, Ngá chyáng dik lò rá nghut lhê." ga luí, yhangmoq lé taí ri.

³⁸ Haú mù, lagyô pé gi, "Yhumsǐng ê, wú aq, shǐ má shǎm í hkyam joq tô ri." ga taí kôjǎng, Yesuq gi, "Gé bê." ga luí, yhangmoq lé taí ri.

Tsanlun Bùm Má Yesuq Kyúdung É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhǎng é chǎngzô pé le Yhang htáng chǎng e ló akò. ⁴⁰ Haú jowó má jé jǎng, Yhang gi, "Nungmoq, gungláú é a hui sháng gaq, kyúdung nyi keq." ga luí, yhangmoq lé taí to mù, ⁴¹ chǎngzô pé nyi é mai luqgok radú we kó gǎng e ló luí, hkyihput htuq mù. ⁴² "Áwa ê, Náng ô nau é nghut le gi, góm† shǐ lé Ngá chyáng mai lhaí pyám byi laq. Nghut kôlháng, Ngò ô nau é dǒng a nghut, Náng ô é dǒng sheq nghut sháng gaq." ga kyúdung ri. ⁴³ Haú hkún, mauhkǔng mai maumang lagyo rayuq htoq lé luí, Yhang lé i-myit nhik lé taí tǐng ri. ⁴⁴ I-myit hkaú má dik shoq hkâm zo wuí é yanmai, Yhang je riyhang kyúdung wum kat nyi ri; Yhǎng é buibù le, sui hkyí sui pat su myigǔng má yui gyó ri.

⁴⁵ Haú mù, kyú ban dung jǎng, Yhang toq luí, chǎngzô pê chyáng ló wú le, yhangmoq gi, myit yón mù luí, yhup myhǐ to kò é lé ló myǎng mù, ⁴⁶ "Haí mù yhup nyi akò lhú? Toq keq! Gungláu é a hui sháng gaq, kyúdung nyi keq." ga luí, yhangmoq lé taí ri.

* **22:34** Yudaq byu pé é ra-nyí gi, myinhǎng bui wang é mai, htang nyí bui wang é jé shoq nghut lhê. Shǐ má é hkú-nyí gi, nga-nhǔng é matú myín ǎng ri. † **22:37** Esai 53:12 † **22:42** góm gǎ é gi, Yesuq jamjau huí rá hkyô eq shǐ rá hkyô lé, taí nau é nghut lhê.

*Yesuq Lé Chyup É Hkyô**Mht 26:47-56; Mrk 14:43-50; Yhn 18:3-11*

⁴⁷ Haû su ga, ru tai nyi ashî le, wú keg, haû chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga luí lé lo ri. ⁴⁸ Haû mù luí, Yesuq gi, "Yudaq ê, nàng gi, haû Byu Yhangzo lé bopuq puq é èq gyè pè chyáng ap pyâm lhê lú?" ga luí, yhang lé lhom myí ri.

⁴⁹ Haû hkùn, Yesuq htàng cháng bang gi, haí dut lò rá lé bûn sé kô é yanmai, "Yhumsing ê, ngamoq gi, sham èq zân le, gè rá lú?" ga myí akô. ⁵⁰ Yhangmoq chyáng má é rayuq gi, hkyangjong mó é dui-nhâng zoshâng lé zân kat luí, yhang é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tú tai mù, haû yuq é nohkyap lé é zàng luí lhoq gê byí ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhùm zúng é zau pé eq agyi suwún wuí lé, "Nungmoq gi, damyaq rayuq lé chyup é su, shâm, dumbáng eq kut luí, lé lo akô lú?" ⁵³ Ngò gi, nyí wuí, noqkuq yhùm má nungmoq eq rahá nyi kôlhang, nungmoq Ngo lé chyup yú râ ga a hen wú kó; ahkuí gi, mauchut èq up† nyi bê yanmai, nungmoq é ahkýing nghut nyi ri." ga tai ri.

*Yesuq Lé, Petruq Èq He-ngik Pyâm É Hkyô**Mht 26:57-58, 67-75; Mrk 14:53-54, 66-72; Yhn 18:12-18, 25-27*

⁵⁴ Haû hkùn, yhangmoq gi, Yhang lé chyup yú mù she lô luí, hkyangjong mó é yhùm shut shuí wang lô akô. Petruq le we we mai châng tô ri. ⁵⁵ Ahkuí, yhangmoq gi, wàng hkaû má myi mut yú luí zung tô bum é hkùn, Petruq le yhangmoq é ahkaû má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga tai ri.

⁵⁷ Haû hkùn, Petruq gi, "Myiwe myhí ê, nàng tai é sù lé, ngò a sé." ga he pyâm ri.

⁵⁸ Hau htàng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga tai kat jáng, Petruq gi, "Byù hpó ê, ngò a nghut." ga tú tai ri.

⁵⁹ Hkýing hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq tai ri.

⁶⁰ Petruq gi, "Byù hpó ê, nàng tai nyi é hkyô lé, ngò a sé." ga tú tai ri. Haû su ga ru tai nyi ashî le, woq tún bê nghut ri. ⁶¹ Haû hkùn, Yesuq gi, lhing luí, Petruq lé wú kat ri. Haû mù, Petruq gi, "Hkù-nyí lhang, woq a tún shi má, nàng Ngo lé sum dâm he pyám râ nghut lhê." ga luí, Yhumsing yhang lé tai é dang lé bûn kat ri. ⁶² Haû mù, yhang gi, shinggan shut htoq é luí, gyai yhang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luí nghap myíng nghap htê mu nyi akô. ⁶⁴ Yhangmoq gi, Yhâng é myoqdong nghop pyám byi luí, "Nàng lé bat sù gi, ó yuq nghut ri lú? Myiqhtoi htoí wú aq." ga myí akô. ⁶⁵ Yhangmoq gi, Yhang lé nyhap é dang ajung jung đông tai rhoi nyi akô.

† 22:53 Mauchut èq up gâ é gi, Tsadán èq up é lé gâ ri.

Suwún Wui É Hí Má Yesuq Jé Nyi É Hkyô
Mht 26:59-66; Mrk 14:55-64; Yhn 18:19-24

⁶⁶ Napkyô myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí é mù, ⁶⁷ "Nàng Hkrisduq nghut é têng le gi, ngamoq lé tai kyo laq." gâ akô.

Yesuq gi, "Ngò gi, Hkrisduq nghut lhê nguû tai kôhlang, nungmoq jing kó rá a nghut. ⁶⁸ Ngò, nungmoq lé myi kôhlang, nungmoq gi, tù tai kó rá a nghut. ⁶⁹ Nghut kôhlang, ahkuî mai haû Byu Yhangzo gi, a-tsam bo dik é Garai Gasâng é loqyô hkyam má wó zung nyi berâ nghut lhê." ga luí, yhangmoq lé tai ri.

⁷⁰ Haû hkûn, yhangmoq banshoq bang gi, "Haû nghut le gi, Nàng, Garai Gasâng é Yhangzo nghut lhê lú?" ga myi akô.

Yesuq gi, "Nungmoq tai é eq rajung za Ngò nghut lhê." ga luí, yhangmoq lé tù tai ri.

⁷¹ Haû hkûn, yhangmoq gi, "Nga-nhúng hai jung saksé wá rá nyi ashí lú?" Yhâng é nhut mai yhang, tai htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô
Mht 27:1-2, 11-14; Mrk 15:1-5; Yhn 18:28-38

¹ Haû hkûn, zup zing tô é bang banshoq gi, htoq mù, Yesuq lé mauzau Pilat chyáng shuí wang é luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat rá hkyô lé le hkûm to luí, Yhânggùng yhang gi, haû Hkrisduq nguû é hkohkâm nghut lhê ga luí, tai nyi é lé ngamoq myang ri." ga luí, Yhang lé mara hun akô.

³ Haû hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng tai é eq rajung za nghut lhê." ga tù tai ri.

⁴ Pilat gi, "Shí yuq lé hún rá mara ngò a myàng." ga luí, hkyangjong agyi pé eq shiwa byu pé lé tai ri.

⁵ Nghut kôhlang, haû bang gi, "Shí yuq gi, Yuda mau gón má yhang mhoqshit é dòng mai, mingbyû wui é i-myt lé shuí gabyông ri. Haû gi, Galile mau mai ahkuî shí má jé shoq nghut bê nghut ri." ga zuq zuq tai bum akô.

⁶ Pilat gi, haû su ga kô é lé wó gyo jáng, Yesuq Galile byù nghut é, a nghut é hkyô lé myi wú ri. ⁷ Yesuq gi, Herut up é mau mã é byù nghut é lé Pilat sé jáng, haû u lé Yerusalem và mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jáng, gyai yhang gabú yâm ri. Hkâsu mù gâ le, Yhâng é hkyô lé wó gyô wú mù, Yhang laklai kumlhá ralhuh lhum kut shit rá lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹ Haû mù, yhang gi, Yesuq lé dangmyi myo myô èq myi wú kôhlang, Yesuq gi, dang rahkun lhang a tù tai byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyoi kut mù, atam é dòng tai hpoi kô luí, réng é mebu hut byi mù, Pilat chyáng dum tau dé nhang kat akô. ¹² Haû nyi jáng, hí hpyang gyè dut lhûm é Herut eq Pilat gi, buinùm dut byuq beko nghut ri.

Yesuq Lé Sat Râ Matú Doqdân É Hkyô
Mht 27:15-26; Mrk 15:6-15; Yhn 18:39—19:16

¹³ Haû hkûn, Pilat gi, hkyangjong agyi pé eq zau suwún wui, mingbyû wui lé wut tsing to mù, ¹⁴ "Shí yuq gi, mingbyû wui lé hkyô shuí nghoq ri ga, Yhang

lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nganhúng chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri. ¹⁶ Haú mù, ngò, Yhang lé dam byi luí, nhang pyám rá." ga luí, yhangmoq lé tai ri.

¹⁷ Nghut kôlhang, Lhoqlhai Póí hkangmó má, Pilat gi, mingbyú wui lé htongbyú rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chóm wut garu bum akô. ¹⁹ Barabaq gi, wà htum má gumlau kut é eq byú sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq tai ri. ²¹ Nghut kôlhang, yhangmoq gi, "Yhang lé tapzìng má jén tap pyám aq, jén tap pyám aq!" ga luí, wut tai garú nyi bum akô.

²² Haú mù luí, sum dâm nghú rá hkún, Pilat dum tai é gi, "Haí mù luí lúh? Yhang gi, hai mara kut shut bê lúh? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám rá." ga luí, yhangmoq lé tai ri.

²³ Yhangmoq gi, Yesuq lé tapzìng má wó jén sat pyám shoq ga, zuq zuq hté mó o mó éq dúng wut nyi akô nghut é yanmai, wó tai ung yú bekô nghut ri. ²⁴ Haú mù luí, Pilat gi, yhangmoq dúng é eq rajung za myit hpyit doqdan byí ri. ²⁵ Haú su mù, yhang gi, yhangmoq dúng é eq rajung za, wà htum má gumlau kut é eq byú sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzìng Htoq Má Jén Tap É Hkyó

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq lô kô é hkún, yosô wà mai lo é, Kuruni myuq byú nghut é Simun ga sù lé, chyup yú mù, tapzìng waq nhâng luí, Yesuq htàng má cháng nhang akô. ²⁷ Byú rajùm rayò gi, Yhang htàng má châng e ló bum akô. Yhang é yanmai ngaubyi ngau nhap eq iyon yôn é myiwe zo wui le haú má bo tô ri. ²⁸ Yesuq gi, yhangmoq shut lhîng wú luí, "Yerusalem byizo wui é, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wui é matú sheq ngau nyi keq. ²⁹ Hkâsu mù gâ le, 'Zogûng a dut wú é eq nau a huq wú é baùdung myhí pé gi, hkungsô wó nyi ri.' ga luí, tai é buinyi gi, jé lô rá nghut lhê. ³⁰ Haú buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé,

'Ngamoq ahtoq má nghop aq!'

ga luí le, wut tai bùm bekô rá nghut lhê. ³¹ Byu pé gi, siggâm jùm tô ashí le isu kut kô é nghut le gi, màn jáng gi, hkâsu wá dut lò rá lúh?" ga tai ri.

³² Haú hkún, damaq í yuq lé le, sat pyám rá ga, Yesuq eq rahá shuí htoq lô akô. ³³ Ahkuí, Ugyap nghu é kong má jé jáng, Yesuq lé tapzìng htoq má jén tap tô é hkún, damaq í yuq lé le, loqpai loqyò shut kut luí tapzìng má jén tap tô akô. ³⁴ Haú hkún, Yesuq gi, "Áwa é, yhangmoq lé mara hkyut pyám byi laq; hkâsu mù gâ le, yhangmoq kut é hkyó lé yhangmoq a sé kó nghut ri." ga tai ri. Gyezô pé gi, Yhâng é mebu pé lé lhâng, hkyín shosé she é dông gam yu pyám byí akô.

³⁵ Mingbyû wuî gi, yap to mù tu wú nyi akô. Zau suwún wuî Yhang lé nyhap é gi, "Yhang gi, byû góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huî é mù, rhoi nyaú nyaú akô. Yhangmoq gi, chyîn wing lé yhun byi kôluî, ³⁷ "Nàng gi, Yudaq byu pé é hkohkâm nghut é nghut le gi, Nàng gùng yhang nàng, hkyi yu wú aq." ga Yhang lé tai akô.

³⁸ Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kê tap tô akô.

³⁹ Tapzîng htoq má bat tap lâng to huî é damyaq rayuq gi, "Nàng gi, Hkrisduq nghut lhê, a nghut lhu? Haú Nàng gùng nàng le, ngá-nhik lé le, hkyi yù aq." ga luî, Yhang lé rhoi ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luî nhîng, Garai Gasang lé a gyuq lhu? ⁴¹ Nga-nhik gi, yhumsîng kut shut é mara eq rajung za, jéyáng hui zo gîng é sù nhik nghut lhê; shí yuq kúm gi, hai mara lé kut shut wú sù a nghut." ga luî, haú yuq lé tân kat ri.

⁴² Hau htâng, yhang Yesuq lé tai é gi, "Yesuq ê, Nàng, Nàng é mingdán má já ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za tai lé, hkû-nyi yhang nàng Ngò eq rahá hparadisu* má nyi rà nghut lhê." ga luî, yhang lé tù tai kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luî, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyi náng é loq má ap byi lhê." ga htê mó eq garú kat ri. Haú su ga ban tai eq, Yhang káng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luî, Garai Gasang lé hkya-on kungton ri. ⁴⁸ Haú hkyô lé wú rà ga, lé zîng tô é byû lhunglhang bang le, haú su dut é hkyô pé lé myàng kôjáng, myit yón kôluî, wànggàng bat mù, dum taú ló byuq bekô. ⁴⁹ Nghut kôlhang, Yhang lé sê é bang eq Galile mau mai Yhang htâng châng é myiwe wuî gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé rà hkyô lé myit myoqbyu to sù le, nghut mù luî, ⁵¹ yhang gi, Yudaq uphkang hpúng má é rayuq nghut kôlhang, hpyé lhûm é hkyô má le, zui sai é hkyô má le, myit a bo huî lom é sù nghut ri. ⁵² Yhang gi, Pilat chyáng wàng luî, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luî, pán yúng eq htup yup mù, ó lé lhang a kat wú shí é, luqgok

* **23:43** Hparadisu nghu é gi, mauhkúng mingdán lé tai ri. † **23:44** Nga-nhùng é nyí káng raxe í hkyíng gi, Yudaq byu pé é napkyô hkyuq hkyíng nghut lhê; yhangmoq é gau hkyíng gi, nga-nhùng é myinhâng sum hkyíng nghut bê.

lé kyung tô é luqgok lup hkaû má kat tô ri. ⁵⁴ Haú nyí gi, Hên Lajang Buinyi nghut luí, Bánno buinyi jé rá za nghut bê.

⁵⁵ Galile mau mai Yesuq eq rahá htoq lé lo é myiwe zo wuí le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, é myang akô. ⁵⁶ Hau htâng, yhangmoq gi, yhûm shut taú lò mù, Yesuq é gung sôm lé but byi rá matú, namngón é jung eq mura xú lé hen tô akô. Bánno buinyi má kúm gi, tará joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wuí gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup mâ é luqhkum lêng bóng to láng é lé, é myâng kômù, ³ wang e wú kô le, haú Yhumsing Yesuq é gungsôm lé, a myàng lo kó nghut ri. ⁴ Yhangmoq mau úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nâm má yap tô akô. ⁵ Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, dui sù lé, shi to bâng chyáng hai mù ho nyi akô lúhú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé, ⁷ 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to hui é htâng, sum nyí nghû é buinyi má lhoq dui toq yu é hui rá nghut lhê.' ga nungmoq lé tai tô é dang lé myit bun keq." ga luí, yhangmoq lé tai ri. ⁸ Haú hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taú lò mù, lagyo raxe rayuq eq gotú lhunglhâng bang lé, haú hkyô banshoq lo tai kyô akô. ¹⁰ Lagyo pé lé lo tai kyo bang gi, Magadalaq wà má é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô. ¹¹ Lagyô pé kúm gi, yhangmoq é dang lé dangsôm su ngam pyám kôluí, a jîng byi kó nghut ri. ¹² Nghut kôlhâng, Petruq gi, toq luí lup má đin jé é mù ngóm wú kat le, mâng htup é pán leq tô é lé za myàng mù luí, haú su dut é hkyô lé mau é èq, yhûm shut dum taú lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haú ra-nyí má za, Yesuq é chángzô pé mâ é í yuq gi, Yerusalem wà mó mai nyhit dêng kô wê é Ema-u gâ é wà shut e ló akô. ¹⁴ Yhangnhik gi, dut lai ló é hkyô pé banshoq lé, rayuq eq rayuq tai lhûm nyi akô. ¹⁵ Yhangnhik gi, haú hkyô pé lé rayuq eq rayuq tai hpyé lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang tai lhûm lé lo é gi, hai jung wà nghut akô lúhú?" ga myi kat jâng, yhangnhik gi, myoqdong shûm kut luí, hkyíng yap tô akô. ¹⁸ Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyí luí nhîng, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhê lúhú?" ga myi kat ri.

¹⁹ Yhang gi, "Haî jung lhu?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lunglhang bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui eq haú yuq lé sat pyám rà matú ap byí pyám kômù, yhangmoq gi, Yhang lé tapzjng má jén sat pyám bekô nghut ri. ²¹ Ngamoq kúm gi, haú yuq lé, Israelaq byù myú lé hkyi yù rà sù nghut lhê ngû luí, myit myoqbyu nyi bum lhê. Nghut kôlhang, haú su dut lai ló é gi, hkû-nyí sum nyí lhang bò bê. ²² Hau htoq agó, hkû-ñap noq le, lup má é wú é, ngamoq hpúng má é myiwe wui ra-am gi, ngamoq lé, lo hloq maú akô. ²³ Yhangmoq gi, Yesuq é gungsôm lé a myàng jäng dum taú lò mù, 'Haú Yhumsing dui nyi ri.' ga luí, tai kyô é maumang lagyo htoq shit é shing-rán lé, myang é hkyô lé lo tai kyô akô. ²⁴ Haú mù, ngamoq é luzúm wui ra-am gi, lup má é wú kô le, myiwe wui tai é eq rajung za, dut to lánq é lé é myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé tai kyô akô.

²⁵ Haú hkûn, Yhang gi, "Myiqhtoi pé tai é dang banshoq lé lumjing rà matú, hpaqchyí a bo é eq ngha é sù nhik é, ²⁶ Hkrisduq gi, haú su é wuihke jamjau hkâm zô yu é htang má sheq, Yhâng é hpungwup shingkang má wó wang nyi to rá, a nghut kó lhu?" ga luí, yhangnhik lé myí ri. ²⁷ Yhang gi, yhangnhik lé, Mosheq kâ tô é eq myiqhtoi pé banshoq bang kâ tô é Chyúmdang pé mai, Yhang má âng é dang banshoq é lichyúm lé, tai hpông kyô ri.

²⁸ Ahkuí, yhangmoq, haú nhik e ló é wà má chyâng lò kôjäng, Yesuq gi, lai lò rà su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyum bê mù, mau le chut lò bê nghut ri." ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo rá ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byí ri. ³¹ Haú hkûn, yhangnhik é myoq bóng lò luí, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngá-nhik eq dang nyo lhum é eq Chyúmdang é lichyúm tai hpóng shit é hkûn, ngá-nhik gi, i-myt unghkaú má, achyí aku dut bê a nghut lhu?" ga luí, yhangnhik yhangchang tai lhum akô.

³³ Yhangnhik gi, toq mù, radá dâm Yerusalem wà mó shut dum taú lò kô le, lagyo raxe rayuq eq, yhangmoq eq rahá nyi é bang zup míng to kô é lé lo myang akô. ³⁴ Haú bang gi, "Haú Yhumsing gi, teng za yhang dum dui toq lò bê; Simun lé lhang htoq shit bê nghut ri." ga tai lhum nyi bum akô. ³⁵ Haú hkûn, yhangnhik gi, hkyô má dut lai ló é hkyô pé eq, muk hpé é hkûn má Yesuq lé bûn sé kat é hkyô lé, tai kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm tai nyi tô bum ashí le, Yesuq gi, Yhang gûng yhang, yhangmoq é agùng má yap to luí, "Nungmoq nguingón yuqyo nyi sháng gaq." ga luí, yhangmoq lé tai ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, "Nungmoq gi, haí mù dan nyi bum akô lhu? Haí mù nungmoq é i-myt unghkaú má úng-âng nyi bum akô lhu?" ³⁹ Ngá é loq eq Ngá é hkyí lé wú wú keq. Ngò yhang nghut nyi lhê. Ngo

lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luí, yhangmoq lé tai kyô ri.

⁴⁰ Yhang gi, haú su ga tai mù, Yhâng é hkyí loq lé tún shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luí, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byi akô.

⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé tai é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghû luí, nungmoq eq rahá nyi to ashí hkûn lé, Ngò, nungmoq lé tai kyô tô é pé gi, shí nghut bê." ga tai ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byi ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyi nghû râ buinyi má, shí é mai dum dui toq lô râ hkyô lé le,

⁴⁷ Yerusalem wà mó mai hí luí, byù myû chângjup lé, Yhâng é myìng lé lang luí yubak mara hkyut pyám byi râ hkyô eq myit lhing râ hkyô lé le, hko kyo râ hkyô lé, kâ to bê nghut ri. ⁴⁸ Nungmoq gi, shí pé é saksé pé nghut nyi akô.

⁴⁹ Ngá Wa byi tô é danggidiq* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyi keq." ga luí, yhangmoq lé tai ri.

Yesuq Mauhkûng Shut Shuí Toq Yu Huí É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byi ri. ⁵¹ Haú su kut shimân byi nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô. ⁵³ Yhangmoq gi, noqkuq yhùm má nyi to mù, Garai Gasang lé hkya-on kungton nyi bum akô nghut ri.

* **24:49** Ngá Wà byi tô é danggidiq nghu é gi, Chyoiyúng é Woi-nyí lé tai ri.

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijòq gi, Yhang đông mai hpan tô é chyat nghut lhê; Yhang đông mai a hpan é gi, haù lhang a joq nghut ri. ⁴ Asak chyangxe gi, Yhang má nghut lhê mù, asak haù gi, byu pé é matú maubó nghut ri. ⁵ Haù maubó gi, mauchut má duqbo byi nyi kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haù eq sêng é hkyô lé, saksé hkâm byi luí, yhang é yanmai byù lhunglhang bang wó lumjing kó sháng gaq ga, saksé rayuq đông jé lé é sù nghut ri. ⁸ Yhang gi, haù maubó a nghut; maubó haù lé saksé hkâm byi râ matú za sheq jé lé é ru nghut lhê. ⁹ Byù yuq jup lé duqbo byi é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri.

¹¹ Yhang gi, yhumsing mau má jé lé kôlhang, Yhâng é amyù pé gi, Yhang lé a lhom hap yù kó nghut ri. ¹² Nghut kôlhang, Yhang gi, Yhang lé lhom hap yù luí, Yhâng é mying lé lumjing é bang lhunglhang lé, Garai Gasâng é yhangzô pé dut râ ahkang byi bê nghut ri. ¹³ Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingkan lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shingkan nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkâm é hkùn, garú tai é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaù sù nghut ri.' nghù, ngò tai é sù gi, shí yuq nghut bê." gâ ri. ¹⁶ Yhâng é gumjup é jeju akkaù mai, nga-nhúng banshoq bang gi, shimân jeju lé ralhùm htoq ralhùm myang yu nyi bê nghut lhê. ¹⁷ Hkâsu mù gâ lé, haù jep é tarâ gi, Mosheq é loq đông mai byi é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq èq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô Mht 3:1-12; Mrk 1:1-8; Luk 3:15-17

¹⁹ Yerusalem wà mó mà é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkùn, Yohan saksé hkâm é gi,

a-ô mâ é hkyô pé nghut ri. ²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹ Haú hkûn, yhangmoq gi, "Haú nghut jáng, nàng gi, ó yuq nghut lê lú? Nàng gi, Eliyaq lú?" ga myi kôjáng, yhang gi, "A nghut." ga taí ri; "Nàng gi, haú Myiqhtoi nghut lê lú?" ga dum myi kôjáng, yhang gi, "A nghut." ga tú taí ri.

²² Haú mù, yhangmoq gi, "Ngamoq lé nhang kat bâng chyáng ló wó taí kyo rá matú, nàng gi, ó yuq nghut lê lú? Náng gũng lé nàng hkâsu nghú lê lú? Taí kyô wú laq." ga dum myi akô.

²³ Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lê."* ga tú taí ri.

²⁴ Hparishe pé mai nhang kat é bang ra-am gi, yhang lé, ²⁵ "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhing, haí mù luí, wui-myhup hkám byi nyi lê lú?" ga dangmyi myi akô.

²⁶ Haú hkûn, Yohan tú taí é gi, "Ngò gi, wui èq za wui-myhup hkám byi lê; nghut kôlhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htâng má lé é sù yuq nghut bê; ngò gi, Yhâng é hkyí-tsung tui lé hpyî rá lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byi nyi é, Yodan làng hé hpoq mã é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyi, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pé é yubak mara lé yu pyám byi é Garai Gasâng é Sauzo lé, wú keq! ³⁰ Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghù, ngò taí é sù yhang nghut bê. ³¹ Ngò gi, Yhang ó yuq nghut é lé a sê é nghut lê, nghut kôlhang, Yhang lé, Israelaq byu pé wó sé kó sháng gaq nghù, ngò lé jé mù, wui èq wui-myhup hkám byi nyi é nghut lê." gâ ri.

³² Hau htâng, Yohan saksé hkám é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi rá matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi rá sù nghut lê.' gâ ri. ³⁴ Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lê nghù, ngò saksé hkám lê." gâ ri.

Sâng-hi Lê É Chángzo Pé

³⁵ Hau htang nyi, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luí, "Nungnhik haí o akô lú?" ga myi jáng, yhangnhik gi, "Rabai ê,

* **1:20** Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lê. * **1:23** Esai 40:3

Nàng hkâmá nyi lê lúhú?" ga taú myí kat akô nghut ri. (Rabai gâ é gi, Sará gâ é lichyúm nghut lê.)

³⁹ Haú hkûn, Yhang gi, "Lé keq, haú jáng, nungnhik myàng kó rá nghut lê." ga tú taí ri.

(Haú-u gi, raxê hkyíng[†] kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyùm shoq, Yhang eq rahá é nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik má é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa[‡] gâ é myíng lé, nàng wó yú rá nghut lê." ga taí ri. (Kehpa gâ é lichyúm gi, Petruq gâ é nghut lê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyi, Yesuq gi, Galile mau shut ê rá matú, myit hpyit yú bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

⁴⁴ Hpilip gi, Andre eq Petruq nhik nyi é Bet-saida wà mó má é byù nghut ri. ⁴⁵ Yhang gi, Nahtanelaq lé myàng jáng, "Mosheq mai tarâ laiká má kâ tô é eq myiqhtoi pé mai le lhoq ang luí kâ tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taí kyô ri.

⁴⁶ Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lê lúhú?" ga myi jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akyíng rayuq nghut ri." ga taí ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lúhú?" ga myi jáng, Yesuq gi, "Nang lé, Hpilip èq a wut yú shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lê." ga tú taí ri.

⁴⁹ Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohlkâm le nghut ri." ga taí ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é ngú taí kyô é yanmai, nàng lumjíng lê a nghut lúhú? Hau htoq je kô é muzó pé lé, nàng myàng rá nghut lê." ga taí ri. ⁵¹ Hau htâng, Yesuq xoq taí é gi, "Ngò, nungmoq lé teng za taí kôlé, mauhkúng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyí kô é lé, nungmoq myàng kó rá nghut lê." gâ ri.

2

Wui Lé Tsibiyiq Wíng Dut Nhang É Hkyô

¹ Hau htâng, í nyí ngú rá nyí má, Galile mau má é Hkanaq wà mó má, myiháng poi rallhum joq ri. Haú má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poi haú má jí akô nghut ri. ³ Tsibiyiq wíng

[†] 1:39 Raxê hkyíng gi, myinháng myi hkyíng záng ri. [‡] 1:42 Aramaik dang dông Kehpa gâ é eq Grik dang dông "Petruq" gâ é lichyúm gi, luggok gâ é nghut lê.

jaú tùm to kô é hkûn, Yesuq é yhangnu gi, "Yhangmoq, tsibiyiq wing a wó lo kó nghut ri." ga, Yesuq lé tai ri.

⁴ Haú hkûn, Yesuq gi, "Ánu ê,* haú, nàng gi, Ngò eq haí sêng lhê lú? Ngá é ahkying a jé shi é nghut lhê." ga tú tai ri.

⁵ Nghut kôhang, Yhâng nu gi, haú dui-nhâng zoshâng wui lé, "Yhang haí tai le, haí kut keq." ga tai ri.

⁶ Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wui lé, "Wúng haú pé má wui lhoq pyíng keq." ga tai ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkuí, ratsuí hkû yù mù, poi-up lé yu ló byi keq." ga tai jáng, yhangmoq gi, yu ló byi akô nghut ri.

⁹ Poi-up hpó gi, wui mai dut é tsibiyiq wing haú lé, shuq chyam wú ri; wui hkam é dui-nhâng zoshâng wui gi, tsibiyiq wing haú hkâmai lo é hkyô lé sê to kôhang, yhang gi, a sé nghut ri. Haú mù, yhang gi, lusik lé, jì yù luí,¹⁰ "Yuq hkanmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyàng lé ru y htoq lhê; nghut kôhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga tai ri.

¹¹ Galile mau mâ é Hkanaq wà mó má, Yesuq tûn shit é limik kumlhá gi, Yhang kut é limik kumlhá pé mâ é sâng-hí dàm nghut ri. Yhang gi, Yhâng é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

Noqkuq Yhûm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akô nghut ri.

¹³ Yudaq byu pé é Lhoqlhai Poi jé râ nghut é hkûn, Yesuq gi, Yerusalem wà mó má doq ló ri. ¹⁴ Haú hkûn, noqkuq yhûm wàng má, nojûng, sau, hpûngkyui pé lé ùng nyi é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq râ wase sai yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zo bâng é ngùn htíngchap lé gi, tú hut pyám byi mù, yhangmoq é siboí lé gi, tu mhuq pyám byi ri; ¹⁶ haú hpûngkyui ung zô é bang lé le, "Zè shi pé lé yu htoq ló keq! Ngá Wá é yhûm lé, hpugá jowò hkâkut kól!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhûm lé chyitdap kâng tui é hkyô gi, Ngo lé myi su nyhê jôm pyám râ nghut lhê."* ga kâ tô é lé, myit bún kat akô nghut ri.

¹⁸ Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tûn shit râ matú, ngamoq lé, haí jung limik kumlhá wó tûn shit râ lú?" ga chòm myi akô nghut ri.

¹⁹ Haú hkûn, Yesuq gi, "Noqkuq yhûm shí lé nungmoq hpyoq pyám keq, sum nyi gyoro má, Ngò, haú lé dum tu shap râ nghut lhê." ga, yhangmoq lé tú tai ri.

* 2:4 Ánu é gâ é lé, Grik dông gi, "Myiwe myhí é" ga bo tô é nghut lhê. * 2:17 Hkya-on 69:9

²⁰ Haú Yudaq byu pé gi, "Noqkuq yhûm shî lé, myi xe hkyuq zân tup saî é ru nghut lhê; sum nyí gyoro má za, Nàng wó tu shap râ lhú?" ga tu myí akò nghut ri. ²¹ Nghut kôlhang, Yesuq taí é noqkuq yhûm gi, Yhâng é gùng lé lhoq ang luí taí é nghut ri. ²² Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjǐng akò nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjǐng bum akò nghut ri. ²⁴ Nghut kôlhang, Yesuq gi, byù lunglhang bâng é myit lé sê é yanmai, yhangmoq chyáng, Yhànggùng lé a ap to nghut ri. ²⁵ Yhang gi, byu é i-myt unghkaú má haí lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshít É Hkyô

¹ Nikodimu gâ é Hparishe rayuq nyi ri; yhang gi, Yudaq byu pé é byin tú wapdoq má bo é sù nghut ri. ² Yhang gi, myín lé, Yesuq chyáng lé mù, "Rabai ê, Nàng gi, Garai Gasàng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

³ Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasàng é mingdán lé wó myàng râ a nghut." ga tú taí ri.

⁴ Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasàng é mingdán má wó wàng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ Nungmoq gi, dum hku é hui râ lhê' nghú Ngò taí é dang lé, nàng hkâmaú nyí. ⁸ Haú, lai gi, yhang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tú taí ri.

⁹ Haú hkûn, Nikodimu gi, "Haú gi, hkâsu wó dut râ lhú?" ga myí ri.

¹⁰ Yesuq tú taí é gi, "Nàng gi, Israellaq byu pé é sará rayuq nghut to luí nhîng, haú hkyô pé lé a sê gyo lhú? ¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lhang, a lumjǐng kô é nghut le gi, mauhkúng mingdán eq sêng é hkyô lé taí kyô é nghut le gi, hkâsu kut wó lumjǐng kó râ lhú? ¹³ Mauhkúng mingdán mai gyó lo é sù, haú Byu Yhangzo mai lai luí, mauhkúng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmúi lé tu shap tô é su, haú Byu Yhangzo le tu shap tô é hui ra râ nghut lhê. ¹⁵ Haú mù, haú Byu Yhangzo lé lumjǐng é yuq hkangmó gi, ahtum abyuq é asak wó yù râ nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjǐng é sù ó yuq nghut kôle, htên byoq é a hui é za,

ahtum abyuq é asak wó yû sháng gaq ga, rayuq za é Yhâng é Zote lé byí pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byi rá matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rá matú sheq nhang kat é ru nghut lhê. ¹⁸ Yhang lé lumjǐng é sù gi, mara byí é hui rá a nghut; nghut kôhlang, Yhang lé a lumjǐng é sù kúm gi, Garai Gasâng é Yhangzo zote lé a lumjǐng é sù nghut é yanmai, mara byí é hui to gù bê nghut ri. ¹⁹ Maubó gi, mingkan htoq má lé jé to bê; nghut kôhlang, byu pé kut é hkyô gi, agê ashop hkyô nghut é yanmai, yhangmoq gi, maubó lé chytit rá malaî, mauchut lé chytit akô nghut ri; haú gi, mara byí é hui rá hkyô yhang nghut ri. ²⁰ Agê ashop hkyô kut é sù ó yuq nghut kôle, maubó lé a nguì nghut ri; haú yuq gi, yhang kut é hkyô lhoq byông htoq kat rá lé gyyuq é yanmai, haú maubó shut lé lô rá a nghut. ²¹ Nghut kôhlang, haú tengmán hkyô đông asak tù é sù ó yuq le, yhumsǐng kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyi lui, wui-myhup hkâm byi ri. ²³ Haú u lé, Yohan gi, Salim nàm mã é E-nun gâ é jowò má, wui gyai myo joq é yanmai, wui-myhup hkâm byi nyi ri; byu pé gi, abyit alan lé lô kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htông a lhoq hkyô shí é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng lui, dang htǐng htǐng lhùm bum akô nghut ri. ²⁶ Hau htâng, yhangmoq gi, Yohan chyáng lé lui, "Rabai ê, Yodan làng hé hpoq shut nàng eq rahá nyi lui, nàng eq saksé hkâm byi é Sù gi, ahkuí, wui-myhup hkâm byi nyi é nghut mù, yuq hkangmó gi, Yhâng chyáng e bum akô nghut ri mhaî." ga, yhang lé tai akô.

²⁷ Haú eq séng lui, Yohan tù tai é gi, "Byù rayuq gi, mauhkúng mai byí é za a nghut jáng, haí le wó hap yù rá a nghut. ²⁸ Ngò gi, Hkrisduq a nghut, Yhâng é hí má nhang kat huí é sù za nghut lhê.' nghù, ngò tai é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, làng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra rá nghut lhê; ngò gi, yom ló ra rá nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq má é sù kúm gi, myigùng htoq eq séng é nghut lui, myigùng htoq eq séng é đông za tai ri; mauhkúng mai lé é Sù gi, lhunglháng é ahtoq má nghut ri. ³² Yhang gi, wó myâng wó gyô é hkyô lé, saksé hkâm kôhlang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasâng eq nhang kat é hui Sù gi, Garai Gasâng é mungdang lé tai ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri. ³⁵ Haú Íwa gi, Zo lé chytidap lui, jung hkangmó lé Yhâng é loq má ap byi bê nghut ri. ³⁶ Haú Zo lé lumjǐng é sù ó yuq nghut kôle, ahtum abyuq é asak wó lhê; nghut kôhlang, haú Zo lé he-ngik pyám é sù ó yuq nghut kôle, asak haú lé myàng rá a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhi Hui É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byi nyi ri gâ é hkyô lé, haü Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.) ³ Haü hkyô lé, Yesuq sé jáng, Yhang gi, Yuda mau mai htoq mù, Galile mau shut dum taü ló bê nghut ri.

⁴ Ahkuí, Yesuq gi, Samariq mau mai sô lai ló rá dut bê nghut ri. ⁵ Haü mù, Yhang gi, Yakup mai yhang zo Yosep lé byí é maumyi rajap eq chyâng lhúm é, Suhka ga myhíng é, Samariq mau má é wà mó ralhú má lo jé ri. ⁶ Haü má, Yakup é wuihtung le joq to lui, Yesuq gi, hkyô sô ngu é yanmai, wuihtung hau é nàm má zung gyó tô ri. Haü u gi, nyí-káng raxe í hkyíng* nghut bê nghut ri.

⁷ Haü hkûn, Samariq myiwe myhi rayuq wui lé hkam ri; Yesuq gi, yhang lé, "Ngo lé wui byi shuq laq." ga taí ri. ⁸ (Haü u gi, Yhâng é chángzô pé, zoshuq wui rá matú wà hkaü shut e byuq kô é ahkyíng nghut ri.)

⁹ Haü Samariq myiwe myhi gi, Yhang lé, "Nàng gi, Yudaq byu rayuq nghut to lui nhíng, ngò Samariq myiwe myhi chyáng, haü mù shuq wui dúng lhê lhú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kô nghut ri.)

¹⁰ Haü hkûn, Yesuq gi, yhang lé, "Nàng gi, haü Garai Gasâng é chyunghuq lé le, nang lé wui dung sù ó yuq nghut é lé le, sê é nghut le gi, noq mai Yhang lé dúng tóngbán lui, Yhang gi, nang lé asak-wui byi berâ nghut lhê." ga tú taí ri.

¹¹ Myiwe myhi haü gi, "Yhumsíng ê, Nàng gi, wui hkâm rá zè haí le a wó, wuihtung le nik ri; haü asak-wui lé, Nàng hkâmá é wó yú rá lhú? ¹² Ngamoq é íwa Yakup gi, ngamoq lé wuihtung shí byí to bê nghut lhê; yhang yhang le, yhang zo pé le, yhang rém é dusak pé le, wuihtung shí má é wui shuq bekô nghut ri; Nàng gi, Yakup htoq je kô lhê lhú?" ga Yhang lé taí ri.

¹³ Yesuq gi, "Wui shí lé shuq é sù ó yuq le, wuìshit é dum hui rá nghut lhê.

¹⁴ Nghut kôlhang, Ngò byí é wui lé shuq é sù ó yuq nghut kôle, wuìshit é hkâ-nhám a hui lo rá nghut lhê. Ngò byí é wui haü gi, haü yuq má, ahtum abyuq é asak matú wuibum dut rá nghut lhê." ga yhang lé tú taí ri.

¹⁵ Myiwe myhi haü gi, Yhang lé, "Yhumsíng ê, ngò gi, wui le a shit lo, shí má wui hkâm le a lé ra lo sháng gaq, wui haü ngo lé byi laq." ga taí ri.

¹⁶ Haü hkûn, Yesuq gi, "Ló mù, nung làng lé ló wut lò aq." ga, yhang lé taí ri.

¹⁷ Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri. ¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tò é yuqgè le nung làng a nghut. Nàng gi, têng é dang taí bê nghut ri." ga taí ri.

¹⁹ Haü hkûn, myiwe myhi haü gi, "Yhumsíng ê, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é íchyi íwá pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

²¹ Haü hkûn, Yesuq taí é gi, "Myiwe myhi é, Ngo lé jing aq; bùm shí má le a nghut, Yerusalem wà mó má le a nghut e za, haü Íwa lé noqkuq rá ahkyíng, jé lò nyi bê nghut ri. ²² Nungmoq Samariq byu pé gi, yhumsíng lháng a sê é lé, noqkuq akô; ngamoq kúm gi, ngamoq sé é lé noqkuq lhê; hkâsu mù gâ le, hkyi

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

yù hkyô gi, Yudaq amyû mai lo é nghut lhê.[†] 23 Nghut kôlhang, haù têng é đông noqkuq é bang gi, woi-nyí mai le, tengmán hkyô mai le, haù Íwa lé noqkuq râ ahkyíng gi, jé lo nyí bè nghut luí, ahkuí lhang jé to bê nghut ri; hkâsu mù gâ le, haù Íwa gi, haù su kut noqkuq é bang lé ô nau ri. 24 Garai Gasang gi, woi-nyí nghut lhê; haù mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

25 Myiwe myhí haù gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

26 Hau htâng, Yesuq gi, "Nàng eq dang nyo nyi é sù ngò gi, haù yuq nghut lhê." ga taí ri.

Haù Chángzô Pé Dum Taù Jé Lo É Hkùn Lhê Hkyô

27 Haù u lé, Yhâng é chángzô pé gi, dum taù jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maù byuq bum akô. Nghut kôlhang, "Nàng, haí ô ri lú?" ga le, "Haí mù Yhang eq dáng nyo nyi lhê lú?" ga le, Yhang lé ó yuq a myi kó nghut ri.

28 Hau htâng, myiwe myhí haù gi, yhâng é wui yambú lé tô pyâm to luí, wà shut taù wang ló mù, wà byù wui lé ló taí kyô é gi, 29 "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. 30 Haù mù, yhangmoq gi, wà mai htoq lé luí, Yesuq chyáng lé lo bum akô nghut ri.

31 Haù u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

32 Haù hkùn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tù taí ri.

33 Haù mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhum bum akô.

34 Haù hkùn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. 35 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lú? Ngò, nungmoq lé taí kôlé, nungmoq é myoq hpóng luí, haù yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. 36 Haù kyô hkyô sù eq kyô shu sù gi, rahá wó gabú kó sháng gaq ga, ahkuí lhang, haù kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shù tsíng to bê nghut ri. 37 Haù su mù, 'Rayuq gi, sân hkyô, góyuq gi, shù yù.' gâ é sanghkyang gi, têng ri. 38 Nungmoq a zui saí tô é jang mã é shù yù râ matú, nungmoq lé Ngò nhang kat bê nghut lhê. Góbang gi, haù má wum kat zui saí to bê nghut mù, nungmoq gi, haù bang zui saí é akyù lé shu yù bekô nghut ri." gâ ri.

Samariq Byù Myo Myo Lumjíng Kô É Hkyô

39 "Yhang gi, ngò kut lai lò bê hkyô lhunglhang lé, taí kyô ri." ga luí, myiwe myhí haù saksé hkâm é yanmai, haù wà mã é Samariq byù myo myo gi, Yesuq lé lumjíng bùm bekô nghut ri. 40 Haù mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í

† 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé đông danggidiq byi to é nghut é lé taí nau é nghut ri.

nyí bo nyí bê nghut ri. ⁴¹ Yhâng é dang pê é yanmai, byù myo myo gi, lumj́ng bang dut jat lò bekô nghut ri.

⁴² Yhangmoq gi, myiwe myhí haù lé, "Ahkuí, ngamoq lumj́ng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chòm taí akô nghut ri.

Mingsuwún Hpó É Yhangzo Lé Lhoq Gê Byí É Hkyô
Mht 8:5-13; Luk 7:1-10

⁴³ Í nyí lai jáng, Yesuq gi, haù mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wà mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

⁴⁶ Yesuq gi, Yhang mai haù wuì lé tsibiyiq wing dut nhang é, Galile mau má é Hkanaq wà mó má, ê dum kûm ri. Haù ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haù wó gyo jáng, yhang gi, Yesuq chyáng é mù, shí-nò no nyí é yhangzo lé, lé lhoq gê byi rá matú, Yhang lé dúng tóngbân ri.

⁴⁸ Haù hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumj́ng kó rá a nghut." ga taí ri.

⁴⁹ Mingsuwún haù gi, "Yhumsing ê, ngá zo a shí shimá gyó lé laq." ga taí ri.

⁵⁰ Haù hkûn, Yesuq gi, "Nàng wó ló bê; nung zo byùn râ nghut lhê." ga tù taí ri.

Suwún haù gi, Yesuq taí é dang haù lé gyô j́ng luí, tau ló bê nghut ri.

⁵¹ Yhang gi, hkyô má ru nghut nyí ashí hkûn, yhâng é dui-nhâng zoshâng wuì gi, yhang lé lé hui luí, zoshâng haù gè byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é chàm ló byuq bê nghut ri." ga taí kyô akô.

⁵³ Haù hkûn, ahkyíng haù gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haù yhangwa bún sé bê nghut ri. Haù mù, yhang eq yhâng yhumbyù banshoq bang gi, lumj́ng bekô nghut ri.

⁵⁴ Haù gi, Yesuq, Yuda mau mai Galile mau má lé jé é htâng, í dâm ngû rá dá kut shít é limik kumlhá nghut ri.

5

Wuìtum Yàm Má, Nòhpyo Lhoq Gê Byí É Hkyô

¹ Hau htàng a myáng má, Yudaq byu pé é poí ralhúm joq é yanmai, Yesuq gi, Yerusalem wà mó má doq ló ri. ² Ahkuí, haù Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuìtum ralhúm joq ri; hau é lhíngkhyuq má, jìrop ngo lhum joq tò ri. ³ Jìrop haù pé má, myoqjit bang, hkyí hten bang, gùngjum shí bang ajùm ayò leq tò bum akô. (Haù bang gi, wuì dui núm rá lé láng tò é bang nghut akô. ⁴ Hkâsù mù gâ le, haù Yhumsing é maumang lagyo gyó lé lé kut mù, wuì lé, lé lhu nhún jáng, wuìtum haù má hí wó wang é sù gi, haí jung ana wa dap to kôlhang, ge byuq

é huí é yanmai nghut ri.)⁵ Súm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lúh?" ga myí ri.

⁷ Nò sù haú yuq gi, "Yhumsing é, wui dui nún lo é hkún, wuihtum má wàng rã matú, ngo lé garúm rã byù ó a nyi; ngò wàng rã nghu jáng, góyuq hí, ngá hí má wàng wàng dut ri." ga tũ tai ri.

⁸ Hau htâng, Yesuq gi, yhang lé, "Toq aq! Nàng é taphkang yu chùng lúi, sô lô aq." ga tai ri. ⁹ Hau yuq gi, radá dâm nò ge byuq bê nghut lúi, yhâng é taphkang yù mù, sô lô bê nghut ri.

Haú nyí gi, Bánno buinyi nghut ri. ¹⁰ Haú mù, Yudaq byu pé gi, haú nò ge byuq é huí sù lé, "Hkũ-nyí gi, Bánno buinyi nyí nghut é yanmai, nàng, taphkang waq é gi, tarã lu lai bê nghut ri." ga tai akô.

¹¹ Nghut kôlháng, yhang tũ tai é gi, "Haú ngo lé lhoq gê byi sù gi, ngo lé, 'Nàng é taphkang yu chùng mù, sô lô aq.' ga tai é nghut lhê." gã ri.

¹² Haú mù, yhangmoq gi, "'Nàng é taphkang yu chùng mù sô lô aq.' ga, nang lé tai é sù gi, ó yuq wá nghut ri lúh?" ga myí akô.

¹³ Nghut kôlháng, haú ó yuq nghut é lé, nò ge byuq é huí sù gi, a châng sê kat nghut ri; hkãsu mù gã le, Yesuq gi, haú mã é byù moq mó má wang nyó lô byuq é yanmai nghut ri.

¹⁴ Htâng má, Yesuq gi, haú yuq lé noqkuq yhùm má myàng jáng, "Wú aq, nàng wángzãn bê nghut ri; hí lhê htoq má je wuihke é hkyô a hui zo sháng gaq, mara hkãkut shut lo." ga lúi, yhang lé tai ri. ¹⁵ Haú yuq gi, htoq lô mù, yhang lé lhoq gê byi é sù gi, Yesuq nghut ri ga, Yudaq byu pé lé tai kyô ri.

Asak Wó Yú Rã Hkyô

¹⁶ Haú mù, Yudaq byu pé gi, Bánno buinyi nyí má, Yesuq, haú hkyô kut é yanmai, Yhang lé gunjang lo akô nghut ri. ¹⁷ Haú hkún, Yesuq gi, yhangmoq lé, "Ngá Wa gi, hkũ-nyí jé shoq, hkã-nhám le mù zui nyi é nghut mù, Ngò le mù zui nyi lhê." ga tai ri. ¹⁸ Haú mù lúi, Yesuq gi, Bánno buinyi lé lhoq htên é htoq agó, Garai Gasang lé lháng, Yhâng Wa ga wut é đông, yhumsing gùng lé, Garai Gasang eq lhoq whui é yanmai, Yudaq byu pé gi, Yhang lé sat pyám rã matú, je riyhang shikut lo akô nghut ri.

¹⁹ Yesuq, yhangmoq lé tũ tai é gi, "Ngò, nungmoq lé teng za tai kôlé, haú Zo gi, yhumsing é myit đông hai le a wó kut; Yhâng Wa kut é hkyô lé myang é gù za wó kut é nghut lhê; hkãsu mù gã le, haú Íwa kut é hkyô lé za, haú Zo châng kut é yanmai nghut lhê. ²⁰ Hkãsu mù gã le, haú Íwa gi, Zo lé chyitdap é nghut lúi, Yhang kut é hkyô lhunglháng, haú Zo lé tũn shit ri; nungmoq maú hông shoq, shí pé htoq je ko é hkyô pé lé lháng, haú Zo lé tũn shit shirã nghut lhê. ²¹ Haú Íwa gi, shí bê bang lé lhoq dui toq mù, yhangmoq lé asak byi é eq rajung za, haú Zo le, Yhang byi nau é bang lé, asak byi rã nghut lhê. ²² Hau htoq agó, haú Íwa lé hkunggã é eq rajung za, haú Zo lé le, lhunglháng bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhunglháng, haú Zo lé lum to bê nghut ri. ²³ Haú Zo lé a hkunggã é sù gi, haú Yhang lé nhang kat é sù Íwa lé le, a hkunggã é sù nghut ri.

²⁴ Ngò, nungmoq lé teng za tai kôlé, Ngá dang lé gyo lúi, Ngo lé nhang kat é Sù lé lumjing é sù, ó yuq nghut kôlé, mara byi é a hui e za, ahtum abyuq

* 5:4 Bun zo 3 lhum mã é ahtang túm eq bun zo 4 lhum gi, chyúmding myo myo má a bo é nghut lhê.

é asak wó é nghut lhê; haú yuq gi, shi é mai lut luí, asak duì bê sù nghut ri. ²⁵Ngò, nungmoq lé teng za tái kôlé, haú Garai Gasâng é Yhangzô é htê lé, shi byuq bê bang wó gyo rá ahkyíng gi, jé lo nyi bê nghut ri; ahkuí lháng jé to bê nghut ri. Htê haú lé gyô é bang gi, asak duì kó rá nghut lhê. ²⁶Hkâsu mù gà le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷Hau htoq agó, Yhang gi, haú Byu Yhangzo nghut é yanmai, Garai Gasang gi, tará jéyáng rá ahko ahkáng, Yhang lé byi bê nghut ri.

²⁸Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló rá ahkyíng jé lò rá nghut lhê. ²⁹Ge é hkyô kut é bang gi, asak duì rá matú, duì toq kó rá nghut lhê; agè ashop hkyô kut é bang gi, mara byí é hui zo rá matú, duì toq kó rá nghut lhê. ³⁰Ngò gi, Ngá myit dông mai hai le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gà le, Ngò gi, Ngò ô nau é dông châng é a nghut e za, Ngo lé nhang kat é Sù ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹Ngá gùng lé ngò saksé hkâm é nghut jáng, ngò za saksé hkâm é hkyô gi, teng rá a nghut. ³²Ngá é hkyô lé saksé hkâm byí é Sù (Ngá Wa) góyuq nyi lhê; Ngò eq séng luí, haú yuq hkâm é saksé gi, têng é hkyô lé, Ngò sê lhê.

³³Nungmoq gi, Yohan[†] chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴Ngò gi, xângzo byu pé mai saksé hkâm byi rá lé, ra luí a nghut, nghut kôlháng, nungmoq hkyi yu é wó hui rá matú sheq, haú su nghú tái é ru nghut lhê. ³⁵Yohan gi, duq nyi é myibung su duqbó byí é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

³⁶Nghut kôlháng, Ngò wó é saksé gi, Yohan byí é saksé htoq je kô lhê; hkâsu mù gà le, ahkuí Ngò zui sai nyi é muzó gi, Ngò lhoq pán rá matú, haú Íwa, Ngo lé ap byí tô é nghut luí, haú Íwa, Ngo lé nhang kat é hkyô lé, saksé hkâm byí nyi ri. ³⁷Hau htoq agó, haú Ngo lé nhang kat é sù Íwa le, Ngò eq séng luí saksé hkâm byí ri; nungmoq gi, Yhâng é htê lé le, a wó gyô wú kó; Yhâng é gungghyâng lé le, a myang wú kó; ³⁸haú Yhâng é mungdang le, nungmoq chyáng a bò kó nghut ri; hkâsu mù gà le, nungmoq gi, Yhang nhang kat é Sù lé a lumjíng kô é yanmai nghut ri. ³⁹Nungmoq gi, haú Chyúmdang mai ahtum abyuq é asak wó yú rá nghut lhê ga myit yù kô é yanmai, haú Chyúmdang má ho wú akô nghut ri; nghut kôlháng, Chyúmdang haú gi, Ngò eq séng luí saksé hkâm byí ri; ⁴⁰nghut kôlháng, asak wó yú rá matú, nungmoq gi, Ngá chyáng a kám lé kó nghut ri.

⁴¹Ngò gi, byu eq hkya-ôn é lé a lhom yu é nghut lhê. ⁴²Nghut kôlháng, nungmoq lé gi, Ngò sê lhê; nungmoq é i-mytit hkaú má, Garai Gasang lé chyitdap é myit a bò kó nghut ri. ⁴³Ngò gi, Ngá Wá é myíng mai jé lé é sù nghut kôlháng, nungmoq gi, Ngo lé a lhom hap yù kó; yhâng myíng yhang lang é byù, gotú rayuq jé lé é ru nghut le gi, haú yuq lé, nungmoq lhom hap yù kó rá nghut lhê. ⁴⁴Nungmoq gi, rayuq eq rayuq hkya-ôn lhùm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhíng, hkâsu kut wó lumjíng kó rá lú?

[†] 5:33 Yohan shí yuq gi, Wui-myhup Sará Yohan nghut lhê.

⁴⁵ Nghut kôlhang, haù Íwâ é hí má, Ngò, nungmoq lé mara hùn nhò hkâ-ngâm kó; nungmoq lé mara hun é sù gi, haù nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjng kô é ru nghut le gi, Ngo lé le lumjng kó râ nghut lhê; hkâsu mù gà le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjng kô é nhing, Ngá dang lé, hkâsu kut wó lumjng kó râ lúhú?" gà ri.

6

Byù Ngo Hkying Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

¹ Hau htâng a myáng má, Yesuq gi, Tiberi nhông le gà é, Galile nhông he hpoq shut gù dap ló bê nghut ri. ² Haù hkùn, byù ajùm ayò gi, haù nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akò nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhúng, hkâmá ê wó wuí râ lúhú?" ga taí ri. ⁶ Yesuq, haù su ga taí é gi, yhang lé chyam wú râ matú za nghut ri; hkâsu mù gà le, hkâsu kut râ hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho eq muk wui le lhang, rayuq ratsuí tsuí ngap râ a nghut." ga tú taí ri.

⁸ Haù hkùn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gâm byi râ lúhú?" ga taí htoq kat ri.

¹⁰ Yesuq gi, "Haù shiwa byu pé lé, zùng nhâng keq." ga taí ri. Jowò haù gi, mhán htu é jang nghut mù, yuqgè wui baù lhang, ngo hkying kô zung tô bùm bekò nghut ri; ¹¹ hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gâm byí ri. Haù eq rajung za, ngozo lé le haù su kut ri.

¹² Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haì le a langsâ pyám sháng gaq." ga taí ri. ¹³ Haù mù, yhangmoq gi, zô myhit tô é muk-yo muk ngo long má é ajap azo pé lé châng guq tsing le, raxe í mung bying shoq wó guq tsing yu akò nghut ri.

¹⁴ Haù shiwa byu pé gi, Yesuq kut é limik kumlhá lé myàng kô é hkùn, "Shí yuq gi, mingkan htoq má jé lé lô râ gà é, Myiqhtoi yhang nghut ri-nhung!" ga taí bum akò. ¹⁵ Yesuq gi, yhangmoq lé mù, Yhang lé hkohkâm zik kut nhâng kó râ dà é hkyô lé, sê é yanmai, Yhang baù tsik za bùm shut dum haq doq ló bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

¹⁶ Buigyum htâng, Yhâng é chángzô pé gi, haù nhông shut gyó ló mù, ¹⁷ lhai má wang ji luí, nhông hé hpoq má é Kaperna-um wà shut gù e ló akò; haù hkùn, mauchut bê nghut kôlhang, Yesuq gi, yhangmoq chyáng a jé gyó lo shi

* **6:7** Denari rachap gi, byù rayuq é ra-nyí é zuihpau eq wuí é nghut lhê.

nghut ri. ¹⁸ Haú u lé, laidun htan lo é yanmai, wuìlhêng toq lô bê nghut ri. ¹⁹ Yhangmoq gi, sum myi déng kô lhai kôn e ló kô é hkûn, Yesuq gi, nhông htoq má so luí, haú lhai shut chyâng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhàng, Yesuq gi, "Hkâgyuq kó, Ngò ru nghut lhê." ga yhangmoq lé tai ri. ²¹ Haú mù, yhangmoq gi, Yesuq lé gabú myit èq lhai hkaú má shuí hâng yù nau akò. Haú hkûn, lhai haú gi, radá dâm yhangmoq jé nau é jang wuiyam má jé bê nghut ri.

²² Nhông hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq jì e za, chángzò pé baú jì htoq ló kô é hkyô lé, hau htang nyi, bûn sê kat akò nghut ri. ²³ Haú hkûn, haú Yhumsing, jeju hkya-ôn é htàng, byu pé muk zô é jowò nàm má, Tiberi myuq mâ é lhai pé jé lé bum ri. ²⁴ Haú byù moq mó gi, Yesuq eq Yhâng é chángzò pé, haú má a nyi lo kô é hkyô lé sé kô é yanmai, Yesuq lé châng hô rá matú lhai haú pé má wàng jì mù, Kaperna-um wa shut e ló akò nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lú?" ga, Yhang lé myi akò.

²⁶ Haú hkûn, Yesuq gi, "Ngò, nungmoq lé teng za tai kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byi rá nghut é ahtum abyuq é asak é matú, ru gîng nyi é zoshuq wó yù rá lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tù tai ri.

²⁸ Haú mù, yhangmoq gi, "Garai Gasang ô nau é muzò pé zui sai rá matú, ngamoq hái kut ra rá lú?" ga Yhang lé myi akò.

²⁹ Haú hkûn, Yesuq gi, "Garai Gasang nhang kat é Sù lé, lumjîng é gi, Garai Gasang ô nau é muzò nghut bê." ga tù tai ri.

³⁰ Haú mù luí, yhangmoq gi, Yhang lé, "Ngamoq myoq èq wó myàng luí, Nàng lé lumjîng rá matú, Nàng, hái jung limik kumlhá kut shit rá lú? Nàng, hái jung kut shit rá lú? ³¹ Haú Chyúmdang má, "Yhang gi, yhangmoq zo rá matú, mauhkûng mai muk byi ri."* ga kâ tô é eq rajung za, ngamoq é ichyí íwa pé gi, haú yoso hkaú má mannaq muk zo bekô nghut lhê." ga tai akò.

³² Haú hkûn, Yesuq gi, yhangmoq lé, "Ngò, nungmoq lé teng za tai kôlé, nungmoq lé mauhkûng mai muk byi é Sù gi, Mosheq a nghut, haú Ngá Wa sheq, nungmoq lé mauhkûng mai tengmân é muk byi é Sù ru nghut lhê.

³³ Hkâsu mù gâ le, Garai Gasang byi é muk gi, mauhkûng mai gyó lé luí, haú mingkan lé asak byi é Sù nghut lhê." ga tai ri.

³⁴ Yhangmoq gi, "Yhumsing ê, ahkuí mai, ngamoq lé muk haú hkâ-nhám le byi nyi laq." ga chôm tai bum akò.

³⁵ Haú mù, Yesuq tai kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui rá a nghut; Ngo lé lumjîng é sù le, hkâ-nhám le wuìshit é hui rá a nghut. ³⁶ Nghut kôlhàng, Ngò, nungmoq lé tai wú bê eq rajung za, nungmoq gi, Ngo lé myang wú é nghut kôlhàng, a lumjîng shi kó nghut ri. ³⁷ Haú Íwa mai Ngo lé ap byi tô é byù lhunglhang bang gi, Ngá chyáng lé kó rá nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám rá a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut rá matú a nghut e za, Ngo lé nhang kat Sù ô nau é hkyô lé kut

* 6:31 Htoq Ló 16:4

râ matú ru nghut lhê. ³⁹ Haú Ngo lé nhang kat Sû ô nau é hkyô gi, Yhang mai Ngo lé ap byí tô é bang mã é rayuq lé lhang, Ngò, a lhoq hpyuq pyâm e za, jhtùm buinyi má yhangmoq lé dum lhoq dui toq yú râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjng é sù yuq hkgangmó, ahtum abyuq é asak lé wó yú râ matú nghut lhê; Ngò le, jhtùm buinyi má haú bang lé lhoq dui toq râ muk lhê." gâ ri.

⁴¹ Haú mù, "Ngò gi, mauhkúng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi. ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haú sù é nhing, ahkuí, 'Ngò gi, mauhkúng mai gyó lé é nghut lhê.' ga, Yhang hkâsu kut wó taí lhê lú?" gâ bum akò.

⁴³ Haú hkùn, Yesuq gi, "Nungmoq ahkaú má hkâtaí put nyi kó. ⁴⁴ Haú Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jhtùm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunglhang bang gi, Garai Gasâng eq mhoq yú é hui kó râ nghut lhê.'* ga kâ tô é eq rajung za, haú Íwâ chyáng mai gyo yú, mhoq yu é bang yuq hkgangmó gi, Ngá chyáng lé kó râ nghut lhê. ⁴⁶ Haú gi, rayuq yuq mai, haú Íwa lé myang wú bê nghú nau é a nghut; Garai Gasâng chyáng má é Sù za sheq, haú Íwa lé myang wú é Sù nghut lhê. ⁴⁷ Ngò, nungmoq lé teng za taí kôlé, lumjng é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é ichyí íwâ pé gi, haú yoso hkaú má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shi gi, mauhkúng mai gyó lé lo é muk nghut lhê; haú lé zô é sù gi, a shi lo râ nghut lhê. ⁵¹ Ngò gi, mauhkúng mai gyó lé lo é, haú asak dui é muk nghut lhê; rayuq yuq, muk shi lé zô é nghut le gi, ahtum abyuq dui nyi râ nghut lhê; muk shi gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

⁵² Haú mù, haú Yudaq byu pé gi, "Byú shi yuq gi, nga-nhúng lé, Yhâng é gungsho hkâsu kut wó byi tso râ lú?" ga, yhangmoq yhangchang dang htng htng lhùm bum akò.

⁵³ Haú hkùn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jhtùm buinyi má, haú yuq lé lhoq dui toq yú râ nghut lhê. ⁵⁵ Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luí, Ngò le haú yuq má nghut nyi bê nghut lhê. ⁵⁷ Haú rú dui nyi é Íwa gi, Ngo lé nhang kat luí, Ngò gi, haú Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê. ⁵⁸ Shí gi, mauhkúng mai gyó lé lo é muk nghut lhê. Nungmoq é ichyí íwâ pé gi, mannaq muk zo kôle, shi byuq bekô nghut ri; nghut kôlhang, muk shi lé zô é sù gi, ahtum abyuq dui nyi râ nghut lhê." ga taí ri. ⁵⁹ Dang haú pé gi, Yesuq, Kaperna-um wà mã é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰ Yhâng é chángzô pé myo myo gi, haù lé wó gyo kôjáng, "Dang shî gi, gyai wuî ri. Ó yuq wá wó cháng râ lúhú?" ga taí bum akô.

⁶¹ Yesuq gi, haù eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shi é yanmai, nungmoq myit htên bum akô lúhú? ⁶² Haù Byu Yhangzo gi, Yhang nyi lai lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lúhú? ⁶³ Haù Woi-nyí gi, asak byí lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng mâ é ra-am gi, a lumjǐng kó nghut ri." ga taí ri. Hkâsu mù gâ le, ô pé gi, a lumjǐng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yhang xoq taí é gi, "Haù su mù, haù Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

⁶⁶ Haù dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekò nghut ri.

⁶⁷ Haù su mù, Yesuq gi, haù chángzo raxe í yuq lé, "Nungmoq le, ló byuq nau akô, a nghut lúhú?" ga myí ri.

⁶⁸ Haù hkûn, Simun Petruq gi, "Yhumsǐng ê, Nàng gi, ahtum abyuq é asak mungdang wó Sù nghut to bê lé nhǐng, ngamoq gi, ó yuq chyáng ê shirâ lúhú? ⁶⁹ Nàng gi, Garai Gasâng é Chyoiyúng Sù nghut é lé, ngamoq, lumjǐng lhê, sê nyi lhê." ga, Yhang lé tú taí ri.

⁷⁰ Haù hkûn, Yesuq gi, "Nungmoq raxe í yuq lé, Ngò hkyin yù bê a nghut kó lúhú? Nghut kôle, nungmoq mâ é rayuq gi, nat nghut ri." ga tú taí ri. ⁷¹ (Yhang gi, haù Simun Iskarut é yhangzo, Yudaq lé taí nau é nghut ri; haù yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wui

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ² Nghut kôlháng, haù Yudaq byu pé é Saksé Zúm Poí chyáng lo nyi é hkûn, ³ Yesuq é yhanggu yuqzô pé gi, Yhang lé, "Nàng é chángzô pé gi, Nàng kut é laklai kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq. ⁴ Myǐng hu nau é sù gi, hkaù zaú luí haí le a kut wú é nghut lhê. Nàng gi, haù pé lé kut nyi bê nghut é yanmai, mingkan lé, Nàng gǐng tǐn shit aq." ga taí akô. ⁵ Hkâsu mù gâ le, yhanggu sǐng yuqzô pé lháng, Yhang lé a lumjǐng kó nghut ri.

⁶ Haù mù luí, Yesuq gi, yhangmoq lé, "Ngá é ahkyǐng gi, a jé shi nghut ri; nungmoq é ahkyǐng kúm gi, hká hkûn le joq nyi ri. ⁷ Haù mingkan gi, nungmoq lé a jú a wó kut kó nghut ri; nghut kôlháng, Ngo lé gi, a jú kó; haí mù gâ le, yhang kut é hkyô gi, agè ashop é nghut é lé, Ngò, saksé tǐn shit é yanmai nghut ri. ⁸ Nungmoq gi, poí haù shut doq ló keq. Ngò kúm gi, Ngá é ahkyǐng a jé shi nghut é yanmai, poí haù shut a doq ló shirâ nghut lhê." ga taí ri. ⁹ Haù su ga taí luí, Yhang gi, Galile mau má nyi gyó to bê nghut ri.

¹⁰ Nghut kôlháng, Yhang gu pé, haù poí shut doq ló byuq é htâng má, Yhang gi, de de a nghut é dǒng, tsik za cháng doq ló bê nghut ri. ¹¹ Yudaq byu pé gi,

haù poi má, Yhang lé châng hô kômù, "Haù yuq gi, hkâmá nghut lhê lú?" ga, myi wún akò nghut ri.

¹² Haù byù hpúng hkaù má, Yhang eq séng luí tai lhum bùm kô é má, ra-am gi, "Yhang gi, byù gè nghut ri." ga tai kôjáng, ra-am gi, "A nghut, Yhang gi, byu pé lé hkyô shuí nhoq sù nghut ri." ga tũ tai akò. ¹³ Nghut kôlhang, haù Yudaq suwún wú lé gyuq kô é yanmai, ó yuq le, Yhang eq séng é hkyô lé de de a wám tai kô nghut ri.

Haù Poi Má, Yesuq Mhoqshit É Hkyô

¹⁴ Haù poi rawuí nghut lô é hkùn, Yesuq gi, noqkuq yhùm má doq é luí, mhoqshit hi lô bê nghut ri. ¹⁵ Haù hkùn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haù-i hkâsu mù sê lhê laq?" ga myi bum akò.

¹⁶ Haù mù, Yesuq tũ tai é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng má é nghut a nghut é eq, Ngá é myit đông tai é dang nghut a nghut é lé, yhang sé gám hkoq yũ rá nghut lhê. ¹⁸ Yhumsing é myit đông tai é sũ gi, yhumsing é matú aróng hô sũ nghut ri; nghut kôlhang, yhumsing lé nhang kat su é matú, aróng ho é sũ gi, tengmán é byù nghut ri; yhang má, a tengmán é hkyô hai le a bò nghut ri. ¹⁹ Mosheq gi, nungmoq lé jep é tará byi to bê, a nghut kó lú? Nghut kôlhang, nungmoq ó yuq le, jep é tará haù lé a cháng kó nghut ri. Hai mù luí, Ngo lé sat nau nyi akò lú?" gâ ri.

²⁰ Haù hkùn, haù byù hpúng gi, "Nàng gi, nat gang wang to sũ nghut ri-nhung! Nàng lé, ó yuq wá sat nau nyi ri lú?" ga tũ tai akò.

²¹ Yesuq gi, yhangmoq lé, "Ngò, laklai kumlhá ralhùm kut jáng, nungmoq banshoq bang gi, maú byuq bum akò. ²² Nghut kôlhang, nungmoq gi, ahpyo-kuq hpyit byi é hkyô lé, Mosheq byi é nghut lhê ga luí, Bánno buinyi má, zoshâng lé ahpyo-kuq hpyit byi akò (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, ichyi iwá pê chyáng mai lo é ru nghut lhê.). ²³ Haù, Mosheq lé jep é tará lé a lhoq htên pyám sháng gaq nghũ, Bánno buinyi má, zoshâng lé ahpyo-kuq hpyit byi é nghut le gi, hai mù luí, Bánno buinyi má, byù rayuq é gùng gón lé, Ngò lhoq gè byi é yanmai, Ngo lé nhikjum yô akò lú? ²⁴ Byù du lé wú luí hkâjéyáng kó; tengmán é đông sheq jéyáng keq." ga tai ri.

Yesuq Gi, Hkrisduq Nghut Lhê Lú?

²⁵ Haù mù luí, Yerusalem wá mó má é byu pé ra-am gi, "Haù yhangmoq sat pyám nau nyi é sũ gi, shí yuq a nghut lhi? ²⁶ Yhang gi, shí má de de dáng nyo nyi le, yhangmoq gi, Yhang lé, hai le a ga kó myhi-nhung! Yhang gi, Hkrisduq nghut lhê ga, haù ahkáng ayá wó bang gi, gè gè yhang, sê akò abe? ²⁷ Haù Hkrisduq jé lé é hkùn gi, Yhang hkâmai lé lo é lé, ó yuq lhang sé rá a nghut." ga tai bum akò. Nghut kôlhang, shí yuq gi, hkâmá é sũ nghut é lé, nga-nhung sê lhê;

²⁸ Haù mù, Yesuq gi, noqkuq yhùm wàng má mhoqshit uchyang, htê mó èq tai kat é gi, "Nungmoq gi, Ngo lé sê é htoq agó, Ngò, hkâmai lé é sũ nghut é lé le, sê akò nghut ri. Ngò gi, Ngá myit đông shí má lé nyi tô é sũ a nghut kôlhang, Ngo lé nhang kat é Sũ gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sũ eq Yhang mai nhang kat é sũ nghut lhê." gâ ri.

³⁰ Haù mù, yhangmoq gi, Yhang lé chyup râ dô akô; nghut kôlhang, Yhâng é ahkyíng a jé shí é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byù hpúng hkaù má é bang myo myo gi, Yhang lé lumjíng bùm kôluí, "Haù Hkrisduq jé lé é hkùn, Yhang gi, shí yuq htoq má, limik kumlhá pé je wó kut shit râ lúh?" ga taí bum akô nghut ri.

³² Haù Hparishe pé gi, haù byù hpúng hkaù má, Yesuq eq sêng é hkyô lé, haù su ga dangsoq soq lhùm nyi kô é hkyô lé wó gyô yu akô. Haù mù, haù hkyangjong agyi pé eq Hparishe pé gi, Yhang lé é chyup râ matú, noqkuq yhùm zúng é bang lé nhang kat akô.

³³ Haù hkùn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taù ló râ nghut lhê. ³⁴ Haù hkùn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dô lhê lúh? Yhang gi, Grik byu pé má nyi byo myín tô é nga-nhúng é byu pé nyi é jowò má é mù, Grik byu pé lé, é mhoqshit râ dô lhê lúh? ³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taí é dang gi, haí jung wá gá naù é nghut lhê lúh?" gâ akô.

³⁷ Haù lô htâng é eq je ahkyak é Poi buinyi má, Yesuq toq yap luí, htê mó èq taí é gi, "Wui shit sù gi, Ngá chyáng lé mù, shuq sháng gaq. ³⁸ Ngo lé lumjíng é sù ó yuq nghut kôle, haù Chyúmdang má taí tô é eq rajung za, 'Yhâng chyáng mai asak uchyâm é wuilàng yui htoq lô râ nghut lhê.'" gâ ri. ³⁹ Yhang haù su gâ é gi, Yhang lé lumjíng é bang myang hap yù râ nghut é, haù Woi-nyí lé taí é nghut ri. Haù hkùn jé shoq, haù Woi-nyí lé a byi kat shi nghut ri. Hkâsu mù gâ le, Yesuq gi, hpungwup shing kang dan hù é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haù nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lúh? ⁴² Haù Chyúmdang má, Hkrisduq gi, Dawiq é awut ashín má é nghut luí, Dawiq nyi lai lo é Bethlehem wá mai htoq lô râ nghut lhê gâ é, a nghut lúh?" ga myí bum akô nghut ri. ⁴³ Haù mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjíng Kô É Hkyô

⁴⁵ Hau htâng má, haù noqkuq yhùm zúng bang gi, haù hkyangjong agyi pé eq Hparishe pé chyáng taù ló kô é hkùn, haù bang gi, yhangmoq lé, "Nungmoq, haí mù luí, Yhang lé a shuí lo kô é lúh?" ga lhom myí akô.

⁴⁶ Haù hkùn, haù noqkuq yhùm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

⁴⁷ Haù mù, haù Hparishe pé gi, "Nungmoq lé le, Yhang èq mhoq hpyoq yù bekô lúh? ⁴⁸ Haù zaù wui chyáng le, Hparishe pé chyáng le, Yhang lé lumjíng é byù bò akô lúh? ⁴⁹ A bò! Nghut kôlhang, haù jep é tará lé a sê é byù moq mó shí gi, nhâng pyâm é hui bekô nghut ri." ga nhik-yô é đông tú taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, ⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lhê lú?" ga, yhangmoq lé myí ri.

⁵² Haú hkûn, yhangmoq gi, "Nàng le, Galile mau byù nghut lhê lú? Galile mau mai myiqhtoi rayuq lháng a htoq é hkyô lé, nàng gon wú aq, haú jáng sé rà nghut lhê." ga tù tai akô.

⁵³ Hau htâng, yuq hkangmó gi, ó le ô yhùm shut taú ló byuq bùm bekô nghut ri.*

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsalun Bùm shut e ló bê nghut ri. ² Htang napkyó napsùn noq le, Yesuq gi, noquq yhùm wàng hkaú má dum ê luí, byu pé lhunglhang gi, Yhâng é lhingkyuq má lé zing bum akô; haú mù, Yhang gi, zung to luí, yhangmoq lé mhoqshit ri. ³ Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluí, ⁴ Yesuq lé, "Sará é, myiwe myhí shí lé, sulàng shut nyi é má myang chyup yu é nghut lhê. ⁵ Haú Mosheq é tarâ má gi, shí su é myiwe lé, luqgok eq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú rà lú?" ga myí akô. ⁶ Yhangmoq haú su ga myí é hkyô gi, Yhang lé mara wó hùn shoq ga, chyam wú rà matú nghut ri.

Nghut kôlhang, Yesuq gi, ngóm mù, myigùng má loqnyhuí eq htaú kê nyi ri. ⁷ Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, "Nungmoq má é mara a wó é sù hí, myiwe myhí shí yuq lé luqgok eq dú sháng gaq." ga tai ri. ⁸ Hau htâng, Yhang gi, dum ngóm luí, myigùng má kê nyi ri.

⁹ Yhangmoq gi, haú su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe myhí haú jáng yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô lú? Ó yuq eq le, nàng lé mara a byi kó lú?" ga myí ri.

¹¹ Yhang gi, "Yhumsing ê, ó yuq le mara a byi kó nghut ri." ga tù tai ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuí mai mara hkâdum kut shut lo." ga tai kat ri.

Yesuq, Míngkân É Maubó

¹² Yesuq gi, shiwa byu pé lé dum nyo é hkûn, "Ngò gi, míngkân é maubó nghut lhê; Ngá htâng châng é sù ó yuq nghut kôle, mauchut hkaú má hkâ-nhám le so rà a nghut, asak maubó lé wó rà nghut lhê." ga tai ri.

¹³ Haú mù, haú Hparishe pé gi, "Wú aq, Nàng gung Nàng saksé hkâm yu é nghut ri; Nàng é saksé gi, teng rà a nghut." ga tai akô.

¹⁴ Haú hkûn, Yesuq gi, "Ngá gung Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵ Nungmoq gi, byù hkyam đông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

jéyáng é hkyô gi, jô lhê; hkâsu mù gà le, Ngò gi, Ngò baú a nghut, haú Ngo lé nhang kat é sù Íwa eq rahá nghut nyi lhê. ¹⁷ Haú nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haú Ngo lé nhang kat é sù Íwa le, Ngá é matú saksé hkâm byí é nghut lhê." ga tù taí ri.

¹⁹ Haú mù, yhangmoq gi, Yhang lé, "Náng Wa gi, hkâmá lú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kê é nghut le gi, Ngá Wa lé le, sé kó rá nghut lhê." ga tù taí ri. ²⁰ Dang haú pé gi, haú noqkuq yhùm wàng hkaú mã é alu kat jang nàm má, Yhang mhoqshít nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gà le, Yhâng é ahkyíng a jé shi é yanmai nghut ri.

²¹ Haú mù luí, Yesuq gi, yhangmoq lé, "Ngò gi, ló byuq rá nghut lhê, haú hkûn, nungmoq Ngo lé hô kó rá, yhumsing é mara má le shí kó rá nghut lhê. Ngò ló é jang má, nungmoq wó jé kó rá a nghut." ga, radàm dum puq taí ri.

²² Hau é yanmai, haú Yudaq byu pé gi, "Ngò ló é jang má, nungmoq wó jé kó rá a nghut.' gà é gi, Yhânggùng yhang sat shí rá gà é nghut lhê lú?" ga myi bum akó.

²³ Nghut kôlhang, Yesuq xoq taí é gi, "Nungmoq gi, a-ô mai lo é bang nghut akó; Ngò gi, ahtoq mai lé é sù nghut lhê. Nungmoq gi, mingkan shí eq sêng é bang nghut akó; Ngò kúm gi, mingkan shí eq sêng é sù a nghut. ²⁴ Haú mù, nungmoq gi, yhumsing é mara má shí kó rá nghut lhê nghú, Ngò taí é nghut lhê. Ngò gi, haú Yuq nghut lhê nghú taí é lé, nungmoq a lumjíng kê é nghut jáng, nungmoq gi, gè gè yhang, yhumsing é mara má shí kó rá nghut lhê." gà ri.

²⁵ Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê. ²⁶ Ngò gi, nungmoq eq sêng luí, taí rá hkyô eq jéyáng rá hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gú lé, Ngò, mingkan lé taí kyô lhê." ga tù taí ri.

²⁷ Yesuq gi, yhangmoq lé, Yhâng Wa eq sêng é hkyô taí kyô nyi é lé, yhangmoq gi, a sê gyo kó nghut ri. ²⁸ Haú mù luí, Yesuq gi, "Haú Byu Yhangzo lé nungmoq tu shap* kat é hkûn sheq, Ngò gi, haú Yuq nghut é hkyô lé le, yhumsing myit dông haí le a kut e za, haú Íwa mhoq byí é dông za taí é hkyô lé le, nungmoq sé kó rá nghut lhê. ²⁹ Haú Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyám to nghut ri." ga taí ri. ³⁰ Yhang, haú su taí nyi é u lé lhang, byù myo myo gi, Yhang lé lumjíng bùm bekô nghut ri.

Abraham É Awut Ashín Pê Hkyô

³¹ Haú mù, Yesuq gi, Yhang lé lumjíng é Yudaq byu pé lé, "Ngò mhoqshít é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haú tengmán hkyô lé sé kó rá nghut luí, haú tengmán hkyô gi, nungmoq lé lhoq lhut kat rá nghut lhê." ga taí ri.

³³ Haú hkûn, yhangmoq gi, "Nga moq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haú mù, 'nungmoq lé lhoq lhut kat rá' nghú Nàng hkâsu kut wó taí lhê lú?" ga tù taí akó.

* 8:28 Tu shap gà é lichyúm gi, tapzíng htoq má jén sat pyám rá gà é nghut lhê.

34 Yesuq dum tâi é gi, "Ngò, nungmoq lé teng za tâi kôlé, mara kut shut é sù gi, marâ é jùn nghut lhê. 35 Jùn gi, yhùm ikun eq hkâ-nhâm le sêng nyi râ a nghut; zo kúm gi, ikun eq ahtum abyuq sêng lhê. 36 Haù mù luí, haù Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. 37 Nungmoq gi, Abraham é awut ashín pé nghut é lé, Ngò sê lhê. Nghut kôlháng, nungmoq gi, Ngá é dang lé a lhom yu kô é yanmai, Ngo lé sat râ dà akò nghut ri. 38 Ngò gi, Ngá Wâ chyáng mai myang yu é eq rajung za, nungmoq lé tâi kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akò nghut ri." gâ ri.

39 Haù hkûn, yhangmoq gi, "Ngamoq é îwa gi, Abraham nghut lhê." ga tâi tâi kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê. 40 Nghut kôlháng, nungmoq gi, haù Garai Gasâng chyáng mai wó gyô yu é tengmán hkyô lé tâi kyo sù nghut é Ngo lé, sat pyám nau akò nghut ri. Haù sù é hkyô gi, Abraham a kut é nghut lhê. 41 Nungmoq gi, nungmoq é îwa kut é muzó lé yhang, kut nyi akò." ga tâi ri.

Haù hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haù gi, Garai Gasang nghut lhê." ga tâi he akò nghut ri.

Zô Wui É A-kyang Gi, Mó Ó Nghut É Hkyô Shit

42 Yesuq gi, yhangmoq lé, "Garai Gasang gi, nungmoq é îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit dòng lé lo é a nghut, Yhang sheq Ngo lé nhang kat é ru nghut lhê. 43 Nungmoq gi, haù mù Ngá é dang lé a sê gyo kô é lhu gâ le, Ngò tâi é dang lé, nungmoq a wó lhom yù kô é yanmai nghut ri. 44 Nungmoq gi, haù nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akò. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haù tengmán hkyô má a yap gíng nyi nghut ri. Yhang gi, mhaù é hkûn, yhâng é myit má bo é dòng tâi ri; hkâsu mù gâ le, Yhang gi, byù mhaù nghut luí, mhaù hkyô pé é îwa nghut ri. 45 Haù su mù, Ngò, nungmoq lé, haù tengmán hkyô tâi kyô é yanmai, nungmoq gi, Ngo lé a lumjíng kó nghut ri. 46 Nungmoq mâ é ó yuq wá, Ngo lé mara bo lhê nghù saksé wó tún shit akò lhu? Ngò gi, haù tengmán hkyô lé tâi nyi é nghut le nhíng, nungmoq, Ngo lé haù mù a lumjíng kô é lhu? 47 Garai Gasang eq sêng é sù gi, Garai Gasang tâi é dang lé gyô lhê. Nungmoq a gyo kô é gi, nungmoq, Garai Gasang eq a sêng kó é yanmai nghut ri." ga tâi ri.

Yesuq Eq Abraham

48 Haù hkûn, haù Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghù, ngamoq tâi é dang gi, jô lhê a nghut lhu?" ga myí akò.

49 Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggá é ru nghut lhê; nungmoq kúm gi, Ngo lé tâi hpoi nyi akò nghut ri. 50 Ngò gi, Ngá é matú aróng ho nyi é a nghut; nghut kôlháng, hô byi Sù rayuq nyi lhê, haù yuq jéyáng sháng gaq. 51 Ngò, nungmoq lé teng za tâi kôlé, Ngá dang lé châng é sù gi, hkâ-nhâm le, shí râ a nghut." ga tâi ri.

52 Hau é yanmai, haù Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haù myiqhtoí pé le, shi byuq bekò nghut ri; nghut kôlháng, Nàng gi, 'Ngá dang lé châng é sù gi,

hkâ-nhám le, shî râ a nghut.' ga tai ri. ⁵³ Nang gi, ngamoq é iwa Abraham htoq hkik lhê lúh? Yhang gi, shi byuq bê; haú myiqhtoi pé le, shi byuq bekô nghut ri. Nang gung nang ó yuq su ngam lhê lúh?" ga tai akô.

⁵⁴ Yesuq gi, "Ngá gung Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlháng, haú nungmoq é Garai Gasang nghut lhê ga nungmoq tai é sù, Ngá Wa gi, Ngo lé lhoq gyaú é sù ru nghut lhê. ⁵⁵ Nungmoq gi, Yhang lé a sé kó nghut ri; nghut kôlháng, Ngò gi, sê lhê. Yhang lé a sé ngú Ngò tai é ru nghut le gi, Ngò le nungmoq su byù mhaú dut râ nghut lhê; nghut kôlháng, Ngò gi, Yhang lé sé luí, Yhâng é dang gyo sù nghut lhê. ⁵⁶ Nungmoq é iwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga tú tai ri.

⁵⁷ Haú hkún, haú Yudaq byu pé gi, Yhang lé, "Nang gi, asak ngo xê zàn lhang a nghut shî é nhing, Abraham lé myàng wú é nghut lhê lúh?" ga tai akô.

⁵⁸ Yesuq gi, "Ngò, nungmoq lé teng za tai kôlé, Abraham lhang a hkú shi má, Ngò nyi gù bê nghut lhê. ✠ ga tú tai ri. † ⁵⁹ Haú mù luí, yhangmoq gi, Yesuq lé, dú râ ga luqok kui yu akô; nghut kôlháng, Yesuq gi, haú noqkuq yhúm mai haq htoq ló byuq bê nghut ri.

9

Myoqjit Sù Lé Lhoq Gê Byí É Hkyô

¹ Yesuq gi, sô yông ló nyi é u lé, hku lé é mai myoqjit to gú nghut é byù rayuq lé myang ri. ² Haú hkún, Yhâng é chángzô pé gi, Yhang lé, "Rabai é, shí yuq, myoqjit gú hku lé é gi, ó yuq kut shut é yubak é yanmai nghut lhê lúh? Yhang kut shut é lúh? A nghut jáng, yhâng nu yhâng wa kut shut é lúh?" ga myí akô.

³ Yesuq tú tai é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasang é muzó lé, yhang má wó lhoq htoq shit râ matú, haú dut é ru nghut lhê. ⁴ Nga-nhung gi, haú Ngo lé nhang kat Su é muzó lé, nyí nghut tô ashí hkún, zui saí nyi ra rá dut lhê; myín jé jáng gi, ó yuq le, mú wó zui saí râ a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gâ ri.

⁶ Yhang gi, haú su ga tai luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri. ⁷ Hau htàng, haú yuq lé, "Haú Siloam wuhtum má é chí pyám aq." ga tai ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhúm shut ló bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lúh?" ga myí bum akô. ⁹ Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga tai akô.

Nghut kôlháng, yhang gi, "Ngò, haú yuq yhang nghut lhê." ga tai ri.

¹⁰ Haú hkún, yhangmoq gi, "Haú nghut le gi, nang myoq hkâsu kut wó myang é lúh?" ga myí akô.

¹¹ Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byí mù, 'Siloam wuhtum má é chí pyám aq.' ga ngo lé tai ri; haú mù, ngò é chí pyám é htàng má, ngá myoq wó myang é nghut lhê." ga tú tai ri.

✠ 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gâ nyi nghut ri.

¹² Haú hkûn, yhangmoq gi, "Byù haú yuq gi, hkâmá nyi ri lúhú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô.

¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri. ¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, é chí pyám jáng, ngá myoq myâng bê nghut lhê." ga tú taí ri.

¹⁶ Haú Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lúhú?" ga myí akô. Haú mù, yhangmoq gi, myit a huí lhûm bùm lò kó nghut ri.

¹⁷ Haú mù, yhangmoq gi, haú myoqjit wú sù shut lhîng mù, "Nang lé myoq lhoq myâng byí é sù gi, hkâsù é byù nghut lhê nghû, nàng taí râ lúhú?" ga dum myí kôjáng, "Yhang gi, myiqhtoi rayuq nghut ri." ga, yhang tú taí ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myâng bê nghut é hkyô lé le, haú yhâng nu eq yhâng wa lé, é ji lò nhang é hkûn jé shoq, a lumjîng kó nghut ri. ¹⁹ Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lúhú? Hku lé é hkûn mai, myoqjit gù nghut lhê lúhú? Yhang, ahkuí, hkâsu kut wó myang é lúhú?" ga myí akô.

²⁰ Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

²¹ Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq eq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tú taí akô.

²² Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wuí chôm myit hpyit to bekô nghut é yanmai nghut ri.

²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tú taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byí ri lúhú? Náng é myoq lé, yhang, hkâsu kut lhoq myâng byí ri lúhú?" ga, yhang lé myí akô.

²⁷ Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lúhú? Nungmoq le, Yhâng é chángzô pé dut nau akô lúhú?" ga taú myí ri.

²⁸ Haú mù, yhangmoq gi, yhang lé gyai rhoi é dông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut

lê! 29 Garai Gasang gi, Mosheq lé dâng nyo é hkyô lé, ngamoq sê lê; nghut kôlhang, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

30 Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! 31 Garai Gasang gi, yubak dap bâng é dang lé a gyo byí é hkyô lé, nga-nhung sê lê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo byí lê. 32 Hku lé é hkûn mai myoqjit gù nghut é byù lé, ó yuq eq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lê. 33 Haú yuq gi, Garai Gasang chyang mai lé é sù za a nghut le gi, haí le wó kut râ a nghut." ga tú taí ri.

34 Haú su ga jáng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lê lú?" ga tú taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

35 Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjáng lê lú?" ga myí ri.

36 Haú hkûn, haú yuq gi, "Yhumsing ê, haú gi, ó yuq nghut lê lú? Yhang lé, ngò wó lumjáng sháng gaq, taí kyo laq." ga myí ri.

37 Yesuq gi, "Nàng, haú yuq lé myàng wú bê nghut lê; ahkuí, nàng eq dâng nyo nyí é sù gi, haú yuq yhang nghut lê." ga taí ri.

38 Haú mù, haú yuq gi, "Yhumsing ê, ngò lumjáng lê!" ga taí luí, Yhang lé noqkuq ri.

39 Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng rà matú, mingkan shí má Ngò jé lé é nghut lê." ga taí ri.

40 Yhang eq rahá nghut nyí é Hparishe pé ra-am gi, Yhang haú su ga taí é lé wó gyo kôjáng, "Hkâsu htâ? Ngamoq gi, myoqjit bang dut bê lú?" ga myí akô.

41 Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lê; nghut kôlhang, ahkuí, nungmoq gi, myoq myàng bang nghut lê ga kô é yanmai, nungmoq má yubak mara bo ashí kó nghut ri.

10

Sau Zúng Sù Eq Sau Hpúng

1 Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô đông doq lut wang é sù gi, hkau sù eq damyaq nghut ri. 2 Haú hkúmdong mai wang é sù kúm gi, sau zúng sù nghut ri. 3 Haú hkum zúng sù gi, yhang lé hkum hpóng byí é htoq agó, haú sau pé gi, yhâng é hté lé gyo byí akô. Yhang gi, yhâng é sau pé lé, mying lang luí wut yù mù, yhangmoq lé shuí htoq htoq kut nyí ri. 4 Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é hté lé sê gyo kô é yanmai, yhâng é htâng má châng akô nghut ri. 5 Nghut kôlhang, yhangmoq gi, byù bíng é htâng má, hkâ-nhám lhang cháng kó râ a nghut e za, yhâng chyang mai kúm hpang byuq kó râ nghut lê; hkâsu mù gâ le, haú byù bíng é hté lé, yhangmoq a sê gyo kô é yanmai nghut ri." ga taí ri. 6 Yesuq gi, dangtú haú lé yù mù, yhangmoq lé

taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kôlé, Ngò gi, haú sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sù ó yuq nghut kôle, hkýi yu é hui rá nghut lhê. Haú yuq gi, htoq htoq wàng wàng wó kut rá eq mhan-yô myang hô rá nghut lhê. ¹⁰ Haú hkau sù gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yú rá eq byingjup é asak lé wó yú rá matú sheq nghut lhê.

¹¹ Ngò gi, ge é sau zúng sù nghut lhê; haú ge é sau zúng sù gi, sau pé é matú, yhumsing é asak lé ap byi pyám é nghut lhê. ¹² Haú langchyáng kut sù gi, sau pé lé sing é sau zúng sù a nghut; haú mù, yhang gi, haú wamhkuí lé lo é lé myàng jáng, sau pé lé pyám to mù hfang ló byuq rá nghut lhê; haú hkún, wamhkuí gi, sau hpúng lé é htim luí, lhoq pyo pyám rá nghut lhê. ¹³ Yhang gi, langchyáng hpó nghut luí, haú sau pé é matú haí le a myit chiq byi é yanmai, hfang é nghut ri.

¹⁴ Ngò gi, haú ge é sau zúng sù nghut lhê; haú Íwa gi, Ngo lé sê é nghut luí, Ngò le, haú Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haú sau pé é matú, yhumsing é asak lé ap byi pyám é nghut lhê. ¹⁶ Ngò gi, sau hkup shí má é a nghut é gotú sau pé wó ashí; sau haú pé lé le, Ngò, shuí yú ra rá nghut lhê; sau haú pé le, Ngá é htê lé gyo kó rá nghut lhê; haú hkún, sau hpúng rahpúng za dut luí, sau zúng sù le rayuq za, nghut rá nghut lhê.* ¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byi pyám é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq èq le wó yu pyám é a nghut, Ngá é myit đông byi pyám é ru nghut lhê. Ngò gi, yhumsing asak lé ap byi pyám rá ahko ahkáng eq haú lé dum taú yú rá ahko ahkáng wó sù nghut lhê. Haú gi, Ngá Wá chyáng mai Ngò wó yu é hkunmó nghut lhê." gá ri.

¹⁹ Dang haú pé é yanmai, haú Yudaq byu pé gi, myit a huí lhum dum dut byuq bekô nghut ri. ²⁰ Haú má é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyo nyi akô lúhú?" ga taí bum akô.

²¹ Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myáng nhâng rá lúhú?" ga taí bum akô nghut ri.

Yudaq Byu Pé A Lumjng Kô É Hkyô

²² Yerusalem wà mó má, Ap Nóng Poi* jé bê nghut ri. Haú gi, gyoqmyò nám nghut ri. ²³ Haú hkún, Yesuq gi, haú noqkuq yhùm wàng má é, Sholomon é Jirop má sô yông wún ri. ²⁴ Haú u lé, haú Yudaq byu pé gi, Yhâng é lhinghkyuq má lé zing bum kômù, "Nàng gi, ngamoq lé hkâ-myháng jé shoq úng-áng nhang nyi rá lúhú? Nàng, Hkrisduq nghut le gi, ngamoq lé san za taí kyô pyám laq." ga taí akô.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjing kó nghut ri. Ngá Wá é mying mai, Ngò kut é laklai kumlhá haú pé gi, Ngá é matú saksé hkám byi nyi ri. ²⁶ Nghut kôlhang, nungmoq gi, Ngá é sau

* 10:16 Esai 56:8 * 10:22 Ap Nóng Poi gá é gi, Garai Gasâng é yhùm lé ap nong lé gá lhê.

a nghut kô é yanmai, a lumjǐng kó nghut ri. ²⁷ Ngá é sau pé gi, Ngá é htê lé dat gyo akô; Ngò gi, yhangmoq lé sê lhê; yhangmoq le, Ngá htàng châng akô nghut ri. ²⁸ Ngò gi, yhangmoq lé, ahtum abyuq é asak byi é nghut mù, yhangmoq gi, hkâ-nhâm le htên byoq kó rà a nghut; ó yuq eq le, yhangmoq lé, Ngá é loq mai wó lú yû rà a nghut. ²⁹ Yhangmoq lé, Ngá é loq má ap byi tô é sù, haù Ngá Wa gi, lhunglhâng htoq má je gyaù Sù nghut lhê; ó yuq eq le, yhangmoq lé, Ngá Wá é loq mai wó lú yû rà a nghut. ³⁰ Ngò eq haù Íwa gi, rayuq za nghut lhê." ga tú tai ri.

³¹ Haù hkûn, haù Yudaq byu pé gi, Yesuq lé, dú rà matú luggok dum kui akô. ³² Nghut kôlhâng, Yesuq gi, yhangmoq lé, "Haù Íwá chyáng má é laklaí kumlhá mó pé myo myo, Ngò, nungmoq lé tún shit bê nghut lhê. Nungmoq, Ngo lé dú rà gi, hká lhùm é yanmai nghut akô lú?" ga myi ri.

³³ Haù Yudaq byu pé gi, "Ngamoq, Nang lé dú rà gi, haù pé hká lhùm é yanmai le a nghut; Nang gi, byù rayuq nghut to lui, Garai Gasang nghut é đông tai whui lui, Yhang lé rhoi dang tai é yanmai, dú rà nghu lhê." ga tú tai akô.

³⁴ Haù hkûn, Yesuq gi, yhangmoq lé, "Nungmoq gi, garaí pé nghut akô nghu, Ngò tai bê nghut lhê."* ga nungmoq é tarâ má kâ to lhê a nghut kó lú? ³⁵ Chyúmdang haù lé gi, a ge lhoq hpyoq pyâm é nghut lui, haù Garai Gasâng é mungdang lé wó yu é bang lé, 'garaí pé' gâ é nghut le gi, ³⁶ haù Íwa mai, Yhang é matú hkyin htoq yû lui, mingkan má nhang é Sù eq séng lui gi, hká đông nghu kó rà lú? 'Ngò gi, Garai Gasâng é Yhangzo nghut lhê.' nghu tai é yanmai, Ngò gi, Garai Gasang lé tai hpoí ri nghu, nungmoq, haù mù Ngo lé mara hùn akô lú? ³⁷ Ngá Wá é muzó pé lé, Ngò kut é a nghut jáng, Ngo lé hkâlumjǐng kó. ³⁸ Nghut kôlhâng, Ngò, haù pé lé kut é nghut le gi, nungmoq, Ngo lé a lumjǐng kôlhâng, haù muzó pé lé lumjǐng keq; haù hkûn, haù Íwa gi, Ngò má nghut nyi é hkyô lé le, Ngò gi, haù Íwa má nghut nyi é hkyô lé le, nungmoq wó sé lui, sê gyo kó rà nghut lhê." ga tú tai ri. ³⁹ Yhangmoq gi, Yhang lé chyup rá dum hen akô; nghut kôlhâng, Yhang gi, yhangmoq é loq mai wó lut ló bê nghut ri.

⁴⁰ Hau htàng, Yesuq gi, haù Yodan làng he hpoq mâ é, Yohan, wui-myhup hkám byi hi é jowò má ló jé ri. Haù má, Yhang nyi nyi é nghut lui, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhâng, shí yuq eq séng lui, Yohan tai é hkyô lhunglhâng gi, têng ri." ga tai bum akô. ⁴² Haù jowò má, byù myo myo gi, Yesuq lé lumjǐng bùm bekô nghut ri.

11

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haù Mariq eq yhângnhá Mahtaq nhik nyi é Behtani wà má é sù nghut lhê. ² Mariq haù gi, Yhumsing lé namngón-xù hut gyun lui, hkyi má yhâng xam éq sùt byi é sù nghut ri; yhang gi, haù no nyi é Lazaruq é yhângnhá nghut ri. ³ Haù mù, haù yhângnhá nhik gi, "Yhumsing é, Nang chyitdap é sù gi, no nyi ri." ga, Yesuq chyáng é tai nhang akô.

⁴ Yesuq gi, dang haù lé wó gyo jáng, "Nòhpyo haù gi, shî-nò a nghut. Haù Garai Gasâng é Yhangzo gi, hau é yanmai, hpungwup shing kang wó dan hù é

* 10:34 Hkya-on 82:6

hui sháng gaq ga, Garai Gasâng é hpungwup shingkâng é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haú su mù, Yhang gi, haú Lazaruq no nyi ri gâ é lé, wó gyô é hkùn, haú Yhang nyi é jowò má, í nyí nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng." ga taí ri.

⁸ Haú hkùn, yhangmoq gi, "Rabai ê, hkû-yoq za, haú Yudaq byu pé, Nang lé luggok êq dú sat râ da kô é nghut le nhîng, ahkuí, haú shut dum taú ló râ lúh?" ga Yhang lé myí akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lúh?*" Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tú taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhúng é luzúm Lazaruq yhup myhí byuq bê nghut ri; nghut kôlháng, Ngò gi, yhang lé é nhaú toq râ nghut lhê." gâ ri.

¹² Haú hkùn, Yhâng é chángzô pé gi, "Yhumsíng ê, yhang yhup myhí tô é nghut le gi, ge lò râ nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôlháng, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjíng râ matú nghut luí, nungmoq é matú Ngò gabú býi ri; yhâng chyáng e ló sháng hkoi." gâ ri.

¹⁶ Haú mù, haú Zozùm le gâ é Htomaq gi, gotú chángzô pé lé, "Nga-nhúng le, Yhang eq rahá shí sháng gaq, châng e ló sháng." ga taí ri.

Haú Í-nhá Nhik Lé, Yesuq Nhik Tíng É Hkyô

¹⁷ Yesuq gi, jé e é hkùn, haú Lazaruq lé lup má kat pyâm é myi nyí nghut bê hkyô lé, lhom taí kyô akô. ¹⁸ Behtani wà gi, Yerusalem wà mó eq í déng kô za wê lhúm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tíng býi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé é huí ri; nghut kôlháng, Mariq gi, yhúm má nyi tô ri.

²¹ Mahtaq gi, Yesuq lé, "Yhumsíng ê, Nàng, shí má nyi tô é ru nghut le gi, ngá gu shi byuq râ a nghut. ²² Nghut kôlháng, ahkuí le, Garai Gasâng chyáng Nàng haí dung kôlháng, Yhang býi râ nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq râ nghut lhê." ga taí ri.

²⁴ Haú hkùn, Mahtaq gi, "Haú jhtùm buinyi má dum dui toq é hkùn, yhang le dum dui toq râ nghut é lé, ngò sê lhê." ga tú taí ri.

²⁵ Haú hkùn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjíng é sù gi, shi byuq kôlháng, dum dui râ nghut lhê. ²⁶ Asak dui nyi luí, Ngo lé lumjíng é sù ó yuq nghut kôle, hkâ-nhám le shi é hui râ a nghut. Nàng gi, dang shí lé lumjíng lhê lúh?" ga taí ri.

* **11:9** Nyí gi, hkyíng hkum raxe í hkum bo lhê a nghut kó lúh? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

²⁷ Haù hkùn, yhang gi, "Yhumsing ê, ngò lumjìng lhê. Nàng gi, haù mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjìng lhê." ga, Yhang lé tai kyô ri.

²⁸ Yhang gi, haù su ga tai é htâng má, taù lò mù, yhanggu Mariq lé, tsik za wut yù luí, "Haù Sará jé tô ri; Yhang gi, nang lé myí nyi ri." ga tai kyô ri.

²⁹ Mariq gi, haù lé wó gyo jáng, hân za toq mù, Yesuq chyáng ê bê nghut ri. ³⁰ Haù u lé, Yesuq gi, haù wâ hkaù má a wang lô shí e za, Mahta q eq huí é jowò má ru nyi tô ashí nghut ri. ³¹ Haù yhúm hkaù má, Mariq lé nhik ting nyi é Yudaq byu pé gi, yhang hân za toq luí, htoq lô é lé myàng kôjáng, yhang, lup má é ngaú rá dá lhê abe ga, myit yù kômù, yhang htâng châng e lô bum akò nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, "Yhumsing ê, Nàng, shí má nyi tô é ru nghut le gi, ngá gu shi byuq rá a nghut." ga tai ri.

³³ Yesuq gi, Mariq ngaù nyi é lé le, haù yhang eq rahá lé lo é Yudaq byu pé ngaù nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri. ³⁴ Haù mù, Yhang gi, "Yhang lé, hkâmá tô tô akò lú?" ga myi jáng, yhangmoq gi, "Yhumsing ê, lé wú wú aq." ga tù tai akò.

³⁵ Yesuq gi, ngaù bê nghut ri.

³⁶ Haù mù, haù Yudaq byu pé gi, "Wú keq, Yhang gi, Lazaruq lé, haù-í yhang chyit ri-nhung!" ga tai akò.

³⁷ Nghut kôlháng, ra-am gi, "Haù myoqjít sù lé, myoq wó lhoq myâng byí é Sù gi, shí yuq lé le, a shí lo shoq a wó kut é lú?" ga tai bum akò nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é èq, lup má lé jé ri. Lup haù gi, luq hkyung dong nghut luí, luqgok rachâm èq chí tô akò. ³⁹ Haù mù, Yhang gi, "Luqgok haù lé yu pyám keq." ga tai ri.

Haù hkùn, haù shi byuq su é yhâng há Mahta q gi, "Yhumsing ê, yhang lé, haù má tô tô é myi nyi lhang nghut bê yanmai, ahkuí gi, bup nàm berá nghut lhê." ga tai ri.

⁴⁰ Haù mù, Yesuq gi, "Nàng, lumjìng é nghut le gi, haù Garai Gasâng é hpungwup shing kang lé, wó myâng rá nghut lhê nghú, Ngò, nang lé tai kyô wú bê a nghut lú?" ga tai ri.

⁴¹ Haù mù luí, yhangmoq gi, luqgok haù lé yu pyám akò. Hau htâng, Yesuq gi, mauhkung shut tu wú luí, "Áwa ê, Nàng, Ngá é dang lé gyo byí é yanmai, Ngò, Nang lé jeju hkyá-ôn lhê. ⁴² Nàng gi, hkâ-nhám le, Ngá é dang lé gyo byí nyi é lé, Ngò sê lhê; nghut kôlháng, Nàng, Ngo lé nhang kat é hkyô lé, shí má yap tô é bang lumjìng kó sháng gaq nghú, yhangmoq é matú, Ngò, isu nghú tai é nghut lhê." ga tai ri.

⁴³ Yhang gi, haù su ga tai luí, "Lazaruq ê, htoq lô aq." ga htê mó èq wut kat ri. ⁴⁴ Haù hkùn, haù shi byuq bê sù gi, yhâng é loq hkyí pé má pân èq htup yup to gù eq, yhâng é myoqdong má hpajet èq htup to gù htoq lo ri.

Haù mù, Yesuq gi, yhangmoq lé, "Yhang lé hpyi pyám byi mù, nhang kat keq." ga tai ri.

Yesuq Lé Sat Pyám Râ Haq Dâ É Hkyô *Mht 26:1-5; Mrk 14:1-2; Luk 22:1-2*

† 11:27 Hkrisduq lé Mesaia le gâ lhê.

⁴⁵ Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjúng bùm bekô nghut ri. ⁴⁶ Nghut kôllhang, yhangmoq chyáng mâ é ra-am gi, haú Hparishe pê chyáng ló mù, Yesuq kut é hkyô lé, ló taí kyô akô. ⁴⁷ Haú mù, haú hkyangjong agyi pé eq Hparishe pé gi, Yudaq byìn tú wapdoq[†] zuphpong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè rá lúh? ⁴⁸ Nga-nhúng, Yhang lé haú su ru kut nyí nhang é nghut jáng, yuq hkangmó gi, Yhang lé lumjúng kó rá nghut lhê; haú hkûn, Romaq byu pé gi, jé lé mù, nga-nhúng é jowô eq nga-nhúng é byuhú lé, lé lhoq htên pyám kó rá nghut lhê." ga taí akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lhang a sé kó nghut ri-nhung! ⁵⁰ Haú byuhú gón htên byoq byuq rá htoq má, byuhú hau é matú, byù rayuq shí hkâm byi le gi, nungmoq é matú je gè rá hkyô lé, nungmoq, a myit jé kó nghut ri." ga taí kat ri.

⁵¹ Yhang haú su ga taí é gi, yhumsing myit đông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkâm byi rá nghut é hkyô lé le, ⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsing yù mù, rading ralhúum za dut nhâng rá matú, shí hkâm byi rá nghut é hkyô lé le, myiqhtoi dang taí é ru nghut lhê. ⁵³ Haú nyí mai, yhangmoq gi, Yesuq lé sat rá matú chòm da bekô nghut ri.

⁵⁴ Hau é yanmai, Yesuq gi, Yudaq byu pê goro má, de de a sô shit wún e za, haú mai htoq luí, haú yoso eq chyáng lhúm é mau má é, Ehprim gâ é wà má é mù, Yhâng é chángzô pé eq rahá nyi nyi ri.

⁵⁵ Haú Yudaq byu pê é Lhoqlhai Poí jé rá za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hkíng đông yhumsing gùng lé lhoq sân-yúng yù rá matú, yosô wà pé mai, Yerusalem wà mó shut doq ló bum akô. ⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhúm wàng má yap to uchang, rayuq eq rayuq, "Nungmoq, hkâsu wó myit akô lúh? Yhang gi, Poí má a lé lô rá gâ lhê lhà?" ga myí lhúm bum akô. ⁵⁷ Nghut kôllhang, haú hkyangjong agyi pé eq Hparishe pé gi, Yesuq lé wó chyup yù rá matú, Yesuq hkâmá nyi é lé, sé é sù ó yuq nghut kôle, yhangmoq lé lo shit kyo rá lhê ga dangmó hkyô tô akô nghut ri.

12

*Yesuq, Namgón-xù But Byi Huí É Hkyô
Mht 26:6-13; Mrk 14:3-9*

¹ Haú Lhoqlhai Poí jé rá hkyuq nyí rá ashí hkûn, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri. ² Haú má, Yesuq lé hkunggâ é đông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboi má zô zung nyi bang mâ é rayuq nghut ri. ³ Haú hkûn, Mariq gi, haú nardu amyit mai za saí yu é, gyai hpaú é namgón-xù raxe í rúng kô yu lé mù, Yesuq é hkyí má hut gyun byi luí, yhâng é uxam eq sùt byí ri. Haú mù, yhúm haú gi, namgón-xù shôm byíng to bê nghut ri.

[†] 11:47 Yudaq byìn tú wapdoq lé Grik đông gi, San-hedrin gâ lhê.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haù myùng bang lé byí pyám râ matú, haù namngón-xù lé denari sum sho eq haù mù a ùng pyám é lúh?" ga taí ri. ⁶ Yhang haù su ga taí é gi, myùng bang lé chiq byí é yanmai taí é a nghut, yhang gi, ngùn htùng chùng sù nghut luí, haù má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xù shí lé hkong to byí é nghut lhé. ⁸ Haù myùng bang gi, nungmoq eq rahá hkâ-nhám le nyi râ nghut lhé; nghut kôlhang, Ngò gi, nungmoq eq rahá ayang nyi nyi râ sù a nghut." ga tũ taí ri.

⁹ Haù u lé, Yudaq byu pé ajùm ayò gi, haù má Yesuq nyi é lé sé kôluí, lé lo akò; haù bang gi, Yesuq é yanmai za lé kô é a nghut, haù Yhâng eq shí bê mai lhoq dui toq yu é Lazaruq lé, lé myàng nau kô é yanmai le nghut ri. ¹⁰ Haù mù, haù hkyangjong agyi pé gi, Lazaruq lé le, sat pyám râ matú chòm hpyê lhùm akò. ¹¹ Hkâsu mù gâ le, yhâng é yanmai, haù Yudaq byu pé myo myo gi, Yesuq chyáng lhing ló kômù, Yhang lé lumjng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô
Mht 21:1-11; Mrk 11:1-11; Luk 19:28-40

¹² Hau htang nyí, haù Poi má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyò bum akò. ¹³ Haù mù, yhangmoq gi, byùm-haq pé yu chùng mù, Yhang lé é tẽ uchyang,

"Hosana!"*

Haù Yhumsing é mying mai jé lé lô Sù gi, hkungsô wó nyí sháng gaq ô!

Haù Israelaq byu pé é Hkòhkâm gi, hkungsô wó nyí sháng gaq!†[✧] ga, taí garũ bum akò nghut ri. ¹⁴ Haù hkùn, Yesuq gi, logúng zo radu lé myàng luí, doq jĩ ri;

¹⁵ haù gi, "Zi-un byizo† é, hkâgyuq; wú keq, nungmoq é hkòhkâm gi, logúng zo má ji mù lé lo nyi ri."†[✧]

ga, kâ tô é eq rajung za nghut ri.

¹⁶ Haù pé banshoq lé, Yhâng é chángzò pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htàng má za sheq, haù pé gi, Yhang eq séng luí kâ tô é hkyô lé le, haù eq rajung za, Yhang lé, yhangmoq mai kut bê hkyô lé le, bùm sê kat akò nghut ri.

¹⁷ Haù Yesuq gi, lup hkaù má é Lazaruq lé wut luí, shi é mai lhoq dui toq yu é hkùn, Yhang eq rahá nghut é shiwa hpúng gi, haù hkyô lé, saksé hkám byí nyi akò. ¹⁸ Haù mù, byù myo myo gi, Yesuq tũn shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akò. ¹⁹ Hau é yanmai, haù Hparishe pé gi, "Wú keq, nga-nhúng, hkâsu yhang a ge kut lo nhung! Haù mینگkan gón gi, Yhâng htàng cháng bùm bekò." ga, rayuq eq rayuq taí lhùm bum akò nghut ri.

Yesuq, Yhang Shí Râ Hkyô Lé Te Tai É Hkyô

²⁰ Haù hkùn, noqkuq râ matú Poi má doq ló é bang má, Grik pé ra-am le bo tô akò. ²¹ Yhangmoq gi, Galile mau, Bet-saida wà mó má é Hphilip chyáng lé jé kômù, "Àhkaù ê, ngamoq gi, Yesuq lé myàng nau ri." ga, dung tóngbán akò.

* **12:13** Hebre dang má, hosana gâ é gi, "ahkuí hkyi yu aq" gâ é nghut lhé. Nghut kôlhang, bun zo shí má gi, hkya-on dang dòng chung é nghut lhé. ✧ **12:13** Hkya-on 118:25-26 † **12:15** Hebre myíng dòng Zi-un byizo gâ é gi, Yerusalem má é byu pé lé gâ é nghut lhé. ✧ **12:15** Zhk 9:9

22 Haù mù, Hpìlip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

23 Haù mù, Yesuq gi, "Haù Byu Yhangzo gi, hpungwup shingkang dan hù é hui rà matú, ahkyíng jé bê nghut ri. 24 Ngò, nungmoq lé teng za taí kôlé, sungso racham gi, myigùng má gyô luí, shi byuq e za a nghut jáng, acham roq za dut nyi rà nghut lhê. Nghut kôlhang, shi byuq é nghut le gi, ashí myo myo lhoq htoq rà nghut lhê. 25 Haù yhumsing é asak lé chyitdap é sù gi, asak sùm byuq rà nghut lhê. Míngkan shí má, haù yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to rà nghut lhê. 26 Ngo lé dojaú é sù ó yuq nghut kôlé, Ngá htàng cháng rà lhê; Ngò, hkámá nyi le, Ngá é dui-nhâng zoshâng le nyi rà nghut lhê. Ngá Wa gi, haù Ngo lé dojaú é sù lé, shigyaú rà nghut lhê.

27 Ahkuí, Ngò, myit wuñke nyi ri; Ngò hkâsu ngù taí rà lhi? 'Áwa ê, ahkyíng shí mai Ngo lé lhoq lhut yù laq.' ngù taí rà lhu? Nghut kôlé, Ngò gi, ahkyíng shí é matú za sheq jé lé é ru nghut lhê. 28 Áwa ê, Náng é myíng lé hpungwup shingkang dan hu nhâng aq hkoil!" ga taí ri.

Haù hkún, "Ngò gi, Ngá é myíng lé hpungwup shingkang dan hu nhâng bê nghut luí, dum dan hu nhâng shirá nghut lhê." gâ é htê, mauhkúng mai htoq lo ri. 29 Haù má nyi tô é byù moq mó gi, haù lé wó gyo kójáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

30 Haù hkún, Yesuq gi, "Danghtë shí gi, Ngá é matú a nghut, nungmoq é matú ru nghut lhê. 31 Ahkuí gi, míngkan shí lé jéyáng rà ahkyíng nghut bê; míngkan shí é zau gi, ahkuí hkat htoq pyám é hui rà nghut lhê. 32 Nghut kôlhang, Ngò gi, myigùng mai tu shap kat é hui é hkún, byù lunglhang bang lé, Ngá chyáng shê yù rà nghut lhê." ga taí ri. 33 Yhang haù su ga taí é gi, Yhang hkâsu kut shí rà nghut é hkyô lé shit é nghut ri.

34 Haù hkún, haù byù moq mó gi, "Haù tarâ laiká má, Hkrisduq gi, ahtum abyuq dui nyi rà nghut lhê gâ é lé sheq, ngamoq wó gyô wú é ru nghut le nhíng, 'Haù Byu Yhangzo gi, tu shap é hui ra rà nghut lhê.' ngù, Náng hkâsu kut wó taí lhê lhu? Haù Byu Yhangzo gi, ó yuq nghut lhê lhu?" ga, myí akô.

35 Haù mù, Yesuq gi, yhangmoq lé, "Nungmoq chyáng, haù maubó joq nyi rà ahkyíng gi, a lúm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haù maubó joq nyi ashí hkún sô nyi keq; hkâsu mù gâ le, haù mauchut má sô nyi é sù gi, yhang hká shut e ló nyi é lé, a sé nghut ri. 36 Nungmoq gi, maubó é yhangzô pé wó dut kó sháng gaq, haù maubó joq nyi ashí hkún, haù lé lumjíng keq." ga taí ri. Yesuq gi, dang haù ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyi Kô É Hkyô

37 Yesuq gi, yhangmoq é hí má, limik kumlhá haù pé banshoq kut shit kôlhang, yhangmoq gi, Yhang lé a lumjíng shi kó nghut ri. 38 Haù gi, "Yhumsing é, nga-nhúng é danglù lé, ó yuq wá lumjíng byi wú é lhu? Haù

Yhumsing é loq† gi, ó yuq lé htoq shit wú é lhu?"*
ga, myiqhtoi Esai-aq taí tô é dang lo dik é nghut ri.

39 Yhangmoq a wó lumjíng kô é hkyô gi, Esai-aq taí é dang má,

† 12:38 Yhumsing é loq gâ é gi, Yhumsing é hpungwup a-tsam lé gâ é nghut lhê. * 12:38 Esai 53:1

40 "Yhang gi, yhangmoq é myoqjí lé lhoq chít byi luí, yhangmoq é i-myt lé lhoq htan to byi bê nghut ri;

haù mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi rà matú, a wó lhing taù lò kó dut rà nghut lhê."*
ga le bo tó é yanmai nghut lhê. 41 Esai-aq gi, Yesuq é hpungwup shìngkang lé myang é yanmai, Yhang eq sêng é hkyô lé, haù su ga taí é nghut ri.

42 Nghut kôlhang, haù uphkâng bang myo myo lhang gi, haù u má, Yesuq lé lumjìng bum akò. Nghut kôle, yhangmoq gi, Hparishe pé èq tarajong mai lhoq htoq pyâm é hui rà lé, gyuq kô é yanmai, yhangmoq lumjìng bê hkyô lé a yín yu bùm kó nghut ri. 43 Hkâsu mù gâ le, yhangmoq gi, Garai Gasâng chyáng mã é aróng lé, ô nau é htoq má, byu pé chyáng mã é aróng lé, je ô nau kô é yanmai nghut ri.

44 Haù mù, Yesuq, htê mó èq taí é gi, "Ngo lé lumjìng é sù gi, Ngo lé baù lumjìng é a nghut; haù Ngo lé nhang kat é Sù lé le, lumjìng é nghut lhê. 45 Ngo lé myang é sù gi, haù Ngo lé nhang kat é Sù lé le myang é nghut lhê. 46 Ngò gi, Ngo lé lumjìng é sù ó yuq le, mauchut hkaù má a nyi sháng gaq nghú, maubó đông mìnkan má lé jé é nghut lhê.

47 Ngò gi, Ngá é dang lé wó gyo luí, a châng é sù ó yuq lé le, jéyáng rà a nghut; hkâsu mù gâ le, Ngò gi, mìnkan lé jéyáng rà matú jé lé é a nghut; haù mìnkan lé hkyi yù rà matú sheq, jé lé é ru nghut lhê. 48 Ngo lé he-ngik luí Ngá é dang lé a hap yu é sù lé, jéyáng rà Sù rayuq nyi lhê; Ngò taí é dangkun haù gi, haù jìhtùm buinyi má, haù yuq lé mara byi rà nghut lhê. 49 Hkâsu mù gâ le, Ngò gi, Ngá é myit đông taí é a nghut; nghut kôlhang, Ngò haí taí rà eq hkâsu nghú taí rà lé gi, haù Ngo lé nhang kat é sù Íwa mai, Ngo lé hkunmó hkyô to bê nghut lhê. 50 Haù Yhâng é hkunmó gi, ahtum abyuq é asak nghut é lé, Ngò sê lhê. Haù mù luí, Ngò, haí taí kôlé, haù Íwa mai Ngo lé taí kyô é lé za, taí é nghut lhê." gâ ri.

13

Chángzô Pé É Hkyi Chì Byi É Hkyô

1 Haù Lhoqlhai Poi jé rà hí má za, Yesuq gi, Yhang, mìnkan shí mai Yhâng Wá chyáng htót lò rà ahkyíng jé bê hkyô lé, sê ri. Yhang gi, mìnkan má nyi é, Yhâng é byu pé lé chyitdap nyi é nghut luí, jìhtùm jé shoq Yhâng é chyitdap myit lé shit rà nghut lhê.

2 Myinzang zô nyi bùm kô é u lé, nat Tsadán gi, Simun é yhangzô Yudaq Iskarut chyáng, Yesuq lé ap pyâm rà myit kat byi to gú nghut ri. 3 Yesuq gi, haù lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taù lò rà sù nghut é lé le, sê ri. 4 Haù mù, Yhang gi, zohpoq mai toq luí, Yhâng é bumó lé hkyut pyâm lé, hpyidum má hpajet ralhùm èq hpyihit hit tó ri. 5 Hau htâng, Yhang gi, jirung má uchyam hut kat mù, Yhâng é chángzô pé é hkyi chì byi luí, haù Yhâng é hpyidum má hit tó é hpajet èq sut hui byi ri.

6 Yhang gi, Simun Petruq chyáng jé jáng, Simun Petruq gi, "Yhumsing é, Nàng gi, ngá hkyi lé chì byi rà nghut lhê lú?" ga myi ri.

7 Haù hkùn, Yesuq gi, "Ngò, haí kut nyi é hkyô lé, ahkuí, nàng sê gyo rà a nghut; nghut kôlhang, htâng má sê gyo rà nghut lhê." ga tú taí ri.

⁸ Petruq gi, "Ngá hkyí lé, Nàng, hkâ-nhám le wó chi byi râ a nghut." ga tai jáng, Yesuq gi, "Nang lé, Ngò a chi byí é nghut jáng, nàng gi, Ngò eq séng râ a nghut." ga tú tai ri.

⁹ Haú hkûn, Simun Petruq gi, "Yhumsîng ê, haú su nghut jáng gi, ngá é hkyí lé baú za a nghut, ngá é loq eq ulhum lé le chi byi laq!" ga tú tai ri.

¹⁰ Yesuq gi, "Gùng chi bê sù gi, hkyí za chi jáng, ragùngdú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tú tai ri. ¹¹ Hkâsu mù gà le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga tai é nghut ri.

¹² Yesuq gi, yhangmoq é hkyí lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byí é hkyô lé, sê gyo akò lúhú? ¹³ Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gà le, Ngò gi, haú yuq yhang nghut lhê. ¹⁴ Ngò, nungmoq é Sarâ eq Yhumsîng nghut sù lháng, nungmoq é hkyí lé chi byí é nghut le gi, nungmoq le, rayuq eq rayuq é hkyí lé chi byí lhum râ dut lhê. ¹⁵ Nungmoq gi, Ngò, nungmoq lé kut byí é su kut kó sháng gaq nghú, Ngò, nungmoq lé alik kut shit tô é nghut lhê. ¹⁶ Ngò, nungmoq lé teng za tai kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haú pé lé sé bekô nghut luí, châng kut kô é nghut jáng, hkungso wó kó râ nghut lhê.

Yesuq Lé Ap Pyám Râ Lé, Te Tai É Hkyô

¹⁸ Ngò gi, nungmoq banshoq bang lé lhoq ang luí tai é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyiháng la-nhik eq nâng hting râ nghut lhê.'* gà é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé tai kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjîng kó râ matú nghut lhê.

²⁰ Ngò, nungmoq lé teng za tai kôlé, Ngò nhang kat é sù lé, lhom hap yu é sù ó yuq nghut kôlé, Ngo lé hap yu é nghut bê; Ngo lé hap yu é sù ó yuq nghut kôlé, haú Ngo lé nhang kat é Sù lé hap yu é nghut bê." gà ri.

²¹ Yesuq gi, haú su ga tai é htâng má, myit wuîhke nyi mù, saksé hkâm é gi, "Ngò, nungmoq lé teng za tai kôlé, nungmoq mâ é rayuq sù gi, Ngo lé ap pyám râ nghut lhê." gà ri.

²² Haú mù, Yhâng é chángzô pé gi, ó yuq lé tai záng nyi é hkyô lé, rago a sé kô é yanmai, rayuq eq rayuq wú tsuq lhúm bum akò nghut ri. ²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

²⁴ Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, tai nyi é hkyô lé, myi wú aq." ga tai ri.

²⁵ Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lúhú?" ga, Yhang lé myí ri.

²⁶ Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tú tai luí, muk jap zo haú lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

* 13:18 Hkyá-on 41:9 * 13:19 Haú Yuq gà é gi, Hkrisduq lé gà é nghut lhê.

Haù mù, Yesuq gi, "Nàng kut rà é hkyô lé, hân kut aq hkoi." ga yhang lé tai kat ri. ²⁸ Nghut kôlhang, yhang lé, Yesuq haù su ga haù mù tai é hkyô lé, zohpoq haù má nyi tô é bang gi, rayuq lhang a sê gyo kó nghut ri. ²⁹ Haù Yudaq gi, ngùn zum sù nghut é yanmai, ra-am gi, haù Poi má rà é hkyô lé, ê wui rà matú, Yesuq tai ri ga lui lé, myùng bang lé rajung jung byí nhang ri ga lui le, myit yu bum akó nghut ri. ³⁰ Yudaq gi, muk haù lé lhom yù eq, htoq ló byuq bê nghut ri. Haù u gi, mauchut bê nghut ri.

Petruq He-ngik Pyám Râ Lé, Yesuq Te Tai É Hkyô
Mht 26:31-35; Mřk 14:27-31; Luk 22:31-34

³¹ Haù yuq htoq ló byuq jáng, Yesuq tai é gi, "Ahkuí, haù Byu Yhangzo gi, hpungwup shingkang dan hù é nghut lui, Garai Gasang gi, haù Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haù Byu Yhangzô é yanmai, hpungwup shingkang dan hù é nghut jáng, Yhang le, Yhang má haù Zo lé hpungwup shingkang dan hu nhâng rà nghut lhê; radá dâm dan hu nhâng rà nghut lhê.

³³ Ngá zo pé ê, Ngò, nungmoq eq rahá nyi rà gi, razup za ru nghut alò. Nungmoq gi, Ngo lé hô kó rà nghut lhê; nghut kôlhang, 'Ngò ló é jang má, nungmoq wó jé kó rà a nghut.' nghũ, haù Yudaq byu pé lé, Ngò tai é eq rajung za, ahkuí, nungmoq lé le, Ngò tai lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum rà dut lhê. ³⁵ Nungmoq yhangchang chyitdap lhum kó é nghut jáng, nungmoq gi, Ngá é chángzô pé nghut é hkyô lé, byu lhunglhang bang sé kó rà nghut lhê." gâ ri.

³⁶ Haù hkùn, Simun Petruq gi, "Yhumsing ê, Nàng, hká shut ló rà lú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó rà nghut lhê. Nghut kôlhang, htâng má gi, nungmoq châng ra kó rà nghut lhê." ga tù tai ri.

³⁷ Petruq gi, "Yhumsing ê, haù mù lui, ahkuí ngò Nàng htâng a wó châng é lú? Ngò gi, Nàng é matú, shí hkám rà rì rì nghut lhê." ga tai ri.

³⁸ Haù mù, Yesuq tai é gi, "Nàng gi, gè gè yhang, Ngá é matú shí hkám rà lú? Ngò, nàng lé teng za tai lé, woq a tũn shimá, nàng, Ngo lé sum dâm he-ngik pyám rà nghut lhê.

14

Yesuq, Yhang É Chángzô Pé Lé Nhkik Ting É Hkyô

¹ Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wá é yhũm má, nyi jowò myo myo joq lhê; a joq é ru nghut le gi, noq mai, Ngò, nungmoq lé tai kyo rà nghut lhê. Ngò, haù má ló é gi, nungmoq é nyi jowò ló hên lág rà matú ru nghut lhê. ³ Ngò gi, ló mù, nungmoq é matú nyi jowò ló hên é nghut jáng, Ngò nyi é jang má nungmoq le wó nyi shoq, Ngò eq rahá nyi rà matú, Ngò dum tau lé mù, nungmoq lé, lé shui yù rà nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haù hkùn, Htomaq gi, Yhang lé, "Yhumsing ê, Nàng hká shut ló é lé lhang, ngamoq a sê le nhing, hkyô haù lé, ngamoq hkâsu kut wó sé rà lú?" ga myí ri.

⁶ Yesuq gi, "Ngò gi, hkyô nghut lhê; haù tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yang, Ngo lé sé kô é nghut le gi, Ngá Wa lé le, nungmoq sé kó rá nghut lhê. Ahkuí mai, nungmoq gi, Yang lé sé kô é htoq agó, myàng le myang wú bekô nghut lhê." ga tù taí ri.

⁸ Haù hkûn, Hpilip gi, "Yhumsing ê, ngamoq lé, haù Íwa tân shit laq, haù hkûn, ngamoq nhik shí rá nghut lhê." ga taí ri.

⁹ Yesuq tù taí é gi, "Hpilip ê, Ngò, nungmoq eq shí myáng lháng nyi lò bê le nhing, nàng, Ngo lé a sé lúh? Ngo lé myang é sù gi, haù Íwa lé myàng bê nghut ri; haù nghut le nhing, 'Ngamoq lé, haù Íwa tân shit laq.' nghú, nàng hkâsu wó taí lhê lúh? ¹⁰ Ngò gi, haù Íwa má nghut nyí luí, haù Íwa gi, Ngò má nghut nyi é hkyô lé, nàng a lumjúng lúh? Ngò, nungmoq lé taí é dang haù pé gi, Ngá é myit mai taí é a nghut; haù Ngò má lúng nyi é Íwa sheq, Yhâng é mù zuí nyi é ru nghut lhê. ¹¹ Ngò gi, haù Íwa má nghut nyí luí, haù Íwa gi, Ngò má nghut nyi lhê nghú é lé lumjúng keq; haù a nghut jáng, kut shit é limik kumlhá pé dông za lháng, lumjúng keq. ¹² Ngò, nungmoq lé teng za taí kôlé, Ngo lé lumjúng é sù gi, Ngò kut é muzó lé kut rá nghut lhê. Ngò gi, haù Íwâ chyáng ló rá nghut é yanmai, haù yuq gi, hau htoq je kô é muzó pé lé lháng kut rá nghut lhê. ¹³ Haù Yhangzô é yanmai, Íwâ é hpungwup shingkan wó hù ló shoq, Ngá é mying lé lang luí, nungmoq haí jung dung kôhang, Ngò gyo byi rá nghut lhê. ¹⁴ Nungmoq gi, Ngá é mying lé lang luí, haí dung kôhang, Ngò gyo byi rá nghut lhê.

Chyoiyúng Woi-nyí Byi Râ Danggidíq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rá nghut lhê. ¹⁶ Haù Íwa gi, nungmoq eq ahtum abyuq nyi nyi rá nghut é, hpaqchyí byi Sù gotú rayuq, nungmoq lé byi rá matú, Ngò gi, haù Íwa lé dung rá nghut lhê. ¹⁷ Haù yuq gi, tengmán é Woi-nyí nghut lhê. Haù mingkan gi, Woi-nyí haù lé a myàng a sé é yanmai, Yang lé a wó hap yu é nghut lhê. Nghut kôhang, Yang gi, nungmoq eq rahá nyi nyi é nghut luí, nungmoq má nyi to rá Sù nghut é yanmai, nungmoq gi, Yang lé sê akô. ¹⁸ Ngò gi, nungmoq lé, chuizó pé dông pyâm to rá a nghut; nungmoq chyáng Ngò dum jé lé rá nghut lhê. ¹⁹ Adê myáng má, haù mingkan gi, Ngo lé a myàng lo rá nghut lhê; nghut kôhang, nungmoq gi, Ngo lé myàng kó rá nghut lhê. Hkâsu mù gá le, Ngò gi, asak dui nyi é nghut mù, nungmoq le dui kó rá nghut lhê. ²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haù buinyi má, nungmoq sé kó rá nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rá nghut lhê; Ngò le, haù yuq lé chyitdap luí, Ngá gung lé yang, yang lé shit rá nghut lhê." gá ri.

²² Hau htâng, (Yudaq Iskarut a nghut sù) Yudaq gi, "Yhumsing ê, Nàng gi, haù mingkan lé Náng gung a shit e za, ngamoq lé shit rá nghut é gi, haí mù nghut lhê lúh?" ga myí ri.

²³ Haù hkûn, Yesuq tù taí gi, "Rayuq yuq, Ngo lé chyitdap é nghut le gi, Ngá dang lé gyo rá nghut lhê. Ngá Wa le, haù yuq lé chyitdap rá nghut luí, Ngá hpe gi, haù yuq chyáng lé mù, yang eq rahá nyi rá nghut lhê. ²⁴ Ngo lé a chyitdap é sù gi, Ngá dang lé gyo rá a nghut. Nàng wó gyo é dang shí pé gi, Ngá myit

mai tai é a nghut; dang hau pé gi, Ngo lé nhang kat é Sû, hau Íwá é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé tai bê nghut lhê. ²⁶ Nghut kôhang, Ngá é mying dông, hau Íwa nhang kat rá nghut é, hpaqchyí byí Sû nghû é, hau Chyoiyung Woi-nyí gi, nungmoq lé, jung hkangmó mhoq byí rá eq, Ngò, nungmoq lé tai kyo bê hkyô lhunglhang, nungmoq lé lhoq pun rá nghut lhê. ²⁷ Ngò gi, nungmoq chyáng, nguingón hkyô tô to byí bê; Ngá é nguingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myyit nhikhlum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum tau lé rá nghut lhê.' nghû, Ngò tai é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, hau Íwá chyáng Ngò ló rá nghut é hkyô lé, nungmoq gabú kó rá nghut lhê; hkâsu mù gâ le, hau Íwa gi, Ngá htoq je ko Sû nghut lhê. ²⁹ Hau dut é hkûn, nungmoq lumjing kó sháng gaq nghû, ahkuí, hau a dut shimá, Ngò, nungmoq lé tai kyô é nghut lhê. ³⁰ Ahkuí mai, Ngò gi, nungmoq lé, dang myo myo wó nyô rá a nghut lo; hkâsu mù gâ le, mingkan shi é zau gi, jé lé lo nyi bê nghut ri. Hau yuq gi, Ngo lé up rá ahkang hai a wó é sù nghut ri. ³¹ Nghut kôhang, hau Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pê É Hkyô

¹ Ngò gi, hau tsibiyiq nuí akying nghut lhê; Ngá Wa gi, tsibiyiq hkyâm yhumsing nghut lhê. ² Yhang gi, ashí a zuí é akoq hkangmó lé, Ngá chyáng mai kyik pyám luí, ashí zuí é akoq hkangmó lé kúm gi, ashí je myo zui sháng gaq ga, shang pyám byí ri. ³ Nungmoq gi, Ngò, nungmoq lé tai é mungdang hau é yanmai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi rá nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashí wó zuí é a nghut. Hau eq rajung za, nungmoq le, Ngò má nyi nyi e za a nghut jang, ashí wó zui kó rá a nghut.

⁵ Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí. Ngò gi, yhang má nyi nyi é nghut jáng, hau yuq gi, ashí myo myo zui rá nghut lhê; hkâsu mù gâ le, Ngò mai gang jáng, nungmoq gi, hai le a wó kut kô é nghut lhê. ⁶ Ngò má a nyi nyi é sù gi, hau dú pyám é hui luí, kyuq shi byuq é akoq eq wui ri; hau sù é akoq pé gi, byu pé eq guq yù mù, myihkyóm má dú kat pyám é hui luí, nyé gyô byuq rá nghut lhê. ⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é hai nghut kôhang, dung keq; hau hkûn, nungmoq lé byí rá nghut lhê. ⁸ Nungmoq gi, hau ashí ga-myhó zuí é dông, Ngá Wá é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tún shit nyí bekô nghut ri.

⁹ Hau Íwa gi, Ngò lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má ging nyi keq. ¹⁰ Ngò gi, Ngá Wá é hkunmó lé châng é nghut luí, Yhâng é chyitdap myit má ging nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má ging nyi kó rá nghut lhê. ¹¹ Nungmoq má Ngá é gabú hkyô joq nyi rá eq, nungmoq

é gabú hkyô wó byíng Jup râ matú, Ngò, nungmoq lé, dang shí pé tai é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê. ¹³ Haú yhumsing é luzúm wui é matú, yhumsing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghù, a wut lô e za, luzúm wui nghù wut é nghut lhê; hkâsu mù gà le, dui-nhâng zoshâng gi, yhâng yhumsing hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gíng nyi é ashi zui râ matú hkyin masat tô é ru nghut lhê. Hau hkûn sheq, Ngá é myíng lé lang mù, haú Íwâ chyáng nungmoq hai jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haú gi, Ngá é hkunmó nghut lhê.

Haú Mingkan Gi, Chángzô Pé Lé A Jú É Hkyô

¹⁸ Haú mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹ Nungmoq gi, haú mingkan eq séng é bang nghut é nghut jáng, haú mingkan gi, yhang eq séng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haú mingkan mai hkyin htoq yû bê nghut luí, nungmoq gi, haú mingkan eq a séng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsing htoq je kô é a nghut.' nghù, Ngò, nungmoq lé tai é dang pé lé bún nyi keq. Ngo lé lhang, yhangmoq zing-rí yû bekô nghut le gi, nungmoq lé le, zing-rí kó rá nghut lhê. Ngò mhoqshit é hkyô lé, yhangmoq châng kô é nghut le gi, nungmoq mhoqshit é lé le, cháng kó rá nghut lhê. ²¹ Nghut kôlhang, yhangmoq gi, Ngá é myíng é yanmai, nungmoq lé haú su kut kó rá nghut lhê; hkâsu mù gà le, haú Ngo lé nhang kat é Sû lé, yhangmoq a sé kôluí nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó rá a nghut; nghut kôlhang, ahkuí gi, yhangmoq mara wó tai hkyut râ a nghut lo. ²³ Ngo lé a jú é sù gi, Ngá Wa lé le a jú é sù nghut ri. ²⁴ Haú ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó rá a nghut; ahkuí kúm gi, laklaí kumlhá haú pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haú gi, 'Yhangmoq gi, jumgúyô má Ngo lé a jú kut akô nghut ri.'* ga, yhangmoq é tará má kâ tô é dang lé lhoq dik é nghut ri.

²⁶ Haú Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyi nghut é, haú hpaqchyí byi Sû jé lé é hkûn, Ngá é hkyô lé saksé hkám byi râ nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó rá nghut lhê.

16

¹ Nungmoq gi, myit lingbat jowò a joq kó sháng gaq nghù, haú pé banshoq lé, Ngò, nungmoq lé tai kyo bê nghut lhê. ² Yhangmoq gi, nungmoq lé, tarajong mai hkat htoq pyám kó rá nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haú đông mai Garai Gasang lé dojaú nyi lhê ga myit yu é ahkyíng, gè gè yhang, jé rá nghut lhê. ³ Yhangmoq gi, haú Íwa lé le, Ngo lé le, a sé kô é yanmai, haú su kut kó rá nghut lhê. ⁴ Nghut

kôlhang, nungmoq lé, Ngò sidiq byî é hkyô lé, ahkyíng jé jáng nungmoq bûn nyi kó sháng gaq nghû, Ngò hau hkyô tai kyô é nghut lhê. Ngò gi, nungmoq eq rahá nghut nyi é yanmai, hau hkyô lé, hí hkûn nungmoq lé a tai kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuí, Ngò gi, Ngo lé nhang kat Su chyáng ló rá nghut lhê. Nghut kôlhang, nungmoq ó yuq le, 'Nàng, hká shut ló rá lúh?' ga, Ngo lé a myi kó nghut ri. ⁶ Ngò, nungmoq lé, hau hkyô pé tai kyô é yanmai, nungmoq é i-myt unghkaú má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za tai kôlé, Ngò ló byuq é gi, nungmoq é matú je gè rá hkyô ru nghut lhê. Ngò ló byuq e za a nghut jáng, hau hpaqchyí byi Sû gi, nungmoq chyáng lé rá a nghut; Ngò ló jáng sheq, Yhang lé, Ngò, nungmoq chyáng nhang kat byi rá nghut lhê. ⁸ Yhang jé lé é hkûn, Yhang gi, hau mara wó é eq séng luí le, dingmán hkyô eq séng luí le, tará jéyáng hkyô eq séng luí le, hau mingkan lé tún shit rá nghut lhê. ⁹ Hau yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri. ¹⁰ Hau dingmán hkyô eq séng luí ga jang, Ngò gi, hau Íwá chyáng ló rá nghut luí, nungmoq, Ngo lé a myàng lo kó rá nghut é yanmai nghut ri. ¹¹ Hau tará jéyáng hkyô eq séng luí ga jang, mingkan shi é zau gi, mara byí é hui é nghut é yanmai nghut ri.

¹² Ngò gi, nungmoq lé tai rá hkyô myo myo wó ashí; nghut kôlhang, ahkuí, nungmoq wó hkâm kó rá a nghut. ¹³ Nghut kôlhang, hau tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé rá nghut lhê. Yhang gi, Yhang myit đông tai rá a nghut; Yhang, wó gyô yu é hkyô lé za tai luí, dut lo rá hkyô pé lé le, nungmoq chyáng tai pyô rá nghut lhê. ¹⁴ Yhang gi, Ngò wó é lé, yù mù, nungmoq lé tai kyô é eq sé nhang é đông, Ngá é hpungwup shingkan lé hú ló nhâng rá nghut lhê. ¹⁵ Hau Íwa wó é lhunglhang gi, Ngá é chyat nghut lhê. Hau é yanmai, hau Woi-nyí gi, Ngò wó é lé yù mù, nungmoq lé sé nhâng rá nghut lhê nghû, Ngò tai é nghut lhê.

¹⁶ Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê." gâ ri.

Changzô Pé É Iyon Hkyô Gi, Gabú Hkyô Taú Dut Râ

¹⁷ Yhâng é changzô pé ra-am gi, "'Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' gâ é eq 'Ngò gi, Íwá chyáng ló rá nghut é yanmai nghut lhê.' ga, Yhang tai é gi, hai jung gá nau é nghut lhê lúh?" ga, rayuq eq rayuq myi lhum bum akô. ¹⁸ Hau htoq agó, yhangmoq gi, "'Adê myáng má,' gâ é gi, Yhang hai jung gá nau lhê lúh? Nga-nhúng gi, Yhang hai tai nau é lé a sê gyo." ga, tai lhum bum akô nghut ri.

¹⁹ Yesuq gi, yhangmoq myi naú kô é hkyô lé sê ri; hau mù, Yhang, yhangmoq lé tai é gi, "'Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' nghû, Ngò tai é lé, hai jung gá nau lhê laq nghû, rayuq eq rayuq myi lhum nyi akô lúh?" ²⁰ Ngò, nungmoq lé teng za tai kôlé, hau mingkan gi, gabú nyi é u lé, nungmoq gi, ngaú é eq iyon yón é hui kó rá nghut lhê. Nungmoq gi, iyon yón é hui kó rá nghut lhê; nghut kôlhang, nungmoq é iyon hkyô gi, gabú hkyô taú dut rá nghut lhê. ²¹ Myiwe gi, zoshâng hkû rá nghut jáng, zohkû-nò nò rá ahkyíng jé bê nghut é yanmai, myit chiq nyi ri; nghut

kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri. ²² Haú eq rajung za, ahkuí gi, nungmoq iyon yôn é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rá nghut lhê; nungmoq é gabú hkyô haú lé, nungmoq chyáng mai ó yuq éq le wó yu pyám byi rá a nghut. ²³ Haú buinyi má, nungmoq gi, Ngo lé, haí le a dung lo kó rá nghut lhê. Ngò, nungmoq lé teng za tai kôlé, nungmoq gi, Ngá myíng lang luí, Ngá Wâ chyáng hai dung kôlé, Yhang byi rá nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó rá nghut luí, nungmoq é gabú hkyô gi, byíng jup lò rá nghut lhê.

²⁵ Ngò gi, nungmoq lé, dangtú dông haú pé tai kyo bê nghut lhê; nghut kôlhang, Ngò gi, dangtú a chûng lô e za, haú Íwa eq sêng é hkyô, nungmoq lé san za tai kyô é ahkyíng jé rá nghut lhê. ²⁶ Haú buinyi má, nungmoq gi, Ngá é myíng lé lang luí dung kó rá nghut lhê. Ngò gi, nungmoq é matú, haú Íwâ chyáng dung byi rá nghut tai nyi é a nghut. ²⁷ Hkâsu mù gà le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chyitdap é nghut lhê. ²⁸ Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú ló rá nghut lhê." gà ri.

²⁹ Haú hkûn, Yesuq é chángzô pé gi, "Ahkuí, Nàng gi, dangtú a chûng é dông, san za tai kyô nyi é nghut bê! ³⁰ Nàng gi, lhunglhang lé sê é sù nghut é lé le, Nàng lé, ó yuq eq le dangmyi myi nó a rá é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga tai bum akò.

³¹ Haú hkûn, Yesuq tú tai é gi, "Nungmoq, ahkuí lumjíng bekò lhú? ³² Nghut kôlhang, nungmoq gi, lhoq pyo pyám é hui luí, Ngo lé baú za tô pyám to kômù, ó le ô yhúm shut ló byuq rá ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gà le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguínón hkyô wó kó sháng gaq nghú, Ngò gi, haú hkyô pé lé tai kyô é nghut lhê. Nungmoq gi, mingkan shí má, wuìhke hkyô hui kó rá nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gà ri.

17

Yesuq Kyûdûng É Hkyô

¹ Yesuq gi, haú su ga tai é htâng má, mauhkûng shut tu wú luí, kyûdûng é gi, "Áwa é, ahkyíng jé bê nghut ri; haú Nung Zo gi, Nang lé hpungwup shíngkang wó hu nhâng sháng gaq, Nung Zo lé hpungwup shíngkang hú ló nhâng laq ô! ² Hkâsu mù gà le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up rá ahkáng, Yhang lé byi tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shíngkang lé lhoq htoq

shit bê nghut lhê. ⁵ Áwa ê, haù mingkan lháng a joq shî mai, Ngò, Nàng eq rahá chôm wó é hpungwup shingkang eq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyúdung byi é hkyô

⁶ Mingkan mai, Nàng, Ngo lé hkyin htoq yû byi é bang lé, Ngò gi, Náng é mying lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut lui, yhangmoq gi, Náng é dang lé châng kut bekô nghut ri. ⁷ Nàng, Ngo lé byi é lhunglháng gi, Náng chyáng má é nghut é lé, ahkuí, yhangmoq sé bekô nghut ri. ⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut lui, yhangmoq gi, haù pé lé hap yû bekô nghut ri; Ngò gi, Náng chyáng mai lé é sù nghut é lé le, yhangmoq hkyak sé akô; Nàng, Ngo lé nhang kat é hkyô lé le, yhangmoq lumjúng bekô nghut ri. ⁹ Ngò gi, yhangmoq é matú kyúdung byi lhê. Ngò gi, haù mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglháng gi, Náng é chyat nghut mù, Nàng wó é lhunglháng le, Ngá é chyat nghut lhê. Haù mù, Ngò gi, yhangmoq má hpungwup shingkang hù é hui bê nghut lhê. ¹¹ Ngò gi, Nàng chyáng lò rá nghut lhê mù, mingkan htoq má nyi nyi rá a nghut lo; nghut kôlháng, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haù Náng mying é a-tsam eq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut lui, Nàng, Ngo lé byi é mying hau eq, yhangmoq lé rago zúng bê nghut lhê. Haù Chyúmdang lhoq dik sháng gaq ga, haù bang má é htên byoq hui rá sù mai lai lui, ó yuq le a byuq byuq é nghut lhê.

¹³ Ngò gi, ahkuí, Náng chyáng lò rá nghut bê; nghut kôlháng, Ngá é gabú hkyô gi, yhangmoq chyáng bying Jup sháng gaq nghú, Ngò gi, haù pé lé mingkan má tai é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haù mingkan gi, yhangmoq lé a jú nghut ri; hkâsu mù gâ le, Ngò gi, mingkan má é a nghut é su, yhangmoq le, mingkan má é a nghut kô é yanmai nghut ri. ¹⁵ Ngò kyúdung é gi, Nàng, yhangmoq lé mingkan mai shui htoq yû rá matú dung é a nghut, haù agé ashop su chyáng mai, yhangmoq lé upzúng yû rá matú sheq dung é ru nghut lhê. ¹⁶ Ngò gi, mingkan má é a nghut é su, yhangmoq le, mingkan má é a nghut kó. ¹⁷ Yhangmoq lé, haù tengmán hkyo eq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghú, Ngò gi, yhangmoq é matú, yhumings gùng lé lhoq sân-yúng yu é nghut lhê.

Lumjúng Bang Lhunglhâng É Matú, Yesuq Kyúdung Byi É Hkyô

²⁰ Ngò gi, yhangmoq é matú baù za kyúdung byi é a nghut; Yhangmoq é danglu é yanmai, Ngo lé lumjúng kó rá bang é matú le, Ngò kyúdung byi é nghut lhê. ²¹ Haù mù, yhangmoq banshoq bang gi, rading rahum za dut nyi kó sháng gaq. Haù mingkan gi, Nàng, Ngo lé nhang kat é hkyô lé wó lumjúng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za

nghut é su, yhangmoq le, rading ralhūm za dut nyi kó sháng gaq nghū, Ngò gi, Nàng, Ngo lé byi é hpungwup shingkang lé, yhangmoq lé byi bê nghut lhê.
²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haú mingkan wó sé rà matú, yhangmoq gi, gumjup shoq rading ralhūm za wó dut kó sháng gaq nghū, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

²⁴ Áwa ê, haú mingkan lháng a joq shi mai, Nàng, Ngo lé chyitdap luí byi tô é hpungwup shingkang haú lé, Nàng, Ngo lé byi tô é bang, wó myàng kó rà matú le, Ngò nyi é jang má, Ngò eq rahá wó nyi kó rà matú le, Ngò ô nau ri.

²⁵ Dingmán é Áwa ê, haú mingkan gi, Nang lé a sé kôlhāng, Ngò gi, Nang lé sé lhê; Nàng, Ngo lé nhang kat é hkyô lé gi, yhangmoq sé akò nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi rà matú le, Ngò gi, yhangmoq má wó nyi nyi rà matú le, yhangmoq lé, Ngò, Nang é hkyô sé nhāng bê nghut luí, xoq mù sé nhang nyi shirā nghut lhê." gā ri.

18

Yesuq Chyup Yū Huí É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haú su ga kyúdüng é htāng má, Yhāng é chāngzô pé eq rahá, Kedron wūlhkūng mai laí byit dap ló luí, haú hpoq má joq é hkyām ralhūm má wang e akò nghut ri.

² Hkyām haú gi, Yesuq eq Yhāng é chāngzô pé lhaq hui hui kut é jowò nghut é yanmai, haú Yesuq lé ap pyám rà sū Yudaq le sé ri. ³ Haú mù, Yudaq gi, haú hkyangjong agyi pé eq Hparishe pē chyāng mai nhang kat é noqkuq yhūm zūng bang ra-am eq gyezo rajūm lé, haú jowò shut shuí wang lé lo ri. Haú bang gi, myihu, myibung eq shām lhām pé chung lé lo akò.

⁴ Yesuq gi, Yhang má dut lò rà hkyô lhūnglhāng lé sé gū nghut mù, htoq é luí, yhangmoq lé, "Nungmoq, ó yuq lé ho akò lhú?" ga myi ri.

⁵ Haú hkūn, yhangmoq gi, "Nazaret wà byū Yesuq lé ho lhê." ga tū tai kōjāng, Yesuq gi, "Ngò gi, haú yuq nghut lhê." ga tai ri. (Yesuq lé ap pyám sū Yudaq le, yhangmoq eq rahá yap tô ri.) ⁶ "Ngò gi, haú yuq nghut lhê." ga Yesuq tai kat é hkūn jāng, yhangmoq gi, nungzut zut mù, myigūng má lēng leq ló bum akò nghut ri.

⁷ Yhang gi, "Nungmoq, ó yuq lé ho akò lhú?" ga, yhangmoq lé dum myi kat jāng, yhangmoq gi, "Nazaret wà byū Yesuq lé ho lhê." ga tai akò.

⁸ Haú hkūn, Yesuq gi, "Ngò gi, haú yuq nghut lhê nghū, nungmoq lé tai kyo bê nghut lhê; nungmoq, Ngo lé hô kó é nghut le gi, shi bang lé ló nhang pyám keq." ga tū tai ri. ⁹ Haú gi, "Nàng, Ngo lé byi tô é bang rayuq le lhāng, Ngò, a lhoq hpyuq pyám." ga, Yhang tai tô é dang dik rà matú nghut ri.

¹⁰ Haú hkūn, Simun Petruq gi, shām wun tô é nghut luí, shām shē mù, haú hkyangjong mó é dui-nhāng zōshāng é loqyo nohkyap lé zān hpyit kat byi ri. (Dui-nhāng zōshāng haú yuq é mying gi, Malhku gā ri.)

¹¹ Haú mù, Yesuq gi, Petruq lé, "Náng é shām lé, shambyāng má xāng pyám aq! Haú Íwa, Ngo lé byi é góm* lé, Ngò a shuq é wó nyi rà lhú?" ga tai kat ri.

Yesuq Lé, Anna Chyāng Shuí É É Hkyô

Mht 26:57-58; Mrk 14:53-54; Luk 22:54

* **18:11** Góm lé shuq gā é gi, jamjau hui rà eq shi hkám rà lé, tai nau é nghut lhê.

¹² Hau htâng, gyezo haú jûm eq yhangmoq é gyezau hpó, Yudaq byu pé é mingsuwún wuí gi, Yesuq lé chyup yú mù, tuí akô nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴ Kayahpaq gi, byu pé é matú rayuq shí hkám byí le je gè râ nghut lhê ga, haú Yudaq byu pé lé hpaqchyí byí é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánq yap tô ri. Haú hkyangjong mó lé rago sê é sù, gotú chángzo haú yuq gi, taú htoq ló mù, hkum zúng é myiwe myhi lé taí luí, Petruq lé shuí hâng yu ri.

¹⁷ Haú hkûn, haú hkum zúng é myiwe myhi gi, Petruq lé, "Nàng gi, haú yuq é chángzô pé má é rayuq a nghut lú?" ga myí jáng, yhang gi, "Ngò a nghut." ga tú taí ri.

¹⁸ Haú u lé, gyoq é yanmai, dui-nhâng zoshâng wuí eq noqkuq yhûm zúng bang gi, yhangmoq gyoq gâng râ matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myí Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

²⁰ Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zing é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô hái le a joq. ²¹ Nàng, hái mù Ngo lé myi lhê lú? Haú, Ngò taí é lé wó gyô é bang lé myi aq; Ngò hái taí é hkyô lé, yhangmoq gè gè sê akô nghut ri." ga tú taí ri.

²² Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghû dang tú lhê lú?" ga taí ri.

²³ Haú hkûn, Yesuq gi, "Ngò taí shut é nghut le gi, shut é hkyô lé saksé tân shit aq. Nghut kôhang, Ngò gi, têng é đông ru taí le nhing, nàng, hái mù Ngo lé pyuq lhê lú?" ga tú taí ri. ²⁴ Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haú Simun Petruq gyoq gang yap tô é hkûn, "Nàng gi, Yhâng é chángzô pé má é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyám byí é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lú?" ga taí ri.

²⁷ Haú hkûn, Petruq gi, xoq he pyám ri; haú u yhang, woq tân bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhúmwàng shut shuí e ló akô. Haú u gi, napsùn noq ashí nghut ri. Yhangmoq gi, agot a-û a dut e za, htúngli đông Lhoqlhai Poí lé wó zo rá matú, yhúmhkaú má a wàng kó nghut ri. ²⁹ Haú mù luí, mauzau Pilat gi, yhangmoq chyáng htoq é mù, "Shí yuq lé, nungmoq hai mara hún nau akô lú?" ga myí ri.

³⁰ Haú hkún, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi rá a nghut." ga tù taí akô.

³¹ Pilat gi, "Yhang lé, nungmoq yhang shuí ló mù, nungmoq é tará đông ló jéyáng keq." ga taí jáng, haú Yudaq byu pé gi, "Nghut kôlhang, ngamoq gi, ó yuq lé sat rá ahkáng le a wó é nghut lhê." ga tù taí akô nghut ri. ³² Haú su dut é hkyô gi, Yesuq, Yhang hká đông shi rá ga taí é dang lé lhoq dik rá matú nghut lhê.

³³ Haú mù, Pilat gi, yhúmhkaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lhê lú?" ga myí ri.

³⁴ Haú hkún, Yesuq gi, "Haú gi, náng é myit đông taí é nghut lhê lú? A nghut jáng, góbang mai, nang lé, Ngá é hkyô taí kyo luí nghut lhê lú?" ga taú myí ri.

³⁵ Pilat gi, "Ngò gi, Yudaq byù nghut lhê lú? Haú Náng é byù myú eq Náng é hkyangjong agyi pé sheq, Nang lé, ngá loq má ap byi é ru nghut lhê. Nàng gi, haí kut é nghut lhê lú?" ga dum myí ri.

³⁶ Haú hkún, Yesuq gi, "Ngá é mingdán gi, mingkan shi eq a séng. Mingkan shi eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuú, Ngo lé chôm hung yù kó rá nghut lhê. Nghut kôlhang, Ngá é mingdán gi, mingkan shi eq a séng é ru nghut lhê." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê lú?" ga myí jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám rá matú, Ngò, mingkan htoq má jé lé é nghut lhê. Haú tengmán hkyô eq séng é sù ó yuq le, Ngá é dang lé gyô ri." ga tù taí ri.

³⁸ Haú hkún, Pilat gi, "Tengmán hkyô gá é gi, haí jung lú?" ga myí ri. Yhang gi, haú su ga myí luí, haú Yudaq byu pé chyáng dum htoq é mù, "Shí yuq chyáng mara hún rá hkyô, ngò a myàng nghut ri. ³⁹ Nghut kôlhang, haú Lhoqlhai Poí u lé, nungmoq é matú, ngò, htóng byù rayuq nhang htoq kat byi byi kut é htung, nungmoq wó akô. Haú mù, 'Yudaq byu pé é hkohkâm' lé, nhang htoq kat byi rá lé, nungmoq ô nau akô lú?" ga myí ri.

⁴⁰ Haú hkún, yhangmoq gi, "Haú yuq lé a nghut! Barabaq lé sheq nhâng byi aq." ga, garú kat akô. Barabaq gi, damyaq nghut ri.

19

Yesuq Lé, Tapzìng Má Jén Sat Rá Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haú mù luí, Yesuq lé lạng she yù mù, nhuq bat rá matú, Pilat hkunmó hkyô ri. ² Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhíng nè hut byí akô nghut ri. ³ Hau htâng, yhangmoq gi, Yhâng chyáng dum huí é ê kut luí, "Yudaq byu pé é hkohkâm é! Chyung híng xê híng nyi sháng gaq ô!" ga taí kômù, Yhâng é myoqdong má pyuq byí akô nghut ri.

⁴ Pilat gi, haú Yudaq byu pé chyáng radàm dum htoq ê mù, "Wú keq, shí yuq chyáng mara hùn râ hkyô, ngò a myang é lé nungmoq sé sháng nghù, Yhang lé, ngò nungmoq chyáng shuí htoq lé byí lhê." ga tai ri. ⁵ Yesuq gi, haú zumuq tsûng tô é eq bu nè hîng wut to mù htoq lé jâng, Pilat gi, yhangmoq lé, "Wú keq, Yhang, shí yuq nghut lhê." ga tai ri.

⁶ Haú hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akò.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hùn râ hkyô a myàng." ga tú tai ri.

⁷ Haú hkûn, haú Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shí gîng bê nghut ri; hkâsu mù gà le, Yhang gi, Garai Gasâng é Yhangzo haú nghut lhê gà ri." ga xoq tai akò.

⁸ Pilat gi, dang haú lé wó gyo jâng, je gyô gyuq luí, ⁹ yhúmhaú shut dum wang ló mù, Yesuq lé, "Nàng, hkâmâ é sù nghut lhê lú?" ga myí ri. Nghut kôlhang, Yesuq gi, dang rahkun lhang a tú tai byi nghut ri. ¹⁰ Haú hkûn, Pilat gi, "Nàng, ngo lé a tú tai kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?" ga myí ri.

¹¹ Yesuq gi, "Nàng lé, haú ahtoq mai ahkáng byí e za a nghut le gi, nàng, Ngo lé hai kut râ a-tsam le wó râ a nghut. Haú mù luí, Ngo lé, nàng é loq má ap byí é sù gi, mara je bo é nghut lhê." ga tú tai ri.

¹² Haú hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haú Yudaq byu pé gi, "Nàng, haú yuq lé nhang pyâm é nghut jâng, nàng gi, hkoséng Kehtaq é luzúm a nghut lo; yhumsing gùng lé, hkohkâm gà é sù gi, hkoséng Kehtaq eq shai lhûm é sù nghut lhê." ga, ru jâng garû nyi bum akò nghut ri.

¹³ Haú lé wó gyo jâng, Pilat gi, Yesuq lé shuí htoq ê mù, Hebre myíng dông Gabahta gà é Luggok hkâng myhang to jang nghu é jowò mà é tarâ jéyáng tanghkuq má zung tô ri. ¹⁴ Haú u gi, Lhoqlhai Poí é matú, Hên Lajâng é Buinyi nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga tai ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akò.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lú?" ga myi jâng, haú hkyangjong agyi pé gi, "Haú hkoséng Kehtaq mai lai luí, gotú hkohkâm ngamoq a wó." ga, tú tai akò nghut ri.

¹⁶ Hau htàng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekò nghut ri.

Tapzîng Má Jén Pyâm É Hkyô

Mht 27:32-44; Mrk 15:21-32; Luk 23:26-43

¹⁷ Yesuq gi, yhumsing é tapzîng lé waq mù, Hebre myíng dông Golgahta gà é, Ugyap joq é Jowò gà é jang má htoq jé e ri. ¹⁸ Yhangmoq gi, haú má, Yesuq lé tapzîng htoq má jén tap pyám akò; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kâ yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÛ YESUQ" gà tô ri. ²⁰ Yesuq lé

jén tô é jowò gi, myuq eq chyâng lhum é htoq agó, haù masat laiká gi, Hebre dông le, Latin dông le, Grik dông le, ká tô é yanmai, haù Yudaq byu pé myo myo gi, masat laiká haù lé nghap bum akô nghut ri. ²¹ Haù Yudaq byu pé é hkyangiong agyí pé gi, Pilat lé, "'Yudaq byu pé é hkohkâm' nghũ hkáká, 'Ngò gi, Yudaq byu pé é hkohkâm nghut lhê ga, Yhang taí ri.' nghũ luí sheq ká aq." ga taí akô.

²² Haù hkûn, Pilat gi, "Ngò ká é dông, ngò ká to bê nghut lhê." ga tú taí ri.

²³ Haù gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haù ahte bu lé le, gàm rá dâ akô; nghut kôlhang, haù gi, hkyupshi a bo e za, awang mai ahpýo hpyot kut woq tô é nghut ri.

²⁴ Haù mù, yhangmoq gi, "Bu shí lé gi, a lãng cheq e za, ó yuq myang yù ang rá laq, hkyîn shosé she wú sháng." ga, rayuq eq rayuq taí lhum akô.

Haù gi,

"Yhangmoq, Ngá é mebu lé chôm gam yù kó rá; Ngá é ahtê bú é matú, hkyîn shosé shê kó rá nghut lhê."²⁵

gá é Chyúmdang lé lhoq dik rá matú dut é nghut lhê. Haù mù, gyezô pé gi, haù su kut bekô nghut ri.

²⁵ Haù Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wá má é Mariq pé, yap tô bum akô.

²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ânu é* nung zo lé wú aq." ga taí mù, ²⁷ chángzo haù lé le, "Náng nu lé wú aq." ga taí ri. Haù hkûn mai, chángzo haù yuq gi, Yesuq é yhângnu lé, yhâng é yhũm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haù Chyúmdang lhoq dik rá matú, "Ngò, wui shít ri." ga taí ri. ²⁹ Haù má, tsibiyiq wíng chyîn rayambú joq tô ri; haù mù, yhangmoq gi, wuimaù lé tsibiyiq wíng chyîn haù má jum yù luí, jàm-yang ahpýo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wíng chyîn haù lé shuq yù mù, "Mú bàn bê." ga taí ri. Yhang, haù su ga taí eq yhang, ulhum nguhoq ló mù, kâng byit bê nghut ri.

³¹ Htang nyí gi, ahkyak é Bánno buinyi nghut luí, haù nyí gi, Hên Lajang Buinyi nghut ri. Haù mù, Yudaq byu pé gi, Bánno buinyi má, mâng pé lé tapzîng htoq má a joq to nhâng nau kô é yanmai, hkyí pé lé bat hkyuí pyám mù, mâng pé lé yù hkyô pyám nhâng rá matú, Pilat chyáng dúng tóngbán akô.

³² Haù mù luí, gyezô pé gi, lé mù, Yesuq eq jén hui su nhik má é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri.

³³ Nghut kôlhang, yhangmoq gi, Yesuq chyáng jé é hkûn, Yhang shi to lãng bê nghut é lé myàng kômù, Yhâng é hkyí lé a bat hkyuí byi kó nghut ri. ³⁴ Nghut kôlhang, gyezo rayuq gi, Yesuq é namcham má lham eq htaù kat byi jáng, radá dâm sui eq wui yui htoq lo ri. ³⁵ Haù lé myàng é sù gi, saksé hkám byí ri; yhâng saksé hkám é hkyô gi, tengmán ri. Haù yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri. ³⁶ Haù hkyô pé dut é gi, "Yhâng é showui rahkat lhang a lhoq hkyuí

* 19:24 Hkya-on 22:18 * 19:26 Ânu é, gá é lé, Grik dông gi, "myiwe myhí é" ga bo tô é nghut lhê.

râ nghut lhê. "✠ gâ é Chyúmdang haù lhoq dik râ matú nghut lhê. ³⁷ Chyúmdang gotú ralhú má le, "Yhangmoq eq htau htông é sú lé, yhangmoq tu wú kó rá nghut lhê. "✠ gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byú Yosep gi, haù Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byi kat jáng, yhang gi, gungsôm haù lé, lé yu ló bê nghut ri. ³⁹ Yhang gi, hí hkún, myín lé, Yesuq lé é huí é sú, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é màng yhum htông eq rajung za, namngón jung eq rahá, pán yúng eq htup yup to byi akò. ⁴¹ Haù Yesuq lé tapzìng má jén sat pyâm é jowò nàm má, hkyâm ralhú joq ri; ó yuq lé le a lheq wú shí é, lup sik ralhú hkyâm hkaù má joq tô ri. ⁴² Haù nyi gi, Yudaq byu pé é Hên Lajang Buinyi nghut é yanmai le, lup haù le chyáng é yanmai le, yhangnhik gi, Yesuq lé, haù má é lheq tô akò nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyi htâng, napsún noq le mau a bó shimá, Magadalaq wà má é Mariq gi, haù lup má é jé le, lup hkum má é luqlong huí hpyuq to lánq é lé myang ri. ² Haù mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haù Yhumsing lé, lup mai yu htoq ló byuq bekò; hkámá é kat to kô é lé, ngamoq a sé." ga tai ri.

³ Haù mù, Petruq eq chángzo haù gi, lup shut e ló akò. ⁴ Yhangnhik í yuq é din akò; nghut kôhang, chángzo haù gi, Petruq htoq má wó din luí, lup má hí din jé e ri. ⁵ Haù mù, yhang gi, ahkaù shut ngóm wú kat é hkún, haù pán yúng htui leq tô é lé myang ri; nghut kôhang, yhang gi, a wang é nghut ri. ⁶ Hau htâng, Simun Petruq gi, cháng jé luí, lup hkaù shut wang e ri; haù hkún, yhang gi, haù má pán yúng htui joq tô é lé le, ⁷ haù Yesuq é ulhum má htup é panchoq lé le, myang ri. Panchoq haù gi, pán yúng htui eq rahá a nghut e za htui jup leq tô ri. ⁸ Haù lup má hí jé é chángzo le, ahkaù má wang é luí, myàng jang, lumjing bê nghut ri. ⁹ (Yesuq gi, shi é mai dum dui toq lô rá nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haù chángzo nhik gi, yhum taù ló bekò nghut ri.

Magadalaq Wà Má É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôhang, Mariq gi, lup shinggan má ngau yap tô ri. Yhang gi, ngau uchyang lup hkaù má ngóm wú kat ri. ¹² Haù hkún, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyí htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhi é, nàng, haì mù ngau nyi lhê lhú?" ga myi kójang, yhang gi, "Ngá é Yhumsing lé yù ló hpyuq kôluí, Yhang lé hkámá ló lheq to kô é lé, ngò a sê é yanmai nghut lhê." ga tú tai ri. ¹⁴ Haù su ga luí,

yang, lhing wú kat é hkún, Yesuq yap tô é lé myàng kôlhang, Yesuq nghut é lé yang a wú sé nghut ri.

¹⁵ Yesuq gi, "Myiwe myhí ê, nàng, haî mù ngau nyi lhè lhu? Nàng gi, ó yuq lé ho wún lhè lhu?" ga myi jáng, yang gi, hkyâm sai zo sù su ngam pyâm mù, "Sarâ é, nàng, Yhang lé waq htot pyâm é nghut le gi, hkâmá ê lhez tô é, ngo lé tai kyo laq, ngo, Yhang lé yu ló rá." ga tai ri.

¹⁶ Haú hkún, Yesuq gi, yang lé, "Mariq ê" ga wut kat ri.

Mariq gi, Yhâng shut lhin mù, Hebre myíng dông, "Raboni!" ga wut kat ri. (Haú gi, "Sarâ ê" gâ é lichyúm nghut ri.)

¹⁷ Yesuq gi, "Ngo lé hkázáng shi; hkâsu mù gâ le, Ngò gi, haú Íwâ chyáng a taú doq ló shí é nghut lhè. Nàng gi, Ngá é gumang wui chyáng ló mù, yangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhè.' gâ ri nghú, ló tai kyo aq." ga, yang lé tai kat ri.

¹⁸ Magadalaq wà mà é Mariq gi, chángzô pé chyáng ló mù, "Yhumsing lé, ngò myàng bê!" ga tai lui, yang lé shit kat é pé lé, tai kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyi htang myin lé, haú chángzô pé gi, Yudaq byu pé lé gyuq kô é yanmai, hkum tsing myhí pyâm mù, zing tô bum kô é u lé, Yesuq gi, lé jé mù, yangmoq é agùng má yap to lui, "Nungmoq nguingón yuqyo nyi sháng gaq!" ga tai ri. ²⁰ Yhang gi, haú su ga tai é htang má, yangmoq lé, Yhâng é loq pé eq namcham lé tún shit ri. Chángzô pé gi, haú Yhumsing lé myàng kôjáng, gyai gabú bum bekô nghut ri.

²¹ Yesuq gi, "Nungmoq nguingón yuqyo nyi sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhè." ga dum tai ri. ²² Haú su ga tai mù, Yhang gi, yangmoq é ahtaq má soq mut lui, "Haú Chyoiyúng Woi-nyí lé hap yù keq. ²³ Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyâm byí é hui rá nghut lhè; nungmoq a hkyut byí é nghut jáng, mara haú pé gi, hkyut pyâm é hui rá a nghut." ga tai ri.

Htomaq Lé, Yesuq Htoq Shit É Hkyô

²⁴ Haú chángzô raxe í yuq má bo é, Zozúm le gâ é Htomaq gi, Yesuq lé jé é hkún, haú chángzô pé eq rahá a nyi to nghut ri. ²⁵ Haú mù lui, gotú chángzô pé gi, yang lé, "Haú Yhumsing lé, ngamoq myàng bê." ga tai kyô akô.

Nghut kôlhang, yang gi, yangmoq lé, "Ngò gi, Yhâng é loq pé mà é shamtoq zuhkô lé myàng mù, ngá é loqnyhuí eq joi wú é eq, Yhâng é namcham má, ngá é loq eq myang lap wú é za a nghut jáng, haú lé ngò lumjing rá a nghut." ga tai ri.

²⁶ Rabat myáng jáng, chángzô pé gi, haú yhúmhaú má dum nyi tô akô; Htomaq le, yangmoq eq rahá nghut nyi ri. Haú hkum pé myhí to kôlhang, Yesuq gi, lé jé mù, yangmoq é agùng má yap to lui, "Nungmoq nguingón yuqyo nyi sháng gaq!" ga tai ri. ²⁷ Haú htang, Yhang gi, Htomaq lé, "Náng é loqnyhuí, shí má lé joi mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjing nyi aq." ga tai ri.

²⁸ Haú hkún, Htomaq gi, "Ngá é Yhumsing, ngá é Garai Gasang ê!" ga Yhang lé tai ri.

²⁹ Yesuq gi, yhang lé, "Nàng gi, Ngo lé myang é yanmai, lumjǐng é a nghut lhú? A myàng kôlhang, lumjǐng é bang gi, hkungsô wó nyi ri." ga tai ri.

³⁰ Laiká buk shí má a kâ tô é limik kumlhá pé gotú myo myo lé le, Yesuq gi, Yhâng é chángzô pé hí má kut shit bê nghut ri. ³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjǐng râ matú eq, lumjǐng é yanmai, nungmoq Yhâng é myǐng má asak wó kó râ matú, shí hkyô pé lé kâ tô é nghut lhê.

21

Ngozo Wó Chyup Yu É Limik Kumlhá

¹ Hau htàng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô má é đông nghut ri. ² Simun Petruq, Zozúm le gâ é Htomaq, Galile mau Hkanaq wà mó má é Nahtanelaq, Zebedi é yhangzo nhik eq gotú chángzo í yuq pé gi, rahá nyi to bum akô. ³ Háu hkún, Simun Petruq gi, yhangmoq lé, "Ngò gi, ngozo kóng ê râ." ga tai jáng, yhangmoq gi, "Ngamoq le châng lé râ." ga tai akô. Háu mù luí, yhangmoq gi, htoq é mù, háu lhai má wàng bekô nghut ri; nghut kôlhang, háu myǐn, radu lháng a wó kóng kó nghut ri.

⁴ Htang napkyô maubó lo é hkún, Yesuq gi, wuiyàm má yap tô ri; nghut kôlhang, háu chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui é, nungmoq, ngozo wó akô lhú?" ga, wut myi kat jáng, yhangmoq gi, "A wó." ga tù tai akô.

⁶ Háu hkún, Yhang gi, "Nungmoq é gùn lé, háu lhai é loqyo hkyam shut dú hkyô kat keq; háu jáng, nungmoq wó kông yù kó râ nghut lhê." ga tai ri. Háu mù, yhangmoq gi, gùn dú hkyô kat é hkún, ngozo lúm myô é yanmai, háu gùn lé lháng a wó lǎng yù lo kó nghut ri.

⁷ Háu mù luí, háu Yesuq chyitdap é chángzo gi, Petruq lé, "Yhumsǐng ru nghut ri." ga tai ri. Simun Petruq gi, "Yhumsǐng ru nghut ri." gâ é lé wó gyo eq yhang, yhang gi, mebu hkyut pyám tô é yanmai, buhǐng mó lé, yhâng é gùng má baiyup yù mù, wui hkaú má byam wang ló bê nghut ri. ⁸ Háu chángzo góbang gi, wuiyàm eq ngo xê làm kô za wê é yanmai, ngozo byǐng tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm má jé dap ló kô é hkún, myigyé gyúng é myǐhkyóm htoq má ngozo nyhǐn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Háu, ahkuí za nungmoq wó kông yu é ngozo, ra-am yù lé keq." ga tai ri.

¹¹ Háu mù, Simun Petruq gi, lhai má doq jì luí, kô é ngozo rasho nóg xe sũm du yhang bo é gùn lé, dùng yàm má she htoq tô ri. Ngozo háu myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga tai ri. Chángzô pé gi, Yhang, háu Yhumsǐng nghut é lé sé kô é yanmai, ó yuq lháng, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé ê yù luí, yhangmoq lé byi ri; ngozo lé le, háu su kut ri. ¹⁴ Yesuq gi, shi é mai lhoq dui toq yù huí é htàng, Yhâng é chángzô pé lé htoq shit é má, shí gi, sum dâm nghú râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htàng má, Yesuq gi, Simun Petruq lé, "Yohan é yhangzo Simun é, nàng gi, shí bang htoq má, Ngo lé teng za je chyitdap lhê lhú?" ga myi jáng, yhang gi, "Nghut lhê; Yhumsǐng é, ngò, Nàng lé chyitdap é

hkyô lé, Nàng sê lhê." ga tù tai ri. Haú hkûn, Yesuq gi, "Ngá é sau zô pé lé, baú aq." ga, yhang lé tai ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tù tai ri. Haú hkûn, Yesuq gi, "Ngá é sau pé lé, rém aq." ga tai ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myi ri.

Haú hkûn, Petruq gi, "Nàng gi, ngo lé chyitdap lhê lú?" ga, yhang lé Yesuq eq súm dam dàm tai é yanmai, yhâng myit nò lui, "Yhumsing ê, Nàng gi, lunglhang lé sê lhê; ngò, Nàng lé chyitdap é hkyô lé, Nàng sê lhê." ga tai ri.

Haú hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za tai lé, nàng, zorâm nghut é hkûn gi, yhumsing gùng yhumsing hpyihit baiyup* yù mù, ê nau é jowò hkangmó má wó è é nghut lhê; nghut kôlhang, nàng mang jáng gi, loq í loq lham lui, nang lé góyuy eq hpyihit baiyup byi mù, nàng a é nau é jowò shut shuí ê rà nghut lhê." ga tai ri. ¹⁹ (Yesuq haú su ga tai é gi, haú Petruq, hkâsu kut shí é đông mai, Garai Gasâng é hpungwup shingkang lé dan hu nhâng rà nghut é lé, tai nau é nghut ri.) Hau htâng, Yesuq gi, yhang lé, "Ngá htâng cháng aq." ga tai ri.

²⁰ Haú hkûn, Petruq gi, lhing wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsing ê, Nang lé ap pyám rà sù gi, ó yuq lú?" ga, myi wú é sù nghut ri. ²¹ Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut rà lú?" ga myi ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú? Nàng gi, Ngá htâng cháng aq." ga tù tai ri. ²³ Dang hau é yanmai, chángzo haú yuq a shí rà nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí rà hkyô lé tai é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú?" ga, tai é ru nghut lhê.

²⁴ Shí pé lé saksé hkám mù, shí pé lé kâ tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotú muzó myo le kut ashí nghut ri. Muzó haú pé lhum jup lé, kâ htoq yu é ru nghut le gi, kâ tô é laiká buk haú pé gi, mingkan gón má lhang ngò rà a nghut nghú, ngò wó myit ri.

* **21:18** Hpyihit baiyup gâ é lichyúm gi, mebu wut lui ri ri kut tô é lé gâ lhê.

LAGYO Laiká (Acts)

Yesuq, Mauhkûng Má Shuí Yù Huí É Hkyô

¹ Htohpiluq è, Yesuq yhang hkyin yu tô é lagyo pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuí yu é buinyì jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhè é laiká buk má ngò kê kat bê nghut lhè. ³ Yesuq gi, shí hkâm é htâng má, Yhang dui toq bê hkyô lé, lungíng é saksé myo myô èq yhangmoq lé tún shit mù, buinyì myi xê nyí gyoro má yhangmoq chyáng lé htoq shit shit kut luí, Garai Gasang é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ é danggidiq byí tô é chyunghuq lé láng nyí keq. ⁵ Hkâsu mù gà le, Yohan gi, wui èq wui-myhup hkâm byí é nghut lhè; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhè." gà ri.

⁶ Lagyo pé gi, Yhang eq rahá chôm zup ming tô é hkûn, Yhang lé, "Yhumsing è, nàng, haù Israelaq byu pé lé mingdán dum xuq byi râ gi, ahkuí yhang nghut bê lúhú?" ga myí akò.

⁷ Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksé pé dut kó râ nghut lhè." ga luí, yhangmoq lé tai ri.

⁹ Dang haù ban tai é htâng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé è, haí mù luí mauhkûng shut wú tsuq nyi akò lúhú? Nungmoq é hí mai mauhkûng shut shuí yù huí é, haù Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhè." ga tai akò.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wà mó shut taù ló bekò. * Haù gyoro gi, Bánno buinyì má ge sô é í za wê ri. ¹³ Yhangmoq jé ló kôjáng, yhangmoq nyi nyi kô é yhúm ahtoq pyâm mâ é wap shut doq ló akò; haù bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akò. ¹⁴ Yhangmoq lhunglhâng bang gi, myiwe wui le, Yesuq é yhangnu Mariq lé, yhanggu pé le kut mù, i-myyit rahkat za kyù chôm dung dung kut nyi akò.

* 1:12 Tsanlun bùm eq Yerusalem gyoro gi, déng rawuí hkup kô we ri.

¹⁵ Buinyi haú yoq má, Petruq gi, lumj́ing é gumang gu-nhá† wui rasho í xê yuq kô zup zing tô é gung gung má, toq yap mù, ¹⁶ "Gumang gu-nhá wui ê, Yesuq lé chyup é bang lé hkyô shuí hî é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kólhang shí hkyô dut bê nghut ri." ga taí ri.

¹⁸ (Yudaq gi, yhang kut é agê ashop é muzo mai wó é ahaú êq myigùng ratóng wui yu é htâng, haú má yhang, a-nghop dông byit gyó mù wam buq goq luí, ù banshoq buq myín byuq bê nghut ri. ¹⁹ Haú hkyô lé Yerusalem wá mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

²⁰ Petruq xoq taí é gi, "Hkásu mù gâ le, Hkya-on Kungtón Laiká má, 'Yhâng é jowò chamchuyiui dut byuq sháng gaq; haú má ó le a nyi kó sháng gaq.'*

ga luí le, dum

'Yhang wó é ayá lé byù góyuq wó yu pyám byi sháng gaq.'*

ga luí le, bo tô ri. ²¹⁻²² Haú mù luí, Yohan baptisma byí hî é hkún mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

²³ Haú hkún, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haú mù, yhangmoq kyúdung kô é gi, "Byù banshoq é i-myyit lé sê é Yhumsíng ê, Yudaq Iskarut gi, yhang lô gíng é jowò shut lô rá ga, tò pyám tô é yhâng é lagyo ayá é matú shí nhik má é nàng hkyin tô é sù lé tún shit laq ò." ga akô. ²⁶ Hau htâng, yhangmoq, byù hkyin shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumj́ing bang banshoq gi, jowò ralhóm má za, chóm zup míng nyi tô akô. ² Haú hkún, laidum mó lo é su gâ é htê gi, byodàn ratung, mauhkúng mai myíng htoq lô mù luí, yhangmoq zing tô é yhúm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí eq taí nhang é eq rajung za, laklai dang dông nyo lo bum akô.

⁵ Haú u lé, mauhkúng ô má joq é mingdán hkangmó má é, tarâ hkunggâ é Yudaq byu pé gi, Yerusalem wá mó má bíng nyi bum akô. ⁶ Haú myíng é htê lé wó gyo kôjáng, byù rajùm rayò zing lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhunglháng gi, Galile byu pé chyat a nghut kó lúh? ⁸ Haú nghut é wa, hkásu mù nga-nhúng ó le ô é yhumsing mau má é myíng dông sê gyô yu lhê lúh? ⁹ Parhti, Medi, Elam mau

† 1:15 Gumang gu-nhá gâ é lé, Grik má gi, gumang za gâ to lhê. * 1:20 Hkya-on 69:25 * 1:20

Hkya-on 109:8 * 2:1 Penteko-ti gâ é gi, Lhoqlhai Poi lai é htâng ngo xê nyí jé é buinyi má, kut é poi lé gâ lhê.

mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bing nyi é Yudaq byu pé eq Yudaq noqkuq htung má lhung wang lò bang, ¹¹Kreti zinlóng eq Arabiq mau mâ é bang, nga-nhung gi, yhangmoq hko kyô é Garai Gasang é mauhpo muzó hkyô lé, yhumsing mau mâ é mying dông yhang wó sê gyô yu ri-nhung." gâ ri. ¹²Yhangmoq banshoq bang gi, mau ung-ang byuq kômù, "Shí gi, hai wá nghut lhê lhu?" ga le, rayuq eq rayuq myi lhum bum akô.

¹³Nghut kôlhag, byù ra-am gi, "Shí bang gi, í shuq wut é bang nghut akô." ga lui, tai jihpoi bum akô nghut ri.

Petruq Hko Kyô É Mungdang

¹⁴Haù hkùn, Petruq gi, lagyo góbang raxe rayuq eq toq yap mù, htê mó èq byù haù bang lé tai é gi, "Yudaq byu pé eq Yerusalem wá mó má nyi nyi é lhunglhang bang ê, rago gyô wú keq! Ngò, nungmoq lé, shí hkyô tai kyo kôlé.

¹⁵Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkying za ru nghut ashí. ¹⁶Shí hkyô kúm gi, myiqhtoi Yoelaq tai tô é eq rajung za dut é nghut ri. ¹⁷Yhang tai tô é gi, 'Garai Gasang ísu gâ ri: Lô htang é buinyi pé má, Ngò Ngá é Woi-nyí lé byù lhunglhang bang é ahtoq má hut gyun rà nghut lhê.

Haù mù, nungmoq é yuqzo byizó pé gi, myiqhtoi htoi kó rà; nungmoq é zorâm wui gi, myoqwup shing-rân myàng kó rà; nungmoq é hpaù mang pé gi, yhpumoq myàng kó rà nghut lhê.

¹⁸Buinyi haù pé má, Ngá é dui-nhang zoshang hpô pé eq dui-nhang zoshang myhi pé é ahtoq má lhang, Ngò Ngá é Woi-nyí lé hut gyun mù lui, yhangmoq gi, myiqhtoi htoi kó rà nghut lhê.

¹⁹Ngò gi, ahtoq mauhkung htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé èq kut mù tún shit rà.

²⁰Haù Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rà nghut lhê.

²¹Haù hkùn, Yhumsing é mying lé lang é bang yuq hkangmó gi, hkyi yu é hui kó rà nghut lhê.[✧]

gâ ri.

²²Israelaq byu pé ê, dang shí lé gyô yù keq, nungmoq sê é eq rajung za, Nazaret wá byù Yesuq nungmoq é hí má tún shit é, laklai kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. ²³Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyám é hui mù, nungmoq gi, agè ashop byu pé é loq èq, Yhang lé tapzing htoq má jén sat pyám nhang bekô nghut ri. ²⁴Nghut kôlhag, haù shí-nò hkyô gi, Yhang lé wó hkùm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi lui lhoq dui toq yù bê nghut ri. ²⁵Dawiq gi, shí yuq eq séng lui tai é má, 'Haù Yhumsing gi, ngá é myoq hí má hkâ-nhám le nyi nyi é lé ngò myàng bê. Yhang ngá é loqyo hkyam má nyi nyi é yanmai, ngo lé wó lhoq nhún rà a nghut lo.

²⁶Haù mù, ngá i-myt gi, nguingón nyi lui, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi rà nghut lhê.

27 Hkâsu mù gâ le, nàng, ngá é woi-nyí lé mosumhkung má tô pyâm to rá a nghut.

Nàng, náng é Chyoiyúng Sû lé bup byuq é hui nhâng rá a nghut.

28 Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi rá nghut lhê.*[†]
gâ ri.

29 Gumang wui ê, nga-nhông é íchyí íkê Dawiq kâng byit mù, myhup pyâm hui bê hkyô lé le, yhâng é lup gi, hkû-nyí jé shoq nga-nhông chyáng joq tô é lé le, ngò, nungmoq lé a gyuq a kyum wám tai lhê. 30 Dawiq gi, myiqhtoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng rá ga Garai Gasang byi tô é danggidiq lé sê to mù,

31 'Hkrisduq† gi, mosumhkung má pyâm to a hui rá eq, Yhâng é gungsho a bup byuq é za, dum dui toq ló rá nghut lhê.', gâ é hkyô lé te sê to luí tai tô ri.

32 Garai Gasang gi, haù Yesuq lé lhoq dui toq yù bê. Ngamoq banshoq bang gi, haù hkyô é saksé pé nghut nyi ri. 33 Haù mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. 34-35 Hkâsu mù gâ le, Dawiq gi, mauhkúng htoq tsáng myhâng má a doq ló wú kôlhâng, yhang gi,

'Haù Yhumsíng Garai gi, ngá é Yhumsíng lé,

"Ngò, náng é gye pé lé, náng é hkyí nang tanghkuq kut pyâm byí é hkyíng jé shoq,

Ngá é loqyo hkyam shut zung nyi shi aq." gâ ri.*[†]

ga luí, tai ri.

36 Hau é yanmai, Garai Gasang gi, nungmoq èq tapzîng má jén sat pyâm é haù Yesuq lé, Yhumsíng eq Hkrisduq dut nhang é hkyô, Israelaq byu pé lhunglhâng bang hkyak sê nyi kó sháng gaq ô." gâ ri.

Sâng-hi Lumjîng É Bang

37 Yhangmoq gi, haù lé wó gyô bùm kôjáng, yhangmoq é i-mytit má záng kô é nghut mù luí, "Gumang wui ê, ngamoq hkâsu kut lo rá lhú?" ga luí, Petruq eq lagyo góbang lé myí akò.

38 Petruq gi, "Nungmoq yuq hkangmó myit lhîng mù, Yesuq Hkrisduq é myîng mai wui-myhup hkâm yù keq; Haù jâng, nungmoq é yubak hkyut pyâm byí é hui kó rá nghut lhê. Haù hkûn, Chyoiyúng Woi-nyí gâ é chyunghuq lé, nungmoq wó yù kó rá nghut lhê. 39 Hkâsu mù gâ le, danggidiq haù gi, nga-nhông é Yhumsíng Garai Gasang ji yù rá bang banshoq nghut é, nungmoq eq nungmoq é yhangzo yhangshù pé eq le, mau we má nyí é lhunglhâng bang eq le, sêng lhê." ga luí, yhangmoq lé tai kyô ri.

40 Yhang gi, dang gotú myo myô èq le saksé hkâm mù, "Shí agé ashop é amyú mai wó lut htoq lo keq ô!" ga luí, yhangmoq lé lhoq pun lhoq kyîng ri. 41 Dang haù lé guq yu é bang gi, wui-myhup hkâm yu bùm kôluí, haù nyí má byù sum hkyíng kô jat wàng lo bum bekô nghut ri.

Lumjîng Bang Zùm Yap É Hkyô

* 2:28 Hkya-on 16:8-11 † 2:31 Grik dong Hkrisduq gâ é gi, xù but hui Sû gâ é lichyúm nghut mù, Hebre dong Mesaia gâ é eq rajung za nghut lhê. * 2:34-35 Hkya-on 110:1

⁴² Haú bang gi, lagyô pé mhoqshit é hkyô, zùm yap é hkyô, muk hpê gam é hkyô† eq akyû dúng é hkyô má, i-myit rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lunglhang bang gi, gyuq maú nyi bum akô nghut ri. ⁴⁴ Lumjîng é lunglhang bang gi, rawò má za zup zîng to mù, azîng zè banshoq lé chôm chung nyi akô. ⁴⁵ Yhangmoq gi, yhumsing é sutzé pé lé, ùng pyám mù, yuq hkangmò lé, yhang râ tô é eq rajung za gàm byi akô. ⁴⁶ Yhangmoq gi, nyi wui myit rahkat zâ èq noqkuq yhùm wàng má nyi nyi akô. Yhumsing é yhùm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsing gi, nyi wui yhangmoq chyáng hkyi yù huí bang jat lò nhang ri.

3

Hkyi Hten Sû Rayuq Lé, Petruq Lhoq Gê Byi É Hkyô

¹ Ahkuí, Petruq eq Yohan gi, myinhâng zó sum hkyíng lhê é kyûdung nám má, noqkuq yhùm shut doq e ló akô. ² Haú hkûn, ínù unghkaú mai hkyi hten lugù dut é byù rayuq lé, noqkuq yhùm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyi hkang nyi mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhùm haú má wang e ló é lé, myàng luí, lhóm dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haú mù, yhang, yhangnhik chyáng mai rajung jung wó yù râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhâng, ngò wó é nang lé byi lé: Nazaret wâ byù Yesuq Hkrisduq é myîng mai toq sô ló aq." ga taí uchyang, ⁷ yhâng é loqyo loq má zui mù lâng toq kat ri; haú hkûn jâng, yhâng é hkyi kochang-chap pé wúm bo lò bê nghut ri. ⁸ Haú mù, yhang gi, radâ dâm toq yap mù sô kat luí, so uchyang, byâm uchyang Garai Gasang lé hkya-on mù, yhangnhik eq rahá noqkuq yhùm má wang ló ri. ⁹ Yhang sô e ló nyi é eq Garai Gasang lé hkya-on kungton nyi é lé, lunglhang bang chôm myang akô. ¹⁰ Haú yuq gi, noqkuq yhum é Yúnglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byin châng tô é hkûn, shiwa byu pé gi, wú maú uchyang, Sholumon jîrop shut, yhangmoq chyáng din yán wang lé lo bum akô. ¹² Petruq haú lé myàng jâng, shiwa byu pé lé taí é gi, "Israelaq byu pé è, shí yuq é hkyô lé hái mù luí maú nyi akô lú? Nga-nhik é dîngmân hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lú? Haú dông a nghut. ¹³ Abraham, Isak eq Yakup pé é Garai Gasang, nga-nhûng é íchyí íwa pé é Garai Gasang gi, Yhâng é dui-nhâng zoshâng Yesuq lé hpungwup shîngkang lhoq htoq byi é nghut ri; nungmoq kúm gi, Yhang lé sát huí shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má

† **2:42** Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

yang, Yhang lé he-ngik pyâm akô nghut ri. ¹⁴ Haû chyoyúng dingmán é Sû lé nungmoq he-ngik pyâm kômù, byù sat sù lé sheq dúng htoq yû kôluí, ¹⁵ Asak Yhumsing lé gi, sat pyâm bekô. Garai Gasang kúm gi, haû yuq lé shí é mai lhoq dui toq yû bê nghut ri; ngá-nhik gi, haû hkyo é saksé nghut nyi lhê. ¹⁶ Yesuq é mying lé lumjǐng é yanmai, haû lumjǐng myit mai za, shí nungmoq myang é sê é sù lé wum-o lhoq pying byi bê nghut ri; nghut bê, Yesuq lé lumjǐng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haû hkyô lé a sé mù kut pyâm é hkyô lé ngò sê nyi lhê. ¹⁸ Nghut kôlháng, haû hkyô gi, Garai é Hkrisduq shí-nò jamjau hui rá nghut lhê ga luí, myiqhtoi banshoq bang lé hí hí mai taí nhang tô é Garai Gasang yang, lhoq dik é nghut ri. ¹⁹ Hau é yanmai, haû Yhumsing chyáng má é nguingón é ahkyíng yàm yoq jé lô rá matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi rá matú le, nungmoq é yubak mara hkyut pyâm byí é hui rá matú le, nungmoq gi, myit lhǐng mù Garai Gasang chyáng lhǐng lò keq. ²¹ Garai Gasang gi, a-nham pyat mai, Yhâng é chyoyúng myiqhtoi pé é nhut mai, taí nhang to bê eq rajung za, nyi mi-nyí, joq mijoq lé asik dum saí é pyat jé shoq, Yesuq lé mauhkúng htoq má nyi nhang to rá nghut lhê. ²² Hkâsu mù gâ le, Mosheq taí tô é le, 'Haû Yhumsing Garai Gasang gi, nungmoq é yanggu yangmông pé chyáng mai, nungmoq é matú ngò sù é myiqhtoi rayuq pô htoq lô nhâng rá nghut lhê; haû yuq taí mitaí nungmoq gyo ra rá nghut lhê. ²³ Myiqhtoi hau é dang lé a gyo sù ó yuq nghut kôlháng, yhumsing é byù myú mai chyung hpyit pyâm é hui rá nghut lhê.'* gâ ri.

²⁴ Gè gè yang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, haû myiqhtoi pé é dang silí wunlí eq, Garai Gasang mai, Abraham lé, 'Náng é awut ashín é yanmai, mingkan htoq má é byù myú chângjup hkungsô wó kó rá nghut lhê!*' gâ é eq rajung za, nungmoq é íchyí iwá pé eq tô tô é danggidiq lé wó hkam yù rá bang nghut akô. ²⁶ Garai Gasang gi, nungmoq yuq hkangmó lé yhumsing agé ashop é hkyô mai wó lhǐng taú lò nhang é đông, shimân byi rá matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Hui É Hkyô

¹ Hkyangjông pé, noqkuq yhúm zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkún, htoq lé lô kômù, ² yangnhik, shiwa byu pé lé mhoqshit é eq, Yesuq é yanmai shí byuq bê bang Yesuq má dum dui toq lô rá gâ é hkyô lé taí nyi kô é yanmai, yangmoq gyai yang myit myô nyi bum akô. ³ Haû mù, yangmoq gi, yangnhik lé chyup yû luí, myinhâng mauchut lô bê nghut é yanmai, htang napkyó jé shoq htóng má lhǐng tô akô. ⁴ Nghut kôlháng, mungdang lé wó gyô yu é bang myo myo gi, lumjǐng kômù luí, yuqgè ngo hkyíng kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myi Jep Wú É Hkyô

⁵ Htang nyí, yhangmoq é zau wuí, suwún wuí eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gúng má nyhi to luí, "Nungnhik gi, hai a-tsam, ó yuq é myíng mai mù shí lé kut akô lúh?" ga myí akô.

⁸ Haú hkún, Petruq gi, Chyoiyúng Woi-nyí byíng tô é nghut mù luí, yhangmoq lé tai é gi, "Mingbyú wuí é zaugun suwún wuí ê, ⁹ hkyí hten sù shí yuq lé lhoq gê byí é jeju yanmai, yhang hkâsu kut lhoq ge yù huí é hkyô lé, hkú-nyí nungmoq ngá-nhik lé myí gôn wú naú kô é nghut le gi, ¹⁰ nungmoq lhunglhang bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám wú, Garai Gasâng eq shi é mai lhoq dui toq yu é, Nazaret wà byú Yesuq Hkrisduq é myíng mai, shí yuq gi, nungmoq é hí má ísu wáng wáng zán zán yap tô é nghut ri.

¹¹ 'Yhùm sai bang nungmoq hkyin htoq pyâm é luqgok gi, htungchyún mâ é ahkyak dik é luqgok dut bê.*
gâ é gi, Yesuq lé tai é đông nghut ri. ¹² Hkyi yù hkyô gi, Yhang mai lai luí gotú a nyí lo, hkâsu mù gâ le, nga-nhúng hkyi yu é hui râ matú, mauhkúng a-ô má, Yhâng é myíng mai lai luí, xângzo byu pé lé byí tô é myíng gotú a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum tai é lé myàng kôjáng, yhangnhik, jong a doq wú é, mayú byú za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, tai râ hkyô hai le a joq lo kó nghut ri. ¹⁵ Haú mù, yhangnhik lé, haú Yudaq byin tú wapdoq* mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shí nhik lé hkâsu kut lé gè râ lúh? Yhangnhik kut shit e laklaí kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haú lé a wó hê lo nghut ri. ¹⁷ Nghut kôlhang, mingbyú wuí má shí hkyô je riyhang a byo myín ló sháng gaq, ahkuí mai myíng haú lé lang mù ó lé le a tai kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yù luí, Yesuq é myíng lé lang mù, hai le hkâtai, hkâ-mhoqshit kó ga chôm hkúm akô. ¹⁹ Petruq eq Yohan kúm gi, "Garai Gasâng é mungdang lé gyo rá htoq má, nungmoq é dang gyo le gi, Garai Gasâng é hí má gè râ, a gè rá lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a tai é, a wó nyí nghut lhê." ga luí, yhangmoq lé dum tú tai akô.

²¹ Haú hkún, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi rá hkyô a myàng kô é nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haú laklaí kumlhá đông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjîng Bâng É Kyûdung Dang

* 4:11 Hkya-on 118:22 * 4:15 Yudaq byin tú wapdoq lé Grik đông gi, San-hedrin gâ lhê.

²³ Yhangnhik gi, nhang kat pyâm é hui kôjáng, yhangnhik é luzúm wui chyáng taù ló kômù, hkyangjong agyi pé eq suwún wui èq yhangnhik lé hkyim é dang banshoq lé, ló tai kyo akô nghut ri. ²⁴ Haù hkyô lé wó gyo kôjáng, yhangmoq gi, myit rahkat zâ èq yhumsing é htê lhoq ko mù, Garai Gasang lé kyüdung kô é gi, "Mauhkung eq myigùng, wuishuq lung-aù eq, haù pé má, nyi mi-nyì lé hpan tô é, ahko ahkáng lhunglháng wó é Yhumsing ê, ²⁵ Náng, náng é dui-nhâng zoshâng, ngamoq é ichyí iké Dawiq é nhut mai, Chyoiyúng Woi-nyì èq tai tô é gi, 'Haù mù luí, tungbaù amyü pé gi, nhikjum yô akô? haù mù luí, byu pé gi, akôm dâ pyám akô lhú?

²⁶ Haù Yhumsing eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wui eq rahá zup zing bum akô.[†] gâ ri. ²⁷ Gè gè yhang, Herut eq Pontu Pilat nhik gi, tungbaù pé eq Israelaq byu pé le mù, wà mó shí má chôm zing to kôluí, náng xù but byi é sù,† náng é Chyoiyúng dui-nhâng zoshâng Yesuq lé gumlau toq râ dâ nyi akô. ²⁸ Náng é wum-o a-tsam eq náng ô nau é dông dut râ matú, hí hkün mai náng myit hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsing ê, ahkuí yhangmoq tai kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit èq náng é dang lé tai râ matú wum-o byi laq! ³⁰ Náng é wum-o bo é loq lhâm kat luí, noli nojàng lé lhoq gè byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gâ akô.

³¹ Haù su, kyü ban dung kôjáng, yhangmoq zing tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyì bying lô luí, Garai Gasang é mungdang lé a gyuq a kyum é za tai bùm bekô nghut ri.

Azing Zê Lé Chôm Gam Chûng Kô É Hkyô

³² Haù lumjing é lhunglhâng bang gi, i-myit rahkat za nghut nyi akô; ó yuq le, yhumsing wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haù Yhumsing Yesuq dum dui toq é hkyô lé a-tsam mó èq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyí ratóng wó é, a nghut jáng, yhúm wó é bang ó yuq nghut kôlháng, haù pé lé adàm dâm ùng pyám luí wó yu é ngùn le gi, ³⁵ lagyô pé é hkyí wang má lé to byi akô. Haù mù luí, a wó a lóm sù ó yuq lé le ra tô é eq rajung za gàm byi akô nghut ri.

³⁶ Haù hkün, Barnaba ga luí lagyô pé èq myhíng byi é, Kupru ming má é Lewiq byù Yosep le, yhang wó é maumyí ratóng lé ung luí, wó yu é ngùn lé lagyô pé é hkyí wang má, lé to byi ri. ³⁷ Barnaba gâ é dang lichyúm gi, myit wum byi su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlháng, Anani ga sù gi, yhangmyi Sahpira eq rahá, yháng nhâm wó é maumyí ratóng lé ùng pyám luí, ² yhangmyi le bo sê é dông, ngùn haù ra-am lé gi, haq myhit yu to mù, ra-am lé za lagyô pé é hkyí wang má lé to byi akô.

† 4:26 Hkya-on 2:1-2 † 4:27 Xù but é hkyô gi, Yudaq byu pé htùng dông xù but byi jáng, rajung jung kut râ matú hkyin masat yu é hkyô nghut lhê. Xù but byi é sù gi, Grik dông Mesaia gâ é nghut lhê.

³ Haù mù luí, Petruq gi, "Anani ê, Chyoiyúng Woi-nyí lé mhaù pyám rà matú eq, maumyí hpau má é ra-am lé haq yu to rà matú, haí mù luí, náng é myít má Tsadán le byíng nhang tô lhê lú? ⁴ Maumyí haù joq tô le, náng é zè nghut lhê a nghut lú? Wó ung é ngùn le náng é zè nghut ashí, a nghut lú? Haí mù luí, náng haù dông dà lhê lú? Byù lé mhaù é a nghut, Garai Gasang lé mhaù pyám bê nghut ri." ga taí ri.

⁵ Anani gi, dang haù lé wó gyo jáng, lêng mù, shi byuq bê nghut ri. Haù hkyô lé wó gyô é bang banshoq le, gyai yang gyuq bùm bekô nghut ri. ⁶ Haù hkún, zorâm wuì gi, toq mù, yhâng é mâng lé htup luí, ê waq myhup pyám akô. ⁷ Hau htâng, sum hkyíng kô myáng jáng, yangmyi le, wang lé lo ri. Haù su dut é hkyô lé gi, yang a sé nghut ri.

⁸ Haù hkún, Petruq gi, "Ngo lé taí kyô wú aq. Nungnhik úng é maumyí hpau gi, shí gù za nghut lhê lú?" ga myí jáng, yang gi, "Nghut lhê, haù gù za nghut bê." ga tú taí ri.

⁹ Petruq gi, "Nungnhik gi, haù Yhumsing é Woi-nyí lé isu kut chyam wú rà matú, hkásu mù chôm myít huí akô lú? Wú aq, náng é yhumsing hpó lé é myhup pyám bang gi, haù hkúmdong má jé bê; yangmoq gi, nang lé le waq htoq pyám kó rà nghut lhê." ga taí ri.

¹⁰ Radá dâm, yang le lagyo hpô é hkyí wang má lêng shi byuq bê. Zorâm wuì le wang lo wú le, myiwe haù shi to lánng é lé myàng kôluí, waq é mù, yanglang é nàm má, ê myhup pyám bekô. ¹¹ Hau é yanmai, haù hkun lhê é hpúng byù banshoq bang eq, haù su dut é hkyô lé wó gyo má wó gyô é bang gi, gyai yang gyuq bùm bekô nghut ri.

Byù Myo Myo Lé, Lagyo Pé Lhoq Gê Byí É Hkyô

¹² Ahkuí, lagyo pé gi, míngbyù wuì é hí má limik kumlhá eq mauhpo muzó myo myo lé, kut shit nyi akô. Haù lumjáng bang gi, i-myít rahkat zâ èq, Sholumon jiropp má chôm hui hui kut bum akô. ¹³ Shiwa byu pé gi, yangmoq lé hkunggá nyi bùm kôlháng, yangmoq lé a wám ê zum bùm kó. ¹⁴ Nghut kôlháng, haù Yhumsing lé lumjáng é myiwe yuqgè wuì gi, myo sheq myô jat lò kômù, yangmoq chyáng je myô jat lò bê nghut ri. ¹⁵ Haù mù luí, byu pé gi, Petruq lai lo é hkún, yhâng é wupzo za lháng rayuq yuq é ahtoq má zang sháng gaq ga, nõhpýo huí é bang lé, wá má é hkyô yàm má waq htoq ê mù, yuhphú pé eq taphkang pé má lhez tô akô. ¹⁶ Hau htoq agó, Yerusalem awuì ayàm má é wá pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haù bang lhunglháng gi, lhoq gê lhoq yô byí é huí bum akô nghut ri.

Lagyo Pé Zing-ri Huí É Hkyô

¹⁷ Hkyangjong mó eq yhâng é luzúm wuì, Saduke hpúng má é byu pé kúm gi, gyai yang wú manon bùm kôluí, toq mù, ¹⁸ lagyo pé lé chyup yú luí, wá má é htóng má lhung tô akô. ¹⁹ Nghut kôlháng, haù myín lé, Yhumsing é maumang lagyo rayuq gi, htóng hkum pé lé hpông pyám mù, yangmoq lé shuí htoq yú uchyang, ²⁰ "Nungmoq htoq lò mù, nõqkuq yhùm má é yap to luí, dui é asak hkyô sik eq sèng é danglú banshoq, shiwa byu pé lé taí kyo keq." ga taí ri.

²¹ Napsún myoqmyàng zô lé, yangmoq gi, nõqkuq yhùm má wàng mù yangmoq wó gyô yu é eq rajung za, shiwa byu pé lé, mhõqshit hi lò akô.

Haù u lé, hkyangjong mó eq yhâng é luzúm wuì gi, Israelaq byu pé é suwún wuì lhunglháng bang lé ji yù mù, Yudaq byin tú wapdoq chôm zung yù luí,

lagyô pé lé é shuí yù râ matú htóng shut byù nhang kat akô. ²² Haú bang kúm gi, htong má jé é hkûn, lagyô pé lé a myàng kôjáng, dum taù lò mù lo tai kyo kô é gi, ²³ "Htóng hkum le ging ging myhi to láng ri, htóng zúng bang le hkum yâm má yap tô akô. Nghut kôlhang, hpông wú le, ahkaù má ó le a nyi to lo nghut ri." gâ ri. ²⁴ Noqkuq yhùm zúng é zau hpó eq hkyangjong agyi wui gi, dang haù lé wó gyo kôjáng, "Shí hkyô haì dut lô râ lú?" ga, gyai gyuq maù bum akô.

²⁵ Haù hkûn, byù rayuq wang lé lô mù, "Wú keq, nungmoq eq htóng má lhung tô é bang gi, noqkuq yhùm má yap to mù byu pé lé mhoqshit nyi bum akô." ga luí, yhangmoq lé tai kyô ri. ²⁶ Haù mù luí, zau hpó haù gi, yhâng é a-ô mã é bang eq é mù, lagyô pé lé é shuí yu akô. Nghut kôlhang, shiwa byu pé luqgok eq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haù hkûn, hkyangjong mó gi, ²⁸ "Yesuq é mying lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jâm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô." ga luí, yhangmoq lé tai akô.

²⁹ Haù hkûn, Petruq eq gotú lagyô pé tú tai kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhúng é ichyi íwâ pé é Garai Gasang gi, nungmoq eq tapzìng má lhang sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyú lé, myit lhung hkyô eq mara hkyut byi hkyô hpóng byi râ matú, up é ahkáng wó Sù eq hkyi yù Sù kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woinyí le, shí pé é saksé nghut lhê." ga akô.

Gamalelaq Hpaqchyì Byì É Hkyô

³³ Yhangmoq gi, dang haù lé wó gyo kôjáng, lùm gyo nhik-yo naù kômù, lagyô pé lé sat pyâm râ lhang myit akô. ³⁴ Nghut kôlhang, mingbyù banshoq bâng é hí má aróng wó é tarâ sarâ Gamalelaq gâ é Hparishe rayuq, haù Yudaq byìn tú wapdoq má toq yap mù, lagyô pé lé razup zo lhoq htoq to nhâng luí, ³⁵ yhang tai é gi, "Israelaq byu pé é, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhanggùng yhang byù mó rayuq yuq nghut lhê ga tai jáng, byù myi shô kô yhang chyáng châng wú bekô. Yhang sat pyâm é hui luí, yhang htâng châng é lunglhang bang le byo myín byuq kômù, haì le a wó kut dut byuq akô nghut ri. ³⁷ Hau htâng, mying jihpán guq yu é buinyi má, Yudaq gâ é Galile byù rayuq pô htoq mù, mingbyù wui lé yhâng hkyam shut mhoq hpyoq yu ri. Yhang lé sat pyâm é hui mù, yhang htâng châng é lunglhang bang le, byo myín byuq bekô nghut ri. ³⁸ Ahkuí le, shí bang lé haì le hkâgon ko, yhangmoq kâm é dòng nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit dòng kut é nghut jáng, htên byoq byuq râ za nghut lhê. ³⁹ Nghut kôlhang, Garai Gasâng chyáng mã é nghut le gi, nungmoq wó lhoq hkying pyâm kó râ a nghut. Garai Gasâng é gyè sheq dut lò kó râ nghut lhê." gâ ri.

* 5:31 Garai é loqyo loq gâ é gi, hpautap hkungga ging é jowò lé tai nau é nghut lhê.

⁴⁰ Dang haù lé yhangmoq gyô htuk bum akô. Haù mù, lagyô pé lé wut yù mù luí, nhuq bat yù kômù, Yesuq é mying lé lang luí mhoqshit é hkyô a ge kut rà nghut lhê ga tai kômù, nhang pyâm akô nghut ri.

⁴¹ Lagyô pé kúm gi, Yesuq é mying é yanmai ru hpuzô é hkyô gi, gingdán nyi ri, ga myit yù kômù, Yudaq byin tú wapdoq haù mai gabú myit eq htoq ló bekô. ⁴² Hau htâng, yhangmoq gi, nyi wuì làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimô myhî pé lé, nyi wui lhê é gàm tso gàm huq é hkyô má rago a wó kut kô é yanmai, Hebre mying mu é Yudaq byu pé lé mara hùn dang tai bum akô. ² Haù hkùn, lagyo raxe í yuq gi, chángzô pé lunglhang bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amù lé za lajang nyi é nghut le gi, a htuk rà nghut lhê. ³ Haù mù luí, gumang wuì ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haù bang lé muzó shí lhum hun to rà nghut lhê. ⁴ Ngamoq kúm gi, kyúdùng é hkyô eq mungdang hkô é hkyô lé za, noqzuq tung kut nyí rà nghut lhê." ga tai akô.

⁵ Dang haù lé shiwa byù lunglhang bang gyô htuk kômù luí, lumjǐng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htung má lling wang lò bê sù Antioku wà mó má é Nikolaq pé lé hkyin yù mù, ⁶ lagyô pé chyáng shuí ló akô; lagyô pé gi, kyúdùng byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haù lumjǐng hkyô má châng nyi bum akô.

Stehpan Chyup Yù Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tûn shit ri. ⁹ Haù hkùn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhùm akô. ¹⁰ Nghut kôlhâng, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ùng kô nghut ri.

¹¹ Haù mù, yhangmoq gi, "Shí yuq, Mosheq eq Garai Gasang lé rhoi dang tai nyi é lé, ngamoq wó gyô ri." ga luí, mhaù tai nhâng rà byù haq lung tô akô.

¹² Haù mù, yhangmoq gi, mingbyú wuì eq nhik bô suwún wuì, tarà sará pé lé, chun htau mù, Stehpan lé chyup yù nhâng luí, Yudaq byin tú wapdoq má shuí nyi tô akô. ¹³ Mhaù é saksé byu pé lé le lhoq hâng kat luí, haù bang gi, "Shí yuq, shí chyoiyúng jowò* eq jep é tarà lé shut shai é dang ru tai nyi ri. ¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq eq byí tô é htungking lé htaí pyám rà nghut lhê ga luí, yhang tai é dang lé ngamoq wó gyô é nghut lhê." ga tai akô.

* 6:13 Shí chyoiyúng jowò gi, Yerusalem noqkuq yhùm lé gà lhê.

¹⁵ Haú Yudaq byìn tú wapdoq má zung to bang banshoq, yhang lé chôm wú tsuq nyí kô é hkùn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

7

Stehpan Tai É Dang

¹ Haú hkùn, hkyangjong mó gi, "Dang haú pé têng lê lú?" ga luí, yhang lé myi jáng,

² Stehpan tú tai é gi, "Gumang wui eq íwa wui ê, gyô wú keq, nga-nhúng lhunglhang bâng é íchýí Abraham gi, Haran wà má a ló nyí shí lé, Mesopotamiaq mau má nyi tô ashí hkùn, hpungwup shingkang bo é Garai Gasang gi, yhâng chyáng lé htoq shit mù, ³ Náng é ming eq náng é amyú mai htoq ló luí, ngò tún shit râ ming shut e ló aq. ✧ ga luí, yhang lé tai ri.

⁴ Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot ló nhâng bê nghut ri. ⁵ Garai Gasang gi, shí ming má yhang lé silí wunlí nghú râ, hkyí rahkô nang í é myigùng lhang a byí é nghut kôlhang, yhang, zodù lhang a wò shi mai, yhang lé le, yhâng é awut ashín pé lé le, maumyí shi byi râ ga danggidiq byí to bê nghut ri. ⁶ Hau htoq agó, shí hkyô lé Garai Gasang xoq tai é gi, Náng é awut ashín pé, tungbau ming má bíng nyi mù, haú ming bâng eq myi shô zàn jùn zô é eq zing-rí é lé hui kó râ. ⁷ Nghut kôlhang, yhangmoq lé jùn zô é amyú lé le, ngò jéyáng râ nghut lê.' gâ ri. 'Haú hkùn, yhangmoq gi, haú ming mai htoq ló mù, jowò shí má ngo lé noqkuq kó râ nghut lê.' ✧ ga le, Garai Gasang tai ri. ⁸ Hau htâng, yhang lé ahpýo-kuq hpyit byi râ hkyô eq sêng é dangshikaq le, byí ri. Haú mù, Abraham gi, Isak lé hku é htâng shit nyí buinyi má ahpýo-kuq hpyit byí ri; Isak gi, Yakup lé hkù mù, Yakup gi, íchýí íwa achyùng raxe í yuq lé hku kat bê nghut ri.

⁹ Haú íchýí íwâ pé gi, Yosep lé manôn kôluí, Egotuq ming shut jùn dông ùng kat akô. Nghut kôlhang, Garai Gasang gi, yhang eq rahá nghut nyi mù luí, ¹⁰ wuìhke jamjau banshoq mai yhang lé lhoq lhut yù mù, Egotuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egotuq ming eq, yhâng é hkohkâm-wâng banshoq lé up nhang ri.

¹¹ Haú u lé, Egotuq ming eq Hkanan ming banshoq má mutmó gyó lô mù, wuìhke jamjau mó hui bekô. Nga-nhùng é íchýí íwâ pé le zoshuq a myang hô zo lo dut byuq bekô nghut ri. ¹² Ahkuí, Yakup gi, Egotuq ming má guqzo joq é hkyô lé wó gyo jáng, nga-nhùng é íchýí íwâ pé lé sâng-hí dâm ê nhang ri. ¹³ Htang dâm dum é é hkùn, Yosep gi, yhanggu yhangmâng pé lé yhang ó nghut é hkyô tai kyô ri. Hpara-uq le Yosep é yhumbyù ikon hkyô lé sê yù byi bê nghut ri. ¹⁴ Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egotuq ming má jé gyó ló luí, yhang eq nga-nhùng é íchýí íwâ pé gi, banshoq haú ming má shí ló byuq bekô nghut ri. ¹⁶ Yhangmoq é mâng lé gi, Shehkem wà má yu taù ló mù, Shehkem wà má é Hamora é yhangzo yhangshu pé chyáng mai, Abraham eq ngùn byi mù wui hpyit tô é lupdùng má ló myhup tô akô nghut ri.

¹⁷ Abraham lé Garai Gasang byi tô é danggidiq dik râ ahkyíng jé lo nyi é u lé, ¹⁸ nga-nhông é amyú gi, Egutuq ming má Yosep lé a sé é hkohkâm pô htoq é pyat jé shoq, myoluq jebe lò bekô nghut ri. ¹⁹ Hkohkâm hpó haù gi, nga-nhông é amyú htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhông é íchyí íwâ pé lé zing-ri bê nghut lhê.

²⁰ Haù u má, Mosheq lé hkù to bê. Yhang gi, Garai Gasâng é hí má gyai yúnglhô é sù nghut ri; yhang gi, yhângwâ é yhùm má lhamó sum hkyap baù tô é hui mù, ²¹ htot tô tô é hui jáng, yhang lé Hpara-uq é byizô èq xe yù mù, zosing kut yù luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng é kùm wú râ matú wó myit htoq kat ri. ²⁴ Ê jé jáng, zing-ri hui nyi é sù rayuq lé é myâng luí, haù yuq lé búng mù, zing-ri nyi é Egutuq byù lé, loqchoq hpuq é dông sat pyám ri. ²⁵ Mosheq gi, yhâng é byu pé lé yhâng é loq dông Garai Gasang hkyí yù hkyô byi nyi é lé, yhâng é amyú pé sé gyo byi nhò ngàm kôlháng, yhangmoq a sé gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahaù nhik è, gumang yhangchang sheq ru nghut lhê nhing, haì mù rayuq eq rayuq byoq lhum nyi akò lúh?' ga taí ngón wú ri.

²⁷ Luzúm hpó lé zing-ri nyi sù yuq gi, 'Ngamoq é ahtoq má zau eq tarâ agyi kut râ matú, nàng lé ó yuq hkyin tô é lúh?' ²⁸ A-nyí nap Egutuq byù lé sat pyám é su, ngo lé le sat pyám nau ri lúh? ✧ ga luí, tú taí uchyang yhang lé dùn chyún pyám ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haù má yuqzo í yuq é wó ri.

³⁰ Haù ming má myi xê zàn lai jáng, Sinaq Bùm yàm, yoso hkaù má é myi gyúng tô é mhanpúng mai, maumang lagyo rayuq gi, Mosheq lé htoq shit ri.

³¹ Mosheq gi, haù lé myàng jáng, hau é yanmai mau luí, wú wú râ ga huí e ló le, Yhumsing é htê htoq lo é gi, ³² Ngò gi, náng íchyí íwâ pé é Garai Gasang, Abraham, Isak, Yakup é Garai Gasang nghut nyi lhê. ✧ gâ ri. Mosheq kúm gi, gyuq nán luí, a wám tu wú nghut ri.

³³ Haù Yhumsing gi, 'Náng é hkyí-tsung hkyut pyám aq, nàng yap tô é jowò gi, chyoiyúng é myigùng nghut lhê. ³⁴ Egutuq ming má ngá é amyú pé zik zo huí nyi é hkyô lé, ngò gè gè yhang myàng bê; yhangmoq é ngau nhik ngau htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taù kat râ. ✧ ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyi kut râ matú, ó yuq hkyin tô é lúh?' ga luí he-ngik pyám é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhang luí, taù nhang kat é nghut ri. ³⁶ Haù Mosheq yhang, Egutuq ming má le, Nhong Nè má le, yoso hkaù pé má le, myi xê zàn gyoro má mauhpo muzó pé eq limik kumlhá pé tún shit uchyang, yhâng é byù myú pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lò nhang râ nghut lhê. ✧ ga

luí, taí tò é sù le Mosheq yhang nghut ri. ³⁸ Yoso hkaú má nghut nyi ashí hkùn lé, shiwa byú hpúng má, Sinaq Bùm má yhang lé dang taí é maumang lagyo éq le, nga-nhúng é íchyí íwâ pé eq le rahá nghut sù gi, yhang yhang nghut nyi ri; nga-nhúng lé ap byi râ asak dui é mungdang lé lom yu é sù le, yhang nghut nyi ri.

³⁹ Nghut kôlhang, nga-nhúng é íchyí íwâ pé kúm gi, yhang é dang lé a kâm gyo kômù, yhang lé he pyám luí, Egutuq ming shut tau nau é myit bo bum akô.

⁴⁰ Haú mù, Arun lé, 'Egutuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhúng hí má so byi râ hpara lhô pé saí byi aq.* ga taí akô. ⁴¹ Haú buinyi pé má, yhangmoq gi, nojúng zo lhô saí mù, alhô haú lé hkungga nhông byi uchyang, yhangmoq é loq èq saí tò é muzò jizò má gabú nhik dik nyi akô. ⁴² Haú mù luí, myiqhtoi pé é laiká má kâ tò é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lúhú?

⁴³ Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám râ nghut lhê.^{1*}

ga luí, bo tò é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq mâ é buí, kyí, lhamó pé lé noqkuq râ matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é dông saí tò é saksé zúm lé, haú yoso má nga-nhúng é íchyí íwâ pé wó yú bekò nghut ri. ⁴⁵ Haú mù, nga-nhúng é íchyí íwâ pé gi, yhangmoq é myoq hí mai

Garai Gasang eq hkat htoq pyám byí é byú myú pé é mau má, Yoshuq eq rahá wang nyi ló kô é hkùn, saksé zúm haú lé yu wang ló akô. Haú gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasang hí má myoqdong wó sù nghut mù luí, Yakup é Garai Gasang matú nyi jowò saí râ ahkáng dung

kôlhang, ⁴⁷ Sholumon eq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq èq za saí é yhùm má nyi é a nghut, haú hkyô eq séng luí myiqhtoi wá taí tò é gi,

⁴⁹ Mauhkúng gi, ngá é zùng tangkuq, myigùng gi, ngá é hkyí nang jang nghut nyi lhê;

ngá é matú hkasù é yhùm saí byi shi kó râ lhú? Ngò nô yù râ jang gi, hkâmá nghut kó râ lhú?

⁵⁰ Haú banshoq lé ngá é loq èq baú saí tò é a nghut kó lhú? ga luí, haú Yhumsing taí ri.*

gâ ri.

⁵¹ I-myit htân mù, i-myit eq nohkyap má ahpyo-kuq a hpyit é bang* ê, nungmoq gi, nungmoq é íchyí íwâ pé su, Chyoiyúng Woi-nyí lé hkâ-nhám le lhom he-ngik pyám nyi akô; ⁵² Nungmoq é íchyí íwâ pé èq a zing-rí wú é myiqhtoi, ó yuq wá nyi lhê lhú? Haú Dingmán Sù pô htoq râ hkyô lé hko kyô é bang lé, yhangmoq sat pyám é chyat nghut akô; ahkuí, nungmoq le, haú Dingmán Sù lé ap pyám é bang eq sat pyám é bang nghut nyi akô. ⁵³ Maumang lagyo èq shit kyo byí é tarâ lé nungmoq wó yú kôlhang, haú lé a cháng kó nghut ri." gâ ri.

* 7:40 Htoq Ló 32:1 ✧ 7:43 Amo 5:25-27 ✧ 7:50 Esai 66:1-2 * 7:51 I-myit eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

Stehpan Lé Luqgok Èq Dú Sat É Hkyô

⁵⁴ Haú hkyô lé yhangmoq wó gyo kôjáng, yhangmoq é nhiklhum má lúm htaú záng kô é yanmai, Stehpan lé, zuì wang ngat kyáng shoq wú nhik-yô nyi akô. ⁵⁵ Stehpan kúm gi, Chyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, "Wú keq, mauhkúng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

⁵⁷ Haú hkún, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang lé chôm htím kômù. ⁵⁸ yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhíng pé lé hkyut bum tô akô.

⁵⁹ Luqgok èq dú nyi bùm kô é u lé, Stehpan gi, "Yhumsing Yesuq ê, ngá é woi-nyí lé hap yù laq." ga kyúdung ri. ⁶⁰ Hau htâng, yhang gi, hkyihput htuq mù, "Yhumsing ê, yhangmoq kut é mara haú lé hkyut pyám byi laq." ga luí, htê mó èq wut dúng ri; haú ban taí jáng, yhang kâng byit byuq bê nghut ri.

8

Hpúng Byù Lé Sholuq Zing-ri É Hkyô

¹ Sholuq gi, haú má nyi to mù, Stehpan lé sat pyám é muzó má myit bo huí ri.

Haú nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyô pé mai lai luí, lumjáng bang lunglhang gi, Yuda mau eq Samariq mau jowò hkangmó má byo myín ló bekô. ² Nghut kôlhang, tará hkunggâ é bang gi, Stehpan lé yhum pyám é htâng má, yhang é yanmai iyon mó huí nyi akô nghut ri. ³ Sholuq kúm gi, rayhum htâng rayhúm wàng mù, myiwe yuggè lé she hkyut htoq yú luí, htóng má lhúng tô é dông mai, noqkuq hpúng haú lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mungdang lé hkô kyô ló akô. ⁵ Haú hkún, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. ⁶ Byù ajùm ayò gi, Hpilip taí kyô é hkyô lé wó gyô é eq, yhang tún shit é limik kumlhá lé myàng kôjáng, i-myít rahkat za eq yhang é dang chôm gyô nyi bum akô. ⁷ Nat wang júng é byù myo myô pé chyáng mai, agé ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô. ⁸ Haú mù luí, haú myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklai sù nghut lhê gâ ri. ¹⁰ Byù tiq ko banshoq le, "Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yú sù nghut ri." ga luí, yhâng é dang lé gyô bum akô. ¹¹ Haú yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chôm lum bum akô. ¹² Nghut kôlhang, Hpilip hko kyô é Garai Gasâng é mingdán hkyô eq, Yesuq Hkrisduq é myíng eq sêng é gabú danglù hkyô lé, lumjáng kôjáng, myiwe yuggè wui-myhup hkâm yu bum akô. ¹³ Simun yhang yhang lé lumjáng mù

luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklai kumlhá pé lé myàng jáng, yhang gi, gyai maú byuq ri.

¹⁴ Garai Gasâng é mungdang lé Samariq byu pé, lhom hap yù bè hkyô lé, Yerusalem wà mó má nyí é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. ¹⁵ Yhangnhik gi, lé jé jáng, byù haú bang Chyoiyúng Woi-nyí wó yú rá matú kyúdung byí akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyô lô shi; Yhumsing Yesuq é myíng mai wui-myhup hkâm yu é za ru nghut bùm ashí. ¹⁷ Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn è byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yú rá matú, haú su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunhuq lé ngun eq wó wui yù rá nghut lhè ga luí, myit é yanmai, náng é ngùn gi, náng eq rahá htên byoq byuq sháng gaq. ²¹ Náng gi, Garai Gasâng é hí má myit a dúng sù nghut é yanmai, shí hkyô má náng wó bo lhom rá a nghut. ²² Haú mù luí, shí agè ashop é hkyô mai myit lhing mù, Yhumsing Garaí chyáng dúng tóngbán aq. Haú hkún, náng é unghkau má myit pyâm é hkyô lé, mara hkyut pyâm byi abe. ²³ Náng gi, ladu lai shoq nhikhko zo mù, yubak mará eq tuí zing to huí é lé, ngò myàng ri." ga yhang lé tai ri.

²⁴ Haú hkún, Simun gi, "Nungnhik tai é hkyô hai le ngá chyáng a jé sháng gaq, ngá é matú haú Yhumsing chyáng kyúdung byi kó laq." ga tù tai ri.

²⁵ Yhangnhik kúm gi, haú Yhumsing é mungdang lé saksé hkâm mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut lò é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhè." ga tai ri. ²⁷ Haú hkún, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zúm é, Ehtiopi byù u-nuk rayuq gi, noqkuq rá ga Yerusalem wà mó má è mù, ²⁸ dum taú lo é hkún, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyâng e ló aq." ga tai ri.

³⁰ Haú mù, Hpilip gi, din è mù, myiqhtoi Esai-aq laiká nghap nyi é lé wó gyo jáng, "Náng nghap nyi é hkyô lé sê gyo ri lú?" ga luí, yhang lé myí ri.

³¹ Haú yuq gi, "Mhoqshit sù yuq a nyi le, ngò hkâsu kut sê gyo rá lú?" ga tù tai mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat rá sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkún, Yhang lé a tara é đông doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo rá lúhú?"[✱] gâ ri.

³⁴ Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myightoi shí yuq gi, ó lé lhoq ang luí, taí é nghut lê lúhú? Yhânggùng lé taí é nghut lê lúhú? Haú a nghut jáng, góyuq é hkyô lé taí é nghut lê lúhú?" ga myí ri. ³⁵ Haú hkûn, Hpilip gi, Chyúmdang haú lé yù mù, Yesuq eq séng é gabú danglù lé taí kyô ri.

³⁶ Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkâm yù rá matú ngo lé hkúm rá jang hai joq ashí lúhú?" ga taí ri. ³⁷ Hpilip gi, "Náng i-myt banshoq èq, nàng lumjìng bê nghut le gi, hkâm yu le ge lê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjìng bê." ga tú taí ri. ³⁸ Haú hkûn, yhâng é myanglhêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri. ³⁹ Wui hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha rá eq sat pyám rá ga, nhikmó-yô nyi é nghut mù luí, hkyangjong mó chyáng ê mù, ² Yhumsing é Hkyô lé lumjìng é myiwe yuqgè myàng mì-myàng lé chyup yú luí, Yerusalem wà mó shut wó she ló rá matú, Damaskuq myuq mã é tarajong pé má byi rá laiká pé lé dũng chũng ri. ³ Yhang e ló le, Damaskuq myuq eq chyáng ló nyi é hkûn, yhâng é lhinghkyuq má mauhkũng mai dân loq tung duqbó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé hai mù zing-rí nyi lê lúhú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lê lúhú?" ga myi jáng, haú Yhumsing gi, "Nàng zing-rí nyi é Yesuq nghut lê, ⁶ toq aq, myuq shut wang ló aq. Nàng zui sai rá hkyô lé lhom taí kyo rá nghut lê." ga tú taí ri.

⁷ Yhang eq rahá e ló é luzúm wui gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, hai lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjít byuq mù luí, a zo a shuq é nyi byuq ri.

¹⁰ Damaskuq myuq mã Anani gâ é chángzo rayuq nyi ri. Yhumsing gi, yhang lé, "Anani ê." ga shing-rán dõng wut ri.

Yhang gi, "Yhumsing ê, shí má nyi lê." ga tú taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut é mù, Yudaq é yhũm má, Tarshu byù Sholuq lé é hõ aq, yhang gi, kyúdũng nyi ri. ¹² Yhang gi, Anani ga sũ wang lé lô mù, yhâng é myoq dum myàng sháng

✱ 8:33 Esai 53:7-8 * 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bõ.

gaq ga, yhâng é ahtoq má loq ke byí é lé, shing-rán đông myàng bê nghut ri." gâ ri.

¹³ Anani kúm gi, "Yhumsing ê, shí yuq gi, Yerusalem và mó má, náng é sân-yúng bang lé a ge é đông hkâ-myhó kut lai lo é hkyanglù lé ngò myo myo wó gyô wú bê; ¹⁴ Shí pé má le, náng é mying lé lêng é bang banshoq lé chyup râ ga, hkyangjong agyi pè chyáng mã é ahko ahkáng wó yu to sù nghut ri." ga tũ tai ri.

¹⁵ Nghut kôlhang, Yhumsing gi, "Ru ê aq, shí yuq gi, tũngbaù pé eq yhangmoq é hkohkam pé é hí má le, Israelaq byu pé é hí má le, ngá é mying lé wùn waq râ matú, ngò chũng râ nghú luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tũn shit râ nghut lhê." ga tai ri.

¹⁷ Hau htâng, Anani gi, jé ê mù, yhũm haù má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí bying sháng gaq ga, náng lé lo é hkyô má, náng lé htoq shit é Yhumsing Yesuq èq ngo lé nhang kat é nghut lhê." ga tai ri. ¹⁸ Haù hkũn jáng, Sholuq é myoq mai akyap sù é wui gyó byuq mù, yhang myoq dum wó myàng bê. Haù hkũn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pying yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mã é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasâng é Yhangzo nghut é hkyô, haù hkũn jáng tarajong pé má hko kyô nyi bê nghut ri. ²¹ Sholuq é dang lé wó gyô é lunglêng bang gi, maù byuq hũm kômũ, "Shí yuq gi, Yerusalem và mó má mying haù lêng é bang lé lhoq hten lhoq hpyoq sù nghut lhê, a nghut kó lú? Ahkuí, shí má le, haù su é bang lé chyup yù mù, hkyangjong agyi pè chyáng ló ap râ da luí jé lé é sù a nghut kó lú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé tai hpyi kyo luí, Yesuq gi, Hkrisduq yhang nghut nyi é hkyô lé saksé tũn shit ri.

²³ Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô. ²⁴ Nghut kôlhang, yhangmoq dâ é hkyô lé Sholuq sé pyám ri. Yhangmoq gi, yhang lé wó sat pyám shoq ga, nyi lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, và kyám xewâm mai lhoq nyhum hkyô kat akô nghut ri.

Sholuq, Yerusalem Và Mó Má Tau Jé Lo É Hkyô

²⁶ Hau htâng, yhang gi, Yerusalem và mó má jé lo é hkũn, chángzô pé eq zùm yap râ matú shikut wú kôlhang, yhang gi, chángzô dut bê hkyô lé a jing kô é yanmai, lunglêng bang gi, yhang lé gyuq bum akô. ²⁷ Barnaba kúm gi, Sholuq lé lagyo pè chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq èq yhang lé tai é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé tai kyô ri. ²⁸ Haù mù, Sholuq gi, yhangmoq eq rahá Yerusalem và mó má htoq htoq wàng wàng kut nyi uchyang, Yhumsing é mying mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, tai he lhum nyi akô; nghut kôlhang, yhangmoq gi, yhang lé sat pyám râ dâ akô. ³⁰ Haù hkyô lé, gumang wui sé kôjáng, yhang lé Kesare và mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkgangmó mà é noqkuq hpúng gi, haú yoq pé má, lhoq ging lhoq tǐng é hkyô wó yú mù, nguingón nyi akô; haú Yhumsing lé gyuq hkunggâ é hkyô má le, Chyoyíung Woi-nyí eq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haú hkún, Petruq gi, haú mau pé má hkat kúm wún uchyang, Ludaq wà mó má nyi é sâ-n-yúng bâng chyáng é jé ri. ³³ Haú wà má, gǔngjum shí luí shit zân tup yhupjang mai a wó toq é Ainea gâ é byù rayuq lé é myang ri. ³⁴ Haú mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, nang é yhuphú hen yù aq." ga luí, yhang lé tai ri. Haú hkún jáng, Ainea wó toq yap bê nghut ri. ³⁵ Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; myíng haú lé Grik dang dông gi, Dorka * gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byí nyi é sù nghut ri. ³⁷ Haú u lé, yhang gi, nôhpyo hui mù shí lô bê nghut ri. Yhâng mǎng lé gi, chí mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkún, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhâng bang gi, yhâng nǎm má yap mù ngaú uchyang, yhangmoq eq rahá nyi tô ashí hkún Dorka hkyup é buhíng eq gotù mebu pé lé tún shit nyi akô.

⁴⁰ Petruq kúm gi, lhunglhâng bang lé htoq ló nhâng mù, hkyihput htug luí, kyúdung mù, mǎng shut lhing wú luí, "Tabihta ê, toq aq!" ga tai ri, haú hkún myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé lǎng toq yù luí, lumjǐng bang eq chuimó myhí pé lé wut yù mù, duí gú ap byí ri. ⁴² Haú hkyô lé, Yopa myuq mà é bang banshoq wó gyô lô kômù luí, byù myo myo gi, haú Yhumsing Yesuq lé lumjǐng bum akô nghut ri. ⁴³ Haú mù, Petruq gi, shokuq loqmú sai é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mà é nghut lhê. ² Yhang gi, tará hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyúdung nyi ri. ³ Ra-nyí lé, myíntǎng sum hkyíng kô má, Garai Gasang é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsing ê, hai hkyô nghut lhê lú?" ga gyuq myit eq myí ri.

Maumang kúm gi, "Nǎng é kyúdung dang eq alu byí é hkyô gi, Garai Gasang é hí má, hkungga masat dông hkyáng bê nghut ri. ⁵ Ahkuí, Yopa myuq shut

* 9:36 Dorka gâ é lichyúm gi, "chochí" gâ é nghut lhê.

byù nhang kat mù, Petruq gâ é sù Simun lé ê shuí lò nhâng aq. ⁶ Yhang gi, wuimau yàm má é, shokuq hkyup zô é Simun yhùm má bing nyi ri." ga tai ri.

⁷ Koneli gi, yhang eq dang tai é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang má é, tará hkunggâ é gyezo rayuq lé ji yù mù, ⁸ dut lai lo é hkyô banshoq, yhangmoq lé tai kyo lui, Yopa myuq shut nhang kat ri.

Petruq É Shing-rán

⁹ Htang nyi nyi-káng u lé, yhangmoq, Yopa myuq jé ló yâm má, Petruq gi, kyùdung rá ga, yhumhkung shut doq ló ri. ¹⁰ Haú hkún, yhang gi, zòmut lui rajung jung zô nau nyi ri; nghut kôhang, zoshuq ru gai nyi ashí le, yhang moq byuq ló mù myoqwup shing-rán myang é gi, ¹¹ mauhkung bóng lô mù, hpajóng mó sù é lé, myi chyùn má zui lui myigùng shut lhoq hkyô kat é azing lé myang ri. ¹² Haú hkaú má, myigùng htoq má é hkyí myi hkyí dap é jung dusak ahú hú eq dô yé é jung ahú hú, mau má dang é ngoq ahú hú, lúng tô ri. ¹³ "Petruq é, toq mù, sat zô aq." gâ é danghtë le mying htoq lo ri.

¹⁴ Petruq kúm gi, "Yhumsing ê, haú gi, a wó dut, achaq achyut é eq a sansêng é zè lé, ngò hkâ-nhám le a zô wú." ga tú tai ri.*

¹⁵ Haú hkún, "Garai Gasang lhoq san lhoq séng bê zè lé, a sanséng hkâ-nghú." ga lui, yhang lé dum tai kat ri.

¹⁶ Haú su ga sum dâm tai é htâng má, zè haú lé radá dâm mauhkung shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé hai wá nghut lhê lúh ga lui, myit mau nyi é hkún, haú Koneli nhang kat é bang gi, Simun é yhùm lé myang hô kômù, hkumtot má yap to lui, ¹⁸ Petruq gâ é sù Simun, yhùm haú má nyi a nyi é lé, wut myi wú akô.

¹⁹ Petruq gi, shing-rán haú lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit hai a úng-âng é za, yhangmoq eq rahá bo ló aq." ga tai ri.

²¹ Haú mù, Petruq gi, haú bâng chyáng gyó ló lui, "Nungmoq hô nyi é sù gi, ngò nghut lhê, hai ra lui lé kô é lúh?" ga myi ri.

²² Yhangmoq tai é gi, "Dingmán é, Garai Gasang lé gyuq hkunggâ é, Yudaq amyú lunglhang bâng é hí má myoqdong wó é, shò up gyezau Koneli gi, nang lé yhâng é yhùm má ji hâng yù mù, nàng tai é dang gyo yù rá matú, yhang lé choyiyung maumang lagyo eq tai shit kyô é hkyô lé wó yù lui, ngamoq lé nhang kat é nghut lhê." ga akô. ²³ Haú mù lui, Petruq gi, yhangmoq lé wut hâng yù mù, bing nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq má é gumang wui ra-am le châng akô nghut ri.

Koneli Lé Petruq Huí É Hkyô

²⁴ Hau htang nyi, yhangmoq gi, Kesare wá mó shut wang ló akô. Koneli gi, yhâng é gumang wui eq buinùm ji-myi wui lé ji tsing to mù, yhangmoq lé láng nyi ri. ²⁵ Petruq wang ló jáng, Koneli gi, te yù mù, yhâng é hkyí wang má paí gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga lui, tai uchyang yhang lé tu toq ri.

²⁷ Haú mù, Petruq gi, yhang eq dang nyô uchyang wang ló wú le, byù myo myo zup zing tô bum é lé myang ri. ²⁸ Haú hkún, yhang gi, yhangmoq lé,

* 10:14 Nhung 11 lé wú aq.

"Yudaq byù rayuq gi, noqkuq htông dông tângbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôhlang, ó yuq lé le achag achyut dut ri, a sanséng dut ri nghù a ge taí é hkyô lé gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkûn, ngo a he pyám é za châng lé lo é nghut lhê. Haù mù luí, haí ra kô é yanmai, ngo lé ji akô nghù ngo myí nau ri." ga taí ri.

³⁰ Haù hkûn, Koneli gi, "Lai lò bê myi nyí, myinhâng sum hkyíng má, ngá é yhùm má, ngo kyûdung nyi le, danso loq, duqbô é mebu wut é byù rayuq ngá é hí má yap htoq shit mù, ³¹ 'Koneli ê, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gá é Simun lé ji nhâng aq. Haù yuq gi, wuimau yàm má é shokuq hkyup zô é Simun yhùm má bíng nyi ri.' ga taí ri. ³³ Haù mù luí, haù hkûn jáng ngo náng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsing yhang nang lé tai nhang é gû banshoq gyô yù râ matú, ahkuí ngamoq lhunglhang bang Garai Gasang é hí má nghut nyi lhê." ga taí ri.

Petruq Hko Kyô É Mungdang

³⁴ Haù hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngo gè gè yhang sé bê. ³⁵ Byù myú chângjup má, Yhang lé gyuq hkungá é eq tengmán é muzó jizó saí é sù gi, Yhang é hí má myoqdong wó nyi ri. ³⁶ Nyi mi-nyí, joq mijoq é Yhumsing, Yesuq Hkrisduq é yanmai, nguóngon hkyô eq séng é gabú danglù lé hko kyo shàng gaq ga, Israelaq byu pè chyáng Garai Gasang hun kat é mungdang eq rajung za, ³⁷ baprisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. ³⁸ Haù gi, Garai Gasang eq Chyoiyúng Woi-nyí eq wum-o a-tsam byí to bê sù, Nazaret và byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

³⁹ Haù mù, Yudaq byu pè é ming má le, Yerusalem và mó má le, yhang zui saí bê muzó banshoq é saksé pé gi, ngamoq nghut nyi lhê. Haù yuq lé yhang, yhangmoq sik zîng má jén sat pyám bekô nghut ri. ⁴⁰ Garai Gasang kúm gi, sum nyí nghù râ buinyi má, haù yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shí bê bâng é tará agyi kut râ matú, Garai Gasang eq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ 'Yhang lé lumjîng é bang yuq hkangmó gi, Yhâng é mying é yanmai, yubak hkyut pyám byí é huí kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Tângbaù Pé Wó Hap Yu É Hkyô

⁴⁴ Petruq gi, haù hkyô lé ru taí nyi ashí le, dang haù wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Tângbaù pè é htoq má lhang Chyoiyúng Woi-nyí gá é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maù bum akô.

⁴⁶ Hkâsu mù gâ le, yhangmoq gi, laklai dang nyo é lé le, Garai Gasang lé hkyan kô é lé le, wó gyô bùm kô é yanmai nghut ri.

⁴⁷ Haù mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkùm to râ lúh?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù râ matú pying tô ri. Haù hkùn, yhangmoq gi, Petruq lé buinyí ra-í nyí, nyí gyó shi aq ga chôm hkùm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô. ² Haù mù, Petruq, Yerusalem wà mó má doq lô é hkùn, ahpyo-kuq hpyit hkyô lé myit zuq é lumjing bang gi, ³ "Nàng gi, ahpyo-kuq a hpyit é bâng é yhùm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

⁴ Haù hkùn, Petruq gi, haù dut lò bê hkyô lé awang mai ahpyo hpyot, yhangmoq lé taí sân kyô hi kat é má, ⁵ "Ngò gi, Yopa myuq má kyúdung nyi le, moq byuq lô mù shing-rán myang é gi, mauhkúng mai hpajóng mó sù é myi chyún shut zui luí, ngá shut lhoq hkyô kat é zè gyó jé lo é lé, myang ri. ⁶ Haù lé rago za saí wú le, myigùng htoq má hkyí myi hkyí dap é jung dusak, yosó zè, dô yè é jung eq, maulat nghoqzô pé bo tô é lé, ngò myàng luí, myit wú nyi é hkùn, ⁷ 'Petruq ê, toq mù, sat zo aq.' gâ é danghtë lé, ngò wó gyô ri.

⁸ Ngò kúm gi, 'Yhumsing ê, haù gi, a wó dut, achag achyut é eq a sansêng é zè, ngá é nhut má hkâ-nhâm le a wang wú.' nghù taí kat é nghut lhê.

⁹ Haù hkùn, 'Garai Gasang lhoq san lhoq yúng bê zè lé, a sansêng hkâ-nghù.' ga luí, mauhkúng mai dum taí kat ri. ¹⁰ Haù su ga sum dâm taí é htâng má, haù pé banshoq lé mauhkúng shut dum wup yu lò bê nghut ri.

¹¹ Haù hkùn jâng, Kesare wà mó mai, ngá chyáng nhang kat é byù sum yuq gi, ngò nyi é yhùm hkumtot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng é aq ga taí ri; shí gumang hkyuq yuq le ngò eq rahá é mù, Koneli é yhùm má ngamoq wang é. ¹³ Haù hkùn, haù yuq gi, yhâng é yhùm má maumang lagyo lé htoq shit é hkùn, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gâ é sù Simun lé é jí nhâng aq; ¹⁴ nàng eq náng yhumbyù lunglhang bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haù hkùn sheq, ngò gi, 'Yohan gi, wui èq wui-myhup hkâm byí ri; nungmoq kúm gi, Chyoiyúng Woi-nyí èq wui-myhup hkâm byí é hui kó râ nghut lhê.' ga luí, Yhumsing taí é dang lé bún kat ri. ¹⁷ Haù mù luí, Yhumsing Yesuq Hkrisduq lé lumjing é hkùn, ngamoq lé Garai Gasâng jeju chyunguq byí é su, Yhang, yhangmoq lé le byí é nghut le gi, ngò gi, hkasù é byù nghut luí, Garai Gasang lé wó lhom hkùm pyám râ lúh?" ga taí ri.

¹⁸ Yhangmoq gi, haù hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tungbaù pé lé le, asak dui râ matú myit lhing hkyô byi bu-nhung!" ga luí, Garai Gasang lé chôm hkyâ-ôn akô nghut ri.

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zínlong eq Antioku và mó jé shoq byo ló kômù, Yudaq byu pé lé baú za, mungdang haú hko kyô akô nghut ri. ²⁰ Nghut kôlhàng, yhangmoq mâ é Kupru byù eq Kuruni byù ra-am gi, Antioku và mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akô. ²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjìng mù, Yhumsing chyáng lhing wang lo bùm bekô nghut ri.

²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku và mó jé shoq nhang kat akô. ²³ Yhang jé é hkùn, Garai Gasàng jeju bo nyi é lé myàng jáng, yhang gi, gabú luí, yhangmoq é myit nhikhum banshoq eq haú Yhumsing má lhumzui nyi rá matú, lhunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjìng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé é hò rà ga Tarshu myuq shut é mù, yhang lé myàng jáng, Antioku và mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku và mó má sâng-hi wó yù bekô nghut ri.

²⁷ Haú u lé, myiqhtoí pé ra-am gi, Yerusalem và mó mai, Antioku và mó má lé jé bum akô. ²⁸ Haú bang mà é Agabu gâ é sù gi, toq yap mù, Romaq mingkan tìng má mutmó gyó lô rà nghut é hkyô lé, Woi-nyí eq tũn shit é dõng taí kyô ri; (Haú gi, hkohkâm Klodi é pyat má dut bê nghut lhê.) ²⁹ Haú mù luí, chángzô pé gi, Yuda mau mà é gumang wui lé, ó le ó wó dut é myhó garum kat rà ga, myit hpyit yu bum akô. ³⁰ Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byù ra-am lé chyup yù mù, zing-ri rà ga ngantsâ nyi ri. ² Haú mù, Yohan é yhangmang Yakuq lé sham eq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poi u lé nghut ri. ⁴ Herut gi, Lhoqlhai Poi lai jáng sheq, mingbyù wui hí má jéyáng rà ga myit tô é yanmai, yhang lé chyup yu é htâng má, htóng má lhùng to mù, yhang lé zúng rà matú, gyè myi yuq yuq kut myi hpúng lé ap tô ri.

⁵ Haú mù, Petruq gi, htóng má lũng tô ri; hpúng byù wui kúm gi, yhang é matú Garai Gasàng chyáng kyû gyai chòm dung byí nyi akô nghut ri.

⁶ Petruq gi, Herut eq yhang lé jéyáng rà matú she htoq yù rà hì myìn lé, shamtoq-tui í hkat eq tui é hui luí, gyezo í yuq é gyoro má yhup myhí tô ri; zúng é bang le htóng hkum má zúng nyi bum akô. ⁷ Haú hkùn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má é hpuk kat mù, "Myap toq wú aq." ga nhaú ri; haú hkùn, Petruq é loq mà é toqjàng tui pé le gyut gyó ló bê nghut ri.

⁸Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. ⁹Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri.

¹¹Ahkuî, Petruq gi, dum bûn gyíng lò jáng, "Yhumsíng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

¹²Haú hkyô lé myit sê kat jáng, yhang gi, byù myo myo zing mù, kyúdüng nyi é jowò, Markuq gâ é Yohan é yhângnu Mariq é yhùm má jé ló ri. ¹³Haú mù, yhang gi, yhùm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴Yhang gi, Petruq é hté nghut é lé sê gyô kat jáng, lûm gabú luí hkum a hpóng byi shí é za, yhùmhkaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

¹⁵Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut àng ri." ga taí akô.

¹⁶Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuy eq gumang wui lé taí kyô kat keq." ga taí ri. Hau htâng, yhang htoq ló luí, jowò gó shut e ló bê nghut ri.

¹⁸Ahkuî, maubó jáng, gyezò pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám râ matú hkunmó hkyô ri.

Herut Hkohlâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰Haú gyoro má, Herut hkohlâm gi, Turuq eq Sidun byu pé lé gyai nhikyô nyi ri. Haú mù luí, yhangmoq gi, myit rahkat zâ èq yhâng chyáng ê mù, Blastu gâ é, hkohlâm wa lum tô é suwún hpó lé ê lûm hkaú mù, simsaq hkyô ê dùng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaú nyi kô é yanmai nghut ri.

²¹Haú hkûn, ding lhùm tô é buinyi má, Herut gi, hkohlâm hking wut chùng mù, hkohlâm tanghkuq má zùng luí, yhangmoq lé hkohlâm mungdang byi ri. ²²Haú jáng, mingbyuq wui gi, "Hté shí gi, waxâng byu é hté a nghut, garai wá é hté sheq nghut ri." ga garú bum akô. ²³Radá dâm, Herut gi, Garai Gasâng é hpungwup shinggang lé a tê byi é yanmai, Yhumsing é maumang lagyo gi, yhang lé dâm byi luí, yhang gi, luq eq hké é hui mù, shí byuq bê nghut ri.

²⁴Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí tùm nyi é muzó ban saí jáng, Markuq gà é Yohan lé shuí chùng mù, Antioku wà mó shut taú ló bekô nghut ri.

13

Barnaba Eq Sholuq, Hkyin Nhang Kat Huí É Hkyô

¹ Ahkuí, Antioku wà mó má é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger* gà é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luí Yhumsing lé noqkuq dojaú nyi é hkùn, Chyoiyúng Woi-nyi gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haú mù luí, yhangmoq gi, zoshuq gám luí kyúdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyi éq nhang kat é eq rajung za, Seluki wà shut gyó ló mù, haú má é lhai ji luí, Kupru zinlóng má jé ló luí, ⁵ Salami wà mó má nyi nyi é hkùn, Yudaq byu pé é tarajong pé má, Garai Gasâng é mungdang hko kyô akô. Markuq gà é Yohan le yhangnhik lé htuqluq htuqbang kut nyi ri.

⁶ Yhangmoq gi, haú zinlóng mai lai byit e ló mù Pahpu wà mó jé ló kô é hkùn, myiqhtoí pyoq nghut sù Bara-Yesuq gà é Yudaq byù myoqheq sará rayuq eq htùng hui akô. ⁷ Haú yuq gi, Sergi Poluq gà é, myit hpaqchyí kúng é ginwáng zau hpó é byù rayuq nghut lhê. Minggyi hpó haú gi, Garai Gasâng é mungdang gyô yù nau mù, Barnaba eq Sholuq nhik lé ji yu ri. ⁸ Haú hkùn, myoqheq sará gà é lichyúm dông myhîng é Eluma le gà é Bara-Yesuq kúm gi, ginwáng zau hpó lé haú lumjîng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹ Haú hkùn, Poluq le gà é Sholuq gi, Chyoiyúng Woi-nyi byíng mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gyê hpó ê, Yhumsing é tengmán hkyô lé a lhoq hpyoq é a wó nyi lúhú? ¹¹ Ahkuí, wú aq, Yhumsing é loq gi, náng chyáng jé mù, náng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkùn jáng, yhâng é myoq gi, myhî-myhâ ga luí mauchut tuq dut lò byuq ri; haú mù, yhang lé shê râ byù ho sop lhîng wún ri. ¹² Haú hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wui gi, Pahpu wà mó mai lhai ji mù, Pamhpuli mau má é Perga wà má jé ló akô. Markuq gà é Yohan kúm gi, yhangmoq eq gang luí, Yerusalem wà mó shut taú lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng má é Antioku wà mó má jé ló akô. Bánno buinyi má, yhangmoq gi, tarajong má wang zung tô akô. ¹⁵ Haú hkùn, Mosheq é tará laiká eq myiqhtoí laiká pé lé ban nghap jáng, tarajong má up bang gi, "Gumang wui é, mingbyû wui lé myit wum byi dang

* 13:1 Grik dong Niger gà é gi, byù noq gà é nghut lhê.

joq kô é nghut le gi, ahkuí taí lo keq." ga luí, yhangmoq chyáng taí nhang kat ri.

¹⁶ Haú hkûn, Poluq gi, toq yap mù, zím byuq kó sháng gaq ga loq tú luí, "Israelaq byu pé eq Garai Gasang lé gyuq hkunggâ é byu pé ê, chômg yô yù keq. ¹⁷ Israelaq byu pé é Garai Gasang gi, ngamoq é íchyí iké pé lé hkyin yù bê nghut mù luí, Egutuq ming má byúbíng dut nyi to ashí hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming má é byuhú nyhit hú lé lhoq htên pyám luí, haú bâng é mingdán má é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyí pé lé to byí ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyú má é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut rà nghut lhê.' gá ri.

²³ Garai Gasang gi, Yhâng é danggidid joq é eq rajung za, Israelaq byu pé é matú, haú yuq é awut ashín mai, hkyi yù Sù Yesuq lé, pò htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhíng hkyô eq séng é bapstima hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngò lé ó nghut é su ngâm tô akò lúh? Ngò gi, haú yuq a nghut, wú keq, ngá é htâng má rayuq jé rà nghut lhê, haú yuq é hkyí-tsung tui hpyí rà lhang ngò a gíng.' ga taí ri.

²⁶ Abraham é yhangzo yhangshù pé eq Garai Gasang lé gyuq hkunggâ é tungbaù, gumang wù è, shí hkyi yù hkyô mungdang lé, nga-nhúng chyáng byi kat bê nghut ri. ²⁷ Yerusalem wà mó má é bang eq, yhangmoq é zau suwún wú gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sê gyo kô é yanmai, Yesuq lé sat rà doqdán é hkûn, myiqhtoi pé é dang lé lhoq dik pyám bekò nghut ri. ²⁸ Yhâng chyáng shí gíng é mara a myàng kôlháng, Yhang lé sat pyám nhâng rà matú, Pilat chyáng dúng akò. ²⁹ Yhangmoq gi, yhang eq séng luí, kâ to má kâ to ban lhoq dik kôjáng, Yhang lé tapzìng mai yu hkyó mù, lup má kat tô akò nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhúng Israelaq byu pé é hí má, Yhâng é saksé dut bekò nghut ri.

³² Haú mù, í dam lhê é Hkya-on Kungtôn Laiká má, 'Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê.'* ga luí, kâ tô é eq rajung za, ³³ Garai Gasang gi, íchyí iwá pé lé byi tô é danggidid lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yù rà hkyô eq séng luí, Garai Gasang taí é gi, 'Dawiq lé byí tô é danggidid eq rajung za, chyoiyúng é eq lungíng é jeju lé, ngò nungmoq lé byi rà nghut lhê.'*

* 13:32 Hkya-on 2:7 * 13:34 Esai 55:3

gâ ri. ³⁵ Hkya-on Kungtôn Laiká gó wô má le, 'Náng é Chyoiyúng Sù lé, Nàng htên byoq nhâng naù râ a nghut.'^{*} ga tái tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é đông ban wùn waq jáng, shi byuq luí, íchyí íwâ pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq hui é a nghut.

³⁸ Háu nghut é yanmai, gumang wui ê, háu yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sé nyi keq. ³⁹ Háu htoq agó, Mosheq é tarâ êq mara hkyut san byí é a hui kôlhang, háu yuq lé lumjíng é bang gi, hkyô lhumjup má mara hkyut san byí é hui râ nghut lhê. ⁴⁰ Háu é yanmai,

'Wú keq, jihpoi é bang ê, maú mù luí htum byuq keq; nungmoq é buinyi pé má ngò rajung jung kut htoq râ nghut lhê;

⁴¹ háu hkyô lé, rayuq yuq, nungmoq lé hkaí kyo kôlhang, jíng kó râ a nghut.'^{*} ga luí, myiqhtoí pé tái é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, háu pé lé dum hkaí kyo râ matú yhangmoq chôm dúng akô. ⁴³ Chôm byo htoq ló kô é hkùn, Yudaq byu pé eq Yudaq noqkuq htung má lhing wang lo é tarâ hkunggá é byù myo gi, yhangnhik é htâng má châng bùm kô é nghut mù luí, Garai Gasâng jeju má gíng nyi râ matú, yhangnhik gi, yhangmoq lé lhoq pun lhoq kyíng akô nghut ri.

Tungbaù Pé Chyáng Lhing Lo É Hkyô

⁴⁴ Háu htang lhê é Bánno buinyi má, Garai Gasâng é mungdang gyô yù râ matú, rawa bang aluq shoí banshoq, lé zup zing to bum akô. ⁴⁵ Yudaq byu pé kúm gi, byù moq mó háu lé myàng jáng, manon myit baú byíng bùm kômù luí, Poluq tái é dang lé tái htíng é eq nhíng pyám akô.

⁴⁶ Poluq eq Barnaba le gyuq myit a bo é đông tái é gi, "Garai Gasâng é mungdang lé, nungmoq lé hí tái kyo râ dut é yanmai, ngá-nhik tái bê nghut lhê. Nghut kôlhang, nungmoq gi, háu lé lhom he-ngik pyám kômù, ahtum abyuq é asak eq gíngdán é đông yhumsing gíng lé a myit yù kô é yanmai, wú keq, ahkuí, ngá-nhik gi, tungbaù pé shut lhing ló berâ nghut lhê. ⁴⁷ Hkâsu mù gâ le, háu Yhumsing gi,

'Hkyi yù hkyô lé maumyí htum shoq wó chùng jé râ matú, Ngò, nàng lé tungbaù pé é maubó dut nhâng bê.'^{*} ga luí, ngamoq lé hkunmó hkyó kat bê." gâ ri.

⁴⁸ Tungbaù pé gi, dang háu lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to hui é lhunglhang bang le, lumjíng bum akô nghut ri.

⁴⁹ Yhumsing é mungdang gi, háu ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wui má é tarâ hkungga bang eq, háu wà má é suwún wui lé, nhik lhoq yo kôluí, yhangnhik lé maukyo mai chôm hkat htoq pyám akô. ⁵¹ Yhangnhik gi, yhangmoq lé a nau é hkyô tún shit é đông, yhumsing é hkyí má é hpuilhaù lé yhangmoq chyáng ko hkyô pyám to kômù, Ikoni wà mó shut ló byuq bekô

nghut ri. ⁵² Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹ Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byu eq tûngbaù pé ajùm ayò lumjìng bùm kó shoq, wum kat hko kyô akô. ² Nghut kôlhang, a lumjìng é Yudaq byu pé gi, lumjìng é gumang wuì lé a ngui rà đông tûngbaù pé lé mhoq hpyoq yú mù, shuí gumlaù akô. ³ Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é đông, Yhâng é jeju mungdang lé saksé hkâm byí nyi ri. ⁴ Haù wà mã é bang kúm gi, myit byo ló bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akô. ⁵ Ahkuí, tûngbaù pé le, Yudaq byu eq yhangmoq é uphkâng bang le, yhangnhik lé rhoí mù luggok èq dú sat rà ga htím lo bum akô. ⁶ Nghut kôlhang, yhangnhik gi, haù hkyô lé bûn sê kat kôjáng, Lukaoni ginwáng mã é Lustra eq Derbe wà mó eq, hau é awui ayàm wà tiq wà zo pé shut hpang e ló akô. ⁷ Haù pé mã le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

⁸ Ahkuí, Lustra wà mó má, ìnu unghkaù mai hkyí hten mù luí, hkâ-nhám le hkyô a wó sô wú é sũ rayuq zung tô ri. ⁹ Yhang le Poluq tai é dang lé gyô nyi ri. Poluq gi, haù yuq lé wú tsuq kat é hkûn, wó lhoq gé byi hui rà nghut lhê gà é lumjìng myit yhâng chyáng bo tô é lé, myàng byí ri. ¹⁰ Haù mù, Poluq gi, "Toq yap aq!" ga luí, htê mò èq yhang lé tai kat jáng, yhang gi, byam toq kat mù, wó so bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luí ngamoq chyáng gyó lô bekô nghut ri." ga luí, wut garu bum akô. ¹² Hau htâng, Poluq gi, dang myô tai sú nghut é yanmai, yhang lé Herme ga, Barnaba lé gi, Zeu ga myhíng byí akô. ¹³ Haù wà yàm mã é Zeu hparà noqkuq yhùm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rà hen akô.

¹⁴ Nghut kôlhang, lagyo nhik Barnaba eq Poluq gi, haù lé wó gyo kôjáng, yhumsing é mebu láng cheq pyám kôluí, shiwa hpông gung gùng shut òn wang ê kômù, garú tai kô é gi, ¹⁵ "Hkaù pé ê, haí mù haù su kut lo akô lúh? Nga-nhik le nungmoq eq rajung za, xângzo byù za nghut lhê, akýù a bo é hkyô shí pé lé tô pyàm tò mù, mauhkùng eq myigùng, wuìshuq lung-aù eq haù pé mã nyi mi-nyì, joq mijoq lé hpan to sũ, rú òn nyi é Garai Gasâng chyáng lhing wang lò kó sháng gaq nghù luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myù chângiup lé hí hpyang lhê é pyat bán mã ó le ó kâm é đông kut nhâng bê nghut ri. ¹⁷ Nghut kôlhang, Yhang gi, mauhkùng mai mau wò nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byí é eq, nungmoq lé i-myt ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri." ga akô. ¹⁸ Haù su ga tai kô le lhang, yhangnhik lé shiwa byu pé mai hkungga nhông byi rà hkyô lé, yhangnhik gi, gyai wuihke luí sheq wó hkùm pyám akô nghut ri.

¹⁹ Hau htâng, Antioku wà mó eq Ikoni wà mó pé má é Yudaq byu pé ra-am lé jé kômù, shiwa byu pé lé shuú-u luí, Poluq lé luqgok eq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô. ²⁰ Nghut kôlhang, Poluq gi, yhâng é lhinghkyuq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Tau Jé Ló É Hkyô

²¹ Haú wà má yhangnhik eq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum tau ló kômù, ²² chángzô pé lé myit hoq ging byi uchyang, haú lumjng hkyô má ru gng nyi rá matú myit wum byí akô. "Nganhung gi, Garai Gasang é mingdán má wàng rá matú, wuìhke jamjau myo myo hui ra rá nghut lhê." ga le, mhoqshit akô. ²³ Yhangnhik gi, noqkuq hpúng hkgangmó má, hpúng suwún kut rá bang lé hkyin yù mù, zoshuq gám luí kyúdung mù, yhangmoq lumjng nyi é Yhumsing Garai chyáng ap byi tô akô. ²⁴ Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akô nghut ri. ²⁵ Haú ginwáng má é Perga wà mó má mungdang hko kyo luí, Atali wà mó shut lai gyó ló akô nghut ri.

²⁶ Haú mai, lhai ji mù, ahkuí yhangnhik wùn waq lai ló bê muzó é matú, Garai Gasang jeju má ap luí yhangnhik lé nhang kat é Antioku wà mó má dum jé ló bekô nghut ri. ²⁷ Jé lo é hkûn, yhangnhik gi, hpúng byú wui lé wut tsing yù mù, yhangnhik dông mai Garai Gasang kut é hkyô banshoq lé le, tungbaù pé lé haú lumjng hkyô hkum hpóng byí é hkyô lé le, shit kyô akô. ²⁸ Haú mù, yhangnhik gi, haú wà má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau má é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htungtarâ eq rajung za, ahpyo-kuq a hpyit é nghut jáng, hkyi yu é hui rá a nghut." ga luí, mhoqshit bum akô. ² Hau é yanmai, myit a hui lhâm é hkyô htoq lô mù, Poluq eq Barnaba nhik gi, haú bang eq gyai yhang mying myó lhâm akô; haú mù luí, gumang wui gi, Yerusalem wà mó má nyi é lagyo pé eq suwún wui chyáng, haú hkyô lé ló hpyê lhum rá matú, Poluq, Barnaba nhik eq rahá, yhangmoq chyáng má é ra-am lé, nhang kat rá ga hkyin tô akô. ³ Haú mù, hpúng byú wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô lai ló uchyang, tungbaù pé lhing wang lò bê hkyô lé tai kyô akô. Haú má é gumang wui lé gyai yhang gabú nhang akô nghut ri. ⁴ Yhangmoq, Yerusalem wà mó má jé kô é hkûn, hpúng byú wui, lagyo pé eq suwún wui gi, yhangmoq lé lhom hkúlum yù kô é nghut mù luí, yhangmoq gi, yhangmoq dông mai Garai Gasang kut é hkyô lunglhang lé, haú bang lé shit kyô akô.

⁵ Haú hkûn, Hparishe hpúng má é lumjng bang ra-am gi, toq mù luí, "Tungbaù pé lé, ahpyo-kuq hpyit nhâng rá eq, Mosheq é tarâ dông cháng nhâng rá gi, ra yhang rá lhê." ga tai bum akô nghut ri.

Yerusalem Wà Mó Má Kut É Byin Tú Wap Hpong

⁶ Ahkuí, lagyo pé eq hpúng suwún wuí gi, shí hkyô lé chôm myit wú rã ga, zup tô bum akô. ⁷ Shí hkyô lé gyai yang dang rhâng lhùm bùm kô é htâng má, Petruq gi, toq mù luí, "Gumang wuí ê, Garai Gasang gi, ngá nhut mai tai é, haú gabú danglù lé, tũngbaù pé gyô yù mù lumjĩng kó sháng gaq ga, hí hkũn nungmoq chyáng mai ngo lé hkyin yù bê hkyô lé, nungmoq sé lugù nghut bê. ⁸ Haú mù, myit nhiklhùm lé sé byi sũ Garai Gasang gi, nga-nhúng lé byi é eq rajung za, yangmoq lé le Chyoiyũng Woi-nyí byi é dõng, yangmoq lé hap yù bê hkyô lé saksé tũn shit bê nghut ri. ⁹ Garai Gasang gi, yangmoq lumjĩng luí, yangmoq é myit nhiklhùm lé lhoq san lhoq yũng byi bê nghut é yanmai, nga-nhúng eq yangmoq é gyoro má gamhkuí é hkyô a joq nhâng lo nghut ri. ¹⁰ Haú nghut le gi, íchyí íwã pê èq le, nga-nhúng èq le a ung é wòlai lé, haú chángzô pê é lingzing má ke byi é dõng mai, haí mù, ahkuí Garai Gasang lé chyam wú nyi akô lhú? ¹¹ Nghut kólhang, ngamoq gi, yangmoq eq rajung za, Yhumsĩng Yesuq é jeju mai za hkyi yu é huí é hkyô lé lumjĩng é bang nghut lhê." ga luí, yangmoq lé tai ri.

¹² Haú hkũn, zup míng tô é bang lhunglháng gi, zim za kut luí, Barnaba eq Poluq nhik mai, tũngbaù pê chyáng, Garai Gasang èq yangnhik é loq dõng limik kumhá pé eq mauhpo muzó pé kut shit é hkyô, tai kyô nyi é lé chôm gyô nyi akô. ¹³ Yangnhik dang ban tai kójáng, Yakuq gi, "Gumang wuí ê, ngá dang lé gyô wú keq. ¹⁴ Garai Gasang gi, tũngbaù pê chyáng mai Yhâng myĩng é matú byù ra-myú hkyin yù rã ga, yangmoq lé sâng-hi mai hkãsu kut lé kũm nyi é hkyô lé, Simun tai kyo bê nghut ri. ¹⁵⁻¹⁶ Shí hkyô gi,

'Hau é htâng má gi, ngò dum taù lò mù luí, lêng gyop byuq bê Dawiq é yhũm* lé dum sai rã nghut lhê.

Haú byoq htên tô é pé lé sai sai mù, haú lé dum lhoq toq rã nghut lhê.

¹⁷ Haú hkũn sheq, ngá myĩng mai ji yu é tũngbaù pé eq, myit gyo tô é byù lhunglhâng bang gi, Yhumsĩng Garai lé hô kó rã nghut lhê ga,

¹⁸ a-nham mau htoq xang hkun mai, shí hkyô pé lé sé nhang é Yhumsĩng Garai tai ri. ✧

ga myiqhtoí pé kã tô é dang eq rajung za nghut ri.

¹⁹ Haú mù luí, ngò tai nau é gi, tũngbaù pê chyáng mai Garai Gasang shut lhing lo é bang lé, gotú haí le a lhoq wuí é za, ²⁰ hparà lhò pé lé kyáng byi é a sansêng é zoshuq pé lé le, ashop é dõng gungsho zũm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rã matú za, yangmoq lé, nga-nhúng laiká mai wó shit kat lhê. ²¹ Hkãsu mù gã le, gó hkũn mai yang, Mosheq é tarã lé wã hkangmó má hko kyô ló kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga tai ri.

Lumjĩng É Tũngbaù Pê Chyáng Hun Kat É Laiká

²² Haú hkũn, lagyo pé, suwún wuí eq, hpúng byù wuí lhunglhâng bang gi, Poluq, Barnaba nhik eq rahá Antioku wã mó shut nhang kat rã byù lé, yangmoq chyáng mai hkyin yù rã matú chôm myit hpyit akô. Haú eq rajung za, yangmoq gi, gumang wuí chyáng mã é nhik bô suwún nhik Barsabaq gã é Yudaq eq Sila lé hkyin yu akô nghut ri. ²³ Yangnhik é loq má, hun kat kô é laiká gi,

* **15:15-16** Dawiq é yhũm gã é gi, Dawiq eq yhang é awut ashìn pé up é hkyô lé gã é nghut lhê.

✧ **15:18** Amo 9:11-12

"Antioku và mó, Suriq mau eq Kiliki mau pé má nyi é, tûngbaù gumang wuì é, nungmoq é gumang wuì nghut é, ngamoq lagyo pé eq suwún wuì gi, nungón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng eq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê. ²⁵ Haù mù, ngamoq lunglhang bang gi, byù ra-am lé hkyin yù mù, ²⁶ nga-nhúng é Yhumsing Yesuq Hkrisduq é matú, yhumsing asak lé lhang a hà é nga-nhúng chyitdap é Barnaba, Poluq nhik eq rahá, nungmoq chyáng nhang kat rà matú chòm myit hui bê. ²⁷ Haù mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang tai kyo kó rà nghut lhê. ²⁸ Nungmoq é matú gi, hparà hó pé lé tîng byí é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám rà hkyô mai lai luí, gotú wòwùn hùn rà hkyô a joq nghu luí, Chyoiyung Woi-nyí le, ngamoq le, myit huí to bê. ²⁹ Nungmoq haù pé lé koi pyám nyi kôjáng gi, gè rà nghut lhê.

Nungón wángzán nyi kó sháng gaq ô!" ga kâ tô ri.

³⁰ Yhangmoq lé nhang kat kôjáng, yhangmoq gi, Antioku và mó má gyó jé lô kômù, hpúng byù wuì lé ji tsing to kôluí, haù hùn kat é laiká lé ap byí akò nghut ri. ³¹ Hpúng byù wuì gi, laiká haù lé ban nghap kôjáng, wum-o byí é danglù hau é yanmai, gabú nyi bum akò. ³² Yudaq eq Sila gi, myiqhtoí nhik le nghut kômù luí, gumang wuì lé mungdang myo myô eq lhoq pun lhoq kying kômù, wum-o lhoq gîng to byí akò. ³³ Rayoq zo haù má nyi nyi kô é htâng má, gumang wuì gi, yhangmoq lé nhang kat é bâng chyáng, ngui ngui ngón ngón dum tau ló nhâng bekò nghut ri. ³⁴ (Sila kúm gi, yhang ô nau é dông nyi gyó tô ri.)† ³⁵ Poluq eq Barnaba kúm gi, Antioku và mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akò nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, và hkyap hkangmó má é gumang wuì chyáng taù lò luí, yhangmoq hkâsu dut nyi é hkyô lé, ló dum kúm wú lo goq." ga tai ri. ³⁷ Barnaba gi, Markuq gâ é Yohan lé le shuí chûng nau ri. ³⁸ Nghut kôlhang, Poluq gi, haù yuq lé a kâm shuí chûng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang tai shai lhum kômù, rayuq eq rayuq gâng lhum bekò nghut ri. Barnaba gi, Markuq lé shuí chûng luí, lhai ji mù Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wuì eq yhang lé Yhumsing Garaí é jeju má ap kat kô é htâng má, yhangnhik gi, htoq e ló byuq bekò. ⁴¹ Haù mù, Poluq gi, Suriq mau eq Kiliki mau mai sô lai ló uchyang, haù má é noqkuq hpúng pé lé wum-o lhoq gîng byí wún bê nghut ri.

16

Poluq Eq Sila Nhik Chyáng Timohti Châng É Hkyô

† 15:34 Bun zo shí lhum gi, Grik Chyúmlaiká myo myo má a bò nghut lhê.

¹ Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjíng é Yudaq myiwe myhí nghut ri; yhâng wa kúm gi, Grik amyú nghut ri. ² Timohti gi, Lustra wà mó eq Ikoni wà mó má nyi é gumang wui éq hkya-ôn é hui sù nghut ri. ³ Poluq gi, hkyowui má yhang lé shuí chùng naù mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haú má é Yudaq byu pé lunglhang bang sé kômù, haú bang lé myit tē byí é yanmai nghut ri. ⁴ Haú mù, yhangmoq gi, rawa htâng rawà mai lai ló uchyang, Yerusalem wà mó má é lagyô pé eq hpúng suwún wui, chòm myit hpyit tō é hkyô lé, cháng kó sháng gaq ga, yhangmoq lé tai kyô akô. ⁵ Haú mù luí, hpúng byú wui gi, lumjíng hkyô má wum-o bo lò kômù, ra-nyí éq ra-nyí byú du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo rá hkyô lé Chyoiyúng Woi-nyí éq yhangmoq lé hkúm pyâm é yanmai, Hprugi mau eq Galatiq mau đông sô lai ló mù, ⁷ Musi mau kyo má jé ló kôjáng, Bihtuni mau shut wang ló rá dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô lai ló luí, Troa myuq má gyô jé ló akô. ⁹ Haú má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yú laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo rá matú, ngamoq lé Garai Gasang wut yú bê nghut ri nghú myit yú luí, haú hkún yhang, ngamoq gi, Makedoni mau shut dap é rá matú ri rì kut lò bê nghut lhê.

Ludia Gâ É Myiwe Myhí Hpúng Byú Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut lhai ji é mù luí, htang nyi gi, Neapoli wà má jé bê nghut lhê. ¹² Haú mai lai jáng, Makedoni mau má, Romaq byu pé xuq tō é, haú ginwáng má é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyúdung jowò joq nhô ngam mù, wà hkum shinggan má é, wuilàng yâm shut htoq é luí, haú má zing to láng é myiwe wui lé, zung gyô mù nyo hi é nghut lhê. ¹⁴ Haú dang gyo nyi é bang má, Garai Gasang lé noquq é, Htuatira myuq byú, pán nê ung zo sù Ludia gâ é myiwe myhí rayuq bo ri; Yhumsing Garai gi, Poluq tai kyô é hkyô lé rago gyô yú sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyù wui wui-myhup ban hkâm yú kôjáng, "Nungmoq gi, ngo lé haú Yhumsing Yesuq má lumjíng bê sù nghut é đông, myit yú byi kô é nghut jáng, ngá yhúm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyúdung é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é đông yhâng yhumsing wui lé ngunzè gyai yhang hô byí é sù nghut lhê. ¹⁷ Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yú hkyô tai kyô wún é, Myhang Htáng é Garai Gasang é dui-nhâng zoshâng wui nghut bum akô ô!" ga wut garú ri. ¹⁸ Buinyi myo myo haú su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haú lé, "Yesuq Hkrisduq é mying lang

luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haú lé, nhik-yô kat ri. Haú hkún jáng, nat haú gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsing wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e akò. ²⁰ Dum, yhangmoq gi, yhangnhik lé tarà agyì pé chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htungking lé mhoqshit byì nyi é dông, ²¹ nga-nhông é myuq lé gunjâng nyi akò nghut ri." ga taí akò.

²² Haú mù luí, shiwa byu pé gi, yhangnhik lé chôm htím akò. Tarà agyì pé gi, yhangnhik é mebu lé lãng hkyut pyám luí, wumchúm hkat êq bat râ matú, hkunmó hkyô kat akò. ²³ Yhangmoq gi, yhangnhik lé gyai yhang nhuq bat yu é htâng, htong má lhông kat mù, rago za wú zúng râ matú htóng suwún lé hkunmó hkyô tô akò. ²⁴ Htóng suwún hpó gi, haú sù é hkunmó lé wó jáng, yhangnhik lé hkyì kyum hut luí, htóng mâ é, je ahtè gok má lhông tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggãm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkún, htóng byù góbang gi, yhangnhik é hté lé chôm gyô nyi bum akò. ²⁶ Haú hkún, byodàn ratung layàng mó nún lô mù htóng yhum gón le nún lô luí, hkum pé banshoq le radá dâm bóng hã lo bum ri; dum nghut jáng, yuq hkangmó mâ é tojâng tui pé le gyut gyó byuq bê nghut ri. ²⁷ Htóng suwún hpó gi, yhup bún lò mù, htóng hkum pé bóng hã tô bum é lé myang kat jáng, htóng byu pé ban hfang byuq bùm bekò râ nghut lhê ga myit yù luí, shâm shê mù, yhanggùng yhang sat shí râ dã ri. ²⁸ Nghut kôlhang, Poluq gi, "Ê, náng gùng yhang nàng haú su hkâkut, ngamoq banshoq shí má nyi tô lhê." ga luí, hté mó êq wut garu taí kat ri.

²⁹ Haú hkún, yhang gi, duq é myibung lé dúng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yhang gi, yhangnhik lé shuí htoq yù luí, "Sarà nhik ê, ngò hkyi yu é hui rà matú, hai kut ra rà lhu?" ga myi kat ri.

³¹ Haú hkún, yhangnhik gi, "Yhumsing Yesuq lé lumjáng jáng, nàng eq náng yhumbyù lhunglhang bang hkyi yu é hui rà nghut lhê." ga taí akò. ³² Hau htâng, yhangnhik gi, haú htóng suwún hpó eq yhang yhumbyù lhunglhang lé, Yhumsing é mungdang hko kyô akò. ³³ Haú myín haú u lé yhang, htóng suwún hpó gi, yhangnhik lé shuí ê mù, yhangnhik é dàm pé lé tsing chí pyám byi luí, haú htâng, yhang eq yhang yhumbyù banshoq bang wui-myuhp hkâm yù bekò nghut ri. ³⁴ Hau htâng, yhang gi, yhangnhik lé, yhang é yhumhkaú má shuí wang ló mù, zoshuq hkang byì ri. Yhang eq yhang yhumbyù banshoq bang gi, Garai Gasang lé wó lumjáng bekò nghut é yanmai, gyai gabú nyi bum akò nghut ri.

Haq Nhang Pyám Râ Lé A Dông É Hkyô

³⁵ Ahkuí, maubó jáng, tarà agyì wui gi, "Haú nhik lé nhang pyám aq." ga, htóng suwún hpó chyáng pyata pé lé taí nhang kat akò. ³⁶ Haú hkún, htóng suwún hpó gi, "Nungnhik lé nhang pyám aq ga, tarà agyì wui mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé tai ri.

³⁷ Poluq kúm gi, "Nga-nhik gi, Romaq mingdán byû sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám rà dâ akô nhung lhi? A wó dut, yhangmoq yhang sheq lé shuí htoq yû kó sháng gaq." ga luí, yhangmoq lé tú tai kat ri.

³⁸ Pyata pé gi, tarâ agyi wui lé dang haú pé ló tai kyo kôjáng, tarâ agyi wui gi, Poluq eq Sila nhik Romaq mingdán byû nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yû mù, wà haú mai htoq ló byuq rà matú chôm dúng akô. ⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhúm má wang ló akô; haú má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhipoli wà mó eq Apolon wà mó mai sô lai ló mù, Htesaloni wà mó má jé akô. Haú wà má gi, Yudaq byu pé é tarajong ralhum joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyí yhang, Chyúmdang má bo é eq séng mù, yhangmoq eq chôm ming lhum uchyang, ³ Hkrisduq wuífke jamjau hui mù, shí bê mai dum dui toq lô rà hkyô lé tai hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga tai ri. ⁴ Yudaq byu pé má é ra-am gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggá é Grik pé myo myo eq, ahkyak é myiwe wui tósmra myo shoq le, gyô jing kômù, lé xoq yu akô.

⁵ Nghut kôlhang, a gyô jing é Yudaq byu pé gi, manôn kôluí, gài má é byùgang jùm ra-am lé lung yû mù, byù moq mó tsing yû luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhúm má htím e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng lêng she é kômù, "Mingkan gón lé atau ahú kut é byù shí nhik, ahkuí shí má jé jáng, Yason gi, yhâng é yhúm má lhom hkùlum yu ri. ⁷ Yhangmoq lunglhang bang gi, Yesuq gá é hkohkâm góyuq nyi lhê ga kôluí, hkoséng Kehtaq é tarâ lé lhoq shai é dông kut é bang nghut akô." ga tai garú bum akô. ⁸ Shiwa byu pé eq wà suwún wui gi, dang haú lé wó gyo kôjáng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq rà matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myín jáng yhang, gumang wui gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pé htoq má jé riyhang nhik bo bum akô; haú mù, danglù haú lé gyai ô nau é myit eq hap yû mù, danglù shí teng a têng é hkyô lé wó sé shoq ga, nyi wui Chyúmdang lé chôm nghap wui nyi akô nghut ri. ¹² Haú mù luí, Yudaq byu pé myo myo gi, lumjing bum akô, haú eq rajung za, aróng wó é Grik myiwe wui eq yuqgè wui myo myo le, lumjing bum bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haú má lé kômù, wà byù wui lé mhoq hpyoq luí, gabyông lò nhang akô. ¹⁴ Haú hkûn, gumang wui gi, Poluq lé wuimau yàm jé shoq, radá dâm dé kat akô; nghut kôlháng, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé tô kômù, Sila eq Timohti nhik lé hân hân châng lô rà matú pying kat é dang lé wun chûng mù, dum taú lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haú nhik lé láng nyi tô é u lé, haú wà má rawa é hparà lhô baú dut tô é lé myàng mù luí, yhâng i-myit gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggá é Grik pé eq le, gai pé má hui mihui bang eq le, nyí wui taí sán kyô lhûm nyi akô nghut ri. ¹⁸ Haú mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gá é byìn tú wap shut Poluq lé shuí doq lô mù, "Nang mhoqshit é hkyô asik, ngamoq lé sé nhang le a gè lhú? ²⁰ Nang eq taí é maú nhô za gá é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé è, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gá le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsíng le nghut lhê mù luí, byu loq eq saí é noqkuq yhûm má nyi rà a nghut. ²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung rà é sù lé su, byu loq eq dojaú rà sù a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi rà jowò masat to byi bé nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gá le, nungmoq é jihkyang kat bang, 'Nga-nhúng le yhâng é awut ashín pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haú mù, nga-nhúng gi, Garai Gasâng é yhangzô pé nghut nyi é yanmai, Garaí gùng gi, byu é hpaqchyí loq eq kyúng kâ tô é hîng, ngùn, luqgok pé eq

* **17:18** Epikuri hpaqchyí gi, htang pyat a joq, ahkuí ngón yú rà za ahkyak gá é nghut lhê. Sto-i hpaqchyí gi, haí wá dut kôlháng i-myit zim za kut mù, htang pyat matú chiq a ra gá é nghut lhê.

pûng lhê nghu luí hkâ-myt yù kó. ³⁰ Laí lò bê haú myoq a bóng shi é pyat lé, Garai Gasang gi, haí le a ga lhai pyám to kôlhang, ahkuí gi, jowò hkangmó má é byù lhunglhang bang lé, myit lhung keq ga hkunmó hkyô to bê nghut ri. ³¹ Hkâsu mù gà le, Yhang hkyin to sú mai mینگan gón lé tara é dōng jéyáng rá buinyi ra-nyí masat to bê nghut ri. Shí hkyô lé, byù lhunglhang bāng é hí má wó lum é saksé dut sháng gaq ga, Yhang haú yuq lé shi é mai lhoq dui toq yú bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoi pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³ Hau htāng, Poluq gi, haú zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htāng chāng kômù, lumjǐng bang dut bekò nghut ri. Haú bang má, Aripagu zuphpong má bo é Dionisi ga sú le bo ri. Hau htoq agó, Damari gà é myiwe rayuq eq gotù byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htāng má, Poluq gi, Ahten myuq mai htoq luí, Korinhtuq myuq má jé lo ri. ² Haú má, yhang gi, Romaq myuq mai Yudaq byù lhunglhang bang htoq ló byuq rá dut lhê ga, hkohkâm Klodi èq hkunmó hkyô é yanmai, a myáng shí lé Itali ming mai yhangmyi Priskila eq htoq jé lo é, Pontuq mau byù nghut é, Akula gà é Yudaq byù rayuq lé hui luí, yhangnhik chyáng é ri. ³ Yhangmoq gi, jonghpang saí zo bang chyat nghut kó é yanmai, muzò pûng kôluí, Poluq gi, yhangnhik eq rahá nyi nyi mù, muzò chòm saí akô. ⁴ Bánno buinyi hkangmó, Poluq gi, tarajong má Yudaq byù eq, Grik pé lé, taí sên kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai chāng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé gi, lhom he-ngik pyám kômù, yhang lé rhoi dang taí pyám akô; haú mù, Poluq gi, yhang mebu ko shit é dōng yhangmoq lé a nau é hkyô tūn shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tūngbaù pé chyáng e ló berá nghut lhê." ga luí, yhangmoq lé taí ri.

⁷ Hau htāng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhùm má wang ló ri. ⁸ Krispu gà é tarajong má up sú gi, yhang yhumbyù lhunglhang bang eq rahá, Yhumsing lé lumjǐng akô. Korinhtuq myuq byu pé myo myo le, Poluq é dang lé gyô yù mù, lumjǐng luí, wui-myhup hkâm yu bum akô nghut ri.

⁹ Ra-myìn lé, shing-rán ralhum má Yhumsing mai Poluq lé taí é gi, "Hkâgyuq, taí aq, zím za hkâ-nyí. ¹⁰ Ngò nàng eq rahá nghut nyi lhê, nàng lé ó yuq èq le haí wó kut rá a nghut, hkâsu mù gà le, myuq shí má, ngá é byù myo myo nyi bum lhê." gà ri. ¹¹ Haú mù luí, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sú, Ahkaia mau má é ginwáng zau kut nyi é u lé, Yudaq byu pé gi, myit rahkat zâ èq Poluq lé chòm chyup yú kôluí, tará hpyit wap má she háng kômù, ¹³ "Byù shí yuq gi, jep é tará eq shai lhùm é dōng, Garai Gasang lé noqkuq rá matù, byu pé lé mhoq hpyoq wún ri." ga mara hún akô.

¹⁴ Haú hkûn, Poluq tû tái rã dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu lai é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi rã hkyô joq lhê. ¹⁵ Nghut kôlhang, muzó shí gi, nungmoq é tarâ eq séng luí, dang eq séng luí, myìng eq séng luí, tái lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyi kut byi rã a nghut." ga tái mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haú hkûn, yhangmoq lunglhang bang gi, tarajong má up sù Sositeni lé chyup yú mù, tarâ hpyit wap hí má chòm bat akò. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taué Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjìng bang eq nyi nyi ri. Hau htàng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhai ji luí Suriq mau shut e ló akò. Hau hí má, yhang gi, danggididq tô tô é yanmai, Kenhkrea wà má xãm nyhâm pyâm ri.* ¹⁹ Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé tái sân kyo byi ri. ²⁰ Haú mã é bang gi, yhangmoq eq rahá rayoq zo nyi shi rã dông yhang lé dung kô é nghut kôlhang, yhang gi, a nhò lo nghut ri. ²¹ Haú mù, yhang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé rã nghut lhê." ga, yhangmoq lé danggididq byi tô ri. ²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htàng, Antioku wà mó má dum gyo ló ri.

²³ Yhang gi, haú wà má rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawà mã é chángzô pé lé wum-o lhoq ging byi ri.

Apolo Zui Sai É Muzó

²⁴ Ahkuí, Alesandru myuq byù nghut é sù, Apolo gã é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kúng é sù nghut ri. ²⁵ Yhang gi, Yohan é baprisma hkyô lé za sé sù nghut kôlhang, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byi ri. ²⁶ Ahkuí, yhang gi, gyuq kyúm myit a bo é za tarajong má tái hí ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasang é mungdang hkyô lé azó tung tái sân kyo byi akò nghut ri.

²⁷ Apolo gi, Ahkaia mau shut dap e ló nau é hkûn, gumang wuì gi, yhang lé wum sai byi mù, yhang lé lhom hkúlum yù rã matú, chángzô pé chyáng laiká ká byi kat akò; yhang gi, jé jáng, Garai Gasang jeju mai lumjìng bê bang lé, gyai yhang wó garúm sù dut bê nghut ri. ²⁸ Hkâsu mù gã le, yhang mai, Yesuq gi, Hkrisduq yhang nghut nyi ri ga luí Chyúmdang má tân shit uchyang, byu pé hí má Yudaq byu pé lé, wum kat wó tái ung pyám é yanmai nghut ri.

19

Poluq, Ehpesu Myuq Má Nyi U Lhé Hkyô

* **18:18** Xãm nyhâm pyâm é gi, Yudaq htùng dông rajung jung kut rã matú danggididq to luí, haú lé ban kut jáng, yhumsing xãm lé nyhâm pyâm é nghut lhê.

¹ Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô laí ló mù, Ehpesu myuq má jé ri. Haú má, yang gi, chángzô pé ra-am eq huí luí, ² yangmoq lé, "Nungmoq gi, lumjǐng é hkûn, Chyoiyúng Woi-nyí lé, wó yú bekô lú?" ga myí ri.

Haú hkûn, yangmoq gi, "Chyoiyúng Woi-nyí nyi lhê gâ é lhang, ngamoq a wó gyô wú." ga tú taí akô.

³ Haú mù, Poluq gi, "Haú nghut jáng, nungmoq gi, haí jung baptisma hkam yú kô é lú?" ga luí, yangmoq lé myí jáng, yangmoq gi, "Yohan é baptisma hkam yu é nghut lhê." ga tú taí akô.

⁴ Haú hkûn, Poluq gi, "Yohan é baptisma nghu é gi, myit lhǐng mù wui-myhup hkâm yu é hkyô lé gâ lhê. Yohan gi, yang é htang má jé lé rá sù, haú Yesuq lé sheq lumjǐng rá lhê ga shiwa byu pé lé taí ri." ga taí ri. ⁵ Yangmoq gi, dang haú lé wó gyo kôjáng, Yesuq é myǐng lang luí baptisma byí é lé, hkam yu bum akô. ⁶ Poluq gi, yangmoq é htoq má loq ke byí jáng, haú Chyoiyúng Woi-nyí gi, yangmoq htoq má jé lé mù, yangmoq gi, laklaí dang nyo lo é htoq agó myǐghtoi le htoi lo bum akô. ⁷ Haú bang lhunglhǎng gi, yuqgè raxe í yuq kó nghut ri.

⁸ Hau htang, Poluq gi, tarajong má wǎng luí, gyuq kyûm myit a bo é za lhamó sum hkyap Garai Gasǎng é mingdǎn hkyô lé taí sǎn kyo mù, lhoq pun lhoq kyǐng yu ri. ⁹ Nghut kôhǎng, ra-am gi, myit htan lo bùm kôluí a kǎm lumjǐng kô é htoq agó, haú Yhumsǐng é Hkyô lé byu pé hí má lhoq hpoi pyám byí kôjáng, Poluq gi, yangmoq chyáng mai htoq luí, chángzô pé lé shuí chǔng mù, Turanu gá su é hpaqchyí mhoq jong má, nyí wuí taí sǎn kyô lhúm nyi akô. ¹⁰ Haú su kut í zǎn yang mhoqshit nyi é yanmai, Asia mau gón mâ é Yudaq byu pé eq Grik pé lhunglhǎng bang gi, Yhumsǐng é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dǒng laklaí kumlhá kut ri. ¹² Haú mù, Poluq chyáng má é hpajet eq hpyihit rajung jung lé, nò bǎng chyáng yu ló mù, ló zǎng byí jáng lhǎng, yangmoq é nòhpyo ge ló byuq é eq, agè ashop é nat pé lé yangmoq chyáng mai htoq ló byuq bum akô.

¹³ Haú u lé, nat hkak htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myǐng mai, ngò, nungmoq lé hkak htoq lhê." ga, agè ashop é nat wang júng to bǎng é ahtaq má, Yhumsǐng Yesuq é myǐng lé lang luí, hkak chyam wú akô. ¹⁴ Skewa gâ é, Yudaq hkyangjong agyí rayuq é yuqzo nyhit yuq lé haú su kut wun akô. ¹⁵ Ra-nyí lé, agè ashop é nat gi, yangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôhǎng, nungmoq gi, ó pé nghut akô?" ga tú taí mù. ¹⁶ agè ashop é nat haú wang júng é byù gi, yangmoq htoq má byam doq jǐ to luí, nhuq bat yú mù yangmoq lé ung pyám ri. Yangmoq gi, yhúm haú mai gǔngchǐn sui nê yang yang hpang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yangmoq lhunglhǎng bang gi, chôm gyô gyuq bum akô. Yhumsǐng Yesuq é myǐng gi, hkya-on lhoq toq é huí bê nghut ri. ¹⁸ Lumjǐng bê bang myo myo gi, lé mù, yhumsǐng kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyí kut zô é bang le, yangmoq é laiká lé yu lé kôluí, shiwa byu pé hí má nyhê hkyô pyám akô. Mausau haú pé é ahpau lé sôn wú le, ngùn

chap ngo mun záng ri. ²⁰ Haú đông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htàng má, Poluq gi, Makedoni mau eq Ahkaia mau đông sô lai lò mù, Yerusalem wà mó má ló jé rã ga myit hpyit yú luí, "Haú má ló jé tô é htàng má, ngò, Romaq myuq má le, jé wú rã dut ashí." ga tai ri. ²² Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

²³ Haú yoq lé, haú Yhumsing é Hkyô yanmai gyai yhang gabyông lo bum akô. ²⁴ Demetri gô é ngùn bat zo sù rayuq gi, Artemi hpara é ngùn yhùm zòng zo sai luí, mù sai luzúm wuí lé wó sùt nhang nyi ri. ²⁵ Yhang gi, yhâng é ngùn bat zo luzúm wuí eq haú jung amû kut é góbang lé le ji tsing tò mù, tai é gi, "Luzúm wuí é, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sé lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq sai é zè lé, garaí pé a nghut ga, shí Poluq ga sù mai byu myo myo lé mhoq hpyoq yú mù, hkyô shuí lhoq nghoq nyi é hkyô lé, nungmoq wó myâng, wó gyó nyi akô. ²⁷ Haú mù luí, nga-nhúng é muzó shí gi, hpoi byuq rá lé chiq rá é za a nghut, hpara myhi mó Artemi é noqkuq yhùm gi, hai a dut byuq luí, Asia mau gón eq mingkan gón mai noq é hpara myhi é shingkang hpoi byuq rá lé le myit chiq rá dut bê." gâ ri.

²⁸ Yhangmoq gi, dang haú lé wó gyó bùm kôjáng, nhik mó gyó yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garú bum akô. ²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byu Ge-u eq Aristauq nhik lé chyup she yù mù, yhangmoq é poi wàng mó shut radá dâm chyin chyap wang lò bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuí nghut é, haú mau mã é suwún wuí ra-am lhang, yhang lé poi wàng hkaú mã a ê rá matú, hkùm pyám nhang akô nghut ri.

³² Zing tô é bang gi, hai hú háng le a sé lo dut byuq kô mù luí, ra-am rajung ga garú bum akô. Myo mi-myo gi, hai mù luí yhangmoq haú mã nyi tô é lé lhang a sé bùm kó nghut ri. ³³ Yudaq byu pé gi, Alesander lé hí mã chôm chyin htoq kat kôluí, shiwa hpong mai ra-am gi, yhang hká đông tai rá hkyô lé mhoq byi kat akô. Alesander le shiwa hpong lé tai san kyo naú luí, zim byuq rá matú loq tu ri. ³⁴ Nghut kôlhang, Alesander, Yudaq byu nghut é lé sé kôjáng, yhangmoq lhunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkying hkum í hkum kô garú bum akô.

³⁵ Haú, myuq chyare hpó gi, shiwa moq mó lé lhoq zim luí tai é gi, "Ehpesu myuq byu pé é, Ehpesu myuq shí gi, Artemi myhi mó é noqkuq yhùm eq mauhkúng mai byit gyó lo é yhâng é alhó lé, wú zúng nyi é wà nghut é hkyô lé, mingkan mã a sé é ó yuq wa nyi lhê lú? ³⁶ Haú mù luí, shí hkyô pé gi, wó he pyám jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhùm lé hpyoq zo su nhik le a nghut, nga-nhúng é hpara myhi lé lhoq hpoi su nhik le a nghut kô é le nhing, nungmoq shuí lé bekô nghut ri. ³⁸ Demetri eq yhâng é ngùn bat zo luzúm wuí gi, rayuq yuq é ahtoq mã mara hún rá hkyô joq kô é nghut jáng, tarâ rùng pé hpông tô lhê. Tarâ agyi pé nyi lhê. Haú mã yhangmoq é kô sháng gaq. ³⁹ Nungmoq tai nau é gó hkyô rajung jung joq é nghut le kúm gi, tarâ wang zuphpong mó mã chôm

taí pyám râ nghut lhê. ⁴⁰ Hkû-nyí gabyông é mû shí má, mû htoq wang a bo é yanmai, nga-nhúng lé mara hún râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhúng a wó taí kyo nghut ri." gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Lô É U Lhê Hkyô

¹ Haú gabyông é hkyô zím byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri. ² Yhang gi, haú mau mai sô lai lô uchyang, byu pé lé wum byí é dang myo myo taí luí, Grik mau má ló jé bê. ³ Yhang haú má lhamó sum hkyap nyi yù mù, lhai ji luí Suriq mau shut é râ hen nyi é hkún, Yudaq byu pé gi, yhang lé gyám nyí kô é yanmai, yhang gi, Makedoni mau đông tau lò râ lé myit hpyit bê nghut ri. ⁴ Yhang eq rabyìn za châng é bang gi, Beria wà mó má é Purú yhangzo Sopata, Htesaloni wà mó má é Aristakuq eq Sekundu nhik, Derbe wà mó má é Ge-u, Timohti, Asia mau má é Tuhkiku eq Trohpinu nhik pé nghut akô. ⁵ Yhangmoq gi, hí so láng luí, ngá-nhik lé Troa myuq má ló láng nyi akô. ⁶ Nghut kôlhang, ngá-nhik gi, Azuma Poi* lai é htâng má, Hpilipi wà mó mai lhai ji ló le, ngo nyí nghû jáng, Troa myuq má yhangmoq lé hui luí, haú má nyhit nyí chôm nyi é nghut lhê.

Troa Wà Má, Utuhku Ga Sû Lhoq Tui Toq Hui É Hkyô

⁷ Rabat é sâng-hi nyí lé, ngamoq gi, muk hpé gâm râ matú lé chôm zup zing tô é hkún, Poluq gi, htang nyí ló byuq râ ga hen tô é yanmai, chángzô pé lé gunggâm jé shoq hko kyô nyi ri. ⁸ Ngamoq zup zing nyi é haú ahtoq pyám wap má, myibung myo myo le duq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmô myi byuq luí, yhùm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkún, Poluq gi, gyó ló mù, po ngop to luí, "Hkâdân ko, yhang soq bo ashí." ga taí ri. ¹¹ Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duí gù shuí ló kômù, nhik ting é gyai yhang hui bekô nghut ri.

Troa Wà Eq Melitu Wà Gyoro Mã É Hkyowui

¹³ Poluq gi, myi hkyô ló râ matú hen tô é yanmai, yhang lajang byí é eq rajung za, yhang lé Asu wà má lhai lhom shuí ji râ matú, ngamoq gi, lhai ji mù hí ló láng bê nghut lhê. ¹⁴ Haú mù, yhang gi, Asu wà má ngamoq eq hui luí, ngamoq gi, yhang lé lhai má shuí ji chùng mù, Mitulene myuq shut e ló bê. ¹⁵ Htang nyi, ngamoq gi, haú mai lhai ji mù, Kiu zinlóng yâm mai lai ló luí, hau htang nyí gi, Samu zinlóng má lai dap ló luí, htang nyí gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyám to râ matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

* **20:6** Múnchi a bo é Muk zo Poi lé, Azuma Poi le gâ lhê.

¹⁷ Poluq gi, Melitu wà mó mai Ehpesu shut byù nhang kat lui, hpúng suwún wui lé é ji nhang ri. ¹⁸ Haú bang jé lé kôjáng, yhang yhangmoq lé tai é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkying banshoq lé le; ¹⁹ Yudaq byu pé jeq hô lui, ngò wuihke jamjau hui zo kôlhang, haú Yhumsing é muzó lé, ngò myit gyai lhoq nyhùm é eq ngaubyi ngaù nhap é eq wùn waq é hkyô lé le; ²⁰ nungmoq é matú akyù bo é hkyô banshoq lé, a myhit to loshoq tai é hkyô lé le; shiwa byu pé hí eq rayhùm htàng rayhùm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhing mù Garai Gasâng chyáng lhing lò ra eq, nga-nhùng é Yhumsing Yesuq lé lumjing ra hkyô lé, saksé hkâm kyo lugù nghut bê lé le, nungmoq sè nyi akô.

²² Ahkuí, ngò gi, Woi-nyí má tui tô é hui bê yanmai, Yerusalem wà mó má e ló lhê; haú má, ngò hai ló dut rà lé kúm gi, a sé nghut ri. ²³ Ngò gi, htóng eq wuihke jamjau hkyô ngo lé láng tô ri ga, wà hkangmó má Chyoiyung Woi-nyí èq lhoq pùn é hkyô lé za sè nyi lhê. ²⁴ Nghut kôlhang, ngò gi, òn rà hkyô ban òn rà eq, Garai Gasâng jeju eq sêng é gabú danglù lé saksé hkâm rà matú, Yhumsing Yesuq ngo lé byi tô é muzó lé ban wùn waq rà za nghut jáng, ngà asak lé ratsui le a myit ha ló é nghut lhê.

²⁵ Garai Gasâng é mingdán hkyô lé hko kyô wún é hkùn, ngò eq hui é nungmoq lhunglhang bang gi, htàng nùng má ngo lé a myàng lo kó rà nghut é lé, ahkuí ngò sè to bê. ²⁶ Haú mù lui, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap ló é hkyô lé, hkù-nyí, ngò saksé hkâm tô lhê. ²⁷ Hkâsu mù gà le, Garai Gasang ô nau é hkyô banshoq nungmoq lé hko kyo rà matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyung Woi-nyí èq up zúng nhang é sau hpúng† lhunglhang lé le, zúng nyí keq. Garai Gasang Yhâng suí èq wui tô é noquq hpúng lé le, rém zúng nyí keq. ²⁹ Ngò ló byuq é htàng má, sau hpúng lé a shogyô é, ashop é wamhkuí gi, nungmoq chyáng jé rà nghut é hkyô lé, ngò sè lhê. ³⁰ Hau htoq agó, chángzô pé lé wó mhoq hpyoq yù shoq ga, shut é òng tai é byu pé lhang nungmoq chyáng mai htoq lò rà nghut lhê. ³¹ Haú mù lui, nungmoq yuq hkangmó lé, ngò sum zân tup ngaubyi ngaù-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq ting mù, lhoq chyoiyung é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hìng, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htàng châng é bang ra châ é lé kut byi bê hkyô lé, nungmoq yhang sé gù nghut lhê. ³⁵ Ngò kut é muzó banshoq gi, nungmoq é alik dut bê nghut lui, shí su kut shikut é òng mai, nga-nhùng gi, wum-o nyhóm bang lé htuq bang lui, 'Lhom yu é htoq má byí é gi, je riyhang hkungsó wó nyi ri.' ga lui, Yhumsing Yesuq tai é dang lé bún nyí sháng." gà ri.

³⁶ Poluq gi, haú su ga ban tai jáng, hkyihput htuq mù, yhangmoq lhunglhang bang eq rahá za kyúdùng ri. ³⁷ Yhangmoq lhunglhang bang gi, yhang lé po to lui, bopuq puq mù, chòm ngaù akô. ³⁸ Htàng nùng má, yhang lé dum myàng rà a nghut lo gà é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

† 20:28 Sau hpúng gà é gi, lumjing é bang lé gà lhê.

21

Yerusalem Wà Mó Shut Doq Lô Nyi É U Lhê Hkyô

¹ Ngamoq gi, yhangmoq lé kang pyâm to lui, lhai jî chùng mù, nyâng za Kusa zinlóng má jé é nghut lhê. Hau htang nyi gi, Rode zinlóng má jé mù, hau mai Patara wà má dum jé bê. ² Hau wâ má Hpinisi mau shut dap lô é lhai lé, ngamoq myàng lui, hau mai chôm jî chùng bê. ³ Hau hkûn, ngamoq gi, Kupru zinlóng lé myàng jáng, hau é loqyo hkyam đông lai lô lui, Suriq mau shut é lô le, hpugá zê lé hkyô rà matú, Turuq myuq má nô é nghut lhê. ⁴ Hau wâ má, chángzô pé lé myang hô lui, yhangmoq chyáng nyhit nyi bíng yu é. Chángzô hau bang gi, Chyoiyung Woi-nyí eq lhoq pùn é đông Poluq lé Yerusalem wà mó shut a lô rà matú, chôm hkûm akô. ⁵ Nghut kôlháng, nyhit nyi hau lai jáng, ngamoq gi, ngamoq é hkyowui shut dum xoq sô htoq lô bê. Chángzô pé lunglhang bang gi, yhangmoq é myi zo wui eq rahá, ngamoq lé wà shinggan jé shoq châng dé kôlui, ngamoq gi, yhangmoq eq rahá wuiyâm má hkyihput htug mù, kyú chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhùm shut dum tau lô byuq bekô nghut ri.

⁷ Ngamoq gi, Turuq myuq mai lhai jî chùng mù, Toleme wà má jé lô bê. Ngamoq gi, hau wâ má é gumang wui lé shichyên yù mù, yhangmoq eq rahá ra-nyí chôm nyi kûn é nghut lhê. ⁸ Htang nyi gi, ngamoq hau wâ mai htoq lô mù, Kesare wà mó má dum jé bê. Hau wâ má, hau htuqluq htuqbang nyhit yuq* má bò sù, gabú danglù hko tai é Hpilip gá su é yhùm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, hau yhùm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé lui, Poluq é hpyihit lé yù mù, yhanggung yhang loq eq hkyi pé má tui mù lui, tai é gi, "Shi hpyihit yhumsing lé, Yerusalem wà mó má é Yudaq byu pé mai shi su kut lhom tui lui, tungbaù pé é loq má ap pyám kô rà nghut lhê;" ga lui, Chyoiyung Woi-nyí tai ri." gâ ri.

¹² Dang hau lé wó gyo jáng, hau má é bang eq ngamoq gi, Poluq lé Yerusalem wà mó má a doq lô rà matú, gyai yhang chôm hkûm bê nghut lhê. ¹³ Nghut kôlháng, Poluq gi, "Nungmoq gi, hai mù lui ngaubyi ngau-nhap kut é eq, ngo lé myit wum gyui rá đông kut nyi akô lúh? Ngò gi, Yhumsing Yesuq é yanmai, Yerusalem wà mó má, tui é hui rà za a nghut, shi hkâm rà matú lé rì rì nghut lhê." ga tù tai pyâm ri. ¹⁴ Yhang lé wó tai hkûm rà su a dut lo jáng, ngamoq gi, "Garai Gasang ô nau é đông nghut sháng gaq." nghu lui, zim za chôm nyi bùm bê.

¹⁵ Hau htâng má, ngamoq gi, zê món chùng mù Yerusalem wà mó shut doq lô bê nghut lhê. ¹⁶ Kesare wà mó má é chángzô pé ra-am le, ngamoq eq rabyìn za nghut kôlui, yhangmoq gi, ngamoq lé Kupru byu Manason ga sù, hí hí lhê é chángzo rayuq é yhùm má shuí lô mù, yhang chyáng bíng nhang akô.

Yerusalem Wà Mó Má, Yakuq Lé Ê Huí É Hkyô

¹⁷ Yerusalem wà mó má ngamoq jé é hkûn, gumang wui gi, ngamoq lé gabú tung lhom hkûlum yu akô. ¹⁸ Htang nyi, Poluq eq ngamoq gi, Yakuq lé é huí le, hpúng suwún wui le zing nyi to láng akô. ¹⁹ Poluq gi, yhangmoq eq ban

* 21:8 Lagyo 6:1-6

shichyen jáng, yang wùn waq laí lo é hpúng mù dông mai, Garai Gasâng èq túngbaù pé chyáng kut byi bê hkyô pé lé, jikhúm nuqguq shit kyô ri.

²⁰ Yangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Ámang ê, Yudaq byu pé má lumjínq é bang hkâ-myhó hkyíng mun nghut bê lé, nàng sê lhê. Haù bang lunglhang gi, jep é tarâ má myit zuq tò bê bang chyat nghut bum akô. ²¹ Nghut kôlhang, yangmoq lunglhang bang gi, túngbaù pé chyáng nyó lúng tô é Yudaq byu banshoq bang lé, nàng, yhumsing yangzô yangshù pé é matú ahpoy-kuq hpyit a ra nghu é eq nga-nhùng é htùng tarâ lé châng nyi a ra nghu luí, Mosheq é tarâ lé tô pyám rà dông mhoqshit ri gâ é dang lé, wó gyo yu bùm bekô nghut ri. ²² Nàng jé bê hkyô lé, yangmoq wó gyo berâ za nghut lhê. Ahkuí, ngamoq hkâsu kut lo râ lú? ²³ Haù mù, ngamoq taí é dông kut aq, ngamoq chyáng danggidiq mó byi bê byu nyi yuq nyi lhê. ²⁴ Nàng gi, haù bang lé ji yù mù, yangmoq eq rahá lhoq san lhoq yúng yù aq, yangmoq lé u wó wuq yù rà matú, ahpau le htoq byi aq. Haù hkún sheq, byù lunglhang bang gi, yangmoq wó gyo tô é hkyô a têng byuq é eq, nàng yang lhang, jep é tarâ lé, châng kut nyi sù nghut é hkyô lé, sé kó rà nghut lhê. ²⁵ Lumjínq é túngbaù pé é matú kúm gi, hparâ lhô pé lé túng byí é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yangmoq koi pyám rà matú, ngamoq chòm doqdan luí, kâ hún kat bê nghut lhê." ga akô.

²⁶ Haù mù luí, Poluq gi, hau htang nyí haù bang lé ji yù luí, yangmoq eq rahá, lhoq san lhoq yúng yù mù, noqkuq yhùm má wàng luí, yangmoq yuq hkangmó é matú hkungga wó byi shoq ga, yangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yú Huí É Hkyô

²⁷ Buinyi nyhit nyí haù ngap rà yàm má, Asia mau má é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong luí, yang lé chyup yù mù, garú taí kô é dang gi, ²⁸ "Israelaq byu pé è, garúm yù keq, shí yuq gi, nga-nhùng byuhú lé le, jep é tarâ lé le, jowò shí lé le, shut shai é dông jowò hkangmó má é byù banshoq lé mhoqshit sù nghut ri. Hau htoq agó, noqkuq yhùm má Grik pé lé shuí háng é eq, chyoyúng jowò shí lé achayut kut é sù nghut ri." gâ akô. ²⁹ (Hkâsu mù gâ le, yangmoq gi, Ehpesu myuq byù Trohpimu ga sù eq Poluq wà hkaù má rahá nghut kô é lé, myàng kômù, haù yuq lé noqkuq yhùm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhínghkyuq mai din lé lô kôluí, Poluq lé chyup zing tò uchyang, noqkuq yhùm shinggan shut she hkyut htoq ló akô. Haù hkún jáng, hkum pé lé myhí pyám akô nghut ri. ³¹ Poluq lé yangmoq sat rà dá nyi kô é hkún, Yerusalem wà gón gabyông nyi akô gâ é hkyô lé, Romaq dap up zaú é no má, lò jé ri. ³² Haù mù, yang gi, radá dâm shô up gyezau ra-am eq gyezô pé lé shuí chùng mù, byù hpúng shut, din yán gyó ló akô. Yangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyíng byuq akô nghut ri.

³³ Haù hkún, dap up zau hpó gi, Poluq chyáng é jé mù, yang lé chyup yù luí, tojàng tui í hkat eq tui tò nhang ri; hau htâng, yang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garú bum akô. Haù mù, gyezau hpó gi, lùm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi,

zumhtâng wang má jé lo é hkûn, byù moq mó lûm htim chyîn chyap lô kô é yanmai, gyezô pé gi, yhang lé waq doq lô akô. ³⁶ Shiwa byu pé gi, "Yhang lé sat pyâm keq." ga châng garû nyi akô nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

³⁷ Gyezô pé gi, Poluq lé gyewap má shuí wàng rã za nghut é hkûn, Poluq gi, dap up zau hpó lé, "Ngò nàng lé dang wó nyô rã lú?" ga myi jáng, dap up zau hpó gi, "Nàng, Grik myíng dat mu lhê lú?" ³⁸ Nàng gi, hí hkûn gumlau kut mù, byù sat wún bang myi hkyíng lé, yoso shut shuí htoq lô é sù, Egotuq byù a nghut lú?" ga tau myí ri.

³⁹ Háu hkûn, Poluq gi, "Ngò gi, Kiliki mau Tarshu myuq má é Yudaq byù nghut lhê, ngò nyi é wã gi, wã chyap wã zo za a nghut, jeju mai, byù shí bang lé ngò dang tái rã ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Háu hkûn, yhangmoq lhunglhâng bang zim byuq kômù, Poluq, yhangmoq lé Hebre myíng dông tái é gi,

22

¹ "Gumang wui eq íwa pé ê, ahkuí, ngò mara a bò nghu tái é dang lé gyô wú shi keq." gã ri.

² Yhangmoq gi, yhang Hebre myíng dông tái é dang lé wó gyô bùm kôjáng, gyai yhang zim byuq bekô. Háu mù, Poluq xoq tái é gi, ³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wã mó shí má nyi kô lô sù nghut lhê. Ngò gi, nga-nhông íchyí íwa pé é jep é tarã lé, Gamalelaq é loq má jihkùm nuqguq mhoq yú luí, hkû-nyí lhê é nungmoq lhunglhâng bang su, Garai Gasang lé gyai myít zing zuq é sù nghut lhê. ⁴ Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yú mù htóng má lhung pyâm wú bê sù nghut lhê.

⁵ Hkyangjong mó eq byin tú wap suwún wui lhunglhâng bang gi, ngá é saksé pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi rá laiká yhangmoq chyáng mai wó yu chùng luí, háu má é bang lé le Yerusalem wã mó má dam byi rá matú, chyup tuí lô rá nghù, Damaskuq myuq shut e é nghut lhê.

⁶ Nyigùng tú zó lé, ngò Damaskuq myuq shut sô chyâng lô nyi é hkûn, maubó gi, ngá é lìnhghkyuq má mauhkúng mai byodàn tung duqbó to bê nghut ri. ⁷ Háu mù, ngò myigùng má lêng gop tô le, wó gyô kat é danghtë gi, 'Sholuq, Sholuq, nàng ngo lé hái mù zing-rí nyi lhê lú?' gã ri.

⁸ Ngò le, 'Yhumsing ê, nàng ó nghut lhê lú?' nghu myi kat jáng, 'Ngò gi, nàng zing-rí wún é sù, Nazaret wã byù Yesuq nghut lhê.' ga luí, Yhang tú tái kat ri. ⁹ Ngò eq rahá é lô é bang kúm gi, maubó lé myàng kôlhang, ngo lé tái é danghtë lé a sê gyô kó nghut ri.

¹⁰ Dum, ngò gi, 'Yhumsing ê, ngò hái kut ra rá lú?' nghu myi jáng, háu Yhumsing gi, 'Toq mù, Damaskuq myuq má wang lô aq, nàng kut rá matú wò byí tô é hkyô pé lhunglhang, nang lé háu má lhom tái kyo berã nghut lhê.' ga ngò lé dum tái ri. ¹¹ Háu maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang lô akô.

¹² Háu hkûn, Anani gã é yuqgè rayuq ngá chyáng lé huí ri. Yhang gi, jep é tarã lé gyuq hkunggã é eq, háu má nyi é Yudaq byù lhunglhâng bãng é hí má myoqdong gyai wó é sù nghut ri. ¹³ Yhang gi, ngá nãm má yap to luí, 'Gumang

Sholuq ê, náng myoq myàng aq hkoi' ga tai ri. Haú hkûn jáng yang, yang lé ngò wó myang kat bê nghut lê.

¹⁴ Yang dum xoq tai é gi, 'Nga-nhung ichyi iwa pé é Garai Gasang gi, nang lé, Yang ô nau é hkyô sé sháng gaq ga lui le; Dingmán Sû lé wó myàng lui, Yhâng é nhut má é mungdang lé wó gyo sháng gaq ga lui le, hkyin to bê nghut ri.

¹⁵ Haú mù, nàng gi, nàng myang é eq wó gyo yu é hkyô pé lé, byu lhunglhang bâng é hí má, Yhâng é matú saksé hkám byi râ su dut râ nghut lê. ¹⁶ Ahkuí, nàng hai lé láng nyi ashí lú? Toq aq, Yhâng é mying lé lang lui wui-myhup hkám yu é eq, náng é yubak mara pé lé chí sân pyám aq.' gâ ri.

¹⁷ Hau htâng, ngò gi, Yerusalem wà mó má dum taú jé ló mù, noqkuq yhûm má kyû ê dúng nyi le, moq byuq ló mù, ¹⁸ Nàng, ngá é hkyô lé saksé hkám râ dang lé, yangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsing ngo lé tai nyi é lé, myoqwup shing-rân dông myang ri.

¹⁹ Haú mù, ngò gi, 'Yhumsing ê, tarajong ralhûm htâng ralhûm má nang lé lumjing bang lé, htóng má chyup lhung pyâm é eq, hkat bat lhing wún é hkyô lé, yangmoq sé bum akò. ²⁰ Náng é saksé Stehpan sat hui lui sui shun u lé, ngò nàm má yang yap to mù, haú hkyô lé myit bo hui lui, yang lé sat pyám bâng é mebu lé zúng byi é nghut lê.' nghu tú tai bê.

²¹ Haú hkûn, Yhumsing gi, 'Ê aq, ngò, nang lé, wê gâng é tungbaù pé chyáng nhang kat rà.' ga, ngo lé tai ri." gâ ri.

Poluq, Romaq Mingdán Byû Nghut É Hkyô

²² Shiwa byu pé gi, dang haú hkun jé za gyo yù kômù, "Shí sù é byù gi, myigùng htoq má nyi a ging, sat pyám keq." ga, hte mó eq garù bum akò.

²³ Yangmoq gi, haú su garu uchyang, yhumsing buhîng lé hkyut dú pyâm lê, hpuilhup lé mauhkung shut kyaq tâng lê, kut nyi kôjáng, ²⁴ dap up zau hpó gi, Poluq lé gyewap má shui hâng yù nhâng mù, yang lé shiwa byu pé hai mù shí su ga garù bum kô é hkyô lé wó sé shoq ga, nhuq bat nhâng lui, myí choq nhang ri. ²⁵ Nhuq bat râ matú shokuq tuí eq tui kôjáng, Poluq gi, nàm má yap tô é shù up gyezau lé, "Romaq mingdán byû ru nghut sù lé nhîng, lhang a jéyáng shimá, nungmoq nhuq bat le gi, tarâ wang akò lú?" ga tai ri.

²⁶ Rashô up gyezau gi, dang haú lé wó gyo jáng, dap up zaú chyáng ló mù, "Nàng hai kut râ dâ nyi lê lú? Shí yuq gi, Romaq mingdán byû sheq ru nghut ri." ga lui, yang lé ló tai kyô ri.

²⁷ Haú mù, dap up zau gi, Poluq chyáng é mù, "Nàng gi, Romaq mingdán byû nghut lê lú? Tai kyô wú laq." ga myi ri.

Poluq gi, "Ngò, Romaq mingdán byû nghut lê." ga tú tai ri.

²⁸ Haú hkûn, dap up zau hpó gi, "Ngò lhang ahpau myo myo byi pyám lui sheq, Romaq mingdán byû ru wó dut é nghut lê." ga tú tai jáng, Poluq gi, "Ngò kúm gi, Romaq mingdán byû dut gú hku lé lo é sù nghut lê." ga tai ri.

²⁹ Yang lé myí choq wú râ gâ é bang gi, haú hkûn jáng, yhâng chyáng mai huí zut ló bum bekò. Gyedap up zau hpó le, Poluq gi, Romaq mingdán byû nghut é lé sé jáng, yang lé tuí pyám bê nghut é yanmai, gyuq byuq bê nghut ri.

Yudaq Byin Tú Wapdoq Suwún Wuí Gam Hkoq Byuq É Hkyô

³⁰ Htang nyi, dap up zau hpó gi, Yudaq byu pé mai Poluq lé hun é mara hai nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byin tú wapdoq suwún wuí lhunglhang lé ji

tsing to lui, yhangmoq é gung gung má Poluq lé shuí wàng mù, shap to bê nghut ri.

23

¹ Haú hkûn, Poluq gi, Yudaq byin tú wapdoq suwún wui lé wú tsuq to mù, "Ngá gumang wui ê, ngò gi, hkû-nyi jé shoq Garai Gasâng é hí má sansêng é i-myt êq asak dui nyi bê nghut lhê." ga tai ri. ² Haú mù lui, hkyangjong mó Anani gi, Poluq nâm má yap to bang lé, yhang nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lhê. Nàng gi, tarâ eq rajung za ngo lé jéyáng râ matú shí má zung to lui nhing, hai mù tarâ eq shut shai é đông ngo lé bat nhang lhê thú?" ga tai ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê thú?" ga lui, chôm tai akô.

⁵ Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyú lé up é sù lé wó rhoi rá a nghut.'* ga le kê tô é nghut lhê." ga tú tai ri.

⁶ Hau htâng, haú zing tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wui lé, "Gumang wui ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô rá hkyô lé myit myoqbyú é yanmai, ngò jéyáng é huí nyi ri." ga lui, garú tai kat ri. ⁷ Yhang haú su ga tai kat jáng, Hparishe pé eq Saduke pé gi, dang jet jet lhùm lò kômù, Yudaq byin tú wapdoq hpong gi, gam hkoq lô byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga tai bum akô. Hparishe pé kúm gi, haú pé joq lhê ga, lumjing bang nghut akô.)

⁹ Haú mù lui, gyai yhang tai garú bum akô. Haú hkûn, Hparishe hpúng má é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang tai bê nghut jáng gi, hkâsu nghú kó rá thú?" ga lui, zuq zuq tai htíng lhùm akô nghut ri. ¹⁰ Haú su kut gyai yhang tai htíng lhùm lò kôjáng, dap up zau hpó gi, Poluq lé lãng myha pyám kó rá lé chiq é yanmai, yhangmoq chyáng gyô é mù, Poluq lé haú bãng é gung gung má é lú shuí lò lui, gyewap má shuí wang lò rá matú, gyezô pé lé nhang kat ri.

¹¹ Haú myín, Yhumsing gi, Poluq é nàm má yap to lui, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé tai ri.

Poluq Lé Sat Râ Haq Dâ É Hkyô

¹² Htàng napkyô, Yudaq byu pé gi, Poluq lé sat râ hpaqchyí chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. ¹³ Hpaqchyí shí lé chôm dâ é bang gi, myi xê yuq chyân nghut bum akô.

¹⁴ Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq hai le a zo nghú, chôm dakam yu to bê nghut lhê.

¹⁵ Hau é yanmai, ahkuí nungmoq gi, Yudaq byin tú wapdoq suwún wui eq rahá kut lui, Poluq é hkyô lé rago za myí gon wú rá nghu mhaú é đông, yhang lé nungmoq chyáng wut yù rá matú, dap up zau chyáng dúng kat keq. Haú

* 23:3 But hpyu tô é xewâm gâ é gi, gegùn labyoq kut bang lé gâ lhê. ✧ 23:5 Htoq Ló 22:28

hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga tai akô.

¹⁶ Nghut kôlhang, haù lhom haq sat kó râ gâ é hkyô lé, Poluq é yhang nhammó é yhangzo yuqgè zo wó gyô yù luí, yhang gi, gyewap má wang é mù, Poluq lé é tai kyô ri.

¹⁷ Haù hkûn, Poluq gi, shô up gyezau rayuq lé ji yù mù, "Zorâm shí lé dap up zaù chyáng shuí ê aq, yhang, yhang lé shit kyo râ hkyô rajung joq lhê ga." ga tai ri. ¹⁸ Haù mù luí, shô up gyezau hpó gi, zorâm haù lé dap up zaù chyáng shuí ê mù, "Zorâm shí nang lé shit kyo râ hkyô rajung joq lhê gâ ri ga, yhang lé nang chyáng shuí lé râ matú, htóng byù Poluq gi, ngo lé ji yù mù tai ri." ga, yhang lé tai ri.

¹⁹ Haù jáng, dap up zau hpó gi, jauwò má zorâm haù lé yhang loq mai she é mù, "Nàng ngo lé hai jung shit kyô nau ri thú?" ga, yhang lé baù tsik za myí ri.

²⁰ Haù hkûn, zorâm haù gi, "Yudaq byu pé gi, Poluq lé rago za saí myí wú râ su kut mhaù mù, napmá, Yudaq byìn tú wapdoq má shuí yù râ matú, nang chyáng dung kó râ ga, myit chôm huí to bekô nghut ri. ²¹ Haù mù luí, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, hai le a zo a shuq râ nghut lhê ga, byù myí xê yuq chyân yhang, ó le ó dakam yù bekô nghut ri. Haù bang gi, yhang lé lhom chyup yù râ matú haq lhom to láng kó râ nghut lhê. Ahkuí lhang, yhangmoq gi, mù haù kut râ matú rì rì nghut bùm bekô; nang é ahkáng lé za láng nyi bum akô nghut ri." ga shit kyô ri.

²² Haù hkûn, dap up zau hpó gi, zorâm haù lé, "Nàng, ngo lé shí hkyô shit kyo bê hkyô lé, ó yuq lé le hkâtai kyo." ga, sidiq byi mù, taù nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkù-myìn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lham chùng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhanghik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngo Klodi Lusi gi, nguóngón danglù shit kyô kat lhê.

²⁷ Shí yuq lé gi, Yudaq byu pé èq chyup yù mù sat pyám râ dâ nyi bekô za nghut lhê. Nghut kôlhang, ngo gi, gyezô pé eq rahá é wú le, yhang Romaq mingdán byù nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haù su mù, hai mù yhang lé mara hùn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byí wú bê nghut lhê. ²⁹ Haù hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhung gíng é mara hai le a bò nghut ri. ³⁰ Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yhang lé ngò nang chyáng dé nhang kat bê. Yhang lé mara hùn nau é bang lé gi, nang hí má yhang hun lhum keq ngù pying kat bê nghut lhê." gâ ri.

† 23:23 Myín sum hkyíng gi, nga-nhùng é myín gau hkyíng nghut lhê.

³¹ Haù mù luí, gyezô pé gi, haù pying kat é dang eq rajung za, myín lé yhang, Antipatri wà mó jé shoq Poluq lé dé kat bekò nghut ri. ³² Htang nyí, myang ji bang lé é châng dé nhâng kômù, yhangmoq gi, gyewap shut dum taù lò bekò nghut ri. ³³ Myang ji é gyezô pé gi, Kesare wà mó má jé kô é hkùn, mauzau hpó lé laiká byi mù, Poluq lé lé jâng ap byí akò nghut ri. ³⁴ Haù hkùn, mauzau hpó gi, laiká haù lé ban nghap jâng, Poluq hká mau má é byù nghut é hkyô lé myí wú luí, Kiliki mau má é byù nghut é lé sé jâng, ³⁵ "Nang lé mara hùn bang jé jâng sheq, náng mù lé ngò gôn wú râ." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hùn Huí É Hkyô

¹ Hau htâng, ngo nyí lai jâng, hkyangjong mó Anani gi, suwún wuí ra-am eq tará sé sù Tertulu lé shuí gyó lò mù, mauzau hpò hí má Poluq lé mara lé taí hun bum akò. ² Haù hkùn, Poluq lé hí má ji hâng tô é nghut mù, Tertulu, yhang lé mara hùn dang taí hi é gi, "Aróng wó dik é Hpilik ê, ngamoq gi, nyí-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkgang é jeju lé, byù myú shí wó hkâm zô nyi é yanmai, ³ ngamoq gi, haù lé hkyô hkat hkgangmó eq jowò hkgangmó má jeju bún é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é dông a dut sháng gaq, taí râ dang ratot zo lé, myit hng hng to mù gyo byi laq nghú dng tngbân lhê ô!

⁵ Shí yuq gi, byù lé gunjang sù, mingkan gón má é Yudaq byu pé lhunglhang lé shuí gabyong sù eq, haù Nazaret hpúng má é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhùm lé achag achyut kut râ dà nyi luí, yhang lé ngamoq chyup yù mù, (ngamoq é tará dông jéyáng râ hen nyi é hkùn, ⁷ dap up zau Lusi gi, lé lò mù, ngamoq é loq mai yhang lé lé lú shuí yù luí, yhang lé mara hùn bang lé, náng chyáng jé keq ga hkunmó hkyô tô é nghut lhê.) ⁸ Haù mù, nàng, yhang lé myí wú jâng, ngamoq yhang lé hun é mara banshoq têng é hkyô lé, nàng wó sé râ nghut lhê." gâ ri.

⁹ Yudaq byu pé le, haù pé gi, têng lhê ga bo chôm taí akò nghut ri.

Poluq, Mara A Bò É Lé Tai Hung É Hkyô

¹⁰ Míngzau hpó gi, Poluq lé dang taí râ dông loq lik kat jâng, Poluq taí é gi, "Zau ê, shí mau bâng é ahtoq má, nàng zanwut myo myo jéyáng byí nyi é hkyô lé, ngò sê é yanmai, ngò gabú myit eq yhumsing matú, mara a bo é hkyô tai bá. ¹¹ Ngò, Yerusalem wà mó má noqkuq râ matú doq é é buinyi raxe í nyi lhang a chyân shi é gi, nàng lui za wó sé râ nghut lhê. ¹² Noqkuq yhùm má ngò ó yuq eq taí hng lhum é lé lhang, tarajong, a nghut jâng, wà hkaù hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tún shit kó nghut ri. ¹⁴ Nghut kôlhang, náng hí má ngò yín yù râ hkyô rahkat gi, yhangmoq eq shut shaí hkyô ga myhng tô é Hkyô lé cháng lui, ngamoq é íchyí íwâ pé é Garai Gasang lé noqkuq nyi lhê. Jep é tará eq myiqhtoi laiká pé má kâ tô é lhunglhang lé le lumjng lhê. ¹⁵ Ngò gi, dingmán é bang eq a dingmán bâng é dum dui toq lò râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haù mù luí, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra laí é htâng má, ngò gi, ngá é byù myû má é myùng bang lé chyunghuq byi rá eq alu kat rá matú, Yerusalem wà mó shut ló jé bê nghut lhê. ¹⁸ Haú su kut nyí é hkún, ngò eq rahá hai byù moq mó le a nyí, hai jung gabyông é hkyô le a htoq, ngò noqkuq yhúm má lhoq san lhoq yúng yû bê hkyô lé za, yhangmoq myang akô. ¹⁹ Nghut kôlhang, Asia mau má é Yudaq byù ra-am gi, haú má nyí tô é nghut lhê; yhangmoq mai ngo lé mara hún rá hkyô joq kô é nghut le gi, shí náng é hí má yhangmoq lé jé kó ra nghut lhê. ²⁰⁻²¹ Haú a nghut jáng, shí má nyí tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq rá hkyo é yanmai, hkú-nyí nungmoq ngo lé jéyáng nyí akô.' nghú lui, garú é dang hkún mai lai lui, ngò má gotú mara myàng shi kô é nghut le gi, yhangmoq yhang tai kyo kó sháng gaq." gâ ri.

²² Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi rá nghut lhê." ga lui, yhangmoq lé ahkying htot kat byí ri. ²³ Poluq lé le, zúng za zúng to mù, yhâng é buinùm ji-myi wui mai yang ra châ é hkyô lajang byi naú kô é bang nyí le gi, ahkáng byi keq ga lui, shô up gyezau lé hkunmó hkyô kat ri.

²⁴ Buinyí rayoq zo laí é htâng má, Hpilik gi, Yudaq myiwe myhí nghut é sú yhangmyi Drusila eq jé lé mù, Poluq lé ji lò nhâng lui, yang, Hkrisduq Yesuq lé lumjing hkyô tai kyô é le gyô yu ri. ²⁵ Poluq gi, dingmán hkyô, yhumsing gùng lé hkang é hkyô eq, jé lò rá tará dara hkyô lé mhoqshit jáng, Hpilik gi, gyô gyuq mù, "Nàng ahkuí wó ló bê, ngò jin jáng sheq nang lé dum ji yù rá nghut lhê." ga tai ri. ²⁶ Hpilik kúm gi, Poluq eq ngùn haq byi rá lé myit myoqbyù mù, yang lé anum num ji yù lui, yang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pé é hí má myoqdong wó nau é yanmai, Poluq lé htóng má jâng lhúng pyâm to bê nghut ri.

25

Poluq, Kehtaq Chyáng Jé Râ Matú Dùng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. ² Haú hkún, hkyangjong agyi pé eq Yudaq byù hkyô-u shê bang gi, yang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyâm rá dá to kômù lui, jeju ralhum kut byí é dông Poluq lé Yerusalem wà mó shut dé kat byi rá matú, Hpestu lé lhom dùng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhúng tô lhê, hkâ-myháng a myáng má, ngò yang le haú má dum taú ló rá nghut lhê. ⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yang lé mara lé hún kó sháng gaq." ga tû tai ri.

⁶ Hau htâng, yang gi, shit nyí, raxê nyí kô yhangmoq chyáng nyí yù lui, Kesare wà mó má taú ló mù, htang nyí gi, tará tanghkuq má zùng lui, Poluq lé yhâng hí má shuí wang lò rá matú hkunmó hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhinghkyuq má yap to kôlui, saksé a wó tûn shit é mara mó myo myo lé, yhâng é ahtoq má chôm tai hun akô nghut ri.

⁸ Haú hkûn, Poluq gi, "Yudaq byu pê é jep é tarâ eq shai é dông le, noqkuq yhûm lé shut é dông le, Kehtaq* lé shut é dông le, ngò a kut wú." ga luí, mara a bo é hkyô taí ri.

⁹ Nghut kôlhâng, Hpestu gi, Yudaq byu pê é hí má myoqdong wó naú mù, Poluq lé, "Nàng, Yerusalem và mó má doq ló luí, shí hkyô pé lé ngò háu má doqdan byi râ matú, nàng dóng lhê lú?" ga myí ri.

¹⁰ Poluq kúm gi, "Ngò gi, doqdan hui râ nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé hái lháng a shut wú sù nghut lhê. ¹¹ Laqma mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôlhâng, shí Yudaq byu pé mai ngo lé mara hun é hkyô a teng é nghut jáng gi, ó yuq lháng ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tú taí ri.

¹² Haú hkûn, Hpestu gi, yhâng é byin tú wap bang eq ban hpyê lhum jáng, "Nàng Kehtaq chyáng wang taí râ ga bê nghut lhê, Kehtaq chyáng wang ló aq hkoí!" ga taí kat ri.

Poluq Lé, Hkohlâm Agripa Hí Má Shuí Hâng Yu É Hkyô

¹³ Hau htâng, buinyi hká-myhâng a myáng má, Hkohlâm Agripa eq yhanggu myiwe zo Bernike gi, Kesare và mó má jé lé mù, Hpestu lé lé hui nyo akò nghut ri. ¹⁴ Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq taí kyô lhûm é gi, "Hpilík, lhúng to lãng é htóng byú rayuq nyi ri. ¹⁵ Ngò Yerusalem và mó má nyi tô é hkûn, hkyangjong agyi pé eq Yudaq byu pê é suwún wui gi, haú yuq é hkyô lé taí kyo kôluí, haú yuq lé mara byi râ matú ngo lé chôm dúng akò.

¹⁶ Haú hkûn, ngò gi, mara hun é hui sù, mara hun é bang eq chyung chyog yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htùng a joq nghu luí yhangmoq lé taí kyo bê nghut lhê. ¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyi jáng tarâ tanghkuq má zùng luí, haú yuq lé shuí wang lò râ matú hkunmó hkyô kat é. ¹⁸ Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara rahum le a hun htoq lô kó nghut ri. ¹⁹ Yhangmoq é noqkuq htùng hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhûm bum akò. ²⁰ Haú mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem và mó má doqdan é ló hkam yù râ matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyi shirâ matú, ngò hkunmó hkyô kat é nghut lhê." gâ ri.

²² Haú hkûn, Agripa gi, "Ngò le háu yuq é dang gyó wú nau ri." ga, Hpestu lé taí jáng, yhang gi, "Napmá, nàng wó myang gyo râ nghut lhê." ga tú taí ri.

²³ Htâng nyi, Agripa eq Bernike nhiktâng gi, shing kang bò bò za lé lô mù, dap up zau wui eq và mã é agyi suwún wui eq rahá, rùng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akò. ²⁴ Haú hkûn, Hpestu taí é gi, "Hkohlâm Agripa eq ahkuí shí má zup zing tô é lhunglhâng bang é, Yerusalem và mó eq shí và mã é Yudaq byu pé banshoq bang, ngá chyáng lé taí kôluí, shí yuq lé asak a wó dui nhang to lo

* 25:8 Kehtaq gâ é gi, "hkoséng" gâ é nghut lhê.

ga garû bùm é gi, ahkuí nungmoq myang é shí yuq yhang nghut bê. ²⁵ Nghut kôlhang, shí yuq zui saí é má shí gíng é mara hái lé lhang ngò a myàng nghut ri. Yhang gi, Hkosêng chyáng wàng rà ga taí é yanmai, yhang lé Romaq myuq shut dé kat rà matú ngò myit hpyit to bê. ²⁶ Dé kat bá nghû jáng le, ngá é yhumsíng Hkosêng chyáng yhang é hkyô jikhúm nuquq ká hun kat rà hái le a bò nghut ri. Haú mù luí, yhang lé ban myí gôn wú jáng sheq, ká rà hkyô rajung jung hkâhláng ngò myàng abe nghû, nungmoq banshoq bang é hí má le, je riyhang nàng Hkohlâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byú rayuq yuq lé dé kat é hkún, yhang lé hun é mara a wó tún shit lé gi, a htuk nghû luí, ngò myit lhê." gâ ri.

26

Poluq É Hí Hpyang Lhê É Nyi Yap Hkyô

¹ Haú hkún, Agripa gi, Poluq lé, "Nàng, náng matú dang tai rà ahkáng wó bê." ga taí ri.

Haú mù luí, Poluq loq tû kat mù mara a bo é hkyô taí é gi, ²⁻³ "Hkohlâm Agripa ê, nàng gi, Yudaq byu pé é htunghking banshoq eq taí htúng lhum é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkú-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luí, ngá dang lé myit hing é eq gyô yù byi laq nghû, dùng tóngbán kat lhê.

⁴ Ngò gi, zoshâng hkún mai, ngá amyú má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhang bang gi, sé gû nghut akô.

⁵ Yhangmoq gi, ngo lé hí hkún mai sé kô é yanmai, ngò, ngamoq é noquq htúng má é tarâ htan dik é hpúng má bo é Hparishe rayuq nghut é hkyô lé, saksé hkám naú kô é nghut jáng, yhangmoq wó hkâm lhê. ⁶ Nghut kôlhang, doqdân é hui zo rà matú, ahkuí ngò shí má yap tô é gi, Garai Gasang eq ngamoq é ichyí íwa pé lé byí tô é dangidiq lé myit myoqbyù nyi é yanmai nghut lhê. ⁷ Ngamoq é byù myú raxe í hú gi, danggidiq jeju haú lé wó hkam yù shoq ga, Garai Gasang lé nyí myín noquq dojaú shikut nyi bum akô; Hkohlâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shí bê bang lé dum lhoq tui lhê gâ é hkyô lé, a wó lùm nghû, hái mù myit yu akô lú?

⁹ Ngò le, Nazaret wà byù Yesuq é myìng eq shai lhum é đông myo myo wó kut rà nghut lhê nghû, gè gè yhang myit yu wú bê nghut lhê. ¹⁰ Gè gè haú đông le Yerusalem wà mó má kut wú bê nghut lhê; hkyangjong agyi pé chyáng má é ahkáng wó yù luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lhung lhung yhangmoq lé dam byi luí, Yesuq lé rhoi dang tai kó shoq shikut wú bê nghut lhê; nhik mó góng yo luí, gó mau má é wà pé lhang jé shoq, yhangmoq lé châng zing-rí wú bê nghut lhê.

Poluq Hpúng Byú Dut Lo É Hkyô

¹² Haú hkún, radâm lé, ngò gi, hkyangjong agyi pé chyáng mai ahko ahkáng eq hkunmó lé yu chùng mù, Damaskuq myuq shut é ló nyi le, ¹³ Hkohlâm wa ê, nyigùng tu ló zó lé, bui htoq má je duq é maubó gi, haú hkyô má, ngò eq ngá é luzùm wui é lnhingkyuq má, mauhkûng mai duq bó htoq lo é lé myang ri.

¹⁴ Haú hkún, ngamoq banshoq bang myigùng má lêng gop tô bum le, Hebre myíng đông, 'Sholuq, Sholuq, nàng, ngo lé hái mù zing-rí nyi lhê lú? Zuchún

lé pik le gi, náng é matú gyai yhang wuí lhê.' ga luí, ngo lé taí é danghtê lé ngò wó gyô kat ri.

¹⁵ Haú mù, ngò gi, 'Yhumsing ê, nàng gi, ó yuq nghut lhê lú?' ngú luí, myi jáng, haú Yhumsing tù taí é gi, 'Nàng zing-ri nyi é Yesuq nghut lhê. ¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirá nghut é hkyô pê é matú, ngá é mù wùn râ byu eq saksé dut nhâng râ đông nang lé hkyin to râ nghú, ngò nàng chyáng lé htoq shit é nghut lhê. ¹⁷ Náng é amyú pê é loq mai le, tûngbaù pê é loq mai le, ngò, nang lé hkyi yù nyi râ nghut lhê. ¹⁸ Yhangmoq, yubak hkyut pyám byí é jeju wó yú râ eq, ngo lé lumjíng é yanmai, lhoq sân-yúng huí é bang eq rahá sili wunlí wó hkam yù kó sháng gaq nghú, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasang shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' ga ri.

Poluq Kut É Muzó Hkyô

¹⁹ Haú mù luí, hkohkâm Agripa ê, ngò gi, mauhkûng mã é myoqwup shing-rán haú lé a gyô é a wó é nyi nghut lhê. ²⁰ Ngò gi, yhangmoq myit lhing luí, Garai Gasang shut lhing taú lò mù, myit lhing bê hkyô lé, hkyí zó loq zó đông mai tûn shit kó sháng gaq nghú, sân-hi má Damaskuq myuq má nyi é băng chyáng mai hí luí, Yerusalem wà mó mã é băng chyáng má le, Yuda mau gón mã é băng chyáng má le, tûngbaù pê chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhûm má chyup yú luí, sat pyám râ da kô é nghut lhê. ²² Nghut kôllhang, ngò gi, hkú-nyí jé shoq Garai Gasang eq garúm é lé wó yú luí, ahkuí shí má yap to mù, tiq kó banshoq bang lé saksé wó hkâm kyô é nghut lhê. ²³ Ngò taí é má, Hkrisduq gi, hpuzo luí, shí bê bang mai sân-hi dui toq lò mù, Yhâng é amyú eq tûngbaù amyú pê lé maubó é hkyô lé wó taí kyo râ nghut lhê ga luí, dut lò râ hkyô lé, myightoi pé eq Mosheq taí tò é hkyô mai lai luí, ngò gotú haí le a taí é nghut lhê." ga ri.

²⁴ Yhang haú su ga mara a bo é hkyô taí é lé, Hpestu gi, "Poluq ê, nàng na bê! Lùm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê. ²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sé é gi, haí le a joq râ nghut lhê nghú, ngò myit lum nyi lhê. ²⁷ Hkohkâm Agripa ê, nàng gi, myightoi pê é dang lé lumjíng lhê lú? Nàng lumjíng é hkyô lé ngò sé lhê." ga tù taí ri.

²⁸ Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lú?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkú-nyí ngò taí é dang lé gyô nyi é lhunglhâng bang, ngò su dut râ matú, ngò gi, Garai Gasang lé kyúdùng nyi lhê." ga tù taí ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq taí lhum bum akô nghut ri.

³² Agripa gi, Hpestu lé, "Shí yuq gi, yhang mai Kehtaq chyáng jé rã ga a tai tô é nghut le gi, yhang lé wó nhang pyám berã nghut lhê." ga tai ri.

27

Poluq, Romaq Myuq Shut Wui-sanghpo Mai E Lô É Hkyô

¹ Ahkuî, ngamoq lé Itali ming shut wui-sanghpo mai gû dap lô nhâng rã matú myit hpyit to kôluî, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mã é, Yuliu gã é shô up gyezaû é loq má ap byî kat akô. ² Haû hkûn, Asia mau mã é wuimau gin-gau cháng luî wã pé mã wang jón lô é, Adramuti myuq mai toq é wui-sanghpo mã ngamoq wang ji bê nghut lhê. Htesaloni wã mó mã é Aristakuq gã é Makedoni byu rayuq le ngamoq eq rahá nghut lhê.

³ Htang nyí, ngamoq gi, Sidun myuq má nó bê nghut lhê. Yuliu gi, Poluq lé shogyo mù, yhang chyáng rã é hkyô lé yhâng é buinùm wui mai lhom lajang byi kó sháng gaq ga, yhangmoq eq ê hui rã matú ahkáng byî kat ri. ⁴ Haû mai dum toq lô é hkûn, lai tau mut é yanmai, Kupru zinlóng lé lai hkaû uchyang jî lai lô mù, ⁵ Kiliki eq Pamhpuli mau mã é wuimau đông lai byit lô le, Laiki mau mã é Mura myuq mã jé bê nghut lhê. ⁶ Haû mã, shô up gyezau hpó gi, Itali ming shut dap e lô é, Alesandru myuq mã é wui-sanghpo lé myang hkyup luî, ngamoq lé haû mã jî nhâng bê nghut ri. ⁷ Haû mai buinyi myo myo yhó lé za ji é lô luî, awui ahke yhang Kidu wã mó eq ang mã wó jé lô jáng, lai tau mut é yanmai, hí shut a wó lai lô lo mù, ngamoq gi, lai lé cháng luî, Kreti zinlóng lé lai hkaû mù, Salamone kongzô é tú tap âng é mai lai lô é nghut lhê. ⁸ Haû mã é wuiyãm mai awui ahke ji lô lé, Lasea wã eq a wê lhùm é Yuqyo é Guhkan gã é jowô mã jé ri.

⁹ Ahkuî, buinyi tsómra lhoq lhai pyám luî, haû Zoshuq gám poi lai bê nghut é yanmai, wui-sanghpo mai sô wún le gi, gyuq chiq rã nám jé bê nghut ri. Haû mù, yhangmoq lé Poluq tai pun tai kyíng é gi, ¹⁰ "Áhkaû pé ê, shí dãm lhê é wui hkyô gi, wuihke mó hui luî, wui-sanghpo eq zè pé sùm pyám rã htoq agó, nga-nhùng é asak lhang sum rã dut é hkyô lé, ngò byu myang ri." gã ri. ¹¹ Nghut kôlháng, shô up gyezau hpó gi, Poluq é dang lé gyo rã malaî, wui-sanghpo hkâng sù eq wui-sanghpo yhumsing é dang lé, je lum ri. ¹² Guhkan haû gi, gyoqmyô* wó lhoq lhai rã su a dut é yanmai, myo hpyang gi, Hponik guhkan mã wó jé le jé mù, haû mã gyoqmyô lô nyi lhai rã matú chôm myit huî akô. Guhkan haû gi, Kreti zinlóng mã maupyî buiwàng hkyam eq mautsung buiwàng hkyam shut hu tô é jowô nghut ri.

Wuimau Mã, Laidun Mó Htùng Huí É Hkyô

¹³ Maupyî shut mã é lai yhó le hik lô jáng, yhangmoq myit tô é mã hkyak nghut bê su ngam pyám kôluî, shamtoq goknghe lé lhoq toq yû kômù, Kreti zinlóng yãm đông jî é lô bê nghut lhê. ¹⁴ Nghut kôlháng, hkâ-myháng a myáng mã, Buihtoq mautsung lai gã é laidun mó gi, haû zinlóng mai mut lò luî, ¹⁵ wui-sanghpo lé lo mut htùng é yanmai, hí shut a wó lô lo jáng, ngamoq gi, lai mut lô é shut châng yông lô bê nghut lhê. ¹⁶ Ngamoq gi, Koda gã é zinlóng zo lé lai hkaû uchyang yông lô nyi é hkûn, haû sakhkyilhai lé gyai shikut é eq wó láng yù luî, ¹⁷ wui-sanghpo ahtoq mã láng toq to bê. Wui-sanghpo lé gi, a byoq lo shoq tuí eq tú kíng to bê nghut lhê. Dum, yhangmoq gi, Surti gã é semui

* **27:12** Gyoqmyô lé, haû mau mã laidun mó lò dut mù, yông wún le gyuq chiq nám nghut lhê.

bùm má ló kē gyâm to râ lé chiq kô é yanmai, wui-sanghpo mâ é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lúm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. ¹⁹ Sum nyí ngu é nyí má, yhangmoq gi, wui-sanghpo zê pé lé yhumsing é loq eq yhang hkyó pyám bekô. ²⁰ Buinyi myáng myáng, bui lé le, kyí pé lé le a myáng é eq, laidun mó za ru mut nyi é yanmai, wó lut râ nghú myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gûng má yap to mù, "Àhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marop hui zo râ a nghut. ²² Ahkuí nghut kôlháng, ngò taí é dang lé gyô yù mù myit wum yù keq; nungmoq mâ é hká yuq lé asak sum râ a nghut, wui-sanghpo za sheq htên byoq byuq râ nghut lhê. ²³ Hkásu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amân ngá é nâm má lé yap to mù, ngo lé taí é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wui-sanghpo shí má nàng eq rahá ji tô é lhunglháng bâng é asak lé, Garai Gasang gi, náng é yanmai, láí láí byi râ nghut lhê.' gâ ri. ²⁵ Hau é yanmai, àhkaú pé ê, myit wum yù keq, ngo lé taí kyô é eq rajung za dut lò râ nghut lhê nghú luí, Garai Gasang lé ngò lumjínng nyi lhê. ²⁶ Nghut kôlháng, nga-nhúng gi, zinlóng ralhum lhum má ló htúng chyap to râ nghut lhê." ga luí, yhangmoq lé i-myt taí títng ri.

²⁷ Buinyi raxe myi nyí myín má, gunggâm yoq lé, ngamoq gi, Adria wuimau má yông lhing wún é hkún, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. ²⁸ Haú su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myáng akô nghut ri. ²⁹ Haú mù luí, luqmó má ló záng htung râ lé chiq kômù, yhangmoq gi, wui-sanghpo htâng shut mâ é shamtoq goknghe nyí lhum lé lhoq hkyô kat luí, mau hân bó sháng gaq ga kyúdùng nyi bum akô nghut ri. ³⁰ Wui-sanghpo hkâng bang gi, wui-sanghpo lé tô pyám to luí hpâng râ dá é myit eq, wui sanghpo-u shut mâ é shamtoq goknghe pé lé lhoq hkyô râ su kut mhaú luí, sakhkyílhai lé wui má lhoq hkyô nyi bum akô. ³¹ Haú mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut râ a nghut." ga taí ri. ³² Haú hkún, gyezô pé gi, sakhkyílhai lé túi tô é túi lé zân hpyit kat kôluí, sakhkyílhai gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq hai le a zô é, hkú-nyí raxe myi nyí myáng lô bê. ³⁴ Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lháng byuq râ a nghut." gâ ri. ³⁵ Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkyá-on mù, muk lé hpé luí, zô hí bê nghut ri. ³⁶ Haú hkún sheq, banshoq bang gi, myit wum wó yù kômù, zoshuq zô bùm bekô nghut ri. ³⁷ Wui-sanghpo haú má é byù lhunglháng gi, í sho nyhit xe hkyuq yuq nghut lhê. ³⁸ Yuq hkingmó bàn zô gyí é htáng má, wui-sanghpo sóm râ matú, sungso pé lé wui má dú kat pyám akô nghut ri.

Wui-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlháng, semuí-jàng chyún ralhú lé byu myàng kôluí, wó dut é nghut jáng, haú má sanghpo

lé kôn gyam râ matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyám tô akô. Lhaishap tui lé le hkyut yú luí, wui-sanghpo ulhum mã é panlong lé lhoq toq yú mù, lài hkyô cháng luí wuiyàm shut mut ló bê nghut ri. ⁴¹ Nghut kôlhang, semui lo bum tô é jowò ralhum mã, wui-sanghpo ló htung chyap byuq luí, sanghpo u gi, a wó dúi lo mù, sanghpo htang lé gi, wuiheng eq ló bat hkyop myha pyám bê nghut ri.

⁴² Haú hkûn, gyezò pé gi, htongbyû pé wuili lí hpang byuq kó râ lé gyuq kô é yanmai, yhangmoq lé sat pyám râ chôm dâ akô. ⁴³ Nghut kôlhang, shô up gyezau hpó gi, Poluq lé hkyi yú naù luí, yhangmoq dâ é hkyô lé hkúm pyám mù, wuili dat li bang gi, wui má byam gyó luí wuiyàm shut hí li dap ló kó sháng ga luí le, ⁴⁴ góbang gi, siklong eq wui-sanghpo mã é gotù zè pé má zui mù, gu dap ló sháng ga le, hkunmó hkyô kat ri. Haú dông mai lhunghâng bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhé Hkyô

¹ Ngamoq wó lut dap ló jáng sheq, zinlóng haú gi, Malata gâ é lé sê ri. ² Zinlóng byu pé gi, ngamoq lé shogyo myit gyaì lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkúlum yu akô. ³ Haú hkûn, Poluq gi, htang rawaq guq tsing yú mù, myihkyóm má kat kat é hkûn, myi soq htan lò jáng, duq htân lhangmui radu gi, htoq ló mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmui haú htê lhâng tô é lé myàng kôjáng, "Shí yuq gi, gè gè yhang byù sat é sù teng râ dut ri; wui mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq tai lhum bum akô nghut ri. ⁵ Poluq kúm gi, lhangmui haú lé myihkyóm má ko hkyô kat luí, haí le a dut é za nyi tô ri. ⁶ Yhangmoq gi, yhânggung wâm lò berâ, haú a nghut jáng, byodân ratung shi hkyaq lêng lò berâ, ga myit lán nyi bum akô. Nghut kôlhang, myáng myáng lán wú nyi bum le, yhang má haí le a dut lo é lé myàng kôjáng, yhangmoq é i-myt dum htaì pyám kôluí, shí yuq gi, hparà rayuq sheq nghut ri ga dum tai bum akô nghut ri.

⁷ Hau é nâm má, zinlóng agyì hpó Popli sing é maumyì pé joq tô ri. Haú yuq gi, ngamoq lé lhom te yú mù, yhâng yhúm má sum nyi yhang lalúm la-nye lhom hkúlum yu ri. ⁸ Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyúdung byi luí, yhâng é ahtoq má loq ke byi mù, yhang lé lhoq gè byi ri. ⁹ Haú su dut é yanmai, zinlóng mã é nô byù góbang banshoq le, lé luí lhoq gè byi é hui bekô nghut ri. ¹⁰ Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo jì mù, dum toq ló râ hkûn, ngamoq râ é gù lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mã é, "Hparà zozùm nhiktâng" gâ é alhò dap é wui-sanghpo mã, ngamoq wang jì htoq ló bê nghut lhê. Wui-sanghpo haú gi, gyoqmyò lé zinlóng haú má joq lai é nghut ri. ¹² Surakusa wà mó má jé jáng, haú má ngamoq sum nyi nô yu é nghut lhê. ¹³ Haú mai jì xoq lhing ló le, ngamoq gi, Regi wà mó má jé ri. Htang nyi gi, maupyì lai hik lô mù luí, í nyi nyi má nghut jáng, Potioli wà mó má jé lô bê

nghut lhê. ¹⁴ Haú mã é gumang wuì ra-am eq hui luí, ngamoq lé nyhit nyí no rá matú lùng kômù, ngamoq gi, nô yù bê; hau htàng, Romaq myuq má já ló bê nghut lhê. ¹⁵ Haú mã é gumang wuì gi, ngamoq já lo nyí é hkyô lé wó gyo kôjáng, te yù rá ga, Api Gai gâ é wà eq Bínq Yhûm Sûm Lhum gâ é wà já shoq lé akô. Poluq gi, hau bang lé lhom myàng jáng, Garai Gasang lé hkyon kungtôn mù, myit wum wó yù bê nghut ri. ¹⁶ Ngamoq, Romaq myuq má já wang ló é hkûn, Poluq gi, yhang lé zúng rá gyezo rayuq eq gotù san nyí rá matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyì sum nyí lai é htàng má, Poluq gi, hau mã é Yudaq suwún wuì lé ji yu ri. Yhangmoq já lé bûm kôjáng, yhang gi, "Gumang wuì ê, ngò gi, nganhúng é amyù lé le, íchýí íwà pè é htungking lé le, shut shai é dông hai le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pè é loq má ap byí kat é hui bê nghut lhê. ¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, hau lé Yudaq byu pè a dông kô é yanmai, ngò hkâsu a dat kut lo mù, Kehtaq chyáng já rá matú dúng é nghut lhê. Haú nghut kôle, ngá amyù lé mara hûn rá jowò joq é yanmai gi, a nghut. ²⁰ Haú mù luí, Israelaq amyù é myit myoqbyù hkyô* é yanmai, shí shamtoq-tuì èq tuì é ngò hui zô é hkyô eq séng luí, nungmoq eq nyo kún rá matú, ngò, nungmoq lé ji kat é nghut lhê." ga luí, yhangmoq lé tai ri.

²¹ Haú hkûn, yhangmoq gi, "Náng é hkyô eq séng luí Yuda mau mã é laiká ngamoq a wó yù nghut ri. Haú mai lé é gumang wuì ó yuq le, nàng eq séng é a ge é luhkyang lé shit kyô é a bô kó nghut ri. ²² Nghut kôlhang, shí nàng lom é hpúng gi, jowò hkangmó má tai he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tũ tai akô.

²³ Yhangmoq gi, yhang eq hui kún rá buinyì dîng to kôluí, yhang bínq é yhûm má byù myo myo lé zîng bum akô. Haú hkûn, yhang gi, napkyó mai myín htàng já shoq, Garai Gasang é mingdán hkyô lé saksé hkâm kyô é eq, Mesheq é tará eq myiqhtoi pè é dang má cháng mù, yhangmoq lé shikut luí, Yesuq é hkyô tai pun tai kyíng ri. ²⁴ Yhang tai é hkyô lé, ra-am gi, lumjínq bum akô; ra-am kúm gi, a lumjínq kó nghut ri. ²⁵ Yhangmoq rayuq eq rayuq hau su myit a hui lhûm bùm kô é yanmai, Poluq gi, yhangmoq lé, "Chyoiyúng Woinyí, Myiqhtoi Esai-aq é nhut mai nungmoq é íchýí íwà pè lé tai é dang gi, gyai yhang têng ri. Dang hau gi,

²⁶ 'Byù hau hú chyáng é mù,

"Nungmoq gyô tsuq to kôlhang, sê gyo kó rá a nghut;
wú tsuq to kôlhang, wú sé kó rá a nghut.", ngù é tai aq.

²⁷ Hkâsu mù gâ le, amyù shi é i-myt gi, htan byuq luí,
yhangmoq é nohkyap gi, htu byuq bê nghut ri;
yhangmoq é myoq gi, chûm byuq bê nghut ri;
hau a nghut le gi, yhangmoq é myoq èq myàng mù,
yhangmoq é nohkyap èq wó gyo luí,
yhangmoq é i-myt má sê hkyáng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê. ✧
gâ ri.

* 28:20 Israelaq amyù é myit myoqbyù hkyô gi, Mesaia gâ é hkyi yù sù lé myoqbyù nyí é nghut lhê.

✧ 28:27 Esai 6:9,10

²⁸ Haû mù luî, shî Garai Gasâng é hkyi yù hkyô lé, tûngbaù pè chyáng byî kat bê nghut luî, yhangmoq lhom gyô yù berâ hkyô lé, nungmoq yhang sê nyî keq ô!" ga luî, danghkun haû taî kat é htâng má, yhangmoq gi, htoq ló byuq bùm bekô nghut ri. ²⁹ (Poluq haû su ga taî é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhúm má í zân tup nyî é u lé, yhâng chyáng lé má lé é bang lé lhom hkûlum yu ri. ³¹ Haû mù, a gyuq a kyum é za, Garai Gasâng é mingdán hkyô lé hko taî kyô é eq, Yhumsîng Yesuq Hkrisduq eq sêng é hkyô lé mhoqshit byî ri; yhang lé, ó le a hkûm zing to kó nghut ri.

ROMAQ Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut rã matú, Garai Gasâng eq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggididq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut rã matú jí yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsíng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myú chângjup mai byù ji yù mù, lumjíng hkyô lé châng nyi nhâng rã matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng rã matú ji yù huí é bang má lòm bekô nghut ri.

⁷ Nga-nhúng é Iwa Garai Gasang eq Yhumsíng Yesuq Hkrisduq chyáng má é jeju eq nguínón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjíng hkyô lé, mingkan gón má tai pyo ló bê nghut é yanmai, sàng-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹ Ngá é kyúdung dang pé má, ngò, nungmoq lé hkâ-nhám le bún nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq eq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé rã hkyô htong byi rã matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kíng byi rã matú, nungmoq lé gyai yhang myàng nau nyi ri. ¹² Haú su nghu é gi, nga-nhúng rayuq eq rayuq é lumjíng hkyô dông mai, nungmoq eq ngò, myit wum byí é hui rã matú nghut lhê. ¹³ Gumang wui ê, ngò gi, haú tûngbau pé chyáng mai ashi wó yu é eq rajung za, nungmoq chyáng mai le ashi wó yù rã matú, nungmoq chyáng lé jé rã nghú adàm dàm dâ wú é nghut kôlhang, ahkuí jé shoq hkúm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵ Haú nghut é yanmai, ngò gi, Romaq myuq má é bang nungmoq lé le, haú gabú danglù gyai yhang hko kyo nau nyi é nghut lhê.

¹⁶ Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sàng-hi má Yudaq byu pé, hau htàng tûngbau pé má, lumjíng é sù yuq hkgangmó lé hkyi yu é wó hui nhâng rã nghut é, Garai Gasâng é hpungwup a-tsam nghut lhê. ¹⁷ Hkâsu mù gâ le, lumjíng myit mai wó yù luí, lumjíng myit má gíng nyi é, Garai Gasâng chyáng má é dínghán hkyô lé gi, gabú danglù

haú má hpông shit bê nghut ri. Haú gi, "Haú dingmán sù gi, lumjǐng myit mai asak òu rã nghut lhê."¹⁸ ga kã tô é eq rajung za nghut ri.

Xãngzo Byu Pê Htoq Má Garai N्हikmo-yô Ê Hkyô

¹⁸ Haú tengmán hkyô lé, yhumsing é agè ashop hkyo èq zik hkùm pyâm é byu pê é agè ashop hkyô eq garai a bo é hkyô pé banshoq htoq má, mauhkúng mai Garai Gasàng é n्हikmo-yo hkyô lé hpông shit bê nghut ri. ¹⁹ Haú mù gà le, Garai Gasang gi, Yhang eq sêng é hkyô, yhangmoq lé san za tũn shit bê nghut é yanmai, Garai Gasang lé sé àng é hkyô gi, yhangmoq chyáng san za dut bê nghut ri. ²⁰ Hkãsu mù gà le, mau htoq xàng hkun mai, hpan tô é zè pé wú jàng, Yhàng é a byu-myang é isàm nghut é, ahtum abyuq é hpungwup a-tsam eq Garaí é myit sãm lai lé gi, san za wó myàng, wó sê gyô é nghut lhê. Haú mù luí, byu pé gi, mara mai wó he lut rã hkyô a joq lo nghut ri.

²¹ Haú mù gà le, yhangmoq gi, Garai Gasang lé sê to kôlhàng, Yhang lé Garaí òng a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyǐng é yhangmoq é myit n्हiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhàng, a-ngok é bang dut byuq bekô nghut ri. ²³ Haú mù, htên byoq a sê é Garaí Gasàng é hpungwup shing kang lé, htên byoq sê é byù zòng, nghoq lhô, dusak lhô eq yê jung dusak lhô pé èq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó rã matú, a sansêng é gungsho zùm-yap hkyô kut rã nghut é, yhangmoq é yut yut ô nau é i-myt má, yhangmoq lé, ap pyám bê nghut ri. ²⁵ Yhangmoq gi, haú Garaí Gasàng é tengmán hkyô lé, mhaú é hkyo èq htaí lhik pyám kômù, hpân Sù lé noqkuq dojaú rã malaí, mhaú hkyô nghut é hpan tô é zè pé lé noqkuq mù, dojaú akô nghut ri. Hpân Sù haú gi, ahtum abyuq hkya-on hui sù nghut ri. Amen.

²⁶ Haú nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyám bê nghut ri. Yhangmoq é myiwe wui lhang gi, htũng akying lé tô pyám kômù, haú eq shai é òng htaí lhik pyám nyi akô nghut ri. ²⁷ Haú eq rajung za, yuqgè wui le, myiwe wui eq zum é htũng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-ũ hkyô kut shut lhum kôluí, yhangmoq kut shut é eq gingdán é yubak dam lé, yhumsing gũng yhumsing hkam yù nyi bekô nghut ri.

²⁸ Hau htoq agó, haú Garaí Gasang lé sê é hkyô gi, akyù bo é a nghut ga yhangmoq myit yù kô é yanmai, a kut àng é hkyô kut nhàng rã matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhum é hkyô pé byǐng jup tô é bang dut bekô nghut ri; manon é, byù sat é, mabyoq jishũm htoq é, mhaú zô é eq myit goí bo é pé le byǐng bum ri. ³⁰ Yhangmoq gi, lumu é bang, gansang é bang, Garaí lé a jú é bang, byù rhoi é bang, nghutbún é bang, gyáng é bang, agè ashop kut rã hkyô lhoq htoq é bang, mó wui é jino a gyô é bang nghut akô. ³¹ Yhangmoq gi, a gyǐng a hâng é bang, gidìq a zung é bang, chyit myit a bo é bang, shogyo n्हikmyin a sê é bang nghut akô. ³² Haú pé lé kut é bang gi, shí gǐng lhê gà é, Garaí Gasàng é dingmán tarã joq é lé, yhangmoq sê to kôlhàng, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haù mù luí, góyuq lé tarâ jéyáng é sù nàng ê, nàng gi, mara mai wó he lut rá hkyô a joq lo; hkâsu mù gà le, nàng yhang jéyáng nyí luí, mù haù pé lé, nàng kut nyi é yanmai, byù góbang lé jéyáng é hkùn, nàng gùng nàng mara byí nyi bê nghut ri. ² Haù dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haù mù, byù za nghut to luí, góbang lé gi, jéyáng mù, yhumsing gi, haù dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hpang lut rá su ngam nyi lhê lú? ⁴ Haù a nghut jáng, nàng gi, Garai Gasâng é ge é hkyô eq nang lé myit wó shuí lhung nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyám nyi lhê lú?

⁵ Nghut kôlhang, náng é myit htân hkyô eq myit a lhung é nhiklhùm é yanmai, haù Garai Gasang dingmán é dông tarâ jéyáng shit rá nghut é, Yhâng é nhikmo-yô é buinyi má hkâm zo rá nhikmo-yo hkyô lé, yhumsing gùng yhang hkong tó nyi bê nghut ri. ⁶ Garai Gasang gi, yuq hkanmó lé, ó le ó kut é má cháng luí, hkâm zo nhâng rá nghut lhê. ⁷ Jân shirâng mù, ge é hkyô kut nyi é dông, hpungwup shingkan lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi rá nghut lhê. ⁸ Nghut kôlhang, haù yhumsing wuizat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé rá nghut lhê. ⁹ Wuíhke hkyô eq iyon yon hkyô gi, agè ashop kut é xângzo byù yuq hkanmó chyáng jé rá nghut lhê; sâng-hi má Yudaq byu pé chyáng jé mù, tûngbaù pé chyáng le jé rá nghut lhê. ¹⁰ Nghut kôlhang, hpungwup shingkan, aróng eq nguingón hkyô gi, haù ge é hkyô kut é bang yuq hkanmó chyáng jé rá nghut lhê: sâng-hi má Yudaq byu pé chyáng jé mù, tûngbaù pé chyáng le jé rá nghut lhê. ¹¹ Hkâsu mù gà le, Garai Gasang gi, myoqdong a hkyin é Sù nghut lhê.

¹² Haù jep é tarâ lé a sê é mara kut shut é bang lunglhang gi, jep é tarâ dông a nghut é za htên byoq kó rá nghut lhê. Haù jep é tarâ hkaù má mara kut shut é bang lunglhang gi, jep é tarâ dông jéyáng é hui zo kó rá nghut lhê.* ¹³ Hkâsu mù gà le, haù jep é tarâ lé wó gyô é bang lé, Garai Gasâng é hí má dingmán bang gà é a nghut é za, jep é tarâ lé châng kut é bang za sheq, dingmán bang gà é hui rá nghut lhê. ¹⁴ Haù jep é tarâ lé a wó é tûngbaù pé gi, jep é tarâ hkyô lé, yhang baù yhang châng nyi kô é hkùn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haù jep é tarâ hkyô pé lé, yhangmoq é i-myt unghkaù má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haù lé saksé hkám byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haù hkyô gi, ngò taí pyo é gabú danglù eq rajung za, byu pé é záu nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut rá nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gùng nàng Yudaq byù rayuq nghut lhê ga mù, haù jep é tarâ lé lumhkaù nyi é eq Garai Gasang lé xoq é hkyô má

* **2:12** Haù jep é tarâ lé a sê bang gà é gi, tûngbaù pé lé gà é nghut luí, haù jep é tarâ hkaù má é bang gà é gi, Yudaq byu pé lé gà é nghut lhê.

nghutbùn nyi é sù; ¹⁸ Yhâng ô nau é hkyô lé sê é eq haù jep é tarâ mhoqshit é hkyô wó yù bê nghut é yanmai, je ahkyak é hkyô lé sê gàm hkoq é sù; ¹⁹ haù jep é tarâ má, hpaqchyí eq tengmán hkyô é alik wó sù nghut é yanmai, haù myoqjit bâng é matú hkyô-u shê sù eq mauchut hkaù mã é bâng é matú maubó nghut sù; ²⁰ byu ñogk pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhing, yhumsing gùng yhumsing a mhoq yù lú? A wó hkau ga hko tai luí nhing, nàng gi, hkaù lhê a nghut lú? ²² Su-myi sulàng lú hkyô a wó kut ga byu pé lé tai luí nhing, nàng gi, su-myi sulàng lú hkyô kut lhê a nghut lú? Hparà lhô lé a jú dik sù nàng gi, noqkuq yhúm lé hpyoq zo hpyoq shuq nyi lhê a nghut lú? ²³ Jep é tarâ eq séng luí nghutbun sù nàng gi, haù jep é tarâ lé lu lai é dng, Garai Gasang lé a hkungga kut lhê a nghut lú? ²⁴ Haù gi, "Garai Gasâng é mying gi, nungmoq é yanmai, tûngbaù pè chyáng lhoq hpoí pyâm é huí ri."* ga kâ tô é eq rajung za nghut ri.

²⁵ Haù jep é tarâ lé nàng châng é nghut jáng, ahpyo-kuq hpyit hkyô gi, akyù bò bê nghut ri. Nghut kôhlang, nàng, jep é tarâ lé lu lai é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôhlang, jep é tarâ hkyô pé lé châng é bang lé gi, ahpyo-kuq hpyit bê bang dng ge sôn byi lhê a nghut kó lú? ²⁷ Kâ tô é tarâ lé wó mù, ahpyo-kuq hpyit hkam to gù nghut é, tarâ lu lai é sù nàng lé, gungsho má ahpyo-kuq a hpyit kôhlang, jep é tarâ lé châng é sù gi, mara hùn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyíng a nghut; gungsho má za ahpyo-kuq hpyit é gi, ahpyo-kuq hpyit kyíng a nghut. ²⁹ Ahte myit hkaù má Yudaq byù nghut sù za, Yudaq byù kyíng a nghut lhê. Kâ tô é tarâ dng a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyíng a nghut bê. Haù yuq é hkyá-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haù dng ga jang, Yudaq byù rayuq dut nyi é gi, hai akyù hkâm zo rà lú? Ahpyo-kuq hpyit hkyô gi, hai akyù bò rà lú? ² Hkyô hkangmó má gyai akyù bò lhê! Je hí má gi, haù Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mã é ra-am lumjng myit a bo é nghut le gi, hkâsu kó lú? Yhangmoq lumjng myit a bo é yanmai, Garai Gasâng é lhumzui hkyô lé akyù a bò nhâng wó dut rà lú? ⁴ Hká dng le a wó dut!

"Haù mù, nàng dang tai é hkùn, dingmán é hkyô wó lhoq htoq rà eq,

nàng jéyáng huí é hkùn, ùng râ nghut lhê."*

ga kâ tô é eq rajung za, byù yuq hkangmó gi, byù-mhaù dut kôhlang, Garai Gasang gi, tengmán nyí sháng gaq.

⁵ Nghut kôhlang, nga-nhùng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haù nghut jáng, nga-nhúng hkâsu nghú tai rà lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dng tai htng é nghut lhê.) ⁶ Ratsuí lhang a nghut! Haù su ru nghut le gi, haù mingkan lé, Garai Gasang hkâsu wó jéyáng rà lú? ⁷ Rayuq yuq, "Ngò mhaù é hkyô gi, Garai Gasang tengmán é

hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhîng, haî mù luî, ngò, yubak byù rayuq dông mara byî é hui zô nyî ra shîrâ lú?" ga tai dang-rhâng râ nghut lhê. ⁸ "Ge é hkyô htoq sháng gaq, nga-nhúng, agê ashop hkyô kut sháng." nghû haî mù a tai kô é lú? Dang haû lé ngamoq tai é nghut lhê ga luî, ngamoq lé lumù gansang é dông byù ra-am tai akô. Haû bang gi, mara dam byî é hui zo gîng bang nghut akô.

Dingmán Byù A Nyi

⁹ Haû jâng, hkâsu nghû lo râ lú? Nga-nhúng gi, je gè bang nghut lhê lú? Ratsui lhang a nghut. Yudaq byù nghut nghut, tûngbaù pé nghut nghut, yubak mara hkaû mâ é bang chyat nghut lhê nghû, ngamoq tai san kyô wú bê nghut lhê. ¹⁰ Chyúmdang má kâ tô é le,

"Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglhang bang gi, lhing lô byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lhang a nyi nghut ri."✧

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."✧

"Yhangmoq é nhutwui pé má gi, shîduq bò lhangmui é duq dap bum ri."✧

gâ tô ri.

¹⁴ "Yhangmoq é nhut pé gi, nhing myíng nhing htê eq myit nò danghko baù byíng zan tô ri."✧

gâ tô ri.

¹⁵ "Yhangmoq é hkyî pé gi, byù sat sui lhoq htoq râ matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuihkê é ahkô tông tô é nghut mù,

¹⁷ nguóngón é hkyô lé gi, yhangmoq a sé kó nghut ri."✧

gâ tô ri.

¹⁸ "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✧

gâ tô ri.

¹⁹ Byù yuq hkgámó é nhut gi, tû tai jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haû jep é tarâ má tai é lhunglhang gi, jep é tarâ ô má nyi é bang lé tai é nghut é hkyô lé, nga-nhúng sê lhê. ²⁰ Haû mù luî, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

Lumjîng Jâng, Dingmán Sù Wó Dut É Hkyô

²¹ Ahkuî kúm gi, jep é tarâ dông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng má é dingmán hkyô lé, sé nhâng bê nghut ri. ²² Garai Gasâng chyáng má é dingmán hkyô haû gi, Yesuq Hkrisduq lé lumjîng é dông mai nghut mù, lumjîng bang banshoq htoq má jé é nghut lhê. Gamhkuî é hkyô a joq. ²³ Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. ²⁴ Ahkuî kúm gi, Hkrisduq

✧ 3:12 Hkya-on 14:1-3 ✧ 3:13 Hkya-on 5:9 ✧ 3:13 Hkya-on 140:3 ✧ 3:14 Hkya-on 10:7

✧ 3:17 Esai 59:7-8 ✧ 3:18 Hkya-on 36:1

Yesuq mai lo é hkyi yù hkyô dông, Garai Gasâng é jeju êq, mara hkyut san byi é laí laí wó hui bê nghut ri. ²⁵ Garai Gasang gi, Yesuq é sui lé lumjúng bâng matú, shihtai gunglik hkungga ralhumm dông, Yesuq lé byi pyám bê nghut ri. Haù gi, laí lò bê yubak mara lé lhut pyám byi shoq, Garai Gasang myit hng byi bê nghut é yanmai, Yhâng é tengmán hkyô lé tún shit é nghut ri. ²⁶ Garai Gasang haù su kut é gi, Yhânggùng yhang dingmán Sù nghut é eq, Yesuq lé lumjúng é sù lé mara hkyut san byi é Sù nghut rà matú, ahkuí lhê ipyat má, Yhâng é tengmán hkyô lé shit byi é nghut lhê.

²⁷ Haù su nghut jáng, nghutbun jowò joq ri lúhú? A joq. Hai tará mai a joq dut byuq é lúhú? Haù jep é tará châng é yanmai nghut lhê lúhú? A nghut, lumjúng hkyo é yanmai sheq a joq dut byuq é nghut lhê. ²⁸ Hkâsu mù gà le, byù gi, haù jep é tará châng é dông a nghut é za, lumjúng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pè é Garai Gasang za nghut lhê lúhú? Tungbaù pè é Garai Gasang le a nghut lúhú? Nghut lhê, tungbaù pè é Garai Gasang le nghut lhê. ³⁰ Hkâsu mù gà le, Garai Gasang gi, rayuq za nghut é yanmai, rajung za lumjúng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi rà nghut lhê. ³¹ Haù nghut jáng, nga-nhúng gi, lumjúng myit hau êq, jep é tará lé lhoq hpoi pyám rà lúhú? Ratsuí lháng a nghut! Nga-nhúng gi, jep é tará haù lé lhoq ging tng é bang ru nghut lhê.

4

Abraham, Mara Hkyut San Huí É Hkyô

¹ Haù su nghut jáng, nga-nhúng é ichyi íwa Abraham gi, haù hkyô mai haí wó sê yu ri nghú, taí rà lúhú? ² Abraham gi, zui sai é dông mai, mara hkyut san byi huí é ru nghut le gi, yhang nghutbun jang joq rà nghut lhê; nghut kôhang, Garai Gasâng é hí má gi, yhang haù dông a nghut. ³ Chyúmdang má hkâsu gà tò ri lúhú gà le, "Abraham gi, Garai Gasang lé lumjúng bê nghut mù, yhang lé, dingmán sù ga són byi bê nghut ri."* gà ri.

⁴ Zui sai é sù gi, yhâng é zuihpau lé, chyunghuq dông wó yu é a nghut é za, wó yù gíng luí, wó yu é ru nghut lhê. ⁵ Nghut kôhang, zui sai é hkyô dông a nghut é za, haù agè ashop hkyô lé mara hkyut san byi é Garai Gasang lé lumhkau é sù gi, yhâng é lumjúng myit é yanmai, dingmán sù ga són byi huí é nghut lhê. ⁶ Haù eq rajung za, yhang zui sai é hkyô dông a nghut é za, Garai Gasâng eq dingmán sù ga són byi huí é, Garai Gasâng chyáng mà é shimân jeju wó é sù eq séng luí, Dawiq taí é gi,

⁷ "Tará lu laí é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

⁸ Bo tò é mara lé, Yhumsing eq mara a són byi é hui sù gi, hkungsô wó nyi ri."* gà ri.

⁹ Haù sù é jeju gi, ahpyo-kuq hpyit hkâm bâng é matú za nghut lhê lúhú? Ahpyo-kuq a hpyit bâng é matú le nghut lhê lúhú? Hkâsu mù gà le, Abraham é lumjúng myit lé, dingmán sù ga són byi bê nghut lhê nghú, ngamoq taí nyi bê nghut lhê. ¹⁰ Haù su són byi é gi, hkâ-nhám nghut lhê lúhú? Ahpyo-kuq hpyit hkâm é htâng má lúhú? A nghut jáng, hí má lúhú? Haù gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkún mai, lumjúng luí

wó é dingmán hkyô gê é dizik nghut é, ahpyo-kuq hpyit masat lé myang hkam yù bê nghut ri. Haù mù, yhang gi, haù ahpyo-kuq hpyit a hkam yù kôlhang, lumjínj é lhunglhâng bang lé dingmán bang ga sôn byí é wó hui râ matú, haù bâng é íwa dut bê nghut ri. ¹² Haù ahpyo-kuq hpyit hkâm é za a nghut, nga-nhúng é íwa Abraham, ahpyo-kuq hpyit a hkam yù shi má wó é lumjínj hkyô é hkyô-kâm lé cháng luí ahpyo-kuq hpyit bâng é íwa le, yhang nghut ri.

¹³ Míngkân é amyù hkúng xoq pé dut râ ga, Abraham eq yhâng é awut ashín pé lé byi tô é danggidíq gi, jep é tara é yanmai a nghut é za, lumjínj hkyô mai lo é dingmán hkyô dông ru nghut lhê. ¹⁴ Hkâsu mù gê le, jep é tará dông nyi yap é bang gi, amyù hkúng xoq pé nghut é nghut jáng, lumjínj hkyô gi, akyú a bo é eq, danggidíq gi, hpau a dap é dut byuq lhê. ¹⁵ Haù jep é tará gi, nhikmo-yo hkyô lhoq htoq é nghut lhê; nghut kôlhang, jep é tará a joq jáng gi, tará lu lai hkyô le joq râ a nghut.

¹⁶ Haù mù luí, danggidíq gi, Abraham é awut ashín lhunglhâng bâng chyáng, jeju mai za lo é eq gíngtíng nyi é dut sháng gaq ga, lumjínj hkyô mai lo é nghut lhê. Haù gi, jep é tará má lóm bâng é matú baú za a nghut, Abraham é lumjínj hkyô má lóm bâng é matú le nghut lhê. Abraham gi, nga-nhúng lhunglhâng bâng é íwa nghut ri. ¹⁷ "Ngò gi, nang lé, byù myù myo myô é íwa dut nhâng bê."* ga kê tô é eq rajung za, haù shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínj é sù Garai Gasâng hí má, Abraham gi, nga-nhúng é íwa nghut lhê.

¹⁸ "Náng é awut ashín pé le, haù eq rajung za myô lò râ nghut lhê."* ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumjínj luí myoqbyu nyi é nghut mù, byù myù myo myô é íwa dut bê nghut ri. ¹⁹ Yhang gi, rashò zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhúm shibó le shum byuq kôlhang, yhang gi, lumjínj myit a yom byuq nghut ri. ²⁰ Hau htoq agó, Garai Gasâng é danggidíq eq séng luí, a lumjínj a dut é eq hê myit mhô myit a dut é za, yhâng é lumjínj myit lé sai lhoq gíng tíng mù, Garai Gasang lé hkya-on kungtôn luí, ²¹ Garai Gasang gi, Yhang byi tô é danggidíq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga sôn byi bê nghut ri."* gê tô é nghut lhê. ²³ "Yhang lé, sôn byi bê." ga, kê tô é dang gi, yhang é matú za a nghut, ²⁴ nga-nhúng é Yhumsíng Yesuq lé, shi é mai lhoq dui toq yù sù Garai Gasang lé lumjínj luí, Yhang èq dingmán bang ga sôn byi râ nghut é, nga-nhúng é matú le nghut lhê. ²⁵ Yhumsíng Yesuq gi, nga-nhúng é yubak mará é matú, shí hkâm byi râ dông ap pyâm é hui luí, nga-nhúng, mara hkyut san byí é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haù mù luí, nga-nhúng gi, lumjínj é dông mai mara hkyut san byí é hui bê nghut é yanmai, nga-nhúng é Yhumsíng Yesuq Hkrisduq dông, Garai Gasang eq buinùm wó xoq yù bê nghut lhê. ² Yesuq é yanmai, nga-nhúng gi, ahkuí wó yu to bê jeju shí má, lumjínj luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê. ³ Haù za a nghut, nga-nhúng gi, wuìhke jamjau hkyô pé má le gabú gumrong nyi lhê. Hkâsu mù gê le, wuìhke jamjau hkyô gi, hkam jan hkyô lhoq htoq ri; ⁴ hkam

jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haú gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byí tò é Chyoiyúng Woi-nyí đông, nga-nhúng é i-myit unghkaú má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkâm byi bê nghut ri. ⁷ Gê gè ga jáng, dingmán su é matú shí hkâm byi râ byu gi, shau râ nghut lhê; nghut kôlhang, byù gè rayuq é matú kúm gi, wám shí hkâm é byù nyi sê lhê. ⁸ Nghut kôlhang, nga-nhúng gi, yubak dap bang nghut nyi ashí hkún, nga-nhúng é matú Hkrisduq shí hkâm byí é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. ¹⁰ Hkâsu mù gâ le, nga-nhúng gi, Garai Gasâng é gyê pé nghut nyi ashí u le, Yhâng Zo shí hkâm byí é đông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak đông mai, gè gè yhang hkyi yu é hui râ nghut lhê. ¹¹ Haú su za a nghut, nga-nhúng gi, nga-nhúng é Yhumsing Yesuq Hkrisduq đông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shí É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq đông mai, yubak mara gi, mingkan má jé wâng bê nghut luí, shí-nò hkyô gi, yubak mará é yanmai châng jé bê nghut ri; haú đông mai, byù lhunglhang bang gi, yubak dap bang chat nghut byuq mù, shí-nò hkyô gi, byù lhunglhang bâng chyáng jé bê nghut ri. ¹³ Hkâsu mù gâ le, haú jep é tará lé a byi shimá, yubak mara gi, mingkan má joq to bê nghut lhê. Nghut kôlhang, jep é tará a joq shí é hkún gi, yubak mara lé mara su a ngâm shí é nghut lhê. ¹⁴ Haú su ga kôlhang, Adam su hkunmó lé lu laí é đông mara a kut shut bâng é ahtoq má lhang, shí-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlhang, jeju chyunghuq gi, haú mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tará jéyáng é hkyô gi, byù rayuq é mara má châng mù, mara dam byí é hkyô lhoq htoq é nghut lhê; nghut kôlhang, jeju chyunghuq gi, tará lu lai bang myo myo má châng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tará lu lai luí, haú rayuq é yanmai, shí-nò hkyô up nyi bê nghut lhê, ahkuí kúm, haú Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq đông mai, je riyhang asak dui hkyô má uphkanq nyi kó râ nghut lhê.

¹⁸ Haú mù luí, tará lu lai é hkyô ralhúm é yanmai, byù lhunglhang bang gi, mara dam byí é hui zo kô é su, dingmán hkyo é muzó ralhúm é yanmai, byù lhunglhang bang gi, asak dui hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo

gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó rá nghut lhê.

²⁰ Haù jep é tarâ jat é gi, tarâ lu lai hkyô je myo rá matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê.

²¹ Haù mù, yubak mara gi, shî-nò hkyô đông uphkâng bê su, jeju gi, nga-nhung é Yhumsing Yesuq Hkrisduq é yanmai, ahtum abyuq é asak wó byí é dingmán hkyô đông up rá nghut lhê.

6

Hkrisduq Eq Rading Ralhum

¹ Haù nghut jáng, nga-nhung gi, hkâsu nghú tái rá lú? Jeju myô jat lò sháng gaq nghú, nga-nhung, yubak mara kut xoq nyí rá lú? ² Haù su a nghut sháng gaq! Nga-nhung gi, yubak mara eq shi gang bê bang nghut lhê; hkâsu mù haù má wó dui nyí lo rá lú? ³ Hkrisduq Yesuq eq rading ralhum za dut rá matú, wui-myhup hkâm yù bê bang nga-nhung banshoq gi, Yhâng é shí hkám hkyô má le rading ralhum za dut rá matú, wui-myhup hkâm yù bê nghut é lé, nungmoq a sé kó lú? ⁴ Haù mù luí, Hkrisduq gi, Íwâ é hpungwup shingkâng eq, shí bê mai lhoq dui toq huí é su, nga-nhung le, asak asik đông wó dui nyí sháng gaq nghú, nga-nhung gi, wui-myhup hkâm é đông, Yhang eq rahá, shí hkâm é eq myhup yhum é hui bê nghut lhê.

⁵ Nga-nhung gi, Yhang shí hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut rá nghut lhê. ⁶⁻⁷ Hkâsu mù gâ le, shí bê sù gi, yubak mara mai lhoq lhut é hui bê nghut é yanmai, nga-nhung gi, yubak mara é jùn dut nó a ra lo mù luí, yubak mara gùng gi, lhoq htên pyâm é hui rá matú, nga-nhung é byù xau gi, Yhang eq rahá jén sat pyâm é hui bê nghut é hkyô lé, nga-nhung sê lhê.

⁸ Haù mù, nga-nhung gi, Yhang eq rahá shí hkám bê nghut jáng, Yhang eq rahá dui nyí rá nghut lhê nghú, lumjúng lhê. ⁹ Hkâsu mù gâ le, Hkrisduq gi, shí bê mai lhoq dui toq é hui bê nghut mù, Yhang gi, dum wó shí lo rá a nghut é lé, nga-nhung sê lhê; shî-nò hkyô gi, Yhang lé hkâ-nhám le wó sing to rá a nghut lo. ¹⁰ Yhang shí hkâm é shî-nò hkyô gi, banshoq bâng é matú, yubak mara eq séng luí radàm za shí hkám byí bê nghut ri; nghut kôlhang, Yhang dui nyí é asak gi, Garai Gasâng hí má dui nyí é nghut lhê.

¹¹ Haù eq rajung za, nungmoq gi, yubak mara eq shi gang luí, Hkrisduq Yesuq đông Garai Gasâng é matú asak dui nyí lhê nghú, sôn yù keq. ¹² Haù mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyo é chùng zè pé đông yubak mara má hkâ-ap byí pyâm kó, shí bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byí keq; nungmoq é gungdu showui showang pé lé, dingmán hkyo é chùng zè pé đông, Garai Gasâng chyáng ap byí keq. ¹⁴ Hkâsu mù gâ le, nungmoq gi, jep é tarâ hkaù má a nghut ló é za, jeju hkaù má nghut nyí bekô yanmai, yubak mara gi, nungmoq lé sîng sù wó dut rá a nghut lo.

Dingmán Hkyo É Jùn Pé

¹⁵ Haù jáng gi, hkâsu kó lú? Nga-nhung gi, jep é tarâ hkaù má a nghut lo é za, jeju hkaù má nghut nyí bekô yanmai, mara wó kut shut kó rá lú? Haù su a wó kut! ¹⁶ Nungmoq gi, rayuq yuq é jìno gyo rá matú, yhumsing gùng lé jùn

pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jino gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lhu? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklum banshoq eq châng bekô nghut é yanmai, Garai Gasang lé jeju hkyo-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agé ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoiyúng hkyô wó yû râ matú, haû pé lé, dingmán hkyô má jùn dông ap byi keq. ²⁰ Nungmoq gi, yubak marâ é jùn dut nyi kô é hkûn, dingmán hkyo eq uphkan é mai lut nyi kô é nghut lhê. ²¹ Ahkuí, nungmoq hocjung nghu wú htoq é pé gi, haû u lé, hai akyû wó yû kô é lhu? Hau pé gi, shi byuq é má htûm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wui è, ngò gi, tarâ lé sê é bang nungmoq lé tái nyi lhê: haû tarâ gi, byu rayuq lé, yhang, asak dui nyi é u lé za wó uphkan é lé, nungmoq a sé kó lhu? ² Dangké, ikun wàng bê myiwe myhi rayuq gi, yhang é yhumsing hpó asak dui nyi é ahkying má, tarâ eq up zing tô é hui ri; nghut kôlhang, yhang é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri. ³ Haû nghut é yanmai, yhang é yhumsing hpó asak dui nyi ashî u lé, yuqgê góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haû mai lut bê nghut lui, yuqgê góyuq eq hâng lhum kôlhang, sulàng lú sù a nghut lo.

⁴ Haû mù lui, ngá é gumang wui è, nungmoq le, haû shi byuq é mai lhoq dui toq yû hui bê sù Yuqgê chyáng wó xoq mù, nga-nhúng gi, Garai Gasang lé ashî wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kâ tô é hkyô xau dông a nghut é za, Woi-nyi é hkyô sik dông nga-nhúng dojaû nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu tái râ lhu? Jep é tarâ gi, yubak mara nghut lhê lhu? Ratsui lhang a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq

myit hkâbô"^{*} ga jep é tarâ má a tai tô é nghut jáng, myoqnoq é hkyô lé, ngò sé rá a nghut. ⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkanmó lhoq htoq byí ri; hkâsu mù gà le, jep é tarâ hkaú má a nghut jáng, yubak mara gi, shi é za nghut lhê. ⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haú hkunmó htoq lô jáng, yubak mara gi, dui lô mù, ngò gi, shi bê nghut lhê. ¹⁰ Haú mù luí, asak dui nhang rá matú nghut é hkunmó haú gi, shi-nò hkyô dut byuq é lé, ngò wó sê é nghut lhê. ¹¹ Hkâsu mù gà le, yubak mara gi, hkunmó é ahkáng lé chùng mù, ngo lé mhaú yù luí, hau èq ngo lé shi nhang ri. ¹² Hau pé lé wú jáng, jep é tarâ gi, choyiýung ri; haú hkunmó gi, choyiýung, dingmán é eq ge é nghut ri.

¹³ Haú nghut jáng, ge é hkyô haú gi, ngá é matú shi-nò hkyô dut byuq bê lhú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rá matú, haú ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhung sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê. ¹⁵ Ngò hai kut nyi é hkyô lé, ngò a sé. Hkâsu mù gà le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haú jep é tarâ ge é lé, ngò myit hui é nghut lhê. ¹⁷ Ahkuí gi, haú lé ngò yhang kut nyi é a nghut lo, ngò má lúng tô é haú yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô hai le a bo é lé, ngò sê lhê. Hkâsu mù gà le, ge é hkyô lé kut nau é myit ngò má bò kôlhang, haú lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haú lé ngò yhang kut nyi é a nghut lo é za, ngò má lúng tô é haú yubak sheq haú lé kut nyi é ru nghut lhê.

²¹ Haú mù, ge é hkyô lé ngò kut nau é hkún, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gà le, ngò gi, Garai Gasâng é tarâ lé, ngá é i-myit unghkaú má myit nguí gabú nyi lhê. ²³ Nghut kôlhang, ngá é gungdu showui showang pé má bo é gotú tarâ gi, ngá é i-myit tarâ eq majan zân lhum é nghut luí, ngá é gungdu showui showang hkaú má mù zui nyi é yubak é tarâ má, ngo lé shúmbyú dut nhang é lé, ngò myang ri. ²⁴ Ngò gi, shogyo rayhup dut sú nghut ri-nhung! Shí nhang é gungdu shí mai, ó yuq wá, ngo lé wó hkyi yù rá lhú? ²⁵ Nga-nhung é Yhumsing Yesuq Hkrisduq đông mai wó lut bê nghut mù, Garai Gasang lé jeju hkya-ôn nyi lhê!

Haú mù luí, ngò yhang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

8

Haú Woi-nyí Mai Asak Dui É Hkyô

¹ Haú mù luí, ahkuí, Hkrisduq Yesuq má nghut nyí băng é matú gi, mara byí é hkyô a joq lô é nghut lhê. ² Hkâsu mù gà le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shi-nò hkyô é tarâ mai, ngo lé lhoq lhut yù bê nghut lhê. ³ Haú jep é tarâ gi, yubak gungshô é yanmai,

wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gunghkyâng đông, Yhang Zo sîng lé nhang kat é đông kut pyám bê nghut ri. ⁴Haù mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhúng má, haù jep é tará má bo é hkyô pé lé, wó lhoq dik râ matú, gungsho ralhúm má, mara lé doqdán pyám bê nghut ri.

⁵Haù yubak gungsho đông asak dui é bang gi, gungsho yut yut ô nau é hkyô pé lé myit zuq nyi akô; haù Woi-nyí đông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶Haù yubak byu é myit gi, shi é hkyô nghut ri; haù Woi-nyí eq hkang to huí su é myit kúm gi, asak eq nguingón hkyô nghut ri. ⁷Haù yubak myit gi, Garaí é tará ô má a nyi é htoq agó, haù lé a wó cháng kut é yanmai, Garaí é gyè nghut ri. ⁸Haù yubak gungshô èq hkang tô é hui bang gi, Garai Gasang lé a wó gabú nhâng kó nghut ri.

⁹Nghut kôle, Garai Gasâng é Woi-nyí gi, nungmoq chyáng lúng nyi bê nghut jáng, nungmoq gi, haù yubak gungshô èq hkang to huí é bang a nghut lô é za, Woi-nyí eq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰Nghut kôlháng, nàng má Hkrisduq nyi nyi é nghut jáng, nàng é gungdu gi, yubak mará é yanmai shi kôlháng, nàng é woi-nyí gi, dingmán hkyo é yanmai dui nyi ri. ¹¹Hau htoq agó, Yesuq lé shi é mai lhoq dui toq yú Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yú Sù gi, nungmoq má nyi nyi é, Yhâng é Woi-nyí đông mai, nungmoq é, shi sé é gungdu pé lé le, asak dui nhâng râ nghut lhê.

¹²Haù mù luí, Gumang wui ê, nga-nhúng gi, yubak gungsho đông asak dui râ matú, wò wó é bang a nghut. ¹³Hkâsu mù gâ le, haù yubak gungsho đông asak dui kô é nghut jáng, nungmoq gi, shi râ nghut lhê; nghut kôlháng, haù gungshô é shut shai hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. ¹⁴Garaí Gasâng é Woi-nyí eq shui u é hui bang gi, Garaí Gasâng é yhangzô pé nghut lhê. ¹⁵Hkâsu mù gâ le, nungmoq gi, gyuq râ matú, nungmoq lé jùn dum taù dut nhang é woi-nyí lé, a hap yu é za, nga-nhúng lé zo yin yu é Woi-nyí lé hap yu tô é bang ru nghut lhê; haù mù, nga-nhúng gi, Yhang é yanmai, "Aba, * Áwa ê" nghú wut é nghut lhê. ¹⁶Nga-nhúng gi, Garaí Gasâng é yhangzô pé nghut é lé, Woi-nyí haù gi, nga-nhúng é woi-nyí eq rahá saksé hkâm nyi ri. ¹⁷Ahkuí, nga-nhúng gi, zo wui nghut bê yanmai, Hkrisduq eq rahá, Garaí Gasâng é amyù hkúngxoq pé wó dut é nghut lhê. Nga-nhúng gi, Hkrisduq é wuihke jamjau pé lé, gè gè yhang bo hui zô é nghut jáng, Yhâng é hpungwup shingkang lé le, bo myang hkam yu rà nghut lhê.

Htângnùng Lhê É Hpungwup Shingkang

¹⁸Nga-nhúng é ahkuí lhê é wuihke jamjau hkyô pé gi, nga-nhúng lé shit râ nghut é hpungwup shingkang eq whui râ a gingdán nghú, ngò wó myit ri. ¹⁹Haù hpan to huí é lhunglhang gi, Garaí Gasâng é yhangzô pé lé lhoq htoq shit byi râ lé, gyai yhang myit láng nyi akô nghut ri. ²⁰Hkâsu mù gâ le, haù hpan to huí é lhunglhang gi, akyú a bo é chyat dut byuq bê nghut ri. Haù gi, yhumsing hkyin yu é đông a nghut é za, haù su dut nhâng Sù ô nau é đông kut é nghut ri. ²¹Haù hpan to huí é lhunglhang gi, htên byoq byuq râ matú shúm

* 8:15 Aba gâ é gi, Aramaik dang đông "áwa" gâ é lichyúm nghut lhê.

dut é mai lhoq lhut é hui lui, Garai Gasâng é yhangzo pê é hpungwup bo é luthkyô má wó wâng râ matú, myoqbyu tô é nghut lhê.

²² Haù hpan to huí é lhunglhang gi, ahkuí hkying jé shoq, zohkû-nò no é su nò-kying kyíng nyí kô é lé, nga-nhung sê lhê. ²³ Haù pé za a nghut, Woi-nyí é sâng-hi ashi† lé wó yú bê bang nga-nhung le, zo pé dông yín yu é jeju lé láng uchyang, i-myt unghkaù má nò-kying kyíng é nghut lhê. Zo pé dông yín yu é jeju haù gi, nga-nhung é gungdu hkyi xe yù hkyô nghut lhê. ²⁴ Hkâsu mù gà le, nga-nhung gi, myit myoqbyù hkyô haù mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsui le a nghut. Yhumsing myang to bê é lé, ó yuq wá myit myoqbyù shirâ lú? ²⁵ Nghut kôlhang, nga-nhung gi, a wó shí é lé myit myoqbyu é nghut jáng, myit hîng hîng kut láng é nghut lhê.

²⁶ Haù eq rajung za, Woi-nyí gi, nga-nhung wum nyhôm é hkyô má garúm byí ri. Nga-nhung gi, haí dung râ é lé a sé kôlhang, haù Woi-nyí yhang gi, dang mai a wó tai htoq é nò-kying htê dông, nga-nhung é matú bo dúng xoq byí ri.

²⁷ Nga-nhung é i-myt unghkaù lé gôn wú é Sù gi, haù Woi-nyí myit é hkyô lé sê lhê, hkâsu mù gà le, haù Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù lui, Yhang lé chyitdap bâng é matú, lhunglhang lé ge é dông chyat kut é hkyô lé, nga-nhung sê lhê. ²⁹ Hkâsu mù gà le, Yhang Zo gi, gumang wui myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shingkanng bò nhang ri.

³¹ Haù jáng gi, shí hkyô eq séng lui, nga-nhung hai tai shirâ lú? Garai Gasang gi, nga-nhung hkyam shut nghut jáng, nga-nhung lé, ó yuq wá gyê wám kut râ lú? ³² Yhumsing é Yhangzo lé lhang a ha bún é za, nga-nhung banshoq bâng é matú ap byí pyám é Sù gi, Yhang lé le, lhunglhang lé le, rahá lai lai byi râ a nghut lú? ³³ Garai Gasâng èq hkyin yu to bê bang lé, ó yuq wá mara wó hún râ lú? Garai Gasang gi, mara hkyut san byi Sù nghut ri.

³⁴ Hkrisduq Yesuq gi, shí hkâm lui, shí hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyí lui, nga-nhung é matú bo dúng xoq byí nyi bê nghut é yanmai, ó yuq wá mara wó byi râ lú?

³⁵ Hkrisduq é chyitdap myit mai, nga-nhung lé, hai eq wá wó lhoq kang râ lú? Gunjang hui é hkyo eq luq? Wuihke hui é hkyo eq luq? Zing-ri hui é hkyo eq luq? Mutmó hui é hkyo eq luq? Gùng chin dut hui é hkyo eq luq? Gyuq jung eq luq? Sham eq luq? ³⁶ Haù gi,

"Náng é yanmai, ngamoq, nyí wui sat pyám é hui nyi ri;

sat râ matú nyhi tô é sau pé lé su, ngamoq lé myit pyám akô."^{*}

ga kâ tô é eq rajung za nghut ri. ³⁷ A wó lhoq kang; nga-nhung lé chyitdap Su é yanmai, nga-nhung gi, haù pé banshoq lé je wó ung pyám é nghut lhê. ³⁸ Hkâsu mù gà le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haí jung a-tsam pé nghut kôlhang, ³⁹ htoq tsáng mã é nghut

† 8:23 Woi-nyí é sâng-hi ashi gà é gi, Woi-nyí gi, Garai Gasang byí é chyunghuq pé mã é sâng-hi lhum nghut lhê. * 8:36 Hkya-on 44:22

kôlhang, a-ô tsáng mâ é nghut kôlhang, hpan tô é gotú haí nghut kôlhang, nga-nhúng é Yhumsing Hkrisduq Yesuq má bo é Garai Gasâng é chytidap myit mai, nga-nhúng lé wó lhoq kang pyám râ a nghut nghú, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuí, ngò gi, Hkrisduq má tengmán é dang taí râ; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri. ² Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhúng é hui luí Hkrisduq eq gang le lháng gè râ su gâ ri. ⁴ Haú bang gi, Israelaq byu pé nghut lhê. Zo yín yú huí é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhùm má noqkuq é hkyô le, danggididq pé lé le, yhangmoq wó yu akô nghut ri. ⁵ Haú mying hú é íchýí íwâ pé gi, yhangmoq é íchýí íwâ pé nghut luí, byu é hkyam dòng gon jáng, Hkrisduq gi, yhangmoq amyú mâ é nghut ri. Yhang gi, lhunglháng lé up é, ahtum abyuq hkya-on huí é Garai Gasang nghut ri! Amen.

⁶ Haú gi, Garai Gasâng é danggididq akôm dut byuq bê nghú nau é a nghut. Hkâsu mù gâ le, Israelaq byu pé banshoq bang gi, Israelaq byu akying chyat a nghut kó nghut ri. ⁷ Abraham é awut ashín banshoq bang gi, yhâng é zo wuí akying chyat nghú a wó taí é nghut lhê. Hau é malaí, "Isak dòng mai lo é lé, náng é awut ashin nghú són byi râ nghut lhê."* gâ tô ri. ⁸ Radông taí sháng ga jáng, gungsho mai hku é zo wuí gi, Garai Gasâng é zo wuí akying a nghut kó, danggididq eq sêng é zo wuí za sheq, Abraham é awut ashín pé dòng són byí é nghut lhê. ⁹ Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkú râ nghut lhê."* ga taí tô é danggididq é yanmai nghut lhê.

¹⁰ Haú za a nghut, Rebeka é yhangzô nhiktang é íwa gi, nga-nhúng é íwa nghut su Isak rayuq za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yú Su é yanmai nghut é lé, wó gíng nyi sháng gaq ga, haú zozùm nhik a hku lé shí é htoq agó, ge é eq a ge é muzó haí lháng a kut shimá, "Haú ko sù yuq gi, tiq sù yuq lé dojaú râ nghut lhê."* ga, Rebeka lé taí kyô tô é nghut lhê. ¹³ Haú gi, "Yakup lé, ngò chytidap lhê, nghut kôlhang, Eso lé gi, a ngui é nghut lhê."* ga kê tô é eq rajung za nghut ri.

¹⁴ Haú nghut é yanmai, nga-nhúng hkâsu nghú taí râ? Garai Gasang gi, a tarâ é sù nghut lhê lhu? Ratsuí lháng a nghut! ¹⁵ Hkâsu mù gâ le, "Ngò, shogyo nhikmyin nau sù lé, shogyo nhikmyin râ nghut lhê;

Ngò, jeju byi nau sù lé, jeju byi râ nghut lhê."*

ga, Mosheq lé Yhang taí ri. ¹⁶ Haú mù luí, haú hkyin yu é hkyô gi, byú yut yut ó nau é yanmai le a nghut, shikut é yanmai le a nghut, Garai Gasâng é shogyo nhikmyín é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tún shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê."* ga, Hpara-uq lé taí ri. ¹⁸ Haú mù luí, Garai Gasang gi, shogyo nhikmyin nau sù lé, shogyo nhikmyin mù, myit lhoq htân byi nau sù lé, myit lhoq htân byi ri.

¹⁹ Nungmoq mâ é rayuq yuq, "Haù jáng, Garai Gasang gi, ngamoq lé haì mù mara hun nyi ashí lúh? Yhang ô nau é hkyô lé, ó yuq wá wó hkùm pyâm lhê lúh?" ga, ngo lé taí kó rá nghut lhê. ²⁰ Nghut kôlhang, Garai Gasang lé dang tu sù byù nàng gi, ó yuq wá nghut lhê lúh? Saì to hui bê é zè pé gi, "Nàng, haì mù ngo lé shí su kut saì tô lhê lúh?" nghù saì é Sù lé wó taí rá lúh? ²¹ Tso-au saì sù gi, tsohtung ralhùm mai za, hkik é tso-au pé eq a hkik é tso-au pé saì rá ahkáng wó lhê a nghut kô lúh?

²² Garai Gasang gi, Yhâng é nhikmo-yo hkyô tùn shit luí, Yhang é a-tsam lé sé nhâng naù kôlhang, htên byoq rá matú hen tô é, nhikmo-yo gíng é tso-au pé lé, myit hìng hìng shirang pyâm nyi é hkyô lé, taí rá jang haì joq ashí lúh? ²³ Hpungwup shìngkâng é matú noq mai hen to bang nghut é, Yhang shogyo nhikmyin hui é bang lé, Yhâng é agùn agó é hpungwup shìngkang lé sé nhâng naù mù, Yhang haù su kut é nghut jáng, taí rá haì joq ashí lúh? ²⁴ Haù bang gi, Yudaq byu pé mai za a nghut, tũngbaù pé mai le jì yù hui é bang nga-nhúng nghut lhê. ²⁵ Haù eq rajung za, Hosea laiká má Yhang taí tô é gi, "Ngá é byù myù a nghut é bang lé, 'Ngá é byù myù' nghù;

Ngò a chyt é byizo lé 'Ngò chyt sù' nghù wut rá nghut lhê." ✧
gâ ri. ²⁶ Haù mù,
"Nungmoq gi, ngá é byù myù pé a nghut." nghù yhangmoq lé taí é jowò má yhang,
yhangmoq gi, 'Rù dui nyi é Garai Gasang yhangzô pé' ga wut é hui kó rá nghut lhê." ✧

gâ ri.
²⁷ Esai-aq le, Israelaq byu pé eq séng luí garu taí é gi,
"Israelaq yhangzo yhangshù pé gi, wuìshuq lung-aù yàm mâ é semuì su myo kôlhang,

myit gyó tô é bang za sheq hkyi yu é hui kó rá nghut lhê.

²⁸ Hkâsu mù gâ le, haù Yhumsing gi, myidàm htoq má Yhâng é tará jéyáng hkyô lé hân hân lhoq dik lhoq htùm pyám rá nghut lhê." ✧
gâ ri.

²⁹ Haù eq rajung za, hí lé Esai-aq taí tô é gi,
"A-tsam dik shoq bò sù haù Yhumsing za, nga-nhúng lé, awut ashín a myhit to byí é nghut jáng,
nga-nhúng gi, Sodom wà su dut byuq luí, Gomoraq myuq eq pung byuq rá nghut lhê." ✧

gâ ri.

Israelaq Byu Pé A Lumjìng Kô É Hkyô

³⁰ Haù mù, nga-nhúng hkâsu nghù taí rá lúh? Dingmán hkyô lé a châng hkat é tũngbaù pé gi, haù lé wó yù bekô; haù gi, lumjìng hkyo é yanmai wó yu é dingmán hkyô nghut ri. ³¹ Nghut kôlhang, tará eq séng é dingmán hkyô lé châng hkat é Israelaq byu pé gi, haù lé a wó yù kó nghut ri. ³² Haì mù a wó yù kô é lúh? Yhangmoq gi, lumjìng myit eq châng hkat kô é a nghut é za, muzó pé eq châng hkat kô é yanmai, a wó yù kô é nghut ri. Yhangmoq gi, "htung htê rá luqgok" má htùng leng bekô nghut ri. ³³ Haù,
"Wú keq, htùng leng rá luqgok eq myit leqbat nhâng rá luqmó cham lé, Ngò, Zi-un bùm má lheq to luí,
Yhang lé lumhkaù sù gi, hkâ-nhám le hoq hpu é hui rá a nghut." ✧

ga kâ tô é eq rajung za nghut ri.

10

¹ Gumang wui ê, ngò gi, haù Israelaq byu pé hkyi yu é hui kó sháng gaq nghù, gyai yhang myit shirông luí, Garai Gasâng chyáng yhangmoq é matú kyúdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é đông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaù má a nyi kó nghut ri. ⁴ Hkrisduq gi, lumjúng bang yuq hkangmó, dingmán é má wó jé kó sháng gaq ga, jep é tarâ ló htùm jang dut bê nghut ri.

⁵ Mosheq gi, "Haù pé đông châng é sù gi, haù pé mai asak dui rà nghut lhê."* ga, jep é tarâ eq sêng é dingmán hkyô lé kâ sân kyô tô é nghut lhê. ⁶ Nghut kôlhang, lumjúng hkyô eq sêng é dingmán hkyô gi, "Náng é myit nhiklhum má, 'Mauhking má, ó yuq doq ló rà lú?'"* (Haù gi, Hkrisduq lé shui gyó lò rà gá nau é nghut lhê), ⁷ haù a nghut jáng, "Nik é jang má, ó yuq gyó wàng rà lú?*" (Haù gi, Hkrisduq lé, shi é mai dui toq nhâng rà gá nau é nghut lhê.), nghù hkâtaí kó." gâ tô ri. ⁸ Haù jáng, hkâsu gâ tô ri lú? "Haù mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."* gâ tô ri. Haù gi, ngamoq hko taí é lumjúng hkyô eq sêng é mungdang nghut lhê. ⁹ Haù mù, "Yesuq gi, Yhumsing nghut ri." nghù náng é nhut eq yín yù mù, Garai Gasang gi, Yhang lé, shi é mai dui toq nhâng bê nghut lhê nghù, náng é myit nhiklhum má lumjúng é nghut jáng, nàng gi, hkyi yu é hui rà nghut lhê. ¹⁰ Hkâsu mù gâ le, byù gi, myit nhiklhum má lumjúng jáng, mara hkyut san byí é hui mù, nhut mai yín yù jáng, hkyi yù hui é nghut lhê. ¹¹ Haù Chyúmdang taí é gi, "Yhang lé lumhkau é sù ó yuq le, hkâ-nhám lhang hoq hpú é hui rà a nghut."* gâ ri. ¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byí ri. ¹³ Hkâsu mù gâ le, "Haù Yhumsing é myìng lé llang é bang yuq hkangmó gi, hkyi yu é hui rà nghut lhê."* gâ tô ri.

¹⁴ Haù nghut lé gi, yhangmoq a lumjúng é sù lé nhing, hkâsu wó wut dung kó rà lú? Yhangmoq a wó gyô wú é sù lé nhing, hkâsu wó lumjúng kó rà lú? Hko kyô é sù a nyi le nhing, hkâsu wó gyo kó rà lú? ¹⁵ Nhang kat é a hui le gi, yhangmoq hkâsu kut wó hko kyo kó rà lú? Haù eq rajung za, "Gabú danglù pé hko kyo bâng é hkyi-kám pé gi, hkâ-í yhang yúng ri myhi-nhung!"* ga kâ tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing é, ngamoq é danglù lé ó yuq wá lumjúng é lú?*" ga taí ri. ¹⁷ Haù nghut mù luí, lumjúng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haù eq rajung za, "Yhangmoq é htê gi, myidàm htôq banshoq má jàm bê nghut ri;

* 10:5 Nhong 18:5 * 10:6 Tarâ Pun 30:12 * 10:7 Tarâ Pun 30:13 * 10:8 Tarâ Pun 30:14

* 10:11 Esai 28:16 * 10:13 Yol 2:32 * 10:15 Esai 52:7 * 10:16 Esai 53:1

yangmoq é mungdang pé gi, mingkan htungchyûn hkangmó má jé bê nghut ri."[☆]
 gâ tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má taí é gi,
 "Byù rahú lháng a nghut bang èq, Ngò, nungmoq lé manôn nhâng rã;
 sê gyo nyan a bo é amyù èq, Ngò, nungmoq lé wú nhik-yo nhâng rã nghut lhê."[☆]
 gâ ri. ²⁰ Hau htoq agó, Esai-aq a gyuq a wàm taí é gi,
 "Ngo lé a ho é bang gi, Ngo lé myang hô bekò nghut ri;
 Ngá hkyô lé a myí é bang lé, Ngò htoq shit bê nghut lhê."[☆]
 gâ ri. ²¹ Nghut kôlhang, Israelaq byu pé eq séng luí, Yhang taí é gi,
 "Ngò gi, jìno a gyô é eq ngegáng-htu é byù myú lé, nyí wuí Ngá loq lham mù ji nyi lhê."[☆]
 gâ ri.

11

Israelaq Byu Pé Lé A He-ngik Pyám

¹ Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lháng a nghut! Ngò yang le, Israelaq byù myú nghut luí, Abraham é awut ashín eq Ben-yamyin hú má é sù nghut lhê. ² Garai Gasang gi, Yhang te sê to gú nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasang é hí má, yang, Israelaq byu pé lé mara hún é gi, ³ "Yhumsing é, yangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akò nghut ri; ngò rayuq za myit gyó tô é nghut luí, ngo lé sat rã matú le yangmoq ho nyi akò nghut ri."[☆] gâ ri. ⁴ Garai Gasang gi, yang lé, hkâsu ga tú taí é nghut lhê lú? Haù gi, "Balaq hpara é hí má hkyihput a htuq shí é byù nyhit hkying lé, Ngá é matú myhit to lhê."[☆] gâ é nghut lhê. ⁵ Haù eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó đông ru nghut le gi, jeju gi, jeju a nghut lo.

⁷ Haù nghut jáng, hkâsu lú? Israelaq byu pé gyai ho shikut kôlhang, a wó kô é lé, hkyin htoq yù huí é bang kúm gi, wó bekò nghut ri. Góbang gi, myit lhoq htân byí é hui akò nghut ri; ⁸ haù gi,

"Garai Gasang gi, hkù-nyí jé shoq, yangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."[☆]
 ga kâ tô é eq rajung za nghut ri. ⁹ Dawiq taí é le,

"Yhangmoq é zangbó gi, yangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

¹⁰ Yangmoq myoq a wó myâng shoq, myoqjí lhoq chut pyám byí é hui sháng gaq;

yangmoq é nunghkúng gi, ayang wòlai wun goí nhang é hui sháng gaq."[☆]

gâ ri.

Tungbaù Pé Lé Hkyi Yu É Hkyô

11 Ngò dum myi kó lé: Israelaq byu pé gi, a wó dum gè rà í leqbat byuq bekò lúh? Ratsuí lhang a nghut! Yhangmoq é tará lu lai hkyo é yanmai, yhangmoq lé manón nhâng rà matú, hkyi yù hkyô gi, tûngbaù pé chyáng jé byuq é nghut lhê. 12 Nghut kôlhang, yhangmoq é tará lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pé é matú wó sùt hkyô dut é nghut jáng, yhangmoq é bying jup hkyô gi, je riyhang kô é wó sùt hkyô dut rà nghut ri-nhung!

13 Nungmoq tûngbaù pé lé ngò taí nyi lhê: ngò gi, tûngbaù pé é lagyo nghut nyi é u má, ngá é hpungmù lé hpautap nyi lhê. 14 Haù gi, ngá é amyù pé lé manón myit wó bô nhâng mù, yhangmoq ra-am lé wó hkyi yù rà lé myit myoqbyu é hkyô nghut lhê. 15 Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xòq hkyô dut bê nghut jáng, yhangmoq lé dum hap yu é hkyô gi, shi é mai duì toq é dông dut bê a nghut lhi? 16 Hau htoq agó, sâng-hí ashí dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

17 Haù tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xòq é hui mù, haù tsanlun amyit é xù lé bo shuq lom é nghut jáng, 18 akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuq é a nghut é za, amyit haù sheq nungmoq lé htuq é hkyô lé, nungmoq myit sé keq. 19 Nungmoq kúm gi, "Ngò, haù má xòq é hui rà matú sheq, akoq haù pé gi, lhoq hkyui pyâm é hui é ru nghut lhê." ga taí rà nghut lhê. 20 Haù su gi, nghut lhê. Nghut kôlhang, yhangmoq gi, a lumjîng é yanmai, lhoq hkyui pyâm é hui kômù, nungmoq kúm gi, lumjîng é yanmai, wó ging tîng nyi é nghut lhê. Hká gumrong nyi, gyuq kyum nyi keq. 21 Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun rà a nghut.

22 Haù mù luí, Garai Gasang é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyâm kôlhang, nungmoq gi, Yhâng é shogyo nhikmyin hkyô má xòq nyi nyi é myháng, nungmoq lé gi, shogyo nhikmyin nyi rà nghut lhê. Haù a nghut jáng, nungmoq le, zân hpyit pyâm é hui rà nghut lhê. 23 Yhangmoq gi, a lumjîng hkyô lé tô pyâm kô é nghut jáng, dum xòq yu é hui kó rà nghut lhê; hkâsu mù gâ le, Garai Gasang gi, yhangmoq lé dum wó xòq yu é Sù nghut lhê. 24 Haì mù gâ le, yosô tsanlun gàm akoq nghut gù nungmoq lé hpyit yù mù, htông a nghut é dông, hō é tsanlun agàm má xòq é nghut le gi, haù akoq akying pé nghut é yhangmoq gi, ó le ó é tsanlun-ngut akying má xòq yu é lé je riyhang hui rà nghut lhê ô!

Israelaq Byu Pé Hkyi Yu É Hui Râ Hkyô

25 Haù mù, gumang wuì ê, nungmoq a nghutbun kó sháng gaq nghù, zau tô é hkyô shi lé, nungmoq a sé dut rà lé, ngò a ô nau é nghut lhê: haù gi, tûngbaù pé wang lo é laké bying é hkûn jé shoq, Israelaq byu pé ra-am gi, myit lhoq htan é hui é hkyô nghut lhê. 26 Hau htâng sheq, Israelaq amyù banshoq bang hkyi yu é hui rà nghut lhê. Haù gi, "Hkyi yù Sù gi, Zi-un bùm mai htoq lô rà nghut lhê; Yhang gi, Garai lé nunghtâng tô pyâm é hkyô lé, Yakup é awut ashín mai hui sêng pyâm byi rà nghut lhê.

* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê.

²⁷ Ngò, yhangmoq é yubak mara lé huí sêng pyám byi jáng,
 haú gi, yhangmoq lé Ngò byí tô é Ngá é dangshikaq nghut lhê."[✧]
 ga kê tô é eq rajung za nghut ri.

²⁸ Haú gabú danglù eq séng luí ga jang, yhangmoq gi, nungmoq é matú gyè
 nghut akò; nghut kôlhang, hkyin htoq yú hkyô eq séng luí ga jang, yhangmoq
 gi, myíng hù é ichyí íwa pé é yanmai, chytidap é huí akò nghut ri; ²⁹ hkâsu
 mù gà le, Garai Gasâng é chyunghuq pé eq Yhang ji yu é hkyô lé gi, wó
 htaí lhek pyám é a nghut. ³⁰ Nungmoq gi, Garai Gasâng é jìno a gyô é bang
 radàm dut wú kô é nghut kôlhang, yhangmoq jìno a gyô é yanmai, ahkuí kúm,
 shogyo nhikmyin hkyô wó hkam yú bekò nghut é su, ³¹ ahkuí, yhangmoq gi,
 nungmoq wó hkam yu é Garai Gasâng é shogyo nhikmyin hkyo é yanmai,
 shogyo nhikmyin hkyô lé wó hkam yú kó sháng gaq ga, yhangmoq le, ahkuí,
 jìno a gyo bang dut bekò nghut ri. ³² Hkâsu mù gà le, Garai Gasang gi, byú
 lunglhang bang lé, shogyo nhikmyin hkyô wó tún shit shoq ga, lunglhang
 bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan
 hpaqchyí gi, hkâ-i yhang nik ri-nhung!

Yhâng é tará jéyáng hkyô gi, ung sê jung a nghut nhung!

Yhang kut é hkyô pé gi, hkâ-i yhang ho htoq wú jung nghut ri-nhung!

³⁴ "Haú Yhumsing é myit lé, ó yuq wá ung sê lhê lúhú? Yhâng é hpaqchyí byi
 sù gi, ó yuq wá dut wú é lúhú?"[✧]
 gâ ri.

³⁵ "Garai Gasâng èq jeju dum tau byi râ dut shoq, ó yuq wá, Garai Gasang lé
 byí wú é lúhú?"[✧]
 gâ ri.

³⁶ Hkâsu mù gà le, joq mijoj gi, Yhâng chyáng mai nghut mù, Yhang đông mai
 nghut luí,

Yhâng é matú chyat nghut ri. Haú hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haú mù luí, gumang wui ê, nungmoq é gungdu pé lé, Garai Gasang myit
 ngui ô nau é eq chyoyúng é, dui é hkungga đông nhông byi keq nghú, Garai
 Gasâng é shogyo nhikmyin hkyô mai, ngò, nungmoq lé wum byí kat lhê. Haú
 gi, woi-nyí hkyô đông nungmoq noqkuq dojaú é hkyô nghut lhê. ² Mingkan
 shí lhum é sâmlai đông a cháng lo é za, myit sik wó yú râ đông nungmoq é
 a-kyang lé htaí pyám byi nhâng keq. Haú hkún sheq, Garai Gasâng é ge é,
 myit ngui é eq gumjup é ô nau hkyô lé, nungmoq wó chyâm, wó sê gàm hkoq
 yú kó râ nghut lhê.

³ Hkâsu mù gà le, ngo lé byí tô é jeju yanmai, nungmoq yuq hkanmó lé
 ngò taf kôlé: nungmoq gi, yhumsing gùng lé lai shoq a nghutbùn é za, ó le ó
 lé, Garai Gasâng èq lumjing myit tsing gàm byí to bê eq rajung za, myit yú gíng
 é í za myit yú keq. ⁴ Nga-nhúng yuq hkanmó é gungdu ralhum má gi, gungdu
 showui showang pé myo myo bo é nghut luí, gungdu showui showang haú

pé banshoq gi, jai chûng jang a pung é nghut lhê. ⁵ Haû eq rajung za, myo myo nghut é nga-nhúng le, Hkrisduq má gungdu ralhum za dut luí, yuq hkgangmó gi, rayuq eq rayuq gungsho sêng lhúm é bang chyat nghut lhê. ⁶ Nga-nhúng lé byí tô é jeju yanmai, nga-nhúng wó é chyunghuq gi, gotú tú nghut lhê. Byú rayuq é chyunghuq gi, myiqhtoi htoí é nghut jáng, yhâng é lumjáng hkyô eq rajung za htoí sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byí é nghut jáng, myit wum byi sháng gaq; ra châ é bang lé garúm byí é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit eq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyí keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haû Yhumsing lé dojaú nyí keq. ¹² Myit myoqbyú hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rí é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyí keq. A nghutbûn é za, nyí yap hkyô nyhúm bang eq zùm yap keq. Hpaqchyí bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuaq kó. Yuq hkgangmó é myoq hí má ge é lé kut rà rago myit keq. ¹⁸ Wó dut é nghut jáng, nungmoq wó dut é í, yuq hkgangmó eq nguínón shoq nyí keq. ¹⁹ Ngá é buinùm wuî ê, lató a hpuq é za, Garai Gasâng é nhikmo-yo hkyô lé sheq lánq nyí keq. Hkâsu mù gà le, "Ngò sheq lató hpuq rà sù nghut lhê; ngò lató hpuq rà."* ga, haû Yhumsing tai ri ga kâ tô ri. ²⁰ Haû mù, "Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haû dông kut jáng, nàng, yhâng é ulhum htoq má gyúng é myigyè bum to byí é nghut lhê."*

ga le kâ tô ri. ²¹ Agè ashop é gi, nungmoq lé a ung pyám sháng gaq, ge é hkyo eq agè ashop é lé ung pyám keq.

13

Ahkáng Ayá Wó Bàng Ô Má Nyí Rà É Hkyô

¹ Yuq hkgangmó gi, up é ahkáng ayá wó bàng é a-ô má nyí ra rà nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng eq byí tô é chyat nghut lhê.

² Hau é yanmai, up é ahkáng ayá lé gumlau toq é sù gi, Garai Gasang byí tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo rà hkyô lé ho yù nyí é bang nghut akó. ³ Hkâsu mù gà le, uphkanq é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuq é mai

lut nau lhê a nghut lhi? Haû jáng, ge é hkyô kut aq, haû hkûn, yang, nang lé hkya-on râ nghut lhê. ⁴ Hkâsu mù gà le, yang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, náng, shut shaí hkyô kut é nghut le gi, gyuq nán nyi aq; haí mù gà le, yang gi, sâm lé ajè wun tó é a nghut. Yang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê. ⁵ Haû mù luí, dam byi râ lé chiq é yanmai za a nghut, yhumsing nhik bô râ é yanmai le, haû up é ahkáng ayá wó bâng é a-ô má nyi râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gà le, haû up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkan é mù lé, ahkying bying shoq wùn waq nyi akô nghut ri. ⁷ Yuq hkangmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhùm é chyín mai lai luí, hai chyín le hkâdap lhum kó; hkâsu mù gà le, góyúq lé chyitdap é sù gi, haû jep é tará lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myonoq,"* gà tô é hkunmó pé eq gotú hkunmó hai nghut nghut, "Náng gung lé náng chyitdap é su, náng é chyangnâm mâ é bang lé le chyitdap aq."* gà é tará má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haí le a kut é nghut lhê. Haû mù luí, chyitdap myit gi, haû jep é tará lé lhoq dik é hkyô nghut ri.

¹¹ Haû mù, ahkuí lhê é ahkying yàm-yoq lé sê gyo luí, haû hkyô lé kut keq. Nungmoq yhup mui é mai bûn gyíng râ ahkying jé bê; haí mù gà le, nga-nhông é hkyi yù hkyô gi, lumjíng hi é hkun lhê htoq má ahkuí je chyáng bê nghut ri. ¹² Haû myín ahkying gi, lai byuq ló râ za nghut bê; nyi ahkying gi, jé lô berá nghut lhê. Haû mù luí, mauchut é muzó lé tô pyám mù, maubó é gyecking lé wut to sháng. ¹³ Ye lhai é eq shuq wut é, ashop é đông gungsho zùm yap é eq shut é đông nyi zô lhum nau é myit bo é, mabyoq jishùm htoq é eq manon é pé a kut é za, nyi-káng lhê su, ge é a-kyang đông nyi yap sháng. ¹⁴ Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é đông lhoq dik râ matú hkâ-myit kó.

14

Gumang Wui Lé A Jéyang Râ Hkyô

¹ Lumjíng myit má wum nyhóm sù lé, myíng myo nhô zâ é hkyô pé lé a jéyang byí é za hap yù keq. ² Byù rayuq é lumjíng myit gi, jung hkangmó zô ri; nghut kôlhang, lumjíng myit nyhóm sù gotú rayuq gi, mhan-haq hpoqnoq za zô ri. ³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gà le, Garai Gasang gi, yang lé hap yu to bê nghut ri. ⁴ Náng gi, ó yuq wá nghut mù, góyúq é dui-nhâng zoshâng lé jéyang lhê lú? Yang, yap ging kôlhang, leqbat kôlhang, yhâng é yhumsing myit za nghut lhê. Yang gi, wó yap ging râ nghut lhê; hkâsu mù gà le, haû Yhumsing gi, yang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyi htoq je ge lhê gà ri; dum rayuq myit é gi, nyi wui rajung za nghut lhê gà ri. Yuq hkangmó gi, yhumsing myit

yu é lé a úng-âng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haú Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haú Yhumsing lé bun luí zô nyi ri; a zo sù le, haú Yhumsing lé bun luí Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haú Yhumsing é matú dui é ru nghut lhê; nga-nhúng shi byuq le gi, haú Yhumsing é matú shi é ru nghut lhê. Haú mù, asak dui nyi kôlhang, shi byuq kôlhang, nga-nhúng gi, haú Yhumsing eq sêng é bang nghut lhê.

⁹ Haú su mù, Hkrisduq gi, shi byuq bang eq asak dui bâng é Yhumsing dut sháng gaq ga, shí hkám mù dum dui toq é nghut lhê. ¹⁰ Haú mù, nàng gi, haí mù nàng é gumang hpó lé jéyáng nyi lhê lúh? Haí mù nàng é gumang hpó lé wú tiq nyi lhê lúh? Nga-nhúng lhunglhâng bang gi, Garai Gasang é tará jéyáng tangkuq hí má yap râ bang chyat nghut lhê. ¹¹ Hkâsu mù gâ le, "Haú Yhumsing gi, 'Ngò rú dui nyi é eq rajung za, Ngá é hí má hkyihput hkangmó htug râ nghut lhê;

Garai Gasang lé, shô hkangmó eq yín yú kó râ nghut lhê.' ga taí ri."*
ga kâ tô ri. ¹² Haú mù luí, nga-nhúng yuq hkangmó gi, yhumsing kut lai lo é hkyô lé, Garai Gasang chyáng shit ra râ nghut lhê.

¹³ Haú nghut mù, nga-nhúng gi, rayuq eq rayuq tará jéyáng lhùm é hkyô lé tô pyám sháng. Ó yuq nghut kôlhang, yhumsing é gumang é hkyowui má, myit leqbat jowò eq htung htê jowò a to byi râ matú, myit sidiq keq. ¹⁴ Haú Yhumsing Yesuq má nghut nyi é sù ngò gi, haí jung zoshuq nghut kôlhang, yhang baú yhang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sanséng ga myit yu é nghut jáng, yhang é matú, zè haú gi, a sanséng é nghut lhê. ¹⁵ Nàng zô é zoshuq yanmai, nàng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, nàng é gumang hpó lé, nàng zoshuq é dòng mai hkálhoq hten pyám. ¹⁶ Nàng, ge ri ngú myit yu é hkyô lé, agè ashop é dòng hkâtaí pyám nhâng. ¹⁷ Hkâsu mù gâ le, Garai Gasang é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyung Woi-nyí má gabú é hkyô ru nghut lhê. ¹⁸ Haí mù gâ le, shí hkyô dòng mai Hkrisduq lé dojaú é sù gi, Garai Gasang ô nau é sù eq byu pè eq hkya-ôn é hui sù nghut ri.

¹⁹ Haú mù luí, nguingón hkyô má nyi râ eq, rayuq eq rayuq wum byí lhum râ hkyô lé, shikut nyi keq. ²⁰ Zoshuq é yanmai, Garai Gasang é muzó lé hkálhoq hten pyám. Zoshuq lhunglhâng gi, sanséng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotú haí jung kut é nghut kôlhang, nàng é gumang hpó lé myit leqbat nhang é nghut le gi, a kut le je ge lhê.

²² Haú mù, haú pé eq séng luí, nàng lumjing é haí nghut kôle, nàng eq Garai Gasang gyoro má za joq nyi sháng gaq. Yhumsing ge lhê gâ é eq, yhumsing gung yhumsing mara byi jang a joq é sù gi, hkungsô wó nyi ri. ²³ Nghut kôlhang, úng-âng é myit eq zô é nghut le gi, mara byí é hui ri, haí mù gâ le, yhang zô é gi, lumjing myit mai a nghut; lumjing myit mai a kut é haí nghut kôlhang, mara nghut ri.

* 14:11 Esai 45:23

15

Góyuq Lé Myit Ngón Nhàng Râ Hkyô

¹ Lumjǐng hkyô má wum-o bo é nga-nhúng gi, yhumsǐng myit ngón râ hkyô lé a ho é za, wum-o a bò bǎng é wum nyhóm hkyô lé, hkam jan byí nyí râ dut lhê. ² Nga-nhúng yuq hkangmó gi, yhumsǐng é chyangnǎm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byí nyí shǎng. ³ Hkâsu mù gâ le, Hkrisduq lháng gi, Yhǎnggùng yhang lhoq ngón é a nghut; haú gi, "Nang lé rhoi bǎng é dang gi, Ngá chyáng gyó ke bê nghut ri."* ga, kâ tô é eq rajung za nghut ri. ⁴ Hkâsu mù gâ le, lai lò bê hkún kâ tô é lhunglháng gi, nga-nhúng lé mhoq byi râ matú chyat kâ tô é nghut lhê; haú gi, Chyúmdang mâ é hkam jan hkyô eq myit wum byi hkyô dǒng mai, nga-nhúng myit myoqbyù hkyô wó râ matú nghut lhê.

⁵ Haú hkam jan hkyô eq myit wum byi hkyô lé byí é Garai Gasang gi, nungmoq, Hkrisduq Yesuq é htǎng chǎng nyi é u lé, nungmoq yhangchang rading ralhum za dut é woi-nyí byi shǎng gaq; ⁶ haú jáng sheq, nungmoq gi, i-myit rahkat eq nhut htê ralhum èq za, nga-nhúng é Yhumsǐng Yesuq Hkrisduq é Yhǎngwa nghut Sû, Garai Gasang lé, wó hkya-on kungtǒn kó râ nghut lhê.

⁷ Haú mù luí, Hkrisduq gi, nungmoq lé hap yù bê é eq rajung za, Garai Gasang é hpungwup shǐngkang lé lhoq htoq shít râ matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé tai kólé, haú myǐng hũ é íchyí iwá pé lé byí tô é danggidiq pé lé lhoq ging râ matú, Hkrisduq gi, Garai Gasang é tengmán hkyo é malaí, Yudaq byu pé é dui-nhǎng zoshǎng dut bê nghut ri. ⁹ Haú mù, Garai Gasang é shogyo nhikmyin hkyo é yanmai, haú tǔngbaù pé, Garai Gasang lé wó hkya-on kungtǒn kó râ nghut lhê. Haú hkyô gi,

"Haú mù luí, tǔngbaù pé chyáng má, Nang lé, ngò hkya-on râ nghut lhê;

Nǎng é myǐng lé, ngò hkya-on mahkón râ nghut lhê."*

ga kâ tô é eq rajung za nghut ri. ¹⁰ Dum,

"Tǔngbaù pé ê, Yhǎng é byu pé eq rahá gabú nyi keq."*

gâ tô ri. ¹¹ Dum,

"Nungmoq tǔngbaù pé lhunglhǎng bang ê, haú Yhumsǐng lé hkya-on keq, byù myú lhunglhǎng bang ê, Yhang lé hkya-on mahkón hkón keq."*

gâ tô ashí nghut ri. ¹² Hau htoq agó, Esai-aq tai é gi,

"Yese é Amyit gi, yuq htoq lô luí, Yhang gi, byù myú chǎngiup é ahtoq má up râ sù nghut lhê;

tǔngbaù pé gi, Yhang má myit myoqbyù kó râ nghut lhê."*

gâ ri.

¹³ Haú myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguǐngón hkyô lhoq pyǐng byi shǎng gaq; haú jáng sheq, nungmoq gi, Chyoiyúng Woi-nyí é wum-o a-tsám èq, myit myoqbyù hkyô wó byǐng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui é, nungmoq gi, ge é hkyô byǐng jup é bang, hpaqchyí má gumjup é bang, rayuq eq rayuq mhoqshít lhùm é má kúng é bang nghut é lé, ngá gǔng ngò yhang hkyak lumjǐng lhê. ¹⁵ Ngò gi, nungmoq lé dum lhoq pún é dǒng, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu

* 15:3 Hkya-on 69:9 * 15:9 Hkya-on 18:49 * 15:10 Hkya-on 32:43 * 15:11 Hkya-on 117:1

* 15:12 Esai 11:10

mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng eq hap yù gíng é hkungga wó dut kó sháng gaq ga, Garai Gasâng é gabú danglù lé hkô rá hkyangjong é wò dông, tûngbaù pé chyáng, Hkrisduq Yesuq é hpungmù wùn sù dut rá matú, Garai Gasang, ngo lé jeju byí é yanmai nghut lhé.

¹⁷ Haù mù luí, ngò gi, Garai Gasang lé dojaù é hkyô eq séng luí, Hkrisduq Yesuq má nghutbùn nyí lhé. ¹⁸ Ngò gi, ngò tai é eq zui sai é muzó dông le, haù Woi-nyí é a-tsam chùng mù, kumlhá pé eq laklai kumlhá pé dông le, tûngbaù pé lé, Garai Gasâng é jìno gyo shoq shuí ù é má, ngo lé Hkrisduq nhang é muzó hkyô lé tai é mai lai luí, gotù hai lé le wám tai é a nghut. ¹⁹ Haù mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jam shoq, Hkrisduq é gabú danglù lé hko kyo bê nghut lhé. ²⁰ Ngò hkâ-nhám le myit tuí nyí é hkyô gi, góyuaq hi tô é apùn awang má dum a puq sai pyâm é za, Hkrisduq lé a sé shi é jowò má gabú danglù hko kyo rá hkyô nghut lhé. ²¹ Haù gi, "Yhâng é hkyô lé, tai kyô é a hui shí é bang, myàng kó rá nghut luí,

a wó gyô wú é bang, sê gyo kó rá nghut lhé."[✧]

ga kâ tô é eq rajung za nghut ri. ²² Haù mù luí, ngò, nungmoq chyáng lé jé rá lé, anum num hkyikyo luqlhum dut nyi é gi, muzó hau é yanmai nghut lhé.

Romaq Myuq Lé Lô Kum Râ Sôn É Hkyô

²³ Nghut kôhang, ahkuí gi, shí mau pé má ngò zui sai rá jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkùn, nungmoq chyáng wàng rá sôn tô lhé. Ngò gi, lai ló é hkùn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haù mai htugbang kat rá lé, ngò myoqbyu tô lhé. ²⁵ Ahkuí, ngò kúm gi, Yerusalem wà mó má é sân-yúng bang lé dojaù rá matú, haù wâ shut e ló é hkyolat má nghut nyi lhé. ²⁶ Hkâsu mù gâ le, Makedoni eq Ahkaia mau má é bang gi, Yerusalem wà mó má é sân-yúng bâng chyáng má é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhé. Hkâsu mù gâ le, haù Yudaq byu pé é woi-nyí eq séng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng rá chyín dap tô é dông nghut lhé. ²⁸ Haù mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló rá nghut mù, lai ló uchyang, nungmoq chyáng lé sô kum rá nghut lhé. ²⁹ Ngò gi, nungmoq chyáng lé jé é hkùn, nungmoq é matú Hkrisduq é shimân jeju byíng jup é èq jé lé rá nghut é lé, ngò sê lhé.

³⁰ Gumang wui ê, ngá é matú Garai Gasâng chyáng kyùdung byí é dông, ngò wum kat yhang shikut é hkyô má nungmoq bo wàng lòm rá matú, nganùng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum tai tsuq kat lhé. ³¹ Yuda mau má é a lumjing bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haù má é sân-yúng bang hap yù gíng é wó dut rá matú kyù bo dung byi keq. ³² Haù jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yù rá nghut lhé. ³³ Haù nguínón hkyo é Garai Gasang gi, nungmoq banshoq bang eq rahá rù nyi nyí sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng má é hpungtê, nga-nhùng é gu-nhá Hpobe lé, nungmoq chyáng shichyen byi kat lhê. ² Nungmoq gi, sân-yúng bang kut gíng é eq rajung za, haù Yhumsíng má yang lé hap yù luí, yang rà tô é hkyô hai nghut kôle, yang lé htuqbang keq. Hkâsu mù gâ le, yang gi, byù myo myo lé le, ngo lé le, gyai yang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yangnhik é asak sum rà í yang dut wú kô é nghut mù, ngò za a nghut, túngbaù pé é noqkuq hpúng pé banshoq le, yangnhik lé jeju bûn lhê.

⁵ Yhangnhik é yhùm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjíng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shí le nyi bê sù nhik nghut akô.

⁸ Haù Yhumsíng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haù Yhumsíng má nghut nyi bê bang, Narkiso é yhumbyù wui lé bo shi-kyám byi keq.

¹² Haù Yhumsíng má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsíng má mù zui gyai yang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haù Yhumsíng má hkyin yu é hui bê sù, Ruhpu lé le, ngá nu dông nghut wú bê nghut é Ruhpù é yhangnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wui ê, nungmoq é lumjíng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô pé lhoq htoq é bang lé sidiq keq ngù, wum tai tsuq kat lhê. Yhangmoq lé koi pyám keq. ¹⁸ Hkâsu mù gâ le, haù sù é bang gi, nga-nhùng é Yhumsíng Hkrisduq lé dojaú é bang a nghut é za, yhumsíng é wamdaù matú dojaú é

bang nghut akô. Yhangmoq gi, myit nú-nhâm é bang lé, dang ngón dang nguí dông mhaú zô akô nghut ri. ¹⁹ Nungmoq, jìno gyo kô é hkyô lé, yuq hkangmó wó gyo bê nghut ri; haú mù, ngò gi, nungmoq é matú gyai yhang gabú nyi lhê; nghut kôlhàng, ge é hkyô eq séng luí gi, nungmoq hpaqchyí bò mù, agè ashóp hkyô eq séng luí gi, nungmoq a bo lòm rà lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rà nghut lhê.

Nga-nhông é Yhumsing Yesuq é jeju gi, nungmoq eq rahá nghut nyí sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haú eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

²² Laiká shí lé bo ká sù ngò Tertiu gi, haú Yhumsing má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haú wa mã é ngúnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô. ²⁴ Nga-nhông é Yhumsing Yesuq Hkrisduq é jeju gi, nungmoq lhunglhâng bang eq rahá nghut nyí sháng gaq. Amen.*

²⁵ Byù myú chângjup bang lumjing luí, Yhang é jìno gyo sháng gaq ga, a-nham pyat mai haq tô é hui kôlhàng, ²⁶ ahkuí, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng luí, ngá é gabú danglù eq Yesuq Hkrisduq é hkyô tai pyo é dông, nungmoq lé wó lhoq ging títng byí é, ²⁷ rayuq za é hpaqchyí bo sù Garai Gasâng chyáng, Yesuq Hkrisduq dông mai, hpungwup shing kang gi, ahtum abyuq ru joq nyí sháng gaq ô! Amen.

* 16:24 Chyúmding ra-am má chyúmbun 24 shí a bo é nghut lhê.

KORINHTUQ

Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, ² jowò hkangmó má nga-nhùng é Yhumsing Yesuq Hkrisduq é mying lé lãng é bang eq rahá, chyoiyung bang dut râ matú ji yù huí é eq Hkrisduq Yesuq má lhoq sân-yung é huí é bang nghut é, Korinhtuq myuq mâ é, Garai Gasang é noqkuq hpung lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é jeju eq nguóngon hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkâsu mù gâ le, nungmoq gi, Hkrisduq đông mai, nungmoq dang tai é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶ Haù gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyí é nghut lhê. ⁷ Haù mù, nga-nhùng é Yhumsing Yesuq Hkrisduq dum htoq shit râ lé, nungmoq gyai myoqbyu lãng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut. ⁸ Nga-nhùng é Yhumsing Yesuq Hkrisduq é buinyi má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gingting nhang nyi râ nghut lhê. ⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpung Má Gam Hkoq Lhùm É Hkyô

¹⁰ Gumang wui ê, nungmoq hkaù má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhang bang rayuq eq rayuq byin hpyé gohut huí nyi keq nghù, ngò, nungmoq lé, nga-nhùng é Yhumsing Yesuq Hkrisduq é mying mai dúng tongbán kat lhê. ¹¹ Ngá é gumang wui ê, Hkloe é yhùm byù wui gi, nungmoq hkaù má mabyoq htoq hkyô joq é lé, ngo lé hkyáng lo shit akò. ¹² Ngò haù su nghù tai é gi, nungmoq má é rayuq yuq gi, "Ngò gi, Poluq htang châng lhê." ga, góyuq gi, "Ngò gi, Apolo htang châng lhê." ga, dum rayuq gi, "Ngò gi, Kehpa htang châng lhê." ga, dum góyuq gi, "Ngò gi, Hkrisduq htang châng lhê." ga, tai bùm kô é yanmai nghut lhê.

¹³ Hkrisduq gi, gam hkoq é hui bê lúhú? Ngò Poluq gi, nungmoq é matú tapzing má jén sat é hui bê lúhú? Nungmoq gi, ngá é mying mai wui-myhup hkâm yù kô é lúhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghú a wó tai é nghut mù, ngò, Garai lé jeju hkya-ôn lhê. ¹⁶ (Stephana é yhumbyù wui lé le, ngò wui-myhup hkâm byí é nghut lhê, haù mai lai luí gotú ó lé hkâm byí záng ashí laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkâm byi

râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang đông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gà le, tapzing má Yesuq shí hkâm é hkyô eq sêng é danglù gi, htên boq hui râ bâng é matú, danggang dut byuq ri; nghut kôlhang, hkyi yu é hui nyi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gà le, Chyúmdang má kâ tô é gi, "Hpaqchyí bò bâng é hpaqchyí byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."*

ga ri.

²⁰ Hpaqchyí byéng-yá bò bang gi, hkâmá lú? Hpaqchyí laiká kung bang gi, hkâmá lú? Ipyat shí é dang tái kung bang gi, hkâmá lú? Garai Gasang gi, mingkân é hpaqchyí byéng-yá lé lhoq ngok pyám bê a nghut lú? ²¹ Hkâsu mù gà le, Garai Gasâng é hpaqchyí byéng-yá mai ga jang, mingkan zo wui gi, yhumsing é hpaqchyí byéng-yá đông mai Garai Gasang lé a wó sé kô é yanmai, danggang gà pyám byi kô é mungdang lé hko kyô é đông lumjínng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumhá pé lé dúng akó; Grik byu pé gi, hpaqchyí byéng-yá lé ho akó nghut ri. ²³ Nghut kôlhang, ngamoq gi, tapzing má jén sat hui é Hkrisduq é hkyô lé hko kyô lhê. Haù gi, Yudaq byu pé é matú myit leqbat jowò eq tûngbaù pé é matú danggang dut byuq ri. ²⁴ Nghut kôlhang, Garai Gasâng eq ji yù hui é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri. ²⁵ Hkâsu mù gà le, Garai Gasâng é ngok hkyô gà é lhang gi, byu é hpaqchyí byéng-yá htoq má je gyaù ri; Garai Gasâng é wum nyhóm hkyô gà é lhang gi, byu é wum-o htoq má je gyaù ri.

²⁶ Gumang wui ê, Garai Gasang, nungmoq lé ji yu é hkún, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyí byéng-yá bo é bang, ahkáng ayá wó é bang, zaugun suwún amyú má é bang a myô é nghut lhê. ²⁷ Nghut kôlhang, Garai Gasang gi, hpaqchyí byéng-yá bò bang lé hoq lhoq hpu râ matú, mingkan mâ é ngok bang gà é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gà é lé hkyin yu é nghut lhê. ²⁸ Yhang gi, mingkân eq ahkyak tô é lé lhoq htên pyám râ matú, hai a nghut é lé le, mingkan mâ é aróng a bo é eq wú tiq pyám hui é lé le, hkyin yu é nghut lhê. ²⁹ Haù gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhông é matú, Garai Gasâng chyáng má é hpaqchyí byéng-yá dut bê nghut ri. Haù gi, nga-nhông é dingmán hkyô, chyoiyúng hkyô eq hkyi yù hkyô nghut ri. ³¹ Haù mù lú, "Gumrong é sù gi, haù Yhumsing má gumrông sháng gaq."* ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyí Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tái pyô râ matú jé lé é hkún, dang tái kung é eq hpaqchyí byéng-yá mó bo é đông lé é a nghut. ² Hkâsu mù gà le, ngò, nungmoq eq rahá nyi

é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myhî pyám rá ngû myit hpyit yû bê nghut lhê. ³ Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyí bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵ nungmoq é lumjîng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dîng bê bang lé hpaqchyí byéng-yá dông nyo lhê; shí pyat lhê é hpaqchyí byéng-yá eq htên byoq nyi huí é shí pyat mã é zaú wui é hpaqchyí byéng-yá dông kúm a nghut. ⁷ Ngamoq taí é gi, haq tô é eq, ahkyíng nghu é lháng a joq shi mai nga-nhúng é hpungwup shîngkâng é matú Garai Gasang tô to byí é hpaqchyí byéng-yá nghut é, Garai Gasâng é zaú tô é hpaqchyí byéng-yá lé taí é ru nghut lhê. ⁸ Shí pyat lhê é zau wui gi, hpaqchyí byéng-yá haú lé rayuq lháng a sê gyo kó nghut ri; yhangmoq sê gyo kó é ru nghut le gi, hpungwup shîngkang bo é Yhumsîng lé tapzîng má jén sat pyám kó rá a nghut. ⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."*

ga kâ tô é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haú gi, jung hkangmó lé ho gôn wú é nghut luí, Garai Gasâng é zaú tô é hkyô lé lháng ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhúng gi, mîngkân é woi-nyí lé hap yu tô é a nghut é za, Garai Gasâng èq nga-nhúng lé byí to bê jeju lé, ngamoq wó sê gyo rá matú, Garai Gasâng chyáng mã é Woi-nyí lé sheq hap yu tô é ru nghut lhê. ¹³ Haú mù luí, ngamoq gi, waxâng zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sán kyô é nghut lhê. ¹⁴ Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haí mù gâ le, haú pé gi, yhâng é matú ngok é hkyô nghut luí, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lhunglháng lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut.

¹⁶ Chyúmdang má,

"Hkâsu mù gâ le, ó yuq wá, haú Yhumsîng é myit lé sé mù, Yhang lé wó mhoqshit wú é lú?"*

ga kâ tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhùm É Hkyô

¹ Gumang wui é, hí hkûn, ngò gi, nungmoq lé, Woi-nyí eq sêng é bang lé dông wó taí é a nghut; mîngkan eq sêng é bang dông nghut kômù, Hkrisduq má zonú su dut bang lé dông sheq taí wú é nghut lhê. ² Nungmoq gi, zoshuq

apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuí hláng, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashî kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bum kó é nghut jáng, nungmoq gi, mingkan zo wui nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut lui, ó le ó lé, haú Yhumsing eq hun tô é muzó eq rajung za wùn waq é nghut lui, nungmoq gi, ngá-nhik đông mai wó lumjúng kó é ru nghut lhê. ⁶ Ngò gi, gabú danglú amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garaí Gasang za ru nghut lhê. ⁷ Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garaí Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ó é shigyaú chyunghuq wó yú kó rá nghut lhê. ⁹ Hkâsu mù gâ le, ngamoq gi, Garaí Gasâng é mù zui luzúm wui nghut lhê; nungmoq gi, Garaí Gasâng é yò, Garaí Gasâng é yhùm nghut nyi akò.

¹⁰ Garaí Gasang, ngo lé byi to bê jeju eq rajung za, yhùm sai kung sù rayuq đông, ngò gi, yhùm apùn awang hi to bê nghut lhê; gotú byù gi, hau é ahtoq má sai toq jat nyi é nghut lhê. Nghut kôlhang, yuq hkangmó gi, yhumsing sai é má rago sidiq rá lhê. ¹¹ Hkâsu mù gâ le, hi to gù nghut é, Yesuq Hkrisduq nghu é yhùm apùn awang mai lai lui, ó yuq le, gotú yhùm apùn awang lé wó sai é a nghut. ¹² Yhùm apùn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chùng mù sai jat kô é nghut jáng, ¹³ yuq hkangmó é muzó hkâsu nghut é hkyô lé lhoq htoq shit é hui rá nghut lhê. Haú mù lui gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí eq lhoq htoq shit rá nghut lhê. Haú myi gi, yuq hkangmó sai é muzó hkasú é nghut é lé chyâm rá nghut lhê. ¹⁴ Rayuq yuq sai é yhùm gi, ru gíng nyi é nghut jáng, haú yuq gi, yhang é shigyaú chyunghuq wó yú rá nghut lhê. ¹⁵ Nghut kôlhang, yhùm haú nyé gyó byuq é nghut jáng, yhang gi, yhùm sùm byuq é hui zo rá nghut lhê; yhang gi, asak lut kôlhang, myishâm mai wó lut é byù su dut rá nghut lhê.

¹⁶ Nungmoq gi, Garaí Gasâng é noqkuq yhùm nghut lui, Garaí Gasâng é Woi-nyí gi, nungmoq má lúng nyi bê hkyô lé a sé kó lúh? ¹⁷ Rayuq yuq, Garaí Gasâng é noqkuq yhùm lé lhoq htên é nghut jáng, Garaí Gasang gi, haú yuq lé lhoq htên pyám rá nghut lhê. Hkâsu mù gâ le, Garaí Gasâng é noqkuq yhùm gi, choyiúng lhê; nungmoq gi, noqkuq yhùm haú nghut akò.

¹⁸ Nungmoq gi, yhumsing gùng yhumsing hkâlhoq nghoq kó. Nungmoq má é rayuq yuq, shí ipyat má é byù nyi a-tsáng đông hpaqchyí byéng-yá bò sù ga myít é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut rá lhê. ¹⁹ Hkâsu mù gâ le, mingkan shí má é hpaqchyí byéng-yá gi, Garaí Gasâng é hí má ngok é hkyô nghut ri. Haú gi, "Garaí Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga ká tô é eq rajung za nghut ri. ²⁰ Hau htoq agó, "Haú Yhumsing gi,

* 3:2 Nungmoq lé naú byi huq é, gâ é gi, lui é hkyô pé lé hí mhoq byí é lé gâ lhê. ✧ 3:19 Yob 5:13

hpaqchyí byéng-yá bò bang myit é hkyô pé akôm nghut é lé sê lêh. "✧ ga le kâ tô ri. ²¹ Haù mù luí, ó yuq le, byù eq sêng é hkyô má gyáng é dang a tai kó sháng gaq! Lhunglhang gi, nungmoq é chyat nghut lêh. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lêh hkyô eq htàngnùng má é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haù mù luí, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é záu tô é hkyô pé lé tai pyô rá matú ap byi tô é hui bang đông sôn yù rá lêh. ² Haù đông nghut jáng, ap byi tô é hui bang gi, yhumsing lhumzui hkyô lé saksé shit rá dut lêh. ³ Nungmoq eq nghut nghut, waxâng zô wui é tará rùng mai nghut nghut, ngo lé jéyáng kô le, ngá é matú atiq azo za nghut lêh; gè gè ga jáng, ngá gung ngò lhang a jéyáng é nghut lêh. ⁴ Hai mù gâ le, ngá gung ngò mara a bò bún é nghut kôlhang, haù gi, ngo lé wó lhoq sân-yúng byi é a nghut. Ngo lé jéyáng é sù gi, haù Yhumsing nghut lêh. ⁵ Haù mù, masat tô é ahkying a jé shimá hai lé le a jéyáng é za, haù Yhumsing jé lé shoq, lánng nyi keq. Yhang gi, mauchut hkaù má haq tô é pé lé byu-myàng nhâng mù, byu pé é myit nhikhlum má lúng é hkyô lé lhoq htoq shit rá nghut lêh. Haù hkún, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù rá nghut lêh.

⁶ Gumang wui é, ngò gi, "Kâ tô é gú mai hkálai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghú, nungmoq é akyu é matú, ngò eq Apolo má haù pé lé yù mù dangtú kut é nghut lêh. Haù hkún, nungmoq gi, nghutbùn é đông, rayuq lé gi, wú ko, góyuq lé gi, wú shóm, a kut kô rá nghut lêh. ⁷ Ó yuq wá, nang lé, góyuq eq shaí shoq kut lêh lú? Nang hap yu é a nghut le gi, wó rá lú? Nang, hap yu é nghut le gi, a hap yu é đông hai mù nghutbùn nyi lêh lú?

⁸ Nungmoq gi, rá é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô rá lé, ngò hká-í yhang ô nau nyi lêh ô! ⁹ Nghut kôlhang, sat rá matú doqdan hui é shúm byù pé lé su, Garai Gasang gi, lagyô pé nghut é ngamoq lé de de kut htoq shit bê nghú, ngò wó myit ri. Ngamoq gi, nyi mi-nyi, joq mijoq, maumang lagyô pé eq waxâng zô wui é hí má, wú kún jung đông dut nhang é hui nyi gù bê nghut lêh. ¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyí gyaí bo é bang đông dut bekô hung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô hung! Nungmoq gi, hkunggá é hui akô; ngamoq kúm gi, hkunggá é a hui hung! ¹¹ Shí hkying shí u jé shoq, ngamoq gi, zòmut wuishit hui é, mebu ajeq amyhá dut hui é, nhuq bat hui é, yhumsing é nyi jowò a wó é bang nghut nyi lêh. ¹² Ngamoq gi, yhumsing loq eq yhang mú zui wum kat nyi lêh. Ngamoq gi, nhing pyám é hui jáng, shimân byi, zing-rí é hui jáng, jân pyám kut lêh. ¹³ Ngamoq gi, lumù gansang é hui jáng, dang ngón dang nguí tú nyo lêh. Ngamoq gi, ahkuí jé

shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huí nyi lhê.

¹⁴ Ngò gi, nungmoq lé hoq lhoq hpu rà matú háu pé lé kê é a nghut, ngá é chyitdap zo wuí lé dông lhoq pún kying rà matú ru nghut lhê. ¹⁵ Nungmoq gi, Hkrisduq má mhoqshit bang ra mun wó kô é nghut kôlhang, iwâ pé myo shoq wó kô é a nghut; hkâsu mù gà lé, ngò gi, háu gabú danglú dông mai, Hkrisduq Yesuq má nungmoq é iwa dut é nghut lhê. ¹⁶ Háu mù luí, ngò kut é su cháng keq nghú, ngò, nungmoq lé lung kat lhê. ¹⁷ Háu é yanmai, ngò gi, háu Yhumsing má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duí hkyô lé, jowò hkangmó mâ é noqkuq hpúng hkangmó lé ngò mhoq byí é eq rajung za, nungmoq lé lhoq pun byi rà nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé rà su ngam pyám kômù, nghutbún byuq bekò nghut ri. ¹⁹ Nghut kôlhang, háu Yhumsing gyô é nghut jáng, ngò gi, nungmoq chyáng hân za jé lé rà nghut lhê; háu hkún, ngò gi, nghutbún é byù háu bang hai taí é hkyô lé za a nghut, yhangmoq hai a-tsam wó é hkyô lé le gôn htoq rà nghut lhê. ²⁰ Hkâsu mù gà le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹ Nungmoq hká dông ô nau akò lú? Ngò gi, nungmoq chyáng, nuichùm hkat èq, a nghut jáng, chyitdap é eq nú-nhâm é myit mai lé lô ra rà lú?

5

Ashop É Dông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô

¹ Nungmoq chyáng, ashop é dông gungsho zùm yap é hkyô joq é lé, hkyak taí hù lò bekò; háu gi, a lumjing bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zò lhum nyi é hkyô nghut ri. ² Nghut kôle, nungmoq gi, nghutbún nyi bum akò chung! Háu dông a nghut é za, nungmoq gi, yón é myit tún shit mù, háu su kut é byù lé, nungmoq é hpúng mai lhoq htoq pyám le, a gè kó lú? ³ Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi luí, gungdu jé nyi tô é dông mai, háu hkyô kut é sù lé jéyáng doqdan gù nghut lhê. ⁴ Nungmoq gi, nga-nhung é Yhumsing Yesuq é mying mai zup zing mù, ngá é i-myt gi, nungmoq eq rahá nghut nyi luí, nga-nhung é Yhumsing Yesuq é a-tsam le, nungmoq eq rahá nghut nyi é hkún, ⁵ byù háu yuq lé, Tsadán é loq má ap byí pyám keq.* Háu jáng, Yhumsing é buinyi má, yhang é woi-nyí gi, hkyi yu é hui rà matú, yhang é yubak gungsho gi, lhoq htên pyám é hui rà nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lú? ⁷ Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gà le, nga-nhung é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸ Háu mù luí, nga-nhung gi, agè agau hkyô eq hpuzo nhâng hkyô nghut é múnchi

* **5:5** Tsadán é loq má ap byí pyám keq gà é gi, hpúng byù wui eq a zùm yap nhâng lo rà lé taí é nghut lhê. † **5:6** Mún gà é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê.

axau bo é dông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poi háu lé kut nyí sháng.

⁹ Ashop é dông gungsho zùm yap é bang eq hkâzùm kó nghũ, ngò, nungmoq lé, ngá é laiká má kâ kat byi bê nghut lhê. ¹⁰ Nghut kôlhang, mingkan shí eq sêng é, ashop é dông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghũ é gi, a nghut. Háu su ru nghut le gi, mingkan htoq shí mai nungmoq htoq ló byuq ra kô rá nghut lhê. ¹¹ Nghut kôlhang, yhanggùng yhang gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sũ ó yuq eq le a ge zùm yap kô rá nghut lhê nghũ, ahkuí, ngò, nungmoq lé kâ kat nau é nghut lhê. Háu sũ é byù eq gi, rahá lhang hkâzo kó.

¹² Háu noqkuq hpúng shinggan mâ é bang lé jéyáng rá gi, ngò eq hai sêng lhê lú? Nghut kôlhang, hpúng ahkaú mâ é bang lé nungmoq jéyáng rá dut lhê. ¹³ Hpúng shinggan mâ é bang lé gi, Garai Gasang jéyáng rá nghut lhê. Nghut kôlhang, "Háu agè agáu é sũ lé, nungmoq chyáng mai lhoq htoq pyám keq." ✨ gâ tô ri.

6

Lumjíng Bâng Hkaú Má Jéyáng Lhũm É Hkyô

¹ Nungmoq mâ é rayuq yuq gi, gumang góyuq eq dang-rhâng lhũm tô é nghut jáng, háu hkyô lé jéyáng nhâng rá matú, háu sân-yúng bâng é hí má tai rá malaí, Garai a wó bâng é hí má wám tai rá lú? ² Háu sân-yúng bang gi, mingkan lé jéyáng rá nghut é hkyô lé, nungmoq a sé kó lú? Nungmoq gi, mingkan lé jéyáng rá bang nghut kôle nhing, tiq é mũ pé lé wó jéyáng é bang a nghut kó lú? ³ Nga-nhũng gi, maumâng pé lé jéyáng rá nghut é hkyô lé, nungmoq a sé kó lú? Háu mù, shí pyat má é hkyô pé lé, gè gè yhang wó jéyáng kô rá nghut lhê ô! ⁴ Háu mù luí, nungmoq gi, dang-rhâng lhũm é mũ pé joq é nghut jáng, noqkuq hpúng má ahkyak a nghut é bang lé tará agyi kut nhâng kô rá lú? ⁵ Ngò, háu su nghũ tai é gi, nungmoq lé hoq hpu nhâng rá matú nghut lhê. Lumjíng bâng chyáng dang-rhâng lhũm é hkyô lé wó jéyáng rá hpaqchyí luq shoq bo é byù, nungmoq chyáng rayuq lhang a nyi dut kô rá lú? ⁶ Nghut kôlhang, nungmoq gi, gumang yhangchang rayuq eq rayuq, a lumjíng bâng é hí má lhang rùng shok lhum akô nhung!

⁷ Nungmoq hkaú má mũ jéyáng lhũm é hkyô joq é nghut jáng, nungmoq gi, sum lugù nghut bê. Góyuq eq shut le lhang rú ge lhê a nghut kó lú? Mhaú zô é huí le lhang rú gè lhê a nghut kó lú? ⁸ Nghut kôle, nungmoq yhang gi, mhaú zo kô é eq shut kô é nghut luí, háu gi, nungmoq é gumang wui lé kut é nghut lhê.

⁹ Agè agáu é bang gi, Garai Gasang é mingdán mâ é shimân jeju a myang hkam yù kô rá nghut é hkyô lé, nungmoq a sé kó lú? Hkâ-nâ nyi kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyi zô lhũm é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasang é mingdán mâ é shimân jeju lé myang hkam yù kô rá a nghut. ¹¹ Nungmoq mâ é ra-am gi, háu su kut kô é bang nghut akô. Nghut kôlhang, nungmoq gi, nga-nhũng é Garai Gasang

é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô nghut ri.

Ashop É Đông Gungsho Zùm Yap É Hkyô

¹²"Jung hkgangmó kut râ ahkáng ngò wó lhê." Nghut kôlhang, jung hkgangmó gi, akyû byí é a nghut. "Jung hkgangmó kut râ ahkáng ngò wó lhê." Nghut kôlhang, hái jung eq le ngo lé wó sing pyám râ a nghut. ¹³"Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am tai kô râ nghut lhê. Nghut kôlhang, Garai Gasang gi, haû í jung é lé lhoq htên pyám râ nghut lhê. Gungdu gi, ashop é đông gungsho zùm yap hkyo é matú a nghut é za, haû Yhumsing é matú nghut mù, haû Yhumsing gi, gungdú é matú nghut ri. ¹⁴Garai Gasang gi, Yhâng é a-tsâm eq, haû Yhumsing lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê. ¹⁵Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lúh? Haû nghut le nhing, Hkrisduq é gungsho showui showang pé lé yù mù, shiwa myhi pé eq rading ralhù za kut pyám nhâng kô râ lúh? Hkâ-nhâm le a ge dut nhâng! ¹⁶Shiwa myhi eq gungsho zùm é sù gi, yhang eq gungsho ralhù za dut bê hkyô lé, nungmoq a sé kô lúh? Hkâsu mù gâ le, "Yhangnhik gi, gungsho ralhù za dut kô râ nghut lhê."* ga tai tô ri. ¹⁷Nghut kôlhang, haû Yhumsing eq rading ralhù za dut é sù gi, woi-nyí má Yhang eq ralhù za dut bekô nghut ri.

¹⁸Ashop é đông gungsho zùm yap é hkyô lé koi pyám keq. Byù rayuq kut shut é gotú mara pé banshoq gi, yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹Nungmoq é gungdu gi, Garai Gasang chyáng mai nungmoq wó yû bê nghut é, nungmoq má lúng nyi é Choyiyúng Woi-nyí é noqkuq yhùm nghut é lé, nungmoq a sé kô lúh? Nungmoq gi, yhumsing gùng lé sing é bang a nghut. ²⁰Hkâsu mù gâ le, nungmoq gi, ahpau ralhù byi mù wui hpyit tô é hui bê bang nghut akô. Haû mù luí, nungmoq é gungdú eq, Garai Gasang lé, hkunggá é hkyô shit nyí keq.

7

Myí Yu É Eq Sêng É Hkyô

¹Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. ²Nghut kôlhang, ashop é đông gungsho zùm yap é hkyô gyai myô é yanmai, yuqgè hkgangmó gi, yhumsing é myiwe wó râ lhê; myiwe hkgangmó gi, yhumsing é yuqgè wó râ lhê. ³Haû yhumsing hpó gi, wò joq é eq rajung za, yhâng yhumsing myhi eq zùm sháng gaq; haû đông za, yhumsing myhi le, yhâng yhumsing hpó eq zùm sháng gaq. ⁴Haû yhumsing myhi é gungdu gi, yhânggùng yhang za séng é a nghut, yhâng é yhumsing hpó eq le séng lhê. Haû eq rajung za, yhumsing hpó é gungdu gi, yhânggùng yhang za séng é a nghut, yhâng é yhumsing myhi eq le séng lhê. ⁵Nungmoq myit hui lhum luí, kyúdúng é má rago ap nóng râ ahkying ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkgang é yanmai, Tsadán eq gunglaú é a hui kô sháng gaq, ahkying ayoq haû lai jáng, rahá dum zùm keq. ⁶Ngò, haû su nghú tai é gi, hkunmó hkyô é đông a nghut, ahkáng byí kat é đông ru nghut lhê. ⁷Byù banshoq bang gi, ngò su nyi râ lé ô nau ri. Nghut

kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò tái kôlé, ngò su, haú đông jáng nyi pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gung lé a wó hkang kô é nghut le gi, yhangmoq, myi yù myi ló rá lhê; hkâsu mù gâ le, myi su nyé lui ô nau nyi rá malaí, myi yu myi ló le je ge lhê.

¹⁰ Myi yù bê bang lé, ngò, hkunmó hkyó kôlé, shí gi, ngò đông hkyô é a nghut, Yhumsing chyáng má é ru nghut lhê: Yhumsing myhí gi, yhâng é yhumsing hpó chyáng mai a ge gang rá nghut lhê. ¹¹ Nghut kôlhang, yhang gâng é nghut jáng, myi a dum ló é za nyi rá lhê, haú a nghut jáng, yhâng é yhumsing hpó eq dum xoq yù rá lhê. Yhumsing hpó le, yhâng é yhumsing myhí lé a ge kâng pyám rá nghut lhê.

¹² Góbang lé ngò shí su nghú tái kôlé, shí gi, Yhumsing chyáng má é a nghut, ngò đông mai tái é ru nghut lhê. Gumang rayuq yuq gi, lumjúng sù a nghut é yhumsing myhí wó é nghut le, myiwe haú, yhang eq rahá nyi nau é nghut jáng, yhang lé a ge kâng pyám rá nghut lhê. ¹³ Myiwe rayuq gi, lumjúng sù a nghut é yhumsing hpó wó é nghut le, yuqgê haú, yhang eq rahá nyi nau é nghut jáng, yhang eq a ge gang rá nghut lhê. ¹⁴ Hkâsu mù gâ le, haú a lumjúng sù yhumsing hpó gi, yhâng yhumsing myhí đông mai lhoq sân-yúng é hui bê nghut mù, a lumjúng sù yhumsing myhí le, lumjúng sù nghut é yhâng é yhumsing hpó đông mai lhoq san lhoq yúng é hui bê nghut ri. Haú a nghut jáng, nungmoq é zo wui gi, a sanséng dut kô rá nghut lhê; nghut kôlhang, yhangmoq gi, haú đông mai, chyoiyúng bekô nghut ri.

¹⁵ Nghut kôlhang, haú a lumjúng sù gâng ló nau jáng gi, gâng ló sháng gaq. Lumjúng é yuqgê nghut nghut, myiwe nghut nghut, haú sù é hkyô pé má gi, hkúm zing tô é hkyô a joq é nghut lhê. Garai Gasang gi, nga-nhúng lé, nguingón shoq nyi sháng gaq ga ji yù bê nghut lhê. ¹⁶ Yhumsing myhí ê, náng é yhumsing hpó lé wó hkyi yù rá nghú, hkâsu wó sé rá lúh? Yhumsing hpó é, náng é yhumsing myhí lé wó hkyi yù rá nghú, hkâsu wó sé rá lúh?

¹⁷ Hká đông nghut kôlhang, yuq hkangmó gi, Garai Gasang, yhang lé ji yu tô é hkún, haú Yhumsing mai yhang lé nyi nhang tô é đông asak dui nyi rá lhê. Haú gi, noqkuq hpúng pé banshoq má ngò tô to byí é tarâ nghut lhê. ¹⁸ Byù rayuq gi, ji yu é hui é hkún, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù đông a dut byuq sháng gaq. Byù rayuq gi, ji yu é hui é hkún, ahpyo-kuq hpyit a hkam yu to shí é nghut jáng, ahpyo-kuq hpyit a hkam yu sháng gaq. ¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lhê. ²⁰ Yuq hkangmó gi, yhang lé Garai Gasâng eq ji yu é hkún lhê su xoq nyi nyi rá lhê. ²¹ Náng gi, ji yù hui é hkún jùn dut nyi é lúh? Haú hkyô lé hkâ-myt chiq. Nghut kôlhang, náng gi, luthkyô wó yu é nghut jáng, haú đông nyi aq. ²² Hkâsu mù gâ le, haú Yhumsing eq ji yu é hui é hkún, jùn dut nyi é sù gi, haú Yhumsing eq lhoq lhut yu é byù nghut bê. Haú eq rajung za, ji yu é hui é hkún, luthkyô wó é sù gi, Hkrisduq é jùn nghut ri. ²³ Nungmoq gi, Garai Gasâng eq ahpau byi mù wui hpyit yu é hui bê bang nghut akô. Haú mù, byu pé é jùn hkâdut kó. ²⁴ Gumang wui é, yuq hkangmó gi, yhumsing lé Garai Gasâng eq ji yu é hui to bê đông, Yhâng é hí má xoq nyi nyi rá lhê.

²⁵ Ahkuí, zomyi zorâm wui é hkyô taí kôlé. Haú Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyín é yanmai, lungíng sù rayuq nghut nyi é dông, ngò, nungmoq lé hkyô shit rá nghut lhê. ²⁶ Ahkuí hui zô é wuihke hkyo é yanmai, nungmoq gi, yhumsing nyi to é su xoq nyi nyi le je ge ri ngùh, ngò wó myit ri. ²⁷ Nàng, myiháng bê a nghut lhi? Lhoq kang rá hkáda lo. Nàng, myi a háng shi a nghut lhi? Myi hkâhô lo. ²⁸ Nghut kôlhang, nàng, myiháng é nghut le gi, mara a nghut. Zomyi gi, myi lô é nghut jáng, mara a nghut. Nghut kôlhang, myiháng é bang gi, shi pyat má wuihke hkyô pé myo myo hui kó rá nghut mù, ngò, nungmoq lé haú mai hkyi yù nau ri.

²⁹ Gumang wui ê, ngò taí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq. * ³⁰ Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haú mینگkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shi mingkân é ahkuí lhê é azòng isâm gi, lai lô nyi é nghut lhê.

³² Ngò gi, nungmoq lé a myit myo nhâng nau. Myi a yù shi é sù gi, haú Yhumsing lé hkâsu wó gabú nhâng rá matú, haú Yhumsing é muzó lé myit chiq nyi ri. ³³ Nghut kôlhang, myi yù bê sù gi, yhâng é yhumsing myhi lé hkâsu wó gabú nhâng rá matú, mینگkan shi é muzó eq séng luí myit chiq nyi ri. ³⁴ Haú mù, yhâng shirong é myit gi, byo myín nyi ri. Myi a lô é myiwe nghut nghut, zomyi gyíng nghut nghut gi, yhâng é gungdu eq woi-nyi má haú Yhumsing lé rago wó ap nóng rá matú, Yhumsing é muzó pé eq séng luí myit chiq nyi ri. Nghut kôlhang, myi lô bê myiwe gi, yhâng é yhumsing hpó lé hkâsu wó gabú nhâng rá matú, mینگkan shi é muzó eq séng luí myit chiq nyi ri. ³⁵ Ngò, haú su ngùh taí é gi, nungmoq é matú ge é hkyô nghut lhê; nungmoq lé tara eq zui zing é a nghut é za, myit a byò lo shoq Yhumsing lé wó ap nóng rá matú, jô é dông asak wó duí kô sháng gaq nghu é hkyô ru nghut lhê.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngâm jáng, myiwe haú asak kô lo nyi mù, hâng yù rá dut bê ngùh myit é nghut le gi, yhang ô nau é dông kut sháng gaq. Yhang mara kut é a nghut. Yhangnhik gi, hâng lhum rá lhê. ³⁷ Nghut kôlhang, yhang gi, haú hkyô lé yhâng é myit mai wó lhoq zim pyâm é nghut mù, yut yut ô nau hkyo é ahkaú má a nghut é za, yhumsing ô nau é hkyô lé wó hkúm zing pyâm é sù nghut luí, haú zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsing hpó rù dui nyi nyi, yhang eq xoq tô ashí nghut lhê. Nghut kôlhang, yhâng é yhumsing hpó shi byuq é nghut jáng, yhang gi, myi lô rá ahkáng dum wó bê nghut lhê, nghut kôle, haú yuq gi, Yhumsing eq séng é sù dut rá lhê. ⁴⁰ Ngò jeyáng é dông ga jáng, myi a dum lô é wó nyi le gi, yhâng é matú je gabú hkyô dut rá nghut lhê. Ngò le, Garaí Gasâng é Woi-nyi wó sù ngùh wó myit ri.

* **7:29** A wó é bang dông nyi kó sháng gaq gâ é gi, Garaí mù lé je myit zuq nyi sháng gâ nau é nghut lhê.

8

Hparà Lhò Lé Tíng Byí É Zoshuq

¹ Ahkuí, hparà lhò pé lé tíng byí é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ² Byù rayuq yuq gi, rajung jung lé sé bún é nghut le, yhang sé àng é lé lhang a sé shi nghut ri. ³ Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

⁴ Haú mù luí, hparà lhò pé lé tíng byí é zoshuq lé zô é eq séng luí gi: hparà lhò gi, mingkan má haí lhang a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê. ⁵ Hkâsu mù gà le, mauhkung htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang ⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkangmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhò pé má mán byuq kô é yanmai, haú sù é zoshuq lé yhangmoq zô é hkún, hparà lhò lé tíng byí é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bún akô nghut ri. ⁸ Nghut kôlhang, zoshuq gi, nga-nhúng lé, Garai Gasâng shut shuí chyâng é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

⁹ Haú su ga kôlhang, nungmoq a htung a htê zô é hkyô gi, lumjíng myit wum nyhóm bâng é matú myit leqbat jowò a dut shoq sidiq keq. ¹⁰ Hkâsu mù gà le, sumsé hpaqchyí wó é bang nungmoq gi, hparà lho é noqkuq yhúm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhò pé lé tíng byí é zoshuq lé, yhang wám zo rá lé wum byí é a dut kô rá lú? ¹¹ Haú mù, Hkrisduq shi hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyí eq lhoq htên pyâm é hui berá nghut lhê. ¹² Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkún, Hkrisduq lé mara kut shut é nghut bekô. ¹³ Haú mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo rá nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhúng é Yhumsing Yesuq lé myang wú bê sù, a nghut lú? Nungmoq gi, haú Yhumsing má, ngò zui saí é muzó é ashí pé chyat, a nghut kô lú?

² Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gà le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gùng ngò tai hung kat kólé. ⁴ Ngamoq gi, zo rá shuq rá ahko ahkáng a wó é bang nghut lhê lú? ⁵ Gotú lagyo pé eq Yesuq é yhanggu yuqzô pé eq Kehpa kut é su, lumjíng sù nghut é yhumsing

myhí shuí chùng rã, ngamoq, ahko ahkáng a wó é nghut lhê lúh? ⁶ Ngò eq Barnaba baú za, asak ùi hkyo é matú mú zui ra rã lúh?

⁷ Ó yuq wá, yhumsing zoshuq wùn luí, gyè mù wùn waq rã lúh? Ó yuq wá, tsibiyiq hkyám saí mù, haú mã é tsibiyiq shi a zo kut rã lúh? Ó yuq wá, sau rêm mù, sau naú a shuq kut rã lúh? ⁸ Ngò gi, shí hkyô pé lé xângzo hkyam dông za taí é nghut lhê lúh? Haú tarã mã le, rajung za taí tô lhê, a nghut lúh? ⁹ Hkâsu mù gã le, haú Mosheq é tarã mã, "Guq nâng nyi é no lé nhuttsung hkâ-tsúng to byi."* ga kê tô ri. Garai Gasang gi, no eq séng luí za chiq é nghut lhê lúh? ¹⁰ Gè gè yhang, yhang gi, nga-nhùng é matú taí é a nghut kô lúh? Nghut lhê, haú gi, nga-nhùng é matú kê to byí é nghut lhê. Haí mù gã le, yò hpuq sù, yò hpuq é eq, guq bat sù, guq bat é gi, kyô chòm shù yù rã lé myoqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sãn kat bê nghut mù, nungmoq chyáng mã é mingkan zè lé shù yu é nghut jáng, lùm myô é dut byuq bekô lúh? ¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó rã lhê a nghut kô lúh?

Nghut kôlháng, ngamoq gi, ahko ahkáng haú lé a yu é nghut lhê. Haú yù rã malaí, Hkrisduq é gabú danglù gi, hkùm zing pyám é a hui rã matú sheq, jung hkanmó lé ngamoq hkam jãn nyi lhê. ¹³ Haú noqkuq yhùm mã mú zuí é bang gi, yhangmoq é zoshuq lé haú noqkuq yhùm mai wó é hkyô eq, hkungga gyap mã dojaú é bang gi, hkungga gyap mã nhông byí é ra-am lé myàng zô é hkyô lé, nungmoq a sé kô lúh? ¹⁴ Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú rã lhê ga, haú Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haú pé haí lé le a yu é nghut lhê. Nungmoq, ngò lé haú su lhom kut byi rã lé myoqbyù mù, ngò, shí hkyô lé kê é a nghut. Hkâsu mù gã le, ngò haú su gumrong é hkyô lé, rayuq yuq lhoq htên pyám byi rã htoq mã, ngò shi byuq le lhang je ge ri. ¹⁶ Nghut kôlháng, gabú danglù lé ngò hko kyô é hkùn, ngò gumrông jang a joq; hkâsu mù gã le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó rã nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó rã nghut lhê; yhumsing nau é myit mai a nghut jáng gi, ngò lé lùm luí ap tô é lé, agon za wùn waq nyi é dut rã nghut lhê. ¹⁸ Haú mù luí, ngá é shigyaú chyunghuq gi, haí nghut lhê lúh ga jang, haú gabú danglù lé hko kyô é hkùn, ngò gi, ahpau a yu é za wó ap nong luí, gabú danglù hko kyo hkyô mã é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô mã le a nyi é za, lut sù nghut kôle, byù wó myô é myhó shuí lhing yù rã matú, ngá gũng ngò, yuq hkanmó é jùn kut nyi lhê. ²⁰ Ngò gi, Yudaq byu pé lé shuí lhing yù rã matú, Yudaq byu pê chyáng nghut nyi é hkùn, Yudaq byù rayuq dông dut nyi lhê. Ngò gi, tarã hkaú mã nyi sù a nghut kôlháng, tarã hkaú mã é bang lé shuí lhing yù rã matú, tarã hkaú mã nyi bãng chyáng nghut nyi é hkùn, tarã hkaú mã é byù rayuq dông dut nyi lhê. ²¹ Ngò gi, tarã a wó bang lé shuí lhing yù rã matú, tarã a wó bãng chyáng nghut nyi é hkùn, tarã a wó sù rayuq dông dut nyi lhê. Nghut kôlháng, gè gè ga jáng, Garai Gasâng é tarã mai a lut htoq é za, Hkrisduq é tarã hkaú mã nyi sù nghut lhê. ²² Ngò gi, wum nyhóm bang lé shuí lhing yù rã matú, wum nyhóm bãng chyáng nghut nyi é hkùn, wum nyhóm sù rayuq dông dut nyi lhê.

Ngò gi, wó dut é hkyô dông mai byù ra-am lé wó hkyî sháng gaq nghû, byù lhunglhang bâng chyáng, byù ajà jà dông nyi nyi lhê. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

²⁴ Din shingjóng poi má din rá bang banshoq din kôlhang, rayuq za shigyaú chyunghuq wó é hkyô lé, nungmoq a sé kô lúh? Chyunghuq wó rá matú din keq. ²⁵ Sup poi má shingjóng lhum é bang yuq hkanmó gi, yhumsing gung yhumsing tarâ htan é dông lhoq mhân yù rá lhê. Yhangmoq gi, gíng nyi rá a nghut é janmaú wó rá matú, haú su kut é nghut akô; nghut kôlhang, nga-nhung gi, ahtum abyuq gingting nyi rá nghut é janmaú wó rá matú shikut é nghut lhê. ²⁶ Haú mù luí, ngò gi, jum din din é byù rayuq su din é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbang chyáng mungdang hko é htáng má, ngá gung ngò, shigyaú chyunghuq eq a gingdán sù a dut sháng gaq nghû, ngá gung lé gyai yhang lhoq mhân yù mù, ngá gung lé jùn kut yu nyi lhê.

10

Israelaq Pê É Labaú Mai Sidiq Byí É Hkyô

¹ Gumang wuì ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkún, nga-nhung é íchyí íwa pé banshoq bang gi, mhutdúm ô má nyi mù, Nhông Nè mai wó lai byit kô é nghut lhê. ² Yhangmoq banshoq bang gi, mhutdúm eq Nhông Nè má, Mosheq é chángzô pé dông baptisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wuì shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gung sôm lé yoso pé má myhín so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhung a myit tuí nyi rá matú nga-nhung é azông dut bê nghut ri. ⁷ "Byu pé gi, zùng mù, zo luí shuq luí, a lumjing bang kut é dông, toq mù, ye bum akô." ⁸ ga kô tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kô. ⁸ Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mún sum hkying yuq shí byuq é su, ashop é dông gungsho zùm yap é hkyô le, nga-nhung gi, a ge kut shut rá nghut lhê. ⁹ Yhangmoq mâ é ra-am gi, haú Yhumsing lé chyâm luí, lhangmui pé eq hte sat é hui bùm kô é su, haú Yhumsing lé, nga-nhung gi, a ge chyâm rá nghut lhê. ¹⁰ Yhangmoq mâ é ra-am gi, nhutluq shô-myô kôluí, lhoq htén é maumâng eq sat pyâm é hui kô é su, nungmoq gi, nhutluq shô-myô hkâkut kô.

¹¹ Yhangmoq chyáng wú yù rá azông dông haú pé dut htoq luí, ló htáng rá ipyat pé má nyi âng to bang nga-nhung é matú sidiq byi rá dông kâ to bê nghut ri. ¹² Haú mù luí, nungmoq gi, yap gíng nyi bê su ngàm kô é nghut jáng, a leqbat rá matú sidiq nyi keq! ¹³ Byu chyáng htoq sê é gunglau hkyô za nungmoq hui rá nghut lhê. Garai Gasang gi, lhumzui sù nghut lhê mù,

* **10:1** Bun zo ralhumi mai raxê lhum gi, Htoq Ló Laiká má bo é Mosheq htáng cháng bâng é hkyô lé kâ tô é nghut lhê. ✪ **10:7** Htoq Ló 32:6

nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huí é hkûn, Yhang gi, haú lé nungmoq wó jan râ matú, hkyô htong byi râ nghut lhê.

Hparà Lhò Noq Hkyô Lé Koi Pyám Râ Hkyô

14 Haú mù luí, ngò chyitdap é luzúm wui ê, hparà lhò noq hkyô lé koi pyám keq. 15 Nhik gyíng bang lé ngò tai lhê; ngò hai tai nyi é hkyô lé nungmoq gùng myit sôn yù keq. 16 Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kó lú? 17 Hai mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haú rahtung zâ é muk lé chôm gâm zô é bang chyat nghut lhê.

18 Israelaq byu pê é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lhê, a nghut kó lú? 19 Hparà lhò, a nghut jáng, hparà lhò lé tîng byí é hkungga gi, rajung jung nghut lhê ngúh, ngò tai é lú? 20 Haú su tai é a nghut, a lumjîng bâng é hkungga gi, Garai Gasang lé nhông byí é a nghut, nat gâng pé lé tîng byí é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. 21 Nungmoq gi, haú Yhumsing é góm lé le, nat gâng pé é góm lé le, ge shuq râ a nghut; nungmoq gi, haú Yhumsing é zangbó má le, nat gâng pé é zangbó má le, rahá ge bo lòm râ a nghut. 22 Nga-nhúng gi, haú Yhumsing lé manôn nhâng nau é bang dut râ a nghut kó lú? Nga-nhúng gi, Yhâng htoq je wúm bo é bang nghut lhê lú?

Lumjîng Su É Luthkyô

23 "Jung hkangmó kut râ ahkáng wó lhê." nghut kôlhang, jung hkangmó gi, akyû wó é a nghut. "Jung hkangmó kut râ ahkáng wó lhê." nghut kôlhang, jung hkangmó gi, byù lé wó kô làm nhang é a nghut.† 24 Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

25 Sho ùng gài má ùng é hai lé lé, ùng-âng é myit èq a myí gôn é za zo keq. 26 Hkâsu mù gâ le, "Myidàm htoq eq haú má joq é jung hkangmó gi, Yhumsing é chyat nghut lhê."* gâ tô ri.

27 A lumjîng bang ra-am, nungmoq lé zang zo jì mù, nungmoq ê nau é nghut jáng, ùng-âng é myit èq a myí gôn é za, nungmoq hí má to byí é gù lé zo keq. 28 Nghut kôlhang, rayuq yuq, nungmoq lé, "Shí gi, hparà lhò lé tîng byi bê nghut lhê." ga tai kyô é nghut jáng, nungmoq lé tai kyo su é yanmai le, myit ùng-âng é yanmai le, haú lé hkâzo kó. 29 Ùng-âng é myit haú gi, nungmoq é a nghut, góyuq é ùng-âng é myit lé tai nau é ru nghut lhê. Ngá é luthkyô lé, hai mù góyuq é ùng-âng é myit èq jéyáng é huí nhang lhê lú? 30 Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, hai mù lumu pyám é ngò hui râ lú?

31 Haú mù luí, nungmoq zo kôlhang, shuq kôlhang, hai kut kôlhang, Garai Gasâng é hpungwup shíngkâng é matú chyat kut keq. 32 Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mã é byù lé nghut nghut, ó yuq lé le myit hkâleqbat nhâng kó.

† 10:23 Bun zo 23 mã é dangngho gi, Korinhtuq byu pé lhaq tai é dang nghut lhê. * 10:26 Hkya-on 24:1

³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik châng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bûn nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkangmó gi, kyúdûng le nghut nghut, myiqhtoi htoí le nghut nghut, yhâng é ulhum lé nghop tô é nghut jáng, yhâng é ulhúm é aróng lé lhoq hpoi pyâm é nghut bê.

⁵ Myiwe hkangmó gi, kyúdûng le nghut nghut, myiqhtoi htoí le nghut nghut, yhâng é ulhum lé a nghop tô é nghut jáng, yhâng é ulhúm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri.

⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra rá nghut lhê. Nghut kôlhâng, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra rá nghut lhê. ⁷ Yuqgè gi, Garai Gasang é azong isâm eq hpungwup shing kang nghut é yanmai, yhâng é ulhum lé a nghop rá é nghut lhê. Myiwe kúm gi, yuqge é hpungwup shing kang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. ¹⁰ Haú nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop rá dut lhê.

¹¹ Nghut kôlhâng, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhâng, jung hkangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyúdûng é gi, htuk kô rá lú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shing kang nghut é hkyô lé, htunglí eq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop rá zè đông yhang lé byi tô é nghut lhê. ¹⁶ Rayuq yuq, haú hkyô lé tá dang-rhâng nau é nghut jáng, ngamoq chyáng le, Garai Gasang é noqkuq hpûng pé chyáng le, gotú htunglí a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut rá htoq má akýú a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpûng ralhum đông nungmoq zup zîng é hkûn, nungmoq hkaú má gam hkoq hkyô joq é lé wó gyô é nghut luí, têng é le bò rá nghû, ngò lumjîng lhê. ¹⁹ Ó pé gi, Garai Gasang o é hkyam shut nghut é

lé wó shit rá matú, nungmoq ahkaû má gam hkoq lhum hkyô joq rá dut lhê. ²⁰Nungmoq rahá zup zing kô é hkûn, nungmoq gi, haû Yhumsing é myinzang zô é a nghut kô. ²¹Hkâsu mù gà le, nungmoq zô é hkûn, góyuq lé le a láng é za, ó le ó hí yù zô akô. Haû mù, rayuq gi, zo mut huí nyì, góyuq gi, shuq wut to dut akô nghut ri. ²²Nungmoq gi, zo jang shuq jang yhùm a wó bang nghut akô lúh? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lúh? Nungmoq lé ngò hkâsu nghù tai kô rá lúh? Haû pé é yanmai, ngò, nungmoq lé hkya-on rá lúh? Ratsuí lháng a wó dut!

²³Hkâsu mù gà le, haû Yhumsing chyáng mai ngò wó hap yu é gù lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huí é myin má, muk lé yù mù, ²⁴jeju hkya-ôn é htàng má, haû lé myhik hpé mù, tai é gi, "Shî gi, nungmoq é matú Ngá é gungsho nghut lhê; Ngo lé bûn nyì rá matú, shî su kut nyí keq." gà ri. ²⁵Haû eq rajung za, myinzang bàn zô é htàng má, Yhang gi, góm lé le yù mù, "Góm shî gi, Ngá é sui má é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyì rá matú shî su kut keq." gà tai ri. ²⁶Hkâsu mù gà le, nungmoq gi, muk shî lé zo luí, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyì rá lhê.

²⁷Haû mù luí, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸Haû mù, ó yuq le, muk zo góm shuq rá hí má, yhumsing gùng yhumsing jep wú ra rá nghut lhê. ²⁹Hkâsu mù gà le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê. ³⁰Haû nghut é yanmai, nungmoq má é byù myo myo gi, wum nyhôm é, nõhpyo huí é nghut bum akô. Ra-am gi, shi ló byuq bekô nghut ri. ³¹Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tará jéyáng é huí rá a nghut. ³²Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhogshit é huí nyì gù bê nghut lhê.

³³Haû mù luí, ngá é gumang wui é, nungmoq gi, zo rá nghù rahá zup zing é hkûn, rayuq eq rayuq láng lhum keq. ³⁴Nungmoq rahá zup zing é hkûn, jéyáng é a hui zo kó sháng gaq, rayuq yuq zòmut é nghut jáng, yhùm má zô chýng rá lhê.

Gotú myit tô é hkyô pé gi, ngò jé lé é hkûn sheq shit kyo rá nghut lhê.

12

Woi-nyí Hkyô Eq Sêng É Chyunghuq Pé

¹Gumang wui é, woi-nyí hkyô eq sêng é chyunghuq pé lé, nungmoq a sê gyo rá lé ngò a ô nau é nghut lhê. ²Nungmoq gi, a lumjǐng bang nghut nyí kô é hkûn lé, dang a nyo é hpará lhô noq rá matú hkyô shuí nghoq é huí kô é hkyô lé, nungmoq sê lhê. ³Haû mù luí, "Yesuq gi, nhing pyám é huí sháng gaq." ga, Garai Gasâng é Woi-nyí mai tai é byù ó yuq le a nyí é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó tai é nghut lhê nghù, ngò, nungmoq lé tai kyô é nghut lhê.

⁴Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶Zui sai é hkyô ajung

jung joq lhê, nghut kôlhâng, Garai Gasang yhang za, byù lhunglhâng bang má, hau pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. ⁸ Rayuq lé gi, Woi-nyí hau mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjínng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklai dang ahú hú ge taí é ahkáng; dum, góyuq lé gi, dang hau pé é lichyúm taí sân kyô é ahkáng, byí é nghut ri. ¹¹ Chyunghuq hau pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkangmó lé hau pé tsing gam byí é nghut ri.

Gungbun Myo Kôlhâng, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhâng, ragùng za nghut ri; gungsho showui showang pé banshoq myo myo nghut kôlhâng, gungdu ra gùng za dut tô é nghut ri. Hau eq rajung za, Hkrisduq eq le hau dông nghut ri. ¹³ Hkâsu mù gà le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Hau gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Hau hkyí gi, "Ngò, loq a nghut é yanmai, gungdu eq a sêng é nghut lhê." gà é nghut jáng, hau é yanmai, gungdu eq a sêng wó dut é a nghut. ¹⁶ Dum, hau nohkyap gi, "Ngò, myoqjí a nghut é yanmai, gungdu eq a sêng é nghut lhê." gà é nghut jáng, hau é yanmai, gungdu eq a sêng wó dut é a nghut. ¹⁷ Ragùng dù é gi, myoqjí za nghut é nghut jáng, gyô é hkyô gi, hkâmá nghut râ lhu? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhu? ¹⁸ Nghut kôlhâng, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lhu? ²⁰ Hkyak ga jang, gungsho showui showang pé myo kôlhâng, gungdu gi, ragùng za nghut ri.

²¹ Hau myoqjí gi, loq lé, "Ngò, nang lé a ra!" nghù a ge taí. Hau ulhum gi, hkyí lé, "Ngò, nang lé a ra!" nghù a ge taí. ²² Hau za a nghut, gungdu má é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lhê. Hau a shit é jung gungsho pé lé, nga-nhúng hpautap é dông rago nghop râ lhê. ²⁴ Nga-nhúng é wó shit é gungsho pé kúm gi, hau hkyô a ra nghut ri. Nghut kôlhâng, Garai Gasang gi, gungdu é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Hau mù, gungdu má gamhkuí lhùm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lhê. ²⁶ Hau gungsho showui showang ralhum jamjau huí é nghut jáng, lhum hkangmó bo jamjau râ nghut lhê. Ralhum hpautap huí é nghut jáng, lhum hkangmó bo gabú é nghut lhê.

²⁷ Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haú é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghú râ má, myiqhtoi pé, sùm lhum nghú râ má, mhoqshit bang, hau htâng má, laklai kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-ı râ chyunghuq wó é bang, laklai dang ahú hú ge tai é bang lé, masat to bê nghut ri. ²⁹ Banshoq bang gi, lagyô pé nghut lhê lhú? Banshoq bang gi, myiqhtoi pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklai kumlhá kut akô lhú? ³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklai dang ahú hú ge tai lhê lhú? Banshoq bang gi, dang hauú pé é lichyúm ge tai sân kyô lhê lhú? ³¹ Nghut kôlháng, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuî, ngò, nungmoq lé, je gyaú dik é hkyô ralhú shít kôlé.

13

¹ Ngò gi, byu pé é eq maumang lagyô pé é mying pé lé sê tai é nghut kôlháng, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. ² Ngò gi, myiqhtoi htoi é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjینگ myit bo é nghut kôlháng, chyitdap myit a bo é nghut jáng, ngò hai a nghut sù dut berâ nghut lhê. ³ Ngò gi, wó é sutzé banshoq myúng bang lé byí pyám é eq, ngá é gungdu lé nyhê pyám râ matú ap pyám é nghut kôlháng, chyitdap myit a bo é nghut le gi, hai akyú a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a tai, a nghutbún é nghut lhê. ⁵ Chyitdap myit gi, hpau a dap é hkyô a kut, yhumsing é akyú baú za a hô, lui za nhikjum a yo, shut é mara a matsing é nghut lhê. ⁶ Chyitdap myit gi, agè ashop é má a gabú é za, hau tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htúm byuq é a nghut. Myiqhtoi htoi é hkyô pé gi, byuq byuq râ nghut lhê; laklai dang ahú hú ge tai é hkyô gi, zim byuq râ nghut lhê; sumsé hpaqchyí hkyô gi, lai ló byuq râ nghut lhê. ⁹ Hkâsu mù gâ le, nga-nhúng sê é gi, ra-am rahtáng ru nghut lhê. Nga-nhúng myiqhtoi htoi é gi, ra-am rahtáng ru nghut lhê. ¹⁰ Nghut kôlháng, gumjup hkyô jé lé é hkún, a gumjup hkyô gi, byuq byuq râ nghut lhê. ¹¹ Ngò, zoshâng nghut ashí hkún gi, zoshâng dông dang tai, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹² Ahkuî, nga-nhúng gi, myoqjám hkaú má é rago a sân é wupzo lé za myàng é nghut lhê; nghut kôlháng, htâng má, myoqdong hkyúm wó myàng râ nghut lhê. Ahkuî, ngò gi, ra-am rahtáng za sê é ru nghut lhê; nghut kôlháng, Garai Gasang gi, ngò lé gumjup shoq sê é su, ngò le, htâng má, gumjup shoq sé râ nghut lhê.

¹³ Ahkuî, lumjینگ myit, myit myoqbyú hkyô, chyitdap myit shi sùm lhum myit tô ri. Nghut kôlháng, hauú pé má é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklai Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyí keq. Myiqhtoi htoi é chyunghuq lé je riyhang myit o nyí keq. ² Hkâsu mù gà le, laklai dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haù Woi-nyí eq nyo htoq é nghut ri. ³ Nghut kôhang, myiqhtoi htoi é sù yuq hkanmó gi, byu pé lé wum byi dang eq nhik ting dang tai ri. ⁴ Laklai dang rahú nyo é sù gi, yhumsing gung lé htuqbang byí ri, nghut kôhang, myiqhtoi htoi é sù gi, noqkuq hpúng lé htuqbang byí ri. ⁵ Ngò gi, nungmoq yuq hkanmó laklai dang ahú hú pé nyo rá lé ô nau ri, nghut kôhang, nungmoq myiqhtoi htoi rá lé je ô nau é nghut lhê. Hkâsu mù gà le, laklai dang ahú hú nyo é sù gi, haù noqkuq hpúng lé wó htuqbang rá matú, lichyúm lé tai sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé je mù, laklai dang pé nyo é nghut kôle, shing-rán nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a tai kyô é nghut le gi, nungmoq é matú ngò hai akyú htoq rá lhú? ⁷ Htê lhoq htoq é asak a bo jung zè pé má lhang gi, sampyí nghut nghut, ting nghut nghut, gam hkoq tô é htê a joq é nghut jáng, mut myhing bat myhing é htê hai nghut é lé, hkâsu wó sé rá lhú? ⁸ Dum, tut htê le gam hkoq é đông a mut kyô é nghut jáng, majan htoq rá ri ri ó yuq wá hên rá lhú? ⁹ Nungmoq chyáng le haù đông nghut lhê. Nang, laklai dang ahú hú nyo le, sê gyô é danghkun mai nyo é za a nghut jáng, nang hai tai nyi é lé ó yuq wá hkâsu wó sé rá lhú? Nungmoq gi, maual má za tai hâng pyâm nyi kó rá nghut lhê. ¹⁰ Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haù mù luí, rayuq yuq hai tai nyi é lichyúm lé ngò a dat chyup é nghut jáng, ngò gi, haù dang tai su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haù đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi beko nghut mù, haù noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haù nghut é yanmai, laklai dang ahú hú tai é sù ó yuq le, yhang haù tai é lichyúm wó tai sân kyo sháng gaq, kyúdung rá dut lhê. ¹⁴ Hkâsu mù gà le, laklai dang ahú hú đông ngò kyúdung é nghut jáng, ngá é woi-nyí mai dúng é nghut lhê; nghut kôhang, ngá é myitnyân é matú, hai akyú a wó nghut ri. ¹⁵ Haù mù, ngò hkâsu kut rá lhú? Ngò gi, ngá é woi-nyí mai le kyúdung rá, ngá é myitnyan mai le kyúdung rá nghut lhê; ngò gi, ngá é woi-nyí mai le mahkôn hkôn rá, ngá é myitnyan mai le mahkôn rá nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang má é rayuq gi, nungmoq hai tai é lé a sê é nghut mù, nungmoq jeju hkya-on é hkùn, "Amen" ga hkâsu wó tai rá lhú? ¹⁷ Nungmoq gi, ge dik shoq jeju hkya-on kô é abe, nghut kôhang, góbang gi, htuqbang é a hui kó nghut ri.

¹⁸ Ngò gi, nungmoq banshoq bâng htoq má laklai dang ahú hú je wó tai é yanmai, Garai Gasang lé jeju bún ri. ¹⁹ Nghut kôhang, noqkuq hpúng má, laklai dang rahú đông danghkun ramun ngò tai rá htoq má, góbang lé mhoqshit rá akyú bo é dang ngo hkun tai rá lé ngò je ô nau ri.

²⁰ Gumang wui ê, zoshâng wui su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq. ²¹ Haù jep é tarâ má kê tô é gi, "A wó gyô wú é dang dông mai le, góming byu pé é nhutwui dông mai le, byù shí bang lé ngò tái râ nghut lhê; nghut kôlhâng, yhangmoq gi, ngá dang gyo kó râ a nghut." ga Yhumsing tái ri."*

²² Haù mù, laklai dang ahú hú nyo é hkyô gi, lumjینگ bâng matú kumlhá a nghut é za, a lumjینگ bâng matú sheq ru nghut lhê. Myiqhtoi dang kúm gi, a lumjینگ bâng matú a nghut é za, lumjینگ bâng matú sheq ru nghut lhê. ²³ Haù nghut mù, noqkuq hpúng gón chôm zing mù, yuq hkangmó laklai dang ahú hú nyo kê é nghut jáng, a sê gyô é bang nghut nghut, a lumjینگ é bang nghut nghut, wang lé kê é hkùn, yhangmoq gi, nungmoq nâ bùm bekô ga a tái kó râ nghut lhê lhú? ²⁴ Nghut kôlhâng, yuq hkangmó, myiqhtoi dang tái nyi é u má, a lumjینگ sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq eq lhoq pún kyíng é hui râ eq, banshoq eq jéyáng é hui râ nghut é htoq agó, ²⁵ yhâng é i-myt má záu tô é hkyô pé lé de de lhoq htoq shit é hui râ nghut lhê. Haù mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga tái pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haù jáng, gumang wui ê, nga-nhúng hai tái râ lhú? Nungmoq rahá lé chôm zing é hkùn, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklai dang ahú hú nyo é hkyô nghut nghut, tái sân kyô é nghut nghut pé lé, wó le ge ri. Haù pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklai dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyo râ dut é htoq agó, rayuq yuq haù lé tái sân kyo ra râ dut lhê. ²⁸ Tái sân kyô é sù a nyi é nghut jáng, laklai dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut tái kyo râ dut lhê; góbang gi, hai tái é lé rago gyô chyam wú râ dut lhê. ³⁰ Nghut kôlhâng, zung tô é sù rayuq yuq chyáng shing-rán jé é nghut jáng, hí tái nyi é sù gi, nô byuq râ dut lhê. ³¹ Hkâsu mù gà le, yuq hkangmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoi é nghut lhê. ³² Haù myiqhtoi pé é woi-nyi pé gi, myiqhtoi pé uphâng é a-ô má nghut nyi ri. ³³ Hkâsu mù gà le, Garai Gasang gi, atau ahù dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng bâng zing tô é hpúng banshoq má é eq rajung za, ³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang tái ahkáng a wó é nghut mù, haù jep é tarâ má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé naù kê é nghut jáng, yhùm má yhangmoq é yhumsing hpô pé chyáng nyi kó sháng gaq; hkâsu mù gà le, myiwe rayuq noqkuq hpúng má dang tái é gi, ahoq ahí hkyô nghut ri.

* 14:21 Esai 28:11-12

³⁶ Haû Garai Gasâng é mungdang gi, nungmoq chyáng mai htoq lo é nghut lhê lúhú? Haû gi, nungmoq chyáng za lé jé bê nghut lhê lúhú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang se yù sháng gaq. ³⁸ Yhang gi, haû lé haû su a ngàm kut é nghut jáng, yhânggùng le, haû su a ngàm kut é hui zo rà nghut lhê.

³⁹ Haû mù luí, ngá é gumang wui é, myiqhtoi htoi rà lé ô nau nyi mù, laklai dang ahú hú nyo é lé hkâhkâm pyám kó. ⁴⁰ Nghut kôlhang, jung hkangmó gi, htuk é dông eq shuq shuq tap tap zâ é hkyô dông kut é dut rà lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gíng tô é jowò nghut é gabú danglù hkyô lé, ahkuí, ngò, nungmoq lé lhoq pún kat nau ri. ² Ngò, nungmoq lé hko kyo bê é mungdang lé, nungmoq gíng gíng myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haû a nghut jáng, nungmoq lumjǐng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haû pé gi: Chyúmdang eq rajung za, Hkrisduq gi, nga-nhùng é yubak mará é matú shí hkám byi bê gâ é nghut ri; ⁴ Yhang gi, myhup yhúm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit luí, haû lagyo raxe í yuq lé le htoq shit ri.

⁶ Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haû bang má é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htâng má, Yhang gi, hkú buinyi a jé shí é má hku é dông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyo pé má é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghú rà lhang a gíngdán é sù nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mú wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haû mù luí, ngò nghut nghut, yhangmoq nghut nghut, ngamoq hko kyô é gi, haû hkyô chyat nghut lui, nungmoq lumjǐng é le, haû hkyô nghut ri.

Shi Byuq Bâng É Dui Toq Hkyô

¹² Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ra-am gi, shi byuq bâng é dui toq hkyô a joq nghú, hkâsu wó tái kó rà lúhú? ¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berá a nghut. ¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjǐng hkyô gi, akôm dut byuq rà nghut lhê. ¹⁵ Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq rà za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat

râ a nghut. ¹⁶ Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjúng hkyô gi, akôm dut lui, nungmoq gi, nungmoq é yubak mara hkaû má ru nyi nyi shi kó râ nghut lhê. ¹⁸ Haû nghut jáng, Hkrisduq má shi ló byuq bê bang le, htên byoq byuq râ za nghut lhê. ¹⁹ Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

²⁰ Nghut kôlháng, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shí-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lhê. ²² Hkâsu mù gâ le, lhunglháng bang gi, Adam é yanmai shi byuq é su, lhunglháng bang gi, Hkrisduq eq rading ralhun za nghut é yanmai lhoq dui toq é hui râ nghut lhê. ²³ Nghut kôlháng, yuq hkangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. ²⁴ Hau htâng, jihthum jé râ nghut lhê; haû hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haû Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyi wang ô má tô pyâm é hkûn jé shoq up nyi ra râ nghut lhê. ²⁶ Haû lhoq htên pyâm é hui râ nghut é ló htâng é gye gi, shí-nò hkyô nghut ri. ²⁷ Hkâsu mù gâ le, "Garai Gasang gi, jung hkangmó lé, Yhâng é hkyi wang ô má tô pyám bê nghut ri."* gâ Chyúmdang má kâ tô ri. "Jung hkangmó lé" Yhâng é a-ô má tô pyám bê ga tai é hkûn, jung hkangmó lé Hkrisduq é a-ô má tô pyám bê sù Garai Gasang yhang kum a lom é hkyô, san za nghut nyi ri. ²⁸ Yhang gi, haû hkyô ban kut é htâng má, haû Zo yhang le, jung hkangmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglháng htoq má gyaú sù nghut lui, lhunglháng lé sêng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kô é gi, hai akyú bò kó râ lú? Haû shi byuq bang lhoq dui toq é a hui kô é ru nghut le gi, yhangmoq matú hai mù byu pé wui-myhup hkâm yù kó râ lú? ³⁰ Ngamoq gi, ngamoq é matú, hkyíng hkangmó hai mù chiq râ jowó má nyi râ lhê lú? ³¹ Gumang wui é, ngò gi, nyi wui aluq shoí shoí shi é hui zô é nghut lhê. Haû su ngù é gi, nga-nhúng é Yhumsing Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam đông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyú bò râ lú? Shi byuq bang lhoq dui toq é a huí é ru nghut le gi,

"Nga-nhúng gi, napmá shi râ nghut é yanmai,
zo sháng, shuq sháng."*

ngù râ za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí ngoq é hkâhui zo kó! ³⁴ Nungmoq gi, tau bún gyíng lò mù, mara hkâkut shut lo kó;

* 15:27 Hkya-on 8:6 ✧ 15:32 Esai 22:13 * 15:32 Dang ngho shí gi, a lumjúng bang tai é dang nghut lhê.

hkâsu mù gâ le, Garai Gasang lé a sê é byù ra-am nyi akô. Ngò haù su nghù taí é gi, nungmoq hoq bun rà matú nghut lhê.

Dui Toq É Gungdu

³⁵ Nghut kôlhang, rayuq yuq gi, "Haù shi byuq bê bang, hkâsu kut lhoq dui toq é hui kó rà lhu? Yhangmoq gi, hkasú é gungdu nghut kó rà lhu?" ga myi rà nghut lhê. ³⁶ Haù-i nghâ sù ê! Nang hô hkyô kat é pé gi, shi byuq é za a nghut jang, yuq htoq lô rà a nghut mhaí. ³⁷ Nang, kyô hkyô é hkûn, yuq lò rà nghut é agàm lé hô hkat e a nghut é za, sunsô amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haù lé gungdu ralhùm byi mù, kyôshi myui hkangmó lé, ó le ô é gungdu byi ri. ³⁹ Gungsho lunglhang gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut luí, myidam gùng pé le joq ri; nghut kôlhang, mauhkûng gùng pé é shing kang gi, rajung, myidam gùng pé é shing kang gi, gó jung ru nghut lhê. ⁴¹ Haù bùi má bo é shing kang gi, rajung, lhamó mã é gi, gó jung, kyí pé mã é gi, gó jung ru nghut lhê; kyí racham eq rachâm é shing kang le gotû tû shai lhum lhê.

⁴² Haù mù, shi byuq bê bang é dui toq hkyô le, haù eq rajung za nghut ri. Haù hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haù nghut mù, "Haù sâng-hi yuq byù Adam gi, asak dui é xângzo dut bê nghut ri."[✠] ga kê tô ri. Haù ló htâng é Adam kúm gi, asak byí é woi-nyí nghut ri.[†] ⁴⁶ Haù woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haù sâng-hi yuq byù gi, myidam mã é tseyun lé saí é nghut mù, htang híe yuq byù gi, mauhkûng htoq mã é nghut ri. ⁴⁸ Haù myidam byù nghut sù su, myidam eq sêng é bang le nghut nyi akô; haù mauhkûng htoq mã é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidam byù é gunghkyâng isâm lé hkam yù bê nghut é su, mauhkûng htoq mã é byu é gunghkyâng isâm lé le myang hkam yù rà nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasang é mingdân é silí wunlí lé wó yù rà a nghut, htên byoq sê é le, htên byoq a sê é silí wunlí lé wó yù rà a nghut. ⁵¹ Gyo to keq, záu tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq rà a nghut é za, htaí lhik é hui rà ru nghut lhê. ⁵² Haù gi, ló htâng é tut htê mying é hkûn, ralháp za, myoqkuq ralap má dut rà nghut lhê. Hkâsu mù gâ le, tut htê mying rà nghut lhê, haù hkûn, shi byuq bê bang gi, htên byoq a sê é shut lhoq dui toq yu é hui rà nghut mù, nga-nhúng gi, htaí lhik é hui rà nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù rà dut é nghut lhê. ⁵⁴ Haù htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù é

✠ 15:45 Apûn 2:7 † 15:45 Ló htâng é Adam gi, Yesuq lé taí nau é nghut lhê.

hkûn sheq, "Shî-nò hkyô gi, ûng budâng eq myui pyâm é hui bê nghut ri."* ga kâ tô é eq,

⁵⁵ "Shî-nò hkyô ê, náng é ûng budang gi, hkâmá lúh? Shî-nò hkyô ê, náng é nyin gi, hkâmá lúh?"*

gâ tô é sanghkyang gi, dik râ nghut lê. ⁵⁶ Haù shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkyâ-ôn lê! Yhang gi, nga-nhûng é Yhumsing Yesuq Hkrisduq dông mai, nga-nhûng lé ûng budang byi é nghut ri.

⁵⁸ Haù mù luí, ngá é chyitdap gumang wui é, yap gingting nyi keq. Hai èq le, nungmoq lé hkâlhoq dui nún nhâng kó. Nungmoq gi, haù Yhumsing má nungmoq wùn waq é muzó akôm a nghut é lé sé kô é nghut lê yanmai, haù Yhumsing é muzó lé ayang wùn waq shikut nyi keq.

16

Yerusalem Wà Mó Mã É Lumjing Bâng É Matú Alu Hkyuì Râ Hkyô

¹ Ahkuí, Garai Gasang é byu pé é matú alu hkyuì râ hkyô eq séng luí gi, haù Galatiq mau mã é noqkuq hpúng pé lé ngò kut nhang é su kut keq. ² Ngò jé lé é hkûn, alu hkyuì râ hkyô a kut ra râ dông, bat hkangmó mã é sâng-hi nyí má, yuq hkangmó gi, yhumsing wó ho é má cháng mù, gam tô to lánq keq. ³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wa mó mã é dé nhâng râ nghut lê. ⁴ Ngò le é ang râ dut é nghut jáng, yhangmoq gi, ngá é byinzùm kut râ nghut lê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé râ nghut lê. Hkâsu mù gâ le, ngò gi, Makedoni mau lai byit râ za nghut lê. ⁶ Ngò hkâmá é kôlhang, ngá é hkyowui má nungmoq wó garúm kat kó râ matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyi abe. ⁷ Ngò gi, lai ló uchyang za nungmoq lé lé kum râ nghut mù, ahkuí wó myâng râ lé a nau é nghut lê; ngò gi, haù Yhumsing dông é nghut jáng, nungmoq eq rahá rayoq nyi râ lé myit myoqbyu lê. ⁸ Nghut kôlhang, ngò gi, Penteko-ti poi buinyi jé shoq Ehpesu myuq má nyi râ nghut lê. ⁹ Hai mù gâ le, ngo lé htuaq htíng é bang myo myo nyi é nghut kôlhang, akyú htoq é muzó é matú hkum mó ngò lé hpông to byi é yanmai nghut lê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô hai le a joq râ matú wù byi keq; hkâsu mù gâ le, yhang gi, haù Yhumsing é muzó lé, ngò su wùn waq wùn é sù nghut lê. ¹¹ Haù mù, ó yuq le, yhang lé hkâwú shóm kó. Yhang gi, ngá chyáng wó dum taù jé sháng gaq, yhâng é hkyowui má nuingón é dông nhang kat keq. Haù gumang wui eq rahá lò kó râ lé, ngò myit lánq nyi lê.

¹² Ahkuí, nga-nhûng é gumang Apolo é hkyô eq séng luí ga jang: yhang gi, haù gumang wui eq rahá nungmoq chyáng lé râ lé, ngò, gyai yhang wum taí tsuq lê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkyíng wó jáng, yhang lé lò râ nghut lê.

¹³ Machya nyi keq; lumjing hkyô má ging ging tíng tíng yap nyi keq; gyuq kyum myit hkâbô kó; wum bo nyi keq. ¹⁴ Jung hkangmó lé, chyitdap myit eq zui sai keq.

¹⁵ Stehpana eq yhâng é yhumbyù wùi gi, Ahkaia ming má sâng-hi hpúng wâng bang nghut lui, yhangmoq gi, yhumsing gùng lé, haù sên-yúng bâng é dojaù hkyô má ap nòng bekô lé, nungmoq sê akô nghut ri. Gumang wùi ê, ngò, nungmoq lé wum taì tsuq kat kôlé, ¹⁶ haù sù é bâng é a-ô má le, haù muzó má bo wang lôm mù, mù zui shikut bang yuq hkangmó é a-ô má le, nyì keq. ¹⁷ Ngò gi, Stehpana, Hportunatu eq Ahkaiku pé jé lo é hkùn, gyai gabú é nghut lhê, haì mù gâ le, yhangmoq gi, nungmoq a kut byì é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyì eq nungmoq é woi-nyì lé lhoq ngón byi bekô nghut ri. Haù sù é bang lé, hpautap nyì keq.

Ló Htâng É Shi-kyám Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chôm huì é noqkuq hpúng lé, haù Yhumsing má nungmoq lé gyai yhang shi-kyâm kat akô. ²⁰ Shí má nyì é gumang wùi banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

²¹ Ngò, Poluq gi, shi-kyám dang shí lé, ngá é loq èq yhang ká é nghut lhê.

²² Rayuq yuq, haù Yhumsing lé a chyitdap é nghut jáng, haù yuq gi, nhing pyâm é huì sháng gaq. Yhumsing ê, jé lé aq hkoi!

²³ Haù Yhumsing Yesuq é jeju gi, nungmoq eq rahá nghut nyì sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyì sháng gaq. Amen.

KORINHTUQ Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhúng é gumang Timohti le kut, Korinhtuq myuq mã é, Garai Gasâng é noqkuq hpúng lé le, Ahkaia mau gón mã é sân-yúng bang banshoq chyáng le, dang kyô kat lhê: ² Nga-nhúng é Íwa nghut é Garai Gasang eq haù Yhumsing Yesuq Hkrisduq chyáng mã é jeju eq nuingón hkyô gi, nungmoq chyáng ru joq nyí sháng gaq.

Nhik títg hkyô banshoq é Garai Gasang

³ Nga-nhúng é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik títg hkyô banshoq é Garai Gasang gi, hkya-on kungton é huí nyí sháng gaq. ⁴ Garai Gasâng chyáng mai ngamoq wó yù bê nghut é nhik títg hkyo èq, hkasú é wuîhke hkyô hui bang lé le nga-nhúng wó nhik títg byí sháng gaq ga, Yhang gi, ngamoq é wuîhke hkyô banshoq mã nhik títg byí ri. ⁵ Hkâsu mù gà le, Hkrisduq đông mai, ngamoq é nhik títg hkyô le byíng muí nyí é nghut lhê. ⁶ Ngamoq, myit myo uhkyí é huí é nghut jáng, nungmoq é nhik títg hkyô eq hkyi yù hkyo é matú nghut nyí ri; ngamoq, nhik títg é huí é nghut jáng, nungmoq é nhik títg hkyo é matú nghut luí, haù gi, ngamoq jamjaù é eq rajung za nghut é jamjau hkyô lé, myit hing é đông mai wó jân pyâm rá a-tsam, nungmoq chyáng lhoq htoq byí é nghut lhê. ⁷ Haù mù, ngamoq é jamjau hkyô pé mã nungmoq bo lòm bekô nghut é su, ngamoq é nhik títg hkyô mã le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuì ê, Asia mau má, wuîhke jamjaù é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htuam shoq hpuzô é nghut luí, ngamoq gi, asak duí lo rá lhang a myit myoqbyù lô é nghut lhê. ⁹ Gè gè yhang, ngamoq gi, sat hui berá nghù, ngamoq é í-myt má lumjínng pyâm é nghut lhê. Nghut kôlhang, haù gi, ngamoq gùng ngamoq a lumhkau é za, shí bê bang lé lhoq dui toq sù Garai Gasang lé lumhkaù rá matú dut é nghut lhê. ¹⁰ Garai Gasang gi, haù sù é shí rá hkyô mai hkyi yù bê nghut mù, ngamoq lé hkyi yù rá za nghut lhê. Yhang gi, ngamoq é matú nungmoq kyûdung byí nyí é u má, xoq luí ngamoq lé hkyi yù rá za nghut lhê nghù, ngamoq gi, Yhang lé myit myoqbyu to bê nghut luí, ¹¹ myo myo kyûdung byí é lé gyo byí é má ngamoq shimân jeju wó mù, byù myo myo gi, ngamoq wó é shimân jejú é yanmai Garai Gasang lé jeju hkya-on kó rá nghut lhê.

Poluq, Hen Tô É Muzó Htaì Pyâm É Lé Tai Hung É Hkyô

¹² Ngamoq nghutbún é gi, Garai Gasâng chyáng mã é chyoiyúng hkyô eq lhumzui hkyô má, mingkan zo wuì eq ngamoq asak duí bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byí é hkyô nghut lhê. Ngamoq haù su kut é gi, mingkan hpaqchyí byéng-yá

dông mai kut é a nghut é za, Garai Gasâng é jeju dông mai kut é ru nghut lhê. ¹³ Hkâsu mù gà le, ngamoq gi, nungmoq a dat nghap é eq a sê gyô é haï le a ká byí kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haù Yhumsing Yesuq é buinyì má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akyù í dam wó hkam yù kó sháng gaq nghù, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taù lò luí, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haù hkyô hen é hkùn, agon za hen hkyut é nghut lhê lú? Haù a nghut jáng, ngò hen é pé gi, ra-u má za, "Nghut lhê, nghut lhê." nghù é eq, "A nghut, a nghut." nghu é wó taí râ matú, mingkan myit dông hen é nghut lhê lú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹ Hkâsu mù gà le, ngo eq le, Sila eq le, Timohti eq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰ Hkâsu mù gà le, Garai Gasang gi, danggidiq hkâ-myhó to kôle, haù pé gi, Hkrisduq má "Nghut lhê" chyat nghut lhê. Haù mù, Garai Gasâng é hpungwup shingkâng é matú, Yhâng dông mai, nga-nhúng gi, "Amen" nghù taí é nghut lhê. ²¹ Ngamoq eq nungmoq lé Hkrisduq má yap gingting nhang é sù gi, Garai Gasang nghut ri. Yhang gi, nga-nhúng lé masat é xù but byi mù, ²² Yhang sing lhê gà é dizik, nga-nhúng lé htùng tap byi luí, jé lò râ hkyô pé hkyak joq lhê nghu é masat zè dông, Yhâng é Woi-nyí lé nga-nhúng é i-myit unghkaù má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taù lé é hkyô têng é lé, ngá é saksé dut râ dông Garai Gasang lé wut dúng lhê. ²⁴ Haù gi, nungmoq é lumjing hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haï mù gà le, lumjing myit mai za nungmoq wó yap ging nyi bùm kô é ru nghut lhê.

2

¹ Haù mù luí, ngò gi, nungmoq lé myit nò nhâng é dut râ dông, lé dum kùm é a kut râ nghù, myit hpyit to bê nghut lhê. ² Hkâsu mù gà le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lú? ³ Ngò jé lé é hkùn, ngo lé gabú nhâng râ âng é bâng eq, ngo lé myit nò nhâng é a hui sháng gaq nghù, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghù, nungmoq banshoq bang lé ngò hkyak myit lum tô lhê. ⁴ Hkâsu mù gà le, ngò gi, nungmoq lé laiká kâ é hkùn, myit myo uhkyí mó eq le, myit má yón kuq é eq le, ngaubyi ngau-nhap é eq le, kâ kat bê nghut lhê. Haù gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luí, ngo gyai wá yhang zuq zuq a tai nau é nghut lhê. ⁶ Nungmoq myo hpyâng eq yhang lé mara dam byí é hkyô gi, yhâng é matú gé bê nghut ri. ⁷ Nghut kôhlang, ahkuí, nungmoq gi, yhang a wó jan loshoq myit yón é a hui zo rá matú, yhang lé mara hkyut pyám byi mù, nhik títng byi keq. ⁸ Haú mù luí, nungmoq é chyitdap myit gi, yhang é ahtoq má dum lhoq gíng shit nyí keq nghû, nungmoq lé ngo wum tai tsuq kat lhê. ⁹ Ngò, nungmoq lé hai mù laiká ká byí kat é hkyô gi, nungmoq chyam wú hui é hkyô lé wó jân é hkyô eq jung hkanmó má jino gyo hkyô bò a bo é lé, wó sé rá matú le nghut lhê. ¹⁰ Nungmoq, rayuq yuq lé mara hkyut byí é nghut le gi, ngo le, haú yuq lé mara hkyut byí lhê. Mara hkyut rá rajung jung joq é nghut jáng, ngo mara hkyut é gi, Tsadán eq nga-nhúng lé a wó ùng rá matú, nungmoq é yanmai, Hkrisduq é myoq hí má ngo mara hkyut byi bê nghut lhê. ¹¹ Hkâsu mù gà le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo rá matú, Troa myuq má é jé é hkûn, haú Yhumsing gi, ngo lé hkum hpóng byí é lé, ngo myang ri. ¹³ Nghut kôhlang, ngò gi, ngá é gumang Tituq lé hai má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôhlang, Hkrisduq má, ngamoq lé hkâ-nhám le ùng budang hkyô shut shui-ù yù mù, Hkrisduq lé sê é sumsé hpaqchyi é nam ngón shôm lé, ngamoq dòng mai jowò hkanmó má tai pyo é sù, Garai Gasang gi, jeju hkya-ôn é hui nyi sháng gaq. ¹⁵ Hkâsu mù gà le, ngamoq gi, hkyi yu é hui nyi bâng chyáng le, htên byoq ló é hui nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shí-nò hkyo é shôm dut mù, hkyi yù hui nyi bâng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shí eq htuk rá lú? ¹⁷ Ngamoq gi, amyat wó rá matú Garai Gasâng é mungdang lé hkang ung zò é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dòng lhumzui myit mai tai é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra rá luq, nungmoq yuq ngamoq é matú ká byi ra kó rá luq? ² Nungmoq gùng yhang gi, ngamoq é myit nhiklhum má ká tô é, yuq hkanmó eq nghap luí sé yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng má é laiká nghut kô é hkyô lé shit nyi akô. Haú gi, ká jung chí eq ká tô é dòng a nghut é za, rù dui nyi é Garai Gasâng é Woi-nyí eq ká tô é nghut é htoq agó, luqlong pé má ká tô é dòng a nghut é za, xângzo byu é myit nhiklhum long pé má ká tô é ru nghut lhê.

⁴ Haú su nghû hkyak wó myit lum é hkyô gi, Garai Gasâng é hí má, Hkrisduq dòng mai ngamoq wó yu é nghut lhê. ⁵ Ngamoq gi, yhumsing gùng hai lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é

nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haù gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byi é nghut lhê.

Dangshikaq Asik É Hpungwup Shingkang

⁷ Ahkuú, haù Mosheq é myoqdong má é hpungwup shingkâng é yanmai, haù Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haù shùm lo byuq sê é nghut kôlhang, luqlong má dok kâ tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê. ⁸ Haù su nghut jáng, haù Woi-nyí é muzó gi, hpungwup shingkang je riyhang dut râ a nghut kó lúh? ⁹ Gè gè yhang, haù byù lé mara byí é tarâ muzó lháng, hpungwup shingkang bo é nghut le gi, dîngmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyi é dangshikaq asik é hpungwup shingkang gi, je riyhang gyaú râ nghut lhê ô!

¹² Haù mù luí, ngamoq gi, haù sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shùm byuq ló é hkûn, haù Israelaq byu pé haù lé a wú tsuq râ matú, yhâng é myoqdong lé myoqgo eq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byí é huí bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haù gi, huí sêng pyâm é a huí shi, haí mù gâ le, Hkrisduq dông za haù lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhikhum má myoqgò eq nghop tô é nghut ri. ¹⁶ Nghut kôlhang, ó yuq le, Yhumsîng chyáng hká u lhîng lô kôlhang, haù hkûn jáng, myoqgò gi, hí pyám byí é huí râ nghut lhê. ¹⁷ Yhumsîng gi, haù Woi-nyí nghut mù, Yhumsîng é Woi-nyí nyi é jowò má, luthkyô le joq lhê. ¹⁸ Haù Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaí lhik wang é huí nyi bê nghut lhê. Haù hkyô gi, haù Woi-nyí nghut sù Yhumsîng chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haù wó é nghut mù, myit wum a gyuí é nghut lhê. ² Ngamoq gi, zaú tô é eq hoq htoq é hkyô pé lé tô pyám luí, mhaù zô é hkyô le a kut, Garai Gasâng é mungdang lé le ahpuy alhik a kut é bang nghut lhê. Haù su kut râ malaí, ngamoq gi, haù tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsîng gùng yhumsîng htuk shoq nyi lhê. ³ Ngamoq é gabú danglú gi, myoqgo eq nghop pyâm é huí é nghut jáng, haù gi, htên byoq nyi bâng chyáng za nghop pyám huí é ru nghut lhê. ⁴ Haù Garai Gasâng é azòng isâm nghut sù, Hkrisduq é hpungwup shingkang bo é gabú danglú é maubó lé, a lumjîng

bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶ Hkâsu mù gâ le, "Mauchut hkaû mai maubó htoq lô sháng gaq."* ga taí é Garai Gasang gi, Yesuq Hkrisduq é myoqdong mã é Garai Gasâng é hpungwup shingkâng é maubó lé sê gyô é nyan lé, nga-nhúng lé byí é dông, Yhâng é maubó lé, nga-nhúng é i-myyit unghkaû má duqbo nhâng bê nghut ri.

⁷ Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mã é a nghut é za Garai Gasâng chyáng mã é nghut é hkyô lé tún shit rà matú nghut lhê. ⁸ Ngamoq gi, wuìhke hkyo eq lìnhhkyuq mai gyai yhang nhê zik é huì kôlhang, a gyop byuq é nghut lhê; myit lhoq nhúng pyâm é huì kôlhang, myit a htúm byuq é nghut lhê; ⁹ zing-rí é huì kôlhang, kâng pyâm huí é a nghut; bat lhêng pyâm é huì kôlhang, htên byoq huí é a nghut. ¹⁰ Haû Yesuq é asak duì hkyô le, ngamoq é gungdu má lhoq htoq shit é huì sháng gaq nghú, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wùn é nghut lhê. ¹¹ Hkâsu mù gâ le, Yesuq é asak duì hkyô gi, nga-nhúng é shi sê é gungdu má lhoq htoq shit é huì sháng gaq nghú, asak duì nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyi ri. ¹² Haû mù luí, shi byuq hkyô gi, ngamoq má mù zuí nyi ri; asak duì hkyô kúm gi, nungmoq má mù zuí nyi é nghut ri.

¹³ "Ngò gi, lumjìng bê nghut lhê, haû mù, ngò taí é nghut lhê."* ga kâ tô é eq rajung za, ngamoq le, lumjìng hkyô hau eq yhang, lumjìng bê nghut mù taí é nghut lhê. ¹⁴ Haí mù gâ le, haû Yhumsing Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuí jé rà nghut é lé, ngamoq sê lhê. ¹⁵ Haû jeju wó é byu pé gi, je riyhang myò jat lò mù, Garai Gasâng é hpungwup shingkâng é matú, jeju hkya-ôn é hkyô gi, byíng mui nyi sháng gaq ga, haú pé banshoq gi, nungmoq é akyu é matú nghut nyi ri.

¹⁶ Haû mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq lò nyí kôlhang, i-myyit unghkaû gi, ra-nyí eq ra-nyí asik dut nhang é huí nyi ri. ¹⁷ Hkâsu mù gâ le, ngamoq é tiq é eq razup zâ é wuìhke hkyô pé gi, ngamoq é matú haú pé htoq gyai hkik é ahtum abyuq é hpungwup shingkâng lé, wó yù nhang ri. ¹⁸ Haû mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkùng Htoq Mã É Yhùm

¹ Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq eq saí é a nghut é za, mauhkùng htoq má joq é ahtum

* **4:4** Ipyat shi é garai gâ é gi, Tsalán lé gâ é nghut lhê. ✨ **4:6** Apùn 1:3 † **4:7** Tseyam pé gâ é gi, nga-nhúng é wum nyhóm é gungdu lé gâ é nghut lhê. ✨ **4:13** Hkya-on 116:10

abyuq é yhûm* nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuí, nga-nhúng gi, nga-nhúng é mauhkúng yhûm lé tú hut byí é lé gyai yang hui naú mù, nô-kying su kyíng nyi lhê. ³ Haí mù gà le, nga-nhúng gi, hut byí é hui jáng, gungdu a bò bang a dut lô rá nghut lhê. ⁴ Hkâsu mù gà le, nga-nhúng gi, zúm shí má lúng nyi é u lé, wôlai wùn mù, nô-kying su kyíng nyi lhê; haú gi, shí byuq sê é lé, asak dui é eq wó htaí lhik pyám sháng gaq nghú, nga-nhúng gi, a hut byí é hui rá lé a ô nau é za, nga-nhúng é mauhkúng yhûm lé tú hut byí é hui rá lé ô nau é yanmai nghut lhê. ⁵ Ahkuí kúm, jeju haú hkam yù rá matú, nga-nhúng lé lajâng to byí é sù gi, Garai Gasang nghut mù, jé lô rá hkyô gi, hkyak joq lhê nghú é masat zé dông, nga-nhúng lé haú Woi-nyi byi bê nghut ri.

⁶ Haú mù luí, ngamoq gi, hkâ-nhám le hkyak lum tô lhê. Gungdu shí má yhûm dông ru lúng nyí gi, haú Yhumsing eq wé gâng nyi ashí nghut é lé ngamoq sê nyi lhê. ⁷ Ngamoq gi, byu-myang é dông mai a nghut é za, lumjáng myit mai asak dui é ru nghut lhê. ⁸ Ngamoq gi, hkyak myit lum tô lhê nghú, ngò tai lhê, haú mù, gungdu shí mai wé gang luí, haú Yhumsing eq rahá nyi rá lé ngamoq je riyhang ô nau é nghut lhê. ⁹ Haú mù, ngamoq gi, gungdu shí má yhûm dông lúng nyi é nghut nghut, haú mai wé gâng é nghut nghut, ngamoq myit myoqbyu tô é jowó gi, Yang lé gabú nhâng rá matú nghut lhê. ¹⁰ Hkâsu mù gà le, yuq hkangmó gi, gungdu shí má yhûm dông lúng nyi é u lé, ge é nghut nghut, a ge é nghut nghut, kut é eq rajung za hkam yù rá matú, Hkrisduq é tará jéyáng tanghkuq hí má, nga-nhúng banshoq bang htoq shit ra rá nghut lhê.

Nguingón Hkyô Xoq É Muzó

¹¹ Haú mù, Yhumsing lé gyuq hkungga rá hkyô haí nghut é lé ngamoq sê é nghut luí, ngamoq gi, byu pé lé tai pún kyíng shikut lhê. Ngamoq haí nghut é gi, Garai Gasâng chyáng san za nghut nyí mù, nungmoq é myit sôn sê é hkyô má le san za nghut rá lé, ngò myit lum lhê. ¹² Haú myit nhikhlum má bo é lé gumrông rá malaí, byu-myang é lé gumrông é bang lé, nungmoq wó tú tai kó sháng gaq nghú, ngamoq gi, nungmoq chyáng yhumsing gung lé dum owaq shikut é a nghut é za, ngamoq é hkyô lé, nungmoq wó gumrông rá ahkáng, nungmoq lé byí é ru nghut lhê. ¹³ Ngamoq a gyíng é dông nghut le gi, Garai Gasâng é matú a gyíng é nghut lhê; ngamoq gyíng é dông nghut le gi, nungmoq é matú gyíng é nghut lhê. ¹⁴ Hkâsu mù gà le, Hkrisduq é chyitdap myit eq ngamoq lé kut nhang nyi é nghut lhê. Haú gi, banshoq bâng é matú rayuq shí hkám byi bê nghut mù, banshoq bang shí é dông nghut bê nghú, ngamoq hkyak sê gyó é yanmai nghut lhê. ¹⁵ Yang gi, asak dui nyi é bang, yangmoq yhumsing gung é matú a dui lô é za, yangmoq é matú shí hkám byi luí, lhoq dui toq é hui Su é matú dui kó sháng gaq ga, banshoq bâng é matú shí hkám byi bê nghut ri.

¹⁶ Haú mù, ngamoq gi, ahkuí mai, ó yuq eq séng luí le, mingkan hkyam dông mai a wú lô é nghut lhê. Ngamoq gi, hí hkún Hkrisduq lé haú dông wú é nghut kôlhang, haú su hkâ-nhám le a kut lô é nghut lhê. ¹⁷ Haú nghut mù luí, rayuq yuq gi, Hkrisduq má nghut nyi é nghut jáng, yang gi, asik hpân hui sù dut bê nghut ri; haú axau gi, byuq byuq mù, lhunglhang asik dut bunhung! ¹⁸ Haú pé banshoq gi, Garai Gasâng chyáng mã é chyat nghut lhê.

* 5:1 Mauhkúng htoq má joq é ahtum abyuq é yhûm gà é gi, nga-nhúng, mauhkúng mingdán má jé é hkún wó rá gungdu asik lé gà é nghut lhê.

Yhang gi, Hkrisduq đông mai nga-nhúng lé Yhânggùng eq nguingón hkyô xoq yû luí, nguingón hkyô xoq é muzó ngamoq lé byi bê nghut ri. ¹⁹ Haú gi, Garai Gasang gi, byu pé é mara lé a matsing byí é za, Hkrisduq đông mingkan lé Yhânggùng eq nguingón hkyô xoq yû bê nghut luí, Yhang gi, nguingón hkyô xoq yu é mungdang haú lé, ngamoq lé ap byí to bê nghũ nau é nghut lhê. ²⁰ Haú mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq đông mai nungmoq lé lhoq pún kyíng nyi é nghut lhê. Garai Gasang eq nguingón hkyô xoq yû keq nghũ, ngamoq gi, Hkrisduq é gunglik đông nungmoq lé dúng tôngbán nyi lhê. ²¹ Nga-nhúng gi, Hkrisduq đông mai Garai Gasang é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasang é mù zui byinzùm wui nghut nyi é eq rajung za, Garai Gasang jeju lé akyû a bo é đông hkâhap yù kó nghũ, nungmoq lé wum tai tsuq kat lhê. ² Hkâsu mù gâ le, "Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lhê."*
ga luí, Yhang tai ri. Ngò, nungmoq lé tai kyo kólé, ahkuí gi, Garai Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuíhke Hkyô Pé

³ Ngamoq é hpungmù gi, tai hpoí pyâm é a hui sháng gaq nghũ, ngamoq gi, ó yuq é hkyô má le, leqbat jung a to byí é nghut lhê. ⁴ Haú kut rá malaí, ngamoq gi, Garai Gasang é dui-nhâng zoshâng wui nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyí hkyô pé má le shit nyi lhê. ⁵ Nhuq bat huí é pé má le, htóng lhung huí é eq toq gabyông é má hím é huí é má le, mù zui shikut é má le, a myang yhup é myín pé má le, zòmut huí é má le, shit nyi lhê. ⁶ Sân-yúng é má le, sê gyô é hkyô má le, myit hing é eq myit ge é má le, Choyiyúng Woi-nyí eq chyitdap myit akying má le, ⁷ tengmán é mungdang hko é má le, Garai Gasang é a-tsam má le, loqyô loqpai má dingmán hkyô nghũ é laknak pé đông le, shit nyi lhê. ⁸ Hpungwup shingkan byí é hui kô é đông eq a hkunggâ é hui kô é đông nghut kôle, a ge é luhkyang eq ge é luhkyang tai kôle, shit nyi lhê. Ngamoq gi, tengmán kôlhang, mhaú zo bang đông sôn yu akô nghut ri. ⁹ Ngamoq lé sé kôlhang, a sê é đông kut akô nghut ri; shi ló nyí kôlhang, rù dui nyi é bang nghut lhê; nhuq bat é hui kôlhang, sat pyâm é a hui shí é bang nghut lhê. ¹⁰ Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; hai le a wó kôlhang, jung hkangmó lé sing é đông nghut lhê.

¹¹ Korinhtuq bang ê, ngamoq gi, nungmoq lé san za tai bê nghut luí, ngamoq é myit nhiklhum lé, nungmoq é matú làm shoq hpông to byi bê nghut lhê. ¹² Ngamoq gi, ngamoq é chyitdap myit lé, nungmoq chyáng mai láng taú yu nyi é a nghut, nungmoq sheq, ngamoq chyáng mai láng taú yu nyi kô é ru nghut lhê. ¹³ Nungmoq le, myit nhiklhum lé làm shoq dum taú hpóng keq nghũ, ngò gi, ngá zô pé lé đông tai lhê.

A Lumjıng Bang Eq A Nhungkut Râ Hkyô

* 6:2 Esai 49:8

14 A lumjǐng bang eq rahá kandang hkâwâq kó. Hkâsu mù gà le, dingmán é hkyô eq agè ashop é hkyô gi, haì sêng lhum lhê lúh? Maubó eq mauchut gi, hkâsu wó zùm yap kó rà lúh? 15 Hkrisduq eq Beliala* gi, hkâsu kut myit wó huì lhum kó rà lúh? Lumjǐng sù rayuq eq a lumjǐng sù gi, hkâsu wó pung lhum kó rà lúh? 16 Garai Gasâng é noqkuq yhùm eq hparà lhô pé gi, hkâsu wó hùm rà lúh? Hkâsu mù gà le, nga-nhúng gi, rù dui nyi é Garai Gasâng é noqkuq yhùm nghut lhê. Haù gi, "Ngò gi, yhangmoq eq rahá nyi mù, yhangmoq chyáng sô nyi rà nghut luì, Ngò gi, yhangmoq é Garai Gasang dut mù, yhangmoq gi, Ngá é byu pé dut kó rà nghut lhê."* ga Garai Gasang tai tô é eq rajung za nghut ri. 17 "Haù mù luì, yhangmoq chyáng mai htoq lô mù, gotú san za nyi keq. A sansêng é zè lé hkâzàng kó, haù hkùn, Ngò, nungmoq lé lhom hap yù rà nghut lhê."* ga haù Yhumsing tai ri. 18 "Ngò gi, nungmoq é Iwa dut mù, nungmoq gi, Ngá é byizo yuqzô pé dut kó rà nghut lhê."* ga haù wum-o a-tsam dik shoq bò Sù Yhumsing tai ri.

7

1 Chyitdap é luzúm wui ê, nga-nhúng gi, danggidiq haù pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsing lhoq sân-yúng yù luì, Garai Gasang lé gyuq hkunggâ é myit eq chyoyúng hkyô má lhoq gumjup yu nyi sháng.

Poluq É Gabú Hkyô

2 Nungmoq é i-myit unghkaù má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaù zô wú é nghut lhê. 3 Ngò gi, nungmoq lé mara byi rà matú haù su tai é a nghut. Ngamoq gi, asak dui kôle, shì kôle, nungmoq eq rahá wó dut shoq, nungmoq gi, ngamoq é i-myit unghkaù má lúng nyi é nghut lhê nghù, hí hkùn ngò tai wú bê nghut lhê. 4 Ngò gi, nungmoq lé, hkyak yhang nyit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huì ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

5 Hkâsu mù gà le, ngamoq gi, Makedoni mau má jé é hkùn, ngamoq é gungdu gi, zim za a myang nyi é htoq agó, hkyô hkangmó má ngamoq wuìhke jamjau hui zô é nghut lhê. Shinggan má gi, mabyoq htoq, ahkaù má gi, gyuq kyum nyi é nghut lhê. 6 Nghut kôlhang, nhik ngé bang lé nhik tǐng é Garai Gasang gi, Tituq lé jé lé nhang é đông mai, ngamoq lé nhik tǐng byi bê nghut ri. 7 Yhang jé lé é đông mai za a nghut, yhang lé nungmoq nhik tǐng byi é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuì nyi é hkyô, nungmoq gyai yhang shut bún é hkyô, ngá é matú nungmoq gyai myit chiq byi é hkyô pé lé, ngamoq lé tai kyo bê nghut ri.

8 Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. 9 Nghut kôlhang, ngò gi, ahkuì gabú lhê; haù gi, nungmoq lé yón hui nhang é yanmai a nghut é za,

* 6:15 Beliala gà é gi, Tsadán é mying rajà nghut lhê. ✧ 6:16 Nhung 26:12; Yer 32:38; Ezk 37:27

✧ 6:17 Esai 52:11; Ezk 20:34,41 ✧ 6:18 2 Sam 7:14

nungmoq é yón hkyo èq, nungmoq lé myit lêng nhang é yanmai ru nghut lhê. Nungmoq gi, Garai Gasang ô nau é đông yón huí é bang dut bekô nghut mù, nungmoq lé, ngamoq èq hai akyû le a lhoq yôm byí é nghut lhê. ¹⁰ Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lêng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹ Garai o é đông, nungmoq chyáng akyû lhoq htoq byí é yón kuq hkyô lé wú wú keq! Haú gi, gyai yhang myit zuq é hkyô, yhumsing gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ ri ri nghut é hkyô pé nghut lhê. Nungmoq gi, haú hkyô má mara a bo é lé hkat hkanmó má saksé tân shit bekô nghut ri. ¹² Haú mù luí, ngò, nungmoq lé kâ kat é nghut kôlhang, kut shut su é yanmai le a nghut, kut shut é huí zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasâng hí má nungmoq gùng nungmoq wó myáng râ matú kâ kat é sheq ru nghut lhê. ¹³ Haú pé banshoq đông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguínón byi kô é yanmai nghut ri. ¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpù é nghut lhê. Nungmoq lé ngamoq tai é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jìno gyo kômù, gyuq nán é myit mai yhang lé lhom hap yù kô é lé, yhang myitbùn é hkùn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lê sé é yanmai, gabú nyi lhê.

8

Byí É Hkyô

¹ Gumang wui ê, ahkuí, ngamoq gi, Makedoni mau má é noqkuq hpúng pé lé Garai Gasang byí é jeju eq sêng é hkyô, nungmoq lé sé nhâng nau ri. ² Yhangmoq gi, wuihke jamjau hkyô myo myô èq chyam lik é huí é nghut kôlhang, yhangmoq é a ung tai loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é atsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaú mai yhang haú su kut kô é nghut ri. ⁴ Yhangmoq gi, haú sâ-yung bang lé wó bo dojàu râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é đông, yhangmoq gùng lé hí haú Yhumsing lé ap byí pyám kômù, hau htâng sheq ngamoq lé ap kô é nghut ri. ⁶ Haú mù luí, Tituq yhang hí kut hi nyi bê nghut é yanmai, ngamoq gi, jeju haú lé nungmoq chyáng le shuí lhoq bying jup byi râ matú, yhang lé wum byi bê nghut lhê. ⁷ Nungmoq gi, lumjing myit má, dang nyo é hkyô má le, bumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkanmó má agùn agó dut bekô eq rajung za, nungmoq gi, byí nau é jeju shí má le agùn agó dut râ lé, bùn nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú nau luí sheq ru nghut lhê. ⁹ Hkâsu mù gà le, nungmoq gi, nga-nhúng é Yhumsing Yesuq Hkrisduq é jeju lé sê akò nghut ri. Yhang gi, Yhàng é myùng hkyô dông mai nungmoq wó bang dut kó sháng gaq ga, jung hkgangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sâng-hi, byí hí kô é za a nghut, haú su kut nau é myit bo é bang le nghut akò. ¹¹ Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pân keq. ¹² Hkâsu mù gà le, byí nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsá nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴ Nungmoq haí râ tô é lé, yhangmoq agùn agó wó é mã é wó dum taú htuqbang byi kó sháng gaq, ahkui lhê é ahkyíng má, yhangmoq haí râ tô é lé, nungmoq agùn agó wó é mã é htuqbang byi keq. Haú jáng sheq, wuí wuí za wó dut kó râ nghut lhê. ¹⁵ Haú gi, "Myo myo tsing yu é sù gi, lúm myo shoq wó é a nghut, shau za tsing yu é sù gi, lúm shau shoq wó é a nghut." ✧ ga kô tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myit má kat byí é Garai Gasang lé, ngò jeju hkya-ôn lhê. ¹⁷ Hkâsu mù gà le, Tituq gi, ngamoq dúng tóngbân é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri. ¹⁸ Ngamoq gi, haú gabú danglù lé dojaú é má noqkuq hpúng pé banshoq èq hkya-on huí é gumang hpó haú lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tún shit mù, haú Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkún, ngamoq é byinzùm kut râ matú, noqkuq hpúng pé èq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê. ²¹ Hkâsu mù gà le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé le yhangnhik eq rahá nhang kat lhê. Yhang gi, ahkuí hláng, nungmoq lé gyai yhang myit lum tô é yanmai, shirong myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzùm eq ngò eq rahá nungmoq chyáng mú zui sù nghut ri. Nga-nhúng é gumang nhik é hkyô ga jáng, yhangnhik gi, noqkuq hpúng pé é gunglik eq Hkrisduq é aróng nghut akò. ²⁴ Haú mù luí, haú noqkuq hpúng pé wó myáng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tún shit keq.

9

¹ Ngò gi, haù sâ-n-yúng bang lé htuqbang râ hkyô eq séng luí, nungmoq lé kâ kat râ a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haù mù, ngò gi, Makedoni mau bang lé, haù hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé tai kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaù toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò tai bê eq rajung za nungmoq rì rì wó hen to râ matú, ngò gi, gumang wui lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq lé, nungmoq lé lúm yhang lum pyâm é yanmai, hoq bo hpu râ a nghut lhê. ⁵ Haù mù luí, nungmoq danggidiq byi to bê nghut é, chyunghuq lé rago wó lajâng pân to râ matú, gumang wui lé wum tai tsuq mù, nungmoq lé hí, lé kum nhâng râ gi, ra yhang râ lhê nghú ngò wó myit ri. Haù hkûn sheq, a nau é dông byí é a nghut é za, byi nau é chyunghuq dông hen tô é dut râ nghut lhê.

Agùn Agó Byí É Hkyô

⁶ Shau za sâ-n hkyô sù gi, shau za shù yù râ nghut mù, agùn agó sâ-n hkyô sù gi, agùn agó shù yù râ nghut lhê gâ é dang lé, myitbùn nyì keq. ⁷ Yuq hkgangmó gi, a kâm byí é eq byí nhang é dông a nghut é za, yhumsing myit má byí nau é myhó lé myit hpyit yù mù byí é dông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haù mù, ahkyíng hkgangmó jung hkgangmó má, nungmoq râ é banshoq wó mù, ge é muzó hkgangmó lé nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byí é sù nghut lhê. ⁹ Haù gi,

"Yhang gi, a ha bún é za myùng bang lé yhâng é chyunghuq tsing gàm byi bê nghut ri; Yhâng é dingmán hkyô gi, ahtum abyuq gíng nyi ri."^{*}

ga kâ to eq rajung za nghut ri. ¹⁰ Kyô hkyô sù lé kyôshi, zoshuq matú muk byí é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê. ¹¹ Nungmoq gi, ayoq abun hkgangmó má agùn agó byí é bang wó dut kó râ matú, hkyô hkgangmó má sùt wó é bang dut é hui kó râ nghut lhê. Nungmoq agùn agó byí é hkyô lé, ngamoq lhai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shí gi, Garai Gasâng é byu pé râ é hkyô lé lajang byí é za a nghut, Garai Gasang lé jeju bún é dang byíng mui nyì nhang é le nghut lhê. ¹³ Dojaú hkyô hau é yanmai, nungmoq lhumzui hkyô saksé tân shít bekò nghut mù, byu pé gi, Hkrisduq é gabú danglù lé nungmoq yín yù luí jìno gyo kô é yanmai le, yhangmoq eq yuq hkgangmó lé, nungmoq é a ha bún é myit mai shuí gam chúng kô é yanmai le, Garai Gasang lé hkya-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyúdung byí é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq tai é Garai Gasâng é chyunghuq é yanmai, jeju hkya-on hkyô gi, Yhâng chyáng ru nghut nyí sháng gaq ô!

^{*} 9:9 Hkya-on 112:9

10

Poluq, Yhâng É Hpungmû Lé Tai Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô đông mai, nungmoq lé pying kat lhê. ² Shí mingkân é nyi yap a-tsang đông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haù sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gâ le, ngamoq gi, mingkan shí má asak dui nyi kôlhang mingkan byu pé kut é đông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é đông dang-rháng hkyô nghut é, gingtîng é gyedap pé lé lhoq htên pyám râ matú Garaí é a-tsam bying é laknak ru nghut lhê. ⁵ Ngamoq gi, dang-rháng rhâng lhum é hkyô pé eq Garaí Gasang lé sê é hkyô lé shut shai shoq yhumsing gùng yhumsing lhoq myhang mhaù é hkyô hkangmó lé lhoq htên pyám mù, Hkrisduq é jîno gyo râ matú, myit sôn é hkyô hkat hkangmó lé shúm kut yu é nghut lhê. ⁶ Nungmoq é jîno gyo hkyô gi, gumjup é hkûn, jîno a gyô é hkyô hkangmó lé ngamoq dam byi râ ri rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jâng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé lêng hkyô râ nó gi, nungmoq lé kô myhâng nhâng râ matú, ngamoq lé haù Yhumsing byí é ahko ahkáng lé gyai gumrong le lhang, ngò gi, hoq hpù é hui râ a nghut. ⁹ Ngò gi, ngá é laiká pé eq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang tai é dang pé gi, haí a nghut." ga tai akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haù sù é bang sê gyo râ dut lhê.

¹² Ngamoq gi, haù yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whui é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhum wú é eq yhangmoq gùng yhangmoq whui lhum wú kô é hkûn, hpaqchyí a bo é bang dut bekò nghut ri. ¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garaí Gasang masat to byí é, nungmoq chyáng lhang hkyit jé shoq nghut é maukyo hkaù má za gumrông râ nghut lhê. ¹⁴ Ngamoq gi, nungmoq chyáng a jé lé wú é đông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chùng mù, nungmoq chyáng lhang lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai luí gumrong lhai é a nghut. Ngamoq myoqbyu é hkyô gi, nungmoq é lumjîng myit kô myhang jat nyi jâng sheq, nungmoq chyáng ngamoq zui saí é jowò gyai wó lhoq lăm râ nghut lhê. ¹⁶ Haù gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq eq zui saí to bê loqzò eq sêng luí, gumrông nau é a nghut. ¹⁷ Nghut kôlhang, "Gumrong é sù gi, haù Yhumsing má gumrông sháng gaq." ✧ ga kâ tô ri. ¹⁸ Hkâsu mù gâ le, yhumsing gùng

yhumsing owaq é sù gi, hap yù huí é a nghut é za, haù Yhumsing èq owaq byí é sù sheq, hap yù huí é ru nghut lhê.

11

Lagyô Apyoq Pé Eq Poluq

¹Ngò gi, ngá é ratsuí ngok é dang lé, nungmoq jân pyám byi rã lé myoqbyu é nghut lhê; gè gè yhang, nungmoq gi, haù su kut nyí gù nghut bekô. ²Haí mù gà le, ngò gi, Garai Gasang mai nungmoq lé magum é myit èq, nungmoq é matú magùm byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghù, Hkrisduq nghut é yhumsing hpô chyáng za nungmoq lé byi zo rã nghù, danggidiq byí to bê nghut lhê. ³Nghut kôlhang, Ewaq gi, lhangmuí hpaqchyí dâ é èq mhaù zô é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myit ap nóng é hkyô mai shuí nghoq lô byuq é huí rã lé, ngò myit chiq ri. ⁴Hkâsu mù gà le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haù lé lui lui za lhom hap yu é dut bekô nghut ri. ⁵Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyí gyó sù a nghut nghù myit ngam é nghut lhê. ⁶Ngò gi, dang tai hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkangmó má, nungmoq lé haù hkyô hkyâng shoq sé nhâng bê nghut lhê.

⁷Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq rã matú, ngá gùng ngò lhoq nyhum é gi, ngá é mara dut byuq bê lú? ⁸Ngò, nungmoq lé dojaù rã matú, gotù noqkuq hpúng pé mai htuqbâng é lé hap yu é gi, haù bâng chyáng mai ngò zik lú yu é đông dut bê nghut lhê. ⁹Ngò gi, nungmoq eq rahá nyí mù, rajung jung rã é hkûn, ó yuq lé le wòlai a dut nhang é nghut lhê; hkâsu mù gà le, Makedoni mau mai lé jé é gumang wui gi, ngò haí rã é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq lui le haù đông kut nyí rã nghut lhê. ¹⁰Haù Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau má é bang ó yuq lhang, ngò haù su gumrong é hkyô lé wó hkûm zing rã a nghut. ¹¹Haí mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê. ¹²Ngò gi, yhangmoq zui sai é lé gumrong é hkyô pé má ngamoq eq rawuí za són byi rã ahko ahkáng ô nau é bang lé ahkáng a byi rã matú, ngò kut nyí é su xoq lui kut shi rã nghut lhê.

¹³Hkâsu mù gà le, haù sù é bang gi, lagyo apyoq pé, mhaù zô é mù zui bang, Hkrisduq é lagyo pé đông kut mhaù é bang nghut akô. ¹⁴Haù gi, maú ra hkyô a joq, hkâsu mù gà le, Tsadán lhang gi, maubó é maumang lagyo rayuq đông kut mhaù é sù nghut lhê. ¹⁵Haù mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaù é nghut jang, maú dân rã hkyô a joq é nghut lhê. Yhangmoq é ló htang má gi, yhangmoq kut é eq rajung za hui zo kó rã nghut lhê.

¹⁶ Ngò puq taí kôlé, ó yuq le, ngo lé byù gò dông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haù su gumrông é hkyô gi, haù Yhumsing ó é dông ngò taí nyi é a nghut, byù gò rayuq dông taí nyi é ru nghut lhê. ¹⁸ Byù myo myo gi, mingkân é hkyô dông gumrông nyi bum lhê nghut mù, ngò le gumrông rã nghut lhê. ¹⁹ Nungmoq gi, hpaqchyí lùm bo kô é nghut mù, byù go pé lé gabú myit èq jân nyi akò nhung! ²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gung yhang owaq é sù lé le, nungmoq lé bo-pyuq pyuq é sù lé le, jân nyi akò nghut ri. ²¹ Ngamoq gi, nungmoq lé haù hkyô kut rã má wum gyai nyhôm lhê nghu yín yû rã lé, ngò, hoq ri!

Rayuq yuq, haì lé wám gumrông é nghut jáng, ngò le, haù lé wám gumrông lhê nghu, byù gò rayuq dông ngò taí nyi é nghut lhê. ²² Yhangmoq gi, Hebre byu pé nghut akò lú? Ngò le nghut lhê. Yhangmoq gi, Israelaq byu pé nghut akò lú? Ngò le nghut lhê. Yhangmoq gi, Abraham é awut ashin pé nghut akò lú? Ngò le nghut lhê. ²³ Yhangmoq gi, Hkrisduq é dui-nhâng zoshâng wui nghut akò lú? (Ngò gi, myit a gyíng é sù dông haù su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shí rã í é adàm dàm huí wú bê nghut lhê. ²⁴ Ngò gi, Yudaq byu pé nuichum èq bat é myi xê dàm byíng rã radàm ra ra dut é, ngo lhang hui zô wú é nghut lhê. ²⁵ Ngò gi, dumbáng èq nhuq huí é sum dàm, shí sháng gaq ga luqgok èq dú huí é radàm, wui-sanghpo byoq huí é sum dàm, wuimau má myú byôm é ra-nyí ra-myìn hui zô wú bê nghut lhê. ²⁶ Ngò gi, xoq xoq hkyowui htoq é ló é hkún, wui gù é gyuq chiq jung, damyaq huí é gyuq chiq jung, ngá é amyú wui chyáng mã é gyuq chiq jung, tungbaù pé chyáng mã é gyuq chiq jung, myuq hkaù pé mã é gyuq chiq jung, yoso pé mã é gyuq chiq jung, wuimau mã é gyuq chiq jung eq gumang apyoq pé chyáng mã é gyuq chiq jung pé hui zô wú bê nghut lhê. ²⁷ Ngò gi, mù lé zui ngu zui hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí lai lo wú bê nghut lhê. Ngò gi, gyoq hpù é eq gungchín dut é huí wú bê nghut lhê. ²⁸ Haù pé lhunglhang htoq mã, noqkuq hpúng pé banshoq é matú ngò myit chiq byí é hkyô gi, nyi wui ngò má wòlai dut nyi ri. ²⁹ Rayuq yuq wum nyhóm le, ngò le wum a nyhóm rã lú? Rayuq yuq mara shuí kut shut é hui le, ngò myit a nyé rã lú?

³⁰ Ngò gumrông rã dut é nghut le gi, ngò wum nyhôm é hkyô lé tún shit é pé lé gumrông rã nghut lhê. ³¹ Ngò a mhaù nyi é hkyô lé pyat dedu hkya-on huí é sù, haù Yhumsing Yesuq é Iwa eq Garai Gasang sê lhê. ³² Damaskuq myuq mã, Hkohkâm Areta é a-ô mã é mauzau gi, ngo lé chyup rã matú, myuq lé zúng nhang é nghut lhê. ³³ Nghut kôlhang, ngò gi, manghkoq mã lúng mù, myuq xêwâm mã é hkohot dong mai lhoq hkyô kat é hui lui, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rú gumrông nyi rã za nghut lhê. Akyû wó rã a nghut kôlhang, haù Yhumsing chyáng mai lo é myoqwup shing-rán pé eq hpông shit é shing-rán pé lé gumrông rã nghut lhê. ² Ngò gi, lai lò bê raxe myi zân hkún, mauhkung

sum tsáng nghu é má shuí toq yu huí é, Hkrisduq mâ é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³Yhang hparadisu má shuí toq yù huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴Yhang gi, byu pé tai kyô htoq râ ahkáng a wó é hkyô pé nghut é, a wó tai sân kyô é hkyô pé lé wó gyô ri. ⁵Ngò gi, haú yuq sù é byu é hkyô eq séng luí gumrông râ nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gûng ngò gumrông râ a nghut. ⁶Ngò gi, gumrông hkyô lé hkyin yù râ dut é nghut jáng lháng, byù gò dut râ a nghut, haí mù gâ le, ngò gi, tengmán hkyô tai nyi râ nghut lhê. Nghut kôlhang, ó yuq le, ngò kut é eq ngò tai é mai myit lum to kô é htoq má, ngò lé, je a myit lo ko sháng gaq nghù, ngò a gumrông kut pyám nyi lhê.

⁷Haú laklai dik é dòng ngò lé hpông shit é shing-rán mó pé é yanmai, ngò a nghutbùn byuq sháng gaq ga, ngò lé gunjang râ matú, Tsadán é lagyo nghut é zu lé, ngá é gungsho má kat byi to bê nghut ri. ⁸Haú lé ngá chyáng mai yu pyám byi râ matú, ngò, Yhumsing lé sum dâm dúng tôngbán wú bê nghut lhê. ⁹Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga luí, ngò lé tai ri. Haú mù luí, Hkrisduq é a-tsam gi, ngò má wó joq nyi sháng gaq nghù, ngò gi, ngá é wum nyhóm é hkyô pé eq séng luí, gabú myit mai je riyhang gumrông râ nghut lhê. ¹⁰Haú nghut mù luí, ngò gi, Hkrisduq é yanmai, wum nyhóm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhóm é hkún sheq, ngò wúm bo é nghut lhê.

Poluq Chiq Byi É Hkyô

¹¹Ngò gi, ngá gûng ngò byù gò lhoq kut yù bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bãng é htoq má ratsuí lháng gyamgyi gyó sù a nghut. ¹²Lagyo rayuq é masat kumlhá nghut é, kumlhá pé, mauhpo muzop pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³Ngò gi, nungmoq é matú, hkâ-nhám le wôlai a dut é nhing, nungmoq gi, hkâsu mù, gotú noqkuq hpùng pé htoq má gyamgyi gyó nyi akò lúh? Ngò, haú hkyô má shut é nghut jáng, mara hkyut pyám byi kó laq!

¹⁴Ahkuí, ngò gi, nungmoq lé, sum lhing nghù râ dàm, lé kum râ rì rì nghut bê mù, nungmoq é matú wôlai gi, a dut râ nghut lhê. Haí mù gâ le, ngò gi, nungmoq é sutzé lé ô nau é a nghut, nungmoq lé sheq ru nghut lhê. Hká dòng nghut kôle, zo wui gi, mó wui é matú sutzé hkong to byi râ dut é a nghut, mó wui sheq, zô wui é matú hkong to byi râ dut é nghut lhê. ¹⁵Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jai râ nghut mù, ngá gûng lé lháng chùng jai râ nghut lhê. Ngò, nungmoq lé myô chyitdap é yanmai, nungmoq gi, ngò lé shaú chyitdap kó râ lúh? ¹⁶Ngò gi, nungmoq chyáng wôlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é dòng nungmoq lé chyup yú sù dut byuq bê ga nungmoq ra-am myit akò myhi-nhung! ¹⁷Ngò gi,

* 12:2 Hkrisduq má é byù rayuq gâ é gi, Poluq yhânggùng yhang lé tai nyi é nghut lhê.

nungmoq chyáng nhang kat byi é byù dông, nungmoq chyáng amyat kut zô yù bê nghut lhê lú? ¹⁸ Ngò gi, Tituq lé nungmoq chyáng lé rá matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nga-nhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lú?

¹⁹ Ngamoq gi, nungmoq hí má ngamoq gùng ngamoq taí hung yu nyi ri nghù, ahkuí jé shoq myit nyi akò lú? Ngamoq gi, Hkrisduq mà é byu pé dông, Garai Gasâng hí má taí nyi é nghut lhê. Chyitdap é gumang wui é, ngamoq kut é jung hkangmó gi, nungmoq é akyu matú chyat nghut lhê. ²⁰ Hkâsu mù gà le, ngo lé jé é hkùn, ngò, nungmoq lé dut nhâng nau é su, nungmoq a wó dut kó rá eq, nungmoq, ngo lé dut nhâng nau é su, ngo a wó dut rá lé, ngò myit gyuq ri. Ngò gi, mabyoq jishùm htoq é, manon é, nhik-ûn buq é, byù hpúng gam é, gansang é, lumu é, gyai nghutbún é eq atau ahù dut é hkyô pé joq rá lé gyuq ri. ²¹ Ngò dum lé jé é hkùn, ngá é Garai Gasang gi, nungmoq é hí má ngo lé myit nyhùm nhâng mù, yhangmoq ô nau é myit châng é má shut é dông nyi zô lhum nau é i-myt, gungsho zùm yap é yubak mara eq a sân-yúng é hkyô kut shut é mai myit a lhing bang myo myó é yanmai, yón kuq é hui zo rá lé, ngò myit chiq ri.

13

Ló Htáng Má Sidiq Byi É Dang Pé

¹ Ahkuí, ngò, nungmoq chyáng lé kum rá gi, sum lhing nghù rá dà m nghut lhê. Haù gi, "Mara hun é hkyô hkangmó lé, í yuq sum yuq saksé hkâm é eq lhoq teng ra rá nghut lhê."* ga kâ tô é eq rajung za nghut lhê. ² Ngò gi, í lhing nghù rá dà m nungmoq eq rahá nyi é hkùn, nungmoq lé sidiq byi gù bê nghut lhê. Ahkuí le, nungmoq eq wê gâng tô é u lé, dum taí kôlé, ngò dum jé lé é hkùn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rá nghut lhê. ³ Haù gi, ngò dông mai Hkrisduq dang taí nyi é hkyô saksé shit rá lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-ù é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gà le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak teng lhê. Haù eq rajung za, ngamoq gi, Yhang su wum nyhóm kôlhang, nungmoq lé dojaú rá matú, Garai Gasâng é a-tsâm eq, Yhang eq rahá dui nyi rá nghut lhê.

⁵ Nungmoq gi, lumjìng hkyô má nghut nyi lhê luq, yhumsing gùng yhumsing myí wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó rá nghut lhê. ⁶ Ngamoq gi, chyam é má a sùm é hkyô lé, nungmoq wó sé kó rá nghut lhê nghù, ngò hkyak lum tô lhê. ⁷ Ahkuí, ngamoq gi, nungmoq shut é hkyô haí a kut kó rá matú, Garai Gasâng chyáng kyúdung byi lhê. Haù gi, ngamoq chyâm hui luí wó lut é hkyô lé byu pé myàng kó rá matú a nghut é za, ngamoq sùm é su dut kôlhang, nungmoq ge é hkyô kut kó rá lé myàng rá matú nghut lhê. ⁸ Hkâsu mù gà le, ngamoq gi, haù tengmán hkyô eq shaí é dông haí le a ge kut é za, tengmán hkyô é matú za kut rá dut é nghut lhê. ⁹ Ngamoq wum nyhóm kôlhang, nungmoq wúm bo é hkùn, ngamoq

* 13:1 Tará Pun 19:15

gabú é nghut lhê; ngamoq kyûdûng é gi, nungmoq gumjup râ matú nghut lhê.
¹⁰Ngò gi, wê gânq tô é hkûn, haú hkyô pé lé hai mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haú gi, nungmoq lé lhoq htên pyám râ matú a nghut, nungmoq lé kê myhang lo nhâng râ matú, haú Yhumsîng ngo lé byî é sheq ru nghut lhê.

Ló Htânq É Shi-kyâm Dang

¹¹Ló htânq má ngò tái nau é gi, gumang wui ê, nguingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguingón shoq asak dui nyi keq. Haú hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyi râ nghut lhê.

¹²Chyoiyúng é bopuq puq é èq, rayuq eq rayuq shi-kyâm lhum keq. ¹³Sân-yúng bang banshoq gi, nungmoq lé shi-kyâm kat akô.

¹⁴Haú Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pè chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui banshoq bang le mù, Galatiq mau mã é noqkuq hpúng pè chyáng dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng mã é, jeju eq nguingón hkyô gi, nungmoq chyáng ru joq nyi sháng gaq ô. ⁴ Haù Hkrisduq gi, nga-nhùng é Íwa Garai Gasang ô nau é eq rajung za, agè ashop é ipyat shí mai, nga-nhùng lé xe yù rá ga, nga-nhùng é yubak mará é matú yhanggùng lé Yhang byi pyám bê nghut ri. ⁵ Haù hpungwup shing kang gi, Garai Gasang chyáng pyat dedu ahtum abyuq ru joq nyi sháng gaq ô. Amen.

Gotû Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kang pyám to kôluí, shaí é gabú danglù shut lhing ló nyi kô é hkyô lé, gyai yhang maú nyi ri. ⁷ Danglù haù gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyám nyi kô é hkyô za nghut lhê. ⁸ Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkùng htoq mã é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq dam byi é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotû hko nyi e nghut jáng, haù yuq gi, ahtum abyuq dam byi é hui zo sháng gaq ô!

¹⁰ Haù su nghu taí é gi, ahkuí, ngò, byù é hí má myoqdong wó rá matú shikut nyi é nghut lhê lú? Haù a nghut jáng, Garai Gasang é hí má myoqdong wó rá matú shikut nyi é nghut lhê lú? Byù lé gabú nhâng rá matú, ngò shikut nyi é nghut lhê lú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut rá a nghut.

Poluq Lé, Garai Gasang Ji Yu É Hkyô

¹¹ Gumang wui è, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹² Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é dông wó hap yu é ru nghut lhê.

¹³ Ngò, Yudaq noqkuq htùng má nghut nyi ashí hkùn, Garai Gasang é noqkuq hpúng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekó rá nghut lhê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htùng lé je cháng sù nghut é htoq agó, ngá é íchyí íwa pè é htungli lé ladu lai shoq myit zìng zuq sù nghut lhê. ¹⁵ Nghut kôlháng, ngá nũ é unghkaú mai yhang hkyin to luí, Yhang é jeju yanmai ngo lé ji yu é Garai

Gasang gi, ¹⁶ haù Yhang Zô é hkyô gabú danglù lé, ngò mai tûngbaù pè chyáng hko kyo sháng gaq ga, Yhang Zo lé ngá chyáng htoq shit nhâng rá matú myit hpyit yu é hkûn, ngò gi, ó yuq eq le a hpyé yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut é luí, Damaskuq myuq má dum taù ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló huí luí, yhang eq raxe ngo nyí, ló nyi nyí é nghut lhê. ¹⁹ Haù má, Yhumsing é yhanggu Yakuq mai lai luí, lagyo gòbang lé ngò a myàng nghut ri. ²⁰ Nungmoq lé ngò ká byí kat é má, mhaù é hkyô a bò nghù luí, Garai Gasang hí má, hkyak, ngò tai lhê. ²¹ Hau htâng má, ngò gi, Suriq mau eq Kiliki mau má ê jé é nghut lhê. ²² Haù hkûn, haù Hkrisduq má nghut é, Yuda mau má é noqkuq hpúng byù wuì gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhúng lé zing-ri sù gi, yhang mai lhoq hten rá matú radàm shikut wú é lumjing hkyô haù lé, ahkuí hko nyi ri." gá é hkyanglù lé wó gyô wú kôluí za, ²⁴ ngá é yanmai, Garai Gasang lé hkyá-ôn bum akò nghut ri.

2

Poluq Lé Lagyo Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghù, tûngbaù pè chyáng ngò hko kyô nyi é gabú danglù lé, haù suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri. ⁴ Haù hkaù wang lo é mhaù é gumang wuì gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng rá dâ kô é yanmai, haù hkyô gabyông htoq lo é nghut ri.* ⁵ Nghut kôlhang, haù gabú danglù é tengmán hkyô gi, nungmoq chyáng joq gíng nyi sháng gaq nghù, razup za lhang, yhangmoq é dang lé ngamoq gyo byí é a nghut.

⁶ Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haù bang gi, ngá é mungdang má hái le a jat kat e za, ⁷ Petruq gi, Yudaq byu pé† lé, haù gabú danglù hko kyo rá mù má lum tô é huí bê eq rajung za, ngò gi, tûngbaù pé‡ lé, haù gabú danglù hko kyo rá mù má lum tô é huí bê hkyô lé za, yhangmoq myang akò nghut ri. ⁸ Hkâsu mù gâ le, Yudaq byu pé é matú Petruq lé lagyo ayá dang byí é sù Garai Gasang gi, tûngbaù pè matú ngo lé le lagyo ayá dang byi bê nghut lhê. ⁹ Haù hkungmó-zing su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq èq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pè shut é rá lhê ga, myit hui bekò nghut ri. ¹⁰ Yhangmoq gi, ngá-nhik mai myùng bang lé ru bún nyi rá matú za pying kat akò; haù gi, ngò gyai yhang kut nau nyi é hkyô nghut lhê.

Petruq Lé Poluq Htuq Hting É Hkyô

* **1:18** Petruq lé Kehpa le gâ lhê. * **2:4** Yudaq byu pé ra-am gi, hpúng asik wang é bang lé Yudaq htùng tarâ cháng nhâng nau akò nghut ri. † **2:7** Grik má ahpyo-kuq hpyit hkam é bang ga bo tô ri. ‡ **2:7** Grik má ahpyo-kuq hpyit a hkam é bang ga bo tô ri.

¹¹ Antioku wà mó má Petruq jé lé é hkûn, yang lé mara hûn râ hkyô joq é yanmai, ngò gi, byu hí má yang, yang lé lhom htuq htúng é nghut lhê. ¹² Hkâsu mù gà le, Yakuq chyáng mai lé é bang a jé shí é u lé, yang gi, tûngbaù pé eq rahá chòm zo chòm shuq lhaq kut ri. Nghut kôlhang, haù bang jé é hkûn, yang gi, ahyo-kuq hpyit râ lhê gà é hpúng má lom é bang lé gyuq é yanmai, tûngbaù pé chyáng mai htoq gang lui, yang baù nyi tô ri. ¹³ Yhang, gegùn labyoq kut é hkyô má, gotú Yudaq byu pé le bo châng kut akò nghut mù lui, Barnaba lhang yangmoq kut é gegùn labyoq hkyô má bo châng nghoq ló bê nghut ri. ¹⁴ Haù gabú danglu é tengmán hkyô eq rajung za, yangmoq a châng kô é lé myàng jáng, ngò gi, yangmoq banshoq bâng é hí má, Petruq lé, "Nàng gi, Yudaq byù nghut to mù lui, Yudaq byù rayuq đông a nyi e za, tûngbaù rayuq đông nyi lui nhîng, tûngbaù pé lé Yudaq byu pé é htungli hkâsu kut wó châng nhâng râ lúh?

¹⁵ Ngamoq gi, yubak dap bang gà é tûngbaù pé a nghut e za, hkú é buinyi mai yang, Yudaq byù nghut gú bê nghut lhê. ¹⁶ Byù gi, jep é tarâ lé cháng lui mara hkyut san byi hui é a nghut e za, Yesuq Hkrisduq lé lumjîng é yanmai sheq mara hkyut san byi hui é hkyô lé, ngamoq sê lhê. Haù mù lui, ngamoq gi, jep é tarâ lé cháng lui a nghut e za, Yesuq Hkrisduq lé lumjîng é yanmai, mara hkyut sân pyâm byí é hui sháng gaq nghú, Yesuq Hkrisduq lé lumjîng bê nghut lhê; hkâsu mù gà le, ó yuq le, jep é tarâ lé châng é yanmai, mara hkyut san byí é hui râ a nghut.

¹⁷ Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myàng é nghut jáng, mara lé gi, Hkrisduq mai kut nhang é nghut lhê lúh? Ratsuí le a nghut. ¹⁸ Ngò gi, ngò hpyoq pyâm bê hkyô lé dum saí kut é nghut jáng, tarâ lu lai é byù ngò nghut é lé tûn shít ri. ¹⁹ Ngò gi, jep é tarâ eq sêng é má, jep é tarâ é yanmai shí jáng sheq, Garai Gasâng é matú wó dui nyi râ nghut lhê. ²⁰ Ngò gi, Hkrisduq eq rahá jén sat é hui bê nghut mù lui, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chytidap lui, ngá é matú yhânggùng lé Yhang byí pyâm é, haù Garai Gasâng é Yhangzo lé lumjîng é yanmai ru nghut lhê. ²¹ Ngò gi, Garai Gasâng é jeju lé tô pyâm é a nghut, hkâsu mù gà le, dingmán é hkyô lé, jep é tarâ đông wó yu é ru nghut le gi, Hkrisduq shí hkâm é gi, akôm dut byuq râ nghut lhê." nghú tai é nghut lhê.

3

Lumjîng Myit Lhú? Jep É Tarâ Lhú?

¹ Galatiq mau mà é byùbâm pé è! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq èq wá nungmoq lé lhang nghoq yù bekò lúh? ² Nungmoq gi, haù Woi-nyí lé, jep é tarâ cháng lui wó yù kô é nghut lhê lúh? A nghut jáng, nungmoq wó gyô yu é gabú danglù lé lumjîng lui wó yù kô é nghut lhê lúh? Haù rahkat lé za, ngò sê yù nau ri. ³ Nungmoq gi, haù-í yang bâm akò lúh? Haù Woi-nyí lé lumhkaù mù kut hí kôlui nhîng, ahkuí, gungsho wum-o lé lumhkaù mù, yhumsîng myit tô é hkyô lé lhoq pán râ matú shikut nyi akò lúh? ⁴ Nungmoq, myo myo hpuzô pyâm é gi, akôm nghut akò lúh? Gè gè yang, haù gi, akôm nghut byuq bekò lúh? ⁵ Garai Gasang, nungmoq lé Yhâng é Woi-nyí byí é htoq agó, nungmoq chyáng laklai kumlhá kut é gi, jep é tarâ lé nungmoq châng é yanmai nghut

akô lúh? A nghut jáng, nungmoq wó gyô é gabú danglù lé, nungmoq lumjínq é yanmai nghut akô lúh?

6 "Abraham gi, Garai Gasang lé lumjínq luí, yhang lé dingmán sù ga sôn yu é hui bê nghut ri."* ga, Abraham eq séng luí tai tô é lé myit wú keq. 7 Haú mù luí, lumjínq myit bo é bang gi, Abraham é yhangzô pé* yhang dut bê nghut é hkyô lé sé keq. 8 Lumjínq myit é yanmai, tungbaù pé lé Garai Gasang mara hkyut san byi rá nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângiup gi, shimân jeju wó yú kó rá nghut lhê."* ga ri. 9 Haú mù luí, lumjínq myit bo é bang gi, lumjínq myit bo é Abraham eq rahá, shimân jeju lé myang hkam yù kó rá nghut lhê.

10 Jep é tarâ châng é hkyô má ngè hkau é lunglhang bang gi, nhing pyâm é hui bang chyat nghut lhê. Hkâsu mù gâ le, "Tarâ laiká má kâ tô é lunglhang lé a xoq kut é sù, ó yuq nghut kôle, nhing pyâm é hui kó rá nghut lhê."* ga luí, kâ tô ri. 11 Hau htoq agó, "Haú dingmán sù gi, lumjínq myit mai asak ùi rá nghut lhê."* ga kâ tô é yanmai, ó yuq nghut kôle, Garai Gasang é hí má jep é tarâ lé cháng luí, mara hkyut san byi é a hui é hkyô gi, san za nghut bê nghut ri. 12 Haú jep é tarâ gi, lumjínq myit eq hai a séng é nghut luí, "Haú pé òng châng é sù gi, haú pé mai asak ùi rá nghut lhê."* ga kâ tô ri. 13 Haú Chyúmdang má, "Sik zing má jén lhang to hui é sù ó yuq nghut kôle, nhing pyâm é hui sù nghut ri."* ga kâ tô é eq rajung za, Hkrisduq gi, nga-nhung é matú nhing pyâm é hui sù dut bê nghut é yanmai, jep é tarâ má é nhing é hkyô mai nga-nhung lé hkyi yù bê nghut ri. 14 Haú Abraham lé byi tô é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhung lé hkyi yu é nghut ri; haú mù, nga-nhung gi, danggidiq byi tô é Woi-nyí haú lé, lumjínq myit mai wó yù rá nghut lhê.

Jep E Tarâ Eq Danggidiq

15 Gumang wui ê, nyí wui é asak ùi hkyô má é lé dangtú yù mù, ngò nungmoq lé tai kôlé, byù mai chôm tô tô é dangshikaq lé, ó yuq eq le wó lhoq hpyoq pyám rá a nghut, ó yuq eq le haú má wó jat kat rá a nghut. 16 Abraham eq yhang é awut ashín lé byi tô é danggidiq le haú eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haú Chyúmdang má, haú lé tai nau é a nghut e za, "náng é awut ashín lé"* ga tai nau é ru nghut lhê, haú é lichyúm gi, byù rayuq lé za tai é nghut lhê, haú gi, Hkrisduq nghut ri; 17 haú mù luí, ngò tai nau é gi, Garai Gasang, dangshikaq tô tô é htang, myí sho sum xê zàn má lé joq é tarâ gi, dangshikaq haú lé le wó lhoq hpyoq pyám rá a nghut, danggidiq lé le wó lhoq htên pyám rá a nghut. 18 Hkâsu mù gâ le, haú silí wunlí gi, jep é tarâ eq séng lhum é nghut jáng, danggidiq eq gi, hai le a séng lhum lo nghut ri; nghut kôlhang, Garai Gasang gi, Yhang é jeju yanmai, Abraham lé danggidiq òng silí wunlí haú byi to bê nghut ri.

19 Haú su nghut jáng, haú jep é tarâ gi, hai akyú bò rá lúh? Haú gi, danggidiq òng lhoq àng tô é Awut ashín nghut é sù jé lé é hkún jé shoq, mara kut shut nyi bùm kô é yanmai, jat kat tô é nghut lhê; jep é tarâ haú gi, maumang lagyo

* 3:6 Apùn 15:6 * 3:7 Abraham é yhangzô pé gâ é gi, Garai Gasang é yhangzô pé lé gâ é nghut lhê.

* 3:8 Apùn 12:3 * 3:10 Tarâ Pun 27:26 * 3:11 Hbk 2:4 * 3:12 Nhong 18:5 * 3:13 Tarâ Pun 21:23 * 3:16 Apùn 12:7; 13:15; 24:7

pé mai gyoro sô xoq byi sù† é loq dông byi tô é ru nghut lhê. ²⁰ Gyoro sô xoq byi sù gi, rahkyam shut má é bang eq baú sêng é a nghut, nghut kôlhâng, Garai Gasang gi, rayuq za nghut lhê.

²¹ Haú mù luí, jep é tará gi, Garai Gasâng é danggidiq pé eq htuoq htíng lhúm lhê lúh? Ratsuí le a nghut. Hkâsu mù gâ le, dui é asak wô byí é jep é tará lé byi to bê nghut le gi, gè gè yhang, dینگmán hkyô gi, jep é tará mai lò rá nghut lhê.

²² Nghut kôlhâng, mینگkan gôn má é bang gi, yubak mará é htongbyu pé chyat nghut akô ga Chyúmdang má bo tô ri; haú mù luí, haú byí to bê danggidiq lé gi, Yesuq Hkrisduq lé lumjینگ é bang lé byi rá nghut lhê.

²³ Lumjینگ hkyô haú a jé shimá, nga-nhúng gi, haú jep é tara eq htongbyú dông lhúng tô é hui luí, lumjینگ hkyô haú htoq shit é hkún jé shoq myhí lhúng tô é hui wú bê nghut lhê. ²⁴ Haú mù luí, nga-nhúng gi, lumjینگ é yanmai mara hkyut san byí é hui sháng gaq ga, jep é tará gi, nga-nhúng lé Hkrisduq chyáng shuí ê rá matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haú lumjینگ hkyô jé bê nghut é yanmai, nga-nhúng gi, haú jep é tará mai hkyô-u shê é loq hkaú má a nghut lo.

Garai Gasâng É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjینگ é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri.

²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byú ngu é eq Grik ngu é, jùn ngu é eq luthkyô ngu é, yuqé ngu é eq myiwe ngu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haú danggidiq eq rajung za silí wunlí hkam yù bang le, nghut akô nghut ri.

4

¹ Ngò táí nau é lichyúm gi, haú amyú hkúng xoq dut rá sù gi, ikun sutzê banshoq lé sینگ ang sù nghut kôlhâng, yhang, zoshâng nghut ashí hkún gi, jùn hpó eq haí a shaí nghut ri. ² Yhang gi, yhâng wa masat tô é ahkyینگ jé shoq, yhang lé zúng é sù eq yhúm lé up su é a-ô má ru lúng nyi ashí nghut ri. ³ Haú eq rajung za, nga-nhúng le zoshâng* nghut é hkún gi, mینگkan uphkâng tará ô má jùn dut nyi é bang nghut lhê. ⁴ Nghut kôlhâng, ahkyینگ lo ngap jáng, zo dut rá ahkáng lé byینگ shoq, nga-nhúng wó yú sháng gaq ga, Garai Gasang gi, jep é tará hkaú má é byu pé lé hkyi yù rá matú, ⁵ jep é tará hkaú má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wúí nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaú má kat byi bê nghut ri. ⁷ Haú mù luí, nàng gi, jùn a nghut lô é za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkún, Garai Gasang lé nungmoq a sé shí é u lé, nungmoq gi, nat hparà lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê ngu é htoq agó, Garai Gasang gi, nungmoq lé sé

† 3:19 Gyoro so xoq byi sù gi, Mosheq nghut ri. * 4:3 Bun zo shí má, zoshâng gâ é lichyúm gi, Yesuq lé a lumjینگ shí é bang lé gâ lhê.

bê nghut le nhing, nungmoq gi, hkâsu mù, haù wum nyhôm é eq akyù a byî é, mingkan uphkan é tarâ shut dum lhing taù ló nyi akô lú? Nungmoq gi, haù pè eq jùn zô é dum hui zó nau akô lú? ¹⁰ Nungmoq gi, buinyi wú, llohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung! ¹¹ Nungmoq chyáng ngò wum kat pyám é hkyô gi, akôm dut bê abe nghù, nungmoq é matú ngò myit chiq nyi ri.

¹² Gumang wui ê, ngò gi, nungmoq su dut bê nghut é yanmai, nungmoq le ngò su dut keq† nghù, nungmoq lé dúng tôngbán kat lhê. Nungmoq gi, ngo lé haì le a kut shut wú kô é nghut lhê. ¹³ Sâng-hì dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê. ¹⁴ Ngá é nòhpyo gi, nungmoq é matú wuìhke hkyô dut kólhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haù sù é nhing, nungmoq é gabú hkyô banshoq gi, haì dut byuq bekô lú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byî pyám kó rá í dut lai lò bê hkyô lé, ngò saksé wó hkâm lhê. ¹⁶ Ahkuí, ngò gi, nungmoq lé haù tengmán hkyô tai kyô é yanmai, nungmoq é gyè dut to bê nghut lhê lú?

¹⁷ Haù byù góbang gi, nungmoq lé gyai shirong é hkyô tûn shit ri; nghut kólhang, ge é hkyô haì a bô; yhangmoq ô nau é hkyô gi, yhangmoq lé nungmoq taù shirông kó abe ga, nungmoq lé ngamoq chyáng mai lhoq kâng yù rá matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haù su shirong le ge lhê. ¹⁹ Ngò chyitdap é zo wuì ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí, ²⁰ nungmoq é hkyô lé myit wuìhkê tô é yanmai, ahkuí, nungmoq eq rahá myang nyi mù, ngò tai é danghtê wó htaì rá matú, gyai yhang myoqbyu nyi lhê ô.

Hagara eq Sarah Nhk É Hkyô

²¹ Haù jep é tarâ ô má nyi nau é bang ê, nungmoq gi, jep é tarâ má tai é hkyô lé a sê gyo kô é nghut lhê lú? Ngo lé tai kyô wú kó laq. ²² Hkâsu mù gà le, Abraham gi, yuqzô í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri. ²³ Haù jùn myhí é yhangzo gi, gungsho dông hku lé é sù nghut kólhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haù hkyô pé gi, dangtú ru nghut lhê, myiwe haù í yuq gi, dangshikaq í lhum eq wuì lhê; dangshikaq ralhú gi, Sinaq Bùm mâ é† nghut luí, jùn dut rá nghut é zo wuì lé hku kat é Hagara lé tai nau é nghut ri. ²⁵ Hagara haù gi, Arabiq mau mâ é Sinaq Bùm lé tai nau é nghut luí, ahkuí lhê é Yerusalem eq wuì nyi ri. Hkâsu mù gà le, Yerusalem haù gi, yhang zô pé eq rahá, jep é tara é jùn dut nyi kô é yanmai nghut lhê. ²⁶ Nghut kólhang, ahtoq mâ é Yerusalem gi, jùn myhí a nghut sù nghut luí, nga-nhùng é ínu nghut ri. ²⁷ Hkâsu mù gà le, "Zosháng a hku é baùdung myhí é, gabú nyi aq. Zo hkû nò a no wú shí é myiwe gi, gabú luí, gabú garú nyi aq;

hkâsu mù gà le, haù chamchyuiyui dut é myiwe myhí gi, làng wó é myiwê htoq má zo wuì je myó wò bê nghut ri."

† 4:12 Ngò su dut keq gà é lichyúm gi, nungmoq le ngò su jep é tarâ mai lut htoq keq gà nau é nghut lhê. ‡ 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê.

ga kâ tô ri.*

²⁸ Gumang wui ê, ahkuî, nungmoq gi, Isak su, danggidiq byî tô é zo wui nghut bê nghut ri. ²⁹ Haú hkûn lé, haú gungsho đông hku lé lo é sù gi, Woi-nyí wum-o đông hku lé lo é sù lé zing-rî ri. Haú eq rajung za, ahkuî le dut nyi ri. ³⁰ Nghut kôlhang, Chyúmdang má hkâsu ga kâ tô ri lúh gâ le, "Haú jùn myhí eq yhangzo yuqzo lé hkat htoq pyám aq; hkâsu mù gâ le, haú jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù rá a nghut."* gâ ri. ³¹ Haú mù luí, gumang wui ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

5

Hkrisduq Mã É Luthkyô

¹ Nga-nhúng luthkyô wó rá matú, Hkrisduq gi, nga-nhúng lé lhoq lhut kat bê nghut ri. Haú mù luí, haú má ru gíng nyi mù, yhumsing gùng lé jun é wôlai hkaú má hkâtaú bainaí nyi kó.

² Ngá dang lé matsíng yù keq! Ngò Poluq, nungmoq lé tái kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyù le bò kó rá a nghut. ³ Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tará lhunglhang lé châng kut rá lhê nghú, ngò kyô kat lhê. ⁴ Jep é tará châng shikut é đông mara hkyut san byí é hui naú bang, nungmoq gi, Hkrisduq eq gâng lhùm to bekô nghut luí, haú Garaí jeju mai le byit gyó byuq bekô nghut ri. ⁵ Ngamoq kúm gi, myit myoqbyu tô é dínmán hkyô lé, haú Woi-nyí é yanmai lumjíng myit eq gyai yhang láng nyi é bang nghut lhê. ⁶ Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyù a bò nghut ri; chyitdap myit mai htoq lo é lumjíng myit za sheq, akyù bo lhê.

⁷ Nungmoq gi, rago dín wú bekô* nghut é wá, haú tengmán hkyô lé a cháng sháng gaq ga, nungmoq lé ó yuq eq hkúm zing pyám kô é lúh? ⁸ Haú su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹ "Mún ratsuí zo gi, muk long gón lé wó lhoq daú lhê."† gâ é dang joq lhê. ¹⁰ Nghut kôlhang, nungmoq gi, gotú hkyô đông a lhom yù kó rá nghut lhê nghú, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo rá nghut lhê. ¹¹ Gumang wui ê, ahpyo-kuq hpyit é hkyô lé, ngò rú hko nyi ashí nghut le gi, hai mù luí, zing-rí é lé ngò hui zô nyi rá lúh? Haú su kut é nghut jáng, haú tapzíng eq séng luí, manghkáng joq rá a nghut lo. ¹² Nungmoq lé lhoq byok nyi é bang gi, hau htoq chyan luí, yhumsing gùng yhumsing banshoq hpyit pyám kó sháng gaq nghú, ngò wó myit ri.

¹³ Gumang wui ê, nungmoq gi, luthkyô wó rá matú ji yù hui é bang nghut akô; nghut kôlhang, nungmoq é luthkyô ahkáng lé, yubak gungsho má hkáchang nhâng kó, chyitdap myit mai kúm gi, rayuq eq rayuq dojaú lhùm nyi keq. ¹⁴ Hkâsu mù gâ le, "Náng gùng lé nàng chyitdap é su, náng é chyangnâm mã é bang lé le chyitdap aq."* gâ é hkunmó má za, jep é tará banshoq lo bo

* 4:27 Esai 54:1 * 4:30 Apùn 21:10 * 5:7 Rago dín wú bekô gâ é gi, woi-nyí hkyô má kô myhang laí lò bê lé tái nau é nghut lhê. † 5:9 Shut é đông mhoqshít é hkyô ratsuí gi, muk long gón lé mún èq wó lhoq daú é su, nungmoq banshoq lé wó lhoq ngoq yu pyám lhê. * 5:14 Nhong 19:18

to bê nghut lhê. ¹⁵ Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Êq Asak Dui Râ Hkyô

¹⁶ Nghut kôlhang, ngò tai kôlé, Woi-nyí shui ù é đông asak dui nyi keq; haú hkûn, nungmoq gi, yubak gungsho ô nau é hkyô cháng kó râ a nghut. ¹⁷ Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haú í lhum gi, gyê dut lhûm ri; haú mù, nungmoq gi, yhumsing ô nau é đông hkâkut kó. ¹⁸ Nghut kôlhang, nungmoq lé Woi-nyí eq hkyô hi é nghut jáng, nungmoq gi, jep é tará ô má a nghut lo nghut ri.

¹⁹ Yubak gungsho é muzô gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhúm nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsú é hkyô, í shuq wut é hkyô, zô yê shuq yê mù achag achyt kut é hkyô pé eq haú pé su kut é gotú hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghú, ngò, hí hkûn nungmoq lé tai wú bê eq rajung za, ahkuí lé, nungmoq lé ngò sidiq byí nyi lhê.

²² Nghut kôlhang, Woi-nyí é ashí gi, chyitdap hkyô, gabú hkyô, nguingón hkyô, myit hng hkyô, nhik-u nú é hkyô, ge é hkyô, lhumzui hkyô, ²³ nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyâm râ tará haí le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzing má jén sat pyâm bekô nghut ri. ²⁵ Nga-nhúng gi, Woi-nyí mai asak dui bê nghut mù, haú Woi-nyí htâng châng nyi sháng. ²⁶ Nga-nhúng gi, akôm gyáng dang tai luí, rayuq eq rayuq jeq ho lhûm é eq manon lhûm é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui é, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit eq haú yuq lé lhoq pun lhoq kyíng yù keq. Nghut kôlhang, nàng gi, gunglau é a hui sháng gaq, sidiq nyi aq. ² Rayuq eq rayuq é wòlai lé tê byi lhûm nyi keq; haú đông mai, nungmoq gi, Hkrisduq é tará lé wó lhoq dik kó râ nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkangmó gi, yhumsing nyi yap é hkyô lé taú myit wú keq; haú hkûn, yhumsing gùng lé góbang eq whui nó a râ e za, yhumsing gùng má aróng wó yù râ nghut lhê. ⁵ Hkâsu mù gâ le, yuq hkangmó gi, ó le ô wò lé wùn waq ra râ dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gám byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê. ⁸ Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ

matú hô kat é sù kúm gi, Woi-nyí haù mai ahtum abyuq é asak lé myang hkam yù rà nghut lhê. ⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haù lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyû myang hkam yù rà nghut lhê. ¹⁰ Haù mù luí, nga-nhúng gi, kut rà ahkyíng wó tô é u lé, byù lhunglhâng bang lé ge é hkyô kut byi sháng, haù lumjíng hkyô eq séng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kê kat byí é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haù su kut é hkyô gi, Hkrisduq é tapzîng é yanmai zing-ri huí é hkyô lé, koi pyâm rà matú za nghut ri. ¹³ Hkâsu mù gâ le, haù ahpyo-kuq hpyit é bang lháng jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhúng é Yhumsíng Yesuq Hkrisduq é tapzîng eq séng luí gumrông é mai lai luí, hai má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê. ¹⁶ Tarâ haù lé châng é lhunglhâng bâng é ahtoq má le, haù Garai Gasâng é Israelaq byu pé* é ahtoq má le, nguínón hkyô eq shogyo nhikmyin hkyô gi, ru joq nyí sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸ Gumang wuì ê, nga-nhúng é Yhumsíng Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

* **6:16** Bun zo shí lhum mâ é Israelaq byu pé gâ é gi, hpúng byù wuì banshoq lé tái nau é nghut lhê.

EHPE SU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyí é, Hkrisduq Yesuq má lhumzui bang nghut é, haù sâ-n-yúng bâng chyáng nguingón dang shit kyô kat lhê.

² Nga-nhúng é Iwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyí sháng gaq ô!

Hkrisduq Mã É, Woi-nyí Hkyô Shimân Jeju Pé

³ Mauhkúng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhúng é Yhumsing Yesuq Hkrisduq é Yhângwa, Garai Gasang gi, hkungso wó nyí sháng gaq. ⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shí mai, Hkrisduq Yesuq má nga-nhúng lé hkyin yu to bê nghut ri. ⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri. ⁶ Haù mù, Yhang chyitdap é Sù* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhúng mara hkyut byí é hui lui, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê. ⁸ Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq đông mai kut râ matú hen to bê nghut é, Yhâng é záu tô é hkyô lé, nga-nhúng lé shit bê nghut ri. ¹⁰ Sê gyo wui é hkyô haù gi, lhoq dik râ ahkying jé jáng, mauhkúng htoq eq myigùng htoq má é lunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga, ¹² Garai Gasang gi, Yhang myit sôn tô é lunglhang lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkùn, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haù gidiq byí tô é Chyoiyúng Woi-nyí dizik htung tap byí é hui bekô nghut ri. ¹⁴ Garai Gasâng é hpungwup shingkan lé hkya-on râ matú, Yhang eq sêng é byu pé hkyi xe yù hui é hkying jé shoq, Chyoiyúng Woi-nyí haù gi, nga-nhúng é muizé lé hkyak wó yù râ nghu é masat nghut ri.

Poluq Kyúdung Byí É Hkyô

¹⁵ Haù mù lui, Yhumsing Yesuq lé nungmoq lumjing é hkyô eq sâ-n-yúng bang lunglhang lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyúdung dang má nungmoq lé myit bun uchyang, anum yhang, nungmoq é matú jeju hkya-on nyí lhê. ¹⁷ Nga-nhúng é Yhumsing Yesuq

* **1:6** Yhang chyitdap é Sù gâ é gi, Yesuq lé tai nau é nghut lhê.

Hkrisduq é Garai Gasang nghut é, hpungwup shingkang bò sù haù Ìwa gi, Yhang lé nungmoq je sé rà matú, hpaqchyí byéng-yá wó byí é eq san za wó sé nhang é Woi-nyí, nungmoq lé byi sháng gaq nghù, ngò, Yhâng chyáng dùng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasù é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é hkyô lé le, Yhâng é kò dik é a-tsam mó gi, lumjǐng bang nga-nhúng é matú nghut é lé le, ¹⁹ nungmoq wó sé rà matú, nungmoq é myit myoqjí lhoq gyeng byí é hui sháng gaq nghù, ngò kyúdung byí nyi lhê. A-tsam mó haù gi, Garai Gasang, Hkrisduq lé shi é mai lhoq dui toq yù mù, ²⁰ mauhkúng htoq tsáng myhâng má, Yhâng é loqyò hkyam shut zùng nhang é hkùn, chung é wum-o a-tsam mó eq rajung za nghut ri. ²¹ Hkrisduq gi, uphkan é, ahkáng ayá wó é, a-tsam bo é eq up zò é bang banshoq htoq má le, ahkuí pyat eq htang pyat má myhǐng é myǐng lhunglhâng é htoq má le, je gyaú é sù nghut lhê. ²² Hau htoq agó, Garai Gasang gi, lhunglháng lé Yhâng é hkyiwa ô má tô to luí, haù noqkuq hpúng é matú, Yhang lé, jung hkanmó é ushuq dut rà dǒng masat to bê nghut ri. ²³ Noqkuq hpúng haù gi, Hkrisduq é gungdu nghut luí, hkyô hkanmó má jung hkanmó lhoq byǐng jup é Hkrisduq byǐng nyi é nghut ri.

2

Hkrisduq Má Asak Dui É Hkyô

¹ Lai ló bê hkùn, nungmoq gi, tará lu lai é eq mara kut shut é hkyô pé é yanmai, shi tô é bang dut kò é nghut lhê. ² Haù hkùn, nungmoq gi, mingkan ngón hkyô pé má lhaq châng nyi kò é htoq agó, haù tará a cháng bâng é myit má ahkuí mù zuí nyi é sobyô nghut é, maulat lé up sù htáng châng nyi kò é bang nghut lhê. ³ Nga-nhúng banshoq bang le, yhangmoq su kut nyi lai lo é bang chyat nghut mù, yubak mara byǐng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dǒng za châng wú é bang nghut lhê. Haù mù, góbang eq rajung za, nga-nhúng gi, Garai Gasang é nhikmo-yo hkyô eq gingdán wú é bang chyat nghut lhê. ⁴ Nghut kólhang, shogyo nhikmyin myit gyaí bo é Garai Gasang gi, nga-nhúng, tará lu lai luí shi byuq bê bang dut kólhang, Yhâng é chyitdap myit mó eq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵ Haù mù, nungmoq gi, Garai jejú eq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung tai é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yù mù, mauhkúng htoq tsáng myhâng má, Yhang eq rahá zùng nhang to bê nghut ri. ⁸ Hkásu mù gá le, nungmoq gi, lumjǐng é dǒng mai Garaí jejú eq za hkyi yu é hui bekô nghut ri. Haù gi, nungmoq chyáng má é a nghut, Garai Gasang jeju chyunghuq za ru nghut lhê. ⁹ Haù gi, yhumsing é muzó mai wó é a nghut é yanmai, ó yuq le nghutbun rà hkyô a joq. ¹⁰ Hkásu mù gá le, nga-nhúng gi, Garai Gasang é loqmú pé nghut mù, nga-nhúng zui saí rà matú, hí hí mai, Garai Gasang hen lajáng tô é ge é muzó pé lé zui saí rà matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haù mù luí, nungmoq gi, hí hkùn, hku lé lo é mai yhang tǔngbaù pé nghut é hkyô lé le, byu loq eq za gungsho má kut é, "ahpyo-kuq hpyit hkám bang" gá

é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhùm tô é bang; Israelaq mingbyù a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkùn wê gâng nyi é bang nghut kôlhang, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekò nghut ri.

¹⁴ Hkâsu mù gà le, Yhânggùng yhang gi, nga-nhùng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haù í myú* dut nyi é lé, rahú za dut nhâng bê nghut ri. ¹⁵ Haù hkunmò pé eq hkang tô é tarâ pé bo é jep é tarâ lé, Yhâng é gungsho má lhoq htùm pyám bê nghut ri. Haù mù, Yhang ô nau é hkyô gi, haù í myú dut tô é lé, Yhânggùng má yhang, byù sik ra-myú za hpan to rà matú nghut ri; haù dông, simsaq hkyô kut byi bê nghut ri. ¹⁶ Yhang gi, a naù a wòm lhùm é hkyô lé, haù tapzîng má lhoq htùm pyám byi mù, haù tapzîng dông mai, byù myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸ Hkâsu mù gà le, nga-nhúng í myú gi, Yhang dông mai, Woi-nyí ralhùm zâ èq, haù Íwâ chyáng wàng rá hkyô dong bê nghut ri.

¹⁹ Hau é yanmai, nungmoq gi, tûngbaù pé eq byù bíng pé a nghut lô é za, Garai é byu pé eq rahá, mingbyù wui eq yhumbyù wui chyat nghut bekò nghut luí, ²⁰ haù lagyô pé eq myiqhtoí pé, hi tô é apùn awang htoq má xuq tô é bang chyat nghut akò; Hkrisduq Yesuq yhang, haù mã é ahkyak é htungchyùn luqgok dut bê nghut ri. ²¹ Yhang má, wahpang lhum gón xoq lhùm bùm é nghut mù, haù Yhumsing má chyoiyúng noqkuq yhùm ralhùm dut lò bê nghut ri. ²² Woi-nyí dông mai, Garai Gasang nyi rá jang dut rá matú, nungmoq le, Yhang má, wahpang su tsuq é chòm huí nyi bùm bekò nghut ri.

3

Poluq, Tûngbaù Pê É Tarâ Hkô Sará

¹ Haù su nghut mù, Hkrisduq Yesuq é hkyô lé, nungmoq tûngbaù pê chyáng hko kyô é yanmai, htongbyù dut sù, ngò Poluq gi, nungmoq é matú kyúdung byi lhê.

² Nungmoq lé dojaú rá é matú, ngo lé byi tô é Garai Gasâng jeju ayá shí lé, nungmoq gè gè wó gyô wú bekò rá nghut lhê. ³ Haù gi, hí hkùn, ngò, tot é dông kâ tô wú bê eq rajung za, haù zaú tô é hkyô lé, shìng-rán dông ngo lé sé nhang é nghut ri. ⁴ Haù hkyô lé, nungmoq nghap wú é hkùn, Hkrisduq eq sêng é zaú tô é hkyô, ngò rago sé é lé, nungmoq wó sé kó rá nghut lhê. ⁵ Haù lé, laí lò bê ipyat pé mã é byu pé lé a sé nhang é nghut kôlhang, ahkuí gi, Garai Gasâng é chyoiyúng é, lagyô pé eq myiqhtoí pé lé, haù Woi-nyí èq hpông shit bê nghut ri. ⁶ Zaú tô é hkyô haù gi, gabú danglù dông mai, Hkrisduq Yesuq má, Israelaq byu pé eq rahá, tûngbaù pé le, hkùng xoq bang wó dut luí, gungdu ralhùm é gungsho showui showang pé chyat dut é eq, danggidiq byi tô é lé wó chòm hkam yu é bang dut é hkyô nghut ri.

* **2:14** I myú gà é gi, Israelaq byu pé eq tûngbaù pé lé gà lhê. † **2:17** Wê gâng nyi é bang gà é gi, tûngbaù pé lé gà lhê. ‡ **2:17** Chyâng htep nyi é bang gà é gi, Israelaq byu pé lé gà lhê.

⁷ Yhâng é hpungwup a-tsam mai, ngo lé byî tô é Garai Gasâng jeju chyunghuq é yanmai, ngò gi, gabú danglù shî tai râ dui-nhâng zoshâng dut é nghut lhê. ⁸ Ngò gi, haù Garai Gasâng é byu pé mâ é tiq dik sù htoq má lhang je tiq sù nghut kôlhâng, haù Hkrisduq é a ung htoq tai é wó sùt hkyô lé, tungbaù pé chyáng hko kyo râ matú le, ⁹ haù lunglhang lé hpan é Garai Gasang má, lai lò bê ipyat pé má zaù tô é, zaù tô é hkyô haù lé hkâsu kut tô é lé, yuq hkangmó lé tai sân kyo râ matú le, jeju shî, ngo lé byi bê nghut ri. ¹⁰ Haù gi, nga-nhông é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haù Garai Gasâng é hpaqchyî mó góng lé, noqkuq hpúng đông mauhkung htoq tsáng myhâng mâ é uphkâng bang eq ahkáng ayá wó bang lé, ahkuî sé nhâng râ matú nghut lhê. ¹² Nga-nhông gi, nga-nhông é Yhumsing Hkrisduq Yesuq eq rading ralhum za nghut é yanmai le, Yhang lé lumjing é yanmai le, Garai Gasang chyáng, wám é myit eq a gyuq a wám é myit eq wò htep é é nghut lhê. ¹³ Haù mù luí, ngò, nungmoq lé dúng tôngbán nau é gi, nungmoq é matú, ngò wuihke jamjau hui zô é yanmai, nungmoq i-myt hkâgyui kó; haù gi, nungmoq é matú akyù bò râ hkyô nghut lhê.

Ehpesu Myuq Byu Pé Lé Kyûdung Byi É Hkyô

¹⁴ Haù pé é yanmai, ngò gi, haù Íwá é hí má hkyihput htuq luí kyûdung é nghut lhê. ¹⁵ Mauhkung eq myigùng htoq mâ é Yhâng é ikun byù lunglhang gi, Yhâng chyáng mai mying wó yu é chyat nghut lhê. ¹⁶ Nungmoq é lumjing myit mai, nungmoq é i-myt unghkaù má Hkrisduq wó nyi nyi sháng gaq nghù, ¹⁷ Yhang é hpungwup shingkang bo é agùn agó wó sùt é mai, nungmoq é i-myt unghkaù mâ é sù lé, Yhâng é Woi-nyí đông, hpungwup a-tsâm eq wum-o lhoq kóng byi râ matú, ngò kyûdung byi lhê. Haù htoq agó, nungmoq gi, chyitdap myit má amyt chin to luí, awang hi to mù, ¹⁸ sân-yúng bang eq rahá, hau é apyí, a-tsùng, myhâng, nik, hkâ-í nghut é lé, rago wó sé kôluí, ¹⁹ Garai Gasâng é gumjup é hkyô lunglhang eq wó lhoq gumjup yù kó sháng gaq nghù, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuí, nga-nhông é hkaù má mù zuí nyi é, Yhâng é wum-o a-tsâm é yanmai, nga-nhông dúng é banshoq eq myit é hkyô lunglhang htoq je wó kut byi é Su chyáng, ²¹ haù noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rù bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haù mù luí, nungmoq gi, nungmoq lé wut yù bê nghut mù, wut yu é hkyô eq gingdán é đông asak duì keq nghù, haù Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê. ² Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhum nyi keq. ³ Haù Woi-nyí eq byi é myit hui hkyô lé, nguóngn hkyô đông mai cháng nyi râ matú, wó dut é í shikut nyi keq. ⁴ Nungmoq gi, wut yù hui kô é hkùn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵ Yhumsing rayuq za, lumjing hkyô rahkat za, bapisma ralhum za nghut nyi ri. ⁶ Banshoq bâng é Íwa nghut sù Garai Gasang le, rayuq za

nghut nyi ri; Yhang gi, banshoq bâng é ahtoq má nghut luí, lunglhang dong mai mú kut é eq lunglhang é ahkaú má lúng nyí sù nghut ri.

⁷ Nghut kólhang, nga-nhúng yuq hkangmó gi, jeju chyunghuq lé, Hkrisduq mai ké byí é dong wó yu é nghut lhê. ⁸ Hau é yanmai,

"Yhang gi, myhang é jowó shut doq ló é hkún, shúm zung é bang lé gi, shui chúng mù, byu pé lé gi, chyunghuq tsing gám byí ri."^{*}

ga, Chyúmdang má tai tò é nghut lhê. ⁹ Hau "doq ló" gá é lichyúm gi, myigùng é a-o tsáng má le, Yhang gyó jé bê nghut lhê, gá naú é a nghut lhi? ¹⁰ Hau gyó lé é Sù gi, junghkang jungmó lé lhoq byíng jup rá matú, mauhkùng banshoq é ahtoq má doq ló é Sù yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo rá bang, ra-am lé, hpúng-up pé eq sará pé kut tsing byí to bê nghut ri. ¹² Hau bang gi, Garai Gasang é byu pé lé wùn waq âng é muzó pé é matú, hen lajâng é bang nghut ri. Hau hkún sheq, Hkrisduq é gungdu gi, ¹³ hau lumjín hkyô eq Garai Gasang é Yhangzo lé sê é hkyô má, nga-nhúng banshoq bang rading ralhum za wó dut mù, kô dínng bang dut luí, Hkrisduq é gumjup é isâm banshoq lé wó yu é hkún jé shoq, wó kô jat nyí rá nghut lhê.

¹⁴ Hau mù, nga-nhúng gi, wuibaú pé èq hí shut htâng shut bat myhú é su dut é eq, byu pé é agé ashop é eq haq dá é mhoq hpyoq hpaqchyí pé eq mhoqshit hkyô laidun hkangmó èq, shí shut hé shut mù táng é su dut é lé hui zô é zoshâng wui su a nghut ló é za, ¹⁵ chyitdap myit mai tengmán é dang lé tai nyí jáng, Hkrisduq nghu é ulhum má hkyô hkangmó kô myhang lò rá nghut lhê.

¹⁶ Yhang dong mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang hau pé gi, yhumsing é muzó lé zui sai nyí é nghut jáng, gungdu hau gi, chyitdap myit má, yhanggùng yhang kô lò myhang lò rá nghut lhê.

Byù Sik Đông Asak Duì Râ Hkyô

¹⁷ Hau mù luí, hau Yhumsing é ahko ahkáng mai ngò nungmoq lé tai nau é hkyô gi, hau túngbaú pé gi, akýú a bo é lé myit mù, asak duì kô é su, nungmoq gi, hkâkut kó. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyí kô é nghut mù, hai le a sé kô é yanmai, Garai Gasang byí é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit đông a sansêng é hkyô jung hkangmó lé je wó kut xoq nyí shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé hau đông mhoq yú kô é a nghut. ²¹ Nungmoq gi, Yesuq chyáng má é tengmán hkyô đông, Yhâng é hkyô lé wó gyô wú é eq mhoq yu wú bekô nghut lhê. ²² Hau mù, nungmoq gi, hí hpyang lhê é nungmoq é nyí yap sâmlai nghut é, ô nau gadaú luí, yhumsing gùng yhumsing mhaú pyám é đông htên byoq ló nyí é nungmoq é byù xau lé tò pyám rá matú mhoq yú bê eq rajung za, ²³ nungmoq é i-myt lé asik htaí pyám nhâng keq; ²⁴ hau htoq agó, nungmoq gi, tengmán é eq sêng é dínngmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Hau mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkangmó gi, mhaú é hkyô lé tò pyám luí, yhumsing é chyangnâm má é sù lé, tengmán é dang tai rá ra

^{*} 4:8 Hkya-on 68:18

nghut lhê. ²⁶ "Nungmoq nhikjum yô é hkûn, mara hkâkut kó." * nungmoq gi, bui wàng shoq nhikjum hkâyô nyi kó. ²⁷ Nat Tsadán lé le, jowô hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nggut lhê.

²⁹ Nungmoq é nhut mai agê agau é dang hai le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, hau bang kô lam lò râ dang za tai keq. ³⁰ Hau hkyi yû râ buinyi é matú, dizik đông nungmoq lé tap to byi é Garai Gasâng é Chyoiyúng Woi-nyí lé hkâlhoq yón kó. ³¹ Hau myit tot é, nhikjum yô é, nhik-yô é, byoq lhum byoq cheq é eq lumù gansang é, agê agau é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tún shit lhum luí, Garai Gasang gi, Hkrisduq má, nungmoq lé mara hkyut byi é su, nungmoq yhangchang le mara hkyut byi lhum nyi keq.

5

¹ Hau mù, nungmoq gi, chyitdap dik é zoshâng wui nggut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga đông, nga-nhúng é matú Garai Gasâng chyáng Yhânggùng yhang ap byi pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³ Hau htoq agó, ashop é đông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq tai lhang hkâtai kó; hkâsu mù gà le, nungmoq gi, Garai Gasâng é chyoiyúng byu pé nggut lhê. ⁴ Hau eq rajung za, a tai ging é, ahoq ahí dang, dangsôm eq hkunchoq đông gyà é dang pé lé a tai é za, jeju hkya-on dang za tai nyi keq. ⁵ Hkâsu mù gà le, ashop é đông gungsho zùm yap é hkyô kut shut sù, a sansêng é sù eq hparà noq é sù nggut é myoqnoq sù ó yuq nggut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq. ⁶ Ó yuq nggut kôle, dangsôm * đông mai nungmoq lé a wó mhaú kó sháng gaq; hkâsu mù gà le, hau hkyô pé é yanmai, Garai Gasâng é nhikmo-yo hkyô gi, hau jino a gyo bâng é ahtoq má jé râ nggut lhê. ⁷ Hau mù luí, hau bâng chyáng hkâbo wang lôm kó.

⁸ Hkâsu mù gà le, nungmoq gi, hí hpyang mauchut tuq dut é bang nggut lhê; nggut kôlhang, ahkuí gi, hau Yhumsing má maubó pé nggut beko nggut ri. ⁹ Hau Yhumsing ô nau é hkyô hai nggut é lé ho htoq yú mù, maubó é yhangzô pé đông asak dui keq. ¹⁰ Hkâsu mù gà le, hau maubó é ashí gi, ge é hkyô banshoq, dingmán é hkyô eq tengmán hkyô chyat nggut ri. ¹¹ Hau ashí a zuí é mauchut tuq muzó má a bo wang lom é za, yhangmoq é mara lé tún shit keq. ¹² Hkâsu mù gà le, hau jino a gyo bang haq zau kut é hkyô lé gi, tai htoq le lhang hoq hpo nggut ri. ¹³ Nggut kôlhang, junghkang jungmó lé, hau maubó èq tún shit jáng gi, wó byu-myang é chyat dut râ nggut lhê. ¹⁴ Hkâsu mù gà le, junghkang jungmó lé byu-myàng nhang é gi, maubó nggut ri. Hau é yanmai,

"Yhup ngón nyí sù ê, toq aq, hau shi é mai dui toq aq hkoí; hau jáng, Hkrisduq gi, nang lé duqbó byi râ nggut lhê." †
ga luí tai tô é nggut lhê.

* 4:26 Hkya-on 4:4 * 5:6 Dang sôm gà é gi, Garai Gasâng é nhikmo-yo hkyô a jé râ ga tai é dang nggut lhê. † 5:14 Dang ngho shí gi, hí lhê é noqkuq hpung pé tai gyô lo é dang nggut lhê.

¹⁵ Haù mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶ Buinyi ahkying shí pé gi, agè ashop é yanmai, wó é ahko ahkáng banshoq lé ge dik é dông chung jai keq. ¹⁷ Hau é yanmai, byù ngok pé a dut é za, haù Yhumsing ô nau é hkyô gi, haí nghut é lé, sê gyô yu nyi keq. ¹⁸ Haù achaq achyt é yubak hkyô lhoq htoq é í lé hkâshuq wut kó; Woi-nyí lé kúm bying nhang nyi keq. ¹⁹ Nungmoq gi, hkyá-on kungtôn dang dông le, hkyá-on mahkôn dang dông le, woi-nyí eq sêng é mahkôn dông le, rayuq eq rayuq dang nyo lhum luí, nungmoq é i-myt unghkaú mai, haù Yhumsing lé mahkôn hkôn mù, lhoq ngón nyi keq. ²⁰ Nga-nhùng é Yhumsing Yesuq Hkrisduq é mying lé lang luí, jung hkangmó é matú, haù Íwa Garai Gasang lé, hkâ-nhám le jeju hkya-ôn nyi keq.

²¹ Hkrisduq lé hkungga hpautap é myit èq, rayuq eq rayuq hpautap lhùm nyi keq.

Myi Eq Làng

²² Ikun myhí pé ê, haù Yhumsing uphkanq é dông châng é su, nungmoq é ikun hpô pé uphkanq é dông châng nyi keq. ²³ Hkâsu mù gà le, Hkrisduq gi, haù noqkuq hpúng é ulhum nghut é su, haù ikun hpô gi, ikun myhí é ulhum nghut nyi ri; Hkrisduq gi, haù Yhâng gungdu nghut é noqkuq hpúng lé hkyi yù Sù nghut ri. ²⁴ Haù noqkuq hpúng gi, Hkrisduq uphkanq é dông châng é su, ikun myhí pé le, hkyô hkat hkangmó má, yhangmoq é ikun hpô pé uphkanq é dông châng nyi rá lhê.

²⁵ Ikun hpô pé ê, Hkrisduq gi, haù noqkuq hpúng lé chyitdap luí, hau é matú Yhânggùng lé Yhang ap pyâm é su, nungmoq é ikun myhí pé lé chyitdap nyi keq. ²⁶ Yhang haù su kut é gi, haù noqkuq hpúng lé, mungdang dông wui má chí pyám luí, lhoq sân-yúng yù rá eq, ²⁷ haù noqkuq hpúng gi, agè agaú é eq a-ká akông é hkyô haí le a bo é za, mara hùn rá hkyô a bo é eq chyoiyúng é, hpungwup shingkanq bo é noqkuq hpúng dông, Yhânggùng lé wó ap byi rá matú nghut lhê. ²⁸ Haù eq rajung za, ikun hpô pé gi, yhangmoq é ikun myhí pé lé, yhumsing gungdu lé su chyitdap rá dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bê. ²⁹ Ó yuq le, yhumsing gùng lé a chyitdap a kut é za, Hkrisduq gi, haù noqkuq hpúng lé kut byi nyi é su, yhumsing gùng lé byi tso byi huq luí, rago wú zúng nyi é nghut lhê. ³⁰ Hkâsu mù gà le, nga-nhúng gi, Yhâng é gungdú é gungsho showui showang pé chyat nghut lhê. ³¹ Haù mù, "Hau é yanmai, yuqgè gi, ínu íwa eq gang luí, yhangmyi eq zùm-yap mù, yhangnhik í yuq gi, gungsho ralthum za dut kó rá nghut lhê." ³² Haù hkyô gi, gyai yhang zaú tô é hkyô nghut ri. Nghut kôlhang, ngò gi, haù Hkrisduq é hkyô eq noqkuq hpúng é hkyô lé taí nyi é nghut lhê. ³³ Haù mù, nungmoq yuq hkangmó gi, yhumsing gùng lé chyitdap é su, yhumsing é ikun myhí lé le chyitdap rá dut lhê; haù ikun myhí le, yhâng é ikun hpô lé hkungga rá dut lhê.

6

Zo Wui Eq Mó Wui É Hkyô

¹ Zoshâng wui ê, haù Yhumsing má, nungmoq é mó wui é jino gyo keq; hkâsu mù gà le, haù gi, kut gíng é hkyô nghut ri. ² "Náng é ínu íwa lé hkungga aq.

³ Haù jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê. ⁴ ✧ gâ é dang gi, danggidiq lom é sâng-hí lhum hkunmó nghut ri.

⁴ Ìwa pé ê, nungmoq é zo wui lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô đông yhangmoq lé baù kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lumzui é myit mai, nungmoq é myidàm htoq mâ é junsing pé é jìno gyo keq.

⁶ Nungmoq gi, yhangmoq é hí má za, myoqdong ho é đông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaù mai châng kut nyi keq. ⁷ Byù lé za dojaù é đông a nghut é za, haù Yhumsing lé dojaù nyi é đông le, shirông myit eq dojaù nyi keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkangmó lé shigyaù râ nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haù eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkung htoq má nyi é nghut lui, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htâng má, tai nau é hkyô gi, haù Yhumsing eq Yhâng é hpungwup a-tsam mó má wum-o bo nyi keq. ¹¹ Haù nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haù Garai Gasâng é gyè hking banshoq lé wut to keq. ¹² Hkâsu mù gâ le, nga-nhung gi, gungsho eq sui lé htug htíng é bang a nghut é za, haù uphkang bang, ahkang ayá wó bang, mauchut tuq dut é mingkan shi é a-tsam pé eq mauhkung htoq tsáng myhâng mâ é agè ashop é byò eq sêng é wum-o pé lé, htug htíng é bang ru nghut lhê. ¹³ Haù mù lui, Garai Gasâng é gyè hking banshoq lé wut to keq; haù hkún sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkangmó lé ban kut jáng, wó yap gíng tít nyi kó râ nghut lhê.

¹⁴ Haù mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò lui, ¹⁵ nungmoq é hkyi má gi, haù simsaq hkyô byi é gabú danglù hkô râ rì rì kut to mù, gíng gíng yap nyi keq. ¹⁶ Hau htoq agó, haù agè ashop su é myidug é myoshi lunglhang lé wó sat ung pyám râ matú, lumjít hkyô nghu é golong lé chung to keq. ¹⁷ Hkyi yù hkyô shamtoq muq lé tsung to lui, Garai Gasâng é mungdang nghut é, haù Woi-nyi é shâm lé wun chùng keq. ¹⁸ Ahkyíng hkangmó má, kyùdung dang eq dúng tóngbán é dang ajung júng eq, haù Woi-nyi má kyùdung nyi lui, machya nyi uchyang, sângyung bang banshoq é matú, hkâ-nhâm le, xoq xoq kyùdung byi nyi keq.

¹⁹ Haù gabú danglù é yanmai, shamtoq-tui hut hui é lagyo rayuq ngò nghut nyi kôlhang, haù gabú danglù nghut é zaù tô é hkyô lé, a gyuq a wàm wó tai kyo lui, ²⁰ ngò tai râ dut é lé, a gyuq a wàm wó tai sân kyo shoq, ngá nhut hpóng hkangmó, ngò tai râ mungdang pé lé byi sháng gaq, ngá é matú le, kyù bo dung byi nyi keq.

Shi-kyám Dang

²¹ Haû Yhumsîng má, chyitdap é gumang eq lhumzûi é dui-nhâng zoshâng nghut sù, Tuhkiku gi, nungmoq lé jung hkanmó tai kyo râ nghut lui, ngò hkâsu nghut nyi é hkyô eq hai kut nyi é hkyô lé, nungmoq wó sé kó râ nghut lhê. ²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù lui, yhang lé, ngò, nungmoq chyáng nhang kat é nghut lhê.

²³ Iwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chyitdap myit eq nguîngón hkyô gi, haû gumang wui chyáng ru joq nyi sháng gaq ô! ²⁴ A dat htûm é chyitdap myit mai, nga-nhûng é Yhumsîng Yesuq Hkrisduq lé chyitdap é lunglhâng bang chyáng, Garaî jeju gi, ru joq nyi sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

² Nga-nhông é Íwa Garai Gasang eq Yhumsing Yesuq Hkrisduq chyáng má é jeju eq nuingón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkangmó, hkâ-nhám le nungmoq banshoq bâng é matú gabú myit eq dung byí nyi lhê. ⁵ Hkâsu mù gâ le, nungmoq gi, sân-hí nyí mai ahkuí jé shoq, gabú danglù má ngò eq chòm zùm yap nyi é yanmai nghut lhê. ⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé tai húng luí, lhoq gíng é u lé le, nungmoq gi, ngò eq rahá Garai Gasang jeju chòm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyô é matú, Yesuq Hkrisduq é yanmai lo é dingmán hkyô é ashi wó byíng nyí sháng gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wui ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò râ matú dut lò bê nghut ri. ¹³ Hau é yanmai, haû hkohkâm-wâng zúng é lhunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haû Yhumsing Yesuq má gumang wui nghut é myo mi-myo gi, myit wum wó yú kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng râ matú ngò lé hkyin é hkyô lé, yhangmoq sé kômù, chyitdap myit eq hko kyô é bang nghut akô. ¹⁷ Haû góbang chyaú gi, sanséng é i-myt eq a nghut é za, ngò kyum wut é hkyô má wuihke jamjau jat byi râ matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko

taí nyi bum akô nghut ri. ¹⁸ Nghut kôlhang, haû gi, haí râ ri lúhú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. ¹⁹ Hkâsu mù gâ le, nungmoq kyúdung byí é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut râ nghut é lé ngò sê lhê. ²⁰ Ngò myit láng tô é eq myit myoqbyù tô é má, ngò gi, hoq nó hai a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yú mù luí, Hkrisduq gi, ngá gúng má hkya-on waq toq é hui râ nghut lhê. ²¹ Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²² Nghut kôlhang, ngò gi, gungsho má rú dui nyi mù, ngò kut é muzó má aghi zú lo é nghut le gi, hká lhum lé sheq hkyin yu le gè râ lúhú? ²³ Ngò gi, hkyô í hkat gyoro má hká hpyang le a hkap dut tò ri; shí ló luí Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri. ²⁴ Nghut kôlhang, ngò gungsho má dui nyi le gi, nungmoq é matú akyú je bò râ nghut lhê. ²⁵ Haû mù, ngò gi, shí hkyô lé hkyak myit lum to luí, lumjín hkyô má nungmoq kô jat lo é eq gabú nyí râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. ²⁶ Haû mù luí, ngò nungmoq chyáng dum jé lé é hkún, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhúm é hkún nghut nghut, we gang lhum tô é hkún nghut nghut, nungmoq gi, woi-nyí ralhum má za yap gíng to mù, haû gabú danglù lé lumjín hkyô má, i-myit rahkat zâ eq shikut nyi kô é hkyô lé le; ²⁸ nungmoq gi, hká hkyô má nghut kôlhang, gye pè eq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmóq é matú htên byoq hui râ kumhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjín râ é jeju za a nghut, Yhang é matú wuítke jamjau hui râ jeju le, nungmoq hkam yù bekò nghut ri. ³⁰ Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byí é hkyô, Yhang é chytidap myit mai nhik ting é hkyô, Woi-nyí eq zùm yap é hkyô, nú-nhâm é myit eq shogyo nhikmyin é hkyô rajung jung lé, nungmoq wó yu é nghut le gi, ² nungmoq gi, haû i-myit huí é hkyô rahkat za, chytidap myit rajung za, myit nhikhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³ Yhumsing é wuizat é dông le, akôm gyáng pyâm é dông le, haí le a kut é za, myit lhoq nyhum nyi mù, góbang gi, nungmoq htoq má je gyaú lhê ngúh myit yu nyi keq. ⁴ Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawui za nghut é hkyô lé lú zing nyi râ matú a myit é za,

- 7 Yhânggùng lé lhoq gôm pyâm luí, dui-nhâng zôshang é gunghkyâng lé yu chùng mù, xângzo byù gùng roq lé dut bê nghut ri.
- 8 Xângzo byù rayuq đông nghut nyi é hkûn, Yhânggùng lé Yhang lhoq nyhum pyâm luí,
haù tapzìng htoq má lhang tap sat pyâm é hui shoq jìno gyô ri.
- 9 Haù mù luí, Garai Gasang gi, Yesuq é myìng lé mauhkûng htoq mã é hkyihput,
myidàm htoq mã é hkyihput eq moming mã é hkyihput hkanmó htuq pài luí,
- 10 haù Iwa Garai Gasâng é hpungwup shingkâng é matú, Yesuq Hkrisduq gi, Yhumsìng nghut lhê nghù,
nhut shô hkanmó yín yù sháng gaq ga,
- 11 myhang htâng é jowò má Yhang lé lhoq toq tô é eq, myìng lhunglhang é htoq mã gyaù é myìng haù,
Yhang lé byì to bê nghut ri.

Kyì Pé Su Duqbó Nyi Râ Hkyô

12 Haù mù luí, ngò chyitdap é luzúm wuì ê, nungmoq gi, hkâ-nhám le jìno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyaì gyuq hkunggá é myit eq je riyhang lhoq htoq nyì keq. 13 Hkâsu mù gâ le, Garai Gasang gi, Yhang ô nau é hkyô lé, kut nau râ myit eq wó kut râ hkyô lé nungmoq má lhoq htoq byì nyi é sù nghut lhê.

14 Haù kut kôlhang, tái put lhâm é đông, haù a nghut jáng, dang jet jet lhâm é đông hkâkut kó. 15 Haù jáng sheq, myit goi é, agè ashop é pyat hkaù mã, nungmoq gi, mara a bo é, sân-yúng é, shut hkyô a bo é, Garai Gasang é yhangzô pé dut kó râ nghut lhê. 16 Hau htoq agó, nungmoq gi, asak mungdang lé chung htoq uchyang, mauhkûng mã é kyì pé su, yhangmoq chyáng wó duqbó nyì kó râ nghut lhê. Haù hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyì má gumrông jowò wó berâ nghut lhê. 17 Nghut kôlhang, ngò gi, shuq jung hkungga* ralhüm su, nungmoq é lumjìng myit mai nhongjaù byì é shigu hkungga ahtoq mã hut gyün pyâm é hui le lhang, gabú luí, nungmoq banshoq bang eq rahá chôm gabú nyi lhê. 18 Haù eq rajung za, nungmoq le gabú luí, ngò eq rahá chôm gabú nyi râ dut lhê.

Timohti Eq Epahprodi Nhik Lé Nhang Kat Râ Gà É Hkyô

19 Ngò gi, nungmoq chyáng Timohti lé hân za wó nhang kat râ lé, haù Yhumsìng Yesuq má myit myoqbyu nyi lhê; haù hkûn sheq, nungmoq eq sêng é ludang lé ngò wó sê jáng, ngò myit ngón râ nghut lhê. 20 Nungmoq é hkyô lé, yhang su hkyak za ge myit chiq byì é byù gotú rayuq le ngò a wó. 21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akò nghut ri. 22 Yhang kúm gi, zo rayuq mai îwa lé htuqbâng é su, haù gabú danglù hkyô mã ngò eq rahá dojaù é yanmai, yhang lumluq é hkyô tûn shit é lé, nungmoq sê nyi lhê. 23 Haù mù luí, ngò gi, ngò mã hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. 24 Hau htoq agó, hkâ-myháng a myáng mã, ngò yhang

* 2:17 Shuq jung hkungga gâ é gi, tsibiyiq wing ragóm lé myì htoq mã hut pyâm é đông Garai lé gyuq hkunggá é hkyô lé tûn shit é nghut lhê. Bun zo shì mã shì hkâm é hkyô lé tái nau é nghut lhê.

le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

²⁵ Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taù kat byi râ lhê nghû, ngò myit hpyit to bê nghut lhê. ²⁶ Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. ²⁷ Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri. ²⁸ Haû mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byi nau ri. ²⁹ Nungmoq gi, gyai yhang gabú é myit èq, haû Yhumsîng má yhang lé lhom hkûlum yù mù, yhang su dut é bang lé hkungga keq. ³⁰ Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haû Hkrisduq é muzó é yanmai, aluq shoî shoî shî é hui zô ri.

3

Gungsho Má Lumhkaû Râ Hkyô A Joq

¹ Hau htoq agó, ngá é gumang wui ê, haû Yhumsîng má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyû dut râ matú sheq ru nghut lhê.

² Haû, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* ³ Hkâsu mù gâ le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nga-nhung gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htâng shit nyi nghû râ nyi má ahpyo-kuq hpyit bê sù; Israelaq amyû mâ é, Ben-yamyin é awut ashin nghut sù, Hebre byu mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haû noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yù râ eq, Yhang eq rahá wó nghut nyi râ matú, haû jung hkangmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê. ¹⁰ Ngò gi, Hkrisduq lé

* **3:2** Bun zo shi lum gi, ahpyo-kuq hpyit hkyô má noqzuq nyi é bang lé taí nau é nghut lhê. † **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

le, Yhang dui toq hkyô é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haù jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haù pé banshoq lé wó gù bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haù lé wó lhom yù sháng gaq nghû, châng hkat nyi lhê. ¹³ Gumang wui ê, ngò yhang ngò gi, haù lé wó hap yù bê nghû a myit; nghut kôlhang, ngò kut é muzô ralhùm gi, nunghtáng mã é lé tô-myhî pyám mù, myoq hí mã é lé wó yù shoq nghû shikut luí, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haù sù é myit bò râ lhê. Rajung jung má nungmoq myit é hkyô shai nyi kô é nghut le gi, haù lé le, Garai Gasang gi, nungmoq lé san za tún shit râ nghut lhê. ¹⁶ Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq. ¹⁸ Hkâsu mù gâ le, hí hkûn ngò, nungmoq lé anum num tai kyô wú luí, ahkuí lhang, ngau byi eq dum tai kyô é eq rajung za, Hkrisduq é tapzing lé gye kut é bang myo myo nyi bum akò nghut ri. ¹⁹ Yhangmoq é jhtùm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mینگkan zè htoq mã za nghut ri. ²⁰ Nghut kôlhang, nga-nhúng é yhummau gi, mauhkung mingdán mã nghut lhê. Nga-nhúng gi, haù mã é Yhumsing Yesuq Hkrisduq gâ é hkyi yù Sù lé, myoqbyu lánng nyi é bang nghut lhê. ²¹ Yhang gi, jung hkangmó lé, Yhang uphkan é a-ô mã wó kut tô é Yhâng é a-tâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haù mù luí, chyitdap é luzúm wui le nghut mù, ngò chyitdap bún nghâm nyi é, ngá é gabú jowò eq janmaù nghut nyi é, ngá é gumang wui ê, haù gi, Yhumsing má nungmoq hkâsu kut yap gíng nyi râ hkyô nghut lhê.

Lhoq Pun Lhoq Kyíng É Hkyô

² Ngò gi, Uodia eq Suntuki nhik lé, haù Yhumsing má rayuq eq rayuq myit huí lhùm nyi râ matú, gyai yhang pying kat lhê. ³ Ngá é mù wùn luzúm kyíng ê, ngò gi, myiwe shí nhik lé garúm yù laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk mã mying bo é, ngá é mù wùn luzúm wui góbang eq le, haù gabú danglù hkyô mã ngò eq rahá gyai shikut wú bê sù nhik nghut lhê.

⁴ Haù Yhumsing má hkâ-nhám le gabú nyi keq! Ngò dum tai lhê, gabú nyi keq! ⁵ Nungmoq nú-nhâm é hkyô, byù banshoq bang lé sé nhâng keq. Haù Yhumsing gi, chyáng bê nghut ri. ⁶ Haí eq séng luí le, myit hkâ-myo hkâchiq kó; hkyô hkangmó mã jeju hkya-on uchyang, kyúdùng é eq dúng tôngbán é dông, nungmoq dúng é hkyô pé lé, Garai Gasâng chyáng shit kyô nyi keq. ⁷ Haù

hkûn, sé gyô é nyan banshoq htoq má gyaú é, Garai Gasâng é ngingón hkyô gi, nungmoq é myit nhikhlum eq nungmoq myit é hkyô lé, Hkrisduq Yesuq má upzúng byí nyi rà nghut lhê.

⁸ Jihtûm má, gumang wui ê, tengmán é, hpautap gíng é, dingmán é, sansêng é, wó chytidap é, hkungga gíng é, haí má nghut kôlhang, aróng wó dik é hkyô rajung jung, a nghut jang, hkya-on gíng é hkyô rajung jung bo é nghut le gi, haú sù é hkyô pé lé myit nyi keq. ⁹ Nungmoq gi, ngá chyang mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, ngingón hkyô byí é Garai Gasang gi, nungmoq eq rahá nyi nyi rà nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsing má gyai yhang gabú nyi lhê; gè gè yhang, nungmoq myit chiq byí nyi kôlhang, haú lé tún shit rà ahkáng a wó kó nghut ri. ¹¹ Ngò isu nghú taí nyi é gi, ngò má rá é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi rà matú mhoq yù bê nghut lhê. ¹² Ra châ tô u lé, hkâsu kut rà ngò sê lhê; agùn agó wó u lé, hkâsu kut rà ngò sê lhê; hkyô hkangmó eq dut tô é ahkyo lhum jup má, wam gyi kôlhang, zômut kôlhang, agùn agó wó tô nyi kôlhang, ra châ to kôlhang, myit dik nyi rà hpaqchyí lé ngò wó mhoq yù bê nghut lhê. ¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuñke jamjau huí nyi é hkûn, nungmoq garúm yù kô é gi, ge é hkyô kut bekò nghut ri. ¹⁵ Hau htoq agó, Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló rà hkûn, haú byí é hkyô eq lhom yu é hkyô má, nungmoq mai lai luí, noqkuq hpúng gotú ralhúm lhang, ngo lé garúm kat é hkyô a bo é nghut lhê. ¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ é hkyô lé adám dàm hûn byi bekò nghut ri. ¹⁷ Ngò gi, chyunghuq chyungtang lé ho nyi é a nghut, nungmoq mai ashí je myo zui jat rà matú lé za sheq ho nyi é nghut lhê. ¹⁸ Ngò gi, haí le gúm shoq myang yu é htoq agó, chyân shoq lhang nghut bê. Ahkuí, haú nungmoq hun kat é chyunghuq lé, Epahprodi chyáng mai ngò lhom myang yù luí, ngò má agùn agó nghut nyi bê. Haú pé gi, namngón jung hkungga su, Garai Gasang lé gabú nhang é, hap yù gíng é hkungga ralhúm nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq rá é hkyô banshoq lé, Hkrisduq Yesuq má lhoq gúm lhoq jup byi rà nghut lhê.

²⁰ Hpungwup shingkan gi, nga-nhùng é Íwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyám kat akò nghut ri. ²² Sân-yúng bang banshoq gi, nungmoq lé shi-kyám kat akó; Kehtaq é yhúm mâ é sân-yúng bang gi, je riyhang shi-kyám kat akò nghut ri.

²³ Yhumsing Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhúng é gumang Timohti gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhúng é Íwa Garai Gasâng chyáng mâ é jeju eq nguingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byí é hkûn, nga-nhúng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Hai mù gà le, Hkrisduq Yesuq má nungmoq lumjing hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵ Lumjing myit eq chyitdap myit haù gi, nungmoq é matú mauhkung htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haù lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gù nghut lhê. ⁶ Nungmoq gi, gabú danglù haù lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haù gi, mingkan gón má ge é ashi zuí nyi é eq kô myhang nyi bê nghut ri. ⁷ Nungmoq gi, haù hkyô lé, ngamoq é chyitdap byinzum Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. ⁸ Yhang gi, haù Woi-nyí eq nungmoq lé byí tô é chyitdap hkyô lé, ngamoq lé tai kyo sù le nghut ri.

⁹ Haù nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byí nyi lhê. Garai Gasang ô nau é hkyô lé sê rá hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pying byi sháng gaq nghù, Yhâng chyáng kyûdung byí nyi lhê. ¹⁰ Haù su kut kyûdung byí é gi, haù Yhumsing ô nau é hkyô eq gingdán é dông nungmoq asak wó duí lui, hkyô hkangmó má Yhang lé wó gabú nhâng rá matú nghut lhê. Hau dông mai, nungmoq gi, ge é muzó hkangmó má ashi zuí nyi lui, Garai Gasang lé sê é hpaqchyí má kô myhang nyi kó rá nghut lhê. ¹¹ Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq king byí é huí nyi kó rá nghut lhê. Haù mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó rá nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù rá matú, nungmoq lé gingdán nhang é sù haù Íwa lé le, jeju wó hkya-on kó rá nghut lhê. ¹³ Hkásu mù gà le, Íwa haù gi, nga-nhúng lé, mauchut eq up é hkaù mai hkyi htoq yù lui, Yhang chyitdap é Yhang Zô é mingdán má shuí hâng é Sù nghut lhê. ¹⁴ Nga-nhúng gi, haù Yhang Zo dông mai, hkyi xe yu é hui mù, yubak mara hkyut pyám byí é hui bê nghut lhê.

* 1:5 Bun zo shí má bo é myit myoqbyù hkyô gi, Yesuq lé tai é nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasàng é gungghyâng isâm nghut luí, zomún đông hpan tô é lhunglhang htoq má gyaú é sù nghut ri. ¹⁶ Hkâsu mù gà le, mauhkúng eq myigùng htoq má joq é azing zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkang bang, ahkáng ayá wó bang nghut kôle, lhunglhang gi, Yhâng eq hpan to huí é chyat nghut lhê. Lhunglhang gi, Yhâng é matú, Yhâng eq hpan to huí é chyat nghut ri. ¹⁷ Yhang gi, lhunglhang é hí mã é nghut mù, lhunglhang gi, Yhâng é yanmai joq gíng bum é chyat nghut lhê. ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mã é hí dui toq é zomún dut sù nghut ri. ¹⁹ Hkâsu mù gà le, Garai Gasang gi, Yhâng é byíng jup hkyô banshoq, Yhang Zo má joq nyi rá lé myit ngui ô nau é nghut mù, ²⁰ haú tapzing má htoq byí é Yhang Zó é sui đông mai nguóngón hkyô kut byí é eq, myigùng htoq má é azing zê nghut nghut, mauhkúng mã é azing zê nghut nghut, lhunglhang lé, Yhang Zo đông mai, Yhang eq nguóngón simsaq hkyô xoq yú bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlai é yanmai, nungmoq i-myt má, Yhâng é gyê dut wú bekô nghut lhê. ²² Nghut kôlhang, ahkuí, Garai Gasang gi, nungmoq lé, rá é hkyô a bo é eq mara hún rá hkyô a bo é za, chyoiyúng é đông Yhâng é hí má shit rá matú, Hkrisduq é gungsho gungdu shí hkâm é đông, nungmoq eq nguóngón simsaq hkyô xoq yú bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtíng nyi mù, nungmoq é lumjíng hkyô má xoq nyi nyi é nghut jáng sheq dut rá nghut lhê. Gabú danglù shí gi, nungmoq wó gyô wú bê nghut é htoq agó, mauhkúng ô má hpan tô é jung hkangmó lé hko kyô nyi bê nghut lhê. Ngó, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, rá tô ashí nghut é, Yhang hpuzó é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasàng é mungdang lé, nungmoq chyáng gumjup shoq hko kyo rá matú, Garai Gasang, ngó le hún tô é wò mai, noqkuq hpúng hau é mù wùn sù dut é nghut lhê. ²⁶ Mungdang haú gi, gohkún mai apyat pyat haq to gyó lo é záu tô é hkyô nghut kôlhang, ahkuí gi, haú sâ-n-yúng bang lé hpông shit bê nghut ri. ²⁷ Garai Gasang, haú su kut é gi, záu tô é hkyô hau é agùn agó hpungwup shíngkang, túngbau pè chyáng hkâsu nghut é hkyô, yhangmoq lé sé nhâng rá matú nghut lhê. Záu tô é hkyô haú gi, hpungwup shíngkang lé myoqbyù é hkyô nghut é, nungmoq má Hkrisduq dui nyi bê hkyô lé gà é nghut lhê.

²⁸ Hkrisduq má gumjup é đông, byù yuq hkangmó lé wó shuí jé sháng gaq nghú, ngamoq gi, Hkrisduq é hkyô lé taí pyô luí, yuq hkangmó lé, hpaqchyí byéng-yá banshoq eq taí pun taí kyíng é eq mhoqshit nyi é nghut lhê. ²⁹ Ngó, haú-i yhang wó wùn waq shikut é gi, ngò má wum-o a-tsam byíng byíng mù zú nyi Sù é wum-o banshoq eq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bâng é matú le, ngò eq myoqdong hkyùm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haú su awui ahke shikut é hkyô gi, yhangmoq, myit má wum-o byí é huí râ eq chyitdap myit má rading ralhum za wó dut râ matú nghut lhê. Haú hkùn, yhangmoq gi, Garai Gasâng é záu tô é hkyô nghut é, Hkrisduq lé wó sé râ matú, sê gyô é nyan lunglhang é isut byíng shoq lé wó yù kó râ nghut lhê. ³ Haú Hkrisduq má kúm gi, hpaqchyí byéng-yá eq sumpsé hpaqchyí gâ é sutzè lunglhang lé tsíng tô ri. ⁴ Nungmoq lé ngò haú hkyô taí kyô é gi, ó yuq le, dang ngón dang ngui eq mhoq hpyoq é dông, nungmoq lé a wó mhaú zo râ matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôlhng, ngá é myit gi, nungmoq eq rahá nghut nyí luí, nungmoq shuq shuq tap tap za nghut nyí kô é eq Hkrisduq lé lumjíng é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haú mù luí, nungmoq gi, Hkrisduq Yesuq lé Yhumsíng nghù hap yù bekò nghut é eq rajung za, Yhang má asak xoq dui nyi keq. ⁷ Yhang má apùn amyit chin gíng nyi mù, kô myhang lò luí, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkya-ôn é hkyô byíng zan nyi keq.

⁸ Hkrisduq chyáng má é a nghut é za, mingkan shí má é uphkâng tarâ pé eq xângzo wui é htúngli cháng luí, mhaú zô é myit són hpaqchyí eq akyú a bo é dang dông, ó yuq eq le, nungmoq lé a wó shuí ngoq yù kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyí mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekò nghut ri. ¹¹ Yhang má, nungmoq gi, byu loq eq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq eq yubak gungsho mara lé hkyut sêng pyâm é hkyô lé hkam yù bekò nghut ri. ¹² Nungmoq gi, wui-myhup hkâm é hkùn Hkrisduq eq rahá myhup yhâm é huí bekò nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjíng kô é yanmai, Yhang eq rahá lhoq dui toq yu é huí bekò nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkùn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhúng é yubak mara lunglhang lé hkyut pyám byi luí, ¹⁴ nga-nhúng eq shai lhum mù, nga-nhúng lé htuq htíng é, tarâ pé bo é jéyáng râ jihpán lé huí sêng pyám byi bê nghut ri. Yhang gi, haú lé tapzíng htoq má dok tap pyâm é dông yu pyám byi bê nghut lhê.* ¹⁵ Haú dông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzíng eq yhangmoq lé ung pyâm é dông, byù pê é hí má yhangmoq lé de de kut to bê nghut ri.

* 2:14 Yhang gi, haú lé tapzíng htoq má dok tap pyâm é dông yu pyám byi bê nghut lhê gâ é gi, Hkrisduq tapzíng má shí hkâm byí é hkùn, nga-nhúng é yubak mara banshoq lé, Garai Gasâng eq hkyut pyám byi é lé taí nau é nghut lhê.

¹⁶ Haù mù luí, nàng haí zo haí shuq é yanmai le, noqkuq htùng eq sêng é poi buinyi, Lhoxan Lhosik poi, Bánno buinyi eq séng luí le, nungmoq lé, ó yuq èq le a wó jéyáng kó sháng gaq. ¹⁷ Haù pé gi, dut lò rà hkyô pé é wupzo chyat nghut lhê; haù gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaù é eq maumang lagyô pé lé noqkuq é lé myit ngui é sù ó yuq èq le, nungmoq lé, chyunguq eq a gingdán rà đông hkâkut nhâng kó. Haù su é yuq gi, yhumsíng byu-myang é lé† za taí shikut mù, yhumsíng é gungsho myit mai, akôm yhang nghut é lé gyáng dang taí é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lãng tsing tô é haù ullum nghut é Hkrisduq eq xoq é hkyô lé byoq lò nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shí mã é tarâ pé eq shi gang bekô nghut le nhing, haí mù, haù eq séng lhum nyi ashí kó lú? "Hkâzui, hkáchyám, hkázáng." gá é tarâ ô mã nyi nyi ashí kó lú? ²² Haù pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkùn, htên byuq rà chyat nghut lhê. ²³ Haù sù é tarâ pé gi, yhumsíng yhang noqkuq shikut é, myit lhoq nyhum mhaù é eq gungdu lé gunjáng é pé nghut luí, hpaqchyí byéng-yá bo é su dut kôhlang, gungshô é agè ashop yut yut ô nau hkyô lé wó hkùm zing pyám rà má, hai akyú a bò nghut ri.

3

Chyoiyúng É Đông Asak Dui Râ Hkyô

¹ Haù mù luí, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mã é azíng zê pé lé myit ô nau nyi keq. ² Nungmoq gi, myidàm htoq mã é azíng zê lé myit tuí é a nghut é za, ahtoq mã é azíng zê lé myit tuí nyi keq. ³ Hkâsu mù gâ le, nungmoq gi, shí bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkùn, nungmoq le, Yhang eq rahá, hpungwup shingakang hkaù má htoq shit kó rà nghut lhê.

⁵ Haù mù luí, nungmoq é mingkan hkyô eq séng é, ashop é đông gungsho zùm yap é hkyô, agot a-ù nyi zô lhum é hkyô, ye lhaí nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq. ⁶ Haù hkyô pé é yanmai, Garai Gasâng é nhikmo-yo hkyô gi, jìno a gyo bãng é ahtoq má† jé rà za nghut lhê. ⁷ Lai lò bê hkùn, nungmoq le, haù hkyô pé đông sô wú kô é nghut lhê. ⁸ Nghut kôhlang, ahkuí, nungmoq gi, nhikjum yô é, nhikmo-yô é, agè ashop é đông nò shoq kut é, lumú gansang é eq, nungmoq é nhutwuí mai hkunchoq taí é hkyô shí pé banshoq lé, yhumsíng gùng yhumsíng tô pyám rà dut lhê. ⁹ Rayuq eq rayuq hkâ-mhaù lhum kó; hkâsu mù gâ le, nungmoq gi, nungmoq é byù xau eq byù xau é nyi yap hkyô lé hkyut pyám mù, ¹⁰ byù sik lé tũ wut yú kô é nghut lhê; byù sik haù gi, sumsé hpaqchyí đông mai, yhang lé hpân Su é gungdu isâm má asik jat lò nhang é huí nyi ri. ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum

† **2:18** Byu-myang é lé gâ é gi, yhang myit htoq é shing-rán lé gâ lhê. * **3:1** Loqyo hkyam nghu é gi, ahko ahkáng wó é jowò lé gâ é nghut lhê. † **3:6** Jìno a gyo bãng é ahtoq má, gâ é dang, chyúmding ra-am má a bò nghut lhê.

ngheu é, jùn eq jùn a nghut sù ngheu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haù mù luí, Garai Gasâng èq hkyin yù huí é bang, Yhâng èq gyai yhang chyitdap é huí é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. ¹³ Nungmoq yhangchang mara kut shut é hkyô joq é nghut jâng, hkam jan byi lhum luí, rayuq eq rayuq mara hkyut byi lhum keq. Haù Yhumsing gi, nungmoq é mara hkyut pyám byi é su, nungmoq le mara hkyut byi keq. ¹⁴ Haù ge é sâmlai banshoq wó é htoq agó, gumjup é rading ralhúum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguingón hkyô wó rá matú ji yu é hui bekô nghut mù, gungdu ralhúum má é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haù mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhúm é hkún le, Garai Gasang lé nungmoq jeju bún é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkún le, haù Hkrisduq é mungdang lé, nungmoq é myit nhiklhúum má agùn agó bò nhang nyi keq. ¹⁷ Nungmoq haí wá kut kut, dang đông nghut nghut, zui saí é đông nghut nghut, banshoq lé Yhumsing Yesuq é myíng mai kut é hkún, haù Íwa nghut é Garai Gasang lé Yhang đông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhí pé ê, ikun hpô pé uphkan é ahkaù má nyi keq. Haù gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhí pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuí ê, jung hkangmó má nungmoq é mó wuí é jìno gyo keq; hkâsu mù gâ le, haù gi, Yhumsing ô nau é hkyô nghut lhê.

²¹ Íwâ pé ê, nungmoq é zo wuí lé myit hkâ-nô nhâng kó, nò nhâng jáng gi, yhangmoq, myit wum gyuí byuq kó rá nghut lhê.

²² Jùn pé ê, hkyô hkangmó má nungmoq é myidàm htoq má é jùn sîng bang uphkan é ahkaù má nyi nyi keq; yhangmoq é myoq hí má za zui saí luí, myoqdong ho é đông a nghut é za, haù Yhumsing lé gyuq hkunggâ é eq lhumzui é myit mai zui saí nyi keq. ²³ Nungmoq haí wá kut kôle, byu é matú kut é a nghut, haù Yhumsing é matú kut nyi é đông, nungmoq é myit nhiklhúum banshoq eq zui saí nyi keq. ²⁴ Haí mù gâ le, nungmoq gi, haù Yhumsing chyáng mai, muizè lé chyunghuq đông wó yú kó rá nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê. ²⁵ Kut shut sù gi, yhang kut shut é mará matú dam byi é hui zo rá nghut lhê, haí mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gíng âng é đông lajang byi nyi keq; haí mù gâ le, nungmoq le, mauhkúng htoq má Yhumsing rayuq wó é lé sé kô é yanmai nghut lhê.

Xoq Lui Pýng Kat É Hkyô

² Nungmoq gi, kyûdûng é má myit zìng zuq nyì mù, machyâ luí, jeju hkya-ôn nyì keq. ³ Ngò, shamtoq-tui hut huí nyì shoq dut é, Hkrisduq é záu tô é hkyô lé ngamoq wó tai pyô sháng gaq, Garai Gasang gi, mungdang lé ngamoq tai rá hkyô hkum hpóng byi rá matú kyû bo dung byi kó laq. ⁴ Haú Hkrisduq é záu tô é hkyô lé, ngò tai âng é dông san za wó tai pyô sháng gaq, kyû bo dung byi kó laq. ⁵ Nungmoq gi, a lumjìng bang eq zùm yap é hkùn hpaqchyí bo nyì keq; wó yu é ahkyíng hkangmó lé rago yhang chung jai keq. ⁶ Nungmoq gi, yuq hkangmó lé hkâsu tù tai rá hkyô wó sé kó shoq, dâng nyo é má, xô èq nghám nhang é su, hkâ-nhám le jeju byíng é dang bo nyì sháng gaq.

Ló Htâng É Shi-kyám Dang

⁷ Tuhkiku gi, ngá hkyô eq séng é danglù banshoq, nungmoq lé tai kyo rá nghut lhê. Yhang gi, ngá é chyitdap gumang, haú Yhumsíng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyì é hkyô lé nungmoq wó sé rá eq, nungmoq lé myit wum wó byi rá matú nghut lhê. ⁹ Yhang gi, nungmoq chyáng má é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shí má dut nyì é hkyô jung hkangmó lé tai kyo kó rá nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aú Markuq le, nungmoq lé shi-kyâm kat ri. (Markuq eq séng luí pyíng kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkùlum yù keq.) ¹¹ Yustu le gá é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik tíng byí é bang nghut akô. ¹² Nungmoq chyáng má é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglháng má hkyak lùm to mù, gumjup luí wó gingtíng nyì sháng gaq ga, Yhang gi, ayang nungmoq é matú kyûdung shikut byí nyi ri. ¹³ Nungmoq é matú le, Ladoki wá mó eq Herapoli wá mó bâng é matú le, yhang gi, gyai yhang mù zui shikut byí é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wá mó má é gumang wuì lé le, Numhpa eq yhâng yhúm má é noqkuq hpúng lé le, bo shi-kyám byi keq. ¹⁶ Laiká shí lé, nungmoq lé nghap kyô é htâng má, Ladoki byu pé é noqkuq hpúng má le nghap nhang mù, Ladoki wá bâng chyáng hùn kat é laiká lé le, nungmoq nghap wú keq.

¹⁷ "Haú Yhumsing chyáng mai nàng hap yù to bê é muzó lé rago za lhoq pán pyám aq." nghú, Arhkipò lé tai kyo keq.

¹⁸ Ngò, Poluq gi, ngá é loq èq yhang shi-kyám dang shí lé kê kat é nghut lhê. Ngò, shamtoq-tui wut tô é lé bún nyì keq. Jeju gi, nungmoq chyáng ru joq nyì sháng gaq ô.

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpúng lé dang kyô kat lhê. Garaí jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garaí Gasang lé jeju hkya-on luí, ngamoq é kyúdung dang má nungmoq lé bo dúng lhôm nyí lhê. ³ Nungmoq é lumjúng myit mai zui sai é nungmoq é muzó lé le; chyitdap myit é yanmai, nungmoq shikut é hkyô lé le; nga-nhúng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhúng é Íwa Garaí Gasang é hí má, ngamoq ru bún nyí lhê.

⁴ Garaí Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gà le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyí é hkún, nungmoq é matú hkâsu kut lai lo é hkyô lé, nungmoq sé gù nghut lhê. ⁶ Nungmoq gi, wuihke jamjau myo myo hui zo kôlháng, Chyoiyúng Woi-nyí byí é gabú myit mai, danglù haù lé lhom yù kôluí, ngamoq lé le, haù Yhumsing lé le, alik kut yu é bang dut bekô nghut ri. ⁷ Haù mù, Makedoni mau eq Ahkaia mau mà é lumjúng bang banshoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haù Yhumsing é mungdang hủ htoq ló e za a nghut, Garaí Gasang má nungmoq lumjúng hkyô gi, jowò hkangmó jam ló bê nghut luí, ngamoq gi, hai le tái nó a ra lo nghut ri. ⁹ Hkâsu mù gà le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaí Gasang shut hkâsu kut lhing lò mù, rù dui nyí é eq tengmán é Garaí Gasang lé dojaú nyí é hkyô lé le; ¹⁰ mauhkúng mà é haù Yhang Zo lé lánng nyí é hkyô lé le, yhangmoq tái kyô akô. Yhangzo haù gi, Yhang eq shi é mai lhoq dui toq yu é hui luí, jé lô rà nhikmó yo hkyô mai nga-nhúng lé hkyi yù sủ, Yesuq nghut ri.

2

Poluq, Htesaloni Wà Mó Má Garaí Mù Wùn Waq É Hkyô

¹ Gumang wui ê, nungmoq chyáng ngamoq lé kúm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkún, Hpilipi wà mó má wuihke jamjau eq rhoi é hui wú bê nghut lhê; nghut kôlháng, nga-nhúng é Garaí Gasang garúm é yanmai, gyaí lhom htuq htíng é hui kôle, Garaí Gasang é gabú danglù lé, a gyuq a kyum nungmoq lé wám tái kyô é nghut lhê. ³ Hkâsu mù gà le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myit đông eq nungmoq lé mhaù zô é đông a nghut e za, ⁴ haù gabú danglù lé chúng gíng é bang ga, Garaí Gasang chyáng

* 1:1 Sila lé gi, Salwanu le gà lhê.

mai ahkáng wó é dông za, ngamoq taí é nghut lhê. Ngamoq gi, byu pé lé gabú nhâng rá matú a nghut, ngamoq é myit lé chyam wú nyi é Garai Gasang lé, gabú nhâng rá matú shikut é ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhâm a chùng wú, nghop tô é myoqmoq myit le hkâ-nhâm a bô, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotú ó yuq mai le hkya-on rá lê ho nyi é a nghut, Hkrisduq é lăgyô pé nghut é eq rajung za, nungmoq lé wôlai hùn naù jáng wó hun lhê; nghut kôlhang, ⁷ Ìnu rayuq, yang é zoshâng zô pé lé hku baú é su, nungmoq chyáng nú-nhâm é dông nyi lai lò bê nghut lhê. ⁸ Ngamoq gi, nungmoq lé gyai yang chyitdap luí, Garai Gasâng é gabú danglù za a nghut, ngamoq é asak pé nungmoq lé byí pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wui ê, nungmoq gi, ngamoq gyai yang mù zui shikut é hkyô lé, gè gè bun kó rá nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wôlai a byi sháng gaq nghù, ngamoq gi, nyi lé, myin lé, mù zui é nghut lhê.

¹⁰ Ngamoq gi, lumjǐng bê bang nungmoq é hí má, hkâsu chyoiyúng é eq dingmán é, mara hùn rá a bo é bang dut lai lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, Ìwa rayuq mai yhumsing yangzô pé lét kut byí é su, nungmoq yuq hkangmoq lé, myit wum byí nyi é hkyô lé le, nhik taí tǐng nyi é hkyô lé le, ¹² Yang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghù, nungmoq lé wum byí nyi é hkyô lé le, nungmoq yang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkùn, byu é dang lé lhom yu é dông a nghut é za, lumjǐng é bang nungmoq má mù zui nyi é, haù Garai Gasâng é mungdang lé yang, lhom yù kô é yanmai, Garai Gasang lé xox xox jeju hkya-on nyi lhê. ¹⁴ Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haù pé gi, Yudaq byu pé zing-rí é lé hui zô é su, nungmoq le, yhumsing mau má é byu pé zing-rí é lé hui zô akô nghut ri. ¹⁵ Yudaq byu pé gi, haù Yhumsing Yesuq eq myiqhtoí pé lé sat pyâm kôluí, ngamoq lé le hkat htoq akô. Yangmoq gi, Garai Gasang a ô nau é hkyô kut é bang, byù lunglhang eq gyé dut é bang nghut akô. ¹⁶ Tungbaù pé hkyi yù hui rá matú, ngamoq hko kyô é hkyô lé, yangmoq hkùm akô; yangmoq gi, hkâ-nhâm le, yhumsing é mara lé dik shoq haù dông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yangmoq ahtoq má jé bê nghut ri.

Htesaloni Byu Pé Lé Poluq Hui Nau Nyi É Hkyô

¹⁷ Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghù, ngamoq gyai yang shikut nyi lhê. ¹⁸ Nungmoq chyáng ngamoq jé lé naù mù luí, ngò Poluq yang, adàm dàm shikut wú bê; nghut kôlhang, Tsadán gi, ngamoq lé hkùm tang pyâm ri. ¹⁹ Hkâsu mù gâ le, nga-nhùng é Yhumsing Yesuq Hkrisduq é hí má, Yang jé lé é hkùn, ngamoq é myit myoqbyù hkyô, gabú hkyô eq gumrông rá janmaù gi, haí jung wá nghut lhê gâ le, nungmoq yang nghut nyi lhê a nghut kó lúh? ²⁰ Gè gè yang, nungmoq gi, ngamoq é gumrông jowô eq gabú hkyô nghut nyi ri.

3

¹ Haù mù luí, ngamoq gi, haù lé a wó jân nyi lo jáng, Ahten myuq má ngamoq baù nyi gyó le je gè rà nghut lhê nghû, myit hpyit yù mù, ² wuìhke jamjau shí pê é yanmai, ó yuq le, myit a hten kó sháng gaq nghû, nungmoq é lumjúng hkyô má, nungmoq lé wum-o byi rà eq myit wum byi rà matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mú wùn luzúm nghut é Timohti lé, nhang kat é nghut lhê. Nga-nhúng gi, wuìhke jamjau pé hui zo rà matú, hkyin to hui é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo rà nghut lhê nghû, ngamoq, nungmoq eq rahá nghut nyi é hkùn, noq mai nungmoq lé ngamoq tai kyô nyi gù nghut bê. Nungmoq rago sê é eq rajung za, haù đông dut bê nghut ri. ⁵ Hau é yanmai, ngò a wó jân nyi lo jáng, haù gunglau sù mai nungmoq lé gunglau yù luí, ngamoq wùn waq bê muzó gi, akôm dut byuq rà lé, myit chiq mù, nungmoq é lumjúng hkyô lé wó sé rà matú, yhang lé ngò nhang kat é nghut lhê. Gunglau sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjúng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bân nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo tai kyo bê nghut ri. ⁷ Haù mù luí, gumang wui ê, ngamoq myit myo uhkýi é hkyô eq zing-ri hui é hkyô pé banshoq má, nungmoq é lumjúng hkyô é yanmai, nungmoq eq séng luí myit wum byi é hkyô lé ngamoq wó yù bê nghut lhê. ⁸ Ahkuí, ngamoq gi, haù Yhumsing má nungmoq yap gíng nyi kô é yanmai, gè gè nyi ngón bê nghut lhê. ⁹ Nga-nhúng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkásu kut jeju ùng hkya-on rà lú? ¹⁰ Ngamoq gi, nungmoq lé dum myàng rà matú eq, nungmoq é lumjúng myit má langhpyut é hkyô lé wó lhoq hkúm byi rà matú, nyi, myín, gyai yhang lhumzui luí kyúđung nyi lhê.

¹¹ Nungmoq chyáng ngamoq lé rà matú, nga-nhúng é Yhumsing Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haù Yhumsing gi, nungmoq é chyitdap myit lé, rayuq eq rayuq é ahtóq má le, yuq hkanmó é ahtóq má le, lhoq kô jat, lhoq pyíng byi sháng gaq. ¹³ Nga-nhúng é Yhumsing Yesuq gi, Yhâng é chyoiyúng bang banshoq eq rahá lé é hkùn, nga-nhúng é Íwa Garai Gasâng é hí má, nungmoq gi, mara hún jowó a joq é eq chyoiyúng é bang dut rà matú, nungmoq é myit nhiklum má, haù Yhumsing mai wum-o lhoq kíng byi nyi sháng gaq. Yhâng é chyoiyúng bang gá é gi, byù lé, a nghut jáng, maumang lagyó pé lé, tai záng lhê.

4

Garai Gasang Ô Nau É Đông Asak Dui Râ Hkyô

¹ Xoq luí tai nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhâng rà hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rà matú, Yhumsing Yesuq má nungmoq lé đung tôngbán luí, myit wum byi kat lhê. ² Hkásu mù gá le, nungmoq gi, haù

Yhumsing Yesuq é ahko ahkáng dông, ngamoq mai, nungmoq lé mhoqshit to byí é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sân-yúng é hui rá matú le, ashop é dông gungsho zùm yap é hkyô lé koi pyám rá matú le; ⁴ nungmoq yuq hkangmó gi, haú Garai Gasang lé a sê é, a lumjng bang kut é su, gungsho yut yut ô nau é hkyô a châng e za, ⁵ haú chyoiyúng é eq hkungga gíng é sù wó dut shoq, yhumsing gúng lé wó hkang é hkyô mhoq yú rá matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhúngzo rá matú le nghut lhê. Ngamoq, nungmoq lé tai kyo mù, lhoq pun lhoq kying gù nghut bê eq rajung za, haú Yhumsing gi, haú hkyô shut é banshoq lé, dam byi rá nghut lhê. ⁷ Hkásu mù gâ le, Garai Gasang gi, nga-nhúng lé a sân-yúng é bang dut rá matú wut yu é a nghut, chyoiyúng é dông asak dui nyi rá matú sheq wut yu é ru nghut lhê. ⁸ Haú mù luí, mhoqshit hkyô shí lé he-ngik pyám é sù gi, byù lé he-ngik é a nghut, haú nungmoq lé, Yháng é Chyoiyúng Woi-nyi byí tô é sù, Garai Gasang lé he-ngik pyám é sheq ru nghut lhê.

⁹ Rayuq eq rayuq chyitdap lhum rá matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chyitdap lhùm é hkyô eq séng luí, ngamoq gi, nungmoq chyáng kâ kat byi a ra lo nghut ri. ¹⁰ Haú eq rajung za, nungmoq gi, Makedoni mau gón mã é gumang wui banshoq lé chyitdap nyi akô nghut ri. Nghut kôhlang, gumang wui é, haú su je myo kut rá matú nungmoq lé ngamoq wum byí lhê.

¹¹⁻¹² Nungmoq é nyi wui lhê é asak dui hkyô má, gotú byu pé eq hkunggá é wó yú luí, ó yuq lé le, lumhkaú a ra wó dut sháng gaq, hí hkún nungmoq lé ngamoq tai kyô tô é eq rajung za, num num byù zè rá hkyô lé le, yhumsing eq a séng é hkyô a kut wún rá lé le, yhumsing loq eq zui saí mù nyi rá lé le, nungmoq é myit myoqbyù jowò kut yú keq.

Haú Yhumsing Gyó Lé Rá Hkyô

¹³ Gumang wui é, myit myoqbyù hkyô a wó é byù góbang su, nungmoq, iyon ningtsang a dut kó sháng gaq, haú yhup ngón byuq é bang eq séng luí, nungmoq a sé rá lé, ngamoq a ô nau é nghut lhê. Yhup ngón byuq é bang gâ é gi, lumjng luí shí ló byuq é bang lé gâ é nghut lhê. ¹⁴ Hkásu mù gâ le, Yesuq shí luí, dum dui toq bê hkyô lé nga-nhúng lumjng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé rá nghut lhê nghú, nga-nhúng lumjng é nghut lhê. ¹⁵ Haú Yhumsing tai é dang eq rajung za, nungmoq lé ngamoq tai kyo kôlé, haú Yhumsing dum lé é hkún, asak dui nyi é eq myit gyo tô é bang nga-nhúng gi, yhup ngón byuq bê bang htoq ratsui le wó hí rá a nghut. ¹⁶ Hkásu mù gâ le, haú Yhumsing yhang gi, hté mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkung mai gyó lé ló luí, haú Hkrisduq má shí ló bê bang hí dui toq rá nghut lhê. ¹⁷ Hau htáng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haú Yhumsing eq hui rá nghut lhê. Haú hkún, nga-nhúng gi, haú Yhumsing eq ahtum abyuq nyi nyi berá nghut lhê. ¹⁸ Haú mù luí, nungmoq gi, dang shí pé mai rayuq eq rayuq myit wum byí lhùm nyi keq.

5

¹ Nghut kôhlang, gumang wui é, ahkying buinyi eq séng luí, nungmoq lé ngamoq kâ hún byi a ra lo nghut ri. ² Hkásu mù gâ le, haú Yhumsing é buinyi

gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé râ buinyi lé taí nau é nghut lhê. ³ Byu pé gi, 'Nguingón yuqyo ri.' ga taí nyi bùm kô é u lé, gùng lai é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó râ a nghut.

⁴ Nghut kôhang, gumang wui é, nungmoq gi, mauchut hkaú má nyi é bang a nghut é yanmai, buinyi haú gi, hkau sù lé é su, nungmoq é matú byodàn tung dut râ a nghut. ⁵ Nungmoq lhunglhâng bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaú eq sêng é bang a nghut. ⁶ Haú mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyi sháng. ⁷ Hkâsu mù gà le, yhup é bang gi, myín lé yhup akô; i shuq wut é bang le, myín lé shuq wut akô. ⁸ Nghut kôhang, nga-nhúng gi, nyi eq sêng lhê nghut é yanmai, gyíng gyíng kut nyi luí, lumjyng myit eq chyitdap myit lé gi, wànggò-long lé su gò to, hkyi yù hui rá lé myit myoqbyù tó é hkyô lé gi, shamtoq-muq lé su tsung to, kut sháng. ⁹ Hkâsu mù gà le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tó é a nghut e za, nga-nhúng é Yhumsing Yesuq Hkrisduq mai, hkyi yù hkyô lé nga-nhúng wó yù rá matú hkyin to bê nghut lhê. ¹⁰ Yesuq gi, nga-nhúng yhup bûn nyi kôhang, yhup ngón to kôhang, Yhang eq rahá wó nyi nyi sháng gaq ga, nga-nhúng é matú shí hkâm byi bê nghut ri. ¹¹ Haú mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhum mù, htuqluq htuqbáng kut lhùm nyi keq.

Ló Htâng Lhê É Mhoqshit Hkyô

¹² Gumang wui é, nungmoq mâ é muzó shikut luí, haú Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga rá matú le; ¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga rá matú le, nungmoq lé ngamoq sang kat lhê. Nungmoq le, rayuq eq rayuq nguingón lhùm nyi keq. ¹⁴ Gumang wui é, nungmoq lé ngamoq wum byí kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hing byí nyi keq; ¹⁵ ó yuq lé nghut kôhang, a ge é hkyo é yanmai, a ge é dông a taú kut rá lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byí lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyúdùng nyi keq; ¹⁸ hkyô hkat hkangmó má jeju hkya-ôn nyi keq, hkâsu mù gà le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haú Woi-nyi lé hkâlhoq jôm pyám kó; ²⁰ myiqhtoi htoí é lé, haí su a ngàm hkâkut kó. ²¹ Jung hkangmó lé, chyam wú luí, ge é hkyô lé zui zing nyi mù, ²² agè ashop é hkyô hkangmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhunglháng lhoq sân-yúng pyám byi sháng gaq; nga-nhúng é Yhumsing Yesuq Hkrisduq dum lé é hkûn, nungmoq é woi-nyi, myit nhikhum, gungdu gi, mara hún rá hkyô a bò sháng gaq. ²⁴ Nungmoq lé ji yu é Sù gi, lhumzui é Sù nghut lhê mù, Yhang, shí hkyô lé kut rá nghut lhê.

²⁵ Gumang wui é, ngamoq é matú kyû bo dung byi kó laq. ²⁶ Gumang wui banshoq bang lé, chyoiyúng é chyitpuq puq é dông bo shi-kyám byi kó laq.

²⁷ Gumang wui banshoq bang lé, hun kat é laiká shî nghap kyo râ matú, haû Yhumsing é mying mai, ngò, nungmoq lé pying kat lhê.

²⁸ Nga-nhûng é Yhumsing Yesuq Hkrisduq é jeju gi, nungmoq chyáng ru joq nyî sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhùng é Íwa Garai Gasang eq Yhumsing Yesuq Hkrisduq má nghut nyi bê bang, haù Htesaloni wà mó byu pê é noqkuq hpúng lé dang kyô kat lhê.

² Haù Íwa Garai Gasang eq Yhumsing Yesuq Hkrisduq chyáng mà é jeju eq nunggón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyûdung É Hkyô

³ Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rà dut ri; haù gi, gíng lhê; hkâsu mù gâ le, nungmoq é lumjng myit gi, je je kô jat lo nyi lui, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê. ⁴ Haù mù lui, ngamoq gi, nungmoq zing-ri hui é hkyô pé eq wuihke jamjau hui é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjng hkyô lé, Garai Gasang é noqkuq hpúng pê é hí má gumrong nyi lhê.

⁵ Shí hkyô banshoq gi, haù Garai Gasang dingmán é dng jéyáng é hkyô lé saksé tún shit é nghut lhê; haù mù lui, nungmoq gi, Garai Gasang é mingdán é matú wuihke jamjau hui zo bekô nghut é yanmai, mingdán haù eq gíngdán é bang gâ é hui kó rà nghut lhê; ⁶ Garai Gasang gi, tengmán Sù nghut lhê; haù mù, nungmoq lé jamjau byi é bang lé, Yhang mai jamjau byi rá eq, ⁷ jamjau hui nyi é bang nungmoq lé le, ngamoq lé le lhoq lhut byi rá nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng rà matú, ⁸ haù Yhumsing Yesuq, wum-o a-tsam bying é Yhâng é maumang lagyô pé eq rahá, myishâm eq mauhkung mai htoq shit é hkûn, dut rà nghut lhê. ⁹ Yesuq jé lé lô mù, Yhâng é chyoiyung bang má hpungwup shingkang wó yu é eq lumjng bang banshoq mai mauhong é hui é buinyi má, yhangmoq gi, htên byoq hkyô lé ahtum abyuq jéyáng é hui zo kó rà nghut lhê. ¹⁰ Hau htoq agó, haù Yhumsing é hí mai le, Yhâng é a-tsam kô làm é mai le, lhoq kang pyâm é hui kó rà nghut lhê. Ngamoq é saksé dang lé nungmoq lumjng bekô nghut é yanmai, haù lumjng bang má nungmoq le lòm bekô nghut lhê.

¹¹ Haù mù lui, nga-nhùng é Garai Gasang gi, nungmoq lé, Yhang ji yu é hkyô eq gíngdán ri ga rà le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjng myit eq sêng é muzó lhumjup lé, lhoq dik byi sháng gaq nghu le, nungmoq é matú, hkâ-nhám le, ngamoq kyûdung byi nyi lhê. ¹² Ngamoq haù su dung byi nyi é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rà matú nghut lhê.

2

A Tara É Sù

¹ Gumang wui ê, haù nga-nhùng é Yhumsing Yesuq Hkrisduq dum lé rà hkyô, Yhang eq nga-nhùng rahá zup nyi to rà hkyô eq séng lui, nungmoq lé

ngamoq pying kat nau é gi, ² haù Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng má é nghut lhê ga nungmoq chyáng jé é nghut jáng, nungmoq é myit lui za hkâdui kó, hkâgyuq dân kó. ³ Hkâsu mù gâ le, haù htên byoq é yangzô nghut é a tarâ Sù htoq shit lui, haù gumlau toq é hkyô hí a htoq htoq gi, buinyi haù jé rá a nghut, haù mù lui, nungmoq lé, ó yuq èq, hkâ đông mai mhaù kôlhang hkâjáng kó. ⁴ Haù yuq gi, Garai ga noqkuq huí é zè lhunglhang lé htuq htíng lui, haù pé banshoq é htoq má yhânggùng yhang lhoq gyaú yú rá nghut lhê; haù mù lui, Garai Gasáng é noqkuq yhùm má zung to lui, yhânggùng yhang Garai Gasang nghut lhê ga tái rá nghut lhê.

⁵ Ngò gi, nungmoq eq rahá nyi tô é hkùn, shí hkyô pé lé lhaq tai kyo kyo kut é hkyô lé, nungmoq a bun lo kó lú? ⁶ Haù yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkùm zing tô é hkyô lé, nungmoq sê lhê. ⁷ Haù a tara é hkyô é haq dâ é a-tsam gi, mù zui nyi gù nghut bê; nghut kôlhang, haù lé hkùm zing nyi sù gi, hui htot pyám huí é hkùn jé shoq, haù lé hkùm zing nyi shirâ nghut lhê. ⁸ Haù hui htot pyám huí é hkùn, a tarâ Sù htoq shit rá nghut lhê; haù Yhumsing Yesuq kúm gi, Yhâng nhut má é soq èq yhang lé sat pyám rá eq, Yhang gyó lo u lhê é hpungwup mó èq, yhang lé lhoq htên pyám rá nghut lhê. ⁹ Haù a tarâ Sù lé lo é gi, Tsadán a-tsam đông laklái kumlhá pé, kumlhá pé, mauhpo muzó pé ajung jung kut mhaù é eq, ¹⁰ htên byoq huí nyi é bang lé mhaù zo rá agè ashop é hkyô jung hkangmó lé tân shit rá nghut lhê. Yhangmoq htên byoq é gi, haù tengmán hkyô lé chyitdap lui hkyi yù hui rá nghut é hkyô lé he-ngik pyám kô é yanmai nghut ri. ¹¹ Hau é yanmai, Garai Gasang gi, haù tengmán hkyô lé a lumjíng e za agè ashop hkyô má ô nau é lhunglhang bang mara byí é hui kó sháng gaq ga, ¹² mhaù é dang lé jíng kó rá matú, a-tsam mó bo é lum shut rá hkyô lé, yhangmoq chyáng nhâng byi bê nghut ri.

Mhoqshit é hkyô má gíng nyi rá hkyô

¹³ Nghut kôlhang, haù Yhumsing chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rá dut ri. Hkâsu mù gâ le, haù Woi-nyi èq lhoq sân-yúng nyi é muzó đông le, tengmán hkyô lé lumjíng é đông le, hkyi yù hui rá matú, Garai Gasang gi, nungmoq lé, sân-hi mai hkyin yù bê nghut ri. ¹⁴ Yhang gi, nga-nhúng é Yhumsing Yesuq Hkrisduq é hpungwup shíngkang má, nungmoq wó bo lóm shoq ga, ngamoq é gabú danglù đông nungmoq lé shí hkyô má ji yù bê nghut lhê. ¹⁵ Haù mù lui, gumang wui ê, nhutdang đông nghut nghut, laiká đông nghut nghut, nungmoq lé ngamoq lhai byí é mhoqshit hkyô lé zui gíng nyi lui, gíng gíng yap nyi keq.

¹⁶ Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyu hkyô lé byí é, nga-nhúng lé chyitdap é, nga-nhúng é Íwa Garai Gasang eq nga-nhúng é Yhumsing Yesuq Hkrisduq gi, ¹⁷ nungmoq é i-myt má wum byi lui, ge é muzó eq ge é nhutdang lhumjup má, nungmoq lé wum-o lhoq kíng byi sháng gaq ô!

3

Kyú Dung Byi Rá Matú Lung Kat É Hkyô

¹ Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haù Yhumsing é mungdang gi, hân hân byo myín

lò mù, lhoq gyaú é hui sháng gaq, ngamoq é matú kyú bo dung byi kó laq. ²Yuq hkanmó gi, lumjǐng myit bo é a nghut é yanmai, haú acháq achyut agè ashop é byu pè chyáng mai ngamoq wó lut rà matú le, kyú bo dung byi kó laq. ³Nghut kôlhang, haú Yhumsǐng gi, lhumzuí é sù nghut é yanmai, Yhang nungmoq lé wum-o lhoq kǐng byi mù, haú agè ashop su chyáng mai nungmoq lé hung yù rà nghut lhê. ⁴Nungmoq gi, ngamoq pying tô é dang pé lé kut nyí mù, xoq lui le kut nyí rà nghut lhê nghú, haú Yhumsǐng má ngamoq hkyak myit lum tô lhê. ⁵Haú Yhumsǐng gi, nungmoq lé Garai Gasǎng é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mú Zui Shikut Râ É Hkyô

⁶Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghú, haú Yhumsǐng Yesuq Hkrisduq é myǐng mai nungmoq lé hkunmó hkyô kat lhê. ⁷Hkâsu mù gâ le, ngamoq kut é alik lé hká dông chǎng rà dut é gi, nungmoq yhang sê lhê. Ngamoq gi, nungmoq eq rahá nyi tô é hkún, lagôn é hkyô a bo wú é htoq agó, ⁸ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wòlai a byi sháng gaq nghú, ngamoq gi, muzó shikut hkyô eq wuihke hkyô má, nyí lé, myín lé, zui saí é nghut lhê. ⁹Ngamoq gi, nungmoq lé garúm nhǎng rà ahkáng a wó é a nghut, yhumsǐng gùng lé nungmoq chǎng rà matú alik dut sháng gaq nghú sheq, haú su kut é ru nghut lhê. ¹⁰Hkâsu mù gâ le, ngamoq, nungmoq eq rahá nyi é hkún, "Mú a kǎm zui sǐ gi, a zo sháng gaq." nghú, nungmoq lé ngamoq mai sang to bê nghut lhê.

¹¹Hkâsu mù gâ le, nungmoq chyáng má é byù ra-am lagon lui, haí mù le a zui e za, mù chǎng lhoq gyô byí wún akô gâ é hkyô lé, ngamoq wó gyô é yanmai nghut lhê. ¹²Ngamoq gi, haú su kut é bang lé, zim za nyi mù zui saí lui, yhumsǐng é zoshuq ho nyi kó sháng gaq nghú, haú Yhumsǐng Yesuq Hkrisduq é myǐng lé lang lui, hkunmó hkyô kat mù, wum byí kat lhê. ¹³Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴Byù rayuq yuq gi, laiká shí má ngamoq mhoqshit é hkyô lé, a chǎng é nghut jǎng, haú yuq lé rago chôm matsǐng yù mù, yhang hoq bun sháng gaq, yhang eq hkâzǔm yap kó. ¹⁵Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyǐng nyi keq.

Ló Htǎng Lhê É Shi-kyám Dang

¹⁶Haú nguǐngón hkyo é Yhumsǐng yhang gi, ahkyǐng hkanmó eq hkyô hkat hkanmó má, nungmoq lé nguǐngón hkyô byí nyi sháng gaq. Haú Yhumsǐng gi, nungmoq banshoq bang eq ru nyi nyi sháng gaq.

¹⁷Ngò, Poluq gi, ngá é loq mai yhang shi-kyám dang shí lé kâ kat lhê; shí gi, ngò kâ é laiká banshoq má kumlhá nghut lhê. Ngò kâ é gi, shí dông chyat nghut lhê.

¹⁸Nga-nhùng é Yhumsǐng Yesuq Hkrisduq é jeju gi, nungmoq banshoq bǎng chyáng ru joq nyí sháng gaq ô!

TIMOHTI Chyáng Hî Dàm Hun Kat é Laiká (1 Timothy)

¹ Nga-nhùng é hkyi yù Sù Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjǐng hkyô má ngá zo sǐng nghut sù, Timohti lé dang kyô kat lhê; haù Íwa Garai Gasang eq nga-nhùng é Yhumsǐng Hkrisduq Yesuq chyáng mâ é, jeju eq shogyo nhikmyin hkyô, ngingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkùn, pying to hkô é eq rajung za, Ehpesu myuq má nyi to shi aq; haù hkùn sheq, náng gi, shut shai é mhoqshit hkyô lé mhoqshit é bang a mhoq xoq lo rà matú le, ⁴ myit htoq mhô-myi dang eq a dat htùm é byù xik labaù má yhangmoq a ap nóng rà matú le, haù bang lé hkunmó wó hkyô rà nghut lhê. Haù hkyô pé gi, lumjǐng myit mai kut htoq é Garai Gasang é muzó lé lhoq htoq rà malaí, mabyoq jishùm za sheq lhoq htoq nyi é nghut lhê. ⁵ Haù hkunmó hkyô luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansǐng é i-myi, mara a bò bún é myit eq lumjǐng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluí, dangsóm taí é hkyô shut lhing ló byuq bekô nghut ri. ⁷ Haù bang gi, jep é tará sará pé dut naù kôlhang, yhangmoq haí taí nyi é hkyô lé le, hkyak, haí lé mhoqshit é hkyô lé le, a sé kó nghut ri.

⁸ Rayuq yuq, jep é tará lé rago chung é nghut jáng, jep é tará gi, ge é hkyô nghut é lé, nga-nhùng sê lhê. ⁹ Haù jep é tará gi, dingmán bǎng é matú tô tô é a nghut e za, tará lu laí é bang eq gumlau toq bǎng é matú, tará a hkunggá é bang eq mara kut bǎng é matú, a chyoiyúng é bang eq lumjǐng hkyô a chǎng bǎng é matú, yhangmoq é yhǎngwa lé nghut nghut, yhǎngnu lé nghut nghut, sat pyám bǎng é matú, byù sat bǎng é matú, ¹⁰ ashop é dǒng gungsho zùm yap é bang eq yuqgè yhangchang nyi zo lhum bǎng é matú, jùn dǒng byù ung zo bang, mhaù é bang eq dakam mhaù bǎng é matú, tengmán mhoqshit hkyô eq shai lhùm é lhunglhǎng bǎng é matú sheq, jep é tará tô tô é nghut é lé, nga-nhùng sê lhê. ¹¹ Tengmán mhoqshit hkyô haù gi, hkungsó wó é Garai Gasang èq ngo lé ap byi bê nghut é, Yhǎng é hpungwup bo é gabú danglù eq rajung za nghut ri.

Poluq Chyáng Yhumsǐng É Jeju Joq Nyi É Hkyô

¹² Ngò gi, ngo lé wum-o byí é, nga-nhùng é Yhumsǐng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dǒng sôn yù luí, Yhǎng é muzó jizó má hkyin kat yu é yanmai nghut lhê. ¹³ Hí hkùn, ngò gi, Garai Gasang lé taí hpoi sù, zǐng-ri sù eq byù rhoi sù nghut wú kôlhang, a sé shi mù lumjǐng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhùng é Yhumsǐng é jeju lé le, Hkrisduq Yesuq eq sǐng é lumjǐng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù rà matú, Hkrisduq Yesuq gi, mingkan má jé lé bê gâ é dang gi, lumjǐng é mungdang nghut luí, gè gè yhang lhom yù gǐng

é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kôlhang, Hkrisduq Yesuq gi, Yhang lé lumjúng luí ahtum abyuq é asak lé wó yú rã bãng é alik dut rã matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tún shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haù mù, haù aróng eq hpungwup shinggang gi, ahtum abyuq é, a dat htên byoq é, myoq èq a byu-myang é Hkohlkâm nghut sù, rayuq zã é Garai Gasang chyáng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timohti ê, nang eq séng luí myiqhtoi dang joq wú é eq rajung za, ngò gi, nang lé haù đông mhoqshit kat lhê; haù mù, nang gi, haù pé lé chung nyí luí, ge é majan zan mù, ¹⁹ lumjúng myit eq mara a bò bũn é myit bo nyí sháng gaq. Byù ra-am gi, haù hkyô pé lé he-ngik pyám kô é nghut luí, yhangmoq é lumjúng myit gi, wui-sanghpo htên byoq ló é su htên byoq byuq bekò nghut ri. ²⁰ Haù bang má, Humenu eq Alesander le bò kômù, Garai Gasang lé taí hpoi é dang a taí rã matú mhoq yù kó sháng gaq nghù, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byí É Hkyô

¹ Haù mù luí, ngò, hí pying kat nau é gi, tarã hkunggã é eq hkungga gíng é hkyô banshoq má, nga-nhung wó nguingón yuqyo nyí sháng gaq, hkoikhâm pé eq ahkáng ayá wó bang banshoq é matú le, ² yuq hkanqmó é matú le, dũng tóngbán byi, kyũdung byi, dũng xoq byi, jeju hkya-on byi, kut aq nghù nau ri. ³ Haù gi, ge é hkyô nghut mù, nga-nhung é hkyi yù Sù Garai Gasang ô nau é hkyô nghut ri. ⁴ Yhang gi, byù lhunglhang bang hkyi yu é hui mù, tengmán é mungdang lé sê gyo rã lé, ô nau nyi ri. ⁵ Hkãsu mù gã le, Garai Gasang gi, rayuq za nghut luí, Garai Gasang eq byu é gyo má sô xoq byi sù le rayuq za nghut lhê; haù yuq gi, xangzo byu nghut é Hkrisduq Yesuq nghut ri. ⁶ Yhang gi, byù lhunglhang bãng é matú shũhtaí gunglik hkungga đông Yhânggũng lé byí pyám bê nghut ri; haù gi, ahkýing yam-yoq jé é hkũn, saksé htoq shit bê nghut lhê. ⁷ Ngò gi, tũngbaù pé lé, tengmán é lumjúng hkyô mhoqshit rã matú, hkô kyo sù rayuq eq lagyo rayuq đông hkyin tó é hui sù nghut lhê. Ngò, haù su taí é gi, mhaù taí é a nghut, têng é hkyô lé za taí nyi é ru nghut lhê.

⁸ Yuqgè wui gi, nhikjum yô é hkyô eq dang htíng htíng lhum é hkyô a bo e za, jowò hkanqmó má choyiýung é loq tù mù kyũdung rã lé, ngò ô nau ri.

⁹ Myiwe wui gi, xãm nik nik é, hĩng zè, palhé, hpaù jung mebù èq a mhôn chung e za, siri bo é mebu wut chũng mù, tap tap za, shuq shuq za kut luí, ¹⁰ Garai Gasang lé noqkuq é myiwe wui eq gíng shoq, ge é muzò èq yhumsing gũng lé mhôn nyi rã lé le, ngò ô nau ri.

¹¹ Myiwe gi, uphkanng tó é đông chãng nyi mù, zim za mhoq yù kó sháng gaq. ¹² Myiwe gi, yuqgè lé mhoqshit rã hkyô lé le, yuqgè lé uphkàng rã hkyô lé le, ngò ahkáng a byi; myiwe gi, zim za kut nyi ra rã nghut lhê. ¹³ Hkãsu mù gã le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaù é hui zo sù a nghut; haù myiwe sheq mhaù é hui zo luí, mara kut shut é ru nghut lhê. ¹⁵ Nghut kôlhang, myiwe wui gi, lumjúng myit, chyitdap myit eq choyiýung hkyô má, shuq shuq za kut mù, yhangmoq xoq chãng nyi kó é nghut jáng, zoshãng hku é đông mai hkyi yu é hui kó rã nghut lhê.✧

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumging é dang nghut nyi ri. ² Haú mù luí, hpúng-up rayuq gi, mara hún râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù, ³ ìhpê é jùn a dut é sù, byoq lhum byoq cheq a kut e za nùm é sù, mabyoq jishùm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkang luí, yhang zô pé mai hkungga myit bo é eq yhâng dang lé gyo byí é sù le, nghut râ lhê. ⁵ Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkásu kut wó wú gon râ lú? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbún lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tungbaú pé hí má ge é myíng wó é sù le dut râ lhê; haú jáng, yhang gi, tai hpoi pyâm é lé le a hui, nat Tsadán é tuihkyó má le a myí, dut râ nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, ìhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjing hkyô má é nik é mauhpo tengmán hkyô pé lé, sansêng é i-myt eq châng nyi ra râ nghut lhê. ¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hún râ hkyô haí a bò lo jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsing myí pé le, myit no nhang é dang a tai e za, dat sidiq é eq hkyô hkangmó má lumging luí, hkungga gíng é myiwe wui, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjing hkyô má, gyuq kyum é hkyô a bo é myit mó lé le, hkyak wó yu akò nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôlháng, ahkyíng du myáng pyâm le, ¹⁵ Garai Gasâng é ikun hkaú má, byu pé hká dòng nyi yap râ é hkyô lé, nàng sé sháng gaq nghú, pyíng kat é dang shi pé lé ká byí kat lhê; ikun haú gi, rú dui nyi é Garai Gasâng é noqkuq hpúng nghut luí, tengmán hkyô é hkungmó-zíng eq apùn awang nghut ri. ¹⁶ Tarâ hkungga hkyô é záu tô é hkyô gi, ko dik é nghut é lé, ó yuq le wó he-ngik pyâm é a nghut; haú gi, Yhang, byù gungsho má htoq shit mù, haú Woi-nyi mai Yhang lé saksé hkám byi luí, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjing luí, hpungwup shíngkang eq Yhang lé mauhkúng shut shui toq yú bê nghut ri.

4

Timohti Lé Mhoqshit É Hkyô

¹ Jihtùm buinyi pé má, byù ra-am gi, lumjing hkyô mai htak htoq ló luí, mhaú zô é woi-nyi pé htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haú Woi-nyi gi, san za tai ri. ² Haú sù é mhoqshit hkyô pé gi, gegùn labyoq kut é byù-mhaú pé chyáng mai lo é nghut lhê; haú

bâng é myit nhiklum gi, nyhê nhe tô é shamtoq êq nyhê man tô é su dut byuq bê nghut ri. ³ Haú bang gi, hâng lhâm é hkyô lé hkûm tang é hkyô lé le, haú lumjîng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri. ⁴ Garai Gasang hpan tô é lhunglhang gi, ge é chyat nghut ri; Garai Gasang é mungdang eq kyúđung é dang đông haú pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haí jung lé lhang he-ngik pyám râ hkyô a bò nghut ri.

⁶ Haú gumang wui lé, nang haú hkyô pé lhoq pun lhoq kyîng é nghut le gi, nang gi, haú nang cháng bê ge é mhoqshit hkyô eq lumjîng hkyô má é tengmán hkyô má, kô myhâng sù nang nghut râ htoq agó, Hkrisduq Yesuq é ge é hpungmû wùn sù le dut râ nghut lê. ⁷ Garai a bo é myit htoq mhô-myi dang eq hpô-myhí mâng pé é mhô-myi dangsôm lé koi pyám luí, tarâ hkunggâ é hkyô má yhuming gung lé lhoq kung yù aq. ⁸ Hkâsu mù gâ le, gungsho lé lhoq kung é hkyô gi, akyú shau za htoq é nghut lê; nghut kôlhang, tarâ hkunggâ é hkyô kúm gi, jung hkangmó é matú akyú bo lê nghut mù luí, shí ipyat má le, htang pyat má le, akyú bo nyi ri.

⁹ Haú gi, banshoq hap yù gîng é, lumjîng é mungdang nghut lê. ¹⁰ Haú mù luí, xângzo byù banshoq bâng é hkyi yù Sù nghut é, je riyhang, lumjîng bâng é hkyi yù Sù nghut é, rù di nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yang shikut nyi lê.

¹¹ Haú pé lé, hkunmó hkyô luí mhoqshit byí nyi aq. ¹² Náng é zorâm pyat lé, ó yuq êq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjîng hkyô má le, sansêng é hkyô má le, lumjîng bâng é matú alik kut shit nyi aq. ¹³ Náng chyáng ngó jé lé é buinyi jé shoq, nang gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Nang gi, hpung suwún wui náng é ahtoq má loq ke byí é hkún, myiqhtoi dang đông nang lé Garai Gasang byí to bê nghut é, woi-nyi hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zîng zuq luí zui saí nyi aq; nang kô myhang lo é hkyô lé, yuq hkangmó byu-myàng kó sháng gaq, nang gung banshoq haú pé má ap nóng nyi aq. ¹⁶ Náng é asak ðui hkyô má le, nang mhoqshit é hkyô má le, rago sidîq nyi aq. Haú pé má ru gîng nyi aq, hkâsu mù gâ le, nang haú su kut é nghut jáng, náng é asak lé le, náng chyáng mai gyô yu é bang lé le, nang wó hkyi yu râ nghut lê.

5

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak kô sú lé dang htân a tân e za, yhuming é iwa lé su, yang lé lhoq pun lhoq kying aq. Zorâm wui lé gi, gumang wui lé su, ² asak kô é myiwe wui lé gi, ðnù pé lé su zùm yap luí, zomyi wui lé gi, nhammó wui lé su sansêng é i-myit banshoq eq zùm yap nyi aq.

³ Gè gè yang garúm râ dut é chuimó myhí pé lé, hkunggâ nyi keq. ⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhuming é ikun lé wú gon luí, ðnu iwa eq íchyí íwhoí pé lé jeju taú é đông, yhangmoq é lumjîng hkyô lé, zui saí é má lhoq mhán nhâng râ lé hí mhoq yù ra râ nghut lê; hkâsu mù gâ le, haú gi, Garai Gasang ô nau é hkyô nghut ri. ⁵ Haú lùm râ ó yuq le a wó mù, gè gè yang râ tô

é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm rá hkyô lé dúng nyi ri. ⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. ⁷ Yhangmoq lé, ó yuq èq le mara a hún kó sháng gaq, haú hkyô pé lé le mhoqshit byí nyi aq. ⁸ Rayuq yuq, yhâng é buinùm ji-myi wui lé a baú é htoq agó, je luí yhumsing é ikun byú lé a baú é nghut le gi, haú lumjing hkyô lé he-ngik pyám bê nghut luí, a lumjing su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat rá a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wui lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuihke huí tó é bang lé garúm luí, ge é muzó jungkang jungmó má yhumsing gùng yhang ap nóng nyi ri ga, yhang kut é ge é muzó má myíng hú é sù le, nghut rá lhê.

¹¹ Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló nau kó rá nghut lhê. ¹² Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kó é yanmai, tarâ darâ é huí zo kó rá nghut lhê. ¹³ Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó rá nghut lhê. Lagôn é bang za dut kó rá a nghut, lumù gansang é bang eq yhangmoq taí a ge é pé lé tai kômù, yhumsing eq a sêng é mù má châng wang nyo wún é bang le, dut kó rá nghut lhê. ¹⁴ Haú mù luí, gyè pé mai lumù gansâng dang a wó tai pyám kó sháng gaq, asak tiq é chuimó myhí pé gi, myi ló mù, zoshâng hkú luí, yhangmoq é ikun lé gôn lajang rá matú, ngò, yhangmoq lé hpaqchyí byí kat lhê. ¹⁵ Hkâsu mù gâ le, ra-am gi, lhing taú ló kôluí, Tsadán é htâng châng nyi lugú nghut bekó nghut ri.

¹⁶ Lumjing é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yú ra rá nghut lhê; haú hkûn sheq, noqkuq hpúng gi, gè gè yhang rá tô é chuimó myhí pé lé wó garúm rá nghut lhê.

¹⁷ Haú noqkuq hpúng lé rago za shuí ú é hpúng suwún wui gi, akyú í tú hkam yú gíng lhê; haú mungdang hko é hkyô eq mhoqshit é hkyô má shikut é suwún wui gi, je riyhang hkam yú gíng lhê. ¹⁸ Hkâsu mù gâ le, "Guq nâng nyi é no lé, nhuttsung hkâ-tsùng to byi."* ga le, "Mú zui sù gi, yhâng é zuihpau wó yú gíng lhê."* ga le, Chyumdang má tai tô ri. ¹⁹ Hpúng suwún rayuq lé mara hun é hkyô lé, í yuq sum yuq má saksé hkâm e za a nghut le gi, hkâlhom yú. ²⁰ Nghut kôlhang, lhoq yun lhoq kyíng é hkyô lé góbang wó yú kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkui myit a bo e za châng nyi rá eq, myoqdong hkyín luí haí le a kut rá matú, Garai Gasang eq Hkrisduq Yesuq é hí má le, hkyin yú huí é maumang lagyô pé é hí má le, ngò, nang lé pying kat lhê.

²² Ó yuq é ahtoq má le loq ke* byi rá lé hkâhân; góbang é mara hkaú má le hkâbo lóm. Yhumsing yhang yhumsing sân-yúng shoq kut nyí aq.

* 5:18 Tarâ Pun 25:4 * 5:18 Luk 10:7 * 5:22 Haú hkun lhê bang gi, hpúng suwún kut rá matú hkyin to bê bang lé, loq ke kyúdung byí é nghut lhê.

²³ Náng é wamdau ra luí, anum num no lò lò dut é yanmai, nàng gi, wui za shuq é hkyô lé nô pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tará jéyáng é jang má hí ló jé ri; ra-âm é mara kúm gi, hau é htàng má châng byông htoq lo ri. ²⁵ Haù eq rajung za, ge é muzó pé gi, de de nghut nyí luí, haù su de de a nghut é pé lé le, wó zaù to rà a nghut.

6

¹ Jùn dut é wòlai hkaù má nyi é lhunglhang bang gi, yhangmoq é yhumsing wui lé gyai yhang hkungga gíng lhê nghû, myit yù rà dut lhê; haù hkún sheq, Garai Gasâng é mying eq nga-nhúng é mhoqshit hkyô gi, lumù gansang é a hui rà nghut lhê. ² Lumjíng é yhumsing wui é jùn gi, gumang wui nghut é yanmai, yhangmoq lé a wú myuq é za, yhangmoq dojaù luí akyù myang hkâm zô é bang gi, lumjíng bang eq chyitdap gíng é bang nghut é yanmai, yhangmoq lé je ge é đông dojaù rà lhê. Shí hkyô pé lé, nàng gi, yhangmoq lé mhoq byí nyi é eq lhoq pun lhoq kying byí nyi aq.

Ngùn Lé Chyitdap É Hkyô

³ Rayuq yuq gi, shut é lumjíng hkyô lé mhoqshit luí, nga-nhúng é Yhumsing Yesuq Hkrisduq é tengmán mhoqshit hkyô eq tará hkunggá é mhoqshit hkyô lé a myit huí é nghut jáng, ⁴ haù yuq gi, nghutbùn é sù eq haí lé le a sê gyó é sù nghut ri. Yhang gi, htuq htíng lhùm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haù mai, manon é hkyô, byoq lhum byoq cheq é hkyô, lumù gansang é hkyô, agè ashop é đông myit ngam pyám é hkyô eq, ⁵ haù tengmán hkyô lé lhoq hpyuq pyám mù, tará hkungga hkyô gi, ngùn zè wó hkyô za nghut ri ga myit yu é, i-myt lhoq htên pyám bê bâng é gyoro má, byìn a huí é hkyô pé lé, lhoq htoq kat ri.

⁶ Nghut kôlhang, tará hkunggá hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gà le, nga-nhúng gi, mingkan htoq má haí jung le a yu wang lé, haù mai le haí wó yu htoq ló rà a nghut. ⁸ Haù mù luí, nga-nhúng gi, wutbu wutmè eq zoshuq wó é nghut jáng, hau éq nhik dik nyi sháng. ⁹ Wó naù sùt nau é byu pé gi, gunglaù hkyô eq tuihkyó má le, haù byoq yeq hkyô eq htên byoq hkyô má, byu pé lé myup shí nhang é, nga é hkyô myo myo eq myit nò nhâng nau é hkyô má le, byit gyó wâng kó rà nghut lhê. ¹⁰ Hkâsu mù gà le, ngùn lé chyitdap é hkyô gi, agè ashop hkyô ajung jùng é apùn awang nghut nyi ri. Byù ra-am gi, ngùn lé ô nau luí, haù lumjíng hkyô mai sô ngoq ló mù, yhumsing gùng lé yhumsing, haù yón kuq hkyo eq htaù rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haù pé banshoq lé koi pyám luí, dingmán hkyô, tará hkungga hkyô, lumjíng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyí aq. ¹² Lumjíng hkyô eq séng é ge é majan le zân nyi aq. Hap yù lumjíng bê ga, saksé myo myó pé é hí má, ge é đông nàng yín yu é hkún, wut yu é hui luí wó é ahtum abyuq é asak lé, zú zing nyi aq. ¹³ Haù lhunglhang lé asak byí é Garai Gasâng é hí má le, Pontu Pilat chyáng saksé hkâm nyi é hkún, ge é đông yín yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhâng rà nghut é sù, nga-nhúng é Yhumsing Yesuq Hkrisduq htoq shit é buinyi jé shoq, ¹⁵ nàng gi, agot a-u é hkyô eq mara hùn rà hkyô a bo

e za, hkunmó shí lé châng nyi aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsing pê é Yhumsing, ¹⁶ Yhang za ahtum abyuq dui nyi sù, a ge chyâng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyâng ahtum abyuq ru joq nyi sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhung nguingón yuqyo nyi râ matú junghkang jungmó lé agùn agó byi é sù, Garai Gasâng chyâng za, yhangmoq myit myoqbyu nyi râ matú, hkunmó hkyó aq. ¹⁸ Ge é hkyô kut lui, ge é muzó má wó sùt nyi mù, a chum e za, gam chûng nau é myit bò râ matú, yhangmoq lé hkunmó hkyó aq. ¹⁹ Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsing to kó râ nghut lhê; haú hkûn sheq, yhangmoq gi, asak kyîng nghut é asak haú le wó zui zing to kó râ nghut lhê.

²⁰ Timohti é, nang lé ap to bê hkyô lé, zúng nyi aq. Tarâ a hkunggâ é po-ming ming bâng èq hpaqchyí nghut lhê ga myhîng shut é htuq htîng lhum lhum kut é hkyô lé, koi pyám aq. ²¹ Byù ra-am gi, haú lé hpaqchyí nghut lhê ga yín yû kôluí, haú lumjîng hkyô mai so nghoq htoq ló byuq bekô nghut ri.

Jeju gi, nungmoq chyâng ru joq nyi sháng gaq ô.

TIMOHTI

Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mã é asak byi rà gâ é danggididq eq rajung za, Garai Gasang ô nau é đông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

² Haù Íwa Garai Gasang eq nga-nhùng é Yhumsing Hkrisduq Yesuq chyáng mã é jeju eq shogyo nhikmyin hkyô, nguungón hkyô gi, ru joq nyí sháng gaq ô!

Lumluq Râ Matú Myit Wum Byí É Hkyô

³ Ngò gi, ngá é kyùdung dang mã, nyí, myín, abyit alan nang lé bûn nyi uchyang, sân-yúng é i-myt mai, ngá é íchyí íwá pé dojaú é su, ngò dojaú nyi é Garai Gasang lé, jeju hkyá-ôn nyi lhê. ⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyi mù, nang lé gyai yang myàng nau nyi ri. ⁵ Ngò gi, nang é gyíng é lumjíng myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghû, hkyak myit lum nyi lhê. ⁶ Hau é yanmai, ngò loq ke byí é đông, náng mã bo tô é Garai Gasang é chyunghuq lé, gyúng nhang nyi rà matú, nang lé ngò lhoq pûn kat lhê. ⁷ Hkâsu mù gâ le, Garai Gasang gi, gyuq sê é myit nga-nhùng lé a kat byí e za, a-tsam bo é myit, chyitdap sê é myit, yhumsing gùng lé dat hkang é myit sheq kat byí tô é ru nghut lhê.

⁸ Haù mù luí, nàng gi, nga-nhùng é Yhumsing eq séng luí saksé hkâm é hkyô mã le, Yhâng é yanmai htóng byù dut to sù ngá é hkyô mã le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuìhke jamjau chòm hui goq. ⁹ Garai Gasang gi, nga-nhùng zui sai é muzó đông a nghut e za, Yhânggùng yang myit sôn tô é hkyô eq Yhâng é jeju yanmai za, nga-nhùng lé, hkyi yù luí chyoiyúng é asak ùi hkyô mã ji yù bê nghut ri. Ahkyíng nghu é lhâng a joq shí mai yang, jeju haù gi, Hkrisduq Yesuq mã nga-nhùng lé byi to gù nghut bê. ¹⁰ Nghut kôlháng, nga-nhùng é hkyi yù Sù, Hkrisduq Yesuq pô htoq é đông, ahkuí, haù lé lhoq htoq shit bê nghut ri. Yhang gi, shí-nò hkyô lé lhoq htên pyám luí, haù gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sù, lagyo eq mhogshit sù đông, hkyin tô é hui sù nghut lhê. ¹² Hau é yanmai, ngò gi, wuìhke jamjau shí lé hui nyi é nghut lhê. Nghut kôlháng, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haù buinyi jé shoq, Yhang wó zúng rà nghut lhê nghû hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkrisduq Yesuq mã, lumjíng myit eq chyitdap myit mai alik kut yu nyi aq. ¹⁴ Nang lé ap byí to bê, haù ge é mungdang lé, nga-nhùng chyáng bo tô é Chyoiyúng Woi-nyí é wum-o mai zúng nyí aq.

¹⁵ Asia mau mã é bang yuq hkangmó gi, ngo lé pyâm to kô é hkyô lé, nàng sê lhê; haù bang mã, Hpugelu eq Heramoge nhik le bo akò nghut ri.

¹⁶ Haù Yhumsing gi, Onesihpurú é yhumbyù lé shogyo nhikmyín é hkyô tún shit sháng gaq; hkâsu mù gâ le, yang gi, ngo lé anum num myit lhoq ngón é

htoq agó, ngò wut é shamtoq-tuî é yanmai, a hoq e za, ¹⁷ yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. ¹⁸ Haù Yhumsing gi, haù buinyi má, yhang lé haù Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

2

¹ Haù mù, ngá zo ê, nàng gi, Hkrisduq Yesuq má é jeju hkaù má, wúm bo nyi aq. ² Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuîhke hkyô lé chôm jan nyi sháng. ⁴ Gyezo rayuq đông gyè mù wùn waq nyi é sù, ó yuq nghut kôle, gotú muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haù eq rajung za, shingjóng é sù rayuq le, shingjóng lhum poi wang é hkûn, tô tô é tará đông a châng e nghut le gi, ung é aróng chyunghuq lé wó yù rá a nghut. ⁶ Yo-mù zui shikut é sù gi, kyôshi lé sâng-hi myang hkam yù rá sù nghut lhê. ⁷ Haù Yhumsing gi, shí pé banshoq lé wó sê é nyan nang lé byi rá nghut é yanmai, ngò tai é hkyô pé lé myit wú aq;

⁸ Haù Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haù gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzó nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. ¹⁰ Haù mù luí, ngò gi, Hkrisduq Yesuq chyáng má é hkyi yù hkyô eq ahtum abyuq é hpungwup shingkang lé wó yù kó sháng gaq nghù, haù hkyin yù hui bâng é matú, jung hkangmó lé hkam jân nyi lhê.

¹¹ A-ô má é dang gi, lumging é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá dui rá nghut lhê.

¹² Nga-nhúng gi, hkam jân é nghut jáng, Yhang eq rahá up rá nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm rá nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzui nyi rá nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mù Zui Sù

¹⁴ Nàng gi, yhangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haù gi, akyú a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nàng gi, haù tengmán é mungdang lé jo shoq chung jai é eq, hoq nó a rá é mù zui sù rayuq đông Garai Gasâng hí má myoqdong wó shoq, wó dut é myhó shikut aq. ¹⁶ Tará a hkunggâ é po-ming ming bang lé koi pyâm aq. Hkâsu mù gâ le, haù su kut é bang gi, tará a hkunggâ é hkyô má je riyhang wang nân ló byuq é bang dut kó rá nghut lhê. ¹⁷ Yhangmoq é mhoqshit hkyô gi, mong ana su byo myín ló rá nghut lhê; haù bang má Humenu eq Hpilitu nhik le bò kôluí, ¹⁸ haù tengmán hkyô mai sô ngoq ló byuq akó. Yhangnhik gi, haù dum dui toq hkyô dut lai bê ga tai kômù, ra-âm é lumjing hkyô lé lhoq htên pyâm byí akó nghut ri. ¹⁹ Nghut kôlhang, "Haù Yhumsing gi, Yhang eq

sêng é bang lé sê lhê. "☆ ga luí le, "Haù Yhumsing é myìng lé yín yu é bang yuq hkanmó gi, agè ashop hkyô mai lhing tau ra kó rà nghut lhê." ga luí le, dizik haù htung tap tô é, Garai Gasâng é ging tìng é apùn awang gi, gíng nyi ri.

²⁰ Yhùm mó ralhum má gi, hìng auhkoq zè, ngùn auhkoq zè baù za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ram gi, aróng hkyo é matú a nghut. ²¹ Haù mù luí, haù pé mai yhumsing gùng lé lhoq sansêng pyâm é sù gi, chyoyúng luí, haù Yhumsing chung jai gíng é sù, ge é muzó hkanmó kut rà hen tô é sù nghut é yanmai, aróng hkyo é matú chungzè dut rà nghut lhê.

²² Zoram é agè ashop é ô nau hkyô lé koi pyám mù, haù sên-yúng é myit mai, Yhumsing lé wut dúng é bang eq rahá, dǐngmán hkyô, lhumzui hkyô, chyitdap hkyô, nguìngón hkyô pé lé, châng hkat nyi aq. ²³ Go é eq ngok é dǒng dang jet jet lhum é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haù hkyô lé koi pyám aq. ²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkanmó lé dat myit tê byi é, wó mhogshit é, a dat nhik-yô é su dut ra rà nghut lhê. ²⁵ Yhang gi, yhang lé htuoq htíng é bang lé, nú-nhâm é dǒng mhogshit byi ra rà nghut lhê; haù hkún, Garai Gasang gi, yhangmoq lé myit lhing hkyô byi mù, tengmán hkyô lé sê gyo nhâng luí, ²⁶ yhangmoq gi, bún gyíng lò mù, nat Tsadán ô nau é hkyô lé kut byi rà matú, chyp yú huí é, nat Tsadán é tuihkyó mai wó hpang lut lò kó abe nghú, myit lum kat lhê.

3

Jihtúm Buinyì Pé Má Dut Lò Rà Hkyô

¹ Jihtúm buinyì pé má, wuìhké é ahkyíng pé joq lò rà nghut é lé, nàng matsing to aq. ² Hkâsu mù gà le, haù u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbùn é bang, góbang lé taì hpoi é bang, ìnu ìwa nyo é lé a gyô é bang, jeju a dat bún é bang, a chyoyúng é bang, ³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuì pé, ge é hkyô lé a ngui é bang, ⁴ haq gumlaù é bang, a bun a so dut wún é bang, yhumsing gùng lé za hkik bún é bang, Garai Gasang lé chyitdap é bang dut rà malaì ngón kún hkyô lé za chyitdap é bang, dut bùm kó rà nghut lhê. ⁵ Yhangmoq gi, tará hkunggá é bang su dut kólhang, haù pé é a-tsam lé he-ngik pyâm akò nghut ri; haù sù é bang lé, nàng koi pyám nyi aq.

⁶ Yhangmoq gi, hpaqchyí da mù yhùm pé má wàng kôluí, mara wòlai lé wun é, agè ashop é ô nau hkyô ajung jung má sô nghoq lò byuq é, ⁷ hkâ-nhám le mhog yu nyi kólhang, haù tengmán hkyô lé a sê gyô é, myit nyhóm é myiwe wuì lé wó lǎng nghoq yu é bang nghut akò. ⁸ Yanne eq Yambre nhik gi, Mosheq lé htuoq htíng é su, haù bang le, haù tengmán hkyô lé htuoq htíng akò nghut ri; yhangmoq gi, myit é hkyô htên byuq kôluí, haù lumjǐng hkyô má lhum a zuí é bang nghut akò. ⁹ Nghut kólhang, haù nhik é hkyô byông htoq lo é su, yuq hkanmó é hí má, yhangmoq ngok é hkyô byông htoq lò rà nghut mù, haù mai lai luí yhangmoq wó kut jat kó rà a nghut.

Timohti Lé Pying Kat É Dang

¹⁰ Nàng kúm gi, ngá é mhogshit hkyô, ngá é nyiyap hkyô, ngò myit myoqbyu tô é hkyô, ngá é lumjǐng hkyô, myit hìng hkyô, chyitdap hkyô, hkam jan hkyô,

¹¹ zing-ri huí é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haû Yhumsîng gi, haû pé banshoq mai ngo lé xe yù bê nghut ri. ¹² Gè gè yang, agè ashop é byu pé eq mhaû kut é bang gi, mhaû zô nyi bum é eq mhaû zô é huí nyi bùm kôluí, a ge é hkyô shut je riyhang myô jat lò kô é hkùn, ¹³ Hkrisduq Yesuq má tarâ hkunggâ é asak dông nyiyap nau é bang yuq hkangmó gi, zing-ri é hui kó rá nghut lhê. ¹⁴ Nghut kôlhang, nàng gi, ô pê chyáng mai nàng mhoq yû bê hkyô lé le, Hkrisduq Yesuq lé lumjîng jáng hkyi yu é hui shoq, ¹⁵ nang lé hpaqchyí byéng-yá wó byí é chyoyúng Chyúmdang pé lé, zoshâng hkùn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyí aq. ¹⁶ Chyúmdang hkangmó gi, Garai Gasâng é soq hâng tô é pé chat nghut é yanmai, mhoqshit é hkyô, tân mhoq é hkyô, lhoq jo byí é hkyô eq dingmán hkyô lé tân shit byí é hkyô pé é matú, akyû bo ri; ¹⁷ haû mù luí, haû Garai Gasâng é byù gi, ge é muzó jizó hkangmó lé kut rá matú, wó gumjup rá nghut lhê.

4

¹ Garai Gasâng é hí má le, dui nyi bang eq shi byuq bang lé tarâ dara rá sù Hkrisduq Yesuq é hí má le, Yhang htoq shit rá hkyô eq Yhâng mingdán é yanmai, ngò, nang lé pying kat é gi, ² haû mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyí aq. ³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yangmoq ô nau yut yut é hkyô cháng luí, yangmoq é no yo bui nau é nohkyap gyô nau é hkyô tai nhâng rá matú, sará pé rajum rayô lé lhinghkyuq má lhoq tsing to kó rá nghut lhê. ⁴ Yhangmoq gi, haû tengmán hkyô mai yangmoq é nohkyap lé lhing pyám mù, myit htoq mhô-myi dang shut lhing ló kó rá nghut lhê. ⁵ Nghut kôlhang, nàng gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyí aq; nàng é hpungmù banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhùm dông hut pyâm é huí nyi gù nghut mù luí, mingkan mai ngò htoq ló rá ahkyíng jé bê nghut ri. ⁷ Ngò gi, haû ge é majan le zan bê; din shingjông lhùm é hkyô le bàn bê; haû lumjîng hkyô le chang bê nghut lhê. ⁸ Ahkuí, haû tengmán é tarâ Agyi nghut sù, Yhumsîng gi, haû buinyi má ngo lé ap byi rá nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit rá hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shí lé chytidap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yang gi, ngá é hpungmù má wó htuqbáng rá sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nàng gi, lé lo é hkùn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luí eq haû shokuq chyúmding pé lé le, yù lé lô byi aq.

¹⁴ Haù ningdup hpó Alesander gi, ngo lé a ge é myo myo kut bê nghut ri; haù Yhumsíng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

¹⁶ Sâng-hí dàm, ngá gúng lé ngò tái hung é hkûn, yuq hkgámó gi, ngá é hkyam shut a bo lom e za, ngo lé pyâm tô akô. Nghut kôlhang, haù gi, yhangmoq ahtoq má mara a dut sháng gaq. ¹⁷ Nghut kôlhang, ngò dông mai danglù haù lé rago wó hko pyo kat luí, túngbaù pé banshoq bang wó gyo kó sháng gaq ga, haù Yhumsíng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le hkyi yù hui bê nghut lhê.* ¹⁸ Haù Yhumsíng gi, ngo lé agè ashop é hkyô hkgámó mai hkyi yù luí, Yhang é mauhkúng míngdán má ngón za shuí jé râ nghut lhê. Hpungwup shíngkang gi, Yhâng chyáng ahtum abyuq ru joq nyí sháng gaq ô. Amen.

Shi-kyâm Dang

¹⁹ Priskila eq Akula nhik lé le, Onesihpuru yhumbyù wui lé le, bo shi-kyâm byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nò luí, Melitu wà mó má ngò nyhi pyâm to bê nghut lhê. ²¹ Nàng gi, wó dut é í, gyoqmyò a wàng shi lé, shí má jé lé lò aq. Ubulu gi, nàng lé shi-kyâm kat ri; haù eq rajung za, Pudén, Linu, Klodia eq gumang wui banshoq bang gi, nàng lé shi-kyâm kat akô nghut ri.

²² Haù Yhumsíng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyí sháng gaq ô.

* **4:17** Haù hkûn lé, Romaq byu pé, byù sat lé gi, hkanghkyi lé tsô pyâm lhê.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjǐng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haù ahtum abyuq é asak hkyô lé, mhaù a sé é Garai Gasang gi, ahkying ngu é lháng a joq shi mai danggidiq byi to mù, Yhang masat tô é ahkying yam-yoq má sheq mungdang hko kyô é dǒng lhoq htoq shit luí, ³ nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhúng chòm lumjǐng é hkyô dǒng mai, ngá zo sǐng nghut é Tituq lé laiká kâ kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng má é jeju eq nguingón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui sai é loqzô pé lé lhoq pán râ matú eq, wà hkangmó má hpúng suwún ayá dang to byi râ matú nghut lhê. ⁶ Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jǐno a gyô é ga, mara hùn râ jowò a joq é lumjǐng bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq dǒng nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lùm tot; ìhpé é jùn a dut; mabyoq jishúm a kut; a sansêng é ngùn hǐng lé a myit ô nau é sù nghut râ lhê. ⁸ Yhang gi, byù bíng lé dat hkulúm sù; ge é hkyô lé chyitdap sù; nùm é sù, dingmán sù; chyoiyung sù; yhumsing gùng lé wó hkang é sù; ⁹ mhoq yu to bê hkyô eq rajung za, lumgǐng é mungdang lé ging ging zui zing nyi é sù nghut râ lhê. Haù hkún sheq, yhang gi, góbang lé tengmán é mhoqshit hkyô dǒng myit wum wó byí é eq, haù eq shai lhum é bang lé, shut é hkyô wó tún shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô.

¹¹ Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é dǒng sutzê lé wó yú shoq ga luí, mhoqshit a gǐng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù má é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri. ¹³ Saksé shi gi, tǐng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haù lumjǐng hkyô má ging tǐng nyi kó sháng gaq, yhangmoq lé htân htân mhoqshit byí nyi aq. ¹⁵ Sân-yúng bâng é matú gi, azǐng zê lhungháng sân-yúng ri; a sân-yúng bang eq a lumjǐng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhikhlum eq myit sôn sê é hkyô pé gi, gè gè yhang, a sân-yúng dut byuq

bekô nghut ri. ¹⁶ Yhangmoq gi, Garai Gasang lé sê lhê ga kôlhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achag achyut é bang, jino a gyô é bang eq, ge é mù joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nàng kúm gi, tengmán é mhoqshit hkyô eq wuí é đông mhoqshit nyi râ dut lhê. ² Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkâng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

³ Haú eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; ihpé é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haú hkún, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zó pé lé, yhumsing yhanglâng eq, yhangzô pé lé chyitdap é, ⁵ yhumsing gùng lé wó hkang é, siri bo é, ikun lé dat wùn waq é, ge é myit wó tún shit é, yhumsing é yhanglâng uphkan é đông dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶ Haú eq rajung za, zorâm wuí lé le, yhumsing gùng lé wó hkang nyi kó sháng gaq, lhoq pun lhoq kyíng nyi aq. ⁷ Hkyô hkat hkangmó má, yhangmoq lé nàng yhang ge é muzó alik tún shit nyi aq. ⁸ Nàng lé lhom htuoq htúng é bang gi, nga-nhúng é hkyô má mara a wó hún kômù hoq hpù nyi kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyi aq.

⁹⁻¹⁰ Nga-nhúng é hkyi yù Sù Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wuí é i-myt ngón shoq dang a tu rá, a hkau rá; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shíngkang eq htoq shit râ hkyô lé lánng nyi é hkún, ¹² tarâ a hkunggâ é myit eq míngkan myit ô nau é hkyô koi pyám luí, shí ipyat má yhumsing gùng lé wó hkâng râ, díngrâm râ eq, tarâ hkunggâ é hkyô wó cháng shoq, ¹³ nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri. ¹⁴ Haú Yesuq Hkrisduq gi, agè ashop é hkyô banshoq má nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yù shoq ga, nga-nhúng é matú Yhânggùng lé ap byi pyám bê nghut ri.

¹⁵ Nàng lé ó yuq eq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

3

Ge É Muzo Zui Saí Râ Hkyô

¹ Nàng gi, lumjíng bang lé, zau wuí eq ahko ahkáng wó bâng é a-ô má nyi mù, jino gyô nyi râ eq, hkâ-nhám le ge é muzó hkangmó zui saí rá lé hen nyi

uchyang, ² ó yuq lé le lù a mù râ; nguóngón hkyô hô râ; myit tê byí é hkyô tân shit râ eq; byù banshoq lé nùm é i-myit tân shit nyí kó sháng gaq, lhoq pun lhoq kyíng nyí aq.

³ Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung júng eq jùn kut é hui bang, dut mù luí, agè ashop é eq manon lhùm é hkyô kut nyí mù, rayuq eq rayuq a jú lhùm é dông nyí lai lò bê nghut lhê. ⁴ Nghut kôlháng, nga-nhúng é hkyi yù Sù Garai Gasâng jeju eq chyitdap myit htoq shit é hkùn, ⁵ nga-nhúng yhang kut é dǐngmán é muzó èq a nghut é za, Yhâng é shogyo nhikmyín é jeju yanmai sheq, Garai Gasang gi, nga-nhúng lé hkyi yù bê nghut ri. ⁶ Yhang gi, nga-nhúng é hkyi yù Sù Yesuq Hkrisduq é yanmai, nga-nhúng é ahtoq má agùn agó hut hkyó byí é Chyoiyúng Woi-nyí èq nga-nhúng lé chí san chí sèng pyám byi mù, woi-nyí má dum hku é hui nhâng luí, myit sik htaí byí é hkyô dông nga-nhúng lé hkyi yù bê nghut ri. ⁷ Haú mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. ⁸ Dang shí pé gi, lumging é dang nghut lhê mù luí, Garai Gasang lé lumjing é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lungghâng bǎng é matú ge é eq, akyù bo é hkyô nghut lhê.

⁹ Nghut kôlháng, ana apâ ga luí tai htǐng lhùm é hkyó lé le; byùxik labaú gón é hkyó lé le; nyo byoq lhùm é hkyó lé le; jep é tarâ eq sèng mù byoq lhùm é hkyó pé lé le koi pyám nyi aq, hkâsu mù gâ le, haú pé gi, akyù a bo é hkyô eq chǔng a ge é hkyó pé nghut ri. ¹⁰ Gam hkuí é myit bò sù lé gi, í dǎm mhoqshit wú mù, a wó jǎng, yhang lé baú tô pyám aq. ¹¹ Haú su kut sù gi, yhang kut é muzó má mara wó to bê nghut mù, yhumsing gùng lé yhumsing mara hun é sù nghut é lé, nàng sê to lo aq.

Je Htàng Má Pying É Dang

¹² Ngò gi, Nikopoli wà má gyoqmyò lhoq lai râ dông myit hpyit tô é yanmai, Artima lé, a nghut jǎng Tuhkiku lé, nǎng chyáng nhang kat byi râ, jé eq yhang, nàng gi, shikut luí, haú wà shut ngá chyáng lé lô aq. ¹³ Nàng gi, tarâ sê é sù Zena eq Apolo nhik lé, yhangnhik é hkyowui má râ é hkyô banshoq, shikut luí garúm kat aq. ¹⁴ Nga-nhúng é byu pé gi, nyí wui râ é hkyô lé wó htúq é eq ashí zui é bang dut kó sháng gaq, ge é muzó lé myit lòm mù zui saí nyi râ hkyô lé mhoq yù râ lhê.

¹⁵ Ngò eq rahá nyi é bang yuq hkgangmó gi, nang lé shi-kyâm kat akò. Lumjing hkyô má ngamoq lé chyitdap é bang lé, bo shi-kyám byi aq.

Garai é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyí sù, ngò Poluq eq nga-nhùng é gumang Timohti nhik gi, ngá-nhik chyitdap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arkhipo lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhùng é ĩwa Garai Gasang eq Yhumsing Yesuq Hkrisduq chyáng má é, jeju eq nguóngon hkyô gi, nungmoq chyáng ru joq nyí sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé nang lumjing é hkyô lé le, sân-yúng bang banshoq lé nang chyitdap é hkyô lé le, wó gyô é yanmai, ngò kyûdung é hkún, nang lé myit bún nyí luí, hkâ-nhám le ngá é Garai Gasang lé jeju hkya-ôn nyi lhê. ⁶ Ngò gi, Hkrisduq é matú nga-nhùng chyáng bo tô é ge é mù lhumjup lé sê gyô é hkyô lé, nang wó yú sháng gaq nghù, náng é lumjing hkyô lé, nang saksé hkâm é má akyû htoq râ matú, kyûdung byí nyi lhê. ⁷ Náng é chyitdap myit gi, ngo lé gyai gabú nhang é eq wum-o wó yú nhang ri; hkâsu mù gâ le, gumang hpó ê, náng é yanmai, sân-yúng bâng é i-myt má nguóngon yuqyo é hkyô wó yú bekô nghut ri.

Onesimu É Matú Tôngbán Byí É Hkyô

⁸ Haù su mù, nang kut ging é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôlhang, chyitdap myit đông za nang lé pying kat lhê. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ ngò kyum hut huí nyi é u lé ngá zo dut lo é Onesimu é matú nang lé ngò dưng tôngbán kat lhê. ¹¹ Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htung é Onesimu lé náng chyáng dum tau nhang kat lhê. ¹³ Haù gabú danglu é yanmai, ngò htóng lúng nyi é má náng é malaí ngo lé garúm râ matú, yhang lé ngò shuí nyi to naù kôlhang, ¹⁴ ngò gi, nang myit a huí le haí le a kâm kut. Hau é yanmai, ngò, nang lé kut nhang é đông a nghut e za, nang ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum tau lò mù hkâ-nhám le nang eq rahá dum wó nyi nyi râ matú nghut lhê abe. ¹⁶ Yhang gi, htâng hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haù mù luí, nang, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yu aq. ¹⁸ Yhang, nang lé rajung jung shut pyám é nghut le le, chyin dap tô é nghut le le, haù gi, ngá chyáng dap é chyin nghú sôn yu aq. ¹⁹ Ngò, Poluq gi, chyin haù xap râ nghú luí, ngá loq eq yhang kâ kat kôlhang, nang yhang lhang, ngo lé asak chyin xap râ sù nghut é lé bún nham aq. ²⁰ Nghut bê, gumang hpó ê, nang é yanmai, haù Yhumsing má ngò gabú é

hkyô wó yu nyì sháng gaq, Hkrisduq má ngá é i-myt lé lhoq ngui lhoq ngón byî é dông, shî, ngò pying kat é dang lé gyo byi laq. ²¹ Nàng gi, ngò tai kat é htoq má je lhom kut râ nghut é lé, hkyak za sé luí, ngò kê kat é nghut lhê.

²² Hau htoq agó, ngá é matú nyì râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

HEBRE Pê Chyáng Hun Kat é Laiká (Hebrews)

Garai Yhangzo Gi, Maumang Lagyô Pê Htoq Je Gyaú É Hkyô

¹ Lai lô bê ipyat pé má, Garai Gasang gi, nga-nhùng é ichyí iwâ pé lé myiqhtoi pé dông alhùng lhing eq adông dông mai dang nyo wú bê nghut lhê. ² Nghut kôlhang, lô htâng é buinyi shí pé má, Yhang gi, Yhâng Zo dông mai nga-nhúng lé dang nyo bê nghut ri; Yhang gi, lhunglhang lé sîng sù dut râ matú haú Zo lé masat to mù, Zo dông mai, nyi mi-nyí, joq mijoq lé hpan to bê nghut ri. ³ Haú Zo gi, Garai Gasang é hpungwup shingkang duqbó é hkyô eq Yhâng é gunghkyang isâm roq nghut nyi mù, lhunglhang lé Yhâng é a-tsam bying é dang eq zui zing tô ri. Yhang gi, yubak mara lé lhoq sân-yung é hkyô lé ban kut é htâng, mauhkung htoq má Hkikhkam dik Sû Garai Gasang é loqyo hkyam má zung to bê nghut ri. ⁴ Haú mù luí, Yhang gi, maumang lagyô pé é mying htoq gyaú é mying lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gà le, Garai Gasang gi,
"Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê."*
ga le, dum,
"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."*
ga le, maumang lagyo hká yuq lé hkâ-nhám wá tai wú é nghut lhê lhu? ⁶ Dum,
Garai Gasang gi, Yhâng é zomún lé mingkan shut nhang hâng kat é hkún,
"Ngá é maumang lagyô pé banshoq gi, Yhang lé noqkuq kó sháng gaq."*
ga tai ri. ⁷ Maumang pé eq séng luí Garai Gasang tai é má,
"Yhang gi, Yhâng é maumang lagyô pé lé lai su dut nhang mù, Yhâng é dui-
nhâng zoshâng wui lé, myishâm pé su dut nhang é nghut ri."*
gâ ri. ⁸ Nghut kôlhang, haú Zo eq séng luí, Yhang gi,
"Garai Gasang ê, Náng é hkohkâm-tanghkuq gi, pyat dedu ahtum abyuq gîng
nyi mù,

Náng é dingmán hkyô gi, Náng é mingdán lé uphkan é hkyô dut râ nghut lhê.

⁹ Nàng gi, dingmán hkyô lé chyitdap bê nghut mù, agé ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri."*
ga tai ri. ¹⁰ Hau htoq agó, Yhang gi,

"Yhumsing é, Nàng gi, a-nham sâng-hi má myidàm é apûn awang lé hi tô é nghut mù,

mauhkung pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lhê; nghut kôlhang, nàng gi, ru gîng nyi râ nghut lhê; haú pé banshoq gi, mebu su xau byuq râ nghut lhê.

¹² Nàng gi, haú pé lé, bumó lé su ding yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyi rà nghut mù, Náng é zanwut pé gi, hkâ-nhâm le htûm rà a nghut."*

ga le tai ri. ¹³ Garai Gasang gi,

"Ngò, náng é gye pé lé, náng é hkyi nang tanghkuq kut pyám byi é hkying jé shoq,

Ngá é loqyo hkyam shut zung nyi shi aq."*

ga maumang lagyo hká yuq lé hkâ-nhâm wá tai wú é lúh? ¹⁴ Maumâng pé banshoq gi, hkyi yù hkyô lé hkam yù rà nghut é bang lé dojaú rà matú, nhang kat huí é mù wùn woi-nyí pé chyat za nghut akò, a nghut kó lúh?

2

Sadiq Byi É Hkyô

¹ Haù mù luí, nga-nhúng gi, châng nghoq ló byuq é a hui zo sháng gaq, haù nga-nhúng wó gyô yu to bê hkyô lé je riyhang rago châng nyi rà dut lhê. ² Hkâsu mù gâ le, maumang lagyô pê èq tai bê mungdang gi, gîng nyi mù, shut shaí lu lai é hkyô eq jino a gyô é hkyô hkangmó kut é sù gi, yhumsing eq gîng é mara dam byi é hui zo kô é nghut le gi, ³ nga-nhúng gi, haù-í yhang gyaú é hkyi yù hkyô lé hai su a ngàm kut é nghut jâng, nga-nhúng hkâsu wó hpang lut rà lúh? Hkyi yù hkyô haù gi, haù Yhumsing èq hí tai pyo htoq é nghut mù, Yhâng chyáng mai wó gyô yu é bang gi, haù hkyô têng é lé, ngamoq chyáng saksé shit bekò nghut ri. ⁴ Garai Gasang le, kumlhá pé, mauhpo muzò pé, laklai kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byi é dông mai, haù hkyô lé saksé shit bê nghut ri.

Hkyi Yù Hkyô Hpóng Byi Sù

⁵ Garai Gasang gi, maumang lagyô pé lé, ngamoq tai nyi é jé lô rà mingkan lé, uphkâng nhâng rà a nghut. ⁶ Rayuq yuq mai, rawò má saksé hkâm tô é gi, "Byù gi, hai wá nghut mù, Nàng, yhang lé bûn nyi lhê lúh?

Byu Yhangzo gi, hai wá nghut mù, Nàng, yhang lé wú gôn nyi lhê lúh?

⁷ Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkangmó lé, yhâng é hkyiwa ô má tô to bê nghut ri."*

gâ ri. Jung hkangmó lé yhâng é a-ô má tô to bê gâ é gi, Garai Gasang, hai lhang a myhit to loshoq yhang uphkâng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lhê. ⁹ Nghut kôlhang, nga-nhúng gi, maumang lagyô pê htoq ratsuí zo lhoq nyhùm huí é sù Yesuq lé myang é nghut lhê. Yhang gi, Garai Gasang jeju mai, yuq hkangmó é matú shí hkâm byi é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wui myo myo lé hpungwup shingkang wó hkam yù nhâng sháng gaq ga, jung hkangmó lé Yhang é matú chyat eq Yhang dông mai chyat joq nyi nhang é Garai Gasang gi, wuihke jamjau hui nhang é dông, yhangmoq é hkyi yù Sù lé lhoq gumjup byi rà matú htuk âng nyi ri. ¹¹ Haù byu pé lé chyoiyúng nhang é Sù eq lhoq chyoiyúng huí é bang gi, ikun ralhum za mã é bang chyat nghut lhê. Haù mù, Yesuq gi, yhangmoq lé, gumang wui nghu rà lé a hoq é nghut lhê.

12 "Ngò gi, Náng myíng lé, Ngá gumang wui chyáng taí pyô râ nghut lhê;
Ngò gi, shiwa hpông é myoq hí má, Nang lé hkya-on mahkôn hkôn râ
nghut lhê."[☆]

ga, Yhang taí ri. ¹³ Yhang gi,
"Ngò gi, Yhang lé lumhkau nyi râ nghut lhê."[☆]

ga le dum taí ri. Hau htoq agó,
"Ngò gi, Garai Gasang ngo lé byí é zoshâng wui eq shí má nyi nyi lhê."[☆]
ga, Yhang dum taí ri.

¹⁴ Haú zoshâng wui gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô dòng mai, shí-nò hkyô é a-tsam lé zuí zìng é sù nghut é nat Tsadán lé wó lhoq htên pyám râ eq, ¹⁵ yhangmoq é shí-nò hkyô lé gyuq é èq, yhangmoq é asak gón lé jùn dòng zuí zìng to huí é bang lé, wó lhoq lhut râ nghut lhê. ¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷ Haú nghut é yanmai, Yhang gi, Garai Gasang lé dojaú é má shogyo nhikmyín é eq lhumzui é hkyangjong mó wó dut râ eq, byu pé é yubak mará é matú shíhtai gunglik hkungga wó kut râ matú, hkyô hkangmó má Yhâng é gumang wui eq dù shoq kut é hui râ dut é nghut lhê. ¹⁸ Yhang gi, gunglaú huí é hkùn, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haú mù luí, mauhkùng mai wut yù huí é, chyoiyúng é gumang wui ê, lagyo eq hkyangjong mó nghù nga-nhúng yín yu é Yesuq é hkyô lé rago myít wú keq. ² Mosheq, Garai Gasâng é yhùm gón má lhumzui é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri. ³ Yhùm kut sù gi, yhùm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkásu mù gà le, yhùm hkangmó gi, rayuq yuq èq saí é chyat nghut ri. Nghut kôlhàng, Garai Gasang gi, jung hkangmó lé saí é sù nghut lhê. ⁵ Mosheq gi, Garai Gasâng é yhùm gón má dui-nhâng zoshâng rayuq dòng lhumzui mù, Garai Gasang taí râ nghut é lé saksé hkám bê nghut ri. ⁶ Nghut kôlhàng, Hkrisduq gi, lhumzui é zo rayuq dòng Garai Gasâng é yhùm lé up ri. Nga-nhúng kúm gi, nga-nhúng lé wám é myít bò nhang é hkyô eq nga-nhúng gumrong nyi é myoqbyu hkyô lé myhik zìng nyi é nghut jáng, Yhâng é yhùm nghut nyi bê.

A Lumjng Bang Lé Sidiq Byí É Hkyô

⁷ Haú mù luí, haú Chyoiyúng Woi-nyí taí é eq rajung za,
"Hkù-nyí, nungmoq gi, Yhâng é danghté lé wó gyo kô é nghut jáng, ⁸ yoso má Yhang lé chyám kô é u lé,
gumlau toq é hkùn nungmoq é íchýí íwâ pé kut kô é su, nungmoq é i-myít lé hkálhoq htan to kô.

⁹ Nungmoq é íchýí íwâ pé gi, myi xê zàn yhang Ngò kut é muzó lé myàng kôle,
yoso haú má Ngo lé chyam lik bekô nghut ri.

¹⁰ Haú nghut é yanmai, Ngò gi, ipyat haú lé nhikjum yo mù,

☆ 2:12 Hkya-on 22:22 ☆ 2:13 Esai 8:17 ☆ 2:13 Esai 8:18 * 3:2 Bun zo shí eq bun zo 5, 6 lhum má é Garai Gasâng é yhùm gà é gi, Garai Gasâng é byu pé lé gà é nghut lhê.

'Yhangmoq é myit nhiklhun gi, hkâ-nhâm le hkyô ngoq byuq akô; yhangmoq gi, ngá é hkyô pé lé a sé kômù nghut ri.' nghû tai é nghut lhê.
 11 Haú mù, 'Ngá é bánno jowò má yhangmoq hkâ-nhâm le wó wâng kó rà a nghut.' nghû, Ngò, nhikjum yô é eq dakâm dang tai bê nghut lhê."[☆]
 gà ri.

12 Gumang wui ê, nungmoq mâ é ó yuq le, haú rû dui nyi é Garai Gasâng chyáng mai, lhing taù ló byuq sê é, yubak mara byíng é, a lumjíng é i-myt a bò sháng gaq, sidiq nyi keq. 13 Nungmoq gi, ó yuq le, yubak mará é mhaú zô é hkyo èq i-myt lhoq htan pyâm é a hui kó sháng gaq, "hkû-nyí" nghû ru wó tai nyi nyi gi, nyi wui, rayuq eq rayuq myit wum byi lhum nyi keq. 14 Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri. 15 Haú gi, "Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é íchyí íwâ pé kut kó é su, nungmoq é i-myt lé hkálhoq htan to kó."[☆]

ga tai é eq rajung za nghut ri.

16 Wó gyô yù mù, gumlau toq é bang gi, ô pé nghut akô lúh? Haú bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lúh? 17 Myi xê zàn yhang Garai Gasang lé nhikjum yó nhang é bang gi, ô pé nghut akô lúh? Haú bang gi, mara kut shut mù, yoso má shi leq byuq é bang nghut bum lhê, a nghut kó lúh? 18 Jino a gyô bùm kô é nghut jáng, Yhâng é bánno jowò má yhangmoq hkâ-nhâm le wó wâng kó rà a nghut ga, Garai Gasâng èq dakam é bang gi, ô pé nghut akô lúh? 19 Haú mù, yhangmoq a lumjíng kô é yanmai, a wó wâng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buinyi Đông Nghut É Bánno Jowò

1 Haú nghut mù luí, Garai Gasâng é bánno jowò má wàng rà danggidid ru gíng nyi ashí nghut é yanmai, nungmoq mâ é ó yuq le, haú má a hkyit hkáp é a dut rà matú, nga-nhúng sidiq nyi sháng. 2 Hkâsu mù gà le, yhangmoq lé gabú danglù haú hko kyo bê su, ngamoq lé le hko kyo bê nghut lhê; nghut kôlháng, yhangmoq wó gyô é mungdang gi, yhangmoq é matú akyû a bò, hai mù gà le, haú wó gyô é bang gi, lumjíng myit mai a lhom hap yù kó é yanmai nghut ri. 3 Nga-nhúng lumjíng bê bang za, bánno jowò haú má wó wang é nghut lhê. Haú hkyô gi,

"Haú mù, 'Ngá é bánno jowò má yhangmoq hkâ-nhâm le wó wâng kó rà a nghut.' nghû, Ngò, nhikjum yô é eq dakâm dang tai bê nghut lhê."[☆]

ga Garai Gasang tai bê eq rajung za dut é nghut ri. Nghut kôlháng, Yhâng é muzó gi, mau htoq xâng hkun mai ban kut to bê nghut lhê. 4 Hkâsu mù gà le, "Garai Gasang gi, nyhit nyí nghû rà buinyi má Yhâng é muzó banshoq mai bánno bê nghut ri."[☆] gà é dang pé má, haú nyhit nyí nghû rà buinyi eq sêng é hkyô lé rawò má Yhang tai tô ri. 5 Bánno jowò joq é eq séng luí, Yhang dum tai tô é gi, "Ngá é bánno jowò má yhangmoq hkâ-nhâm le wó wâng kó rà a nghut."[☆] gà ri.

6 Bánno jowò haú má wàng rà bang ra-am nyi é danggidid joq tô ashí nghut ri; hí hkûn, gabú danglù haú wó gyô wú bê bang kúm gi, yhangmoq jino a gyo kó é yanmai, a wàng kô é nghut lhê. 7 Haú mù luí,

[☆] 3:11 Hkya-on 95:7-11 [☆] 3:15 Hkya-on 95:7-8 [☆] 4:3 Hkya-on 95:11 [☆] 4:4 Apûn 2:2 [☆] 4:5 Hkya-on 95:11

"Hkû-nyí, nungmoq, Yhâng é danghtë lé wó gyo kô é nghut jáng, nungmoq é i-myt lé hkâlhoq htân kó."[✧]

gâ é lé, ngò hí lé tái bê eq rajung za, Garai Gasang gi, gyai myáng é htâng má Dawiq dông mai tái é hkûn, "Hkû-nyí" gâ é buinyi ra-nyí dum masat to bê nghut ri. ⁸ Hkâsu mù gâ le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotù buinyi eq séng luí tái rà a nghut lo. ⁹ Haù mù luí, Garai Gasâng é byu pê é matú gi, Bánno buinyi dông nghut é bánno jowò ru joq tô ashí nghut lhê. ¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sú gi, yhumsing é muzó mai bánno rà nghut lhê. ¹¹ Haù nghut mù, yhangmoq é jìno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haù má wó wàng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haù gi, shamsó íshut dap é sham htoq má je htoq é nghut mù, myit nhiklhum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglhang gi, Garai Gasâng é hí mai wó haq pyâm é hai le a joq é nghut lhê. Jung hkangmó gi, nga-nhúng, jìhpán shit ra rà Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haù mù luí, nga-nhúng gi, Garai Gasâng é Yhangzo Yesuq nghut sù, mauhkúng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjìng hkyô lé gíng gíng myhik zing nyi sháng. ¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byi é hkyangjong mó wó é a nghut é za, nga-nhúng su hkyô hkangmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê. ¹⁶ Haù mù luí, nga-nhúng gi, shogyo nhikmyin é hkyô wó yú rà eq, nga-nhúng ra châ é u má nga-nhúng le wó garúm rà jeju lé myang hô sháng gaq, hkyak lum é myit mai Garaí jeju tanghkuq shut chyâng htep é sháng.

5

¹ Hkyangjong mó yuq hkangmó gi, byu pê chyáng mai hkyin htoq yú huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik dông, hkyin masat to huí é bang nghut akô. ² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³ Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi rà dut é nghut lhê.

⁴ Ó yuq le, yhumsing gùng yhumsing aróng haù lé wó yu é a nghut; Arun lé su, Garaí Gasâng eq wut yu é huí jáng sheq wó é nghut lhê. ⁵ Haù eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngò, hkû-nyí Náng Wa dut bê nghut lhê."[✧] ga tái é nghut lhê. ⁶ Hau htoq agó,

"Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."^{*}
ga, gó wô má le, Yhang taí to ashí nghut ri.

⁷ Yesuq gi, myidàm htoq má asak dui nyi é buinyí pé má, Yhang lé, shi é mai wó hkyi yù Su chyáng, ngaubyi ngau-nhap eq wut garú é eq, kyúndung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri. ⁸ Yhang gi, Zo rayuq nghut to kôle, Yhang hui zô é wuìhke jamjau hkyô mai jìno gyo hkyô wó mhoq yù bê nghut ri. ⁹ Yhang gi, lhoq gumjup huí é hkún, Yhang é jìno gyo bang banshoq é matú, ahtum abyuq é hkyi yù hkyo é awang dut byuq bê nghut é eq, ¹⁰ Melahkizedek wó é hkyangjong ayá hkyô dông mai hkyangjong mó dut râ matú, Garai Gasâng eq hkyin masat é hui bê sú nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuí ri. ¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang má é tengmán hkyo é awang lé, rayuq yuq eq nungmoq lé dum taù mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashí kó myhi-nhung! ¹³ Naú wing shuq râ é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. ¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yù shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

6

¹ Haù mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô dîng é hkyô shut xoq só é sháng. Nga-nhúng gi, shí-nò hkyô shut shuí jé é muzó mai myit lhîng hkyo é, Garai Gasang lé lumjîng hkyo é, ² baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apùn awang dum hî nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yu bê bang, haù Chyoiyúng Woi-nyí lé chôm hkam yù bê bang, ⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká dông lé myit lhîng dum ge wó râ a nghut lo, haù mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷ Yhâng ahtoq má wo gyùn é mau wuì lé shuq yù mù, yò mù sai bâng é matú akyù bò é hôwa nuqhpýi lhoq htoq byí é maumýi gi, Garai Gasâng é shimân jeju myang hap yu é nghut ri. ⁸ Nghut kôlhang, zu gâm eq myoq gâm yuq htoq nhang é maumýi gi, akyù a bò mù, nhîng pyâm é hui zo râ lé chiq râ ri. Haù gi, ló htáng má nyhê hkyô pyâm é hui râ nghut lhê.

⁹ Nghut kôlhang, chyitdap é gumang wuì ê, ngamoq gi, haù su nghû taí é nghut kôlhang, nungmoq é hkyi yù hkyô eq séng é je ge é jung pé, nungmoq

wó bekô râ nghû hkyak myit lum tô lê. ¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bè eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lê. ¹¹ Ngamoq gi, nungmoq é i-myit myoqbyù hkyô wó byíng Jup rá matú, nungmoq yuq hkgangmó ipyat htum shoq xoq shikut nyi kó rá lé gyai ô nau ri. ¹² Ngamoq gi, nungmoq lagon bang dut byuq rá lé a ô nau é za, Garaí danggidiq byi to bê é lé, lumjng myit eq myit hng hkyô dông mai hkam yu é bang su châng kut kó rá lé ô nau é ru nghut lê.

Garai Gasâng É Danggidiq Gíng Nyi É Hkyô

¹³ Garai Gasang gi, Abraham lé danggidiq tô é hkùn, Yhâng htoq gyaú é dakâm myíng lang rá rayuq lhang a nyi é nghut mù, Yhânggùng lé Yhang lang luí dakam é gi, ¹⁴ Ngò gi, nang lé teng yhang shimân byi mù, nang lé awut ashín myo myo byi rá nghut lê. *¹⁵ Hàu mù, Abraham gi, myit hng hng láng yu é htâng má, byi tô é danggidiq lé wó yú bê nghut ri.

¹⁶ Byu pé gi, yhangmoq htoq gyaú su é myíng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. ¹⁷ Garai Gasang gi, Yhang myit hpyit tô é hkâ-nhâm le a htaí lhik é hkyô lé, danggidiq byi tô é lé hkam yù rá bâng chyáng san za shit nau ri; haú mù luí, dakâm dang eq lhoq gíng to bê nghut ri. ¹⁸ Garai Gasang gi, mhaú a ge é yanmai, hkâ-nhâm le a htaí lhik é hkyô í hkat nghut é danggidiq eq dakâm dang joq é nghut mù, Yhang haú su kut é gi, nga-nhúng hí má to byi é myit myoqbyù hkyô lé myihk zíng rá matú gaú é jowò shut hpang wàng bê bang nga-nhúng lé wum mó byi é dut rá matú nghut lê. ¹⁹ Nga-nhúng gi, myit nhiklhúm é shamtoq goknghe dông myit myoqbyù hkyô haú lé wó é nghut mù, haú gi, gíngtúng é eq gaú é hkyô nghut ri. Myit myoqbyù hkyô haú gi, mauhkúng noqkuq yhúm má é pân-gyang ahkaú má é sân-yúng gok má jé wàng é nghut ri. ²⁰ Jowò haú gi, nga-nhúng é akyu é matú, nga-nhúng é hí má wàng byi é sù Yesuq wàng jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat úng pyám luí dum tau lo é Abraham lé hui mù, shimân byi bê nghut ri. ² Hàu mù, Abraham gi, wó lo é jung hkgangmó má é, xé gambùm má é ragambùm, yhang lé byi bê nghut ri. Sâng-hi lê é Melahkizedek é myíng lichyúm gi, "dingmán hkyo é hkohkâm" gâ é nghut mù, htâng lê é "Salem é hkohkâm" gâ é gi, "nunggón hkyo é hkohkâm" gâ é nghut lê. ³ Yhâng é ínu íwa é hkyô eq byùxik labaú le, hí é buinyè eq asak htúm é hkyô le a kâ to nghut ri. Yhang gi, Garaí Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lê nghú é lé, myit wú keq. Hàu íchyí íwa Abraham lhang gi, wó lo é má é xé gambùm má é ragambùm, yhang lé byi ri-nhung!
⁵ Hkyangjong dut bang Lewiq é awut ashín pé gi, yhangmoq é gumang wui, Abraham mai nyi gyó lo é bang nghut kôle, tará má bo é eq rajung za, haú bâng chyáng mai xé gambùm má é ragambùm lé hkyui yù rá dut é bang nghut

akô. ⁶ Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byi ri. ⁷ Shimân byi sù gi, shimân byi é lé hkam yù sù htoq je gyaú sù nghut é lé, ó yuq le úng-áng rà hkyô a joq é nghut lhê. ⁸ Hkyangjông pé eq séng luí ga jang, shi byuq sê é byu eq, xê gambùm mâ é ragambùm lé hkyui yù é nghut lhê; nghut kôlhang, Melahkizedek eq séng luí nghut jáng, asak dui nyi é ga tai pyô byi é huí su eq hkyui yu é nghut lhê. ⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghù wó tai ri. ¹⁰ Hai mù gà le, Melahkizedek gi, Abraham lé huí é hkûn, Lewiq gi, yhâng é íchyí iké é gungdu hkaú má ru bo tô ashí nghut ri.

Melahkizedek Eq Dù É Yesuq

¹¹ Haú Lewiq hkyangjông amyû pé é ipyat má, byu pé gi, jep é tará lé wó yu bùm kô é nghut mù, hkyangjông ayá haú mai gumjup hkyô wó yù kô é nghut le gi, hai mù luí, Arun wó é hkyangjông ayá hkyo dông a nghut é za, Melahkizedek wó é hkyangjông ayá hkyo dông lo é sù gotù hkyangjông rayuq ra shirâ lú? ¹² Hkâsu mù gà le, hkyangjông amyû htaí é hkûn gi, tará le htaí yhang htaí rá dut é nghut lhê. ¹³ Haú su nghù tai é hkyô pé eq séng é Sù gi, gotù byuhú má é sù nghut mù, byuhú haú mai gi, ó yuq le hkungga gyap má dojaú wú é a nghut. ¹⁴ Hkâsu mù gà le, nga-nhúng é Yhumsing gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haú eq séng é hkyô má, hkyangjông pé eq séng luí hai lé a tai é nghut lhê. ¹⁵ Melahkizedek eq dù é gotù hkyangjông rayuq pô htoq bê nghù, ngamoq tai bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut rá lhê gà é tará dông hkyangjông rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gà le,

"Nàng gi, Melahkizedek wó é hkyangjông ayá hkyô dông mai, ahtum abyuq hkyangjông rayuq nghut nyi ri."✧
ga Yhang eq séng luí tai pyo tô é nghut lhê.

¹⁸ Haú hí lhê é cháng rá tará gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gà le, haú jep é tará gi, gumjup hkyô hai a wó kut byi é nghut lhê. Haú mù, je ge é myit myoqbyù hkyô lajang byi é nghut luí, nga-nhúng gi, myit myoqbyù hkyô haú mai Garai Gasâng chyáng wó chyâng htep é é nghut lhê.

²⁰ Myit myoqbyù hkyô haú gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjông rayuq nghut lhê."

ga haú Yhumsing dakâm bê nghut mù, Yhang myit é hkyô htaí rá a nghut."✧
ga, Yhang eq séng luí Garai Gasang tai é hkûn, dakâm dang haú mai hkyangjông rayuq dut bê nghut ri. ²² Dakâm dang hau é yanmai, Yesuq gi, je ge é dangshikaq é pahkâm wò yù sù dut bê nghut ri.

²³ Hkyangjông pé myo myo nyi rá dut é gi, yhangmoq é muzó a wó xoq zui shoq shi byuq hkyô eq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjông mú ayang ru zui nyi rá nghut lhê. ²⁵ Haú mù luí, Yhang gi,

Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tóngbán byi nyi rá matú, rú dui nyi é sù nghut lhê.

²⁶ Yesuq gi, chyoiyúng é sù, mara hún rá hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkúng pê ahtoq má lhoq toq lhoq gyaú yu huí é sù nghut ri. Haú sù é hkyangjong mó gi, nga-nhúng rá é lé lajang byi rá htuk ang ri. ²⁷ Nyí nyí búi búi, yhumsing é mará é matú hí hkungga nhông byi mù, byu pê é mara matú le hkungga nhông byi é gotú hkyangjong mó pé su, Yhang gi, a kut rá é sù nghut lhê. Yhang gi, Yhânggùng lé Yhang nhông byi é hkún, yhangmoq é yubak mará é matú banshoq radàm za hkungga nhông byi pyám bê nghut ri. ²⁸ Hkâsu mù gâ le, haú jep é tará gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haú jep é tará é htàng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí đông nghut lhê: Nga-nhúng gi, haú sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garaí é hkohkâm-tanghkuq é loqyô hkyam shut zúng to mù, ² byu èq saí é a nghut é za, haú Yhumsing èq saí é saksé zúm akying hkaú mã é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rá matú wó hun to huí é chyat nghut lhê. Haú mù luí, hkyangjong mó shí yuq le, rajung jung nhông byi ra rá nghut lhê. ⁴ Yhang gi, mingkan htoq má nyi tô é ru nghut le gi, hkyangjong dut rá a nghut; hkâsu mù gâ le, jep é tará đông ga jang, chyunghuq nhông jaú é byu pé nyi to gù bê nghut lhê. ⁵ Yhangmoq, sân-yúng dik gok má dojaú é hkyô gi, mauhkúng htoq má joq é azòng eq wupzo đông nghut ri. Haú nghut é yanmai, Mosheq gi, saksé zúm saí rá nghut é hkún, "Nang lé, bùm má tún shít é azòng eq rajung za jung hkangmó wó saí shoq kut aq."* ga sidiq byi huí é nghut lhê. ⁶ Nghut kôlhang, Yesuq, gyoro sô xoq byi é dangshikaq gi, axaú lhúm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haú mù, dangshikaq haú gi, je ge é danggidiq pê htoq má awang hi tô é nghut lhê.

⁷ Hkâsu mù gâ le, sâng-hi lhê é dangshikaq má rá é hkyô haí a bo é ru nghut le gi, gotú ra rá a nghut lo. ⁸ Nghut kôlhang, Garai Gasang gi, byu pê chyáng mara bo é myàng mù, taí é gi,

"Haú Israelaq é yhumbyù wui eq le, Yudaq é yhumbyù wui eq le, Ngò, dangshikaq asik to rá ahkying jé lo nyi ri ga haú Yhumsing taí pyo ri.

⁹ Haú gi, Ngò, yhangmoq é íchyí íwâ pé lé loq èq zui mù, Egutuq ming mai shuí htoq lo é hkún,

yhangmoq eq tô tô é dangshikaq su dut rá a nghut.

Haí mù gâ le, yhangmoq gi, Ngá é dangshikaq lé a xoq cháng kô é nghut mù, Ngò gi, yhangmoq chyáng mai lhing ló byuq é nghut lhê ga haú Yhumsing taí pyo ri.

¹⁰ Shí gi, ahkýing haù laí é htâng má, Israelaq é yhumbyù wuì eq Ngò to rà nghut é dangshikaq nghut lhê ga haù Yhumsing taí pyo ri.

Ngò gi, Ngá é tará pé lé, yhangmoq é i-myt má kat byi mù, yhangmoq é myit nhiklhum má ká to byi rà nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó rà nghut lhê.

¹¹ 'Haù Yhumsing lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhoqshit é byù nyi rà a nghut lo,

haí mù gà lé, yhangmoq lhunglhâng bang gi, tiq htâng sù mai kô htâng sù jé shoq Ngo lé sé kó rà nghut lhê.

¹² Hkâsu mù gà le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo rà nghut lhê.*

gâ ri.

¹³ Dangshikaq haù lé, Yhang "asik" gà é gi, sâng-hí lhum lé, axau kut pyâm é nghut ri; xau ló byuq é haí le, hkâ-myhâng a myáng má byuq ló byuq rà nghut lhê.

9

Myidàm Saksé Zúm Má Noqkuq É Hkyô

¹ Sâng-hi lhê é dangshikaq gi, noqkuq rà htúngtará pé eq noqkuq rà myidàm sân-yúng dik gok bo é nghut ri. ² Saí tô é saksé zúm é sâng-hi gok má gi, haù myibung tsúng jang, siboi eq haù nhông byí é muk joq mù, haù gok lé gi, Chyoiyúng Jowò ga myhíng ri. ³ Í dang nghú rà gok pán-gyang é ahkaù má é gok lé gi, Chyoiyúng Htâng é Jowò gà é nghut lhê. ⁴ Gok haù má gi, namngón jung nyh é hìng hkungga gyap eq hìng shup dangshikaq sidek joq ri. Dangshikaq sidek haù má gi, mannaq muk bo é hìng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵ Dangshikaq sidek é ahtoq má gi, shíhtai gunglik hkungga byi jang htoq má wup tô é, Hpungwup shingkang bò Sù é hkerubim* pé joq tô ri. Nghut kôlhâng, ngamoq gi, ahkuí haù pé lé jikhúm nuqguq a wó taí san kyo é nghut lhê.

⁶ Haù dông jung hkangmó ban lajang tô é hkún, hkyangjông pé gi, ayang sâng-hi gok má wàng mù, yhangmoq é dojaù muzó lé wùn waq bekô nghut ri.

⁷ Nghut kôlhâng, ahkaù gok má gi, hkyangjong mó za, yhànggùng é matú le, a sé é za byu pé kut shut é mará é matú le, nhông byi rà sui chùng mù, razàn má radàm za wàng é nghut lhê. ⁸ Haù Chyoiyúng Woi-nyí gi, haù pé dông mai, sâng-hi é saksé zúm ru joq nyi nyi, haù Chyoiyúng Htâng é Jowò wàng hkyô a hpông shit shi é lé, tún shit nyi ri. ⁹ Haù gi, ipyat shi é matú tún shit é azông nghut mù, nhông byí é chyunghuq pé eq shigu hkungga pé gi, dojaù sù é i-myt lé a wó lhoq sân-yúng byí é hkyô lé taí nau é nghut lhê. ¹⁰ Haù pé gi, zojung, shuqjung eq chí san chí séng hking ahú hù eq za séng é nghut mù, htúngli asik, lé joq é ahkýing jé shoq za tô tô é gungsho eq séng é tará pé nghut ri.

Hkrisduq É Sui

¹¹ Hkrisduq gi, shí má joq to gù nghut é gè hkyô pé é hkyangjong mó dông lé jé é hkún, hpan tô é má a lom nghú nau é, byu eq saí é a nghut é, je kô é

* 8:12 Yer 31:31-34

* 9:5 Hkerubim gà é gi, byù su su, dusak su su dut é, dùng dap é maumang lagyo rahú nghut lhê.

eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkún, bainám eq nojúng zo pé é sui lé chùng mù wang é a nghut é za, Yhâng é suí eq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htúngli dông agot a-û dut é bang lé lhoq sân-yúng rá matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkún, yhangmoq gi, ahtoq gungsho pyâm wó lhoq sansêng é hui kô é nghut lhê. ¹⁴ Haù nghut jang, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byí é Hkrisduq é sui gi, rù dui nyi é Garai Gasang lé nga-nhúng wó dojaú sháng gaq ga, shí é hkyô shut shuí jé é nyi yap sâmlai mai nga-nhúng é myit sôn sé é hkyô lé, je riyhang wó lhoq sansêng yu ri-nhung mhaí!

¹⁵ Haù nghut é yanmai, Hkrisduq gi, danggidiq byi tô é ahtum abyuq é muizé lé, jì yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haù su wó kut é gi, sâng-hi lhê é dangshikaq akkaù má mara kut shut é bang lé lhoq lhut yù rá matú, yubak chyin xap zê ralhùm dông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang tái sù haù shí bê hkyô saksé shit rá lhê. ¹⁷ Haí mù gà le, madat dang gi, rayuq yuq shí jáng za sheq lichyúm htoq é nghut lhê. Madat dang tái sù rù dui nyi nyi, haù gi, hkâ-nhám le lichyúm htoq rá a nghut. ¹⁸ Haù nghut é yanmai, sâng-hi lhê é dangshikaq lhang gi, sui a bo lòm jáng lichyúm a htoq é nghut lhê. ¹⁹ Mosheq gi, haù jep é tará má bo é hkunmó hkangmó lé, shiwa byù banshoq bang lé ban tái pyo é hkún, zam zam ne é saumaú eq jâm kyâng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyün é nghut ri. ²⁰ Yhang gi, "Sui shí gi, nungmoq cháng rá matú, Garai Gasang, hkunmó hkyô tô bê nghut é, dangshikaq tô tô é sui nghut lhê."[☆] ga tái ri. ²¹ Yhang gi, saksé zúm eq dojaú é má chung é zè pé má le, haù eq rajung za sui haù hpyün gyün ri. ²² Gè gè gi, haù jep é tará má bo é dông ga jang, azíng zè aluq banshoq gi, suí eq lhoq sân-yúng é hui rá dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haù mù, mauhkúng zè pé é azòng pé gi, hkungga haù pé eq lhoq sân-yúng é hui rá é nghut lhê. Nghut kôlhang, mauhkúng zè pé yhang gi, haù pé htoq je ge é hkungga pé eq lhoq sân-yúng é hui rá dut é nghut lhê. ²⁴ Hkâsu mù gà le, akying lhum é azòng za nghut é, byu eq saí é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byí nyi é nghut lhê. ²⁵ Yhang gi, haù hkyangjong mó mai yhumsing é sui a nghut é sui lé chùng mù, Chyoiyúng Htâng é Jowò má zàn wui wàng luí kut é su, yhânggùng lé dum nhông byi byi kut rá matú mauhkúng má wang é le a nghut. ²⁶ Haù dông ru nghut le gi, Hkrisduq gi, mau htoq xâng hkún mai shí hkám é adàm myo myo nghut berá nghut lhê. Nghut kôlhang, ahkuí, Yhang gi, yubak mara huí sêng pyám byi rá matú, yhânggùng lé hkungga nhông byi rá ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shí rá nghut mù, hau htâng má tará jéyáng é hui rá nghut é eq rajung za, ²⁸ Hkrisduq gi, byù myo myô é yubak mara lé yu pyám byi rá matú, radá za hkungga nhông é hui bê nghut ri. Haù mù, Yhang gi, yubak mara wun pyám byi rá a nghut lo é za, Yhang lé lánng nyi é bang lé hkyi yù hkyô yu lé byi rá matú, htâng má í dâm nghù rá dâm htoq shit rá nghut lhê.

☆ 9:20 Htoq Ló 24:8

10

Hkrisduq É Gùng Lé, Banshoq É Matú Radàm Za Nhông Byí É Hkyô

¹Haù jep é tarâ gi, jé lô rà nghut é gè hkyô pé é akyíng a nghut é za, wupzo za nghut ri. Haù nghut é yanmai, jep é tarâ gi, zàn wui ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ²Tarâ haù wó lhoq gumjup byí é ru nghut le gi, yhangmoq nhông byí é hkyô nô pyám kó rà a nghut lhi? Hkâsu mù gâ le, haù noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak mará é matú, hkâ-nhám le mara a bò bun lo kó rà nghut lhê. ³Nghut kôlhang, shigu hkungga haù pé gi, zàn wui yubak mara pé lé lhoq pun byí é zè nghut ri. ⁴Haù mù gâ le, nohtó pé eq bainám pé é sui gi, yubak mara lé huí séng pyám é hkyô wó dut é a nghut.

⁵Haù mù luí, Hkrisduq, mingkan má lé jé é hkûn, Yhang taí é gi, "Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷Hau htâng, Ngò gi, 'Garai Gasang ê, Ngò eq séng luí chyúmding má kâ tô é eq rajung za,

Nàng ô nau é hkyô kut râ matú, Ngò, shí má nyi lhê.' nghu taí é."✧

gâ ri. ⁸Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lhê." ga taí ri. Haù jep é tarâ dông haù pé lé kut râ dut kôlhang taí é nghut ri. ⁹Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haù gi, Yhang, htang lhum dangshikaq lé htaí masat to râ matú, sâng-hi lhum lé tô pyám é nghut ri. ¹⁰Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byí é dông mai, nga-nhúng gi, lhoq chyoiyúng é huí bê nghut ri. ¹¹Hkyangjong hkanmó gi, nyí nyí bui bui, yap mù, yhâng é hkyangjong muzó lé zui sai é nghut lhê. Yhang gi, yubak mara lé hkâ-nhám lhang a wó huí séng pyám byí é, rajung zâ é shigu hkungga lé, dum nhông byi byi kut é nghut lhê. ¹²Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byí é hkûn jáng, Garai Gasâng é loqyo hkyam shut zung to bê nghut ri. ¹³Haù hkûn mai, Yhang gi, Yhâng é gyé pé lé, Yhâng é hkyí nang jang kut byi râ lé lánng nyi é nghut ri. ¹⁴Haù mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedú é matú lhoq gumjup byi bê nghut ri.

¹⁵Haù Chyoiyúng Woi-nyí le, hau hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

¹⁶"Haù Yhumsing taí ri, shí gi, ahkyíng haù lai htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaù má kat byi mù, yhangmoq é i-myt má kâ to byi râ nghut lhê."✧

gâ ri. ¹⁷Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô rà a nghut."✧

gâ ri. ¹⁸ Haù mù, mara haù pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haù mù luí, gumang wui ê, nga-nhúng gi, Yesuq é suí èq, haù Chyoiyúng Htâng é Jowò má wàng rá matú hkyak wó lum to bê nghut lhê. ²⁰ Haù gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. ²¹ Haù nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, ²² nga-nhúng gi, gingtíng é lumjíng hkyô mai sansêng é i-myt èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sanséng rá matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sân-yúng wui èq chí byí é hui yù sháng. ²³ Nga-nhúng gi, nga-nhúng yín yu é myit myoqbyù hkyô lé zúí gingtíng nyi sháng; hkâsu mù gâ le, danggidíq byí to bê Sù gi, lhumzui Sù nghut lhê. ²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byí lhum rá hkyô lé, dat myit nyi sháng. ²⁵ Chôm hui zup lhum nyi é hkyô lé, ra-am lhaq tó pyám nyi kô é su, nga-nhúng gi, a tó pyám é za, haù Buinyi chyáng lò bê nghut é lé nungmoq sê é eq rajung za, rayuq eq rayuq je riyhang myit wum byí lhum nyi sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi rá hkungga a joq lo. ²⁷ Tarâ jéyáng hkyô eq Garai Gasâng é gyê pé lé nyhê hkyô pyám rá nghut é nhikmo-yó é myi lé za, gyuq chiq myit mai lánq nyí rá dut bê nghut lhê. ²⁸ Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyám é hui bê nghut lhê. ²⁹ Haù jáng, Garai Gasâng é Yhangzo lé hkyiwa ô má nâng pyeq bê sù, yhumsíng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í yhang gyaú é mara dam byi é hui gíng rá nghut lhê ngúh, nungmoq wó myit akò lúh? ³⁰ Hkâsu mù gâ le, "Lató hpuq rá gi, Ngò ru nghut lhê; Ngò lató hpuq rá."* ga le, "Haù Yhumsíng gi, Yhâng é byu pé lé tarâ jéyáng rá nghut lhê."* ga le, taí é Sù lé, nga-nhúng sê lhê. ³¹ Haù rû dui nyi sù Garai Gasâng é loq hkaù má byit gyó wang é gi, gyuq chiq jung yang nghut ri.

³² Nungmoq, haù maubó lé hap yu é* htâng, wuihke jamjau huí é má gyai yang shikut kôluí wó jân pyám bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haù su hui zo bang eq ráhá bo hui zo bekô nghut ri. ³⁴ Nungmoq yang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haù mù luí, nungmoq é hkyak myit lum tó é hkyô lé hkâdú pyám kó; agùn agó chyunghuq shigyau é hui kó rá nghut lhê. ³⁶ Nungmoq gi, Garai Gasâng é ô nau hkyô lé kut é hkún, Yhâng danggidíq byí tó é lé wó hap yù rá matú, nungmoq hkam jan rá dut é nghut lhê. ³⁷ Hkâsu mù gâ le, razup zo nghut jáng, "Haù lé lô rá Sù gi, jé lé rá nghut mù, ahkyíng lhoq myáng rá a nghut.

* 10:30 Tarâ Pun 32:35 * 10:30 Tarâ Pun 32:36 * 10:32 Haù maubó lé hap yu é gâ é gi, gabú danglú lé sâng-hi wó hap yu é lé gâ lhê.

³⁸ Nghut kôlhang, Ngá é dingmán sù gi, lumjínng myit mai asak duì rã nghut lhê.

Yhang nungzut zut é nghut le gi, Ngò, Yhang lé myit nguì rã a nghut."*
ga tò ri. ³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjínng mù hkyi yù huí é bang ru nghut lhê.

11

Lumjínng Myit Mai

¹ Lumjínng myit nguì é gi, nga-nhúng myit myoqbyu tò é lé hkyak wó rã nguì é eq nga-nhúng a myàng shí é lé joq lhê nguì hkyak sê é hkyô nghut lhê. ² A-nham lhê bang gi, lumjínng myit haù mai Garaí eq owaq é hui kô é nghut lhê.

³ Lumjínng myit mai, nga-nhúng gi, nyì mi-nyì, joq mijoq lunglhang lé Garaí Gasang é hkunmó eq hpan tò é hkyô sê gyô é nghut lhê. Haù mù, myoq eq wó myang é pé gi, byu-myang é pé mai sai htoq tò é a nghut.

⁴ Lumjínng myit mai, Abelaq gi, Ka-in kut é htoq je ge é hkungga, Garaí Gasang lé nhông byí é nghut ri. Lumjínng myit mai, yhang gi, yhâng é hkungga eq séng luí Garaí Gasang hkya-ôn é hkùn, dingmán sù rayuq đông owaq é hui bê nghut ri. Haù mù, lumjínng myit mai, yhang gi, shi byuq bê nghut kôlhang, dang rú nyo nyì ashí nghut lhê.

⁵ Lumjínng myit mai, Eruk gi, shi é a hui zo shoq, asak shí mai mauhkung shut shuí yu é hui bê. Yhang lé, Garaí Gasang shuí ló byuq bê nghut é yanmai, yhang lé a wó myàng lo nghut ri. Hkâsu mù gà le, yhang gi, shuí yu é a hui shí é hí má, Garaí Gasang lé nguì nhâng sù rayuq đông owaq é hui sù nghut ri.

⁶ Lumjínng myit a bo é nghut le gi, Garaí Gasang lé a wó nguì nhang é nghut lhê. Haí mù gà le, Yhâng chyáng shikut luí lé jé é sù gi, Yhang nyì é hkyô lé le, lhumsuz myit mai Yhang lé hô bang lé, Yhâng eq shigyaú é lé le, lumjínng rã dut é nghut lhê.

⁷ Lumjínng myit mai, Noaq gi, a myang wú shí é hkyô pé eq séng luí sidiq byi huí é hkùn, yhâng é yhumbyu wui lé hkyi rã matú, gyuq hkunggá é đông mai wui-sanghpo sai bê nghut ri. Yhâng é lumjínng myit mai, mingkan lé mara byí é nghut mù, lumjínng myit mai lo é dingmán hkýo é jeju lé hkam yù sù dut bê nghut ri.

⁸ Lumjínng myit mai, Abraham gi, yhâng é muizè đông, htâng má yhang hap yù rã nghut é, Garaí Gasang byí é jowò shut e ló rã matú ji yu é huí é hkùn, jño gyo mù, yhang hká shut e ló é a sé kôlhang, ê bê nghut ri. ⁹ Lumjínng myit mai, yhang gi, gó ming má nyì é byù bíng rayuq su, danggididq byí tò é mau má nyì bê nghut ri. Yhang gi, zúm pé má lúng é nghut mù, rajung zã é danggididq é muizè lé hkam yu é Isak eq Yakup le, zúm pé má lúng bekò nghut ri. ¹⁰ Hkâsu mù gà le, Abraham gi, Garaí Gasang eq azông hên mù sai tò é, gíng é apùn awang pé eq mu é myuq lé myit myoqbyu nyì é nghut ri.

¹¹ Lumjínng myit mai, Abraham gi, yhâng é asak ipyat lai ló byuq é eq, Sarah le baùdung nghut to kôlhang, haù danggididq byi Sù, lhumsuz sù nghut lhê ga myit sôn yu é yanmai, iwa rayuq wó dut é hui bê nghut ri. ¹² Haù mù luí, yhang gi, shí gùng đông nghut kôle, yhang rayuq mai lo é awut ashín pé gi, mauhkung mã é kyí pé eq wuimau yàm mã é a ung nghap é semuì myhó myó lò bê nghut ri.

* 10:38 Hbk 2:3-4

13 Byù haù bang banshoq gi, yhangmoq shi é hkùn jé shoq lumjìng myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haù pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri. 14 Haù su yín yu é byu pé gi, yhangmoq yhumings é ming lé ho nyi é bang nghut é lé tún shit é nghut akô. 15 Yhangmoq htoq lo é ming lé, yhangmoq myit tui nyi kô é ru nghut le gi, dum tau lò rà ahkáng wó kó rà nghut lhê. 16 Ahkuí kúm, yhangmoq gi, je ge é ming nghut é, mauhkùng mingdán lé myit tuí nyi akô nghut ri. Haù mù luí, Garai Gasang gi, yhangmoq é Garai Gasang nghu é hui rà lé a hoq é nghut lhê. Hkâsu mù gà le, Yhang gi, yhangmoq é matú myuq ralhum lajâng to byi bê yanmai nghut ri.

17 Lumjìng myit mai, Abraham gi, Garai Gasâng eq yhang lé chyam é hkùn, Isak lé hkungga ralhum dông nhông byi bê nghut ri. Haù gi, danggidiq pé lé hap yu to bê sù gi, yhâng é yuqzo zote lé nhông byi rà dâ é nghut lhê. 18 Garai Gasang gi, "Isak dông mai lo é lé, náng é awut ashín nghù són byi rà nghut lhê." ga yhang lé danggidiq byi to bê nghut kôle, yhang haù su kut é nghut ri. 19 Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri. 20 Lumjìng myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

21 Lumjìng myit mai, Yakup gi, yhang shi lò rà u má, Yosep é yhangzô nhik lé shimân byi mù, yhâng é dumbáng-u má nè luí, noqkuq bê nghut ri.

22 Lumjìng myit mai, Yosep gi, yhâng asak htùm lò rà u lé, Israelaq byu pé Egotuq ming mai htoq lò rà eq séng luí taí mù, yhâng é showui pé eq séng luí hkâsu kut rà hkyô lé pying to bê nghut ri.

23 Lumjìng myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haí mù gà le, yhangnhik gi, zoshâng haù yúng é myàng kômù, hkohkam é mungdang lé a gyuq kó nghut ri.*

24 Lumjìng myit mai, Mosheq gi, yhang kô lo é hkùn, Hpara-uq é byizô é yhangzo ga rà lé he-ngik pyâm ri. 25 Yhang gi, yubak mará é ngón hkyô má rayoq zo ngón kún rà malaí Garai Gasâng é byu pé eq rahá hpuzô é hui rà lé sheq hkyin yù bê nghut ri. 26 Yhang gi, haù Hkrisduq é matú rhoi huí é lé, Egotuq ming má é sutzé htoq má je riyhang hpaudap lhê ga myit són yu ri. Haí mù gà le, yhang gi, yhâng é shigyaú chyunghuq lé myit myoqbyu nyi sù nghut ri. 27 Lumjìng myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq lò byuq bê nghut ri. Yhang gi, myoq eq a wó myang é sù Garai lé wó myang é sù dông, hkam jân é nghut ri. 28 Lumjìng myit mai, yhang gi, haù zomún lé sat é maumang lagyô eq Israelaq byu pé é zomún lé a wó záng sháng gaq ga, Lhoqlhai Poí eq sui hpyùn é hkyô le kut hí bê nghut ri.

29 Lumjìng myit mai, haù shiwa byu pé gi, Nhông Nè lé kyuq huí é myigùng htoq mai su laí byit bekô nghut ri; nghut kôlhang, Egotuq byu pé le, haù dông laí shikut wú kô é hkùn, yhangmoq gi, myup shi byuq bekô nghut ri.

30 Lumjìng myit mai, shiwa byu pé, Yeriho myuq xêwâm lé nyhit nyí sô lhing é htâng má, xêwâm haù leq gyop byuq bê nghut ri.

* 11:18 Apùn 21:12 * 11:23 Haù-u lé, hkohkâm hpó gi, Israelaq pé é yuqzo zonú wui lé sat pyâm rà hkunmó hkyô tô é nghut lhê.

³¹ Lumjǎng myit mai, shiwa myhí Rahap gi, haû Israelaq jó wú bang lé nguóngón é eq lhom hkulum yu é yanmai, jino a gyo bang eq rahá sat pyâm é a huí é nghut lhê.

³² Haû htoq lai luí, ngò haí tai jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoí pé é hkyô lé tai rá ahkyíng ngò a wó. ³³ Haû bang gi, lumjǎng myit mai mingdán pé lé wó zân ung yù bekò, tengmán hkyô lé chung jai bekò, danggidiq byí to bé lé wó hap yù bekò, hkanghkyi pé é nhut lé wó myhí pyám bekò, ³⁴ myiduq myishâm lé wó sat pyám bekò, shamsó mai le wó hpang lut bekò nghut ri. Yhangmoq é wum nyhóm hkyô gi, wum taû bo byuq é dut bekò nghut ri. Yhangmoq gi, majan má a-tsam mó bô bang dut mù, maigan gyè pé lé wó ung pyám kô é nghut lhê. ³⁵ Myiwe wui gi, yhangmoq eq sêng é shi byuq bê bang asak dum lhoq tuí huí é lé, wó yù bekò nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui rá lé he-ngik pyám kômù, zing-rí é gyai yhang hui zo bekò nghut ri. ³⁶ Ra-am gi, wuizui kut pyám byí é eq nhuq bat é hui bekò, góbang gi, shamtoq kyum hut huí é eq htóng lhùng é hui bekò nghut ri. ³⁷ Yhangmoq gi, luqgok eq dú sat é, í túm dut shoq yik hpyit é, sham eq sat pyâm é hui bekò nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rí é eq rhoi pyâm é hui bekò nghut ri. ³⁸ Yhangmoq lhumzui nyí kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkýung pé eq myídong pé má nyi lhing wún bekò nghut ri.

³⁹ Haû bang banshoq gi, yhangmoq é lumjǎng myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri. ⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajáng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haû mù luí, nga-nhúng gi, haû myhó é saksé pé mhutdùm su nga-nhúng é lhinghkyuq má joq to bê nghut é yanmai, nga-nhúng lé hkùm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng òn rá matú tô tô é hkyô lé, hkam jan lui òn é ló sháng. ² Nga-nhúng gi, nga-nhúng é lumjǎng hkyô é apùn awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haí su a ngam é za, tapzîng má shí hkâm é hkyô lé jân pyám luí, Garai Gasang é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngu byuq rá eq myit wum a gyui byuq kó sháng gaq, yubak dap bâng chyáng mai haû su htuq htíng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htíng shikut é hkyô má, nungmoq é sui shun pyám shoq yhang a kut shí kó nghut ri. ⁵ Hau htoq agó, nungmoq gi, zo wuí lé òng Garai Gasang nungmoq lé wum byí é dang lé tô-myhí pyám bekò lhú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhá hkâkut pyám,
Yhang, nang lé tân é hkùn, myit wum hkâgyui,

6 haì mù gà le, haù Yhumsing gi, Yhang chyitdap é bang lé mhoqshit mù, zo rayuq lé đông,

Yhang hap yu é bang yuq hkangmó lé dam byí é nghut lhê."*

7 Mhoqshit huì é hkyô má, wuìhkê é lé hkam jan keq. Garai Gasang gi, nungmoq lé, zo wuì lé đông kut é ru nghut lhê. Hkâsu mù gà le, yhumsing é yhangwâ eq a mhoq é zo gi, ó wá nyi lhê lú? 8 Nungmoq gi, yuq hkangmó huì lai é mhoqshit hkyô lé, a hui kô é nghut jáng, dezô pé đông nghut byuq mù, zo sîng wuì a nghut lo kó. 9 Nga-nhung banshoq bang gi, nga-nhung lé mhoqshit é xângzo iwâ pé wó é bang chyat nghut mù, yhangmoq lé hkunggâ é nghut lhê. Haù nghut jáng, je riyhang, nga-nhung é woi-nyí eq sêng é Íwâ é a-ô má nyi mù, asak duì râ dut ri myhi-nhung! 10 Nga-nhung é xângzo iwâ pé gi, yhangmoq je ge dik bûn é lé, nga-nhung lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyung hkyô má nga-nhung wó bo lom shoq, nga-nhung é gè hkyô é matú, nga-nhung lé mhoqshit ri. 11 Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haù lé hkam yù bê bâng é matú gi, htâng má, nguingón hkyô eq dîngmán hkyô é ashi lhoq htoq byí ri.

12 Haù mù luì, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq. 13 Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

14 Byù banshoq bang eq nguingón shoq nyi râ eq chyoiyung râ matú wó dut é í shikut keq. Hkâsu mù gà le, ó yuq le, chyoiyung hkyô a bo é gi, haù Yhumsing lé myàng râ a nghut. 15 Ó yuq le, Garai Gasang jeju lé a tô pyám râ matú, sidiq keq. Haù, yuq htoq lô mù, wuìhke hkyô lhoq htoq é eq byù myo myo lé agot a-ù dut nhang é nuì hko su, ó yuq lé le hkâdut nhâng kó. 16 Ó yuq le, ashop é đông gungsho zùm yap é hkyô nghut nghut, zang radún é matú, yhang wó tô é yuqzo zomún muizê ahko ahkáng lé ung zô pyám é, Garai a lom é Eso su nghut nghut, a kut râ matú sidiq keq. 17 Nungmoq sê é eq rajung za, Eso gi, htâng má, shimân jeju haù lé hkam yù nau é hkûn, he-ngik pyám é hui bê. Yhang gi, shimân jeju haù lé ngaubyi ngau-nhap eq hô kôlhang, yhang kut é hkyô lé a wó htai byi lo nghut ri.

18 Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyí dut é eq laidun lo é má le, 19 tut htê mying é eq, dang taihtê mying é má le, a jé ê kó nghut ri. Dang htê haù lé wó gyô é bang gi, yhangmoq lé, dang a tai jat lo râ matú dung tôngbán akô nghut ri. 20 Haì mù gà le, yhangmoq gi, "Bùm haù má dusak pé záng jáng lháng, luqgok eq dú sat râ dut lhê."* ga Garai Gasang hkyô tô é hkunmó lé a wó hkâm kô é yanmai nghut ri. 21 Haù byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nán ri."* ga tai é nghut ri.

22 Nghut kôlhang, nungmoq gi, Zi-un Bùm eq rû dui nyi é Garai Gasang é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq, 23 mauhkûng htoq má mying kâ to huì é, zomún pé é noqkuq hpúng joq jang má, jé lé bekô nghut ri. Haù mù, nungmoq gi,

byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pè chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyùn é sui má le, jé lé é nghut bekô.*

²⁵ Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haù mù, mauhkúng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lí? ²⁶ Haù Garaí dang taí é u má, Yhâng é htê gi, mingkan lé lhoq nhùn kat ri, ahkuí kúm gi, "Ngò, mingkan lé za a nghut, mauhkúng pé lé le radàm dum lhoq nhùn râ nghut lhê."* ga Yhang danggidiq byí to bê nghut ri. ²⁷ "Radàm dum" gâ é dang gi, haù a wó lhoq nhùn é pé wó myit to sháng gaq ga, hpan to huí é zè pé nghut é, wó lhoq nhùn é pé lé huí sêng pyâm râ lé gâ é nghut lhê.

²⁸ Haù mù luí, nga-nhúng gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garaí Gasang hap yù gíng é dông noqkuq sháng. ²⁹ Hkâsu mù gâ le, nga-nhúng é "Garaí Gasang gi, nyhê jôm é myi nghut ri".*

13

Ló Htáng Má Lhoq Pun Kyîng É Hkyô

¹ Rayuq eq rayuq, gumang yhangchang dông chyitdap lhùm nyi keq. ² Byù bíng pé lé hkulùm râ hkâtô-myí kó, hkâsu mù gâ le, ra-am gi, haù su kut nyí kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

⁴ Myiháng hkyô gi, lunglhâng bâng èq hpautap é hui râ dut é nghut mù, myiháng yhuphú gi, sân-yúng râ dut lhê. Hkâsu mù gâ le, Garaí Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê. ⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haí mù gâ le, Garaí Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*

ga taí é nghut lhê. ⁶ Haù mù, nga-nhúng gi, hkyak lum é myit mai, "Haù Yhumsíng gi, ngo lé garúm sù nghut lhê yanmai, ngò, gyuq râ a nghut.

Ó yuq wá, ngo lé haí wó kut râ lú?"*
nghù taí é nghut lhê.

⁷ Nungmoq lé Garaí Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjíng myit lé alik kut yù keq. ⁸ Yesuq Hkrisduq gi, a-nyí nap, hkù-nyí, htângnùng pyat dedu rajung za nghut nyi ri.

⁹ Maù nhô zâ é mhoqshit hkyô ajung jung maí èq shuí ngoq huí é bang hkâdut kó. Zo bang lé hai akyú a byí é, htúngli zoshuq èq a nghut é za, Garaí jejú èq nga-nhúng é myit nhiklum lé wum-o lhoq kíng yu é gi, gè hkyô nghut

* **12:24** Abelaq lé gi, yhangmang Ka-in èq sat é nghut luí, yhâng é sui gi, latô-hpuq râ matú nghut ri; nghut kôhang, Hkrisduq é sui kúm gi, hkyi yù hkyô lajang byí ri. * **12:26** Hagi 2:6 * **12:29** Tará Pun 4:24 * **13:5** Tará Pun 31:6 * **13:6** Hkya-on 118:6-7

lê. ¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhúw wó é nghut lê.

¹¹ Haú hkyangjong mó gi, dusak pé é sui lé, yubak mara hkungga đông Chyoiyúng Htâng é Jowò má yu wang ri; nghut kôlháng, gungsho pé lé gi, byú nyi jowò shinggan má nyhê hkyô pyâm ri. ¹² Haú eq rajung za, Yesuq le, Yhâng é sui đông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shí hkám bê nghut ri. ¹³ Haú mù luí, nga-nhúng gi, byú nyi jowò shinggan má Yhâng chyáng ê mù, Yhang hui zô é rhoi hkyô lé é bo hui zo sháng. ¹⁴ Hkâsu mù gà le, nga-nhúng gi, mingkan shí má ru gíng nyi é myuq wó bang a nghut é za, jé lé lô râ myuq lé ho nyi é bang ru nghut lê.

¹⁵ Haú mù luí, nga-nhúng gi, Garai Gasâng é myíng lé yín yu é nhutwui é ashí nghut é, hkya-on hkungga lé, Yesuq đông mai, Garai Gasâng chyáng xoq xoq nhông byí nyi sháng. ¹⁶ Ge é hkyô kut râ eq góbang lé shuí gam chúng râ hkyô lé, hkâtô-myhí kó; hkâsu mù gà le, Garai Gasang gi, haú sù é hkungga pé lé ô nguí nyi ri.

¹⁷ Nungmoq é hkyô-u shê bâng é jino gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang đông mai nungmoq lé upzúng nyi é nghut lê. Yhangmoq é muzó pé gi, nungmoq é matú akýú a bo é wólai a dut é za, gabú hkyô ralhúw wó dut sháng gaq, yhangmoq é jino gyó nyi keq.

¹⁸ Ngamoq é matú kyúdung byi kó laq. Ngamoq gi, sân-yúng é myít sôn sé é hkyô wó mù, hkyô hkangmó má ge é đông asak dui râ lé ô nau lê nghú, hkyak wó myít ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyúdung byi keq nghú wum taí tsuq kat lê.

²⁰ Sau hpúng pê é sau zúng Sù mó nghut é, nga-nhúng é Yhumsíng Yesuq lé, haú ahtum abyuq é dangshikaq é sui đông, shí bê mai dum lhoq dui toq é sù, nguínón hkyô é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhúng chyáng kut nyí sháng gaq. Hpungwup shíngkang gi, Yesuq Hkrisduq chyáng pyat dedu ahtum abyuq ru joq nyí sháng gaq. Amen.

²² Gumang wui ê, ngò lhoq pún kyíng é dang lé nungmoq wó hkam jan kó sháng gaq nghú, wum taí tsuq kat lê; hkâsu mù gà le, ngò gi, nungmoq lé, laiká ratot za kâ kat é nghut lê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyâm byi keq. Itali míng má é gumang wui gi, nungmoq lé shi-kyâm kat akó nghut ri.

²⁵ Jeju gi, nungmoq banshoq bâng chyáng ru joq nyí sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myú lé, ngingón dang shit kyô kat lhê.

Lumjing Myit Lé Chyam É Hkyô Eq Hpaqchyí Byéng-yá

² Ngá gumang wui ê, nungmoq é lumjing myit lé chyam wú é hui jáng, shikut shirang sê é myit jat nyi é lé, nungmoq sê nyi lhê nghut mù, ³ wuihke jamjau ajung jung lé htúng huí é hkûn, gaù jowò mó nghut nyi lhê nghú luí myit yù keq. ⁴ Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyí byéng-yá langhpyut tô é nghut le gi, haù banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, haù jáng, Garai gi, yhang lé byi rá nghut lhê. ⁶ Nghut kôlhang, lum shut é myit a bo é za, lumjing é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông mâ é wuihêng eq wui nyi ri. ⁷ Haù yuq gi, Yhumsing Garaí chyáng mâ é haí le wó yú rà su a ngam nyi sháng gaq. ⁸ Yhang gi, myit-kó xan sù nghut luí, yhang é hkyô hkat hkangmó má, mù htàng a nyang é sù nghut nyi ri.

Myung Sù Eq Wó Sù

⁹ Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woi byuq ló rà nghut lhê. ¹¹ Bui gi, nyé é lai èq toq lô jáng, haù wàhu nyhuí byuq ló mù, abó le yoq gyó byuq é eq, hau é yung sâm pé gi, htên byuq é su; wó sù le haù eq rajung za, yhang kut nyi é muzó má woi byuq ló rà nghut lhê.

Gunglaú É Hkyô

¹² Wuihke jamjau huí le, wó shikut shirang nyi sù gi, hkungsó wó nyí ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaú lé, wó yú rà nghut lhê.

¹³ Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghú luí, a tai sháng gaq, hkâsu mù gâ le, agè ashop é hkyô gi, Garaí Gasang lé wó gunglaú é a nghut, ó yuq lé le Garaí Gasang gunglaú rà a nghut. ¹⁴ Nghut kôlhang, ó yuq nghut le le, yhumsing é gungsho ô nau é dông, shuí láng nghoq ló é nghut le gi, agúng alaú huí bê. ¹⁵ Gungsho ô nau é hkyô kúm gi, zogúng dut jáng, mara lé hku htoq lo ri. Mara kô ding jáng, shi é má jé rà nghut lhê.

¹⁶ Ngò chyitdap é gumang wui ê, i-myit hkyô nghoq hkâ-nghoq nyí kó. ¹⁷ Gè réng é eq bying jup é chyunghuq lhunglhang gi, ahtoq shut má é nghut mù luí, maubó gung pé* é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut rà a nghut. ¹⁸ Yhang hpan tô é amyú pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haù tengmán é mungdang mai, nga-nhúng lé hkú to bê nghut ri.

* **1:17** Maubó gung pé gâ é gi, bui, kyí, lhamó lé gâ lhê.

Gyo Yu É Eq Cháng Kut É Hkyô

¹⁹Ngò chyitdap é gumang wui ê, shí hkyô lé nungmoq sê nyi akô. Byù ó yuq nghut kôlhang, gyô yù rá lé han nyi sháng; dang tai rá lé a hân sháng gaq; nhik-yô rá lé le hkâhân kó. ²⁰Hkâsu mù gâ le, byù nhik-yô é hkyô gi, Garai Gasang ô nau é dingmán é đông asak dui hkyô wó lhoq htoq rá a nghut. ²¹Haù mù luí, acháq achyut é banshoq eq ladu lai agè ashop é pé lé lhoq san lhoq sêng pyám luí, nungmoq é i-myit lé wó hkyi yù rá matú, i-myit unghkaù má Garai Gasang hô tô é mungdang lé, nú-nhâm é myit eq hkam yu nyi keq.

²²Nungmoq gi, yhumsing gùng lé a mhaù pyám sháng gaq, haù mungdang lé wó gyô yu é bang za a nghut, haù đông châng kut é bang le nghut nyi sháng gaq. ²³Mungdang haù lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wui ri. ²⁴Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhí pyâm ri. ²⁵Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhí pyâm é sù a nghut, muzó eq tân shit é sù nghut é yanmai, haù yuq gi, yhang cháng kut é muzó má shimân jeju wó rá nghut lhê.

²⁶Byù rayuq yuq, "Ngò gi, noqkuq htùng lé lhoq dik sù nghut lhê." ga luí, myit to kôlhang, yhumsing nhut shô lé a wó hkâng mù, yhumsing myit lé mhaù pyâm é nghut le gi, haù yuq é noqkuq htùng gi, akôm za nghut nyi ri. ²⁷Íwa Garai Gasâng é hí má sansêng é eq, rá é hkyô a bo é noqkuq htùng gi, wuihke jamjau huí é chuimó chuizô pé lé, châng wú garúm é hkyô eq, mingkan htoq mâ é acháq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹Ngá é gumang wui ê, hpungwup shingkang bo é nga-nhúng é Yhumsing Yesuq Hkrisduq lé lumjing hkyô má, byu é myoqdong lé hkâhkyin lhum kó. ²Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awui é sù rayuq gi, nungmoq é tarajong má wang lò kô é nghut le, ³haù réng é mebu wut é sù lé, nungmoq lhom wú mù je hkunggâ é eq, "Shí aróng wó é jowò má zùng aq." dum, haù asho awui é sù lé nghut jáng gi, "Mhó má yap to aq." haù su a nghut jáng, "Ngá é hkyi htâng má zùng aq." ga tai kô é nghut le gi, ⁴nungmoq rayuq eq rayuq gamhkuí lhum luí, a ge é i-myit eq doqdán é bang dut lò bekô a nghut kó lú?

⁵Ngò chyitdap é gumang wui ê, gyô yù keq, lumjing hkyô má wó sùt nyi luí, gidiq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq má é asho awui é bang lé hkyin yù bê a nghut kó lú? ⁶Nungmoq kúm gi, asho awui é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq eq yhang, tarâ tingnyâng shut she hkyut lò bekô, a nghut kó lú? ⁷Nungmoq eq sêng é kô dik é mying lé lhang, yhangmoq yhang rhoi dang tai bum akô, a nghut kó lú?

⁸Haù mù luí, Chyúmdang má, "Náng gùng lé nàng chyitdap é su, náng é chyangnâm má é bang lé le chyitdap aq."* ga luí, tai tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹Nghut kôlhang, byu é myoqdong lé nungmoq hkyin nyi kô é nghut le gi,

* 2:8 Nhung 19:18

nungmoq mara kut nyi gû nghut bê yanmai, haû tarâ lé shut é bang lé su tarâ jéyáng é huí nyi bekô rá nghut lhê. ¹⁰Byù ó yuq nghut le le tarâ banshoq lé cháng kôlhang, haû mâ é ralhúm lhum lé shut pyám jáng gi, tarâ banshoq lé shut pyám sù dut byuq rá nghut lhê. ¹¹Hkâsu mù gâ le, "Su-myi sulàng hkâlú."* ga luí, hkang tô é sù gi, "Byù lé hkâsat."* ga luí le, taí tô ashí. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹²Haû su mù luí, nungmoq lé lhoq lhut kat é tarâ đông jéyáng doqđân é huí rá bang su, ru taí nyi keq; ru châng kut nyi keq. ¹³Hkâsu mù gâ le, shogyo myit a bò sù gi, a shogyô é đông jéyáng doqđân é huí rá nghut lhê. Shogyo nhikmyín é hkyô kúm gi, jéyáng doqđân é hkyô lé wó ông lut rá nghut lhê.

Lumjín Myit Eq Zui Sai É Hkyô

¹⁴Ngá gumang wui ê, byù rayuq yuq, "Ngò gi, lumjín myit bo lhê." ga taí nyi kôlhang, muzó a bo lom é nghut le gi, haí akyú bò rá lúhú? Lumjín myit haú gi, yhang lé wó hkyi yù rá lúhú? ¹⁵Gumang, gu-nhá rayuq yuq a chún dut nyi é eq, nyí wui é zoshuq langhpyut tô é nghut le, ¹⁶nungmoq chyáng mâ é rayuq yuq gi, yhangmoq é gungsho má rá é hkyô haí le a byí é za, yhangmoq lé, "Nungmoq wut é gung lúm sháng gaq, zô é úng gyi sháng gaq, ngui ngui ngón ngón ló keq." ga taí é nghut le gi, haí akyú bò kó rá lúhú? ¹⁷Haû eq rajung za, lumjín myit má muzó a bo é nghut le gi, shi é eq rajung za nghut nyi ri.

¹⁸Dum rahkyô gi, "Nàng gi, lumjín myit bo ri, ngò gi, muzo bo lhê. Muzó a bo é náng é lumjín myit ngo lé tún shit wú aq, haú hkún, ngá muzó eq ngá lumjín myit lé, nang lé ngò tún shit rá nghut lhê." ga luí, rayuq yuq taí rá nghut lhê. ¹⁹Garai Gasang rayuq za nghut é lé nàng lumjín ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjín mù gyuq nán nyi akô nghut ri.

²⁰Kyoq a bo é byù bam ê, lumjín myit má muzó a bo le akôm za nghut é hkyô lé, nàng sé nau lhê a nghut lúhú? ²¹Nga-nhùng é Íwa Abraham gi, hkungga gyap htoq má yhangzo Isak lé shigu hkungga kut é hkún lé, zui sai é muzó mai dínghán é sù gâ é lé wó yú bê a nghut lúhú? ²²Haû mù luí, yhâng é lumjín myit gi, yhâng é muzó eq rahá za e ló é yanmai, lumjín myit gi, jup byíng lo é lé, nàng wó myâng bê nghut ri. ²³Haû su mù, "Abraham gi, Garai Gasang lé lumjín é nghut mù luí, yhang lé dínghán sù ga són byi bê."* ga luí, kâ tô é Chyúmdang gi, dik to bê. Dum, yhang lé Garai Gasâng é buinùm hpó ga luí le myhíng byi bê. ²⁴Haû mù luí, byù gi, lumjín é myit eq baú za a nghut, zui sai é muzó eq mara hkyut san byi huí é lé, nungmoq bûn sê nyi akô.

²⁵Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyám é hkún le, yhang zui sai é muzó mai dínghán é sù gâ é wó yú bê a nghut lúhú? ²⁶Haû su mù, gungdu má woi-nyí a bo le gi, shi é eq rajung za, haú lumjín myit má muzó jizó a bo le gi, shí gû nghut bê nghut ri.

3

Mhé Wuí É Shô

¹Ngá é gumang wui ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqđân é huí zo rá nghut lhê. ²Nga-nhúng banshoq bang gi, hkyô myo myo má myit

lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê. ⁴ Haù mai gotù, wuì-sanghpo pé lé wú wú keq, haù-í kô é sanghpo lé htan é laidûn èq mut é hui kôlhang, sanghpo hkang sù gi, gyai tiq é sanghpo shap èq za, yhang ô nau é dông, haù pé lé wó hkang yu ri. ⁵ Haù eq rajung za, shô gi, tiq é gungsho za nghut kôlhang, gyai gumrông nghuthûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haù gi, myi eq wuì nyi ri. Nga-nhúng é gungsho má, shô haù gi, agé ashop é mingkan dut lò mù, nga-nhúng é gungsho asak lé achayut dut nhâng luí, gungsho asak lé nyhê tuq kat ri. Haù gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myí má yê é jung eq wuì hkaù má nyi jung banshoq gi, wó mhê yu é jung chyat nghut mù, byu pé gi, haù pé lé mhê yu nyi akô. ⁸ Nghut kôlhang, shô lé kúm gi, byù ó le a wó mhê yù kó nghut ri. Haù gi, apyí abat, agé ashop, uphkang a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô dông hpan tô é waxâng zo wuì lé le nhúng pyâm nyi ri. ¹⁰ Nhut ralhum za mai, hkya-ôn é dang eq nhîng é dang htoq lo ri. Ngá é gumang wuì é, haù su kut é gi, a gè. ¹¹ Wuibúm radong za mai, chuí nghâm é wuì eq hkô é wuì wó htoq râ lú? ¹² Ngá gumang wuì é, maihpáng gâm mai tsanlun shi, tsibiyiq núí mai maihpáng shi, wó zui râ lú? Haù eq rajung za, xô ngam é wuì gi, chuí nghâm é wuì lé wó lhoq htoq byi râ a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lú? Haù yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó dông tún shit nyí sháng gaq. ¹⁴ Nghut kôlhang, nungmoq é myit má ladu lai é manon é i-myit eq, lú lhum bat zik é i-myit bo é nghut le gi, hkâ-nghutbun kó, haù tengmán hkyô lé le hkâ-mhaù pyám kó. ¹⁵ Haù sù é hpaqchyí byéng-yá kúm gi, mauhkúng htoq mai gyó lo é hpaqchyí byéng-yá a nghut, haù gi, myigùng htoq mã é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gà le, manon é eq lú lhum bat zik é dut nyi le gi, ruk ruk rak rak é hkyô eq agé ashop é mú ajung jung jup hkûm nyi ri.

¹⁷ Mauhkúng htoq mã é hpaqchyí byéng-yá kúm gi, sâng-hi awang má sansêng nyi ri; hau htâng má gi, nguínón hkyô lé ô nau é, myit nûm é, jìno gyô é, shogyo nhikmyin sê é eq ge é ashí zui nyi mù luí, gamhkuí a bò, ahpuq alik a dut é eq, kut mhaù a sê é hpaqchyí byéng-yá nghut nyi ri. ¹⁸ Hau htoq agó, nguínón é hkyô dat sô xoq é bang gi, nguínón é shijí lé sân kat é bang nghut mù, ge é ashí wó yù kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhum é eq mabyoq jishûm gi, hkâmai htoq lo é lú? Nungmoq ahkaù má gungsho ô nau é hkyô pé ngón hkyô hô mù, majan zân lhum é yanmai, dut htoq lo é a nghut kó lú? ² Nungmoq yut yut myit ô nau

nyì kôlhang, haî le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhùm nyi é eq majan htoq lhùm nyi kôlhang, haî le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chùng langsa pyám râ matú, shut é dông dúng nyi kô é yanmai nghut ri.

⁴ Su-myi sulàng lú é bang su gidiq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haû mù luí, mingkan ô nau é hkyô eq buinùm dù nau sù ó nghut kôlhang, Garai Gasang é gyè nghut nyi ri. ⁵ Dum ralhum, nga-nhúng má Garai Gasang kat lhung tô é woi-nyí gi, manon é myit lúng nyi ri ga luí, Chyúmdang má tai é gi, akôm nghut ri nghú, nungmoq myit ngam nyi akô lú? ⁶ Nghut kôlhang, Yhang gi, je kô é jeju ru byí nyi lhê. Haû eq rajung za, Chyúmdang má, "Garai Gasang gi, nghutbún é bang lé hkúm zing pyám kôlhang, myit lhoq nyhum é bang lé jeju byí ri."*

ga tai tô ri.

⁷ Haû mù, Garai uphkan é a-ô má ru nyi nyi keq; Nat Tsadán lé hkúm tang pyám keq; haû hkún, yhang nungmoq chyáng mai hpanq byuq râ nghut lhê. ⁸ Garai Gasang chyáng huí é keq, haû hkún, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhum lé lhoq chyoi lhoq yung to keq. Yudaq htung dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yón é eq ngaubyi ngau-nhap é kut nyi keq. Nungmoq é wuihá é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. ¹⁰ Haû Yhumsing Garaí é hí má i-myt lhoq nyhum nyi keq, haû hkún, Yhang gi, nungmoq lé lhoq toq râ nghut lhê.

¹¹ Gumang wui é, nungmoq yhangchang a ge é dông hkâtaí hpoi lhum kó. Yhumsing é yhanggu yhangmang lé a ge é dông tai hpoi nyi é sù, haû a nghut jáng, jéyáng é sù gi, haû tarâ lé a ge é dông tai hpoi nyi mù luí, jéyáng é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

Gyáng Dang A Tai Râ Hkyô

¹³ "Ngamoq, hkú-nyí napmá ra-nyí nyí, wà rawà wà shut é mù, haû má razàn kô é nyí luí, hpugá wuiloq gá mù amyat wó myang yù râ." ga tai nyi é bang ê, gyô wú keq. ¹⁴ Napmá haî dut lô râ lé lhang, nungmoq gi, a sé ko. Nungmoq é asak gi, haî nghut nyi lhê lú? Haû gi, razup rahtang za htoq shit luí dum byuq byuq ló mù é, nghansoq eq rajung za nghut nyi ri. ¹⁵ Haû mù luí, nungmoq haû su ga tai nyi râ malaí gi, "Yhumsing Garaí dông é nghut le gi, ngamoq le ru wó dui nyi mù, shí le, mhô le, wó kut râ nghut lhê." nghú luí, wó tai râ nghut lhê. ¹⁶ Ahkuí kúm gi, nungmoq é gyáng é dang dông gumrong nyi akô; haû su gumrong é hkyô banshoq gi, age ashop é jung chyat nghut nyi ri. ¹⁷ Haû mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byí É Dang

¹ Sùt wó é bang ê, gyo keq, nungmoq chyáng jé lé lô râ é wuĩhke jamjau hkyo é yanmai, ngau garû nyi keq. ² Nungmoq é sutzè gi, htên bup byuq bê nghut ri; nungmoq é wutbu wutnè le manot èq zô pyám bê nghut ri. ³ Nungmoq é hĩng eq ngùn má lháng, jogyik zui byuq mù luĩ, haũ jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám râ nghut lhê. Nungmoq gi, jìhtũm buinyi shí pé má, sutzè lé za hkgong to bekô nhung! ⁴ Wú keq, nungmoq é yohtung dùng yò yam nhâng mù luĩ, ahpau a byí é za, nungmoq mhaũ zô tô é ahpau pé garû nyi é htê pé eq, mù zui bang garû é htê pé lé gi, haũ a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myyit ô nau é đông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haũ dingmán é sũ* lé, nungmoq mara hũn mù, sat pyám bekô. Yhang kúm gi, nungmoq lé a lhom kũm zing nghut ri.

Myit Hĩng Hĩng Hkam Jan Ra Râ Hkyô

⁷ Haũ mù luĩ, gumang wui ê, haũ Yhumsing dum jé lé é buinyi jé shoq myit hĩng é èq láng nyi keq ô! Hkyâm saĩ sũ lé wú wú keq, yhang gi, myihpún mai ahpau dán é ashi lé wó yũ shoq ga mau mún eq wò htáng htâng é mau wo gyũn é jé shoq myit hĩng hĩng láng nyi ri. ⁸ Haũ eq rajung za, nungmoq le, Yhumsing Yesuq dum jé lé râ gi, chyáng lo nyi bê nghut é yanmai, myit hĩng é èq, i-myyit lé lhoq ging lhoq tĩng to keq. ⁹ Gumang wui ê, nungmoq jéyáng a hui sháng gaq, nungmoq yhangchang hkâ-nyung nyâng lhũm nyi ko. Wú keq, Tará agyi gi, hkũmdong má jé nyi to bê nghut ri.

¹⁰ Gumang wui ê, haũ Yhumsing Garai é mying eq hko kyô é myiqhtoĩ pé wuĩhke jamjau hui é hkũn, jân pyám é myit lé, nungmoq gi, ge é alik agàn kut yũ keq. ¹¹ Wú keq, shikut shirang é bang lé, nga-nhũng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htâng má myo myo dum shimân byí é hkyô lé, nungmoq wó gyô wú bê nghut lhê. Haĩ mù gâ le, haũ Yhumsing Garai gi, gyai shogyo nhikmyĩn é sũ nghut nyi ri.

¹² Ngá é gumang wui ê, banshoq má ahkyak dik é gi, haĩ le le hkâdakâm kó. Mauhkũng lé a nghut jáng, myigùng lé lang luĩ le hkâdakâm kó. Dakam é dang gotũ lé le hkâtaĩ nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghũ za, taĩ keq.

Lumjĩng Myit Eq Kyũdung Râ Hkyô

¹³ Nungmoq má rayuq yuq wuĩhke jamjau hui é nghut le gi, kyũdung nyi sháng gaq; rayuq yuq myit ngón nyi é nghut le gi, hkyá-on mahkôn hkôn nyi sháng gaq. ¹⁴ Nungmoq má rayuq yuq nõhpyo hui é nghut le gi, nõqkuq hpũng mã é nhik bô suwũn wui lé jĩ yũ mù, haũ bang gi, Yhumsing Yesuq é mying mai yhang lé xũ but byi luĩ, kyũdung byi kó sháng gaq. ¹⁵ Haũ su mù, lumjĩng myit èq kyũdung é dang gi, haũ nõ sũ lé lhoq gè luĩ, Yhumsing Garai gi, haũ yuq lé lhoq toq yũ râ nghut lhê. Yhang gi, yubak mara kut shut é nghut kôlhang, hkyut pyám byí é hui râ nghut lhê. ¹⁶ Haũ mù luĩ, nungmoq lhoq ge é hui kó sháng gaq, nungmoq é yubak mara lé rayuq eq rayuq yĩn lhũm mù, kyũdung

* 5:6 Dingmán é sũ gâ é danghkun lé, Chyũmlaiká ra-am má gi, dingmán é bang gâ ri.

byí lhûm nyì keq. Dingmán su é kyûdung dang gi, wó dut nhâng râ a-tsam wum-o myo myo bo nyì ri.

¹⁷ Eliyaq gi, nga-nhúng su i-myit unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkûng gi, maú wo hkyô kat byì mù, myigùng gi, yhâng é kyô shì mui shì lé lhoq htoq byí wú bê nghut lhê.

¹⁹ Ngá é gumang wui ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi, ²⁰ haû shuí taû yù sù gi, yubak mara kut é sù lé, shut shai é hkyô mai tengmán hkyô shut shuí taû yù mù, myit woi-nyí lé shì é mai hkyi yù bê nghut é yanmai, yubak mara myo myo lé shuí nghop pyám byí é sù dut berâ lé, bûn nyì keq ô!

PETRUQ Hĩ Dàm Hun Kat é Laiká (1 Peter)

1 Yesuq Hkrisduq é lagyo nghut sù, ñò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jino gyo rà matú le, Yhâng é suĩ eq hpyûn gyûn é hui* rà matú le, haũ Woi-nyĩ é lhoq sân-yúng nyi é muzó ðong mai, Iwa Garai Gasâng é hĩ te sê tô é hpaqchyĩ má cháng luĩ, hkyin yù huĩ é bang nghut é, 2 Garai Gasâng eq hkyin htoq yù luĩ, mingkân é byùbing dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

3 Hkya-on kungtôn hkyô gi, nga-nhùng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô ðong, Yhâng é gyai shogyo nhikmyin é yanmai, nga-nhúng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, 4 nungmoq é matú mauhkúng htoq má tô to byi bê nghut é, hkâ-nhám le, a hten a byoq é, agot a-ũ a dut é, a hpoi byuq é muĩ lé le wó nhang é nghut lhê. 5 Nungmoq gi, lumjing kô é yanmai, ló htâng é ahkying má lhoq htoq shit rà rì rì nghut é hkyi yù hkyô jé shoq, Garai é hpungwup a-t sâm eq upzúng é hui bang nghut akô. 6 Haũ mù, nungmoq gi, ahkuĩ razup zo, wuĩhke hkyô jungghkang jungmó má yón hpuzo é hui kó rà nghut kôlhâng, gyai yhang gabú nyi keq. 7 Wuĩhke hkyô haũ pé mai, nungmoq é lumjing myit gi, jet é hkyô lé wó chyam htoq mù, myi mai jên yù kôlhâng htên byoq sê é hĩng htoq je gyaũ luĩ, Yesuq Hkrisduq htoq shit é hkũn, hkya-on kungtôn hkyô, hpungwup shinggang eq aróng sitang lé, nungmoq wó kó rà nghut lhê. 8 Nungmoq gi, Yesuq lé a myang wú kôlhâng, Yhang lé chyitdap bum akô; Ahkuĩ, nungmoq, Yhang lé a myàng kôlhâng, Yhang lé lumjing kô é nghut mù, a ung htoq tai é eq hpungwup ho é gabú hkyô gi, nungmoq chyáng bying jup nyi ri. 9 Hkâsu mù gâ le, nungmoq gi, nungmoq é asak woi-nyĩ lé hkyi yù hkyô nghu é, nungmoq é lumjing myit é akyù lé wó yu nyi kô é nghut ri.

10 Hkyi yù hkyô haũ eq séng luĩ, nungmoq chyáng jé bê nghut é jeju hkyô lé tai é myiqtoĩ pé gi, gyai yhang sidiq myit eq jí jí chyun chyun ho gon wú bekô nghut ri. 11 Yhangmoq gi, Hkrisduq wuĩhke jamjau hui luĩ, hpungwup shinggang wó rà nghut é hkyô lé, yhangmoq má lúng nyi é, Hkrisduq é Woi-nyĩ mai te tai é hkũn, hkâ-nhám nghut rà eq hkasù é u má nghut rà hkyô lé ho gôn wú bekô nghut ri. 12 Mauhkúng mai nhang kat é Chyoiyúng Woi-nyĩ eq, nungmoq lé gabú danglù hko kyo bê bang mai, ahkuĩ nungmoq lé tai kyo bê nghut é hkyô pé lé, yhangmoq tai kô é gi, yhumsing matú dojaũ é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lháng gi, haũ hkyô pé lé gyai wú nau bum akô nghut ri.

Chyoiyúng Nyi Râ Hkyô

* 1:1 Yhâng é suĩ eq hpyûn gyûn é hui gâ é gi, Yhâng é suĩ eq mara chí sân pyám byi é lé gâ lhê.

13 Haù mù luí, zui saí rã matú nungmoq é i-myt lé hen to keq; yhumsing gùng yhumsing hking nyí keq; Yesuq Hkrisduq htoq shit é hkùn, nungmoq lé byí rã nghut é jeju lé, hkyak za myit myoqbyu nyí keq. 14 Jìno gyô é zoshâng wuì su, myoq a bóng shí é pyat má nungmoq nyí tô é hkùn, nungmoq é agè ashop ô nau hkyô lé a châng kut é za, 15 haù nungmoq lé jì yu é Sù gi, chyoiyúng é su, nungmoq zui saí é hkyô banshoq má chyoiyúng nyí keq. 16 Hkâsu mù gà le, "Ngò gi, chyoiyúng Sù nghut é yanmai, nungmoq le chyoiyúng nyí keq."* ga kã tô ri.

17 Byù yuq hkingmó é muzó lé, myoqdong a hkyin é za tarã jéyáng é sù Ìwa lé, nungmoq wut dung kô é yanmai, byùbing dông shí má nyí é u lé, Garai lé gyuq hkinggã é myit mai asak ùi keq. 18 Hkâsu mù gà le, nungmoq gi, nungmoq é Ìchyí ìwã pê chyáng mai bo gyó lo é hpau a dap é asak ùi hkyô mai, htên byoq sê é ngùn, hìng èq hkyi yù huí é a nghut é za, 19 gumjup é eq mara a bo é sauzo nghut sù, Hkrisduq é hpau dik é suí èq sheq hkyi yù huí é ru nghut é lé, nungmoq sê lhê. 20 Yhang gi, mau htoq xâng hkun mai hkyin yu é hui bê nghut kôlhàng, jìhtùm ahkyíng shí pé má sheq, nungmoq é matú htoq shit nhang é hui bê nghut ri. 21 Yhang lé, shí é mai lhoq ùi toq yù mù, hpungwup shingking bò nhang é Garai Gasang lé, nungmoq gi, Hkrisduq dông mai lumjìng kô é nghut luí, nungmoq é lumjìng myit eq myit myoqbyu hkyô gi, Garai Gasang chyáng nghut nyí bekò nghut ri.

22 Ahkú kúm, nungmoq gi, haù tengmán hkyô lé châng é dông mai, yhumsing gùng yhumsing lhoq sân-yúng yù bekò nghut mù, nungmoq é gumang wuì lé, lhumzuí é dông chyitdap bekò nghut luí, myit nhikhum mai, rayuq eq rayuq gyai yhang chyitdap lhum keq. 23 Hkâsu mù gà le, nungmoq gi, htên byoq sê é amyui mai dum hkù huí é a nghut é za, Garai Gasang é, rù ùi nyí é eq ru gíng nyí é mungdang dông, htên byoq a sê é amyui mai dum hku é hui bang ru nghut lhê. 24 Hkâsu mù gà le, "Byù lhunglhang bang gi, wàhu mhan eq pung ri, yhangmoq banshoq bâng é hpungwup shingking gi, yò mã é banbó pé eq pung ri; wàhu mhan gi, nyhuí kyuq byuq luí, banbó pé gi, yoq gyó byuq lhê; 25 nghut kôlhàng, haù Yhumsing é mungdang gi, ahtum abyuq gíng nyí lhê."* gã tô ri. Haù gi, nungmoq lé hko kyo bê mungdang nghut lhê.

2

1 Haù mù luí, i-myt ùi é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkingmó pé lé tô pyám keq. 2 Asik hku é zonú pé nau lé ô nau gadaú é su, woi-nyí eq sêng é jet é nau* lé ô nau gadaú nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhàng kó rã nghut lhê. 3 Hkâsu mù gà le, haù Yhumsing gi, gè sù nghut é lé, nungmoq chyam wú bekò nghut ri.

Rù Dui Nyí É Luqgok Eq Hkyin Yù Huí É Byù Myù

4 Byu pé mai hkyin htoq pyám kôlhàng, Garai Gasang é matú hpau ùi luí, Yhàng èq hkyin yù huí é, rù ùi nyí é Luqgok nghut sù, haù Yhumsing chyáng nungmoq jé lé é hkùn, 5 nungmoq le, rù ùi nyí é luqgok pé su, woi-nyí eq sêng é yhùm† saí nyí é hui luí, Yesuq Hkrisduq dông mai, Garai èq hap yù gíng é,

* 1:16 Nhong 11:44-45; 19:2; 20:7 * 1:25 Esai 40:6-8 * 2:2 Woi-nyí eq sêng é jet é nau gã é gi, Garai Gasang é mungdang lé tai é nghut lhê. † 2:5 Woi-nyí eq sêng é yhùm gã é gi, noquq hpung lé tai nau é nghut lhê.

woi-nyí eq sêng é hkungga nhông byi râ matú, chyoiyúng é hkyangjong amyú dut bekô nghut ri. ⁶ Hkâsu mù gâ le, Chyúmdang má,

"Wú keq, hkyin yù huí é eq hpaudap é htungchyún luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpú é hui râ a nghut."[☆]

ga tái tô ri. ⁷ Haù mù, lumjínng bang nungmoq é matú gi, luqgok haù hpaudap é nghut lhê. Nghut kôhang, a lumjínng bâng é matú gi,

"Haù yhúm sai bang hkyin htoq pyâm é luqgok gi, htungchyún mâ é ahkyak dik é luqgok[†] dut bê nghut ri."[☆]

ga le,

⁸ "Byu pé lé, htúng leng râ luqgok eq myit leqbat nhâng râ luq mó cham dut bê nghut ri."[☆]

ga le, tái tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haù dut râ lé, yhangmoq é matú masat to gú nghut bê nghut ri.

⁹ Nghut kôhang, nungmoq gi, mauchut hkaù mai Yhâng é mauhpo maubó shut nungmoq lé wut htoq yú Su é mauhpo muzó lé wó tái pyô kó sháng gaq ga, hkyin yù huí é byuhú, hkohkâm hkyangjong amyú, chyoiyúng é byu myú, Garai Gasang eq sêng é byu pé nghut akô nghut ri. ¹⁰ Nungmoq gi, hí lé byu ra-myú a nghut wú kôhang, ahkuí gi, Garai Gasâng é byu myú nghut bekô nghut ri; nungmoq gi, hí lé shogyo nhikmyin hkyô lé a wó yu wú kôhang, ahkuí gi, shogyo nhikmyin hkyô lé wó yú bekô nghut ri.

¹¹ Chyitdap é luzúm wuì ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghú, gó mîng byu pé eq byúbíng pé đông mingkan htoq má nyi é bang nungmoq lé, ngò, wum tái tsuq kat lhê. ¹² Haù a lumjínng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kúm é buinyi má Garai lé shigyaú kó sháng gaq, a lumjínng shí é byu pé é ahkaù má haù su ge é asak duì hkyô đông nyi yap keq.

Uphkâng Bang Eq Yhumsíng Wuì É A-ô Má Nyi Râ Hkyô

¹³ Haù Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi râ matú eq jô é hkyô kut bang lé shigyaú rá matú, hkosêng eq nhang tô é mauzaù pé é a-ô má nghut kôle, nyi nyi keq. ¹⁵ Hkâsu mù gâ le, ge é hkyô kut é đông, byu nâ pé é a sé a dat é dang lé nungmoq lhoq zim pyám é gi, Garai Gasang ô nau é hkyô nghut lhê. ¹⁶ Lut bê bang đông nyi keq, nghut kôhang, agè ashop é hkyô lé nghop pyám rá matú nungmoq é luthkyô lé hkáchùng kó; Garai Gasâng é dui-nhâng zoshâng wuì đông nyi keq. ¹⁷ Yuq hkangmó lé rago za hkunggá é hkyô shit keq; lumjínng é gumang wuì lé chyitdap keq; Garai Gasang lé gyuq hkunggá nyi keq; hkosêng lé hkungga keq.

¹⁸ Dui-nhâng zoshâng wuì ê, hkungga myit banshoq eq, nungmoq é yhumsing wuì é a-ô má nyi keq; ge é eq nú-nhám bâng é a-ô má za a nghut, byuwuì pé é a-ô má le nyi keq. ¹⁹ Hkâsu mù gâ le, byu rayuq gi, Garai Gasang lé bûn nyi sù nghut é yanmai, mara đông a nghut kôhang, wuìhke jamjau huí

☆ 2:6 Esai 28:16 † 2:7 Ahkyak é luqgok gâ é gi, Hkrisduq lé tái é nghut lhê. ☆ 2:7 Hkya-on 118:22 ☆ 2:8 Esai 8:14

é hkyô lé hpuzô é lé, jân pyâm é nghut le gi, hkya-on gíng é sù nghut lhê.
 20 Nghut kôlhang, nungmoq gi, mara kut shut é yanmai, nhuq bat é hkâm zo luí, haú lé jân nyi é nghut le gi, hai aróng wó kó râ lúh? Nghut kôlhang, nungmoq gi, ge é hkyô kut luí, wuĩhke hui zô é lé jân pyâm é nghut jáng, haú gi, Garai Gasâng hí má hkya-on gíng é hkyô nghut lhê. 21 Nungmoq gi, haú hkyô é matú ji yú hui é nghut lhê; hai mù gà le, Hkrisduq gi, nungmoq é matú wuĩhke hkyô hui é má, nungmoq lé alik đông tô to byi bê nghut mù, nungmoq gi, Yhâng é hkyi-kám pé lé cháng râ dut lhê.

22 "Yhang gi, hai mara le a kut shut, Yhâng é nhut mai mhaú é lé a myàng."*

23 Yhang gi, rhoi é hui é hkûn, yhangmoq lé a dum taú rhoi; wuĩhke hkyô hui é hkûn, kyuq é dang a taí. Haú kut râ malaí, tengmán é đông jéyáng é Su chyáng, Yhânggùng lé ap pyâm ri. 24 Nga-nhúng gi, yubak mara eq wó shi gang mù, dǐngmán hkyô é matú asak wó đủ kó sháng gaq ga, Yhang gi, sik zǐng má, Yhânggùng eq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pê é yanmai, nungmoq gi, lhoq gê byi é hui bekô nghut ri. 25 Hkâsu mù gà le, nungmoq gi, hkyô ngoq byuq é sau pé su dut wú kôlhang, ahkuí, nungmoq gi, haú sau zúng Sù eq nungmoq é asak woi-nyí lé upzúng Su chyáng lhing taú lò bekô nghut ri.

3

Ikun Myhì Pé Eq Ikun Hpô Pé

1 Ikun myhì pé ê, haú eq rajung za, yhumsing é ikun hpô uphkang é a-ô má nyi keq; haú hkûn, yhangmoq má é rayuq yuq, haú mungdang lé a lumjǐng kôlhang, 2 yhumsing é asak ùi hkyô má é sansêng é hkyô eq hkunggá é hkyô lé myàng kôjáng, dang đông a nghut é za, yhâng é yhumsing myhì é nyi yap é sâmlai đông mai yhang lé wó lhoq lhik yú râ nghut lhê. 3 Nungmoq yúng é hkyô gi, ahtoq pyám za nghut é, xâmban nik é đông, hǐng zê mhôn chung é eq rêng é mebu wut é đông mai lo é a ge nghut. 4 Hau é malaí, haú gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoi é yúng hkyô nghut é nungmoq é i-myt unghkaú má é su é yúng hkyô sheq dut râ lhê. 5 Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haú đông mhôn yú yú kut kô é nghut lhê. 6 Sarah gi, Abraham é jino gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpô uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

7 Ikun hpô pé ê, haú eq rajung za, yhumsing é ikun myhì eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang đông, yhangmoq lé hkungga keq. Haú hkûn, nungmoq é kyũdung dang lé a he-ngik pyám byi râ nghut lhê.

Ge É Kut Luí, Jamjau Hkam É Hkyô

8 Dang htâng sat é má, nungmoq banshoq bang gi, rayuq eq rayuq myit hui lhum nyi keq; myit wú nô mù, gumang nhiktàng wui su chyitdap lhum nyi keq; shogyo nhikmyin myit bò luí, i-myt nyhum nyi keq. 9 Agè ashop é lé, agè ashop é đông lató a hpuq é eq rhoi é lé rhoi é đông lató a hpuq é za, shimân byi keq; hai mù gà le, nungmoq gi, haú pê é matú, shimân jeju mùi wó hkam yú kó sháng gaq ga, ji yu é hui kô é ru nghut lhê. 10 Hkâsu mù gà le,

* 2:22 Esai 53:9

"Asak duì rà lé chyitdap é eq ge é buinyì pé lé myàng nau é sù ó yuq le, yhâng é shô lé, agè ashop é mai, yhâng é nhutwuì lé, mhaù dang taì é mai, lhoq kâng pyám ra rà nghut lhê.

¹¹ Yhang gi, agè ashop hkyô mai lhing tau mù, ge é kut ra rà nghut lhê; yhang gi, nguìngón simsaq hkyô lé hô mù, châng hkat nyì ra rà nghut lhê.

¹² Hkâsu mù gà le, haù Yhumsing é myoqjì gi, dingmán bang lé wú nyì é nghut luì, yhangmoq é kyùdung dang lé, Yhâng é nohkyp eq gyo byì ri; nghut kôlhâng, haù Yhumsing é myoqdong gi, agè ashop hkyô kut bang lé gyè dông myang pyâm ri.*

gâ tô ri.

¹³ Ge é hkyô lé, nungmoq gyai yhang kut nau nyì é nghut le gi, ó yuq wá nungmoq lé wó gunjang rà lú? ¹⁴ Nghut kôlhâng, dingmán hkyo é matú, nungmoq wuìhke jamjau huì le lhang, nungmoq gi, hkungsó wó nyì ri. "Yhangmoq gyuq é hkyô lé hkâgyuq kó; hkâgyuq dàn kó.*" ¹⁵ Nungmoq kúm gi, myit nhiklhum má, Hkrisduq lé, Yhumsing dông jowò byì keq. Nang wó é myit myoqbyù hkyô lé myì é sù yuq hkangmó lé, haì mù wó é hkyô tú taì kyo rà matú, ayang hen to aq. Nghut kôlhâng, nú-nhâm é eq hkunggâ é dông haù lé kut nyì aq; ¹⁶ nungmoq é unghkaù myit san za dut nyì keq, haù hkûn, Hkrisduq dông mai nungmoq wó é ge é a-kyang lé rhoì dang taì é bang gi, yhangmoq lumù gansang é yanmai hoq hpù é huì kó rà nghut lhê. ¹⁷ Garai Gasang ô nau é nghut le gi, agè ashop kut luì jamjau hkâm rà htoq má, ge é kut luì jamjau hkam le gi, je ge é nghut lhê. ¹⁸ Hkâsu mù gà le, nungmoq lé Garai Gasâng chyáng shuí jé shoq, Hkrisduq gi, byu pé é yubak marâ é yanmai, radàm za shí hkâm pyâm bê nghut ri; haù gi, dingmán Sû, a dingmán bâng é matú shí hkâm byì é nghut lhê. Yhang gi, gungdu shí bê nghut kôlhâng, haù Woi-nyì má lhoq duì é huì bê nghut ri. ¹⁹ Yhang gi, Woi-nyì dông, hóng lúng tô é woi-nyì pé lé é hko kyô ri. ²⁰ Woi-nyì haù pé gi, a-nham lé, Noaq é ipyat má wuì-sanghpo lé Noaq tsuq nyì é hkûn Garai Gasang myit hìng hìng lánng nyì é u lé, jìno a gyô é bang nghut akô. Wuì-sanghpo má wàng mù, wuì mai hkyi yù huì é byù shau luì, shit yuq za nghut akô. ²¹ Wuì haù gi, ahkuì nungmoq lé le hkyi yu é nghut é baptisma é azòng nghut ri; haù gi, gungdu mà é agot a-ù lé huì sêng pyám byì é a nghut é za, sansêng é unghkaù myit mai Garai Gasâng é hí má gidìq tô é ru nghut lhê. Yesuq Hkrisduq é dum duì toq hkyô dông, nungmoq gi, baptisma hkâm yù luì, hkyi yu é huì kô é nghut lhê. ²² Yesuq Hkrisduq gi, mauhkung má doq ló luì, Garai Gasâng é loqyò hkyam má nyì tô é nghut mù, maumang lagyô pé, ahkáng ayá pé eq a-tsam pé gi, Yhâng uphâng é a-ô má nghut nyì bum akô.

4

Garai Gasâng É Matú Asak Duì Rà Hkyô

¹ Haù mù luì, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau eq yhumsing gùng má gyehking dông wut to keq, haì mù gà le, yhâng é gungdu má hpuzo bê sù gi, mara eq gang bê nghut ri. ² Haù nghut é yanmai, yhang gi, yhang nyì tùm tô é mینگkan asak duì hkyô má, agè ashop é xângzo byù ô nau é dông a nghut é za, Garai Gasang ô nau é dông asak duì é ru nghut lhê. ³ Hkâsu mù gà le, nungmoq gi, lai lò bê ahkyíng má, a lumjìng shí é byu pé hkyin kut nau é hkyô nghut é, shut é dông

nyi zô lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye hai râ wut jung zoshuq lé yut yut ô nau é hkyô, achag achyut é hparà noq hkyô pé má, ahkying luq shoq nyi lai lò bê bang nghut akô. ⁴Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumú gansang pyâm akô nghut ri. ⁵Nghut kôlhang, yhangmoq gi, dui nyi é bang eq shí bê bang lé tarâ jéyáng râ rì rì nghut to Sù lé jihpán shit kyo ra kó râ nghut lhê. ⁶Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; hau gi, gungdu eq séng luí ga jang, yhangmoq gi, byú dông mai tarâ jéyáng é hui râ eq, woi-nyi eq séng luí ga jang, Garai Gasang dông mai asak wó dui râ matú nghut lhê.

⁷Lhunglhang htum râ ahkying gi, chyáng bê nghut ri. Hau mù luí, nungmoq kyú wó dung kô sháng gaq, bún gying luí, yhumsing gùng yhumsing hkanng nyi keq. ⁸Banshoq htoq má ahkyak é gi, rayuq eq rayuq gyai yhang chyitdap lhum é hkyô nghut lhê, hai mù gá le, chyitdap myit gi, yubak mara myo myo lé wó nghop pyâm é nghut lhê. ⁹Rayuq eq rayuq, tai nyung nyâng é hkyô a bo é za, rago hkulum lhum keq. ¹⁰Yuq hkangmó gi, yhumsing wó hkam yú bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é èq rago chung jai râ lhê. ¹¹Rayuq yuq tai é nghut jang, Garai Gasang é mungdang hau eq yhang rajung za tai ra râ nghut lhê. Garai Gasang gi, lunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jang, Garai Gasang byí é wum-ô èq dojaú ra râ nghut lhê. Hau hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Hui É Hkyô

¹²Chyitdap é luzúm wuí é, wuíhke hkyô dông chyam é lé nungmoq hkâm zô nyi é hkún, nungmoq chyáng maú nhô zâ é hkyô dut htoq bê dông, hkagyuyq dân kó. ¹³Hkrisduq é jamjau hkyô pé lé bo hui zô é yanmai kúm gi, nungmoq gabú keq, hau hkún sheq, Yhang é hpungwup shingkang eq rahá Yhang htoq shit é hkún, nungmoq gi, gabú dik é hui kó râ nghut lhê. ¹⁴Hkrisduq é mying yanmai, nungmoq gi, rhoi é hui zô é nghut jang, hkungsô wó nyi ri; hkâsu mù gá le, hpungwup shingkang bo é Woi-nyi nghu é, Garai Gasang é Woi-nyi gi, nungmoq chyáng nyi nyi ri. ¹⁵Nungmoq má é rayuq yuq jamjau hui é nghut le gi, byú sat sù, hkau sù, gotú agè ashop kut sù, góbang é mù má châng gunjang sù dông jamjau hui é a dut sháng gaq. ¹⁶Nghut kôlhang, Hkristan rayuq dông nungmoq jamjau hui é nghut le gi, hkâhoq nyi kó, Garai Gasang lé kúm gi, mying hau é yanmai hkya-ôn nyi keq. ¹⁷Hkâsu mù gá le, tarâ jéyáng râ ahkying gi, jé bê nghut luí, Garai Gasang é ikun byu pé mai hi râ nghut lhê; hau gi, nga-nhung mai hi é nghut jang, Garai Gasang é gabú danglù lé a châng é bang gi, hkâsu wá dut lò râ nghut lhê lú?

¹⁸"Hau dingmán sù, hkyi yú hui râ wuí é nghut le gi, tarâ a hkunggá é eq yubak dap é sù gi, hkâsu wá dut râ nghut lhê lú?"^{*}
gâ tô ri.

¹⁹Hau nghut mù luí, Garai Gasang ô nau é dông jamjau hui é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra râ nghut lhê.

^{*} 4:18 Sângkhyang 11:31

5

Suwún Wuí Êq Zorâm Wuí

¹ Nungmoq mã é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit rã nghut é Yhâng é hpungwup shing kang lé bo hkâm rã nghut sù đông mai sang kat kôlê: ² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang đông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut rã lhê; ngunzê lé a myoqnoq é za, shirông myit mai dojaú rã lhê. ³ Nungmoq é loq má ap byí to bê bang lé a up zô é za, yhangmoq é hí má alik dut nyí keq. ⁴ Haú jáng, Sau zúng Agyí mó† htoq shit é hkûn, nungmoq gi, hpungwup shing kang bo é, hkâ-nhám le a shum a byuq é janmaú lé myang hap yù kó rã nghut lhê.

⁵ Zorâm wuí ê, nungmoq le, nungmoq htoq ipyat ko bâng é a-ô má nyí keq. Nungmoq lhunglhang bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le, "Garai Gasang gi, nghuthùn é bang lé hkûm zing pyám kôlhang, myit lhoq nyhum é bang lé jeju byí ri."^{*}

ga tô ri. ⁶ Haú mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsing myit lé yhumsing lhoq nyhum nyí keq. ⁷ Nungmoq é myit chiq hkyô banshoq lé, Yhâng htoq má dù kê pyám to keq, haí mù gâ le, Yhang gi, nungmoq é matú chiq byí nyí sù nghut lhê.

⁸ Yhumsing gùng lé yhumsing hkâng mù, machya nyí keq. Nungmoq é gye nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. ⁹ Yhang lé htuq htung pyám mù, lumjing myit má gingting nyí keq, haí mù gâ le, mingkan gón mã é nungmoq é gumang wuí le, rajung zâ é jamjau hkyô pé hui zô nyí kô é lé, nungmoq sê lhê.

¹⁰ Haú mù, jeju banshoq é Garai Gasang gi, Hkrisduq má ahtum abyuq joq nyí é Yhâng é hpungwup shing kang matú nungmoq lé ji yù bê nghut luí, nungmoq razup zo jamjau huí é htang má, Yhang yhang nungmoq lé gumjup nhâng mù, wum bó nhâng luí, ging ging ting ting dut nhâng rã nghut lhê. ¹¹ Haú hpungwup a-tsam banshoq gi, Yhâng chyáng pyat dedu ahtum abyuq rú joq nyí sháng gaq. Amen.

Ló Htâng É Shi-kyám Dang

¹² Lhumzui é gumang nghù ngò sôn yu é Sila êq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kã kat é nghut lhê. Tengmán é jeju haú má yap ging nyí keq.

¹³ Babelon má nyí é, nungmoq eq rahá hkyin yù huí é Hpúng gi, nungmoq lé shi-kyám kat ri; ngá zo đông nghut sù Markuq le, nungmoq lé shi-kyám kat ri. ¹⁴ Rayuq eq rayuq, chyitdap bopuq puq é êq shi-kyám lhum keq.

Nguingón hkyô gi, Hkrisduq má nghut nyí é nungmoq banshoq bâng chyáng ru joq nyí sháng gaq ô.

* 5:2 Sau hpúng gâ é gi, lumjing bang lé gâ lhê. † 5:4 Sau zúng Agyí mó gâ é gi, Hkrisduq lé gâ é nghut lhê. * 5:5 Sânghkyang 3:34

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhùng é Garai Gasang eq hkyi yù Sù nghut é Yesuq Hkrisduq é đingmán hkyô đông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

² Garai Gasang eq nga-nhùng é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyí sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô đông nga-nhùng lé ji yù Sù lé nga-nhùng sê é đông mai, Garai Gasâng é hpungwup a-tsam gi, asak dui hkyô eq tarâ hkungga hkyo é matú nga-nhùng rã é jung hkangmó lé byi bê nghut ri. ⁴ Haú pé đông mai, Yhang gi, Yhâng é kô dik, hpaû dik é danggidiq pé nga-nhùng lé byi bê nghut ri; haú hkùn, nungmoq gi, haú danggidiq pé đông mai, Garaí é myit sâmlai lé wó bo hkam yù rã eq agê ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô rã nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsing gùng yhumsing hkang é hkyô lé, yhumsing gùng yhumsing hkang é hkyô má jân shirang é hkyô lé, jân shirang é hkyô má tarâ hkunggã é hkyô lé, ⁷ tarâ hkunggã é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gà le, hau pé lé nungmoq wó sing myô jat lo é nghut jáng, hau pé gi, nga-nhùng é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng rã a nghut. ⁹ Nghut kôlhang, rayuq yuq gi, hau pé lé a wó é nghut jáng, chyáng é lé za myang é eq myoqjit é sù nghut luí, lai lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gà le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó rã a nghut; ¹¹ hau htoq agó, nga-nhùng é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó rã nghut lhê.

Chyúmdang Mã É Myiqhtoi Dang

¹² Haú mù luí, nungmoq gi, hau pé lé sé kô é htoq agó, nungmoq wó tó é tengmán hkyô má gingtíng nyi kô é nghut kôlhang, ngò, nungmoq lé hkâ-nhám le hau pé lé ru lhoq pún nyi rã nghut lhê. ¹³ Shí gungdu má ngò rú dui nyi nyi gi, nungmoq lé lhoq pún kying byi le ge ri ngù, ngò wó myit ri; ¹⁴ haí mù gà le, nga-nhùng é Yhumsing Yesuq Hkrisduq gi, ngò lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to rã nghut é lé sê lhê. ¹⁵ Ngò htoq ló byuq é htáng má, nungmoq, hkâ-nhám le haú

pé lé ru wó bûn nyi râ lé myàng naù mù, ngò, wó dut é í shikut nyi râ nghut lhê.

¹⁶ Nga-nhùng é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq tai kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gâ le, haù Kô Làk Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."[✠] ga tai é htê, Yhâng chyáng jé é hkûn, haù Íwa Garai Gasâng chyáng má é aróng eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haù mauhkúng mai htoq lo é lé wó gyô é nghut lhê.

¹⁹ Haù mù luí, myiqhtoi pé dang lé je lhoq ging bê hkyô, ngamoq wó é nghut lhê; haù mù, maubó lô luí, nungmoq é myit má bó-myhú htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haù lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang má é myiqhtoi dang gi, haù myiqhtoi pé mai ó le ó lichyúm lhoq htoq yu é đông a nghut é lé, nungmoq sê to râ dut lhê. ²¹ Hkâsu mù gâ le, myiqhtoi dang gi, byù ô nau é đông hkâ-nhám lé a htoq wú é za, haù Chyoiyúng Woi-nyí eq shuí u huí é bang mai, Garai Gasâng chyáng má é dang tai é ru nghut lhê.

2

Sará Apyoq Pé É Hkyô

¹ Nghut kôlhang, myiqhtoi pyoq pé gi, Israelaq byù haù bâng é ahkaù má nyi wú bê nghut lhê, haù eq rajung za, nungmoq é ahkaù má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó râ nghut lhê. Haù mù, yhangmoq gi, yhumsing gung yhumsing byòdàn tung htên byoq hkyô jé nhâng bekô râ nghut lhê. ² Byù myo myo gi, haù bâng é ahoq ahí hkyô má cháng kó râ eq, tengmán hkyô lé tai hpoi pyám nhâng kó râ nghut lhê. ³ Sará apyoq haù bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaù zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhí tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraí ming má hkyô pyám luí, tará jéyáng é huí râ hkûn jé shoq, yhangmoq lé tuq tuq chut é dong hkaù má kat tô é nghut lhê. ⁵ Yhang gi, tará a hkunggá é byu pé lé dowui tng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotú nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyám é đông mara dam byi luí, tará a hkungga bâng chyáng dut lò râ hkyô é azông kut tô é nghut ri; ⁷ nghut kôlhang, tará a chùng bâng é achayut asak duí hkyô é yanmai myit wui myit hke huí é, haù dingmán sù Lot lé hkyi htoq yu é nghut ri; ⁸ (hkâsu mù gâ le, dingmán sù haù gi, nyí hkanmó yhangmoq ahkaù má nyi nyi é nghut luí, tará a chùng é muzó hkyô lé, yhang wó myàng wó gyô é yanmai, yhâng é dingmán myit

✠ 1:17 Mht 17:5; Mrk 9:7; Luk 9:35

má gunjâng é hui sũ nghut ri.) ⁹ Haũ su nghut é nghut jáng, Yhumsing gi, tarâ hkunggâ é byu pé lé, wuĩhke hkyô mai hkâsu kut hkyi htoq yũ râ eq, a dıngmãn é bang lé, tarâ jéyáng é buinyi jé shoq, dam byĩ é hkyô lé xoq kut nyi é u má hkâsu kut zuĩ zing to rá lé sê lhê. ¹⁰ Haũ yubak gungshô é htên byoq sê é yut yut ô nau hkyô châng é eq ahko ahkáng lé wũ tiq bâng chyáng, haũ hkyô hkyak dut rá nghut lhê.

Byũ haũ bang gi, ngegáng-htu é eq nghutbũn é bang nghut kôluĩ, mauhkũng bang lé lumũ gansâng rá lé a gyuq kó nghut ri; ¹¹ nghut kôlhâng, maumang lagyô pé lháng gi, wum je bo é eq a-tsam je bo é nghut kôle, haũ Yhumsing é hí má, haũ mauhkũng bang lé mara hun é dõng lumũ gansâng hkyô a wãm kut kó nghut ri. ¹² Nghut kôlhâng, haũ sará apyoq pé gi, yhumsing a sê gyô é hkyô pé lé rhoĩ dang taĩ akô. Yhangmoq gi, haũ chyup yu é hui luĩ, lhoq htên pyãm é hui rá matú za hku lé lo é, nhik a bo é tân jung dusak dõng nghut akô; dusak haũ pé su, yhangmoq le, htên byoq byuq kó rá nghut lhê.

¹³ Yhangmoq gi, nõ shoq kut bekô nghut é yanmai, nõ shoq kut é hui zo kó rá nghut lhê. Yhangmoq é ngón kún nau é myit gi, nyĩ mó káng lé lháng gungsho yut yut ô nau hkyô lhoq dik rá matú nghut ri. Yhangmoq gi, nungmoq eq rahá zoshuq poĩ kut kô é hkũn, mhaũ é lé yhangmoq é ngón hkyô kut kômũ, agè agau é eq achaq achyut é bang nghut akô. ¹⁴ Yhangmoq é myoqjĩ pé má gi, su-myi sulàng lú hkyô bying zan to kômũ, mara kut é hkyô lé hkâ-nhám le a hkying kó nghut ri; yhangmoq gi, a gingting é bang lé mhoq hpyoq yu akô; yhangmoq gi, myoqnoq é hkyô má kũng é bang nghut kômũ, nhing pyãm é hui bang nghut akô. ¹⁵ Yhangmoq gi, haũ dıng é hkyô lé tô pyãm to kômũ, Beora é yhangzo nghut é, agè ashop hkyo é ahpau lé chyitdap sũ Balam é hkyô má châng yõng wún bekô nghut ri. ¹⁶ Nghut kôlhâng, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng haũ gi, byu é htê dõng dang taĩ lò mù, myiqhtoi hpó a gyıng é hkyô lé hkũm tang pyãm ri.

¹⁷ Byũ hau bang gi, wui a bo é wuĩhtung eq, laidũn eq mut tâng ló é hñansoq eq pũng kômũ, yhangmoq é matú gi, tuq tuq chut é mauchut hkaũ lé lajang to bê nghut ri. ¹⁸ Hkâsu mù gâ le, yhangmoq gi, asõm gyáng dang lé taĩ mù, yubak gungshô é yut yut ô nau é hkyô dõng mai, haũ shut shai é hkyô má asak dui nyi é mai asik za hpang htoq lo é bang lé, mhoq hpyoq yu akô nghut ri. ¹⁹ Yhangmoq gi, haũ bang lé luthkyô byi rá gidıq byi kô é nghut kôle, yhangmoq gıng gi, htên byoq hkyô lhoq htoq é gungsho yut yut ô nau hkyo é jũn dut nyi akô; haĩ mù gâ le, byũ rayuq gi, yhumsing lé hai eq up sing le, hai é jũn nghut lhê. ²⁰ Byu pé gi, nga-nhũng é Yhumsing eq hkyi yũ Sũ nghut é Yesuq Hkrisduq lé sê é dõng mai, mingkân é agè ashop hkyô hui wó hpang lut htoq bê nghut kôle, yhangmoq lé hau eq tui yup tô é dum hui luĩ, ung pyãm é hui kô é nghut jáng, yhangmoq é matú, hí lhê htoq má je wui byuq kó rá nghut lhê. ²¹ Haũ dıngmãn é hkyô lé yhangmoq sé luĩ, yhangmoq lé ap byĩ to bê nghut é chyoiyung hkunmó lé tô pyãm to mù lhing taũ lò byuq kô é htoq má, haũ hkyô lé a sê é gi, yhangmoq é matú je gè kó rá nghut lhê. ²² "Hkuĩ gi, yhang hpat tô é lé dum taũ zô lhê." gâ é eq, "Waq gi, chí pyãm byĩ é htâng, yhâng é galhu htum má dum taũ lhũ lhê."* gâ é sanghkyang gi, yhangmoq chyáng dik bê nghut ri.

* 2:22 Sânghkyang 26:11

3

Haù Yhumsing Jé Lé Râ Buinyi

¹ Chyitdap é luzúm wuí ê, shí gi, nungmoq lé ngò í dá nghú rà dà m ká byi kat é laiká nghut lhê. Laiká shí í lhum má, nungmoq é sansêng é i-myt lé lhoq toq rà matú taí pùn kat é laiká nghut lhê. ² Haù gi, chyoyiúng myiqhtoí pé mai lai lò bê hkùn taí tò é dang pé eq, nga-nhúng é Yhumsing eq hkyi yù Sù mai, nungmoq é lagyô pé dông byi to bê nghut é hkunmó lé, ngò, nungmoq lé bun nhâng nau luí nghut lhê.

³ Sâng-hi má, ló htâng é buinyi pé má yhumsing é agè ashop ô nau hkyô má cháng luí taí hpoi bang htoq lô rà nghut é lé, nungmoq sê gyô to ra rà nghut lhê. ⁴ Haù bang gi, "'Dum jé lé rà' ga Yhang gidíq byi é gi, hkámá lú? Nga-nhúng é íchyí íwá pé gi, shi byuq ló bekô nghut mù, jungkhang jungmó gi, mau htoq xâng hkun mai dut é su roq dut nyi ri." ga taí kó rà nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkúng pé joq é eq, myigùng gi, wuí mai dut htoq nhâng mù, wuí dông hpan tò é hkyô lé, a sé gùn kut pyâm akô nghut ri. ⁶ Wuí hau èq sheq, haù hkun lhê é mingkan lé dowuí títng mù, lhoq htên pyâm é nghut lhê. ⁷ Ahkui lhê é mauhkúng pé eq myigùng lé gi, tarâ a hkungga bang htên byoq hui rà nghut é, tarâ jéyâng é buinyi jé shoq, myi má nyhê rà matú, hkunmó hau èq Yhang hkong to bê nghut ri.

⁸ Nghut kôlhang, chyitdap é luzúm wuí ê, haù Yhumsing é hí má, ra-nyí gi, zanwut rahkyíng dông, zanwut rahkyíng gi, ra-nyí dông nghut é hkyô shí lé, hkátô-myhí kó. ⁹ Haù Yhumsing gi, Yhâng é danggidíq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq rà lé a ô nau é yanmai, yuq hkangmó myit lhing rà lé za ô nau mù, nungmoq lé myit hng byi nyi é nghut lhê.

¹⁰ Nghut kôlhang, haù Yhumsing é buinyi gi, hkau sù su a bân nùng má jé rà nghut lhê. Haù buinyi má, mauhkúng pé gi, mying hum htê eq byuq byuq rà nghut lhê; duqbó-gùng pé gi, myí eq lhoq htên pyâm é hui luí, myigùng eq haù má é joq mijoq gi, nyé gyô byuq rà nghut lhê.

¹¹⁻¹² Joq mijoq gi, haù hkyô dông lhoq htên pyâm é hui rà nghut é yanmai, nungmoq gi, hkasú é byu pé dut ra rà lú? Nungmoq gi, haù Garai Gasâng é buinyi lé ho nyi é eq buinyi haù hân za jé rà lé ô nau nyi é hkùn, chyoyiúng é eq tarâ hkunggâ é asak duí hkyô dông nyi ra rà nghut lhê. Buinyi haù gi, mauhkúng pé lé, myí eq lhoq htên pyâm luí, duqbó-gùng pé le, lùm nyé luí, nyé yú pyâm é buinyi dut rà nghut lhê. ¹³ Nghut kôlhang, nga-nhúng gi, Garai é danggidíq nghut é, dingmán hkyô é yhúm, mauhkúng asik eq myigùng asik lé, myoqbyu nyi é bang nghut lhê.

¹⁴ Haù nghut mù luí, chyitdap é luzúm wuí ê, nungmoq gi, haù hkyô lé myoqbyu é bang nghut kó é yanmai, Yhang é hí má acháq achyut a dut é eq mara hún rà hkyô a bo é za, Yhang eq nguínón nyí rà hkyô lé gyai yhang shikut nyi keq. ¹⁵ Nga-nhúng é chyitdap gumang Poluq gi, yhang lé, Garai Gasang byi tò é hpaqchyí byéng-yá èq, nungmoq chyáng ká byi bê eq rajung za, nga-nhúng é Yhumsing é myit hng hkyô gi, hkyi yú hkyô nghut é lé matsing to keq. ¹⁶ Poluq gi, yhang ká é laiká pé banshoq má, haù hkyô pé eq séng luí rajung za ká shít tò ri. Yhang é laiká hkaù pé má, ra-am gi, sê gyo wuí é hkyô pé bo é yanmai, a mhoq wú é bang eq a gingtítng é bang gi, gotú

Chyúmdang pé lé lichyúm htaî lhik pyám kô é su, yhangmoq lichyúm htaî lhik pyám kômù, yhumsing htên byoq hkyô kut yu nyi akô nghut ri.

¹⁷ Haû mù luí, chytđap é luzúm wuí ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyô èq nungmoq lé a wó shuí nghoq yû râ eq, nungmoq é gaû é jowò mai a wó byit gyó byuq sháng gaq, yhumsing gùng yhumsing upzúng nyí keq. ¹⁸ Nga-nhùng é Yhumsing eq hkyi yù Sû nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpungwup shingkaq gi, Yesuq Hkrisduq chyáng, ahkuí le, ahtum abyuq le, ru joq nyí sháng gaq ô! Amen.

YOHAN Hĩ Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé tai kyô kat lhê. ² Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé tai kyô lhê. ³ Ngamoq eq zùm yap é hkyô lé, nungmoq le wó sháng gaq nghù, ngamoq gi, myang wú bê eq wó gyô wú bê hkyô lé, nungmoq lé tai kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô byíng jup sháng gaq nghù, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lhang a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé tai kyô é danglù nghut lhê. ⁶ Nga-nhung gi, Yhang eq zùm yap nyi lhê nghù tai kôlhang, mauchut hkaù má ru sô nyi bum é nghut jáng, nga-nhung gi, mhaù é bang dut mù, haù tengmán hkyô đông asak a dui é bang nghut ri. ⁷ Nghut kôlhang, Yhang gi, maubó má nghut nyi é eq rajung za, nga-nhung le haù maubó má sô nyi é nghut le gi, nga-nhung rayuq eq rayuq zùm yap nyi bê nghut luí, Yhang zo Yesuq é sui gi, nga-nhung é mara banshoq lé lhoq sân-yúng pyám byi rá nghut lhê.

⁸ Mara a bò nghù nga-nhung tai é nghut le gi, yhumsing gùng yhumsing mhaù pyám luí, haù tengmán hkyô gi, nga-nhung chyáng a bò nghut ri. ⁹ Nghut kôlhang, nga-nhung gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhung é mara lé hkyut pyám byi luí, a ding a mán é hkyô banshoq mai le, nga-nhung lé lhoq sân-yúng byi rá nghut lhê. ¹⁰ Nga-nhung gi, mara a kut shut nghù tai é nghut jáng, nga-nhung mai Yhang lé mhaù sù nghù chyo pyâm é nghut luí, Yhâng é mungdang gi, nga-nhung má a bò nghut ri.

2

Hkrisduq Gi, Nga-nhung Lé Garúm Sù

¹ Ngò chytidap é zo wui ê, ngò gi, nungmoq mara a kut shut kó sháng gaq nghù, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhung é matú haù Íwâ chyáng bo tai xoq byí é, Yesuq Hkrisduq gâ é Dingmán Sù lé, nga-nhung wó lhê. ² Yhang gi, nga-nhung é yubak marâ é matú, shíhtai gunglik hkungga nghut nyi ri. Nga-nhung é yubak marâ é matú baú za a nghut, mingkan gón mã é byu pè é yubak marâ é matú le nghut nyi ri.

³ Nga-nhung gi, Yhang hkyô tô é hkunmó pé lé châng kut é nghut jáng, Yhang lé nga-nhung rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sê lhê." ga tai kôlhang, Yhang hkyô

tô é hkunmó lé a châng kut é nghut jáng, haú yuq gi, byù mhaú nghut luí, tengmán hkyô gi, yhang má a bò nghut ri. ⁵ Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haú yuq má gè gè byíng jup bê nghut ri. ⁶ Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haú hkun sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wuí ê, ngò gi, nungmoq lé hkunmó asik ká byí kat é a nghut é za, haú sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸ Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haú mauchut gi, laí ló byuq luí, haú tengmán é maubó gi, duq nyi gù bê nghut ri.

⁹ Ngò gi, maubó hkaú má nghut nyi lhê ga luí, yhumsing é gumang lé a jú é sù ó yuq nghut kôlhang, haú mauchut hkaú má ru nghut nyi ashí. ¹⁰ Yhumsing é gumang lé chyitdap é sù ó yuq nghut kôlhang, haú maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri.

¹¹ Nghut kôlhang, yhumsing é gumang lé a jú é sù kúm gi, haú mauchut hkaú má nghut nyí luí, haú má sô lhing jón wún ri; haú mauchut gi, yhang lé myoq lhoq chit to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuí ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kâ kat é nghut lhê.

¹³ Íwâ pé ê, nungmoq gi, haú sâng-hi mai nyi é Sù lé sé bekô nghut é yanmai, nungmoq lé ngò kâ kat é nghut lhê.

Zorâm wuí ê, nungmoq gi, haú agè ashop sù lé ùng pyám bekô nghut é yanmai, nungmoq lé ngò kâ kat é nghut lhê.

Chyitdap é zo wuí ê, nungmoq gi, haú Íwâ lé sé bekô nghut é yanmai, nungmoq lé ngò kâ kat é nghut lhê.

¹⁴ Íwâ pé ê, nungmoq gi, haú sâng-hi mai nyi é sù lé sé bekô nghut é yanmai, nungmoq lé ngò kâ kat é nghut lhê.

Zorâm wuí ê, nungmoq gi, wum-o bo é eq, haú Garai Gasâng é mungdang nungmoq chyáng dui nyi é nghut mù, haú agè ashop sù lé ung pyám bekô nghut é yanmai, nungmoq lé ngò kâ kat é nghut lhê.

Míngkan Lé A Chyitdap Râ Hkyô

¹⁵ Míngkan eq míngkan htoq mâ é haí le lé, hkâchyitdap kó. Byù rayuq yuq, míngkan lé chyitdap é nghut le gi, haú Íwâ lé chyitdap é myit, yhâng chyáng a bò nghut ri. ¹⁶ Hkâsu mù gâ le, míngkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haú gi, Íwâ chyáng mai htoq lo é a nghut, haú míngkan mai htoq lo é ru nghut lhê. ¹⁷ Míngkan eq míngkan ô nau hkyô pé gi, laí ló byuq râ nghut lhê; nghut kôlhang, haú Garai Gasang ô nau é hkyô lé kut é sù gi, ahtum abyuq dui nyi râ nghut lhê.

18 Chyitdap é zo wui ê, shî gi, lô htâng é ahkyíng nghut bê; haù anti-hkrisduq* gi, lé lo nyi ri gà é lé, nungmoq wó gyô wú bê eq rajung za, ahkuí lháng, anti-hkrisduq myo myo gi, jé lé bekô nghut ri. Hau é yanmai, nga-nhúng gi, lô htâng é ahkyíng nghut bê hkyô lé wó sé bê nghut ri. 19 Yhangmoq gi, nga-nhúng é hpúng mai htoq lô byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gà le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlháng, yhangmoq htoq lô byuq bekô nghut é yanmai, yhangmoq rayuq lháng nga-nhúng eq a sêng é hkyô lé tân shit bê nghut ri.

20 Nghut kôlháng, nungmoq gi, haù Chyoiyúng Sû mai xú but byí é hui† bekô nghut mù luí, nungmoq banshoq bang haù tengmán hkyô lé sê akô nghut ri. 21 Haù tengmán hkyô lé nungmoq a sé kôluí, nungmoq lé ngò kâ kat é a nghut; haù hkyô lé nungmoq sé gù nghut luí le, haù mhaù é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kâ kat é nghut lhê. 22 Mhaù é sù gi, ó yuq nghut lhê lú? Haù Yesuq gi, Hkrisduq a nghut ga he pyâm é sù nghut ri. Haù Íwa eq Yhangzo lé he-ngik é sù gi, anti-hkrisduq yhang nghut nyi ri. 23 Haù Yhangzo lé he-ngik sù ó yuq nghut kôle, haù Íwa lé sé sù a nghut. Haù Yhangzo lé hap yu é sù kúm gi, haù Íwa lé le sé bê sù nghut lhê.

24 Haù sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haù nghut jáng, nungmoq gi, haù Yhangzo eq Íwâ chyáng nyi nyi râ nghut lhê. 25 Haù gi, nga-nhúng lé Yhang byí tô é ahtum abyuq é asak wó yú râ gà é danggidig nghut ri.

26 Ngò gi, nungmoq lé hkyô shuí nheoq shikut nyi bâng é hkyô eq séng luí, nungmoq lé shí gù kâ kat é nghut lhê. 27 Nungmoq chyáng kúm gi, Yhâng chyáng mai xú but jeju lé nungmoq wó yù bekô nghut mù luí, mhoqshit râ góyuq a ra lo nghut ri. Nghut kôlháng, haù Yhâng é xú but jeju gi, hkyô hkanmó má nungmoq lé mhoqshit byi mù, haù gi, tengmán nyi é nghut luí, mhaù é hkyô hai le a bo é za, nungmoq lé mhoqshit byí nyi é eq rajung za, Yhâng chyáng nungmoq nyi nyi keq.

28 Chyitdap é zo wui ê, nga-nhúng gi, Yhang jé lé mù htoq shit é hkùn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi keq.

29 Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

3

Garai Gasâng É Yhangzô Pé

1 Nga-nhúng gi, haù Garai Gasâng é yhangzô pé ga wut râ hui bê nghut é yanmai, haù Íwâ é chyitdap myit gi, nga-nhúng ahtaq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Míngkan gi, Yhang lé a sê é yanmai, nga-nhúng lé le a sé nghut ri. 2 Chyitdap é luzúm wui ê, ahkuí, nga-nhúng gi, Garai Gasâng é yhangzô pé nghut nyi to kôlháng, nga-nhúng hkâsu dut râ hkyô lé, a tân shit shi nghut ri. Nghut kôlháng,

* 2:18 Anti-hkrisduq ngù é lichyúm gi, Hkrisduq lé gyè kut é sù lé gà lhê † 2:20 Xú but byí é hui gà é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gà lhê.

Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê. ³ Myit myoqbyù hkyô shî lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu lai é sù nghut ri; gè gè ga jang, mara gi, tarâ lu lai é hkyô nghut nyi ri. ⁵ Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sê shi nghut ri.

⁷ Chyitdap é zo wui ê, nungmoq lé ó yuq eq le hkyô a shui nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng má é nghut nyi ri; hkâsu mù gâ le, Tsadán haù gi, sân-hi mai yhang mara kut nyi bê nghut ri. Haù Garai Gasâng é Yhangzô gi, Tsadán é muzô lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzô a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gâ é hkyô haù gi, sân-hi mai nungmoq wó gyô yù bê danglù nghut ri. ¹² Haù agè ashop sù eq le sêng é, yhanggu lé sat pyâm é Ka-in su a ge kut. Yhang gi, haù mù luí yhanggu lé sat pyâm lhê lhú ga le, yhâng é muzô pé gi, agè ashop hkyô, yhanggù é muzô pé gi, dingmán é hkyô nghut é yanmai nghut ri. ✧ ¹³ Ngá é gumang wui ê, nungmoq lé mingkân eq a ngui a jú kut kôlhang, hkâmau kó. ¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashî nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byi pyám bê lé wú jáng, chyitdap myit hkasû é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byi pyám gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò râ lhú? ¹⁸ Chyitdap é zo wui ê, nga-nhúng gi, dang nhut shô mai za a nghut, muzô eq tengmán é đông le chyitdap nyi sháng. ¹⁹ Haù hkûn, nga-nhúng gi, tengmán hkyô eq sêng bê bang nghut é lé wó sê é eq, nga-nhúng é i-myit mai nga-nhúng lé mara hun lò hkangmó, Garai Gasâng é hí má nga-nhúng i-myit wó ngón nyi bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wuí ê, nga-nhúng é i-myit mai nga-nhúng lé mara a hun é nghut le gi, Garai Gasâng hí má nga-nhúng gyuq kyúm rà hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô hải lé le kut é yanmai, nga-nhúng dúng é hkyô lhunglhang lé, Yhâng chyáng mai wó yú rà nghut lhê. ²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjúng é eq, rayuq eq rayuq chyitdap lhùm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bang chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byi tô é Woi-nyí dồng nga-nhúng wó sê yu é nghut lhê.

4

Woi-nyí Pé Lé Gôn Wú Râ Hkyô

¹ Chyitdap é luzúm wuí ê, woi-nyí hkangmó lé hkâlumjúng ko, woi-nyí haú pé gi, Garai Gasâng chyáng mã é nghut é, a nghut e lé gôn wú keg; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yú rà hkyô gi, shí dồng nghut lhê: haú Yesuq Hkrisduq gi, gungsho dồng jé lé bê ga, yin yu é woi-nyí hkangmó gi, Garai Gasâng chyáng mã é nghut lhê. ³ Nghut kôlhang, Yesuq Hkrisduq lé a yin yu é woi-nyí hkangmó gi, Garai Gasâng chyáng mã é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri. ⁴ Chyitdap é zo wuí ê, nungmoq gi, Garai Gasâng chyáng mã é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. ⁵ Yhangmoq gi, mingkan eq sêng é bang nghut lhê mù luí, mingkan hkyam dồng tai bum akô; mingkan zo wuí le yhangmoq é dang lé gyo byi akô nghut ri. ⁶ Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yú bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai Gasâng chyáng mã é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tún shít é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak mará é matú, shíhtai gunglik hkungga dut sháng gaq ga, Yhang Zo lé nhang kat byi é nghut ri; haú gi, chyitdap myit yhang nghut bê. ¹¹ Chyitdap é luzúm wuí ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhùm rà dut lhê. ¹² Garai Gasang lé ó yuq eq le, hkâ-nhám lhang myang wú é a nghut; nghut kôlhang, nga-nhúng

rayuq eq rayuq chyitdap lhùm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup rá nghut lhê.

¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. ¹⁴ Haú Íwa gi, Yhang Zo lé mingkân é hkyí yú Sù dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵ Ó yuq nghut kôlháng, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê nghut ri. ¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé luí lumjúng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luí, Garai Gasang le háu yuq má nyi nyi bê nghut ri. ¹⁷ Haú đông mai, chyitdap myit gi, nga-nhúng chyáng gumjup bê nghut luí, nga-nhúng gi, tará jéyáng é buinyi má a gyuq a kyum é myit wó yú rá nghut lhê; hkâsu mù gâ le, nga-nhúng gi, mingkân shí má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga táí kôlháng, yhâng é gumang lé a jú é nghut jáng, háu yuq gi, byù mhaú rayuq nghut ri; hkâsu mù gâ le, yhumsing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap rá a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap rá lhê gâ é dang haú gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjúng Hkyô

¹ Yesuq gi, háu Hkrisduq nghut ri ga lumjúng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wôlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkân lé ung pyâm bê nghut ri. Nga-nhúng é lumjúng myit gi, mingkân lé nga-nhúng ung pyâm é ongdang hkyô nghut ri. ⁵ Yesuq gi, Garai Gasâng é Yhangzo nghut é lé lumjúng é sù mai lai luí, mingkân lé wó ung pyâm é sù gi, ó yuq wá nghut lhê thú?

⁶ Háu yuq gi, wui eq sui* mai lé é sù, Yesuq Hkrisduq yhang nghut nyi ri. Yhang gi, wui mai za lé é a nghut, wui mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wui le, sui le, háu sùm lhùm é saksé hkâm akò nghut ri; ⁸ háu sùm lhum gi, rajung za nghut akò. ⁹ Nga-nhúng gi, byu é saksé lé lhom

* 5:6 Wui eq sui nghu é gi, Yesuq baptisma hkam yu é hkyô eq shí hkâm é hkyô lé táí nau é nghut ri.

yu lhê; nghut kôlhang, Garai Gasâng é saksé gi, haù htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byi é yanmai nghut ri. ¹⁰ Garai Gasâng é Yhangzo lé lumjîng é sù gi, saksé haù lé yhâng é i-myt má wó bê nghut ri; Garai Gasang lé a lumjîng é sù kúm gi, Yhang lé byù mhaù rayuq ga chyô pyâm bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjîng é yanmai nghut ri. ¹¹ Nga-nhúng lé, Garai Gasang byi é ahtum abyuq é asak gi, saksé haù nghut nyi ri. Asak haù gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haù lé wó bê; Yhang Zo lé a wó sù gi, asak haù lé le a wó nghut ri.

Ahtum Abyuq Asak

¹³ Garai Gasang é Yhangzô é myîng lé lumjîng é bang nungmoq gi, ahtum abyuq é asak wó bê hkyô lé, nungmoq sé kô sháng gaq nghù, shí hkyô pé lé ngò ká byi kat é nghut lhê. ¹⁴ Nga-nhúng hai dúng le le, Garai Gasang ô nau é dông nghut jáng gi, Yhang gyo byi râ nghut lhê; haù gi, Yhâng é hí má nga-nhúng a gyoq a kyum wó wâng râ matú nghut ri. ¹⁵ Haù mù, nga-nhúng hai dung kôlhang, Yhang gyo byi é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haù yuq é matú kyúdung byi râ lhê. Haù hkûn, Garai Gasang gi, haù yuq lé asak byi râ nghut lhê. Haù gi, shí a gíng é mara wó bâng é matú taí é nghut lhê. Shí gíng é mara le joq lhê; nghut kôlhang, hau é matú dung râ lhê nghù, ngò taí nyi é a nghut. ¹⁷ A dingmán é hkyô lunglhang gi, mara nghut lhê; nghut kôlhang, shí a gíng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haù Garai Gasâng é Yhangzo gi, haù yuq lé wú zúng nyi é nghut mù luí, haù agè ashop sù gi, haù yuq lé wó záng htung râ a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haù agè ashop su eq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luí, haù tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haù tengmán Sù má le nyi nyi bê nghut lhê. Yhang gi, haù tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuí ê, hparà lóhó pé lé koi pyâm nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ² nga-nhúng eq ahtum abyuq ru joq nyí râ nghut é tengmán hkyo é yanmai, haú tengmán hkyô lé sê é lhunglhâng bang le, nungmoq lé chyitdap nyi lhê.

³ Haú Íwa Garai Gasang eq Íwá é Yhangzo Yesuq Hkrisduq chyáng mã é jeju, shogyo nhikmyin hkyô eq nguóngón hkyô gi, haú tengmán hkyô eq chyitdap hkyô má, nga-nhúng eq rahá joq nyí sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô má châng nyi é hkyô lé, ngò wó sê é yanmai, gyaí yhang gabú nyi lhê. ⁵ Chyitdap é hpô-myhí é, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhóm a nghut. ⁶ Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mینگkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê.

⁸ Nungmoq zui saí bê muzó é akyú lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq. ⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má hkâwâng nhâng kó; yhang lé hkálhom xoq yù kó.

¹¹ Hkâsu mù gâ le, haú yuq lé lhom xoq yu é sù gi, yhâng é agé ashop é muzó má lóm bê sù nghut ri.

¹² Ngò gi, nungmoq lé ká byí kat râ hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyùm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN

Súm Dam Dàm Hun Kat é Laiká (3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyi-ngón yuqyo nyi é eq rajung za, nàng nguóngón wángzán rà eq hkyô hkat hkangmó má, nyi-ngón yuqyo nyi sháng gaq nghù, kyúdung byí kat lhê. ³ Hkâsu mù gà le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé tai kyo kô é hkùn, gyai yhang gabú é yanmai nghut lhê. ⁴ Haù tengmán hkyô má, ngá zô pé châng nyi é hkyô lé, ngò wó gyô é hkùn gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haù noqkuq hpúng má é bang lé, náng é chyitdap myit eq séng luí tai kyo bekô nghut ri. Nàng gi, Garai Gasâng hí má gingdán é đông, yhangmoq é hkyowui matú garúm luí, dé kat é nghut jáng, ge é muzó jízó kut é nghut bê. ⁷ Hkâsu mù gà le, yhangmoq gi, Hkrisduq é mying hau é matú htoq ló kôluí, a lumjing bâng chyáng mai hai lhang a hap yù kó nghut ri. ⁸ Haù mù luí, nga-nhúng gi, haù tengmán hkyô é matú rahá za wó chôm zui saí sháng gaq, haù sù é byu pé lé lhom hkúlum yù rà lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haù mù luí, ngò lé jé jáng gi, ngamoq lé a jo a âng é dang tai é eq lumù gansang é, yhang kut é muzó lé, tai hpyí kyo rà nghut lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkúlum yù, lhom hkúlum yù nau bang lé le, yhang mai hkùm zing pyám luí, yhangmoq lé haù noqkuq hpúng mai hkat htoq pyâm ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shí é sù nghut ri. ¹² Demetri ge é hkyô lé, yuq hkangmó mai le, haù tengmán hkyô eq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé ká kat ra hkyô myo myo joq kôlhang, kâjung eq kâjung-chi đông a ká kat nau lo. ¹⁴ Ngò gi, a myáng má, nàng eq myang hui lhum rà lé myit myoqbyu tô lhê. Haù hkùn sheq, ngá-nhik myoqdong hkyûm myang nyo lhum rà nghut lhê.

¹⁵ Nàng nguóngón yuqyo nyi sháng gaq; shí má é luzúm wui gi, nang lé shi-kyâm kat akô nghut ri. Nàng le, haù má é luzúm wui lé, mying du htau luí bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chytidap é hui luí, Yesuq Hkrisduq èq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chytidap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

³ Chytidap é luzúm wuí ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjing hkyo é matú nungmoq htuoq htíng rã dut é lé, myit wum byi rã hkyô ká rã dut é lé, ngò byu-myang ri. ⁴ Hkásu mù gã le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglhang wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé tai pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhang, a lumjing é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyì jowò lé pyám tô é maumâng pé lé, Yhang gi, haù tará jéyáng é hui rã Buinyi mó jé shoq, ahtum abyuq é toqjâng tui èq tui luí, mauchut hkaù má lhùng tô é nghut lhê. ⁷ Haù eq rajung za, Sodom eq Gomoraq myuq eq hau é awui ayám mã é wá pé mã é bang gi, ashop é dōng gungsho zùm yap é hkyô shut é eq myiwe yhangchang yuqgè yhangchang nyì zô lhúm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkung bang lé lumù gansang akô nghut ri. ⁹ Nghut kôlhang, haù maumang lagyo agyì Mihkaelaq lhang gi, Mosheq é gùng eq séng luí, haù nat zau eq dang rhang lhúm é hkún, yhang lé rhoi é dōng mara hún dang a wám tai é za, "Nang lé, haù Yhumsíng nhik-yo sháng gaq!" ga za tai ri. ¹⁰ Nghut kôlhang, byù haù bang gi, yhangmoq a sê gyô é hkyô pé lé rhoi dang tai pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lhang, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó rã! Hkásu mù gã le, yhangmoq gi, Ka-in* kut é agè ashop é hkyô dōng cháng kô é yanmai le, akýù wó rã matú, Balam† shut

* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35

é đông bo shut kô é yanmai le, Kora† é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chyitdap zoshuq pôi má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkùn, yhumsing gùng lé za yhumsing lhoq gyi yu é sau zúng bang nghut akô; yhangmoq gi, lai éq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám lui, í dâm shi é, xung nám lhê é sigâm pé su nghut akô. ¹³ Yhangmoq gi, yhumsing é hoq jung lé, tsù-myup su htoq nhang é, haù wuimau má é kô é wuilhêng pé eq, tuq tuq chut é mauchut hkaù má tarâ jéyáng hui rà matú, ahtum abyuq tó to hui é, yông wún é kyí pé su nghut akô.

¹⁴ Byù haù bang eq séng lui, Adam mai byùxik nyhit xik má nyi é Eruk, myiqhtoi htoi tó é gi, "Wú keq, haù Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkgangmó lé tarâ jéyáng rà matú eq, haù tarâ a hkunggá é lhunglhâng bang, tarâ a hkunggá é đông kut é muzó pé banshoq lé le, tarâ a hkunggá é yubak byu pé, Yhang lé tai shut é dang htân pé banshoq lé le, mara byi rà matú nghut lhê." gá ri. ¹⁶ Byù haù bang gi, put dang tai é bang eq mara hùn dang tai é bang nghut akô; yhangmoq gi, yhumsing ô nau é agé ashop hkyô cháng kô é htoq agó, yhumsing gùng yhumsing nghutbùn é dang tai é eq yhumsing maiwáng zat é đông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wui é, nungmoq gi, haù nga-nhùng é Yhumsing Yesuq Hkrisduq é lagyô pé mai te tai tó é dang lé, bùn nyi keq. ¹⁸ Hkâsu mù gá le, yhangmoq gi, "Haù ló htâng é ahkying pé má, tarâ a hkunggá é yhumsing ô nau é hkyô đông châng é, rhoijap-dap dang tai é byu pé nyi to rà nghut lhê." ga, nungmoq lé tai wú kô é nghut lhê. ¹⁹ Byù haù bang gi, nungmoq lé gam hkoq é bang, mینگan hkyô lé baù za châng é bang, haù Woi-nyí a bo é bang nghut akô.

²⁰ Nghut kôlhang, ngò chyitdap é luzúm wui é, nungmoq gi, haù Chyoiyúng Woi-nyí má kyúđung é đông, nungmoq é chyoiyúng é lumjینگ hkyô má, yhumsing gùng yhumsing lhoq kô yu nyi keq. ²¹ Ahtum abyuq é asak lé wó yù rà matú, haù nga-nhùng é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjینگ hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yù mù, hkyi yù keq; dum, góbang lé gi, sidiq myit èq shogyo nhikmyin hkyô tũn shit mù, haù gungshô é achay achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng lui, nungmoq lé, mara hùn rà hkyô a bo é za, gabú dik é đông mai Yhang é hpungwup shینگkang bo é myoq hí má wó shui shit é, nga-nhùng é hkyi yù Sù, rayuq za nghut é Garai Gasâng chyáng, hpungwup shینگkang, hkikhkam hkyô, hpungwup a-tsam eq ahkáng ayá gi, nga-nhùng é Yhumsing Yesuq Hkrisduq đông mai, lai lò bé

† **1:11** Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tún shit nhâng râ matú, Garai Gasâng eq Yesuq Hkrisduq Yhang lé byí tô é nghut lhê. Yhang gi, Yhâng é maumang lagyo lé nhang kat lui, Yhâng é dui-nhâng zoshâng Yohan lé, shing-rán haù sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. ³ Haù ahkying gi, chyáng lò bê nghut é yanmai, myiqhtoi dang shí pé lé, nghap kyô é sù eq, gyô yù lui, haù má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau má é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí má é nyhit woi-nyí chyáng mai le, ⁵ lhumzui é saksé nghut sù, shi byuq é mai sâng-hi dui toq é zomún dut sù, myidàm htoq má é hkohkam pé lé up sù, Yesuq Hkrisduq chyáng mai le, jeju eq nguóngón hkyô gi, nungmoq chyáng joq nyí sháng gaq.

Nga-nhúng lé chyitdap lui, Yhâng é suí eq, nga-nhúng lé, nga-nhúng é mara pé mai lhoq lhut byí é eq, ⁶ Yhâng é Garai Gasang eq Iwa lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shing kang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut lui, myoqjí hkangmó gi, Yhang lé myàng kó râ nghut lhê;

haù Yhang lé htaù rot bang† lháng, myàng kó râ nghut lhê;

haù myidàm htoq má é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haù đông nghut sháng gaq! Amen.

⁸ "Ngò gi, Alpha eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haù Yhumsing Garai Gasang tai ri.

Byu Yhangso Su Dut Su É Hkyô

⁹ Yesuq é, wuihke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê. ¹⁰ Haù Yhumsing é Buinyi§ má, ngò gi, Woi-nyí eq shuí moq byuq lò é nghut mù, "Nâng myang é eq rajung za, chyúmding ralhú má ká

* **1:6** Htoq Ló 19:6 † **1:7** Htaù rot bang gâ é gi, Yesuq tapzĩng má jén to huí é hkùn, Yhâng é namcham má lham eq htaù é bang lé gâ lhê. ‡ **1:8** Alpha eq Omega gi, Grik laiká myhí má é sâng-hi cham eq ló htàng cham nghut lhê; haù tai nau é gi, rû dui nyi sù gâ é nghut lhê. § **1:10** Yhumsing é Buinyi gâ é gi, yuban nyí lé gâ lhê.

luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhùm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haù ngo lé nyo nyi é htê yhumsing lé wú rã matú, ngò, gùng lhing kat é nghut lhê. Ngò gi, gùng lhing kat é hkùn, hìng myi-kok tsungjang nyhit lhum lé le, ¹³ myi-kok tsungjang haù pé é agùng má, byu yhangzo su dut é Sù rayuq nyi tô é lé le, myang kat ri; haù yuq gi, hkyigoq htoq jé é buhìng wut to luí, wànggàng má hìng wànggò le wut tô ri. ¹⁴ Yhâng é ulhum eq xâm gi, sau hpyù maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyí gi, myi bungghkyúng má jên yu é jet é gyi su dut ri; Yhâng é htê gi, wui myo myo mying hùm é htê su gâ ri. ¹⁶ Yhâng é loqyo loq má gi, kyí nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gùng bui su tso nyi ri.

¹⁷ Yhang lé myang é hkùn, ngò gi, shí gùng su, Yhâng é hkyí wang má lêng leq tô é nghut lhê. Haù hkùn, Yhang gi, Yhâng é loqyo loq ngá ahtoaq má ke byi mù, taí é gi, "Hkâgyuq, Ngò gi, Sâng-hi eq Jìhtùm nghut lhê. ¹⁸ Ngò gi, dui nyi Sù le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq moming é zoqshi pé lé chùng Su nghut lhê.

¹⁹ Haù mù, nàng myang é lé le, ahkui dut é hkyô eq htàngnùng le dut lò rá hkyô lé le, kã to aq. ²⁰ Nàng myang é, Ngá é loqyo loq má é kyí nyhit cham eq hìng myi-kok tsungjang nyhit lhùm é záu tô é hkyô é lichyúm gi, isu nghut lhê. Kyí nyhit cham gi, noqkuq hpúng nyhit lhùm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

Ehpesu Myuq Mã É Noqkuq Hpúng Lé Kã Kat É Laiká

¹ Ehpesu myuq mã é noqkuq hpúng é maumang lagyo lé isu nghù kã kat aq: Haù yhâng é loqyo loq má kyí nyhit cham chùng luí, hìng myi-kok tsungjang nyhit lhùm é gyoro má sô nyi Su é dang gi, ² 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haù lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá mying é yanmai, wuìhke hkyô lé hkam jan bê nghut kôle, ngú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hùn rá hkyô joq ri. ⁵ Nàng hká mai byit gyó é lé, myit bun aq! Myit lhing luí, sâng-hi nàng kut é muzó pé lé, kut aq. Nàng myit a lhing é nghut jáng, ngò, náng chyáng lé jé mù, náng é myi-kok tsungjang lé, hau é jowò mà huí pyâm byi rá nghut lhê. ⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhùm bo ashí nghut ri.

⁷ Gyo rá nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haù Garai Gasâng é hparadisu má joq é asak sigâm mã é ashí zo rá ahkáng, Ngò byi rá nghut lhê.' gâ ri.

Samurna Myuq Mã É Noqkuq Hpúng Lé Kã Kat É Laiká

⁸ Samurna myuq mâ é noqkuq hpûng é maumang lagyo lé isu nghû kê kat aq:

Haû Sâng-hi eq Jihtûm nghut é eq, shi byuq luí, asak dum dui Su é dang gi, ⁹ 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byu nghut lhê gâ é bang tai hpoi é hkyô lé le, Ngò sê lhê. ¹⁰ Nàng hui zo râ nghut é wuîhke hkyô lé, hkâgyuq. Ngò, nungmoq lé tai kyo kôlé, haû nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-ri é hui zo kó râ nghut lhê. Shí shoq lhumzui nyi aq, haû hkgin, Ngò, nang lé, asak janmau byi râ nghut lhê.

¹¹ Gyo râ nohkyap dap sù gi, haû Woi-nyí mai noqkuq hpûng pé lé tai é hkyô lé, gyô yù sháng gaq. Í dâm nghû râ shi é hkyô* gi, wó ung é sù lé, wó záng htung râ a nghut.' gâ ri.

Pergamu Myuq Mâ É Noqkuq Hpûng Lé Kê Kat É Laiká

¹² Pergamu myuq mâ é noqkuq hpûng é maumang lagyo lé isu nghû kê kat aq:

Haû shamsó í shut dap é shâm wó Su é dang gi, ¹³ 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzui é saksé hpó Antipa sat hui é hkûn lhang, nàng Ngo lé lumjíng é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hûn râ hkyô ratsui joq ashí; hkâsu mù gâ le, hparà lhô pé lé tîng byi é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyí, Balak lé mhoq byi é Balam é mhoqshit hkyô lé myhik zing é byu pé, náng chyáng nyi ri. ¹⁵ Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haû mù luí, myit lhíng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham eq yhangmoq lé zan râ nghut lhê.

¹⁷ Gyo râ nohkyap dap sù gi, haû Woi-nyí mai noqkuq hpûng pé lé tai é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kê tô é luqgok hpyù racham lé le, Ngò byi râ nghut lhê, lhom hap yu é sù za sheq, myíng haû lé sé râ nghut lhê.' gâ ri.

Htuatira Myuq Mâ É Noqkuq Hpûng Lé Kê Kat É Laiká

¹⁸ Htuatira myuq mâ é noqkuq hpûng é maumang lagyo lé isu nghû kê kat aq:

Haû myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi, ¹⁹ 'Náng é a-kyang, chyitdap myit, lumjíng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui sai é hkyô lé le, Ngò sê lhê.

²⁰ Nghut kôlhang, yhumsing gùng yhumsing myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wui lé, ashop é dông gungsho zùm yap râ eq hparà lhô pé lé tîng byi é zoshuq zo râ hkyô lé mhoqshit luí, yhangmoq lé hkyô shuí nghoq ri. ²¹ Ngò gi, yhang lé, ashop é

* 2:11 Í dâm nghû râ shi é hkyô gâ é gi, ngaraí ming wang é lé gâ lhê.

dông gungsho zùm yap é hkyô mai myit lhîng râ ahkyíng byi kôlhang, yhang gi, a myit lhîng naù nghut ri. ²² Haù mù, Ngò gi, yhang lé, jamjau hui râ yhupchong má dú lhez pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haù hkún, Ngò gi, myit nhikhlum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haù noqkuq hpûng pé banshoq wó sé kó râ nghut lhê. ²⁴ Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yú é, Htuatira myuq má myit gyó tô é bang nungmoq lé, Ngò tai kôlé, nungmoq lé gotû wôlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jiltúm jé shoq châng é sù lé gi,

"Yhang gi, yhangmoq lé, shamtoq dumbáng eq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."[☩]

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haù bó-myhû byi râ nghut lhê. ²⁹ Gyo râ nohkyap dap sù gi, haù Woi-nyí mai noqkuq hpûng pé lé tai é hkyô lé, gyô yù sháng gaq.' gâ ri.

3

Sardi Myuq Mã É Noqkuq Hpûng Lé Kâ Kat É Laiká

¹ Sardi myuq mã é noqkuq hpûng é maumang lagyo lé isu nghû kâ kat aq:

Haù Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyí sù ga kôlhang, shi byuq sù nghut ri. ² Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³ Haù mù, nàng hkâsu kut wó hap yu é eq wó gyó yu é hkyô lé, myit bun aq; haù dông cháng luí, myit lhîng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôlhang, Sardi myuq mã, yhumsing é mebu lé agot a-û a kut é byù ra-am nyi akò. Haù bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akò. ⁵ Wó ung é sù gi, haù bang su, hpyu é mebu myang wut râ nghut lhê. Ngò gi, haù yuq é myíng lé, hká-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pé é hí má le, haù yuq é myíng lé, Ngò yín yû râ nghut lhê. ⁶ Gyo râ nohkyap dap sù gi, haù Woi-nyí mai noqkuq hpûng pé lé tai é hkyô lé, gyô yù sháng gaq.' gâ ri.

Hpiladehpi Myuq Mã É Noqkuq Hpûng Lé Kâ Kat É Laiká

⁷ Hpiladehpi myuq mã é noqkuq hpûng é maumang lagyo lé isu nghû kâ kat aq:

Haù chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhí é Su é dang gi, ⁸ 'Nàng kut é muzó pé lé, Ngò sê lhê. Wú aq, ó yuq le a wó myhí

† 2:26-27 Shamtoq dumbáng eq up gâ é gi, ahko ahkáng banshoq wó luí, up é lé gâ lhê. ☩ 2:26-27 Hkya-on 2:9

é hkum ralhum, Ngò náng hí má hpông to byí lhê. Nàng gi, wum-o ratsui za bò kôlhang, Ngá é dang gyo lui, Ngá é mying lé a he-ngik pyâm é hkyô lé, Ngò sê lhê. ⁹ Haú tarajong má noqkuq kôlhang, Tsadán lé dojaú bang nghut é, Yudaq byú a nghut kôlhang, nghut lhê gá é byú mhaú pé lé, Ngò, náng é hkyí wang má, lé paí gop nhâng lui, Ngò, náng lé chyitdap é hkyô, yhangmoq lé sé nhâng rá nghut lhê. ¹⁰ Nàng gi, myit hîng hkam jan rá é Ngá é hkunmó lé châng nyí bê nghut é yanmai, myidàm htoq má nyí é bang lé chyam lik wú rá matú, mingkan gón má jé rá nghut é wuîhke jamjau ahkyíng mai, Ngò, náng lé lhoq lhut yú rá nghut lhê.

¹¹ Ngò gi, a myáng má jé lô rá nghut lhê. Náng é janmaú lé, ó yuq eq le a wó yu pyâm byi sháng gaq, náng wó tô é pé lé myhik zing nyí aq. ¹² Wó ung é sù lé gi, Ngá é Garai Gasâng é noqkuq yhùm mà é hkungzing mó dut nhâng rá nghut lhê. Haú yuq gi, hkâ-nhám le haú mai dum htoq lô rá a nghut. Ngò gi, Ngá é Garai Gasâng é mying lé le, Ngá é Garai Gasâng chyáng mai htoq lui, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq mying lé le, Ngá é mying sik lé le, yhâng chyáng kâ tap byi rá nghut lhê. ¹³ Gyo rá nohkyap dap sù gi, haú Woi-nyí mai noqkuq hpûng pé lé tai é hkyô lé, gyô yù sháng gaq.' gá ri.

Ladoki Myuq Mâ É Noqkuq Hpûng Lé Kâ Kat É Laiká

¹⁴ Ladoki wà mó mà é noqkuq hpûng é maumang lagyo lé isu nghû kâ kat aq: Haú lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ Ngò gi, náng kut é muzó lé sê lhê; náng gi, gú le a nghut, nye le a nghut dut ri. Náng gi, gú jáng jáng gi, nye jáng jáng nye dut rá lé, Ngò ô nau ri. ¹⁶ Nghut kôlhang, náng gi, gú le a nghut, nye lé a nghut, lumnye nghut é yanmai, Ngò gi, náng lé, Ngá é nhut mai byé htoq pyâm rá za nghut bê. ¹⁷ "Ngò gi, wó sù nghut lhê; ngò gi, sutzè gyai wó bê nghut lui, haí lháng a ra lo." ga náng tai ri. Nghut kôlhang, náng gi, wuîhke jamjau hui sù, asho awui dut sù, myùng sù, myoqjit sù eq achîn dut sù nghut é lé, náng a sé myhi-nhung. ¹⁸ Haú mù lui, náng gi, wó sù sùt sù wó dut sháng gaq, myi má jên yu é hîng lé le, náng achîn dut é hoq hpu hkyô lé, wó nghop pyâm sháng gaq, wut rá matú, mebu hpyú lé le, náng myoq wó myâng sháng gaq, náng é myoqjí má kat rá matú, myoq chi lé le, náng, Ngá chyáng mai wui yú rá matú, Ngò, náng lé hpaqchyí byí lhê.

¹⁹ Ngò chyitdap é bang lé gi, tan lui, mhoqshit lhê. Haú mù, náng gi, hân bûn gyíng lui, myit lhîng aq. ²⁰ Wú aq! Ngò gi, hkum yâm má yap to lui, hkum lé kok nyi lhê. Rayuq yuq, Ngá é htê lé wó gyo lui, hkum hpóng byí é nghut jáng, Ngò gi, wàng mù, haú yuq eq rahá zo shuq rá nghut lhê; haú yuq le, Ngò eq rahá zo shuq rá nghut lhê.

²¹ Ngò gi, ùng lui, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng rá ahkáng, Ngò byi rá nghut lhê. ²² Gyo rá nohkyap dap é sù gi, haú Woi-nyí mai noqkuq hpûng pé lé tai é hkyô lé, gyô yù sháng gaq.' gá é nghut ri." gá ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gá é danghtê ngo lé tai é gi, "Shí

má doq lò aq, hângnùng má dut lò rã hkyô pé lé, Ngò, nang lé tân shit bá." gã ri. ² Haù hkùn jáng yhang, ngò gi, Woi-nyí má moq byuq ló luí, mauhkúng htoq má hkohkâm-tanghkuq ralhúm joq é lé myàng ri; tanghkuq haù má, byù rayuq zung tô ri. ³ Haù má zung to Su é isâm gi, huhpé eq ne yúng lungsêng su dut ri. Huí nyui lungsêng su dut é woqgan síng-yang gi, haù hkohkâm-tanghkuq má hkông lhing tô ri. ⁴ Hkohkâm-tanghkuq hau é lhinghkyuq má, hkohkâm-tanghkuq gotú í xe myí lhum le joq to luí, hpyu é mebu wut mù, ulhum má hing janmaù tsung tô é suwún í xe myi yuq gi, haù má zung tô bum akò. ⁵ Haù hkohkâm-tanghkuq mai, lhap hpyat é, mying hùm é eq maugum gùm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasâng é woi-nyí nyhit woi-nyí nghut ri. ⁶ Hau htoq agó, san zã é myoqjãm su dut mã é wui-nhông le, haù hkohkâm-tanghkuq hí má dítg tô ri.

Haù hkohkâm-tanghkuq agùng má le, lhinghkyuq má le, hì-u nunghtáng lhinghkyuq myoqjí dap é dui é dusak myí du nyi tô ri. ⁷ Dui é dusak sâng-hí du gi, hkanghkyi su dut ri; í du nghû rã du gi, nohtó su dut ri; sùm du nghû rã dù é myoqdong gi, byu myoqdong su dut ri; myí du nghû rã du gi, dâng wún é zunbung su dut ri. ⁸ Dui é dusak myí du haù gi, du hkanqmó dùng hkyuq lhum lhum dap é htoq agó, lhinghkyuq má myoqjí kôm dap luí, dùng hkaù má lhang dap ri. Yhangmoq, nyí myín hkâ-nhám a no loshoq taí nyi kô é gi, "A-nham pyat le, ahkuq pyat le, htang pyat má le, rú nyi nyi é, haù wum-o a-tsam dik shoq bô Sù Yhumsing Garai Gasang gi, chyoiyúng, chyoiyúng, chyoiyúng nyi ri."

gã akò. ⁹ Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkanq, aróng eq jeju bun hkyô byí é hkanqmó, ¹⁰ haù suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akò. Yhangmoq gi, yhangmoq é hkohkâm-janmaù lé, haù hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsing eq Garai Gasang ê, nyi mi-nyí, joq mijoj lé, Nàng hpan to bê nghut luí,

haù pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shingkanq, aróng eq hpungwup a-tsam lé, hap yù gíng Sù nghut ri."

gã akò.

5

Chyúmding Eq Sauzo

¹ Hau hâng, ngò gi, hkohkâm-tanghkuq má zung to Su é loqyo loq má, í shut é laiká kã to é, dizik nyhit lhum tap tô é chyúmding le myang ri. ² Hau htoq agó, a-tsam mó bo é maumang lagyo rayuq gi, "Haù dizik pé lé hí pyám rã eq chyúmding lé hpóng rã gi, ó yuq wã gingdán lhê lú?" ga luí, htê mó eq wut taí nyi é lé le, ngò myang ri. ³ Nghut kôlháng, mauhkúng htoq má le, myigùng htoq má le, myigùng ô má le, haù chyúmding lé wó hpóng rã eq ahkaù má wó wú rã byù rayuq lhang a nyi nghut ri. ⁴ Haù chyúmding lé hpóng rã, ahkaù má wú rã gingdán é byù rayuq hkâlhang a nyi é yanmai, ngò gyai yhang ngau pyâm é nghut lhê. ⁵ Haù hkùn, haù suwún wui mã é rayuq, ngo lé taí é gi, "Hkã-ngaù! Wú aq, haù Yudaq byuhú mã é Hkanghkyi nghu é, haù Dawiq é Amyit nghut

Sû gi, ùng bê nghut lui, haù chyúmding eq haù mã é dizik nyhit lhum lé wó hpông lhê." gâ ri.

⁶Hau htâng, haù dui é dusak myí du eq suwún wui é agùng mã é, hkohkâm-tanghkuq agùng mã, sat hui bê su dut é Sauzo radu yap tô é lé, ngò myang ri. Sauzo haù gi, hkyuí nyhit lhum eq myoqjí nyhit lhum dap ri. Myoqjí haù nyhit lhum gi, myidàm htoq gón mã nhang htoq kat é, Garai Gasâng é woi-nyí nyhit woi-nyí nghut ri. ⁷Haù Sauzo gi, lé mù, hkohkâm-tanghkuq mã zung to Su é loqyò mã é chyúmding lé yu ri. ⁸Haù chyúmding lé yu é hkùn jáng, haù dui é dusak myí du eq suwún í xe myi yuq gi, Sauzô é hí mã ngóm gop akò. Yhangmoq yuq hkanmó gi, tìng eq sân-yúng bâng é kyúdung dang gâ é namgón jung byíng mui tô é hìng góm pé le chung bum akò nghut ri.

⁹Yhangmoq gi,

"Nàng gi, haù chyúmding lé yù rà eq hau é dizik pé lé hpóng rà gingdán Sù nghut ri.

Haì mù gâ le, Nàng gi, sat hui bê nghut lui, byuhú hkanmó mai le, myíng hkanmó mai le,

byù myú hkanmó mai le, mingdán hkanmó mai le, Garai Gasâng é matú,

Nàng é suí eq byù pé lé wui hpyit yú bê nghut ri.

¹⁰Nga-nhùng é Garai Gasang lé dojàu rà matú, Nàng gi, yhangmoq lé, mingdán byu pé eq hkyangjông pé dut nhâng bê nghut lui, yhangmoq gi, myidàm htoq mã up kó rà nghut lhê."

ga lui, mahkôn sik ralhüm hkon akò nghut ri.

¹¹Haù hkùn, ngò wú kat le, haù hkohkâm-tanghkuq lhíngkhyuq mã le, dui é dusak pé eq suwún wui é lhíngkhyuq mã le, nyi tô bum é maumang lagyo ajùm ayò mun mun sen sên é hté lé wó gyò ri. ¹²Yhangmoq gi,

"Haù sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng sitang,

hpungwup shingkanq eq hkya-on kungtôn hkyô lé, hap yù gíng ri."

ga lui, hté mó eq ton bum akò nghut ri.

¹³Hau htoq agó, mauhkúng htoq mã nyi é, myigùng htoq mã nyi é, myigùng ô mã nyi é, wuiming mã nyi é, hpan to hui é lhunglhang gi,

"Hkya-on kungtôn hkyô, aróng sitang, hpungwup shingkanq eq hpungwup a-tsam gi,

haù hkohkâm-tanghkuq mã zung tô é Sù eq Sauzô chyáng,

pyat dedu ahtum abyuq ru joq nyí sháng gaq ô!"

ga lui, ton nyi bùm kô é lé, ngò wó gyò ri. ¹⁴Haù dui é dusak myí du gi, "Amen" ga tai jang, haù suwún wui gi, ngóm gop lui noqkuq akò nghut ri.

6

Dizik Nyhit Lhüm É Hkyô

¹Haù Sauzo gi, dizik nyhit lhum mã é sânghí lhum lé hpông kat é hkùn, ngò myang é nghut lhê. Hau htâng, haù dui é dusak myí du mã é radu gi, maugum su gâ é hté mó eq, "Lé aq." gâ é lé, ngò wó gyò ri. ²Ngò wú kat é hkùn, ngá é myoq hí mã myang hpyú radu nyi tô é lé myang ri! Haù mã jì to sù gi, lai rahpu chung tô é htoq agó, yhang lé, janmaù ralhüm tsúng to byí lui, ùng budang wó rà matú ùng sù rayuq dōng htoq ló ri.

³Haù Sauzo gi, í lhum nghú rà dizik lé hpông kat é hkùn, haù í du nghú rà dui é dusak gi, "Lé aq." ga tai é lé, ngò wó gyò ri. ⁴Hau htâng, myang nè radu

htoq lo ri; haú má jî tô é sù gi, myidàm htoq mâ é nguóngón simsaq hkyô lé wup yù rá eq, byù yhangchang rayuq eq rayuq sat lhum nhâng rá a-tsam byí é hui sù nghut luí, yhang lé shâm mó rahkyam le byí to bê nghut ri.

⁵ Haú Sauzo gi, sùm lhum nghù rá dizik lé hpông kat é hkùn, haú sùm du nghù rá dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶ Haú hkùn, "Ra-nyí é zuihpau gi, rungsô rabyé, ra-nyí é zuihpau gi, muk-yo guq sum byé nghut lhê; haú tsanlun xù eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷ Haú Sauzo gi, myí lhum nghù rá dizik lé hpông kat é hkùn, haú myí du nghù rá dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkùn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám rá ahkáng wó yu to bekô nghut ri.

⁹ Sauzo gi, ngo lhum nghù rá dizik lé hpông kat é hkùn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Chyoiyúng é eq tengmán é, ahko ahkáng lhunglhâng wó é Yhumsing è, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi rá lhu?" ga, htê mó èq garu bum akô. ¹¹ Haú hkùn, yhangmoq yuq hkangmó gi, bu hpyû hing radung dung hut é hui luí, yhangmoq su sat hui rá bang, yhangmoq é byinzùm dui-nhâng zoshâng wui nghut é gumang wui sat hui ngap é hkùn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghù rá dizik lé, Yhang hpông kat é hkùn, ngò myang ri; haú u lé, layàng mó le nún lo ri; haú bui gi, saumá noq èq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lài mó èq lo mut nhùn kat é hkùn, a myhíng shí é maihpáng-shi yoq gyó é su, mauhkúng mâ é kyí pé gi, myidàm htoq má byit gyó lo bum ri. ¹⁴ Haú mauhkúng gi, laiká lé dng lhum é su htot pyám é hui luí, bùm hkang bùm mó eq zinlóng lhumjup pé gi, yhâng é jowò mai huí pyám é huí ri.

¹⁵ Haú hkùn, haú myidàm htoq mâ é hkohkam pé, uphkáng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi rá lhu?" ga garú taí bum akô nghut ri.

7

144,000 Yuq Masat Lhò Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyùn má yap to mù, myigùng htoq má le, wui ming htoq má le, sikgâm pé má le, lài a hik sháng gaq ga, myi shut mâ é lài lé zui zing to kô é lé, ngò myang ri. ² Haú hkùn, haú dui nyi é Garai Gasâng é masat lhò chung é maumang lagyo gotú rayuq gi,

buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé,
³ "Nga-nhông é Garai Gasâng dui-nhâng zoshâng wui é ngelang má, ngamoq mai masat lô a tap byi byi gi, haú myigùng, wui ming eq sigâm pé lé hkâlhoq hten shi kô." ga htê mó eq wut tai kat ri. ⁴ Haú hkùn, masat lô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mã é 144,000 yuq nghut ri.

⁵ Masat lô tap huí yu é,
 Yudaq up mã é bang gi, 12,000 yuq,
 Rubin up mã é bang gi, 12,000 yuq,
 Gat up mã é bang gi, 12,000 yuq,
⁶ Ashe up mã é bang gi, 12,000 yuq,
 Nahtali up mã é bang gi, 12,000 yuq,
 Manase up mã é bang gi, 12,000 yuq,
⁷ Simeon up mã é bang gi, 12,000 yuq,
 Lewiq up mã é bang gi, 12,000 yuq,
 Yishahka up mã é bang gi, 12,000 yuq,
⁸ Zebulun up mã é bang gi, 12,000 yuq,
 Yosep up mã é bang gi, 12,000 yuq,
 Ben-yamyin up mã é bang gi, 12,000 yuq,
 nghut bum akô.

Bu Hpyû Hing Wut Bang É Hkyô

⁹ Hau htâng, ngò wú kat é hkùn, mingdán hkanmó mai le, byuhú hkanmó mai le, byù myú hkanmó mai le, myíng chângjup mai le, lé é bang, ó yuq lháng a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hing wut luí, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haú hkohkâm-tanghkuq mã zung tô é nga-nhông é Garai Gasang eq Sauzo chyáng mã é nghut ri ô!"
 ga luí, htê mó eq garù bum akô nghut ri. ¹¹ Haú maumang lagyo lunglhang bang gi, haú hkohkâm-tanghkuq é lhinghkyuq má le, suwún wui eq dui é dusak myí du é lhinghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,
¹² "Amen! Hkya-on kungton hkyô eq hpungwup shingkanq,
 hpaqchyí byéng-yá eq jeju bun hkyô,
 aróng, hpungwup a-tsam eq wum-o gi,
 nga-nhông é Garai Gasâng chyáng pyat dedu ahtum abyuq ru joq nyí sháng
 gaq ô!"
 Amen!"
 ga tai bum akô.

¹³ Haú hkùn, suwún wui mã é rayuq gi, "Shi bu hpyû hing wut é bang gi, ô pé lú? Yhangmoq gi, hkâmai lé é bang nghut akô lú?" ga ngo lé myí ri.

¹⁴ Ngò gi, "Suwún hpó ê, nàng sê lhê." nghù tù tai jáng, yhang gi, "Shi bang gi, haú wuihke jamjau mó mai wó lut htoq lô luí, yhangmoq é bu hing lé, haú Sauzô é sui má chí hpyû yù bê bang nghut akô. ¹⁵ Haú mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhùm má, nyí, myín Yhang lé dojaú nyí kô é nghut lhê; haú hkohkâm-tanghkuq mã zùng

Sû gi, Yhâng é jonghpang lé, yhangmoq é ahtoq má nghop byi rá* nghut lhê. ¹⁶Yhangmoq gi, hkâ-nhám le, zòmüt wuìshít hui rá a nghut lo; buì lhap é le, hkyíng hkyíng nyé é le, yhangmoq lé wó záng rá a nghut. ¹⁷Hkâsu mù gâ le, haù hkohkâm-tanghkuq agùng mã é Sauzo gi, yhangmoq é sau-rém sû dut rá nghut luí, Yhang gi, yhangmoq lé, asak wuìbúm jé shoq shuí ê rá nghut lhê. Hau htoq agó, Garai Gasang gi, yhangmoq é ngaubiyi sháng shoq sut pyám byi rá nghut lhê." ga tai ri.

8

Nyhit Lhum Nghù Râ Dizik Eq Namngón Jung Nyhê É Hing Góm

¹ Hau Sauzo gi, nyhit lhum nghù rá dizik lé hpông kat é hkûn, mauhkúng htoq má hkyíng hkum rawuí kô zím byuq ri.

² Hau hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hing góm chung é maumang lagyo gotú rayuq gi, haù hkungga gyap yàm má lé yap tô ri. Haù hkohkâm-tanghkuq hí mã é hing hkungga gyap má, sân-yúng bang banshoq é kyúdung dang eq rahá nhông byi rá matú, namngón jung gyai myo shoq, yhang lé byi tô ri. ⁴ Haù namngón júng é myihkau gi, sân-yúng bâng é kyúdung danghtê eq rahá, maumang lagyo haù yuq é loq mai Garai Gasâng chyáng hkyang rot ló bê nghut ri. ⁵ Hau htâng, maumang lagyo haù yuq gi, góm lé yù mù, hkungga gyap mã é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut rá hen akó nghut ri.

⁷ Sâng-hí yuq nghù rá maumang lagyo gi, yhâng é tut lé mut kat ri; haù hkûn, sui nyó é likwò eq myi htoq lô mù, haù lé myidàm htoq má lhoq hkyô kat jáng, maumyí sum tú mã é ratú eq siggám sum tú mã é ratú nyé gyó byuq é htoq agó, wáhu mhanzo banshoq le nyé gyó byuq bê nghut ri.

⁸ Í yuq nghù rá maumang lagyo gi, yhâng é tut lé mut kat ri; haù hkûn, myi dap tô é bùm mó su é lé, wuìshuq lung-aù má dú hkyô kat ri. Wuìshuq lung-aù sum tú mã é ratú gi, sui dut byuq bê nghut ri; ⁹ wuìshuq lung-aù mã é dui jung sum tú mã é ratú gi, shi byuq luí, wuì-sanghpo pé sum tú mã é ratú gi, htên byuq bê nghut ri.

¹⁰ Sum yuq nghù rá maumang lagyo gi, yhâng é tut lé mut kat ri; haù hkûn, myihu dùm su duq é kyí mó racham gi, mauhkúng mai byit gyó lô mù, wuìlàng sum tú mã é ratú eq wuìbúm pé htoq má lo gyó záng ri. ¹¹ Kyí hau é myíng gi, Kyí Kyí Hko gâ é nghut ri. Wuìlàng sum tú mã é ratú hkô byuq luí, wuì haù hkô byuq é yanmai byù myo myo shi byuq bekô nghut ri.

¹² Myi yuq nghù rá maumang lagyo gi, yhâng é tut lé mut kat ri; haù hkûn, buì sum tú ratú, lhamó sum tú ratú, kyí sum tú ratú gi, hten luí, haù pé é sum tú ratú gi, mauchut byuq bê nghut ri. Hau htoq agó, nyí sum tú mã é ratú le, myín sum tú mã é ratú le, maubó a joq dut byuq ri.

* **7:15** Yhâng é jonghpang lé, yhangmoq é ahtoq má nghop byi rá, gâ é gi, yhangmoq eq rahá nyi mù, yhangmoq lé upzúng nyí rá gâ é nghut lhê.

¹³ Ngò wú nyi le, zunbung radu gi, maulat má dâng wún mù, "Gotù maumang lagyo sum yuq eq mut rá nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó eq garú taí ri.

9

¹ Ngo yuq nghû rá maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyí racham lé, ngò myang ri. Haú nik dik htùm é Lasang-dông é zoqshi gi, kyí haú lé byí tô ri. ² Kyí haú gi, nik dik htùm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htùm é Lasang-dong haú má é myihkau dum é yanmai, bui eq maulat gi, mauchut byuq bê nghut ri. ³ Myihkau dùm haú mai dinggám pé htoq lô mù, myidàm htoq má gyó lé akò; myidàm htoq má é gogok é a-tsam sù é a-tsam le, yhangmoq lé byí to bê nghut ri. ⁴ Myidàm htoq má é wàhu pé lé le, mhan-haq hpoqnoq pé lé le, siggám pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri rá matú, yhangmoq lé taí tô ri. ⁵ Nghut kôlhang, haú bang lé sat pyám rá ahkáng kúm gi, yhangmoq a wó e za, lhamò ngo hkyap tup haú bang lé zing-ri rá ahkáng za ru wó akò nghut ri. Haú bang hui zô é shí-nò jamjau gi, gogok eq pat hkûn no hpû é su yhang nghut ri. ⁶ Haú buinyi pé má, byu pé gi, shí hkyô hô kôlhang, myàng kó rá a nghut; shí nau dik kôlhang, haú shí hkyô gi, yhangmoq chyáng mai hpang byuq rá nghut lhê.

⁷ Dinggám haú pé gi, majan zan rá matú buí tô é myang pé su dut akò. Yhangmoq é ulhum má gi, hîng janmaú sù é tsúng tô é htoq agó, yhangmoq é myoqdong gi, byu myoqdong su dut bum akò nghut ri. ⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri. ⁹ Yhangmoq é wànggò-long gi, joqtoq wànggò-long su dut ri; yhangmoq é dúng mying é htê gi, majan pá shut din yán wang ló é myang jùm eq myanglhêng pé mying hùm é htê su gâ ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamò ngo hkyap tup byu pé lé zing-ri rá a-tsam bo ri. ¹¹ Yhangmoq é hkohkâm gi, nik dik htùm é Lasang-dong má é maumang nghut ri; haú é mying gi, Hebre myíng dong Abadon ga, Grik myíng dông Apolion* gâ ri.

¹² Sâng-hí lhum dingnyé gi, lai lô byuq bê nghut ri; nghut kôlhang, dingnyé í lhum jé lô shirá nghut lhê.

¹³ Haú hkyuq yuq nghû rá maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuí myí lhum mai htê htoq lo é gi, ¹⁴ "Uhprat wui mó lãng má tuí lhung tô é maumang myi yuq lé, nhang pyám aq." ga tut chung tô é hkyuq yuq nghû rá maumang lagyo lé taí é lé, ngò wó gyó ri. ¹⁵ Haú hkûn, xângzo byù sum tú má é ratú lé sat pyám rá matú, ahkyíng, buinyi, lhôhkyap, zanwut lé, rì rì hen to bê nghut é haú maumang myí yuq lé nhang kat bê nghut ri. ¹⁶ Myang ji ji é gyè jum gi, byù du sen í hkyíng bo é hkyô lé, ngò wó gyó ri.

¹⁷ Ngò, shing-rán myang é má, myang jùm eq haú pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyí pé é ulhum su dut luí, yhangmoq é nhut mai, myí,

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

myihkau eq hang pé htoq lo ri. ¹⁸ Haù yhangmoq é nhut mai htoq lo é myi, myihkau eq hang gà é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. ¹⁹ Myang haù jum é sho-myi gi, lhangmuì su dut luì, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haù sùm jung mai wó lut luì, myit gyó tô é xângzo byu pé gi, yhangmoq é loq pè èq zui sai é muzó mai, myit a lhing shi kô é htoq agó, nat gâng pé lé le, a wó myâng, a wó gyo, a wó sô é, hûng, ngùn, gyi, luqgok, sik pè é alhô lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyí mù mai le, ashop é đông gungsho zùm yap é hkyô mai le, hkaù é mai le, myit a lhing shi kó nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é maumang lagyo gotù rayuq, mauhkûng mai gyó lé lo é lé myang é nghut lhê. Yhang lé gi, mhut èq htop yup to luì, yhâng é u htoq má woqgan sing-yang gyân tô ri; yhâng é myoqdong gi, buì su dut luì, yhâng é hkyí gi, myi zing su dut ri. ² Yhâng é loq má gi, hpông tô é laiká ding zo ralhum chung tô ri; yhâng é loqyo hkyi gi, wuìshuq lung-aù má nang, yhâng é loqpaì hkyi gi, myigùng htoq má nâng to luì, ³ hkanghkyi mying é htê su ga, htê mó èq garú kat ri. Yhang garu kat jáng, maugum htê nyhit lhum tú gûm kat ri. ⁴ Haù maugum htê nyhit lhum tú gûm kat é hkûn, ngò ká rã da jáng, "Haù maugum htê nyhit lhum tú gûm é hkyô lé záu pyám aq; haù pé lé hkákã to." ga, mauhkûng mai danghtê htoq lo é lé ngò wó gyô kat ri.

⁵ Haù hkûn, wuìshuq lung-aù eq myigùng htoq má nâng yap tô é lé, ngò myang é maumang lagyo haù gi, yhâng é loqyo loq lé mauhkûng shut tu toq kat ri. ⁶ Haù mù, yhang gi, mauhkûng eq haù má nyi é lhunglhang lé le, myidàm htoq eq haù má nyi é lhunglhang lé le, wuìshuq lung-aù eq haù má nyi é lhunglhang lé le, hpan tô é, pyat dedu ahtum abyuq dui nyi Su é myiing lé lang luì, dakam é gi, "Ahkyíng ratsuí le, lhoq myáng nyi lo rã a nghut!" ⁷ Nghut kólhang, Garai Gasang mai Yhâng é dui-nhâng zoshâng wuì nghut é myiqhtoi pé lé tai to bê é danglù eq rajung za, Yhâng é záu tô é hkyô gi, nyhit yuq ngû rã maumang lagyo èq yhâng é tut lé mut myhîng é buinyi pé má, shit rã nghut lhê." gã ri.

⁸ Hau htoq agó, ngò wó gyô wú bê mauhkûng mã é htê, ngo lé dum tai é gi, "Haù wuìshuq lung-aù eq myidàm htoq má nâng yap tô é maumang lagyo loq má hpông tô é laiká ding lé, ê yù aq." gã ri.

⁹ Haù mù, ngò gi, ê luì, laiká ding zo haù, ngo lé byi rã matú maumang lagyo haù lé ê dung le, yhang gi, "Shi lé yù mù, zo kat aq. Náng é wam má hko rã nghut lhê; nghut kôle, náng é nhut má gi, byo-ì su yhang chui rã nghut lhê." gã ri. ¹⁰ Haù mù, ngò gi, laiká ding zo haù lé, maumang lagyo é loq mai yù mù, zô é nghut lhê; haù hkûn, ngá é nhut má gi, byo-ì su yhang chui ngâm ri; nghut kôle, bàn zô kat é hkûn, ngá é wam hkaù má hkô bê nghut ri. ¹¹ Haù hkûn, "Nàng gi, byù myù myo myo eq séng luì le, mingdán myo myo eq séng luì le, myíng ahú hú eq séng luì le, hkohkam pé myo myo eq séng luì le, myiqhtoi dum htoi ra rã nghut lhê." ga, ngo lé tai kyô ri.

11

Saksé Í Yuq É Hkyô

¹ Ké rà jung dumbáng su dut é jàm-yang rahkat ngo lé byi luí, ngo lé taí é gi, "Ê mù, haú Garai Gasâng é noqkuq yhùm lé le, hkungga gyap lé le, kê wú luí, haú má noqkuq é bang lé nghap wú aq. ² Nghut kôlhang, shinggan mâ é wâng lé gi, a kê é za lhai pyâm to aq; hkâsu mù gâ le, haú gi, túngbaù pé lé byí to bê nghut lhê. Yhangmoq gi, haú chyoiyúng myuq lé, lhamó myixe í hkyap tup chôm nang kó rà nghut lhê. ³ Hau htoq agó, ngò gi, ngá é saksé í yuq lé a-tsam byi rà nghut luí, yhangnhik gi, ji mebu wut* mù, buinyi 1260 nyí tup myiqhtoi htoi kó rà nghut lhê." gâ ri. ⁴ Yhangnhik gi, haú myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri. ⁵ Byù rayuq yuq, yhangnhik lé zing-ri nau é nghut jâng, yhangnhik é nhut mai myi htoq lô mù, yhangnhik é gyè pé lé nyhê hkyô pyám rà nghut lhê. Yhangnhik lé kâm zing-ri é sù gi, haú su kut sat pyâm é hui zo rà nghut lhê. ⁶ Yhangnhik gi, yhangnhik myiqhtoi htoi nyí é buinyi pé má mau a wò rà matú, mauhkúng lé myhí pyám rà a-tsam wó akô; hau htoq agó, wui pé lé sui dut nhâng rà eq, nau é hkùn, wúm ajung júng eq myidàm htoq lé ihkyup hkyó byi rà a-tsam le, wó akô nghut ri.

⁷ Yhangnhik gi, saksé ban hkâm é hkùn, haú nik dik htùm é Lasang-dong mai htoq lo é tân jung dusak gi, yhangnhik lé htim mù, ùng luí, sat pyám rà nghut lhê. ⁸ Yhangnhik é mâng lé gi, danglêng dông Sodom eq Egutuq gâ é, yhangnhik é Yhumsing lé le, tapzing má jén sat pyám é myuq mó é hkyô gùng má, leq to rà nghut lhê. ⁹ Haú hkùn, byù myù hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám rà matú a gyo kô é za, sum nyí eq rahkyuí tup chôm wú nyí kó rà nghut lhê. ¹⁰ Myidàm htoq má nyí é bang gi, yhangnhik shi byuq é yanmai gabú nguóngón luí, rayuq eq rayuq chyunghuq byí lhum é dông ngón poí kut kó rà nghut lhê. Hkâsu mù gâ le, myiqhtoi haú nhik gi, myidàm htoq má nyí nyí é bang lé, wuihke jamjau byí lai bê su nhik nghut akô.

¹¹ Nghut kôlhang, sum nyí eq rahkyuí tup lai é htâng má, Garai Gasâng chyáng má é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yang gyuq nán bùm bekô nghut ri. ¹² Haú hkùn, "Shí má doq lò keq." ga, mauhkúng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkúng shut doq lò bekô nghut ri.

¹³ Haú u lé yang, layàng mó nún lô luí, myuq hkaù raxê tú mâ é ratú gi, htên gyop byuq bê nghut ri. Hau htoq agó, byù nyhit hkyíng yuq shi byuq bê nghut luí, myit gyó tô é bang gi, gyai yang gyuq nán bùm kômù, mauhkúng mâ é Garai Gasang lé hkya-on shigyaù bum akô nghut ri.

¹⁴ Í lhum nghù rà dingnyé gi, lai byuq bê nghut ri; sùm lhum nghù rà dingnyé gi, jé rà za nghut bê.

Nyhít Lhum Nghù Râ Tut Mut É Hkyô

¹⁵ Nyhit yuq nghù rà maumang lagyo gi, yhâng é tut mut kat ri; haú hkùn, mauhkúng htoq má htê mó pé htoq lo é gi,

* 11:3 Ji mebu wut gâ é gi, iyon yón é lé gâ lhê.

"Míngkan htoq má é míngdán gi, nga-nhùng é Yhumsîng eq Yhâng é Hkrisduq é míngdán dut bê nghut lui,

Yhang gi, pyat dedu ahtum abyuq up nyi râ nghut lhê."

gâ ri. ¹⁶ Hâu hkûn, yhumsîng é hkohkâm-tanghkuq má zùng mù, Garai Gasâng é hí má nyi tô é suwón í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang tai kô é gi,

¹⁷ "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chùng mù, up nyi bê nghut é yanmai, ngamoq, Nang lé jeju hkyá-on lhê.

¹⁸ Byù myù pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tará jéyáng râ eq, Náng é dui-nhâng zoshâng myiqhtoi pé lé le, Náng é sân-yúng bang lé le, Náng é myìng lé gyuq hkunggâ é tiq ko lé le, shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

¹⁹ Hâu hkûn, mauhkûng htoq má, Garai Gasâng é noqkuq yhûm hpông to lui, Yhâng é noqkuq yhûmhkaú má, Yhâng é dangshikaq eq sêng é saksé sidek lé byu-myang ri. Hâu hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

¹ Hâu htoq agó, mauhkûng má limik kumlhá mó htoq shit é gi: myiwe myhí rayuq gi, buí lé wut chùng mù, lhamó má hkyí ke lui, kyí raxe í cham dap é janmaú lé, yhâng é ulhum má tsúng tô ri. ² Yhang gi, zogùng dut tô é nghut lui, zo hkú râ matú, zohkû-nò no nyi é yanmai, gyai yhang ngau garú nyi ri. ³ Hâu htâng, mauhkûng má gotú kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuí raxé lhum dap lui, yhâng é ulhum hkangmó má janmaú tsúng tô ri. ⁴ Yhâng é sho-myi gi, mauhkûng má é kyí sum tú má é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri. ⁵ Myiwe myhí haú gi, míngdán banshoq lé shamtoq dumbáng eq up râ nghut é yuzo rayuq lé hkú bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yú bê nghut ri. ⁶ Myiwe myhí haú gi, yhâng é matú Garai Gasang lajâng to byí é yoso hkaú má hpang wang é bê nghut ri; haú jowò má, yhang gi, 1260 nyí tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagýo pé gi, manjung lé majan é zan kôluí, haú manjung eq yhâng é maumáng pé le, tau zân akô. ⁸ Nghut kôlhang, yhangmoq gi, a ùng kômù, mauhkûng má é yhangmoq nyi jowò lhoq hpyuq pyám bekô nghut ri. ⁹ Hâu míngkan gón lé hkyô shuí ngoq é, natzau eq Tsadán ga é, a-nham lhê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyâm é hui bê nghut ri.

¹⁰ Hâu hkûn, mauhkûng htoq má htê mó đông tai é lé, ngò wó gyó é gi,

* 12:3 Manjung nè mó gâ é gi, Tsadán lé tai nau é nghut lhê.

"Ahkuí gi, nga-nhông é Garai Gasâng é hkyi yù hkyô, hpungwup a-tsam eq mîngdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhông é Garai Gasâng é hí má, nga-nhông é gumang wui lé,

nyí, myín mara hun nyi é sù gi, dú hkyô pyâm é hui bê nghut ri.

¹¹ Yhangmoq gi, haù Sauzô é suí é yanmai le, yhangmoq saksé hkâm é mungdâng é yanmai le, yhang lé ung pyám bekô nghut lui, shi byuq é jé shoq yhumsing asak lé a ha kô nghut ri.

¹² Haù mù lui, mauhkông eq haù má nyi é bang ê, gabú nyi keq!

Nghut kôlhâng, myidàm htoq eq wuìshuq lung-aù gi, dingnyé wó ri;

hkâsu mù gâ le, haù natzau gi, yhâng é ahkyíng yàm-yoq tot za ru joq alô nghut é lé sê é yanmai,

nhikmo-yô é èq, nungnhik chyáng gyó lé lô bê nghut ri."

gâ ri.

¹³ Haù manjung gi, myidàm htoq má dú hkyô kat huí é lé myàng lui, haù yuqzo hku é myiwe myhí lé zing-rí ri. ¹⁴ Myiwe myhí haù gi, lhangmui chyáng mai wó lut lui, yhang é matú lajàng tô é yoso má wó dang jé mù, ahkyíng ralhùm, ahkyíng í lhum, ahkyíng rawuí hkup† lhom baù nyi é hui sháng gaq ga, zùn mó é òng í lhum byí é huí ri. ¹⁵ Haù hkûn, haù lhangmui gi, myiwe myhí haù lé wó lhoq myhú pyám shoq ga, myiwe myhí é nunghtáng má, yhâng é nhut mai wui mó lãng í é wui lhoq htoq kat ri. ¹⁶ Nghut kôlhâng, manjung nhut mai lhoq htoq kat é wui mó lãng haù lé, myigùng gi, yhâng é nhut há mù myui pyám byí é òng, myiwe myhí haù lé garúm yu ri. ¹⁷ Haù mù, manjung haù gi, myiwe myhí hau é yanmai, gyai yhang nhikmo-yo lui, Garai Gasâng é jep é tará lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan rá matú htoq e ri. ¹⁸ Manjung haù gi, wuìshuq lung-aù yàm má yap tô ri.

13

Tân Jung Dusak Radu Wuìshuq Lung-aù Mai Htoq Lo É Hkyô

¹ Haù hkûn, haù wuìshuq lung-aù mai tân jung dusak radu htoq lo é lé, ngò myàng ri. Dusak haù má, hkyuí raxê lhum eq ulhum nyhit lhum dap to lui, yhâng é hkyuí pé má gi, janmaù raxê lhum tsùng to mù, ulhum hkangmó má gi, Garaí aróng lhoq hpoi é myíng dap tô bum ri. ² Ngò myang é tân jung dusak haù gi, bauze-lo su dut ri; nghut kôlhâng, hkyí gi, wàm hkyí su dut lui, nhut gi, hkanghkyí nhut su dut ri. Haù manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haù lé ap byí ri. ³ Tân jung dusak hau é ulhum ralhùm gi, shí rá í é òng dap huí é su dut kôlhâng, damhkô haù gi, yâ ge pyám bê nghut lui, mingkan gón gi, mauhong byuq kômù, yhâng htâng châng bùm bekô nghut ri. ⁴ Manjung gi, tân jung dusak lé ahko ahkáng ap byí é yanmai, byu pé gi, manjung haù lé noqkuq é htoq agó, tân jung dusak haù lé le, noqkuq kômù, "Ó yuq wá, tân jung dusak shí du su dut ri lú? Ó yuq wá, yhang lé wó zan ùng rá lú?" ga bum akô.

† **12:14** Ahkyíng ralhùm, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haù gi, 1260 nyí nghut ri.

⁵ Gyáng dang tái râ eq Garaí aróng lhoq hpoi dang tái râ nhut gi, tân jung dusak haú lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng râ ahkáng wó bê nghut ri. ⁶ Yhang gi, yhâng nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é myíng eq nyi jowò lé le, mauhkúng htoq má nyi é bang lé le, lumù gansang é sù nghut ri. ⁷ Haú sân-yúng bang lé majan zân ung yú râ a-tsam, yhang lé byi bê nghut ri. Haú htoq agó, byuhú hkangmó lé le, byù myú hkangmó lé le, myíng hkangmó lé le, mǐngdán hkangmó lé le, up râ ahkáng, yhang lé byi bê nghut ri. ⁸ Haú sat hui bê Sauzo eq sêng é asak jihpán laiká buk má, mau htoq xâng hkun mai, myíng a ká lhom é, myidám htoq má nyi é lhunghâng bang gi, haú tân jung dusak lé noqkuq kó râ nghut lhê.

⁹ Gyo râ nohkyap dap sù gi, gyò yù sháng gaq.

¹⁰ Shúm zung é hui râ sù gi, shúm zung é hui râ za nghut lhê.

Sham eq sat é hui râ sù gi, sham eq sat é hui râ za nghut lhê.*

Haú mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹ Haú htâng, ngò gi, tân jung dusak gotù radu† myigùng mai htoq lo é lé myang ri. Yhang gi, sauzô é hkyuú su dut é hkyuú í lhum yuq ri; nghut kôlhang, yhang gi, manjung su ga dang nyo ri. ¹² Yhang gi, tân jung dusak hí lhê dù é ahko ahkáng lhungháng lé, haú du é hí má chùng mù, shí râ í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. ¹³ Haú htoq agó, yhang gi, byu pé é myoq hí má, mauhkúng mai myigùng shut myi lé háng wó lhoq hkyô é, limik kumlhá mó kut shit ri. ¹⁴ Yhang gi, tân jung dusak hí lhê dù é hí má, kumlhá haú pé kut râ ahkáng wó é yanmai, myidám htoq má nyi é bang lé mhoq hpyoq yú lui, haú shâm damhkô dap kôlhang, dui nyi é tân jung dusak haú lé, hkunggá é dông, yhangmoq lé, yhâng é alhò saí nhang ri. ¹⁵ Yhang gi, haú tân jung dusak hí lhê dù é alhò lé, soq wó mut kat byí é a-tsam lé wó yú sù nghut ri; haú mù, alhò haú gi, dang wó tái lui, yhang lé a noqkuq é bang lé, sat hui nhang ri. ¹⁶ Haú htoq agó, yhang gi, byù mó byù zo, wó sù myúng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yú nhang ri. ¹⁷ Haú hkún, haú tân jung dusak é myíng, a nghut jáng, yhâng myíng é masat námbat dap sù mai lai lui, ùng é, wui é hkyô, ó yuq lé wó kut râ a nghut.

¹⁸ Hpaqchyí byéng-yá gi, shí má bo râ ri. Hpaqchyí bò sù gi, haú tân jung dusak é námbat lé sòn wú sháng gaq; hkâsu mù gá le, haú gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É Hkyô

¹ Haú htâng, ngò wú kat le, haú Sauzo gi, Zi-un bùm má yap tô é lé myang ri; Yhâng myíng eq Yhâng Wá é myíng lé, yhumsing é ngelang má ká tap tô é byù 144,000 yuq le, Yhang eq rahá yap tô bùm ri. ² Haú hkún, ngò gi, wui pé myíng hùm é htê eq maugum mó gúm é htê su gá é htê, mauhkúng mai htoq

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham eq byù sat é sù gi, sham eq sat é hui râ nghut lhê, ga bo tó ri. † **13:11** Tân jung dusak gotù radu gá é shí gi, myiqhtoi pyoq lé gá nau é nghut lhê.

lo é lé wó gyô ri. Ngò wó gyô é htê haû gi, tíng bat bang, yangmoq é tíng lé bat myhîng é htê su gâ ri. ³ Yangmoq gi, haû hkohkâm-tanghkuq é hí má le, dui é dusak myí du eq suwún wui pê hí má le, mahkôn sik lé hkôn akô nghut ri. Haû myidâm htoq mai hkyi yù huí é byù 144,000 yuq mai lai luí, ó yuq lé, mahkôn haû lé a wó mhoq sê yù kó nghut ri. ⁴ Haû bang gi, myiwe wui eq gungsho a zum é bang nghut luí, yangmoq gi, zorâm jet pé nghut bum akô. Yangmoq gi, haû Sauzo hká shut é le hká shut châng é bang nghut akô. Yangmoq gi, byu pê chyáng mai wui yu é hui luí, sâng-hi myhîng é ashi lé su, haû Garai Gasang eq Sauzo lé ap byí é hui akô nghut ri. ⁵ Yangmoq é nhut má, mhaû é hkyô haí le a tái kó; yangmoq chyáng mara hûn rá hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotú rayuq gi, maulat má dâng wún é lé ngò myang ri; yang gi, haû mingkan htoq má nyi é, mingdán hkangmó má é bang, byuhú hkangmó má é bang, myíng hkangmó má é bang, byù myú hkangmó má é bang lé, hko kyo rá ahtum abyuq é gabú danglù wó ri. ⁷ Yang gi, "Garai Gasang, tará jéyáng rá ahkyíng jé bê nghut é yanmai, Yang lé gyuq hkungga luí, Yhâng é hpungwup a-tsam lé shigyaú keq. Haû mauhkûng eq myigùng, wuîshuq lung-aû eq wuibúm pé hpan tô é Sû lé, noqkuq keq." ga luí, htê mó èq tái ri.

⁸ Í yuq nghù rá maumang lagyo gi, htâng má châng lé mù, "Haû mingdán pé* lhunglhang lé, yang kut shut é ashop é dông gungsho zum yap é hkyô, nhik lhoq yô é tsibiyiq wíng shuq nhang é, Babelon myuq mó gi, lêng gyop bê! Lêng gyop bê!" ga tái ri.

⁹ Sum yuq nghù rá maumang lagyo gi, yangnhik é htâng má châng lé mù, "Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wíng jet lé shuq rá nghut lhê. Hau htoq agó, haû chyoiyúng maumang lagyo pé hí má le, Sauzô é hí má le, yang gi, duq nyi é myí eq hang èq zing-ri é hui zo rá nghut lhê. ¹¹ Yangmoq zing-ri huí é myihkau gi, pyat dedu ahtum abyuq htoq nyi rá nghut lhê. Haû tân jung dusak eq yhâng é alhô lé, noqkuq é bang eq yhâng myíng é masat lhô tap yù sù é matú gi, nyi, myín, no rá ahkyíng wó rá a nghut." ga luí, htê mó èq tái ri. ¹² Garai Gasâng é jep é tará châng luí, Yesuq lé lhumzui nyi é bang nghut é, sân-yúng bang gi, hkam shirang é hkyô bò rá lhê.

¹³ Hau htâng, "Ahkuí mai gi, haû Yhumsing má shí é sù, hkungsô wó nyi ri nghù kâ to aq." gâ é htê, mauhkûng mai htoq lo é lé, ngò wó gyô ri.

Haû hkûn, haû Woi-nyí gi, "Nghut rô, yangmoq kut é muzó é akyú gi, yangmoq htâng châng rá nghut é yanmai, yangmoq gi, yhumsing zui ngu é muzó mai myang hkying bekô rá nghut lhê." ga tái ri.

Myidâm Htoq Mã É Kyôshi Shù É Hkyô

¹⁴ Ngò dum wú kat le, mhut hpyù rahtui ngá hí má joq tô é lé myang ri; mhut hpyù htoq haû má Byu Yangzo su dut é byù rayuq zung tô ri; Yhâng é ulhum má gi, hîng janmaú tsùng to luí, Yhâng é loq má gi, htoq é zaiyik ralhum chung tô ri. ¹⁵ Haû hkûn, gotú maumang lagyo gi, noqkuq yhûm mai htoq lô

* 14:8 Mingdán pé gâ é gi, a lumjîng bang lé gâ é nghut lhê.

mù, "Haù myidàm htoq mã é kyôshi gi, myhîng zan to bê nghut luî, kyôshu yoq jé bê nghut é yanmai, náng é zaiyik chûng mù, yik shû yù aq." ga, haù mhut htoq mã zung tô é Sû lé, htê mó èq taí garû kat ri. ¹⁶ Haù mù, mhut htoq mã zung tô é Sû gi, Yhâng é zaiyik lé, myigùng htoq mã dú hkyô kat luî, myidàm htoq mã é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkûng htoq mã é noqkuq yhûm mai htoq lo ri; haù yuq le, htoq é zaiyik ralhûm chung tô ri. ¹⁸ Haù, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaù haù pé lé, yâm tsing yù aq." ga, htê mó èq taí garû kat ri. ¹⁹ Maumang lagyo haù gi, yhâng é zaiyik lé, myidàm htoq mã dú hkyô kat mù, haù mã é tsibiyiq shi pé lé yâm tsing yù luî, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰ Myuq shinggan mã é tsibiyiq wing pyik jang haù mã, tsibiyiq shi haù pé lé nâng nyhoq luî, tsibiyiq wing pyik jang haù mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui lô bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkûng mã gotû limik kumlhá joq é lé, dum byu-myang ri; haù gi, wúm nyhit lhum chung é maumang lagyo nyhit yuq nghut ri; wúm haù pé gi, lô htâng é wúm pé nghut ri; hkâsu mù gà le, Garai Gasang nhikmo-yô é hkyô gi, haù gû mai bàn rà nghut lhê. ² Hau htoq agó, myi eq nyhò tô é myocjâm wui-nhông su dut é lé le, ngò myang ri; haù tân jung dusak eq yhâng é alhò lé le, yhâng mying é nâmbat lé le, wó ung pyám bê bang gi, wui-nhông yàm haù mã yap tô bum akô; yhangmoq gi, Garai Gasang byí é ting pé lé chung to kôluî. ³ Garai Gasâng é dui-nhâng zoshâng Mosheq é mahkôn eq haù Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nàng lé a gyuq a hkungga rà eq Náng myîng lé a lhoq gyaù rà gi, ó yuq wá nyi rà lhú?

Hkâsu mù gà le, Nàng za chyoiyung é Sû nghut ri.

Nàng kut é dingmán hkyô gi, tân shit bê nghut é yanmai,

byù myú lhunglhang gi, Náng hí mã lé noqkuq kó rà nghut lhê." gâ akô nghut ri.

⁵ Hau htâng, ngò wú kat le, mauhkûng mã, saksé zúm joq é noqkuq yhûm bóng tô é lé, myang ri. ⁶ Haù wúm nyhit jung chung é maumang lagyo nyhit yuq gi, noqkuq yhûm haù mai htoq lo ri; yhangmoq gi, sân-yung duqbó é nú nhám mebu wut luî, yhangmoq é wànggâng mã hîng hpyihit baiyup tô akô nghut ri. ⁷ Haù hkûn, haù dui é dusak myí du mã é radu gi, pyat dedu ahtum abyuq dui nyi é Garai Gasâng é nhikmo-yo hkyô byîng tô é hîng góm nyhit lhum, haù maumang lagyo nyhit yuq lé byí ri. ⁸ Garai Gasâng é hpungwup shinggang eq hpungwup a-tsâm é yanmai, haù noqkuq yhûm gi, myihkau

† 14:20 180 déng gi, Grik pé é stadia 1600 kô bo ri.

byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhúm haú má ó yuq le a wó wâng kó nghut ri.

16

Garai Gasâng É Nhkmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq é mù, haú Garai Gasâng é nhkmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhúm mai hté mó èq taí é lé, ngò wó gyô ri.

² Haú hkún, sâng-hí yuq nghù râ maumang lagyo gi, htoq é mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achayq achyut é eq hkê-nho dik é, yapieq ana dap tô bùm bê nghut ri.

³ Í yuq nghù râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shí byuq bê nghut ri.

⁴ Sum yuq nghù râ maumang lagyo gi, yhâng é góm lé, wuìlàng pé eq wuìbùm pé má hut hkyô kat jáng, haú pé gi, sui dut byuq bê nghut ri. ⁵ Haú hkún, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rú nyí nyí é Chyoiyúng Sù ê, Nàng haú su kut jéyáng bê nghut é yanmai, Nàng gi, tengmán Sù nghut ri; ⁶ hkâsu mù gà le, yhangmoq gi, Náng é sân-yúng bang eq myiqhtoí pé é sui lé, lhoq htoq pyám bekó nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. ⁷ Haú hkún, haú hkungga gyap mai,

"Nghut rô! Wum-o a-tsam dik shoq bò Sù Yhumsíng Garai Gasang ê, Nàng jéyáng é hkyô pé gi, tengmán é eq dítngmán é nghut ri."

ga le, taí kat é hté lé, ngò dum wó gyô ri.

⁸ Myi yuq nghù râ maumang lagyo gi, yhâng é góm lé, bui é ahtoq má hut hkyô kat é hkún, bui gi, byu pé lé myí èq nyhê kyuq râ ahkáng wó bê nghut ri. ⁹ Haú mù, yhangmoq gi, nyé dik é eq nyhê kyuq é hui zo luí, wúm shí pé lé up nyí é Garai Gasâng é myíng lé nhíng akó; haú-í yhang hpuzo kólhang, yhangmoq gi, myit le a lhung kó, Garai Gasang lé le a shígyau kó nghut ri.

¹⁰ Ngo yuq nghù râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é míngdán gi, mauchut tuq dut byuq bê nghut ri. Míngbyù wuì gi, yhumsing é shô lé lhang, ngat tân bùm shoq shí-nò jamjau hui zo kôluí, ¹¹ yhangmoq no hpú é eq jéq é ana dap é yanmai, mauhkúng mã é Garai Gasang lé nhíng akó; haú-í yhang hpuzo kólhang, yhangmoq gi, yhangmoq kut é hkyô mai myit a lhung shí kó nghut ri.

¹² Hkyuq yuq nghù râ maumang lagyo gi, yhâng é góm lé, Uhprat wuì mó llang má hut hkyô kat jáng, wuìlàng haú gi, kân byuq luí, haú buíhtoq hkyam mã é hkohkam pé, lé lô râ hkyô dong bê nghut ri. ¹³ Haú hkún, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kó é bang nghut akó. ¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shít kômú, haú wum-o a-tsam dik shoq bò Sù Garai Gasâng é buinyí mó má majan zan râ matú, míngkan gón mã é hkohkam pé lé lhoq tsíng yù râ ga, htoq e ló akó nghut ri.

15 "Wú keq, Ngò gi, hkau sù su jé lé é nghut lhê! Su hí má gungchîn a so rá eq hoq hpu hkyô a lhoq htoq shit sháng gaq ga, yhumsing é wutbu wutnè lé, zúng nyí luí, gying gying kut nyi é sù gi, hkungsô wó nyi ri."*

16 Haù mù, nat haù bang gi, hkohkam pé lé, Hebre myíng đông Armagedon gâ é jowò má, rahá jì tsíng tó akò nghut ri.

17 Nyhit yuq nghû râ maumang lagyo gi, yhâng é góm lé, maulat má hut hkyô kat ri; haù hkûn, haù noqkuq yhùm má é hkohkâm-tanghkuq mai, "Bàn bê!" gâ é htê mó htoq lo ri. 18 Hau htoq agó, lhap hpyát, é myíng hùm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haù su nún é eq haù-í htan é gi, a joq wú shí é nghut lhê. 19 Haù mù, haù myuq mó gi, sùm hkyam byak goq byuq luí, mingdán pé má é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing bying shoq bo é góm lé shuq nhâng bê nghut ri. 20 Zinlóng hkangmó gi, hpang byuq bê nghut luí, bùm pé le byuq byuq bê nghut ri. 21 Haù hkûn, myi xê joí kô lai é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuîhke jamjaù é wúm nghut é yanmai, byu pé gi, Garai Gasang lé nhíng bum akò nghut ri.

17

Shiwa Myhí Mó É Hkyô

1 Haù góm nyhit lhum chung tô é maumang lagyo nyhit yuq má é rayuq gi, lé lô mù, "Lé aq, haù wui myo myô pé htoq má zung tô é shiwa myhí mó lé dam byi rá hkyô, ngò, nang lé tún shit bá. 2 Myidàm htoq má é hkohkam pé gi, yhang eq rahá ashop é đông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyô é tsibiyiq wing lé shuq wut bùm bekô nghut ri." ga luí, ngo lé tai ri.

3 Haù mù, maumang lagyo haù gi, Woi-nyí má, ngo lé yoso shut shuî wang e lô ri. Haù ulhum nyhit lhum eq hkyuî raxê lhum dap luí, tai hpoí é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri. 4 Myiwe myhí haù gi, me me dut é eq zam zam ne é mebu wut luí, hîng, lungsêng, palhé pé èq mhôn chung ri; yhâng é loq má gi, yhâng é myiwe yuqgè nyi zô lhum hkyô é agot a-ù hkyô eq achayut é zé pé byíng tô é hîng góm ralhùm chung tô ri.

5 NIK DIK É HKYÔ, MYIDÀM HTOQ MÁ É ACHAQ ACHYUT HKYÔ PÉ EQ

SHIWA MYHÍ PÊ É YHÂNGNU, BABELON MYUQ MÓ.

gâ é myíng gi, yhâng é ngelang má kê tap tô ri. 6 Myiwe myhí haù gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haù mù, ngò gi, gyai yhang maù byuq é nghut lhê. 7 Haù hkûn, maumang lagyo haù ngo lé tai é gi, "Nàng, haì mù maù lhê lú? Myiwe myhí haù eq, yhang jì tô é, ulhum nyhit lhum eq hkyuî raxê lhum dap é tân jung dusak é zâu tô é hkyô lé, ngò, nàng lé tai kyo rá nghut lhê. 8 Nàng myàng é tân jung dusak haù gi, hí hkûn nyi wú bê, ahkuí a nyi lo, nghut kôhang, nik dik htûm é Lasang-dong mai htoq lô mù, htên byoq é hui rá nghut lhê. Mau htoq xâng hkun mai, asak jihpán laiká buk má myíng a kê tô é, myidàm htoq má nyi é bang gi, tân jung dusak haù lé myàng kô é hkûn, maù byuq bùm kô rá nghut

* 16:15 Dang shí hkun gi, Yesuq tai é dang nghut lhê.

lê. Hkâsu mù gâ le, haû gi, nyi wú bê, ahkuî a nyi lo, nghut kôlhang, dum lé râ nghut é yanmai nghut ri.

⁹ Hpaqchyî byéng-yá bo é nyan gi, shî má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuî nyi to ashî; myit tô é rayuq gi, a jé lé shî nghut ri; haû yuq jé lé é hkûn, yhang gi, ahkyíng razup zo za wó nyi râ nghut lê. ¹¹ Hí hkûn nyi wú bê, ahkuî a nyi lo dut é tân jung dusak haû gi, shit yuq nghû râ hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lê.

¹² Haû nàng myàng é hkyuí raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yù kó râ nghut lê. ¹³ Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó râ nghut lê. ¹⁴ Yhangmoq gi, haû Sauzo lé majan chô m zan kó râ nghut lê; nghut kôlhang, Sauzo haû gi, yhumsing pè é Yhumsing eq hkohkam pè é Hkohkâm nghut é yanmai, yhangmoq lé ung pyám râ nghut lê. Haû Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

¹⁵ Hau htâng, maumang lagyo haû ngo lé dum taí é gi, "Nàng myang é, shiwa myhí zung tô é wui pé gi, byù myú pé, byù ajùm ayò pé, mingdán pé eq myíng lhumjup nghut ri. ¹⁶ Haû nàng myang é tân jung dusak eq hkyuí raxê lhum gi, shiwa myhí haû lé a jú kut kó râ nghut lui, yhâng é sutzè banshoq shang yu pyám byi mù, mebu lháng a dap loshoq achindum kut to kó râ nghut lê; hau htoq agó, yhâng é sho lé zo lui, myí èq nyhê hkyô pyám kó râ nghut lê. ¹⁷ Hkâsu mù gâ le, Garai Gasang gi, haû bang mai, i-myt rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sú nghut ri. Haû mù, yhangmoq gi, Garai Gasâng é mungdang lhoq dik é hkûn jé shoq, haû su kut kó râ nghut lê. ¹⁸ Nàng myang é myiwe myhí haû gi, myidàm htoq mã é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotù rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut lui, haû myidàm htoq lé, yhâng é hpungwup èq duqbó to byi ri. ² Yhang, hté mó o mó èq garù taí kat é gi,

"Babelon myuq mó gi, lêng gyop bê, lêng gyop bê!

Myuq haû gi, nat gâng pè é yhùm eq agè ashop é nat hkangmó é hkyûng dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

³ Hkâsu mù gâ le, haû byù myú lhunglháng gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mã é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mã é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

⁴ Hau htâng, mauhkûng mai htoq lo é htê gotû lé ngò dum wó gyô é gi, "Ngá é byu pé è, myuq hau é mara pé má nungmoq a bo lòm râ matú le, yhâng é wúm pé lé nungmoq a hui zo kó râ matú le, haû mai hân hphang htoq lò keq;

⁵ hkâsu mù gâ le, yhâng é mara gi, mauhkûng htung shoq bum zang to bê nghut luí,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq.

Yhang nyhó byí é góm má, í tú taû nyhó byi keq.

⁷ Yhang gi, yhumsing gùng lé yhumsing lhoq gyaû yû luí, ladu lai shoq gón kún nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut;

hkâ-nhâm le iyon hui râ a nghut.' ga gumrong nyi ri.

⁸ Haû mù luí, yhâng é wúm nghu é shí hkyô, iyon hkyô eq mutmó gyó hkyô gi,

ra-nyí bui má za, yhâng chyáng jé râ nghut lhê.

Hau htoq agó, yhang gi, myí èq nyhé hkyô pyâm é lé hui râ nghut lhê;

hkâsu mù gâ le, yhang lé jéyáng é, haû Yhumsing Garai Gasang gi, wum-o a-tsam bò Sû nghut ri.

⁹ Haû yhang eq rahá myiwe yuggè nyi zô lhum hkyô kut shut é eq yhâng é ladu lai shoq gón kún hkyô má bo lom é, haû myidàm htoq mâ é hkohkam pé gi, yhang lé nyhé hkyô é myihkau lé myàng kôjáng, ngaubyi ngau-nhap eq iyon yôn é hui bùm kó râ nghut lhê. ¹⁰ Yhangmoq gi, yhang no jamjau nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkying hkum ralhum má za, dam byí é hkyô gi, náng chyáng jé bu-nhung!

ga luí, taí garu kó râ nghut lhê.

¹¹ Myidàm htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é hui kó râ nghut lhê; hkâsu mù gâ le, yhangmoq é gai zè lé, ó yuq le a wui byi lo kô é yanmai nghut ri. ¹² Gai zè haú pé gi, hîng, ngùn, lungsêng eq palhé, nú-nhâm é pán, me me dut é pán, lai hkying eq zam zam ne é pán; namngón jung sik ajung jung, maguí zúí lé saí é, guloq hpaû jung sik lé saí é, gyi lé saí é, shamtoq lé saí é, luq hpyû lé saí é jung aja jà nghut ri. ¹³ Hau htoq agó, changhpyik gâm, xunmán, namngón jung, mura, loban, tsibiyiq wing, tsanlun xú, mún eq sungsó, nojúng eq sau, myang eq myanglhêng pé; byú é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhâm le dum wó taû yû râ a nghut.' ga taí kó râ nghut lhê. ¹⁵ Gai zè haú pé lé ung luí, yhâng chyáng mai sutzè wó yu é byú pé gi, yhang hpuzò é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé

mhôn tô é myuq mó gi, dingnyé wó ri-nhung! Dingnyé wó ri-nhung!

17 Hkyíng hkum rahkum má za, haû-í yhang wó é sutzè pé htên byoq byuq bu-nhung!

ga tái kó rà nghut lhê.

Wuì-sanghpo agyì yuq hkangmó eq wuì-sanghpo mai jón wún é bang ban-shoq, wuì-sanghpo hkâng bang eq wuìshuq lung-aû mai wam baú hkyô wó yu é bang banshoq gi, we we má yap to kômù, ¹⁸ myuq haû nyé gyó nyi é myihkau lé myàng kôjáng, 'Myuq mó shí eq pûng é myuq gi, hkâmá joq shirâ lúh?' ga tái garu kó rà nghut lhê. ¹⁹ Yhangmoq gi, yhumsing é ulhum má hpuilhup kyaq gyun mù, ngaubiyi ngau-nhap eq iyon yon uchyang,

'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aû má wuì-sanghpo pé wó é bang gi, yhâng é sutzè pé é yanmai, sutzè wó bum akô.

Nghut kôllhang, hkyíng hkum rahkum má za, htên byoq hkyô gi, yhâng chyáng jé bu-nhung!

20 Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoi pé ê, hkye gabú keq!

Hkâsu mù gâ le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.'

ga tái kó rà nghut lhê." gâ ri.

²¹ Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yû mù, wuìshuq lung-aû má dú hkyô kat luí, tái é gi,

"Haû Babelon myuq mó gi, haû su kut wum kat dú hkyô pyâm é hui rà nghut luí,

hkâ-nhám le dum myàng rà a nghut lo.

22 Haû tíng bat é bang, dat gó dat ye é bang, sampyí mut é bang eq tut mut é bâng é htê lé,

náng chyáng hkâ-nhám le dum wó gyo lo rà a nghut.

Loq hpaqchyí ajung jung kûng é byù lé, náng chyáng hkâ-nhám le dum myàng lo rà a nghut.

Luqluí luí é htê lé, náng chyáng hkâ-nhám le dum wó gyo lo rà a nghut.

23 Haû myibung duq é myishâm lé, náng chyáng hkâ-nhám le dum wó duq lo rà a nghut.

Myisik lusik é htê lé, náng chyáng hkâ-nhám le dum wó gyo lo rà a nghut.

Náng é hpugá byù pé gi, mingkân é byù mó pé nghut ri.

Náng é myoqheq hpaqchyí èq mingdán banshoq mâ é bang lé, hkyô shuí nghoq bê nghut ri.

24 Haû myiqhtoi pé é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkûng htoq má, byù ajùm ayò garú é htê mó su gâ é lé, ngò wó gyô é gi,

"Haleluya!"

Hkyi yù hkyô eq hpungwup shingkang, a-tsam gi, nga-nhông é Garai Gasang eq sêng é nghut lhê.

² Hkâsu mù gà le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mã é bang lé, haù yhâng é ashop é đông gungsho zùm yap é hkyo eq mara kut shut nhang é shiwa myhí mó lé, mara byi luí,

Yhâng é dui-nhâng zoshâng wuì é sui yuichyîn dam byi bu-nhung ô!"

gâ ri.

³ Dum radàm, yhangmoq taí garu kô é gi,

"Haleluya!"

Myuq hau é myihkau gi, pyat dedu ahtum abyuq ru ìng doq nyì sháng gaq ô!" gâ bum akô nghut ri.

⁴ Haù suwún í xe myi yuq eq dui é dusak myí du gi, haù hkohkâm-tanghkuq má zung tô é Garai Gasang lé paí gop luí, noqkuq uchyang,

"Amen, Haleluya!"

ga, taí garù bum akô.

⁵ Haù hkûn,

"Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!

Nga-nhông é Garai Gasang lé, hkya-on kungtôn keq ô."

gâ é htê, haù hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wuì myo myo mying hùm é htê su ga, maugum mó é htê su ga, taí garù é htê lé ngò wó gyô é gi,

"Haleluya!"

Hkâsu mù gà le, wum-o a-tsam dik shoq bò Sù nga-nhông é Yhumsing Garai Gasang gi, up nyi ri.

⁷ Nga-nhông gi, ngón gabù luí, Yhâng é hpungwup shingkang lé lhoq gyaú sháng ô!

Hkâsu mù gà le, haù Sauzo myiháng poi gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut rã matú, Yhang lé byí to bê nghut ri."

gâ ri. (Nú-nhâm é mebu haù gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haù Sauzô é myiháng zoshuq poi má jì yu é huì bang gi, hkungsô wó nyi ri.' nghù ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

¹⁰ Haù hkûn, ngò gi, yhang lé noqkuq rà nghù, yhâng é hkyí wang má paí gop kat é nghut lhê. Nghut kôlhang, yhang gi, "Haù su hkâkut! Ngò gi, nàng eq haù Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gà le, Yesuq é hkyô lé saksé hkâm é gi, myiqhtoi htoí é Woi-nyí é myit đông nghut ri." ga, ngò lé taí hkûm ri.

Myang Hpyù Jì To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyù radu nyi tô é lé le, myang ri. Myang hpyù haù má jì tô é gi, Lhumzui eq

* 19:1 Haleluya gâ é gi, Hebre myíng đông, "Yhumsing Garai Gasang lé hkya-on kungton lhê" gâ é dang nghut ri.

Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri. ¹² Yhâng é myoqji gi, myishâm su dut mù, Yhâng é ulhum má gi, janmaú myo myo tsung tô ri. Yhang mai lai luí, ó yuq le a bo sê é mying, Yhâng chyáng kâ tap tô ri. ¹³ Yhang gi, sui má jum yù bê nghut é buhíng radung wut to luí, Yhâng é mying gi, Garai Gasâng é mungdang gâ ri. ¹⁴ Haú mauhkung gyè pé gi, hpyu é eq sanséng nú-nhâm é mebu wut mù, myang hpyú ji kôluí, Yhâng htâng má châng bum akò nghut ri. ¹⁵ Byù myù haú pé lé zan rá matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up rá nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik rá nghut lhê. ¹⁶ Hkohlkâm pé é Hkohlkâm eq yhumsing pé é Yhumsing gâ é mying gi, Yhâng é buhíng eq Yhâng é tangbaú má kâ tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat má é ngoqzô pé banshoq lé, "Lé keq, Garai Gasâng é zoshuq poi mó matú, lé zup zing keq; ¹⁸ haú hkûn, nungmoq gi, hkohlkâm pé é, gyezaú pé é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pé é, byù mó byù zo pé lhunglhâng é gungsho pé lé, myàng zo kó rá nghut lhê." ga, htê mó eq wut garú tai ri.

¹⁹ Hau htâng, haú tân jung dusak eq myidàm htoq mâ é hkohlkâm eq yhangmoq é gyezô pé gi, haú myang htoq má jì to Sû eq Yhâng é gyezô pé lé, majan zan rá matú chôm zing bùm kô é lé, ngò myang ri. ²⁰ Nghut kôlhâng, haú tân jung dusak gi, chyup yu é hui bekò nghut ri; hau htoq agó, haú tân jung dusak é masat hô lé hkam yù luí, yhâng é alhô lé noqkuq é bang lé, mhaú zo rá matú, tân jung dusak hau é gunglik đông limik kumhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má dù gù dú hkyô kat é hui bekò nghut ri. ²¹ Haú myit gyó tô é bang gi, myang gûng má jì to Su é nhut mai htoq lo é sham eq sat pyâm é hui bekò nghut lui, ngoq pé lhunglhâng gi, haú bâng é gungsho lé, gyi gyi dau dau myàng zô bùm bekò nghut ri.

20

Rahkying Zàn

¹ Dum, maumang lagyo rayuq gi, nik dik htùm é Lasang-dông é zoqshi eq joqtoq tui mó lé, yhâng é loq má chùng mù, mauhkung mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmui gâ é manjung lé, zanwut rahkying lhung to rá matú, chyup tui yù bê nghut ri. ³ Haú mù, maumang lagyo haú gi, rahkying zàn a bying shí é gyoro má, manjung haú, byù myù pé lé a wó mhaú zo sháng gaq ga, nik dik htùm é Lasang-dong má yhang lé dú hkyô hâng kat luí, zoq myhi to mù, hau é ahtoq má dizik htung tô ri. Haú rahkying zàn lai eq, yhang lé, ra yoq zo hpông htoq kat ra rá nghut lhê.

⁴ Ngò gi, haú tarâ jéyáng râ ahko ahkáng wó é bang zung tô bum é hkohlkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyo pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat hô lé a htung tap yù bâng é sobyo pé nghut ri. Yhangmoq gi, dum dui toq mù, zanwut rahkying tup Hkrisduq eq rahá up nyi bekò nghut ri. ⁵ Haú gi, sâng-hí dàm

dum dui toq é hkyô nghut ri. (Shi byuq bê myit gyô tô bang gi, rahkyîng zàn haù a byîng byîng wó dum dui toq kó rà a nghut.) ⁶ Sâng-hî dâm dum dui toq é hkyô má lom é bang gi, hkungsô wó bang eq chyoyúng bang nghut ri. Í dâm nghû rà shi é hkyô gi, haù bang lé up rà ahkáng wó é a nghut; haù bang gi, Garai Gasang eq Hkrisduq é hkyangjông pé dut rà nghut é htoq agó, Hkrisduq eq rahá zanwut rahkyîng tup up kó rà nghut lhê.

Tsadán Htên Byoq Huí É Hkyô

⁷ Rahkyîng zàn haù lai jáng, Tsadán gi, htóng mai nhang htoq kat é hui lui, ⁸ majan zan rà matú, myidâm htoq myi chyûn má nyi é, Goga eq Magoga gá é byu myú pé lé mhaù shuí tsîng yù rà ga, htoq é rà nghut lhê. Byù haù bang gi, wuîshuq lung-aù yàm má é semuí myhó myo kó rà nghut lhê. ⁹ Yhangmoq gi, maumyí htunghtáng hkap shoq chóm yán doq lô kômù, haù Garai Gasâng é byu pé nyi é dap nghut é, Garai Gasang chyitdap é myuq lhîngkyuq má, lé lóm tô bùm bekô. Nghut kôlhang, mauhkûng mai myi gyô lô lui, yhangmoq lé nyhê hkyô pyám bê nghut ri. ¹⁰ Haù tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haù le dú hkyô pyám é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó rà nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhüm eq haù má zung tô é Sû lé, ngò myang ri. Haù mauhkûng eq myigùng gi, Yhâng é hí mai hpang lô bê nghut mù, yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bùm é eq laiká buk pé hpông é lé, ngò myang ri. Asak jihpán laiká buk gá é gotú laiká buk le, hpông tô ri. Haù shi byuq bê bang gi, yhumsîng kut é eq rajung za, laiká buk pé má kâ tô é dông, tarâ doqdan é hui bùm bekô nghut ri. ¹³ Haù hkûn, wuîshuq lung-aù gi, yhang má lúng tô é, shi byuq bê bang lé ap byi lui, haù shi é hkyô eq Moming le, yhangnhik chyáng lúng tô é, shi byuq bê bang lé ap byí akó nghut ri; yuq hkangmó gi, yhumsîng kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haù gi, í dâm nghû rà shi é hkyô nghut lhê. ¹⁵ Asak jihpán laiká buk má, myîng a bo é sù ó yuq nghut kôle, myi nhông haù má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gá le, hí lhê é mauhkûng eq myigùng gi, lai lô byuq bê nghut lui, wuîshuq lung-aù le, dum joq rà a nghut lo. ² Haù hkûn, Chyoyúng Myuq gá é Yerusalem asik gi, lusik é matú mhôn yúng tô é myisik su, hen lajáng yù lui, Garai Gasâng chyáng má é nghut mù, mauhkûng mai gyô lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkúi, Garai Gasâng é nyi jowò gi, xângzo byu pé eq rahá nghut lui, Yhang gi, yhangmoq eq rahá nyi nyi rà nghut lhê. Yhangmoq gi, Yhâng é byu pé dut rà nghut lui, Garai Gasang yhang, yhangmoq eq rahá nyi mù, yhangmoq é Garai Gasang dut rà nghut lhê. ⁴ Garai Gasang gi, yhangmoq é myoq má é ngaubyi lhunglhang lé, sut pyám byi rà nghut lhê. Htângnùng má gi, shî-nò

hkyô, iyon hkyô, ngaubiyi ngau-nhap hkyô eq no hpu hkyô ngû é joq râ a nghut lo; hkâsu mù gà le, hí lhé é hkyô pé gi, laí ló byuq bê nghut ri." gà ri.

⁵ Haú hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyí bê nghut lhé." ga taí lui, "Shí lé kê to aq, hkâsu mù gà le, dang shí pé gi, lumging é dang eq tengmán é dang nghut lhé." ga taí ri.

⁶ Hau htoq agó, Yhang gi, "Háu pé gi, ban kut bê. Ngò gi, Alpha eq Omega nghut lhé; Sâng-hi Awang eq Lô Htâng Sû le nghut lhé. Wui shit sù lé gi, ahpau a dũng é za, asak wuibùm mã é uchyam lé, Ngò byi huq râ nghut lhé. ⁷ Wó ung é sù ó yuq nghut kôle, Garaí é silí wunlí háu pé banshoq lé sîng râ nghut mù, Ngò gi, yhâng é Garaí Gasang dut lui, yhang gi, Ngá zo dut râ nghut lhé.

⁸ Nghut kôlhang, gyuq myit bò bang, a lumjing bang, achay achyut dut bang, byù sat bang, ashop é đông gungsho zùm yap é hkyô shut é bang, myoqheq hpaqchyí kut é bang, hpará noq é bang eq mhaú bang lhunglhâng é jowò gi, háu hang myi duq nyi é nhông nghut râ nghut lhé. Haú gi, í dâm ngû râ shí é hkyô nghut ri." ga ngo lé taí ri.

⁹ Lô htâng é wúm nyhit jung bying tô é góm nyhit lhum chung tô é maumang lagyo nyhit yuq mã é rayuq gi, lé mù, "Lé aq, háu Sauzô é yhangmyi gà é myisik lé, ngò tún shit râ nghut lhé." ga ngo lé taí ri. ¹⁰ Hau htâng, yhang gi, ngo lé Woi-nyí mai bùm myhâng mó ralhum má shuí jé lui, Garaí Gasâng chyáng mã é nghut mù, mauhkũng mai gyó lé lo é, háu Chyoiyung Myuq gà é Yerusalem lé tún shit ri. ¹¹ Myuq háu gi, Garaí Gasâng é hpungwup shing kang hù é htoq agó, háu maubó gi, hpaú dik é huhpé lungsêng su dut lui, myoqjâm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum háu pé má, maumang lagyo raxe í yuq zúng tô ri. Hau htoq agó, Israelaq byù myú raxe í hu é mying lé, hkum háu pé má kê tap to bum ri. ¹³ Hkum háu pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsung shut sùm lhum kut hpông tô ri. ¹⁴ Myuq xêwâm háu gi, awang raxe í lhum eq hí tô é nghut lui, awang háu pé má, Sauzô é lagyo raxe í yuq é mying dap tô bum ri.

¹⁵ Háu ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hing jâm-yang ralhum chung tô ri.

¹⁶ Myuq háu gi, myi chyũn dut mã é nghut lui, hing hpyang làm hpyang rawuí wuí za dut mã é nghut ri. Maumang háu gi, myuq lé jâm-yang hau eq kê wú é hkũn, hing hpyang, làm hpyang, myhâng hpyang banshoq 1400 dêng* kô bo ri; ¹⁷ yhang gi, háu byù kê é jung eq wuí é maumang lagyo é kê jung lé chũng mù, myuq xêwâm lé kê wú é hkũn, rasho myí xê myi dũng bo ri. ¹⁸ Myuq xêwâm háu gi, huhpé lungseng eq saí é nghut ri; myuq gi, hing gyíng eq saí é nghut mù, myoqjâm su yhang sân-yúng ri. ¹⁹ Myuq xêwâm háu é awang pé gi, hpau jung lungsêng ajung jũng eq mhôn tô é nghut ri. Sâng-hí lhum gi, huhpé lungseng eq, í lhum ngû râ gi, nila (mauhkũng nyui su dut jung) lungseng eq, sùm lhum ngû râ gi, mahuya (noq é isâm myo jung) lungseng eq, myí lhum ngû râ gi, myaq (huí nyui nyui é jung) lungseng eq, ²⁰ ngo lhum ngû râ gi, nyháu myoqjí su dut jung lungseng eq, hkyuq lhum ngû râ gi, pate-mya (nè é jung) lungseng eq, nyhit lhum ngû râ gi, huí muí muí é su dut jung lungseng eq, shit lhum ngû râ gi, myek-yoi (wuimau nyui su dut jung) lungseng eq, gaú lhum ngû râ gi, utohpaya (bó huí huí é jung) lungseng eq, raxe lhum ngû râ gi, mahuya nyui lungsêng eq, raxe ralhum ngû râ gi,

* 21:16 1400 dêng gi, Griq pé é stadia 12000 kô nghut ri.

wakintu (mhan-haq nyui eq mauhkûng nyui nyhò tô é su dut é jung) lungsêng eq, raxe í lhum nghû râ gi, (me me dut é jung) htihtu-nila lungseng eq mhôn tô ri. ²¹ Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm eq saí é nghut ri. Haû myuq é hkyô mó gi, hng jet eq saí é nghut lui, myoqjâm su duq san é hkyô nghut ri.

²² Ngò gi, myuq haû má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsing Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³ Haû Garai Gasang é hpungwup shingkang gi, myuq haû má duqbó byí é htoq agó, Sauzo gi, myuq hau é myibung nghut é yanmai, myuq haû má gi, bui eq lhamó tsô byi a ra nghut ri. ²⁴ Haû byû myû pé gi, myuq haû duqbó é hkaû má hkyô wó so kó râ nghut lhê; haû myidâm htoq má é hkohkam pé gi, yhangmoq é hkikhkâm hkyô lé, myuq haû má yù lé kó râ nghut lhê. ²⁵ Myuq haû má gi, myín nghû é a joq é yanmai, myuq hkum myhí é le joq râ a nghut lo. ²⁶ Haû byû myû pé é hpungwup shingkang eq aróng lé, myuq haû má yu lé kó râ nghut lhê. ²⁷ Myuq haû má, a sansêng é hkyô hai le wó wàng râ a nghut é htoq agó, hoq hpu hkyô eq mhaû zô é hkyô kut é sù ó yuq le wó wàng râ a nghut; haû Sauzo é asak jihpán laiká buk má mying bo é bang za wó wàng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzo é hkohkâm-tanghkuq mai yui htoq lô lui, myuq hkaû má é hkyô mó gûng dông yui lô é, myoqjâm su sân-yúng é asak wuì mó lâng lé, maumang lagyo haû, ngo lé tún shit ri. ² Wuilàng í hpoq é má, ashí raxe í myû zuí é asak shigâm yuq tô é nghut lui, lhohkyap hkangmó ashí zuí ri. Hau htoq agó, shigâm haû pé má é ahaq pé gi, byû myû pé lé yâ gè râ matú nghut ri. ³ Nhing é hai le a joq lo râ nghut lhê. Garai Gasang eq Sauzo é hkohkâm-tanghkuq gi, myuq hkaû haû má joq nyi râ nghut mù, Yhâng é dui-nhâng zoshâng wuì gi, Yhang lé noqkuq dojaú kó râ nghut lhê. ⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é mying kê tap é hui kó râ nghut lhê. ⁵ Myín nghû é le joq râ a nghut lo. Myibung duqbó byí é le, bui tsô byí é le, yhangmoq ra kó râ a nghut lo, hkâsu mù gâ le, haû Yhumsing Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haû gi, ngo lé, "Dang shí pé gi, lumging é dang eq tengmán é dang nghut lhê. Myiqhtoí pé é woi-nyí lé up é Yhumsing Garai Gasang gi, adé myáng má dut lò râ hkyô pé lé, Yhâng é dui-nhâng zoshâng wuì lé tún shit râ matú, Yhâng é maumang lagyo lé nhang kat é nghut ri." ga tai ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haû hkyô pé lé wó myàng wó gyô é sù gi, ngò Yohan nghut lhê. Ngò gi, haû hkyô pé lé wó myàng wó gyô é hkûn, ngo lé, shí hkyô pé tún shit é maumang lagyo é hkyí wang má noqkuq râ matú paí gop é nghut lhê. ⁹ Nghut kôhang,

* 22:7 Dang shí hkun gi, Yesuq tai é nghut lhê.

yang gi, ngo lé, "Haù su hkâkut! Ngò gi, nàng eq le, náng é gumang myiqhtoi pé eq le, laiká shî mã é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga tai ri.

¹⁰ Hau htâng, yang gi, "Laiká shî mã bo é myiqhtoi dang pé lé, hkâzaú to lo, hkâsu mù gà le, haù ahkyíng gi, chyáng lò bê nghut ri. ¹¹ A dingmán é sù gi, a dingmán é đông xoq kut nyí sháng gaq; a sansêng é sù gi, a sansêng é đông xoq dut nyí sháng gaq; dingmán é sù gi, dingmán é đông xoq kut nyí sháng gaq; chyoyúng é sù gi, xoq chyoyúng nyí sháng gaq." ga ngo lé tai kyô ri.

¹² "Wú keq, ngò gi, a myáng má jé lé lô rà nghut lhê! Ngò gi, yuq hkangmó lé, yhumsing kut é eq rajung za byi rà shigyaù chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htáng Sù le nghut lhê.

¹⁴ Asak shigâm má jé rà eq myuq hkaù shut hkúmdong mai wó wang jé rà ahkáng wó yù shoq, yhumsing é buhîng lé chî sân é bang gi, hkungsô wó nyi ri. ¹⁵ Shinggan má gi, hkui đông nyi é bang, myoqheq hpaqchyí kut é bang, ashop é đông gungsho zùm yap é hkyô shut é bang, byù sat é bang, hparà noq é bang eq mhaù é hkyô lé ô naù luí châng kut é bang lhunglhang nyi bum akò nghut ri.

¹⁶ Ngò, Yesuq gi, haù noqkuq hpùng pé lé, shí hkyô pé saksé hkâm shit sháng gaq nghù, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haù duqbó é Bó-myhù le nghut lhê."† gá é lé, ngò wó gyô ri.

¹⁷ Haù Woi-nyí eq myisik gi, "Lé aq!" gâ akò. Haù wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuì lé, shuq sháng gaq.

¹⁸ Laiká shî mã bo é myiqhtoi dang pé lé wó gyô é bang yuq hkangmó lé, ngò sidiq byí é gi: dang haù pé mã, rajung jung kat jat é sù ó yuq chyáng nghut kôle, Garai Gasang gi, laiká shî mã kê tô é wúm pé lé jé nhâng rà nghut lhê. ¹⁹ Myiqhtoi laiká shî mã bo é dang pé lé, yu pyâm é sù ó yuq lé nghut kôle, Garai Gasang gi, laiká shî mã kê tô é asak shigâm eq chyoyúng myuq mã é yang eq sêng é gû lé, yu pyâm byi rà nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô rà nghut lhê." ga tai ri.

Amen. Yhumsing Yesuq ê, lé lô aq ô!

²¹ Haù Yhumsing Yesuq é jeju gi, Garai Gasang é byu pê chyáng joq nyí sháng gaq ô! Amen.

† 22:16 Dang shí hkun gi, Yesuq tai é nghut lhê.